

माओ त्से तुंग

ना संकलित रचनांग

ग्रंथ 5



अनुवाद - जनी

दुनिया ता मजदूर उंदी आयमूट!

दुनिया ता मजदूर उंदी आयमूट!

माओ त्सेतुंग
संकलित रचनांग
ग्रन्थ-5

पहली गोंडी संस्करण 2024



5 | माओ त्से तुंग संकलित रचनांग, ग्रंथ 5

माओ त्से तुंग संकलित रचनांग, ग्रंथ 5

पहला हिंदी संस्करण 2002 दिल्ली

प्रोग्रेसिव पब्लिकेशन, दिल्ली

पहली गोंडी संस्करण -2024

जंगोम प्रेस

अनुवाद जनी

Mao Tse Tung Sanklit Rchanag, Vol 5, Translated by Jani



毛澤東

प्रकाशक ना बगिल तल

महान नेताल ओसो शिक्षक माओ त्सेतुंग ना रचनांग मार्क्सवाद-लेनिनवाद ता बस्के मुटवा लेवा स्मारक लेक्का आंदुर। माओ त्सेतुंग ना संकलित रचनांग ना मुन्नेटा नालुंग ग्रंथ कुना लोप्पा मार्च 1926 तल 16 सितम्बर 1949 एवनल ता महत्वपूर्ण रचनांग शामिल मत्तांगा। इव रचनांग किन ओरु चीन ता नवजनवादी क्रांति ता अलग-अलग कालम ते रास्तोरा। विदेशी भाषा प्रकाशन गृह, पेकिंग 1969-1776 ते इव नालुंग खंड कुना प्रकाशन कित्ता।

सितम्बर 1976 ते कामरेड माओ त्सेतुंग शहीद आता पेरके अप्रैल 1977 ते चीन कम्युनिस्ट पार्टी माओ त्सेतुंग ना रचनांग कुना पांचवा अंग्रेजी ग्रन्थ तुन प्रकाशित कित्ता। इद ग्रंथ ता ‘प्रकाशकनोरा बगिल तल नोट’ लोप्पा पेरकेटा रचनांग मुन्ने वायना ग्रंथ कुना लोप्पा प्रकाशित आयनुंग इंजी रास्तद मंता। मति सत्ता पोरो गद्दारी बनेमात्ता तेंग श्याओ-पिंग ना नेतृत्व ते पूंजीवादी कब्जा आतांकु चीन कम्युनिस्ट पार्टी संशोधनवादी पार्टी बनेमाता। अद्रमासी पिस्ता ग्रंथ कुना प्रकाशन रोमतू। पांचवा ग्रंथ ता हिंदी अनुवाद वेने प्रकाशित किताद हिल्ले। मति 1990-1994 एवनल माओ त्सेतुंग ना संकलित रचनांग ना ग्रंथ 6 तल ग्रंथ 9 एवनल भारत ते “क्रांति प्रकाशन” ओसो “श्रमिक प्रकाशन” अंग्रेजी ते प्रकाशित कित्ता, बारांकु इत्तेके माओ त्सेतुंग ना रचनांग अन्तरराष्ट्रीय सर्वहारा वर्ग ओसो सब्बे देश कुना क्रांतिकारी जनता काजे अमूल्य सम्पत्ति आंदू।

इद ग्रंथ पीपुल्स पब्लिशिंग हाऊस, पेकिंग ता अंग्रेजी प्रकाशन “सेलेक्टड वर्क्स ऑफ माओ त्सेतुंग” ता पांचवा ग्रंथ ता हिंदी अनुवाद आंदू। इद ग्रंथ लोप्पा सितम्बर 1949 तल 1957 एवनल रास्ता महत्वपूर्ण

रचनांग शामिल मंतांग। इवु समाजवादी क्रांति, समाजवादी निर्माण कालम ता लेख कु आंदुंग। इद कालम ते सिद्धांत लोप्पा कामरेड माओ त्सेतुंग ना महान देन “भौतिकवादी द्वंद्ववाद ता मौलिक सिद्धांत” विपरीत तत्व कुना एकता संगे समाजवादी समाज लोप्पा अन्तरविरोध, वर्ग ओसो वर्ग संघर्ष ता विश्लेषण आंदू; ओसो तन्ना समाजवादी समाज लोप्पा विकास ता नियम कुना खोज ओसो सर्वहारा तानाशाही ता क्रांति जारी तासना महान सिद्धांत ता रचना आंदू।

इव रचनांग लोप्पा कामरेड माओ त्सेतुंग पहली बेरा वैज्ञानिक सिद्धांत ता खोज कित्तोर। इदिना लोप्पा उत्पादन साधन कुना पोरो अधिकार बुनियादी रूप ते समाजवाद वात्ता पेरके वेने सर्वहारा ओसो पूंजीपति वर्ग नडुमा ता संघर्ष, समाजवादी हरीं ओसो पूंजीवादी हरीं नडुमा संघर्ष मंदिता इंजी वेहतोर। ओरु समाजवादी क्रांति ओसो समाजवादी निर्माण किन मुन्ने ओयना चीन कम्युनिस्ट पार्टी लोप्पा संशोधनवादी विचार कुना विरोध कीयाना, स्तालिन ना पेरके सोवियत संघ ता दलत्यागी गुट ओसो आधुनिक संशोधनवाद विरुद्ध, साम्राज्यवाद ओसो सब्बे देश कुना प्रतिक्रियावादीरा खिलाफ संघर्ष कुना लोप्पा चीन कम्युनिस्ट पार्टी अनि चीनी जनता ना नेतृत्व ते कित्तोर।

इव सब्बे संघर्ष कुनल दोरकता व्यवहारिक अनुभव कुना पोरो आधार आसी विकसित कित्ता कामरेड माओ त्सेतुंग ना विचारधारा दर्शनशास्त्र, राजनीतिक अर्थशास्त्र ओसो वैज्ञानिक समाजवाद लोप्पा मार्क्सवाद-लेनिनवाद ता हथियार किन ओसो ज्यादा विकसित कित्ता।

इद स्थाई रूप ते जनता किन काम वासोरे दुनिया लोप्पा हमेशा जिंदा मंदियार।

प्रोग्रेसिव पब्लिकेशन

मार्च 2001

इद माटा हिंदी प्रकाशक नोरगडल रास्तद मत्ता अनु.

अनुवादक ना बगिल तल

11-12 साल उमर ते मंदानास्केटल बेहरोर वड़कना पोल्लॉग केंजसोरे बेरसताना। बेरसोरे दायना संगे इव पोल्लॉग कुन पाटांग ओसो भाषण कुना लोप्पा वेने केंजा वात्ता। नन्ना सुडलास्केटल मंदाना नाटे ओसो नावा नालुंग बगिल ता वातावरण लोप्पा इद्रम ता बेहरा-बेहरा ओसो मावा रोज ता पिस्वल संगे जुडेमासी मत्ता पोल्लॉग केंजवा मत्तांकु, नावा लोप्पा इविन पुंदाना गिर्दा बेरससोर हत्ता। नावा काजे इव वेल्ले पूना पोल्लॉग मत्तांग।

सिर्फ केंजसिए बदे पोल्लो तुन पुंदाला कोशिश कियाना वेल्ले मुशिकल मंता। बारांकु इत्तेके हर बेरा, हर विषय, हर सवाल ता जवाब हियाला काजे वरोर सही मानेय संगे मदाना मुशिकल मंता। अदिनके नन्ना उचुन पढ़ेमायला अनि रासिला करियताना।

नावा इद यात्रा लोप्पा वेल्ले लोकरा योगदान मंता। सबसे मुन्ने नावा यायाल मंता, अदु नाकिन कम से कम साईन कियानाचोन स्कूल करियाना इंजी सपना हूड़ता। मति अदिना सपना अदु हूड़ता लेक्का पूरा आया परवो आत्ता। बारांकु इत्तेके उंदी पेरके अरसी मत्ता इलाका ओसो नाटे स्कूल-कालेज पढ़ाई ता रिवाजे हिल्ले। इदिनकु बेहरा समस्या गरीबी ते पिस्वल पिस्नदु मंता।

इद्रम ता परिस्थिति ते मंदानास्के नावा पिस्वल लोप्पा वरोर गुरुजी वात्तोर, नावा जीवा ता 'दादाल', नावा गुरुजी। ओरु नाकिन ओरा वेल्ले कीमती समय तिंची नावा काजे समय तेंडानोर, नाकिन प्राथमिक शिक्षा हियानोर, नाकिन जीवा कियानोर। नावा जीवा गरे मत्ता 'मीना' दीदी नाकिन हिंदी भाषा रास्ला ओसो पढ़ेमायला करिहत्ता। इदे आयवा 'गोड़ा ते ताकना स्कूल' ता वेल्ले योगदान मंता। इदे आयवा बच्चोनों दादा-दीदीरा योगदान मंता। इव सब्बे पुस्तकिंग अनुवाद कीसोरे ओर सब्बे तोरकिन नन्ना सुरता कीदान। ओरा लोप्पा बच्चोनों जन इंजे माकिन विड़िसी हत्तोर। वेर सब्बेतोर इद यात्रा लोप्पा नावा संगे मंदानोर, ओसो वायना कालम ते वेने नावा संगे मंदानोर। ओरा बारे ते बच्चोने पुस्तकिंग रासमुड़ आयर।

माटांग ओसो पाटांग लोप्पा केंजता पोल्लॉंग, पुस्तक पढ़ेमायनास्के पुस्तक लोप्पा दोरकतास्के नावा गिर्दा तुकू हंदी हिल्ले आत्ता। नावा लेक्का पूना पोल्लॉंग करियाला आल्सानोर ओसो केंजता पोल्लॉंग कुन पुंदाला कौशिश कियानोर वेल्लेतोर मंतोर। मति पोरो नन्ना वेहता लेक्का हर बेरा, हर विषय, हर सवाल ता जवाब हियाला सही मानेय 'जीवा ता दादाल' दोरकना मुश्किल मंता। अदिनके इद साहित्य ता परताचोन हिंदी तिंची गोंडी भाषा ते अनुवाद कियाना इंजी आल्सताना।

मावा गोंडी भाषा वड़कानोर आंध्रा, ओड़िशा, छत्तीसगढ़, महाराष्ट्र, मध्यप्रदेश, उतरप्रदेश लेक्कटा राज्यकुने अलग-अलग जागा ने पिस्सा मंतोर। अदिनके मावा गोंडी भाषा पोरो अलग-अलग राज्यकुना भाषांग ना वेल्ले प्रभाव मंता। नावा गोंडी पोरो हिंदी, मराठी ओसो छत्तीसगढ़ी ता प्रभाव ज्यादा मंता। अनुवाद कियानास्के नाकिन पूना शब्द बने कियाना वेल्ले कटला वात्ता, इत्तेके गोंडी लोप्पा पारिभाषिक शब्द कुन वेहाला शब्द हिल्ले, अदिनके वेल्ले शब्द हिंदी ता इस्तेमाल कित्ताना। वायना कालम ते जनता लोप्पा हंजी ओसो ज्यादा गोंडी ता शब्दकु करियसी इदिन उचुन सुधरे कीमुड़ आयर। मति भाषा ता प्राकृति अनुसार दूसरा भाषा तल शब्द पोयाए लागिता। अनुवाद कियानास्के नन्ना अंग्रेजी ओसो हिंदी रेंडु पुस्तकिंग ना मदद एतित्ताना।

नावा इद कब्बड़ लोप्पा संगे-संगे ताकसोर मत्ता नावा जीवन साथी ना वेन्ने योगदान मंता। वीरु नाकिन इद काम कियाला गिर्दा कींतोर। नावा लोप्पा जीवा मत्तादु सुरता किसींतोर, नावा कै पोयसी ताकिंतोर। वीरु इदिन पुस्तक लेक्का डिजाईन कियाना ओसो प्रूफ कियाला मदद हित्तोर।

इव सब्बे पुस्तकिंग जनता नडुमा ओयला काजे जंगोम प्रेस पोरोल ते उंदी प्रकाशन पोरोल हित्तोमा इद पोरोल मावा वीर पडियोर, गोंड जनता ना हीरो, गड़चिरोली भूमि ता मरी वीर बाबूराव शेड़माके ना सेना तल पोयत्तोमा सब्बे शहीदीर किन सुरता कीसोरे इव सब्बे पुस्तकिंग इंजे मीवाव आत्तांग।

इद यात्रा जारी मंदियर.... इव पुस्तकुना गोंडी अनुवाद, डिजाईन पोरो सब्बेतोरा सुझाव ओसो आलोचनाकुना वेल्ले जरूरत मंता। मीटू ओसो बदे पुस्तक ता अनुवाद कीतेके बेस आयर इंजी वेने सुझाव हीतेके बेस आयर।

जीवा ता जोहार
मीवा - जनी

विषय सूची

प्रकाशक ना बगिल तल	10
चीनी जनता तेदता!	25
21 सितम्बर 1949	
चीनी जनता ना महान एकता जिंदाबाद!.....	31
30 सितम्बर 1949	
पड़ियोर किन हामूर हिल्ले.....	34
30 सितम्बर 1949	
सादा पिस्वल, कठिन परिश्रम ता कार्यशैली पोरो हमेशा नितसी मंदाना..	35
26 अक्तूबर 1949	
धनी किसान लोरा समस्या हल कीयाना बारे ते कार्यनीतिक राय एतला वेहाना	36
12 मार्च 1950	
राष्ट्र ता वित्तीय, आर्थिक परिस्थिति सुधारे कीयाना लोप्पा बुनियादी मोड़ हियाला काजे संघर्ष कीमुट ⁵	38
6 जून 1950	
नोट	46
नालुंग बगिल तल हमला कीयानायो	47
6 जून 1950	

असली क्रांतिकारी बनेमायना	52
23 जून 1950	
नोट	56
मीटु पूरा राष्ट्र काजे आदर्श आंदिर	58
25 सितम्बर 1950	
चीनी जन स्वयंसेवक लोर किन आदेश.....	60
8 अक्तूबर 1950	
चीनी जन स्वयंसेवक लोर किन कोरिया ता हर मेड्डा, हर डोड्डा, हर मर्रा ओसो रोंडा ता उंदी कटिया ता वेने सम्मान कीयाना	62
19 जनवरी 1950	
चीकपा ता केंद्रीय कमेटी ता राजनीतिक ब्यूरो ता विस्तृत मीटिंग लोप्पा स्विकार कित्ता प्रस्ताव ता मुख्य मुद्दांग.....	63
18 फरवरी 1950	
1. तैयारी काजे 22 महिनांग	63
2. अमेरिका आक्रमण ता प्रतिरोध कीयाना ओसो कोरिया ता सहायता कियाला काजे प्रचार, शिक्षा आंदोलन	63
3. भूमि-सुधार	64
4. प्रतिक्रांतिकारीरा दमन.....	64
5. शहरी काम	65
6. पार्टी-सुदृढीकरण ओसो पार्टी-निर्माण.....	66
7. संयुक्त मोर्चा ता काम	67
8. दोष-निवारण आंदोलन	68
नोट	68
प्रतिक्रांतिकारीरा दमन कियाला पार्टी ता जन दिशा किन अमल जरूर कीयाना	70
मई 1951	
प्रतिक्रांतिकारीरा दमन कीयानास्के गट्टिक मंजी, चुकवा लेवा ओसो जीवाकिवा लेवा हमला कीयाना.....	75
दिसम्बर 1950-सितम्बर 1951	

‘ऊ श्युन ना जीवनी’ फिल्म पोरो तेदता वाद-विवाद पोरो गंभीर आसी ध्यान हियाना	80
20 मई 1951	
नोट	82
मूंड जन आंदोलन कुना लोप्पा दोरकी कित्ता महान सफलतांग	83
23 अक्तूबर 1951	
“मूंड गलतिंग” विरोधी ओसो “हेय्युंग गलतिंग” विरोधी संघर्ष ¹ कुना बारे ते	90
नवम्बर 1951- मार्च 1952	
नोट	99
कृषि लोप्पा आपसी सहयोग, सहकारिता काम तुन उंदी मुख्य काम बने कीयाना	100
15 दिसम्बर 1951	
पूना साल ता संदेश	101
1 जनवरी 1952	
तिब्बत लोप्पा मना काम संबंधित नीतिंग बारे चीकपा केंद्रीय कमेटी ता निर्देश	103
6 अप्रैल 1952	
नोट	107
चीन लोप्पा मजदूर ओसो पूंजीपति वर्ग नड़मा ता अन्तरविरोध प्रधान अंतरविरोध आंदू	108
6 जून 1952	
एकता आसी मना ओसो दुश्मन नड़मा स्पष्ट विभाजन-रेखा पिङ्गाटू ...	109
4 अगस्त 1952	
नोट	113
चीनी जन स्वयंसेवक लोरा असाधारण सफलता ता अभिनंदन!	114
24 अक्तूबर 1952	
नौकरशाही, फरमानशाही ओसो कानून लेवेके अनुशासन तोड़ेकीयाना ता विरोध कीमूट	116

5 जनवरी 1953	
हान शोविनिज्म ता आलोचना कीमूट	119
16 मार्च 1953	
“चीड़ता हेय्यंग” समस्यांग ना हल कीमूट.....	121
19 मार्च 1953	
बदे अधिकार हिलवा केंद्रीय कमेटी ता पोरोल ते दस्तावेज जारी कीसी अनुशासन ता उल्लंघन कित्ता कारण ते ल्यू शाओ-ची ओसो यांग शांग-खुन ना आलोचना	125
19 मई 1953	
आम कार्यदिशा तल भटकेमाता दक्षिणपंथी विचार कुना खंडन कीमुट	126
15 जून 1953	
नोट	128
नौजवान संघ नौजवान लोरा विशेषतांग कुन सुरता तासिसी काम कीयाना	129
30 जून 1953	
राष्ट्रीय पूंजीवाद ता बारे ते	137
9 जुलाई 1953	
संक्रमण कालम काजे पार्टी ता आम कार्यदिशा.....	138
अगस्त 1953	
पार्टी लोप्पा पूंजीवादी विचार कुना विरोध कीमुट	139
12 अगस्त 1953	
नोट	151
पूंजीवादी उद्योग ओसो वाणिज्य लोप्पा बदलाव ता सिर्फ उंदी हरीं.....	152
7 सितम्बर 1953	
नोट	155
अमेरिका आक्रमण ता प्रतिरोध कीयाना ओसो कोरिया ता सहायता कीयाना युद्ध लोप्पा मना महान जीत ओसो मना वायना काम	157
12 सितम्बर 1953	
नोट	165

ल्यांग शू-मिंग ना प्रतिक्रियावादी विचार कुना खंडन.....	166
16-18 सितम्बर 1953	
नोट	179
कृषि लोप्पा आपसी सहयोग, सहकारिता बारे ते रेंडु वार्तांग	180
अक्तूबर ओस नवम्बर 1953	
नोट	193
चीन लोक गणराज्य ना संविधान ता ड्राफ्ट ता बारे ते.....	194
14 जून 1954	
नोट	202
उंदी महान समाजवादी देश ता निर्माण काजे भरपूर कोशिश कीयाना...	203
15 सितम्बर 1954	
“लाल भवन ता सपना” बारे ते अध्ययन पोरो चिट्ठी	206
16 अक्तूबर 1954	
नोट	207
चीनी जनता तुन परमाणु बम संगे वेरिय क्रिया परमुड आयो.....	209
28 जनवरी 1955	
चीनी कम्युनिस्ट पार्टी ता राष्ट्रीय सम्मेलन ते भाषण.....	211
मार्च 1955	
उद्घाटन भाषण	211
21 मार्च 1955	
समापन भाषण	216
31 मार्च 1955	
इंजेटा सम्मेलन ता मूल्यांकन	217
पहली पंचवर्षीय योजना ता बारे ते	219
काओ कांग ओसो राओ शू-श ना पार्टी-विरोधी गठजोड ता बारे ते	221
वर्तमान परिस्थिति ता बारे ते.....	230
5. पार्टी 8वी राष्ट्रीय कांग्रेस तुन सफलतापूर्वक केयला काजे पूरा कोशिश कीयाना	231
नोट	235

“लोकमत ता एकरूपता” ता खंडन	236
24 मई 1955	
नोट	240
“प्रतिक्रांतिकारी हू फंग गुट संबंधित सामग्री” ता प्रस्तावना ओसो सम्पादकीय टिप्पणिंग	241
मई ओसो जून 1955	
प्रस्तावना	241
15 जून 1955	241
सम्पादकीय टिप्पणिंग (चुने कित्ता अंशकु)	245
मई ओसो जून	
नोट	250
कृषि ता सहकारी बदलाव कुना बारे ते	252
32 जुलाई 1955	
नोट	283
कृषि ता सहकारी बदलाव ता कार्य पार्टी, लीग ता सदस्य ओसो गरीब, निम्न-मध्यम किसान लोरा पोरो आधार आसी मंदाना.....	285
7 सितम्बर 1955	
कृषि सहकारी बदलाव ता बारे ते वाद-विवाद ओसो वर्तमान वर्ग-संघर्ष	289
11 अक्तूबर 1955	
1. कृषि सहकारिता ओसो पूंजीवादी उद्योग, वाणिज्य ता बदलाव नडमा ता संबंध	290
2. सहकारिता संबंधित सवाल ता बारे ते वाद-विवाद ता सारांश	296
3. सही योजना अनि कारगर नेतृत्व ता सवाल ता बारे ते	299
4. विचारधारात्मक संघर्ष ता बारे ते	305
5. ओसो उचुक सवालकु	310
नोट	320
“चीन ता नाहकुना लोप्पा समाजवादी उभार” ता प्रस्तावकु	322
सितम्बर ओसो दिसम्बर 1955	

प्रस्ताव 1	322
25 सितम्बर 1955	
प्रस्तावना 2	326
27 दिसम्बर 1955	
नोट	330
“चीन ता नहाकुना लोप्पा समाजवादी उभार” पोरो सम्पादक ना टिप्पणिंग	331
सितम्बर ओसो दिसम्बर 1955	
नोट	375
कृषि संबंधित 17 नियमकुना दस्तावेज पोरो राय हियाना अपील.....	377
21 दिसम्बर 1955	
नोट	382
दस्तकारी उद्योग ता समाजवादी बदलाव ता रफतार बेरसी कीमूट	384
5 मार्च 1956	
नोट	388
दस मुख्य संबंध कुना बारे ते	389
25 अप्रैल 1956	
उंदी पक्ष ते बेहरा उद्योग ओसो दूसरा पक्ष ते सुडला उद्योग, कृषि नडमा ता संबंध	390
समुद्र ओदा ता इलाकांग लोप्पा मत्ता उद्योग ओसो लोप्पटा इलाकांग लोप्पा मत्ता उद्योग कुना नडमा ता संबंध	392
आर्थिक निर्माण ओसो प्रतिरक्षा संबंधित निर्माण नडमा ता संबंध.....	394
राज्य, उत्पादन शाखांग ओसो उत्पादन नडमा ता संबंध	396
केंद्रीय अर्थोरिटी ओसो स्थानीय अर्थोरिटी नडमा ता संबंध	401
हान राष्ट्रीयता ओसो अल्पसंख्यक राष्ट्रीयता ना नडमा ता संबंध.....	405
पार्टी ओसो गैर-पार्टी तत्व नडमा ता संबंध	406
क्रांति ओसो प्रतिक्रांति नडमा ता संबंध	409
सही ओस गलत नडमा ता संबंध	414
चीन ओसो बाकी देश कुना नडमा ता संबंध.....	416

नोट	422
अमेरा साम्राज्यवाद कागज ता डुव्वल आंदू	423
14 जुलाई 1956	
पार्टी एकता तुन बेरसी कीयाना अनि पार्टी परम्परांग कुन जारी तासना	429
30 अगस्त 1956	
मना पार्टी ता इतिहास ता उचुन अनुभवकु	445
25 सितम्बर 1956	
डा. सुन यात-सेन ना सुरता ते	454
12 नम्बर 1956	
चीनी कम्युनिस्ट पार्टी ता आठवी केंद्रीय कमेटी ता दूसरा प्लेनरी अधिवेशन लोप्पा हीता भाषण	456
15 नवम्बर 1956	
नोट	481
प्रांतीय, म्युनिसिपल ओसो स्वायत्त प्रदेशीय पार्टी-कमेटींग ना सचिव लोरा सम्मेलन लोप्पा भाषण	482
जनवरी 1957	
18 जनवरी ता भाषण	482
27 जनवरी ता भाषण	496
नोट	531
जनता नड़मा ता अंतरविरोध कुन सही तरीका ते हल कीयाना ता बारे ते	532
27 फरवरी 1957	
भिन्न स्वरूप वाले रेंडु रकम ता अंतरविरोध	532
प्रतिक्रांतिकारीर किन खत्म कीयाना सवाल	549
कृषि ता सहकारी बदलाव ता सवाल	553
उद्योगपतिर ओसो व्यापारिरा सवाल	558
बुद्धिजीविरा सवाल	560
अल्पसंख्यक राष्ट्रीयतांग ना सवाल	563
विस्तृत योजना ओसो सही बंदोबस्त	565

“सौ पुंगार पूयला हीमुट अनि सौ विचारशाखांग लोप्पा होइ आयला हीमुट” ओसो “दीर्घकालीन संगे मंदाना अनि आपसी निरीक्षण” ता बारे ते	566
उचुने मुल कीयाना विद्रोह कुना सवाल कुना बारे ते.....	575
गलत तुन सही ते बदले कियमूडांता या?.....	578
बचत तुन अमल कीयाना बारे ते.....	580
चीन ता औद्योगिकरण ता हरी.....	582
नोट	585
चीनी कम्युनिस्ट पार्टी ता प्रचार-कार्य संबधित राष्ट्रीय सम्मेलन लोप्पा भाषण	586
12 मार्च 1957	
नोट	607
सादा पिस्वल ओसो कठोर परिश्रम पोरो मेलियवा लेवा नितसी मंदाना, जनता संगे घनिष्ठ संबध तासना.....	608
मार्च 1957	
नोट	613
बदलाव आया मंता.....	614
15 मई 1957	
चीनी कम्युनिस्ट पार्टी पूरा चीनी जनता ना नेतृत्व केंद्र आंदू.....	624
25 मई 1957	
दक्षिणपंथीरा तीव्र हमला ता मुहतोड़ जवाब हियाला काजे मना ताकत उंदीकट कीयाना.....	625
8 जून 1957	
“वन ह्वेइ पाओ” ना पूंजीवादी दिशा ता खंडन कीयाना.....	629
1 जुलाई 1957	
पूंजीवादी दक्षिणपंथी हमला ना मुहतोड़ जवाब हीमुट	638
9 जुलाई 1957	
नोट	660
1957 ता एद्दी कालम ता परिस्थिति	661
जुलाई 1957	

नोट	674
क्रांति तुन मुन्ने ओयला कार्यकर्ता बने मायना	675
9 अक्तूबर 1957	
नोट	696
जनता ना बहुसंख्या पोरु भरोसा तासना	697
13 अक्तूबर 1957	
नोट	719
पार्टी एकता ता द्वन्द्व्वात्मक तरीका	721
18 नवम्बर 1957	
सब्बे प्रतिक्रियावादिर कागजी डुव्वल आंदू.....	725
18 नवम्बर 1957	

(1)
समाजवादी क्रांति
ओसो
समाजवाद
निर्माण ता कालम

चीनी जनता तेदता!¹

21 सितम्बर 1949

प्रिय डेलीगेट्स,

पूरा देश ता जनता वेल्ले गिर्दा ते बद राजनीतिक सलाहकार सम्मेलन तुकू केपसोरे मत्ता, अदिना उद्घाटन इंजे आता।

मना इद सम्मेलन लोप्पा चीन ता सब्बे जनवादी पार्टिंग, जन-संगठन, जन-मुक्ति सेना, अलग-अलग प्रदेश, राष्ट्रीयतांग ओसो प्रवासी चीनी लोरा प्रतिनिधित्व कीयाना कुल 600 तुकू ज्यादा डेलीगेट शामिल आया मंतोरा। इदिनगडल मना सम्मेलन पूरा देश ता जनता ना महान एकता किन मूर्त रूप हियाना सम्मेलन आंदू इंजी समझेमाया मंता।

अमेरिका साम्राज्यवाद ता नेय्य प्रतिक्रियावादी क्वोमिंगतांग सरकार किन हारे किया परतांके मनम पूरा जनता ना महान एकता ता बने किया परतोमा। मूंड साल तुकू उचुन ज्यादा टाईम एवनल अमेरिका समर्थन ते मत्ता क्वोमिंगतांग सरकार तुन, 20 लाख तुकू ज्यादा सैनिक लोरा सब्बे आक्रमण कुन हारे कीयाना ओसो लाखों संख्या ते युद्ध मैदान ते मत्ता सेनांग किन हारे कीयाना लेक्कटा बहादुर चीनी जन-मुक्ति सेना लेक्कटा सेना दुनिया लोप्पा वेल्ले कम हूडानिकु दोरकिंता।

तम्मा प्रत्याक्रमण ओसो आक्रमण शुरू कित्ता। इंजे जन मुक्त सेना युद्ध किन थाइवान, क्वांगतुंग, क्वांगशी, क्वेइचओ, सछवान ओसो सिनच्यांग गर्रे ता इलाकांग लोप्पा फैले मासी मंता। अद्रमासी चीनी जनता ना वेल्ले बेहरा संख्या तुन मुक्ति दोरकता। मूंड साल तुकू ज्यादा टाईम ते पूरा देश ता जनता उंदी आसी जन मुक्ति सेना ता समर्थन कित्ता। दुश्मन

¹ चीनी जन राजनीतिक सलाहकार सम्मेलन ता प्रथम पूर्ण अधिवेशन लोप्पा उद्घाटन भाषण

संगे टक्कर एतिसी बुनियादी जीत दोरकी कित्ता, इदिना पोरोने आधार आसी वर्तमान जनताना राजनीतिक सलाहकार सम्मेलन ताकी कित्ताद मंता।

मना सम्मेलन ता पोरोल राजनीतिक सलाहकार सम्मेलन इंजी तासताद मंता। बारांकु इत्तेके मूंड साल मुन्ने च्यांग कार्ई-शेक ना क्वोमिंगतांग संगे उंदी राजनीतिक सलाहकार सम्मेलन कित्ताद मत्ता। अद सम्मेलन ता सफलतांग कुन च्यांग कार्ई-शेक ना क्वोमिंगतांग ओसो ओना संगे ता अपराधिर नष्ट कीसीतोर, इद्रम कीतेकार्ई अद सम्मेलन जनता पोरो उंदी मिंजवा लेक्कटा चिन्हा वाटता। अद सम्मेलन च्यांग कार्ई-शेक ना क्वोमिंगतांग ओसो तन्ना अपराधिरा संगे कलियसी जनता ना हित ते बदे वेने काम पूरा किया परमूडायो इंजी साबित किसिता। बद प्रस्ताव तुन विचार हिल्वा लेक्का स्वीकार कीतेके अंगडमे आंतांग, बारांकु इत्तेके ओरु मौका दोरकी कीसी अव सब्बे प्रस्ताव कुन वीयर ओडी ते वाटसियानूर अनि क्रूर रूप ते युद्ध शुरू कीसी जनता ना विरोध कियानूर। सम्मेलन तले जनता बेसे शिक्षित आता अनि च्यांग कार्ई-शेक ना क्वोमिंगतांग संगे ओसो ओना संगे ता अपराधिरा संगे समझौता वार्ता कीयाना अंगडम इंजी समझेमाता। जनता दुश्मन ता तख्ता पलट कीयाना लेवेके खुद दुश्मन कीयाना कल्लेआम ओसो उत्पीडन ता शिकार आयना रेंडु हर्रिंग लोप्पा सिर्फ उंदे हर्री पोय्या परमूडंता बदे तीसरा हर्री हिल्ले। मूंड साल तुकू ज्यादा कालम ते चीनी कम्युनिस्ट पार्टी ता नेतृत्व ते चीनी जनता वेल्ले जल्दी तेदता अनि खुद किन साम्राज्यवाद, सामंतवाद, नौकरशाह-पूंजीवाद ओसो ओरा आम प्रतिनिधि प्रतिक्रियावादी क्वोमिंगतांग सरकार खिलाफ उंदी राष्ट्रव्यापी संयुक्त मोर्चा संगठित कित्ता। जन मुक्ति युद्ध ता समर्थन कित्ता, प्रतिक्रियावादी क्वोमिंगतांग सरकार किन बुनियादी रूप ते हारे कित्ता, चीन लोप्पा साम्राज्यवादी शासन ता तख्ता पलट कित्ता अनि राजनीतिक सलाहकार सम्मेलन किन सफल कित्ता।

वर्तमान चीन जनताना राजनीतिक सलाहकार सम्मेलन पूना आधार ते आया मंता, इदु पूरा देश ता जनता ना प्रतिनिधित्व कींता अनि इदिन पूरा देश ता जनता ना विश्वास ओसो समर्थन दोरकिंता। इद सम्मेलन राष्ट्रीय जन-प्रतिनिधि सभा ता कर्तव्य ओसो अधिकार कुन पूरा कियार इंजी ऐलान कित्ता। तन्ना कार्यसूची अनुसार वर्तमान सम्मेलन चीनी जनताना राजनीतिक सलाहकार सम्मेलन ता संगठन संबंधित कानून ओसो चीन लोक गणराज्य ता केंद्रीय जनताना सरकार ता संगठन संबंधित कानून बने कियार अनि चीनी जनताना राजनीतिक सलाहकार सम्मेलन ता आम प्रोग्राम तय कियार इंजी ऐलान कित्ता, अदु चीनी जनताना राजनीतिक सलाहकार सम्मेलन ता राष्ट्रीय कमेटी ओसो चीन लोक गणराज्य ता केंद्रीय जनताना सरकार परिषद कुन चुने कियार, चीन लोक गणराज्य ता राष्ट्रीय झंडा ओसो राष्ट्रीय चिन्ह बने कियार, चीन लोक गणराज्य ता राजधानी ता जागा तय कियार अनि दुनिया ता ज्यादातर देश कुने लागू कीयाना कालक्रम प्रणाली तुन चीन लोक गणराज्य लोप्पा वेने लागू कीयाना निर्णय कियार इंजी ऐलान कित्ता।

डेलीगेट्स, मना कामकाज ता मानव जाति ता इतिहास लोप्पा रासमूझायर इंजी माटु सब्बे तोर किन पक्का विश्वास मंता। अदिनगडले चीनी जनता मानव जाति ता एक चौथाई हिस्सा इंजे तेदता इंजी साबित आंता। चीनी राष्ट्र हमेशा उंदी महान, साहसी ओसो मेहनती राष्ट्र मत्ता, सिर्फ आधुनिक कालम ते ने अदु पेरके अरसी मंता। इदु पूर्ण रूप ते विदेशी साम्राज्यवाद ओसो स्थानीय प्रतिक्रियावादी सरकार कुना उत्पीड़न, शोषण कारण तेने आंता। उंदी शताब्दी तुकू ज्यादा टाईम ते मना पुरखा नोर स्थानीय ओसो अन्तरराष्ट्रीय शोषक वर्ग खिलाफ रोमवा लेवा संघर्ष कित्तोर। ताना लोप्पा चीनी क्रांति ता महान नेताल डा. सुन यात-सेन ना नेतृत्व ते कित्ता 1911 ता क्रांति वेने शामिल मंता। मना पुरकानोर माटु ओरा अधुरा सपना किन पूरा कीयाना इंजी माकिन प्रेरित कित्तोर। माटु अदिना अनुसार काम कीयाना। माट उंदी आसी जन मुक्ति युद्ध ओसो महान जन क्रांति संगे स्थानीय, अन्तरराष्ट्रीय शोषक वर्ग ता सत्ता पलट

किताद मंता। नेंडु माटु चीन लोक गणराज्य ता स्थापना ता घोषणा किया मंतोमा। इंजेटल मना राष्ट्र दुनिया ता बचोनो शांतिप्रिय, स्वतंत्रता तत्ता राष्ट्र कुना महान परिवार ता सदस्य बनेमायर अनि तन्ना सभ्यता, सुख-सुविधा बेरसी कीयाना संगेने दुनिया ता शांति, स्वतंत्रता किन प्रोत्साहन हियाला काजे साहस संगे ओसो वेल्ले मेहनत ते काम कीसोर मंदियरा। नेटल मना राष्ट्र उंदी दूसरा तुकू अपमान ओसो तिरस्कार कीयाना लेक्कटा राष्ट्र लेक्का मन्नो आयारा। माटु इंजे तेदतोमा मना क्रांति किन सब्बे देश कुना जनता ना समर्थन दोरकताद मंता। मना दोस्त दुनिया ता कोंटा-कोंटा ते मंतोरा।

मना क्रांतिकारी काम इंजे पूरा आताद हिल्ले, जन मुक्ति युद्ध ओसो जनता ना क्रांतिकारी आंदोलन मुन्ने दाया मंता, मनम मना कोशिश चालू तासना। साम्राज्यवाद ओसो स्थानीय प्रतिक्रियावाद मना जीत किन चुपचाप स्वीकार कीवोंग आयनुंग अनि डोलना जोम पदिहकसोर मंदांनुंग। देशमेंड शांति ओसो व्यवस्था बने कित्ता पेरके वेने बचोनो तरीका ने तोड़फोड़ किसोर मंदांनुंग अनि गड़बड़ कीसोर मंदांनुंग, दिव्या-दिव्या ते सत्ता पोरो कब्जा कीयाना कोशिश कीसोर मंदांनुंग।

मना राज्य व्यवस्था इत्तेके जनता ना जनवादी नेतृत्व, जनता ना क्रांति ता जीत कुना रक्षा कीयाना ओसो स्थानीय, मावा सत्ता तून मुट्टी कीसी तना सत्ता स्थापित कीयाना विदेशी दुश्मन पंडना साजिश कुन विफल कियाला काजे शक्तिशाली हथियार आंदू, इदिन माटू मजबूती ते पोयसी तासना। माटु सब्बे अन्तरराष्ट्रीय शांतिप्रिय, स्वतंत्रता प्रेमी देशकु ओसो जनता ना संगे सबसे मुन्ने सोवियत संघ ओसो पूना लोकशाही वाले देश कुना संगे एकता कीयाना। अस्केने माटु जनता ना क्रांति ता जीत कुना रक्षा कीयाना ओसो स्थानीय लेवेके विदेशी दुश्मन मावा सत्ता तुन मुट्टी कियाला पंडना साजिश कुन विफल कीयाना संघर्ष लोप्पा अलग-थलग वायवा मंदितोमा। बस्के एवनल माटु जनता ना जनवादी नेतृत्व ते डटेमासी मंदाकोम ओसो मना विदेशी दोस्त लोरा संगे एकता तासितोम अस्के एवनल हमेशा मावा जीत आसोर मंदियारा।

जनता ना जनवादी नेतृत्व ओसो विदेशी दोस्त लोरा संगे मना एकता मना किन मना निर्माण कार्य किन जल्दी मारी किया परना लेक्का बने कीता। मना मुन्ने उंदी राष्ट्रव्यापी आर्थिक निर्माण कार्य मंता। मना परिस्थितिंग वेल्ले अनुकूल मंतांग। 47 करोड़ 50 लाख आबादी ओसो 96 लाख वर्ग कीलोमीटर बेहरा प्रादेशिक भूमि। मना मुन्ने मुश्किलकु मंतांग, मति अवु वेल्ले हिल्लेंगा। पूरा देश ता जनता ना वीरतापूर्वक संघर्ष संगे इव सब्बे मुश्किल कुन दूर कियमूडायर इंजी माकिन पक्का विश्वास मंता। चीनी जनता तुन मुश्किल कुना पोरो काबू कीयाना वेल्ले समृद्ध अनुभव मंता। मना पुरकानोर ओसो खुद माटु वेने वेल्ले कालम एवनल कठिन परिस्थितिंग ना सामना कित्तोम आनि शक्तिशाली स्थानीय, विदेशी प्रतिक्रियावादि किन हारे कित्तोमे। अदिनके मनम नेंडु पूयना-हादना ओसो खुशहाल राज्य ता निर्माण वेने कियापरितोमा। माटु बस्के एवनल सादा पिस्वल, कठिन परिश्रम ता कार्यशैली पोरो नितसी मंदाकोम अस्के एवनल एकताबद्ध मंदाकोम ओसो बस्के एवनल जनता ना जनवादी नेतृत्व पोरो डटेमासी मंदाकोम, मना विदेशी दोस्त लोरा संगे एकता कीसी मंदाकोम अस्के एवनल माकिन आर्थिक मोर्चा लोप्पा जल्दीए सफलता दोरकसोर मंदियर।

आर्थिक निर्माण ता उभार संगे-संगे अनिवार्य रूप ते उंदी सांस्कृतिक निर्माण ता उभार वेने वायारा। चीनी जनता किन असभ्य मानेमायना कालम इंजे हत्ता। दुनिया लोप्पा मना राष्ट्र ता जन्म उंदी समान संस्कृति संगे लैस मत्ता राष्ट्र लेक्का आयारा।

मना राष्ट्रीय सुरक्षा किन सुदृढ़ बने कियमूडायर अनि साम्राज्यावादिर किन मना भूमि पोरो ओसो उंदी बेरा आक्रामण कीयाना अनुमति इनपड़े मन्नो आयारा। मना जनता ना सशस्त्र सेनांग किन बहादुर ओसो लड़ाई लोप्पा गड़स्ता वेले अनुभव मंदना जन मुक्ति सेना तुन आधार बने कीसी विकसित कीयाना। मनगा सिर्फ उंदी शक्तिशाली पैदल सेनाए आयवा उंदी शक्तिशाली वड़ियू सेना ओसो उंदी शक्तिशाली एयर सेना वेने मंदियार।

स्थानीय, विदेशी प्रतिक्रियावादीर किन मना मुन्ने धिर्-धिर् सांगला
हीमुट! ओरकिन माटु बदे वेने रकम ते मजबूत हिल्लेम इंदा हीमुट। माटु
चीन ता लोकर मना रोमवा लेवा कीयाना कोशिश कुना संगे मजबूती ते
मुन्ने हंजोरे मना लक्ष्य जरूर दोरकी कियाकोम।

जन मुक्ति युद्ध ओसो जन क्रांति ताकनास्के शहीद आता
पड़ियोरकिन हामूर हिल्ले!

जन मुक्ति युद्ध ओसो जन क्रांति जीत किन जौहार!

चीन लोक गणराज्य स्थापना किन जौहार!

चीनी जनताना राजनीतिक सलाहकार सम्मेलन सफलता किन
जौहार!

नोट

- 1) 'आत्म रक्षात्मक युद्ध संगे च्यांग काई-शेक ना आक्रामण किन गुंडा कीमुट', नोट
2, 'माओ त्सेतुंग संकलित रचनांग, ग्रन्थ4' लोप्पा हूडाटू।

चीनी जनता ना महान एकता जिंदाबाद!²

30 सितम्बर 1949

जीवा ता देशवासिर,

चीनी जनताना राजनीतिक सलाहकार सम्मेलन ता पहली पूर्ण अधिवेशन तन्ना कार्य तुन सफलतापूर्वक सम्पन्न कित्ता।

इद सम्मेलन लोप्पा चीन ता सब्बे जनवादी पार्टिंग, जन-संगठन, जन-मुक्ति सेना, देश ता अलग-अलग प्रदेश, राष्ट्रीयतांग, प्रवासी चीनी ओसो बाकी देशभक्त जनवादी लोकुरा प्रतिनिधि शामिल मंतोर, इदु पूरा देश ता जनता ना विचार ता प्रतिनिधित्व कित्ता अनि उंदी महान एकता तोहत्ता कित्ता।

पूरा जनता ना महान एकता सिर्फ चीनी जनता ओसो जन मुक्ति सेना ता चीनी कम्युनिस्ट पार्टी नेतृत्व ते, दीर्घकालीन वीरतापूर्वक संघर्ष कित्ता पेरके, अमेरिका साम्राज्यवाद समर्थन मत्ता च्यांग काई-शेक ना प्रतिक्रियावादी क्वोमिंगतांग सरकार किन हारे कित्ता पेरकेने आता। उंदी शताब्दी तुकू वेने ज्यादा टाईम एवनल, चीनी जनता ना नेता लोर (तीना लोप्पा 1911 ता क्रांति नेताल महान क्रांतिकारी डा. सुन यात-सेन लेक्कटा असाधारण लोरु वेने शामिल मंतोर) साम्राज्यवादीर ओसो प्रतिक्रियावादी चीनी शासक लोरा उत्पीड़न ता तख्ता पलट कियाला काजे कित्ता संघर्ष कुना लोप्पा व्यापक जनता ना नेतृत्व कित्तोर, ओरा साहस ओसो डटेमासि कित्ता कोशिश कुना संगे इद उद्देश्य पूरा आता। इद

² इद उंदी घोषणापत्र आंदू. मसौदा तैयार कियाना काम चीनी जन राजनीतिक सलाहकार सम्मेलन ता पहली पूर्ण अधिवेशन कामरेड माओ त्सेतुंग किन सौंपे कीसि मत्ता। “मना जनता ता नेताल अध्यक्ष माओ त्सेतुंग ना नेतृत्व ते” वाले वाक्य घोषणापत्र तुन स्वीकार कियानास्के डेलीगेट कुना प्रस्ताव ते जोड़े कीताद मत्ता।

अधिवेशन माटु चीनी जनता तन्ना दुश्मन किन हारे कित्ता, देश तुन बदले कित्ता अनि चीन लोक गणराज्य ता स्थापना कित्ता पेरके आया मंता। नेंडु माटु 47, करोड़ 50 लाख चीनी लोकुर तेदतोर अनि मना राष्ट्र ता वायना कालम वेल्ले वेहच ते मंदिता।

मना जनता ना नेताल अध्यक्ष माओ त्सेतुंग ना नेतृत्व ते, मना अधिवेशन उंदी जीवा आसी काम कीसोरे, नव जनवादी उसूल कुना अनुसार, चीनी जनताना राजनीतिक सलाहकार सम्मेलन ता संगठन संबंधित कानून, चीन लोक गणराज्य ता केंद्रीय जनताना सरकार ता संगठन संबंधित कानून ओसो चीनी जनताना राजनीतिक सलाहकार सम्मेलन ता प्रोग्राम तैयार कित्ताद मंता; पेकिंग तुन चीन लोक गणराज्य ता राजधानी बने कीयाना निर्णय कित्ताद मंता; लाल पृष्ठभूमि ते पांच हुक्का वाले झंडा किन चीन लोक गणराज्य ता राष्ट्रीय झंडा लेक्का ओसो 'स्वयं सेवक अभियान-गीत' चीन लोक गणराज्य ता वर्तमान राष्ट्रगीत लेक्का स्वीकार आता; चीनी जनताना राजनीतिक सलाहकार सम्मेलन ता राष्ट्रीय कमेटी ओसो चीन लोक गणराज्य ता केंद्रीय जनताना सरकार परिषद चुनाव आता। इद्रम चीन ता इतिहास लोप्पा उंदी पूना समाज ता स्थापना आता।

जीवा देशवासिर, चीन लोक गणराज्य ता स्थापना ता घोषणा आता, इंजे चीनी जनता ना तन्ना केंद्रीय सरकार बनेमासी मत्ता। प्रोग्राम अनुसार इद सरकार चीन ता पूरा भूमि पोरो जनता ना जनवादी कब्जा कियार। ओरू क्रांतिकारी युद्ध किन आखरी एवनल ताकी कियाला दुश्मन ता पिस्ता सेक्शन कुन खत्म कीयाना, देश ता पूरा प्रादेशिक भूमि किन मुक्त कियाला ओसो चीन ता एकीकरण ता महान कार्य तुन पूरा कियाला काजे जन मुक्ति सेना ता मार्गदर्शन कियार। अदु पाड़ना चीन विडस्ता गरीबी, अज्ञानता किन दूर कीयाना ओसो उंदी-उंदी डाका वाटसोरे जनता ना भौतिक, सांस्कृतिक पिस्वल लोप्पा सुधार कीयाना उद्देश्य ते सब्बे मुश्किल कुन दूर कीयाना ओसो आर्थिक, सांस्कृतिक रूप ते बेहरा स्तर ते निर्माण कार्य कियाला पूरा देश ता जनता ना नेतृत्व कियार। अद जनता ना हित कुना

रक्षा कियार अनि प्रतिक्रांतिकारीरा सब्बे षडयंत्रकारी कार्रवाईंग पोरो दमन कियार। जनता ना पैदल सेना, एयरसेना, वडियु सेना किन मजबूत कियार, राष्ट्रीय प्रतिरक्षा किन सुदृढ़ कियार, मना प्रादेशिक अखंडता ओसो प्रभुसत्ता ता रक्षा कियार अनि बदे वेने साम्राज्यवादी देश ता आक्रमण तुन विरोध कियार। अदु सब्बे शांतिप्रिय, स्वतंत्रप्रेमी देश, राष्ट्र, जनगण संगे सबसे मुन्ने सोवियत संघ ओसो पूना लोकशाही वाले देश संगे एकता कियार अनि युद्ध कीयाना साम्राज्यवादी साजिश कुना संगे कलियसी विरोध कियार, इद्रम स्थाई विश्वशांति काजे संघर्ष कियार।

जीवा ता देशवासिर, माटु वेल्ले बेस संगठति आयना। माटु चीनी जनता ना बेहरा संख्या तुन राजनीतिक, फौजी, आर्थिक सांस्कृतिक ओसो बाकी संगठन कुना लोप्पा संगठित कीयाना अनि असंगठन परिस्थिति तुने (पाड़ना चीन ता विशिष्टता मत्ता) खत्म कीयाना। जनता ना महान सामूहिक शक्ति किन जनताना सरकार, जन मुक्ति सेना ता समर्थन कीयाना ओसो उंदी स्वाधीन, जनवादी, शांतिपूर्ण, एकीकृत, समृद्ध शक्तिशाली पूना चीन ता निर्माण कीयाना कार्य ते वाटना।

जन मुक्ति युद्ध ओसो जन क्रांति ताकनास्के शहीद आता पडियोर किन हामूर हिल्ले!

चीनी जनता ना महान एकता जिंदाबाद!

चीन लोक गणराज्य जिंदाबाद!

केंद्रीय जनताना सरकार जिंदाबाद!

पड़ियोर किन हामूर हिल्ले

30 सितम्बर 1949

हत्ता मूंड साल लोप्पा जन मुक्ति युद्ध ओसो जन क्रांति ताकनास्के शहीद आता पड़ियोर किन हामूर हिल्ले!

हत्ता तीस साल लोप्पा जन मुक्ति युद्ध ओसो जन क्रांति ताकनास्के शहीद आता पड़ियोर किन हामूर हिल्ले!

स्थानीय, विदेशी दुश्मन खिलाफ, राष्ट्रीय स्वाधीनता ओसो जनता ना स्वतंत्रता, अदिना पिस्वल बेस कियाला काजे 1840 तल नेंड एवनल ताकी कित्ता बचोनो संघर्ष लोप्पा शहीद आता पड़ियोर किन हामूर हिल्ले!

सादा पिस्वल, कठिन परिश्रम ता कार्यशैली पोरो हमेशा नितसी मंदाना³

26 अक्तूबर 1949

येनान ता कामरेड्स ओसो शेनशी-कानसू-निंगश्या सीमान्त इलाका ता देशवासिर:

मीवा अभिनंद-संदेश दोरकतांकु नाकिन वेल्ले खुशी आता। येनान ओसो शेनशी-कानसू-निंगश्य सीमान्त इलाका 1936 तल 1948 एवनल चीनी कम्युनिस्ट पार्टी ता केंद्रीय कमेटी ता डेरा ओसो चीनी जनता ना मुक्ति संघर्ष ता आम पृष्ठभाग मत्ता। येनान ओसो शेनशी-कानसू-निंगश्या सीमान्त इलाका ता जनता पूरा राष्ट्र काजे महान योगदान कित्ता। मीटु मीवा एकता इद्रमे तासना, युद्ध ता नुकसान जल्दिए भरपाई कीसी मीवा आर्थिक, सांस्कृतिक निर्माण ते सफलता दोरकी कीतिर इंजी नन्ना आशा कीताना। येनान ओसो शेनशी-कानसू-निंगश्या सीमान्त इलाका ता कर्मचारिर हत्ता उंदी दशाब्दी तुकू वेने ज्यादा टाईम तल सादा पिस्वल ओसो कठिन परिश्रम ता लागू कित्ता कार्यशैली पोरु पूरा देश ता क्रांतिकारी कर्मचारी हमेशा नितसी मंदाकिर इंजी आशा कीताना।

माओ त्सेतुंग

26 अक्तूबर 1949

³ पड़ियेरा स्मारक पोरु रास्ता शिलालेख, ता मसौदा कामरेड माओ त्सेतुंग तैयार कित्तोर।

धनी किसान लोरा समस्या हल कीयाना बारे ते कार्यनीतिक राय एतला वेहाना⁴

12 मार्च 1950

प्रांतीय नेतृत्वकारी कामरेड्स ना वर्तमान मीटिंग लोप्पा मीटु धनी किसान लोरा समस्या पोरों बने कित्ता कार्यनीति ता बारे ते लोकुरा राय जमा कीसी उंदी चिट्ठी ते रासिसि माकिन लोहना। इगा चर्चा कीयाना कार्यनीति योजना अनुसार इयेटा इंगम ते दक्षिणी प्रांत ओसो उत्तर-पश्चिम ता उचुक इलाकांग लोप्पा आयना भूमि सुधार आंदोलन, सिर्फ पूंजीवादी धनी किसान लोरकिने आयवा अर्धसामंती धनी किसान लोरा लोप्पा वेने फैलेमायर, अर्धसामंती धनी किसान लोरा समस्या ता समाधान उचुन साल काजे रोमिकिमूडायर। इद्रम कीतेके बेस आयार, आयो इंदानदिना पोरो विचार कीमुटा। इद्रम कीयाना कारणः मुन्ने, भूमि सुधार आंदोलन वेल्ले बेहरा स्तर ते ताकी कियमूडायर अनि ताना लोप्पा अति-वामपंथी रुझान हल्कोए पुट्टियर। माटु सिर्फ जमींदार लोर किने हूडिंतोमा। धनी किसान लोरकिन विड्रस्तेके माटु जमींदार लोर किन अलगाव ते वाटना, मध्यम किसान लोरा रक्षा कीयाना ओसो अंधाधुंध मारपीट कीयाना लेवेके हौकना तुन रोमी कियाला काम वायर, लेवेके वेल्ले मुश्किल आयर। दूसरा उत्तर ते भूमि सुधार युद्धकालम ते किताद मत्ता। युद्ध ता वातावरण भूमि सुधार ता वातावरण पोरो दबाव वाटता। मति नेंडु लडाई समाप्त आताद मंता, भूमि सुधार विशेष रूप ते उभरेमासी मुन्ने वायर समाज तुन विशेष

⁴ चीनी कम्युनिस्ट पार्टी ता केंद्रीय कमेटी जारी कित्ता मध्य-दक्षिण ब्यूरो पोरोल ओसो पूर्वी चीन ब्यूरो, दक्षिणी चीन उप-ब्यूरो, दक्षिण-पश्चिमी ब्यूरो ओसो उत्तर-पश्ची ब्यूरो पोरोल ता सरकुलर।

रूप ते बेहरा धक्का देलगियर अनि जमींदार लोरा कोल्हार विशेष रूप ते बेरसियर। माटु अर्ध-सामंती धनी किसान लोर किन उचुन जोम विड़साकोम अनि उचुन साल पेरके ओरो पोरो हमला कीतोम अस्के मावा आधार वेल्ले मजबूत आयर। इत्तेके राजनीतिक रूप ते मावा पहलकदमी ओसो ज्यादा बेरसियर। तीसरा, माटु राजनीतिक, आर्थिक ओसो संगठनात्मक रूप ते राष्ट्रीय पूंजीपति वर्ग संगे उंदी संयुक्त मोर्चा बने किताद मत्ता। राष्ट्रीय पूंजीपति वर्ग ता भूमि समस्या संगे गटिंग संबंध मंता अदिन काजे राष्ट्रीय पूंजीपति वर्ग तुन जीवा ते जीवा वायना लेक्का कीयाना उद्देश्य ते अर्ध-सामंती धनी किसान लोर किन उचुन जोम काजे विड़सना।

धनी किसान लोर किन उचुन जोम विड़सला काजे नन्ना राजनीतिक ब्यूरो ता हत्ता मीटिंग लोप्पा सवाल पेश कितान। मति अदिना बारे ते विस्तार ते विश्लेषण ओसो निर्णय आताद हिल्ले। इंजे निर्णय कीयाना टाईम वात्ता। ताना पेरके भूमि कानून लोप्पा ओसो भूमि सुधार संबंधित बाकी दस्तावेज कुना लोप्पा संशोधन किया लागियर। अविन पूना मुक्त प्रान्त कुना लोप्पा भूमि सुधार काम कीयाना कार्यकर्ता लोरा अध्ययन जारी किया लागियर। इयेटा इरंगम कालम ता खेती पेरके भूमि सुधार हल्कोए कियमूझायर। सिर्फ मध्य-दक्षिण ब्यूरो आयवा पूर्वी चीन ब्यूरो, दक्षिणी चीन उप-ब्यूरो, दक्षिण-पश्चिमी ब्यूरो ओसो उत्तर-पश्चिमी ब्यूरो कामरेड्स वेने इद सवाल पोरो आल्सना वेल्ले महत्वपूर्ण मंता। इद चिट्टी किन मना प्रांतीय पार्टी कमेटिंग, म्युनिसिपल पार्टी कमेटिंग लोप्पा विचार-विमर्श काजे लोहना अनि इदिना पक्ष ओसो विपक्ष ते पेश कीयाना राय एतसी तुरंत केंद्रीय कमेटी लोप्पा लोहना। इद्रम कीतेके निर्णय कीयानास्के माटु अविना पोरो आल्सा परितोम।

राष्ट्र ता वित्तीय, आर्थिक परिस्थिति सुधारे कीयाना लोप्पा बुनियादी मोड़ हियाला काजे संघर्ष कीमुट⁵

6 जून 1950

वर्तमान अंतरराष्ट्रीय परिस्थिति मावा काजे अनुकूल मंता। सोवियत संघ नेतृत्व ते शांति, जनवादी विश्व मोर्चा हत्ता साल तुकू वेल्ले शक्तिशाली आता। सब्बे देश कुना लोप्पा शांति ओसो युद्ध विरोधी जन आंदोलन विकसित आता। साम्राज्यवादी जुआ लेहची वाटला काजे ताकी कीयाना राष्ट्रीय मुक्ति आंदोलन व्यापक रूप ते फैलेमाता। अमेरिका कब्जा विरुद्ध जापानी जनता ओसो जर्मन जनता ना आंदोलन विशेष ध्यान हियाना लेक्का मता। मुन्नेटा उत्पीड़ित राष्ट्र ता जन-मुक्ति संघर्ष ता विकास आया मंता। संगेने साम्राज्यवाद देश कुना नडमा, मुख्य रूप ते अमेरिका ओसो ब्रिटिश नडमा, अन्तरविरोध बेरसता। अमेरिका पूंजीपति वर्ग लोप्पा ओसो ब्रिटिश पूंजीपति वर्ग लोप्पा अलग-अलग ग्रुपकुना नडमा ता झगडा वेने बेरस्ता। इदिना उल्टा सोवियत संघ ओसो जनता ना लोकशाही वाले अलग-अलग देश कुना नडमा सुदृढ़ एकता मंता। चीन ओसो सोवियत संघ नडमा आता समझौता¹ रेंडासी देश कुना एकता ता संबंध किन सुदृढ़ बने कीयाना लोप्पा महान ऐतिहासिक महत्व मंता; इदु माकिन मना राष्ट्रीय निर्माण-कार्य किन जारी तासला ओसो शांति, जनवाद दोरकी कियाला काजे युद्ध उत्पीड़न ता विरोध कीयाना पूरा दुनिया ता जनता ना महान संघर्ष किन वेने प्रोत्साहन हियाना लेक्का बने कित्ता। साम्राज्यवादी ग्रुप बगिल तल हियाना युद्ध ता धमकिंग इंजे वेने मंतांग ओसो तीसरी

विश्वयुद्ध ता संभावना इंजे वेने मंता। मति युद्ध ता खतरा किन रोमी कियाला ओसो तीसरा विश्वयुद्ध किन रोमी कियाला काजे संघर्ष कीयाना ताकत कुना विकास वेल्ले जल्दी आया मंता। दुनिया ता ज्यादातर जनता ना राजनीतिक चेतना स्तर वेने बेरसा मंता। उंदी पूना विश्वयुद्ध किन रोमी कियाला काजे दुनिया ता कम्युनिस्ट पार्टींग शांति, जनवाद ता सब्बे ताकत कुना संगे एकता जारी तासना ओसो वेल्ले विकास कीयाना। क्वोमिंगतांग प्रतिक्रियावाद फैले कित्ता युद्ध ता गलत प्रचारकु जनता ना कोंडा ते डुंडुल वाटला काजे कित्ता बुनियाद हिल्ला प्रचारकु आंदुंग।

मावा देश लोप्पा वर्तमान परिस्थितिंग इगा रास्ता लेक्का मंता: चीन लोक गणराज्य ता केंद्रीय जनताना सरकार ता ओसो सब्बे स्तर ते स्थानीय जनताना सरकार कुना स्थापना किताद मंता। सोवियत संघ, जनता ना लोकशाही वाले देशकु ओसो उचुन पूंजीवादी देश कु उंदी पेरके उंदी मावा देश संगे राजनीतिक संबंध बने किया मंतांग। मुख्य भूमि पोरो युद्ध बुनियादी रूप ते समाप्त आता। सिर्फ ताइवान, तिब्बत तुन मुक्त कीयाना पिस्ता मति इद काम पूरा कियाला काजे इंजे वेने गंभीरता ते संघर्ष किया लागियरा। मुख्य भूमि ता उचुक इलाकांग लोप्पा क्वोमिंगतांग प्रतिक्रियावादीर डकैत लोरा छापामार लड़ाई ता सहारा एतिता अनि उचुन पेरके अरता तत्व कुन जनताना सरकार खिलाफ भडके कित्ता। ओरु सरकार ता विरोध कियाला काजे वेल्ले खुफिया एजेंट, इन्फार्मर लोर किन जमा कित्तर अनि कम्युनिस्ट पार्टी, जनताना सरकार ता अपमान कीयाना, अलग-अलग राष्ट्रीयतांग, जनवादी वर्ग, जनवादी पार्टींग, जन-संगठन कुना एकता किन नष्ट कीयाना कोशिश कियाला काजे जनता लोप्पा गलत प्रचार कित्तर। वीरा खुफिया एजेंट ओसो इन्फार्मर लोर जनता ना आर्थिक व्यवस्था तुन तितर-बितर कीयाना पार्टी ओसो सरकारी संगठन कुना कर्मचारिर किन गुप्त रूप ते हौकना ओसो साम्राज्यवादी क्वोमिंगतांग प्रतिक्रियावाद काजे गुप्त समाचार जमा कीयाना किया मंतोर। साम्राज्यवाद ओसो विशेष रूप ते अमेरिका साम्राज्यवाद इव सब्बे प्रतिक्रांतिकारी कार्रवाईंग पेरके मंजी ताकी कित्ता। वीर सब्बे डाकू, खुफिया एजेंट ओसो

इन्फार्मर साम्राज्यवादी नैकु आंदुंगा। 1948 ता इंगम कालम ते यांगत्सी डोड्डा वेंडला काजे शुरू कित्ता ल्याओशी-शनयांग, ह्वाए-हाए ओसो पेफिंग-थ्येनचिन पोरोल ता मूंड बेहरा अभियान कुना लोप्पा वेल्ले महत्वपूर्ण सफलता दोरकता पेरके 21 अप्रैल 1949 ते आता। इंजे एवनल साढ़े तेरह महीनांग लोप्पा जन मुक्ति सेना तिब्बत, थाईवान ओसो उचुक समुद्री द्वीप कुन विड़चसी चीन ता सब्बे प्रादेशिक भूमि पोरो अधिकार किताद मंता। प्रतिक्रियावादी क्वोमिंगतांग ता 18,30,000 सैनिक ओसो 9,80,000 छापामार डाकु लोर किन खत्म किताद मंता; इद्रम कीयानास्के जनता ना सार्वजनिक सुरक्षा संगठनकु प्रतिक्रियावादी खुफिया ग्रुप ओसो एजेंट लोरा बेहरा संख्या तुन परहकता। पूना मुक्त इलाकांग लोप्पा जन मुक्ति सेना मुन्ने इंजे पिस्ता डाकु लोर किन खत्म कीयाना काम तुन जारी तासना ओसो जनता ना सार्वजनिक सुरक्षा संगठन कुना मुन्ने दुश्मन ता खुफिया ग्रुप कुना पोरो लगातार हमला कीसोर मंदाना काम मंता। पूरा देश ता जनता ना बेहरा संख्या कम्युनिस्ट पार्टी, जनताना सरकार ओसो जन-मुक्ति सेना ता हार्दिक समर्थन कीता। इंजेटा उचुक महिनांग लोप्पा, जनताना सरकार राष्ट्रव्यापी स्तर ते वित्तीय, आर्थिक काम पोरो एकीकृत नियंत्रण, एकीकृत नेतृत्व किताद मंता ओसो बजट संबंधित आय-व्यय लोप्पा समन्वय कियाला, मुद्रास्फीति किन रोमी कियाला ओसो मूल्य लोप्पा स्थिरता तत्ताला सफलता दोरकी किताद मंता। पूरा जनता अनाज हीसी, टैक्स निहची राजकीय बौंड² अस्सिसी जनताना सरकार ता समर्थन हीताद मंता। हत्ता साल मावा देश ता व्यापक इलाका लोप्पा प्राकृतिक तिप्पल कुना सामना किया लागता; लगभग 12 करोड़ मू खेती ओसो 4 करोड़ लोकुर किन कम-ज्यादा मात्रा ते ऊसा ओसो मुसुर वायवा कारण ते दुखम पोयत्ता मत्ता। जनताना सरकार अकाल-पीड़ित लोकुर किन मदद कीयाना काम वेल्ले जोरशोर ते कित्ता, वेल्ले जागा ने बेहरा जल-संरक्षण परियोजना ना निर्माण कित्ता। हत्ता साल तुकू इयेंड बेस फसल वायना लेक्का मंता। ठोस रूप ते हूडतेके एही ता फसल वेने बेस आया मंता। इंगम ता फसल वेने बेस आतेके वायना साल ता परिस्थिति इयेटुकू बेस

मंदा परिंता। साम्राज्यवादिर ओसो प्रतिक्रियावादी क्वोमिंगतांग ता दीर्घकालीन शासन मावा अर्थव्यवस्था किन पूराए खत्म कित्ता। उंदी बेहरा बेरोजगार बेहरा समुदाय तुन पुट्टी कित्ता। क्रांति जीइता पेरके पूरा आर्थिक ढांचा कम-ज्यादा मात्रा ते पुनर्गठन आया मंता। बेरोजगार लोरा संख्या ओसो बेरसता। इदु उंदी गंभीर समस्या मंता इदिन किन तुरंत हल कियाला काजे जनताना सरकार बेरोजगार लोर किन मदद कीयाना ओसो काम हियाना तरीका लागू कीयाना शुरू कित्ता। सांस्कृतिक, शैक्षणिक रूप ते जनताना सरकार बेहरा स्तर ते काम कित्ता। बुद्धिजीवी, नौजवान विद्यार्थिर बेहरा संख्या ते पूना ज्ञान ता अध्ययन किया मंतोर लेवेके क्रांतिकारी काम लोप्पा हिस्सा एता मंतोर। उद्योग-वाणिज्य लोप्पा सुधार कीयाना, अर्थव्यवस्था लोप्पा राष्ट्रीय ओसो निजी नइमा, श्रम ओसो पूंजी नइमा ता संबंध कुन सुधार कीयाना दिशा ते जनताना सरकार उचुन निर्णयकु कित्ता। अदु इदे उद्देश्य तुकू लगातार वेल्ले कोशिश किया मंता।

चीन उंदी बेहरा देश आंदू, अदिना परिस्थिति वेल्ले कठिन मंता। क्रांति तुकू मुन्ने उचुक इलाकांग लोप्पा ओसो पूरा देश लोप्पा जीत दोरकी कित्ता। इदिना अनुसार पाइना मुक्त इलाकांग लोप्पा (इविना संख्या लगभग 16 करोड़ मंता) भूमि सुधार काम पूरा किताद मंता। सार्वजनिक व्यवस्था किताद मंता। आर्थिक निर्माण काम सही तरीका ते ताका मंता। ज्यादातर मेहनतकश लोकुरा पिस्वल सुधरे माताद मंता। बेरोजगार मजदूर, बुद्धिजीविरा समस्या हल आताद मंता (उत्तर-पूर्व ते आता लेक्का) लेवेके लगभग हल आयना गरे एवसी मंता (उत्तर चीन ओसो शानतुंग प्रांत लोप्पा मत्ता लेक्का)। खासकर उत्तर-पूर्व ते योजनानुसार आर्थिक निर्माण वेने शुरू आताद मंता। दूसरा बगिल पूना मुक्त इलाकांग किन (इविना संख्या लगभग 31 करोड़ मंता) मुक्त कीसी इंजे लगभग 6 महीनांगे आतांग। अदिन काजे अविना लोप्पा जेक-जेक ता इलाकांग लोप्पा लीकता लेक्का मत्ता 4 लाख तुकू ज्यादा डाकू लोर किन खत्म कीयाना काम इंजे वेने पिस्ताए। भूमि समस्या इंजे हल आताद हिल्ले। उद्योग-वाणिज्य लोप्पा सुधार आताद हिल्ले। बेरोजगार इंजे वेने गंभीर रूप तेने मंता। सार्वजनिक

व्यवस्था इंजे वात्ताद हिल्ले। संक्षिप्त ते वेहाना इत्तेके योजनानुसार आर्थिक निर्माण काजे जरूरी परिस्थितिंग इंजे वेने वात्ताद हिल्ले। अद्रमासी उचुन जोम मुन्ने नन्ना, माटु आर्थिक मोर्चा ते उचुन सफलतागंग दोरकी किताद मंता इंजी इत्तानः उदाहरण तुकू आय-व्यय लोप्पा लगभग सुधार आताद मंता। मुद्रास्फीति रोमता अनि मूल्य स्थिर आया मंता। इव सब्बे पोल्लोंग किन हूइसी वित्तीय ओसो आर्थिक परिस्थिति सुधरेमसोर मत्तेकाई इदु बुनियादी रूप ते सुधार आताद मंता इनमूडायो। वित्तीय, आर्थिक परिस्थिति तुक बुनियादी रूप ते सुधरे कियाला काजे मूंड शर्त कुना जरूरत मंता। 1) भूमि-सुधार काम पूरा कियानाः 2) वर्तमान उद्योग-वाणिज्य सही तरीका ते पुनर्व्यवस्था कियानाः ओसो 3) सरकारी संस्थान कुना व्यय लोप्पा वेल्ले कटौती कियाना। इव मूंड शर्त कुन पूरा कियाला काजे वेल्ले टाईम लागियर इत्तेक लगभग 3 सालकु लेवेके इदिनकु वेने ज्यादा टाईम लागियर। पूरा पार्टी ओसो पूरा राष्ट्र इव शर्त कुन पूरा कियाला पुरजोर कोशिश कियाना। माटु लगभग 3 साल कुना लोप्पा इद काम तुन जरूर पूरा कीतोम इंजी नाकिन विश्वास मंता। अस्के माटु मावा पूरा वित्तीय, आर्थिक परिस्थिति तुन बुनियादी रूप ते सुधरे कियाना बगिल ओयला सफल आयकोम।

इद उद्देश्य तुकू, पूरा पार्टी ओसो पूरा जनता उंदी आयना अनि दोइ रास्ता काम पूरा कियाना जरूरी मंताः

- 1) भूमिसुधार काम सही तरीका ते ताकी कियाना।³ इंजे मुख्य भूमि पोरो युद्ध समाप्त आसी मंता अनि परिस्थिति 1946 तल 1948 एवनल (जन मुक्ति सेना, क्वोमिंगतांग प्रतिक्रियावादिरा खिलाफ हायना-पिस्सना संघर्ष कीसोर मत्ता अनि हार-जीत ता फैसला आताद हिल्ला मत्ता) परिस्थिति तुकू एकदम अलग मंता। इंजे राज्य गरीब किसान लोर किन कर्ज हीसी ओरा मुश्किल दूर कियाला ओरा मदद कियाना अनि कम जमीन दोरकतांकु आयना नुकसान ता भरपाई कियानाए संभव मंता। अद्रमासी धनी किसान लोरा बारे ते मावा नीति लोप्पा बदलाव कियाना जरूरी मंता।

इत्तेके ओरा अतिरिक्त जमीन-जायदाद कब्जा कीयाना नीति तुन धनी किसान अर्थव्यवस्था तुन मत्ता लेक्काने तासना नीति लेक्का बदले कीयाना। इद्रम कीतेके नाहकुना उत्पादन तुन परताचोन कम टाईम ते बेस कियमूडायर अनि जर्मीदार लोर किन अलगाव ते वाटसी मध्यम किसान ओसो जमीन ता सुडला पट्टेदार लोरा रक्षा कियाला मदद आयार।

2) मावा वित्तीय, आर्थिक काम लोप्पा एकीकृत प्रबंध, एकीकृत नेतृत्व तुन सुदृढ़ कीयाना। बजट-संबंधित आय-व्यय लोप्पा संतुलन ओसो मूल्य स्थिरता तुन मत्ता लेक्का तासना। इद उसूल अनुसार कर पुनर्व्यवस्थिति कीयाना। जनता ना बोजा हल्को कीयाना। विस्तृत योजना ओसो विस्तृत बंदोबस्त ता उसूल ता वेहच ते, आर्थिक काम लोप्पा मत्ता दिशाहीनता, अराजकता तुन दूर कीयाना। वर्तमान उद्योग वाणिज्य तुन सही तरीका ते पुनर्व्यवस्थित कीयाना। राष्ट्रीय-निजी ओसो श्रम-पूंजी नडमा ता संबंध कुन कारगर रूप ते सुधरे कीयाना। इद्रम समाजवादी राष्ट्रीय नेतृत्व ते अर्थव्यवस्था ता सब्बे काम कुना विभाजन पोरो आधार आसी उंदी दूसरा ता सहयोग कीयाना अनि सम्पूर्ण अर्थव्यवस्था तुन विकसित कीयाना काम तुन प्रोत्साहित कीयाना। उचुन लोकर टाईम तुकू मुन्ने पूंजीवाद तुन खत्म कीयाना अनि समाजवादी स्थापना कीयाना संभव मंता इंदाना विचार इनपडे गलत मंता: इदु चीन ता परिस्थितिंग संगे कलियो।

3) जन मुक्ति सेना तन्ना मुख्या सेनांग कुन सुरक्षित तासना संगे-संगे 1950 ते तन्ना आंशिक सेना तुन थाइवान, तिब्बत तुन मुक्त कीयाना, राष्ट्रीय प्रतिरक्षा तुन सृदृढ़ बने कीयाना, प्रतिक्रांतिकारीरा पोरो दमन कियाला काजे विघटन कीयाना। विघटन कित्ता सैनिक लोर मलसी हंजी उत्पादन काम लोप्पा रम्मे मायना लेक्का वेल्ले सतर्कता ते सेना विघटन कीयाना जरूरी मंता। प्रशासनिक संगठन तुन वेने पुनर्गठित कीयाना अनि

अतिरिक्त कर्मचारिरा समस्यांग किन वेने सही तरीका ते हल कीसी ओरकिन काम ओसो अध्ययन कियाला मौका दोरकना लेक्का हूइना।

- 4) पाइना विद्यालय कुना पढ़ाई ओसो मावा समाज लोप्पा मत्ता पाइना सांस्कृतिक प्रतिष्ठान कुन बदले कीयाना काम वेल्ले सतर्कता ते कीयाना। सब्बे देशभक्त बुद्धिजीविर कुन जनता ना सेवा ते वाटला काजे मना पक्ष ते कीयाना। इदिना लोप्पा बदलाव तुन डामाडोल कीयाना लेवेके विचार हिल्ला लेक्का कीयाना सही मन्नो, अदिन जल्दबाजी लेवेके कामा पूरती मामा कित्ता लेक्का कीयाना कोशिश वेने कीयानायो।
- 5) बेरोजगार मजदूर, बुद्धिजीविरा मदद कीयाना काम वेल्ले बेस कीयाना। बेरोजगार लोर किन रोजगार दोरकी कियाला योजनाबद्ध तरीका ते मदद कीयाना। अकाल-पीड़ित लोरा मदद कीयाना काम वेने लगातार वेल्ले बेस ताकी कीयाना।
- 6) माटु सब्बे रकम ता सम्माननीय जनवादी लोकुरा संगे जीवा कीसी एकता कीयाना। ओरा काम, अध्ययन संबंधित समस्या तुन हल कियाला मदद कीयाना। संयुक्त मोर्चा काम लोप्पा उदारवाद लेवेके जरूरत तुकू ज्यादा छूट हियाना रुझान तुन दूर कीयाना। उंदी काम तुन पूरा कियाला काजे सब्बे जनता तुन एकता कियाला काजे माटु सब्बे रकम ता जन सम्मेलन⁴ कुन सफल कीयाना पूरा कोशिश कीयाना। जनताना सरकार कुना सब्बे महत्वपूर्ण समस्यांग कुना पोरो विचार-विमर्श कियाला ओसो निर्णय एतला काजे इव सम्मेलन कुना मुन्ने पेश कीयाना। इव सम्मेलन कुना सब्बे प्रतिनिधिर किन तम्मा राय हियाना पूरा अधिकार हियाना, ओरकिन तम्मा राय हियाला रोमी कीयाना कोशिश कीयाना गलत आंता।
- 7) सब्बे डाकू, खुफिया एजेंट, स्थानीय निरंकुश तत्व ओसो जनता किन नुकसान कीयाना बाकी प्रतिक्रियावादीर किन दृढ़ता ते खत्म

कीयाना जरूरी मंता। इद्रम कीयानास्के दमन तुन ढील हियाना नीति लागू कीयाना इत्तेके मुख्य अपराधिर किन जरूर सजा हियाना, दबाव ते वासी काम कीयाना सह-अपराधिर किन सजा हियानायो, सकारात्मक सेवा कीयाना लोकर किन इनाम हियाना नीति लागू कीयाना जरूरी मंता। इदिना लोप्पा बदे वेने पहलू तुन नजरअंदाज कीयानायो। पूरा पार्टी ओसो पूरा राष्ट्र प्रतिक्रियावादीरा षडयंत्रकारी कार्रवाईंग पोरो सतर्क मंदांना जरूरी मंता।

- 8) पार्टी-संगठन तुन सुदृढ़ कीयाना विकसित कीयाना, पार्टी, जन-संगठन नडमा ता संबंध कुन मजबूत कीयाना, आलोचना, आत्मालोचना कीयाना, पूरा पार्टी लोप्पा उंदी शुद्धिकरण आंदोलन ताकी कीयाना बारे ते पार्टी ता केंद्रीय कमेटी निर्देश कुन दृढ़तापूर्वक अमल कीयाना। मना पार्टी सदस्यता बेरसिसी 45 लाख एवतांकु वायाना कालम ते माटु पार्टी-संगठन ता विकास कीयानास्के सतर्क मंदांना नीति लागू कीयाना। राजनीतिक जुआ करसानोर किन पार्टी लोप्पा नेंगला हियानायो। पार्टी लोप्पा नेंगता राजनीतिक सट्टेबाज (जुआ) लोरकिन तेंडसियाला काजे सही निर्णय एतना। माटु राजनीतिक रूप ते जागरूक मत्ता मजदूर लोर किन योजनाबद्ध तरीका ते पार्टी लोप्पा शामिल कीयाना अनि पार्टी-संगठन लोप्पा मजदूर लोरा संख्या बेरसी कीयाना। पाड़ना मुक्त इलाकांग लोप्पा, नहाकुना इलाकांग लोप्पा पार्टी ते भर्ती कीयाना काम बंद कीयाना। पूना मुक्ति इलाकांग लोप्पा भूमि-सुधार काम पूरा आयाना मुन्ने साधारण रूप ते नहाकुना इलाकांग लोप्पा पार्टी-संगठन कुना विकास कीयानायो। इद्रम कीतेके राजनीतिक सट्टेबाज लोर किन पार्टी लोप्पा नेंगना मौका दोरकिंता। 1950 ता ग्रीष्म, शरद ओसो शीत कालम ते पूरा पार्टी लोप्पा उंदी बेहरा स्तर ते शुद्धिकरण आंदोलन ताकी कीयाना; इद आंदोलन तुन अलग-थलग आयवा पार्टी ता बाकी काम संगे गंभीरतापूर्वक

तालमेल कीसोरे ताकी कीयाना; इद आंदोलन लोप्पा कार्यकर्ता लोर, आम पार्टी सदस्य लोरा विचारधारात्मक, राजनीतिक स्तर तुन विकसित कीयाना, काम कीयानास्के आता गलतिंग सुधरे कीयाना, खुद किन वेल्ले योगदान हियाना मानेय समझेमायना घमंड मंदाना विचार तुन दूर कीयाना, नौकरशाही, फरमानशाही तुन खत्म कीयाना, पार्टी, जनता नडमा ता संबंध कुन सुधरे कियाला काजे चुने कित्ता दस्तावेज कुन पढेमायना, काम ता सारांश तेंडना, परिस्थिति ता विश्लेषण कीयाना, आलोचना, आत्मालोचना कीयाना लेक्काटा तरीकांग लागू कीयाना।

नोट

1. इगा 'चीन-सोवियत दोस्ती, एकता, आपसी सहायता समझौता' ता बारे ते वेहताद मंता। 14 फरवरी 1950 ते इदिना पोरो हस्ताक्षर कित्ताद मत्ता।
2. इगा 1950 ते केंद्रीय जनताना सरकार जारी कित्ता 'लोक विजय सममूल्य बौंड' कुना बारे ते वेहताद मंता।
3. 1950 ता इरंगम कालम तल शुरू कीसी उंदी पेरके उंदी पूना मुक्त इलाका लोप्पा बेहरा स्तर ते भूमि-सुधार आंदोलन ताकी कित्ताद मत्ता। 1952 ता इरंगम एवनल बुनियादी रूप ते अल्पसंख्यक राष्ट्र कुना उचुक इलाकांग विडचसी भूमि सुधार काम पूरा कित्ताद मत्ता। पूरा देश ता पाइना ओसो पूना मुक्ति इलाकांग लोप्पा वेल्ले कम जमीन मत्ता लेवेके इनपड़े हिल्ला मत्ता लगभग 30 करोड़ किसान लोर किन लगभग 70 करोड़ मू जमीन दोरकता।
4. अलग-अलग स्तर ता स्थानीय जन-प्रतिनिधि सभांग चुने कीयाना अनि केयना मुन्ने सब्बे रकम ता जनता ना सम्मेलन कुन कित्ताद मत्ता। इवे 1949 ता चीनी जनताना राजनीतिक सलाहकार सम्मेलन कुना प्रोग्राम कुना लोप्पा कित्ता योजना अनुसार जन-प्रतिनिधि सभांग ना काम ओसो अधिकार कुन उंदी पेरके उंदी लागू कियानवु।

नालुंग बगिल तल हमला कीयानायो⁵

6 जून 1950

पार्टी ता सातवी केंद्रीय कमेटी ता दूसरा पूर्ण अधिवेशन पेरके मावा पार्टी नेतृत्व ते नवजनवादी क्रांति तुन राष्ट्रव्यापी जीत दोरकता अनि चीन लोक गणराज्य ता स्थापना आता। इदु उंदी महान जीत आंदू, चीन ता इतिहास लोप्पा उंदी मुन्ने बस्केने दोरकवा लेककटा महान जीत आंदू अक्तूबर क्रांति पेरके दोरकी कित्ता उंदी दुनिया मेंड महत्व मत्ता जीत आंदू। कामरेड स्टालनि ओसो वेल्ले विदेशी कामरेड्स चीनी क्रांति ता जीत उंदी वेल्ले महान जीत आंदू इंजी आल्संतोर। मति मावा वेल्ले कामरेड्स इद्रम आल्सोर बारांकु इत्तेके ओरकिन इद्रम ता संघर्ष ता आदत आता। माटु मावा चीनी क्रांति ता जीत महत्व तुन पार्टी लोप्पा ओसो जनता नडमा व्यापक रूप ते प्रचार कीयाना। इद महान जीत ता परिस्थिति लोप्पा वेने माटु वेल्ले कठिन संघर्ष ओसो बचोनो मुश्किल कुना सामना किया लागा मंता।

माटु देश ता उत्तरी हिस्सा ते 16 करोड़ आबादी वाले इलाकांग लोप्पा भूमि-सुधार काम पूरा आता। इद महान सफलता ता बारे वेहाना जरूरी मंता। मावा मुक्ति युद्ध ता जीत मुख्य रूप ते इदे 16 करोड़ जनता ना भरोसा ते दोरकता। भूमि सुधार सफलतापूर्वक आतांकु च्यांग काई-शोक ना तख्ता पलट कियाला सफल आयना संभव आता। इयेटा इरंगम

⁵ चीनी कम्युनिस्ट पार्टी ता सातवी केंद्रीय कमेटी ता तीसरी पूर्ण अधिवेशन ते हीता भाषण ता उंदी अंश। तीना लोप्पा 'राष्ट्र ता वित्तीय, आर्थिक परिस्थिति तुन बुनियादी रूप ते सुधरे कियाना बगिल ओयला काजे संघर्ष कियाना' हेडिंग वाले रिपोर्ट ता बारे वेहताद मंता अनि ताना लोप्पा वेहता रणनीतिक, कार्यनीतिक विचार कुना बारे ते वेहताद मंता।

ते माटु सम्पूर्ण जमींदार वर्ग ता तख्ता पलट कियाला काजे लगभग 31 करोड़ आबादी वाले इलाकांग लोप्पा भूमि सुधार शुरू कियाकोमा भूमि सुधार काम लोप्पा मना दुश्मन वेल्ले ज्यादा ओसो वेल्ले शक्तिशाली मंतोरा मना दुश्मन: 1) साम्राज्यवाद; 2) थाइवान ओसो तिब्बत ता प्रतिक्रियावादीर; 3) क्वोमिंगतांग ता बाकी ताकतकु, खुफिया एजेंट ओसो डाकू; 4) जमींदार वर्ग ; ओसो 5) साम्राज्यवादिर चीन लोप्पा स्थापना कित्ता मिशनरी स्कूल ओसो धार्मिक हंदी ने मत्ता प्रतिक्रियावादी ताकतकु, अनि क्वोमिंगतांग तल कब्जा कित्ता सांस्कृतिक, शैक्षणिक प्रतिष्ठान कुना लोप्पा मत्ता प्रतिक्रियावादी ताकतकु मंतांग। वीर सब्बे मावा दुश्मन आंदुर। माटु वीर सब्बे दुश्मन संगे लड़ेमायना अनि मुन्ने तुकू बचोनो बेहरा इलाकांग लोप्पा भूमि सुधार काम पूरा किया लागियर। इद उंदी वेल्ले महत्वपूर्ण ओसो इतिहास लोप्पा मुन्ने बस्केने आयवा लेक्कटा संघर्ष आंदु।

क्रांति ता जीत तले मावा अर्थव्यवस्था ता पुनर्गठन वेने संभव आता। इद पुनर्गठन जरूरी मत्ता, मति इंजे इदु मावा पोरो वेल्ले बेहरा बोजा वाटता। अर्थव्यवस्था ता पुनर्गठन कारण ते ओसो युद्ध ताकतांकु उद्योग-वाणिज्य ता उचुन विघटन आतांकु वेल्लेटोर नाराज आसी मंतोरा। इस्सल राष्ट्रीय पूंजीपति वर्ग संगे मना संबंध वेल्ले लब्बड़ मंतांग; बेरोजगार बुद्धिजीवी, बेरोजगार मजदूर, उचुन सुडला दस्तकार वेने नाराज आसी मंतोरा। वेल्ले नहाकुना इलाकांग लोप्पा किसान लोर वेने शिकायत किया मंतोरा। बारांकु इत्तेके इंजे एवनल अगा भूमि सुधार लागू कित्ताद हिल्ले। अनि ओरकिन राज्य तुकू अनाज वेने हिया लागिता।

इंजे मावा आम नीति बाताल मंता? अदु क्वोमिंगतांग ता पिस्ता ताकत कु खुफिया एजेंट ओसो डाकु लोर किन खत्म कीयाना, जमींदार वर्ग ता तख्ता पलट कीयाना, थाइवान, तिब्बत तुन मुक्त कीयाना ओसो साम्राज्यवाद खिलाफ आखरी एवनल लड़ाई जारी तासना। मना फौरी दुश्मन कुन अलगाव ते वाटना ओसो ओरा पोरो हमला कियाला काजे माटु जनता नड़मा नाराज आसी मत्तोरा कुन मना समर्थक बने कीयाना

वेल्ले जरूरी मंता। इंजे इद काम वेल्ले कठिन मत्तेकाई माटु हर संभव तरीका ते इव कठिन परिस्थितिंग कुन दूर कीयाना।

माटु उद्योग-वाणिज्य तुन सही ओसो बेस पुनर्गठन कीयाना अनि कारखानांग लोप्पा दुबारा उत्पादन शुरू कीयाना अनि बेरोजगारी समस्या ता समाधान कीयाना। बेरोजगार मजदूर लोरा खाद्य-समस्या हल कियाला काजे माटु 1 अरब किलोग्राम अनाज तूसना, अनि ओरा समर्थन दोरकी कीयाना। माटु लगान, सूद लोप्पा कटौती कियाकोम, डाकू, स्थानीय निरंकुश तत्व कुना उन्मूलन कियाकोम ओसो भूमि सुधार कियाकोम अस्के किसान समुदाय मावा समर्थन कियार। माटु पिस्वल पिस्सना साधन परहकला सुडला दस्तकार लोरा वेने मदद कीयाना। माटु राष्ट्रीय पूंजीपति वर्ग संगे मना संबंध कु वेल्ले मुशिकल कियवा लेवा उद्योग-वाणिज्य कुन ओसो कर-निर्धारण कु सही कीसी इव संबंध कुन सुधरे कीयाना। माटु बुद्धिजीविरा काजे अलग-अलग रकम ता ट्रेनिंग कोर्स, फौजी, राजनीतिक कॉलेज ओसो क्रांतिकारी प्रतिष्ठान ताकी कियाला, ओरा सेवांग इस्तेमाल कीयाना संगे-संगे ओरकिन शिक्षित कीयाना अनि ओरकिन पूना रूप हियाना। माटु ओरा काजे सामाजिक विकास ता इतिहास, ऐतिहासिक भौतिकवाद ओसो बाकी विषय कुना अध्ययन व्यवस्था कीयाना। माकिन विरोध कियवा मंदाना आदर्शवादिर किन वेने माट इद्रमे बने किया पारंतोमा। ओरकिन मानेय ना जन्म भगवान कित्ता इंदाला हियाना अनि माटु मानेय ना विकास उंदी रकम ता मूज तल आता इंतोमा। उचुन बुद्धिजीविर मुयतोर आतोर ओरा उमर 70 साल तुकु ज्यादा मंता; बस्के एवनल ओरु पार्टी ओसो जनताना सरकार ता समर्थन कींतोर अस्के एवनल माटु ओरा पोषण कीयाना।

पूरा पार्टी तन्ना संयुक्त मोर्चा ता काम वेल्ले बेस कीयाना कोशिश कीयाना। माटु निम्न-पूंजीपति वर्ग ओसो राष्ट्रीय पूंजीपति वर्ग किन मजदूर वर्ग नेतृत्व ते ओसो मजदूर, किसान एकता पोरो आधार आसी गोलंबंद कीयाना। पेरके राष्ट्रीय पूंजीपति वर्ग खत्म आयार मति वर्तमान मंजिल ते माटु अदिन मना गर्रे-हेरे गोलंबंद कीयाना, जेक वाटसियानायो। उंदी बगिल

माटु अदिना खिलाफ संघर्ष कीयाना अनि दूसरा बगिल अदिना संगे एकता कीयाना। माटु मना कार्यकर्ता लोर किन स्पष्ट रूप ते राष्ट्रीय पूंजीपति वर्ग, जनवादी पार्टिंग, सम्माननीय जनवादी लोकुर ओसो बुद्धिजीविरा संगे एकता कीयाना सही ओसो जरूरी मंता इंजी समझे कीयाना अनि तथ्य कुना संगे साबित कीयाना। ओरा लोप्पटल बचोनो लोकुर मुन्ने दुश्मन मत्तेकाई इंजे दुश्मन तल संबंध देहची मावा पक्ष ते वात्ताद मंता; एकता कीयाना संभावना कम लेवेके ज्यादा मत्ता सब्बे तोरा संगे एकता कीयाना। मेहनतकश जनता ना हित ते मत्तोरा संगे एकता कीयाना। इंजे माट इदे कार्यनीति लागू कीयाना।

अल्पसंख्यक राष्ट्रीयता संगे एकता कीयाना वेल्ले महत्वपूर्ण मंता। पूरा देश लोप्पा ओरा आबादी लगभग 3 करोड़ मंता। ओरा इलाका लोप्पा सामाजिक सुधार उंदी वेल्ले महत्वपूर्ण मुद्दा मंता इदिन वेल्ले सतर्कता ते हल कीयाना। माटु बद्रमाई होश हिल्ला लेक्का काम कीयानायो बारांकु इत्तेके मनम इद्रम काम कीतेके गड़बड़ कीतोमा बस्के एवनल परिस्थिति अनुकूल आयो अस्के एवनल सुधार कीयानायो। ओसो सिर्फ उंदी परिस्थिति अनुकूल मंजी बाकी परिस्थितिंग अनुकूल हिल्लेके वेने इद्रम ता सुधार कीयानायो। इत्तेके सुधार कीयानाए आयो इंजी आयो। प्रोग्राम ते रास्ता लेक्का अल्पसंख्यक राष्ट्रीयतांग ना इलाकांग लोप्पटा रीति-रिवाज कुना लोप्पा सुधार कीयाना लेक्का। मति इद्रम ता सुधार खुद अल्पसंख्यक राष्ट्रीयतांगे कीयाना। जन समर्थन दोरकी कियवा लेवा जनता ना सशस्त्र सेना लेवा ओसो अल्पसंख्यक राष्ट्रीयतांग ना कार्यकर्ता लोर हिल्ला जन व्यापी बदे वेने सुधार कीयानायो। माटु अल्पसंख्यक राष्ट्रीयतांग किन तम्मा कार्यकर्ता लोर किन प्रशिक्षित कियाला मदद कीयाना अनि अल्पसंख्यक राष्ट्रीयता ना व्यापक जन समुदाय संगे एकता कीयाना।

सारांश ते माटु नालुंग बगिल तल हमला कीयानायो। नालुंग बगिल तल हमला कीयाना गलत आयार, इद्रम कीतेके देश लोप्पा प्रतिकूल परिस्थिति पुट्टियार। माटु वेल्ले लोकुर किन मना दुश्मन बने कीयानायो। माटु उचुन इलाकांग लोप्पा छूट हियाना अनि परिस्थिति लोप्पा

लचीलापन तत्ताना। मना हमला सिर्फ उंदे दिशा ते केंद्रित कीयाना। माटु मना काम बेस कीयाना अनि मजदूर, किसान, सुडला दस्तकार लोरा समर्थन दोरकी कीयाना अनि राष्ट्रीय पूंजीपति वर्ग ओसो बुद्धिजीविरा बेहरा संख्या मावा विरोध तल बचेमायाना। इद्रम क्वोमिंगतांग ता पिस्ता ताकत, खुफिया एजेंट, डाकू, जमींदार वर्ग ओसो थाइवान, तिब्बत ता प्रतिक्रियावादी अलगाव ते वायनूर अनि साम्राज्यवादिर किन वेने ओरु मना देश ता जनता मुन्ने वरौरे मत्ता लेक्का आयरा। इदे मना नीति आंदू, मना रणनीतिक, कार्यनीति आंदू, इदे पार्टी ता सातवी केंद्रीय कमेटी ता तीसरी पूर्ण अधिवेशन ता कार्यदिशा आंदू।

असली क्रांतिकारी बनेमायना⁶

23 जून 1950

वर्तमान अधिवेशन ते हत्ता कालम ता मना अनुभव कुना सारांश तेंडताद मंता अनि अलग-अलग निर्देशक उसूल निर्धारित किताद मंता।

इद काम माटु अलग-अलग राष्ट्रीयतांग, जनवादी वर्ग, जनवादी पार्टिंग, जन-संगठनकु ओसो अलग-अलग सम्माननीय जनवादी लोकुरा प्रतिनिधिरा इद सम्मेलन लोप्पा संयुक्त रूप ते किताद मंता। सम्मेलन लोप्पा किता विचार-विमर्श लोप्पा सिर्फ जनताना राजनीतिक सलाहकार सम्मेलन ता राष्ट्रीय कमेटी सदस्य लोरे आयवा केंद्रीय जनताना सरकार ओसो प्रशासनिक जनताना सरकार (सैनिक, प्रशासनिक कमीशनकु)¹ ओसो प्रांत, म्युनिसिपलटिंग ना जनताना सरकार कुना वेल्ले कार्यकर्ता लोर, सब्बे जनता ना प्रांतीय, म्युनिसिपल सम्मेलनकु² ना सलाहकार समितिंग ना प्रतिनिधिर, विशेष रूप ते केयता बचोनो देशभक्त लोकुर वेने शामिल आतोरा। इद्रम माटु सब्बे तोरा राय एतसी, किता काम कुना विश्लेषण कीयाना अनि वायना कालम काजे उसूलकु निर्धारित कियाला सफल आया परतोम। इद तरीका लगातार इस्तेमाल कीसोर मंदाकोम, प्रशासनिक जनताना सरकारकु (सैनिक, प्रशासनिक कमीशन) ओसो प्रांत, म्युनिसिपल जनताना सरकारकु वेने इदे तरीका लागू कियानुंग इंजी आशा कीताना इंजे एवनल मावा कमेटी ता अधिवेशन लेक्का सिर्फ सलाह हियाना लेक्का मत्ता। मति असल इत्तेके मावा अधिवेशन लोप्पा

⁶ चीनी जन राजनीतिक सलाहकार सम्मेलन ता पहली राष्ट्रीय कमेटी ता दूसरा अधिवेशन लोप्पा समापन-भाषणा।

कित्ता निर्णय तुन केंद्रीय सरकार जरूर स्वीकार कियार अनि जरूर अमल कियार, अदु इद्रम कीयाना जरूरी वेने मंता।

माटु राष्ट्रीय कमेटी काम ता बारे ते पेश कित्ता रिपोर्ट ओसो केंद्रीय जनताना सरकार काम ता बारे ते पेश कित्ता अलग-अलग रिपोर्ट कुन पास कीतोमा इव रिपोर्ट भूमि सुधार, राजनीतिक, सैनिक, आर्थिक, वित्तीय काम, कर-तय कीयाना, सांस्कृतिक, शैक्षणिक काम ओसो न्यायलय काम ता बारे मंतांग। इव सब्बे रिपोर्टकुना लोप्पा हत्ता कालम ते कित्ता मना काम ता अनुभव कुना समीक्षा कीसी वायना कालम ता काम काजे मार्गदर्शक उसूल पंडताद मंता। पूना राज्य ता स्थापना पेरके मना हर इलाका ते शुरू आया मंता लेवेके विकसित आसोर मत्तांकु अधिवेशन ता कार्यसूची लोप्पा वेल्ले मुद्दांग शामिल किताद मंता। पूरा देश ता जनता सब्बे मोर्चा ते वेल्ले जीवा कीसी जनता ना उंदी महान ओसो सही क्रांतिकारी संघर्ष ताकी किया मंता, इदु सैनिक, आर्थिक, विचारधारात्मक, भूमि-सुधार संबंधित मोर्चा ते ताकी कीयाना उंदी मुन्ने बस्केने आयवा ओसो वेल्ले महान संघर्ष आंदू अद्रमासी सब्बे रकम ता काम ता सारांश तेंडना अनि मार्गदर्शक उसूल कुना निर्धारण कीयाना जरूरी मंता। अदिन काजे कार्यसूची लोप्पा माटु वेल्ले मुद्दांग शामिल कीतोमा कानून अनुसार माटु हर साल रेंडु अधिवेशन केया लागियर, पहली एजेंडा लोप्पा वेल्ले मुद्दांग शामिल किया लागियर अनि दूसरा एजेंडा लोप्पा कम। इद परिस्थिति लोप्पा इद्रमे किया लागियर, बारांकु इत्तेके चीन उंदी बेहरा देश आंदू, अदिना असल जन संख्या 47.5 करोड़ तुकू वेने ज्यादा मंता। संगेने अदु जन-क्रांति ता उंदी महान ऐतिहासिक कालम तले वेंडा मंता। अदिन काजे माटु इव सब्बे किताद मंता अनि नावा हिसाब ते माटु इद्रम कीसी बेसे कीतोमा।

मावा वर्तमान अधिवेशन लोप्पा विचार-विमर्श काजे वेल्ले विषयकु तासताद मंता। अविना लोप्पा मुख्य विषयकु- पाड़ना भूमि-व्यवस्था बदले कीयाना सवाल मंता। माटु चीनी कम्युनिस्ट पार्टी ता केंद्रीय कमेटी पेश कित्ता 'भूमि सुधार कानून ता ड्राफ्ट'³ ता बारे ते वेहतोम अनि ताना लोप्पा

बचोनो उपयोग वायना संशोधनकु किताद मंता। इद वेल्ले बेसता पोल्लो आंदू नाकिन, पूना चीन ता दसियों करोड़ नाहकुना जनता किन मुक्ति तुकू मौका दोरकता ओसो मना राष्ट्र तुन औद्योगिकरण काजे बुनियादी शर्त दोरकतांकु वेल्ले खुशी आता अनि नन्ना इदिना अभिवादन कीताना चीन ता आबादी लोप्पा ज्यादातर लोकुर किसान मंतोरा। ओराए मदद ते क्रांति जीड़िता अनि देश ता औद्योगिकरण लोप्पा सफलता दोरकना वेने किसान लोरा कारण ते ने संभव आता। अदिन काजे मजदूर वर्ग तुन भूमि सुधार कार्य लोप्पा किसान लोरा सक्रिय रूप ते मदद कीयाना; शहरी निम्न-पूंजीपति वर्ग ओसो राष्ट्रीय पूंजीपति वर्ग वेने इदे काम ता समर्थन कीयाना अनि सब्बे जनवादी पार्टिंग, जन-संगठन काजे इद्रम कीयाना वेल्ले जरूरी मंता। युद्ध ओसो भूमि सुधार रेंडासी नवजनवाद ता ऐतिहासिक कालम लोप्पा चीन ता हर मानेय ओसो हर राजनीतिक पार्टी किन अग्नि-परीक्षा तल वेंडा लागियरा। बोरु क्रांतिकारी जनता ना संगे वांतोर ओरु क्रांतिकारी आंदुर अनि बोरु साम्राज्यावाद, सामंतवाद ओसो नौकरशाही-पूंजीवाद संगे दांतोर ओरु वरोर प्रतिक्रांतिकारी आंदुर। बोरु सिर्फ क्रांतिकारी जनता ना संगे मंदाना पोल्लॉंगे कींतोर ओरु सिर्फ पोल्लॉंगे कीयाना क्रांतिकारी आंदुर। बोरु क्रांतिकारी जनता ना संगे वायना पोल्लॉंग ओसो व्यवहार ते वेने लागू कींतोर ओरे वरोर असली क्रांतिकारी आंदुर। युद्ध ता अग्नि-परीक्षा इंजे समाप्त आतद मंता, माटु सब्बेतोर अदिन वेंडतोम अनि पूरा देश ता जनता इदिनकु वेल्ले खुश मंता। इंजे माटु भूमि सुधार ता अग्नि-परीक्षा तल वेंडा लागियरा। माटु बद्रम युद्ध ता अग्नि-परीक्षा तल वेंडतोमो अद्रमे इद अग्नि-परीक्षा तल वेने वेंडाकोम इंजी आशा कीताना। वाटु, माटु इद समस्या पोरो ओसो ज्यादा विचार-विमर्श कियाकाल अनि मना विचार कुन सुधरे कियाकाल ओसो हड्डा ते हड्डा काल्पसी मुन्ने हंजोरे उंदी महान सामंतवाद विरोधी संयुक्त मोर्चा बने कियाकाल। अस्केने माटु इद अग्नि-परीक्षा तल वेंडला जनता ना नेतृत्व किया परितोम अनि ओरा मदद किया परितोम। बस्के माटु युद्ध ओसो भूमि सुधार ता अग्नि-परीक्षा पास कीतोम अस्के

समाजवाद ता अग्नि-परीक्षा, राष्ट्रव्यापी स्तर ते समाजवाद तत्ताना अग्नि-परीक्षा ते वेने हल्कोए पास आया परितोमा बोरु क्रांतिकारी युद्ध लोप्पा ओसो भूमि सुधार व्यवस्था ता क्रांतिकारी बदलाव कियाला योगदान हितोर, बोरु वायना सालकुना लोप्पा आर्थिक, सांस्कृतिक निर्माण ते लगातार योगदान हीसोर मंदानुर, ओरकिन निजी उद्योग कुना राष्ट्रीय ओसो कृषि ता सामाजिकरण कीयानास्के (इंजे वेने वेल्ले जेक मंता) जनता मरंगो आयर अनि ओरा वायना कालम वेहच ते मंता। इद्रम मावा देश मजबूती ते मुन्ने दायार; अदु युद्ध तल वेंडता अनि नवजनवादी बदलाव तले वेंडा मंता, वायना कालम ते मावा अर्थव्यवस्था, संस्कृति वेल्ले विकसित आयार, परिस्थितिंग अनुकूल आयनुंग, पूरा जनता बेस आलिससी तम्मा सहमति पेश कियार अस्के बदे जल्दबाजी कियवा ओसो सही तरीका ते समाजवाद ता पूना कालम लोप्पा नेंगियार। नावा हिसाब ते लोकुरा लोप्पा विश्वास पैदा आसी ओरु वेल्ले आल्सना विड्डी कियाला काजे “बस्के नाकिन विड्डीसानोर पुन्नोने, अनि जनता ना सेवा कियाला बचोन आल्सतेक वेने नाकिन सेवा कियाला हिवोर आयनुरा” इंदाना पोल्लो बस्केने वायो आयार इंजी स्पष्ट कींताना बोरु निज्जमे जनता ना सेवा कियाला आल्संतोर, बोरु कठिन परिस्थिति ते वेने जनता ना सहायता कींतोर, बेसता काम कींतोर, नड्माए काम कीयाना विड्डीसवा लेवा लगातार काम कींतोर ओरकिन जनता ओसो जनताना सरकारकु बस्केने विड्डीसोंग, अनि ओरकिन तम्मा रोजी कमै कियाला ओसो तम्मा सेवा देश तुकू हियाना मौका हियवा मंदाना बदे कारण मन्ने आंता।

इद महान उद्देश्य तुन पोयसी माटु अंतरराष्ट्रीय सोवियत संघ, जनता ना लोकशाही वाले देश कु ओसो सब्बे जागा ना शांति, जनवादी ताकत कुना संगे वृद्धता ते एकता कीयाना। इदिना बारे ते उचुन वेने पेरके-मुन्ने, दुलमुल आयनायो। देश लोप्पा माटु सब्बे राष्ट्रीयतांग, जनवादी वर्ग, जनवादी पार्टिंग, जन-संगठनकु, देशभक्त लोकुरा संगे एकता कीयाना अनि क्रांतिकारी संयुक्त मोर्चा तुन सुदृढ बने कीयाना। बोरु क्रांतिकारी संयुक्त मोर्चा तुन सुदृढ कियाला योगदान हींतोर ओरु सही मंतोर, माटु ओरा

स्वागत कीतोम; बोरु सुदृढीकरण तुन नकुसान कीतोम ओरु गलत मंतोर ओरा माटु विरोध कीतोम। क्रांतिकारी संयुक्त मोर्चा तुन सुदृढ कियाला काजे माटु आलोचना, आत्मालोचना ता तरिका लागू कीयाना जरूरी मंता। इद तरीका तुन लागू कीयानास्के मावा मापदंड मावा वर्तमान बुनियादी कानून मंदिता-प्रोग्राम। इद अधिवेश ते माटु प्रोग्राम अनुसार आलोचना-आत्मालोचना ता तरिका लागू कीतोम। माटु सब्बे तोर किन सच्चाई पोरो नितसी मंडाला ओसो मना गलती कुन सुधरे कियाला काजे प्रोत्साहन हियाना उंदी बेसता तरिका मंता। इदे जनता ना राज्य लोप्पा पूरा क्रांतिकारी जनता तन्ना किन शिक्षित कीयाना ओसो तन्ना बदलाव कियाला काजे लागू कीयाना तरिका आंदू। जनता ना जनवादी नेतृत्व रेंडु तरिकांग इस्तेमाल कीता। दुश्मन काजे अदु जरूरी मत्ताचोन जोम ओरकिन राजनीतिक कार्रवाईंग लोप्पा हिस्सा एतला हीवो, जन सरकारी कानून कुना पालन कीयाना अनि मेहनत कीसी पूना मानेय बनेमायना उद्देश्य ते श्रम लोप्पा शामिल कीता। इदिना उल्टा जनता काजे अदु मजबूर कीयाना तरिका आयवा जनवाद ता तरिका इस्तेमाल कीता। इत्तेके अनिवार्य रूप ते राजनीतिक कार्रवाईंग लोप्पा हिस्सा एतना अनि बदे वेने काम कियाला काजे मजबूर कियवा लेवा ओरकिन शिक्षित कीयाना, समझे कीयाना जनवादी तरिका लागू कीता। इद्रम ता शिक्षा जनता काजे उंदी रकम ता आत्म-शिक्षा मंदिता। आलोचना-आत्मालोचना इदिना बुनियादी तरिका आंदू। पूरा देश ता सब्बे राष्ट्रीयतांग, जनवादी वर्ग, जनवादी पार्टिंग, जन-संगठन ओसो देशभक्त जनवादी लोकुर इदे तरिका लागू कीतोम।

नोट

- 1) अस्के देश कु 6 प्रशासनिक इलाका ने तूसताद मत्ता, इत्तेके उत्तर-पूर्व, उत्तरी चीन, पूर्वी चीन, मध्य-दक्षिण, दक्षिण-पश्चिम ओसो उत्तर-पश्चिम। हर प्रशासनिक इलाका लोप्पा उंदी ब्यूरो मत्ता अदिन चीनी कम्युनिस्ट पार्टी ता केंद्रीय कमेटी ता प्रतिनिधित्व कियानदु। उत्तरी चीन विडचसी बाकी 5 इलाकांग लोप्पा तम्मा-तम्मा

प्रशासनिक संगठकू मत्तांग। अदिन उत्तर-पूर्व ते जनताना सरकार पोरोल ते ओसो बाकी नालुंग इलाकांग लोप्पा सैनिक, प्रशासनिक कमीशन पोरोल ते पुंदानोरा नवम्बर 1952 ते ओसो उंदी बेरा इव सब्बे ना पोरोल प्रशासनिक परिषद इंजी तासमूडाता। इद्रम ताए उंदी परिषद उत्तरी चीन लोप्पा वेने स्थापित आता। 1954 ते इव सब्बे प्रशासनिक परिषद कुन भंग कियमूडाता।

- 2) सब्बे जनता ना प्रांतीय, म्युनिसिपल सम्मेलन कुना सलाहकार समितिग ना चुनाव सब्बे जनता ना समान स्तर ते सम्मेलन कीयाना। सब्बे जनता ना सम्मेलन कुना अधिवेशन आयवेके ओरा सलाहकार कमेटिंग सम्मेलन कुना लोप्पा मानेमाता प्रस्ताव कुन लागू कियाला जनताना सरकार कुना सहायता कियाला काम कियानवु।
- 3) इगा 'चीन लोकगण राज्य ता भूमि सुधार कानून ता ड्राफ्ट' ता बारे ते वेहताद मंता। इदिन चीनी कम्युनिस्ट पार्टी ता केंद्रीय कमेटी 14 जून 1950 ते चीनी जनताना राजनीतिक सलाहकार सम्मेलन ता पहली राष्ट्रीय कमेटी ता दूसरा अधिवेशन मुन्ने विचार-विमर्श काजे पेश कीसी मत्ता। अधिवेशन लोप्पा विचार-विमर्श ओसो अनुमोदन आता पेरके केंद्रीय जनताना सरकार परिषद इदिन स्वीकार कित्ता। अदे साल 30 जून ते केंद्रीय जनताना सरकार ता अध्यक्ष माओ त्सेतुंग 'चीन लोक गणराज्य ता भूमि सुधार कानून' जारी कित्तोर।

मीटु पूरा राष्ट्र काजे आदर्श आंदिर⁷

25 सितम्बर 1950

पडियोरा राष्ट्रीय सम्मेलन ओसो उद्योग, कृषि लोप्पा ओसो सेना ते काम कीयाना आदर्श श्रमिक लोरा राष्ट्रीय सम्मेलन ता डेलीगेट कामरेड्स!

चीनी कम्युनिस्ट पार्टी ता केंद्रीय कमेटी मीवा इव सम्मेलन कुना हार्दिक अभिनंदन कीता अनि मीटु कित्ता काम काजे मीकिन धन्यवाद कीता ओसो मीवा अभिवादन कीता।

दुश्मन तुन खत्म कीयाना संघर्ष लोप्पा, औद्योगिक उत्पादन, कृषि-उत्पादन ता पुनर्स्थापना ओसो विकसित कीयाना संघर्ष लोप्पा मीटु वेल्ले कठिन परिस्थितिं कुन दूर कीसी साहस, बुद्धिमत्ता, सक्रियता ता परिचय हीतिर। मीटु पूरा चीनी राष्ट्र काजे आदर्श मंतिर, जनता ना काम तुन सफलतापूर्वक मुन्ने ओयना आस्कुड आंदिर, जनताना सरकार ता विश्वासनीय मोदुल आंदिर। जनताना सरकार ओसो मीवा, सब्बे जीवा ता डेलीगेट कामरेड्स ना ओसो देश ता सब्बे पडियोर, आदर्श श्रमिक लोरकिन मीटु संघर्ष संगे ओसो जनता संगे लगातार करियसोर मंदाना इंजी आह्वान कीता। सिर्फ घमंड, गलत समझदारी तल जेक मंदाना, रोमवा लेवा करियसोर मत्तेकेने मीटु महान चीन लोक गणराज्य काजे लगातार योगदान हिया परिंतिर। इद्रम मीटु मीवा सम्मान-गौरव तुन बचे कीसी तासिंतिर।

⁷ पडियोरा राष्ट्रीय सम्मेलन ओसो उद्योग, कृषि लोप्पा ओसो सेना लोप्पा काम क्रियाना आदर्श श्रमिक लोरा राष्ट्रीय सम्मेलन ता संयुक्त उद्घाटन समारोह लोप्पा चीनी कम्युनिस्ट पार्टी ता केंद्रीय कमेटी बगिल तल पेश कित्ता अभिनंद संदेश।

चीन लोप्पा उंदी शक्तिशाली राष्ट्रीय प्रतिरक्षा सेना ओसो उंदी शक्तिशाली अर्थव्यवस्था ता निर्माण कीयाना जरूरत मंता। इव रेंडासी काम वेल्ले महत्व ता काम आंदुंगा। इव रेंडासी काम जन मुक्ति सेना ता सब्बे कमांडर, योद्धा लोरा संगे सब्बे मजदूर, किसान ओसो बाकी सब्बे जनता ना संगे गटिंग एकता कीयाना ओसो कलियसी कोशिश कीयाना पोरो आधार आसी मंता। नेंडु चीन लोक गणराज्य ता स्थापना ता पहली बरसगांठ जल्दिए वाया मंता। मीटु कीयाना सम्मेलन कुना वेल्ले महत्व मंता। माटु मीवा सम्मेलन कु सफल आयनुंग अनि वायना कालम ते माकिन मीवा काम ते वेल्ले जीत दोरकियर इंजी आशा कीतोमा।

चीनी जन स्वयंसेवक लोर किन आदेश⁸

8 अक्तूबर 1950

चीनी जन सेवक लोर ओसो सब्बे स्तर ता नेतृत्वकारी कामरेड्स!

1. कोरिया जनता ना मुक्ति युद्ध लोप्पा सहायता कीयाना ओसो अमेरिका साम्राज्यवाद ओसो ओरा पालतू नैकु ना आक्रमण ता प्रतिरोध कीयाना संगे कोरिया जनता, चीनी जनता ओसो पूर्व ता बाकी सब्बे देश कुना जनता ना हितकुना रक्षा कीयाना उद्देश्य ते नन्ना चीनी जन स्वयंसेवक जल्दी कोरिया ते नेंगना, कोरिया कामरेड्स ना संगे तालमेल किसोरे आक्रमणकारिरा संगे टक्कर एतना ओसो जीत दोरकी कीयाना इंजी आदेश हीतान।
2. कोरिया ते नेंगता पेरके चीनी जन स्वयंसेवक लोर कोरिया जनता, जन सेना, जनवादी सरकार, श्रमिक पार्टी, बाकी जनवादी पार्टिंग, कोरिया जनता ना नेताल कामरेड किम इल संग ना संगे नरम व्यवहार कीयाना अनि ओरा सम्मान कीयाना, फौजी, राजनीतिक, अनुशासन ता सखती ते पालन कीयाना जरूरी मंता। इदु मीवा फौजी कार्य तुन पूरा कियाला गारंटी काजे उंदी वेल्ले महत्वपूर्ण राजनीतिक आधार आंद।
3. मीटु विभिन्न संभव आता, अनिवार्य मुश्किल कुना पूरा अंदाजा वाटना, अविन दूर कियाला काजे वेल्ले जोश संगे, सतर्कता ते सहनशक्ति ते काम कियाला तैयार मंदाना। सम्पूर्ण रूप ते हूडतेके इंजे अंतरराष्ट्रीय, स्थानीय परिस्थिति मावा काजे अनुकूल

⁸ चीनी जन स्वयंसेवक लोरा पोरोल ते उंदी आदेश ता उचुक अंशकु।

ओसो आक्रमणकारिरा काजे प्रतिकूल मंता। माटु सब्बे
कामरेड्स दृढता ते, बहादूरी तोहना अनि अगाटा जनता ना संगे
एकता कीयाना, आक्रमणकारिरा संगे जूझेमायाला निपुण मत्तेके
आखरी जीत मावाए आयार।

माओ त्सेतुंग
अध्यक्ष, चीनी जन क्रांतिकारी फौजी कमीशन
8 अक्तूबर 1950, पेकिंग

चीनी जन स्वयंसेवक लोर किन कोरिया ता हर मेट्टा, हर डोड्डा, हर मर्रा ओसो रोंडा ता उंदी कटिया ता वेने सम्मान कीयाना⁹

19 जनवरी 1950

चीनी ओसो कोरिया कामरेड्स किन पाल तम्मोर लेक्का गटिग एकता आयना। सुख-दुःख ते वरोर-दूसरो ना कै पोयसी ताकना अनि हायना-पिस्सना लोप्पा वरोर-दूसरो ना मदद कीयाना। मना दुश्मन तुन हारे कियाला काजे आखरी एवनल लड़ेमासोर मंदाना। चीनी कामरेड्स कोरिया ता काम तुन खुद तम्मा काम लेक्का समझेमायना। कामरेड्स ओसो योद्धा लोर किन कोरिया ता हर मेट्टा, हर डोड्डा, हर मर्रा, ओसो हर रोंडा ता सम्मान कीयाना इंजी करिहाना। माटु मना देश लोप्पा इव सब्बे ना सम्मान कित्ता लेक्का, मना जनता ना संगे व्यवहार कित्ता लेक्का कोरिया जनता ना उंदी सुई लेवेके उंदी नूल (धागा) ता तुकड़ा वेने तेहनायो। इदु जीत दोरकी कीयाना राजनीतिक आधार आंदू। माटु इद्रम कीतेके आखरी जीत जरूर दोरकियर।

⁹ चीनी जन स्वयंसेवक लोर किन हीता उंदी आदेश।

चीकपा ता केंद्रीय कमेटी ता राजनीतिक ब्यूरो ता विस्तृत मीटिंग लोप्पा स्विकार कित्ता प्रस्ताव ता मुख्य मुद्दांग¹⁰ 18 फरवरी 1950

राजनीतिक ब्यूरो फरवरी नइमा उंदी मीटिंग कित्ता, ताना लोप्पा केंद्रीय कमेटी ता सब्बे ब्यूरोंग ना जिम्मेदार कामरेड्स शामिल आतोर अनि अलग-अलग महत्वपूर्ण सवाल कुना पोरो विचार-विमर्श कित्तोर। इंजे माट्टु मीकिन प्रस्ताव ता मुख्य मुद्दांग ना बारे ते वेंहितोमा।

1. तैयारी काजे 22 महिनांग

“तैयारी काजे 3 सालकु ओसो योजनाबद्ध आर्थिक निर्माण काजे दस साल” ता इद विचार प्रांतीय ओसो म्युनिसिपल स्तर ओसो अदिना पोरोटा स्तर ता सब्बे कार्यकर्ता लोर किन स्पष्ट रूप ते समझे कीयाना। इंजेटले तैयारी काजे सिर्फ 22 महिनांगें पिस्तांग अदिन काजे सब्बे रकम ता काम लोप्पा रफ्तार बेरसी किया लागियर।

2. अमेरिका आक्रमण ता प्रतिरोध कीयाना ओसो

कोरिया ता सहायता कियाला काजे प्रचार, शिक्षा आंदोलन

इद आंदोलन तुन देशव्यापी स्तर ते ताकी कियाला काजे लगातार कोशिश कीयाना। आंदोलन शुरू आता जागा ते गंभीरता बेरसी कीयाना,

¹⁰ इदु उंदी अंदरूनी पार्टी सरकुलर आंदू। इदिना मसौदा कामरेड माओ त्सेतुंग चीकपा (चीनी कम्युनिस्ट पार्टी) ता केंद्रीय कमेटी काजे तैयार कीसि मतोर।

आंदोलन शुरू आयवा जागा ते विस्तार कीयाना अनि इद शिक्षा तुन देश ता सब्बे जनता एवनल एवसी कीयाना गारंटी कीयाना।

3. भूमि-सुधार

- 1) खेतीबाड़ी कीयानास्के सब्बे जागा ने उचुन जोम काजे भूमि सुधार रोमी कीयाना अनि अनुभव कुना सारांश तेंडना।
- 2) इयेंड उंदी फसल कोयला कोशिश कीयाना।
- 3) किसान प्रतिनिधिरा काउंटी स्तर ता सम्मेलन पोरो ओसो प्रशिक्षण-कक्षांग पोरो आधार आसी मंदांना।
- 4) अनुकूल परिस्थितिंग तैयार कियाला काजे सक्रिय रूप ते काम कीयाना। प्रतिकूल परिस्थिति मत्तास्के भूमि-सुधार जबरन लागू कीयानायो।
- 5) भूमि सुधार काम पूरा आतास्के उत्पादन ओसो शिक्षा काम लोप्पा लगे मायना।
- 6) जमानत ता रकम किस्त संगे वापिस कीयाना¹ पूर्वी चीन ता तरीका मंजूर किताद मंता।
- 7) किसान लोर किन शारिरीक यातनांग हियानायो इंजी समझे कीयाना।
- 8) भूमि सुधार पेरके ज्यादा संख्या ते जिला, श्यांग स्थापना कीयाना ओसो हर जिला, श्यांग लोप्पा सुडला इलाका तासना।

4. प्रतिक्रांतिकारीरा दमन

1. साधारण रूप ते बोनकिने हौकना सजा ता निर्णय कीयाना मुन्ने समस्या तुन जनता मुन्ने पेश कीयाना अनि अदिना बारे ते जनवादी लोकुरा संगे सलाह-सुझाव कीयाना।
2. इद काम पोरो कड़ा नियंत्रण तासना, अंधाधुंध कार्यवाही ना विरोध कीयाना ओसो गलतिंग कीयाना तुकू बचेमायना।

3. “अंदरूनी परत”² पोरो ध्यान हियाणा, पाड़ना कर्मचारिण ओसो मावा काम ते इंजे शामिल आता बुद्धिजीविण नडमा मकसी मत्ता प्रतिक्रांतिकारी किण सतर्कता ते बाहर तेंडना।
4. “अंदरूनी परत” पोरो ध्यान हियाणा, मौका दोरकी कीसी पार्टी लोप्पा नेंगता प्रतिक्रांतिकारी किण सतर्कता ते तेंडसी वाटना, गोपनीय पोल्लोंग ना रक्षा कीयाना काम तुण वेल्ले सुदृढ़ कीयाना।
5. संगेने कार्यकर्ता लोर किण शिक्षित कीयाना अनि काम लोप्पा ओरा समर्थन कीयाना।

5. शहरी काम

1. केंद्रीय कमेटी ता हर ब्यूरो, उपब्यूरो, प्रांत, म्युनिसिपलटी, प्रशासनिक इलाका स्तर ता हर पार्टी-कमेटी इयेंड केंद्रीय कमेटी पेश कित्ता एजेंडा अनुसार शहरी काम ता बारे ते रेंडु मीटिंग कीयाना, इस संबंध ते रेंडु बेरा रिपोर्ट हियाणा।
2. शहरी काम लोप्पा पार्टी कमेटिंग ना नेतृत्व ते सुदृढ़ कीयाना, सातवी केंद्रीय कमेटी ता दूसरी पूर्ण अधिवेशन ता प्रस्ताव तुण अमल कीयाना।
3. कार्यकर्ता लोर किण शिक्षित कीयाना, ओरा दिमाग ते मजदूर वर्ग पोरो भरोसा तासना विचार स्पष्ट कीयाना।
4. कारखाना ते पार्टी उत्पादन-योजनांग कुण केंद्रीय कार्य बने कीसोरे पार्टी संगठन, अथॉरिटी, ट्रेड यूनियन ओसो नौजवान संघ ता काम पोरो तन्ना एकीकृत नेतृत्व लागू कीयाना।
5. उत्पादन बेरसी कीसी मजदूर लोरा पिस्वल सुधरे कीयाना पूरा कोशिश कीयाना।
6. उत्पादन ओसो मजदूर लोरा जरूरी सेवा कीयाना विचार तुण शहरी निर्माण ता योजना लोप्पा शामिल कीयाना।

7. अखिल चीन ट्रेड यूनियन फेडरेशन ओसो उच्च स्तर ता हर ट्रेड यूनियन कु दोड़ स्तर ता ठोस समस्यांग हल कियाला मदद कीयाना।
8. पार्टी-कमेटींग, ट्रेड यूनियनकु आदर्श इकाइंग ना स्थापना पोरो जोर हियाना अनि अविना अनुभव कुन जल्दीए दूसरा जागा ने फैले कीयाना।

6. पार्टी-सुदृढीकरण ओसो पार्टी-निर्माण

1. मना पार्टी उंदी महान, सम्माननीय ओसो सही पार्टी आंदू इंजी माटु जरूर ऐलान कीयाना अनि सब्बे स्तर ता कार्यकर्ता लोरकिन स्पष्ट रूप ते समझे कीयाना जरूरी मंता। मति संगेने ओरकिन स्पष्ट रूप ते इंजे वेने हल कीयाना लेक्कटा बचोनो समस्यांग मंतांग इंजी समझे कीयाना। पूना मुक्त इलाकांग लोप्पा पार्टी-निर्माण कीयानास्के सतर्क मंदाना।
2. पार्टी ता सुदृढीकरण ओसो निर्माण कीयाना काम केंद्रीय कमेटी ओसो केंद्रीय ब्यूरोंग ना कड़ा नियंत्रण ते कीयाना। दोड़ स्तर ते संगठन कुन विचार वात्ता लेक्का कार्रवाईंग कीयानायो।
3. पार्टी ता सुदृढीकरण काम मूंड साल लोप्पा पूरा कीयाना। इदिना काजे दोड़ रास्ता लेक्का काम कियाना: उंदी साल लोप्पा (1951) व्यापक रूप ते कम्युनिस्ट बद्रम मंदाना इंजी शिक्षित कियाला काजे इस्तेमाल कीयाना। सब्बे सदस्य लोर किन वरोर कम्युनिस्ट ना स्वरूप बद्रम मंता इंजी वेहाना। इद्रम कीयानास्के संगठनात्मक कार्य काजे कार्यकर्ता लोर किन ट्रेनिंग वेने हियाना। अस्केने नमूना पेश कीयाना आदर्श इकाइंग कुना इस्तेमाल कीयाना। ताना पेरेके ओरा अनुभव कुना वेहच ते पार्टी ता सुदृढीकरण कीयाना; मति शहर कुना लोप्पा काम 1951 ते शुरू आया परिंता। पार्टी ता सुदृढीकरण कीयानास्के सबसे मुन्ने

- ‘चौथी श्रेणी ता लोकर’³ कुन आचिसी तेंडसियाना। पेरके ‘दूसरा श्रेणी ता लोकर’ अनि ‘तीसरी श्रेणी ता लोकरा’ नडुमा अंतर कीयाना। पेरके ओरकिन शिक्षित कीतेकाई पार्टी-सदस्य एवनल एव्वा परवोर किन पार्टी विडसना सलाह हियाना। मति ओरु खुद विडसना लेक्का ओरकिन दुक्कम वायवा लेक्का हूडना। 1948 लेक्का ‘बंडांग गुचिहना’⁴ कार्रवाईंग कीयानायो।
4. शहर ओसो पूना मुक्त इलाकांग लोप्पा पार्टी निर्माण कीयानास्के सतर्कता ता नीति लागू कीयाना जरूरी मंता। शहर लोप्पा पार्टी-संगठन मुख्य रूप ते औद्योगिक मजदूर लोरा लोप्पाने नित्यी कीयाना। नहाकुना इलाकांग लोप्पा पार्टी-शाखांग सिर्फ भूमि सुधार काम पूरा आता पेरके ओसो करियता पेरके पार्टी सदस्य बने मायना लेक्का मत्तोर किन भर्ती कित्ता पेरके ने कियमूडायरा। शुरू ता रेंडु साल लोप्पा उंदी नाहकुना पार्टी-शाखा ता सदस्य लोरा संख्या दस तुकू ज्यादा मंदानायो। शहर लेवेके नाहकु आई पार्टी ता शिक्षा एतला तैयार मत्तोर किने ओरु वरोर कम्युनिस्ट बद्रम बनेमायना इंजी करहाना। ताना पेरके निज्जमे पार्टी सदस्य बनेमायना लेक्का मत्तोर किने पार्टी लोप्पा शामिल कीयाना।

7. संयुक्त मोर्चा ता काम

1. केंद्रीय कमेटी ब्यूरो, उपब्यूरो ओसो प्रांत, म्युनिसिपल, प्रशासनिक स्तर ता पार्टी कमेटींग संयुक्त मोर्चा ता काम पोरो विचार-विमर्श कियाला काजे 1951 ते रेंडु मीटिंग कीयाना इंजी आशा कीतोम। इदिना बारे ते रेंडु बेरा केंद्रीय कमेटी तुन रिपोर्ट हियाना।
2. कार्यकर्ता लोर किन स्पष्ट रूप ते संयुक्त मोर्चा ता काम तुन सुदृढ़ कीयाना बारांकु जरूरी मंता इंजी समझे कीयाना।

3. साम्राज्यवाद ओसो सामंतवाद खिलाफ संघर्ष पोरो आधार आसी मत्ता बुद्धिजीविर, उद्योगपतिर, व्यापारिर, धार्मिक नेताल लोर, जनवादी पार्टिंग ओसो जनवादी लोकुरा संगे एकता कीयाना ओसो ओरकिन करहाना जरूरी मंता।
4. अल्पसंख्यक राष्ट्रीयतांग नडमा वेल्ले बेस काम कीयाना; प्रादेशिक स्वायत्ता शासन लागू कीयाना ओसो अल्पसंख्यक राष्ट्रीयतांग ना तम्मा कार्यकर्ता लोर किन प्रशिक्षित कीयाना रेंडु केंद्रीय काम आंदु।

8. दोष-निवारण आंदोलन

इद आंदोलन उंदी अल्प कालम काजे हर साल इरंगम कालम ते ताकी कीयाना; इदिना उद्देश्य ते काम शुरू कीयाना, अनुभव कुना सारांश तेंडना, सफलतांग ना विकास कीयाना, गलतिंग सुधरे कीयाना अनि कार्यकर्ता लोरकिन शिक्षित कीयाना मंता।

नोट

5. मुक्ति तुकू मुन्ने जर्मीदार लोरगडल काश्त ते जमीन एतना किसान लोरकिन जर्मीदार लोर किन उंदी तय रकम जमानत लेक्का हिया लागनादु। भूमि सुधार ताकनास्के किसान लोर जर्मीदार लोरगडल रकम वापिस एतितोरा। इद जमानत ता रकम तुन वापिस पोयना इंतोरा। इदिन जर्मीदार औद्योगिक, व्यापारिक कारोबार वेने ताकि कियानोर लेवेके उंदे बेरा पूरा रकम हिया परवोर किन किस्त ते हियाना अनुमति हींतोरा।
6. प्रतिक्रांतिकारीरा दमन कीयाना काम मूंड परतकु, इत्तेके बाहरी, नडमा ता ओसो अंदरूनी परत कुना सफाई कियमूडाता। 'बाहरी परत' ता सफाई कीयाना इत्तेके समाज लोप्पा मकसी मत्ता प्रतिक्रांतिकारीर किन एक्सपोज कीयाना; 'नडमा ता परत' ता सफाई इत्तेके मावा फौजी यूनिट कु ओसो सरकारी संस्थांग लोप्पा मकसी मत्ता प्रतिक्रांतिकारीर किन एक्सपोज कीयाना; 'अंदरूनी परत' ता सफाई इत्तेके मावा पार्टी लोप्पा मकसी मत्ता प्रतिक्रांतिकारीर किन एक्सपोज कीयाना।

7. 1951 ता पार्टी-सुदृढीकरण ताकनास्के पार्टी-सदस्य लोरा वर्गीकरण नालुंग श्रेणिंग लेक्का कित्ताद मत्ता: पहली श्रेणी लोप्पा पार्टी सदस्य बनेमायना लेक्का मत्तोरे मत्तोरे; दूसरा श्रेणी लोप्पा इंजे पूरा पार्टी सदस्य बनेमायना लेक्का हिल्लोर मत्तोरे ओरा लोप्पा तूलनात्मक रूप ते गंभीर कमजोरिंग मत्तांगा। ओरकिन बदलेमायना ओसो राजनीतिक चेतना बेरसी कीयाना जरूरी मत्ता; तीसरी श्रेणी लोप्पा निष्क्रिय ओसो पेरेके अरसी मत्ता तत्व मत्तांगा, इवु उंदी पार्टी-सदस्य बनेमायना गरे वेने एवताद हिल्ले; चौथी श्रेणी लोप्पा अलग-अलग वर्ग-तत्व, गद्दार, राजनीतिक सट्टेबाज ओसो पतित तत्व मत्तांगा इवु मौका दोरकी कीसी पार्टी लोप्पा नेंगसी मत्तांगा।
8. 'बंडांग गुचहाना' नारा 1948 ते मुक्ति इलाकांग लोप्पा भूमि सुधार ओसो पार्टी-सुदृढीकरण कीयानास्के ल्यू शाओ-ची पेश कीसी मत्तोरे। ओरु नाहकुना कार्यकर्ता लोरा वेल्ले संख्या पोरो किसान लोर किन दबे कीयाना 'चट्टाल बंडांग' इंजी आरोप वाटतोरे अनि ओरकिन पद तल तेंडसी पार्टी तल निष्कासित कियाला आल्सतोरे।

प्रतिक्रांतिकारीरा दमन कियाला पार्टी ता जन दिशा किन अमल जरूर कीयाना¹¹

मई 1951

1. प्रतिक्रांतिकारीरा दमन कीयाना आंदोलन इस्सल पूरा देश लोप्पा ताका मंता। इदु उंदी महान, तीव्र ओसो जटिल संघर्ष आंदू। इद काम लोप्पा हर जागा ते पार्टी जनदिशा ता कार्यदिशा सही साबित आता। इत्तेके नेतृत्व-कार्य तुन पार्टी कमेटींग संगे ताकी कीयाना, पूरा पार्टी-सदस्य लोर किन गोलबंद कीयाना, जनता तुन गोलबंद कीयाना, जनवादी पार्टींग ओसो सब्बे जनता तुन शामिल कीयाना, एकीकृत योजना बने कीयाना, एकीकृत कार्यवाही कीयाना, गिरफ्तार कियानोर अनि हौकानोरा पोरोल लिस्ट सख्ती ते जांच कीयाना, संघर्ष ता अलग-अलग कालम कुना कार्यनीति पोरो ध्यान हियाना, व्यापक रूप ते प्रचार कीयाना, शिक्षित कीयाना (अलग-अलग रकम ता सम्मेलन, कार्यकर्ता लोरा मीटींग, आम रैलिंग कीयाना, अविना लोप्पा पीड़ित लोकुर आरोप वाटा परितोर, अपराध कुना सबूत कु तोहितोर, फिल्म, लालटेन-स्लाइड, नाटक, समाचार-पत्र, पुस्तक ओसो पर्चा संगे प्रचार कीतोर) गुप्तरूप ते लोन लोप्पा मंजी काम कीयाना तरीका तुन विड़सियाना, जोश ते वासी जल्दबाजी ते काम कीयाना तुन दृढ़ता ते विरोध कीयाना। बेगा

¹¹ तीसरा राष्ट्रीय सार्वजनिक सुरक्षा सम्मेलन ता प्रस्ताव ता मसौदा ता संशोधन कियानास्के माओ त्सेतुंग हीता सलाहष

इद कार्यदिशा पूर्ण रूप ते अमल आताद मंता अगा काम पूर्ण रूप ते सही तरीका ते ताकता। बेगा इद कार्यदिशा पोरो अमल किताद हिल्ले अगा काम गलत तरीका ते ताकता। बेगा इद कार्यदिशा पोरो-पोरो अमल किताद मंता अगा काम उचुने सही आता। माटु इद कार्यदिशा प्रतिक्रांतिकारी दमन कीयाना संघर्ष तुन ओसो ज्यादा गंभीरता ते मुन्ने ओयना अनि ताना लोप्पा पूर्ण सफलता दोरकी कीयाना गांरटी मंता इंजी विश्वास कीतोमा वायना कालम ते प्रतिक्रांतिकारीरा दमन लोप्पा इद कार्यदिशा पूर्ण रूप ते अमल कीयाना जरूरी मंता। इगा गिरफ्तार कीयाना ओसो हौकनोरा पोरोल ता लिस्ट तुन सख्ती ते जांच कीयाना ओसो व्यापक रूप ते प्रचार कीयाना, शिक्षित कीयाना काम इमानदारी ते कीसोर मंदांना सबसे महत्वपूर्ण काम मंता। इव रेंडासी काम कुन बेस कीसी गलती कीयाना तुकू बचेमायना।

2. हामूर सजा दोरकता प्रतिक्रांतिकारीरा संख्या उंदी निश्चित अनुपात लोप्पा सीमित तासना। इगा हौकना अपराध कीतोरु ओसो बाकी गंभीर अपराध कित्तोर, जनता ओरकिन हौकवा लेवा विडसवा मत्तोर किन ओसो राष्ट्रीय हित कुन वेल्ले गंभीर नकुसान कियानोर किन पेरके मुन्ने लेट आयवा लेवा तुरंत हौकसियाना सजा हियाना। हौकना अपराध किवोर किन, हामूर सजा दोरकना अपराधिर किन, बोना पोरो जनता होंग अच्चोन हिल्लो ओसो राष्ट्रीय हित कुन वेने गंभीर नुकसान कित्तद हिलवोर किन हामूर सजा हीतेकाई औरकिन तुरंत हौकवा रेंडु साल मौका हीसी ओरकिन बाते शर्म कार्य लोप्पा वाटसी, ओरा व्यवहार तुन जांच कीयाना। इदे आयवा स्पष्ट रूप ते छोटा मोटा अपराध कित्तोर किन गिरफ्तार कीयानायो। इदिना विपरित कार्यवाही कीयाना गलत आयार। ओसो हामूर सजा तुक सुडला अपराध कित्तोर किन बद्रमाई कीसी हौकनायो अनि इदिना विपरीत कार्यवाही कीयाना गलत आयार।

3. प्रतिक्रांतिकारिरीर दमन कीयाना आंदोलन तेदनास्के “वामपंथी” भटकाव कुन रोमी कियाला काजे 1 जून तल पूरा देश ता सब्बे जागा ने (तीना लोप्पा इंजे एवनल वेल्ले कम लोकुर हौकता इलाकांग शामिल मंतांग) गिरफ्तारी ता अनुमोदन कीयाना अधिकार बदे अपवाद लेवा प्रिफेक्चर अथॉरिटी तुकू मंदाना ओसो हामूर सजा तुन अनुमोदन कीयाना अधिकार बदे अपवाद लेवा प्रांतीय अथॉरिटी तुकू मंदना इंजी फैसला कीयाना। प्रांतीय राजधानी तल जेक मत्ता जागा ने इद्रम ता समस्यांग हल कियाला काजे अगाटा प्रतिनिधिर लोहमूडायर। इद फैसला तुन बदले कीयाना मांग कीयाना अनुमति बदे वेने जागा तुकू हिल्ले।
4. इंजे ‘नड्मा ता परत’ ओसो ‘अंदरूनी परत’ लोप्पा मकसी मत्ता प्रतिक्रांतिकारिरीर किन योजनाबद्ध तरीका ते आचसी तेंडसियाना काम शुरू कीयाना। केंद्रीय कमेटी आदेशानुसार इयेंड एदी ओसो इंगम कालम ते दोष-निवारण लोप्पा सुधरे कित्ता कर्मचारिर ओसो इंजे-इंजे मावा काम लोप्पा शामिल आत्ता बुद्धिजीविर किन शुरूआती जांच कीयाना। इदिना उद्देश्य परिस्थिति ता आंकलन कीयाना ओसो उचुक विशेष समस्यांग कुन हल कीयाना मंता। प्रतिक्रांतिकारिरीर दमन कीयाना बारे ते दस्तावेज कुना अध्ययन कीयाना, पोरो वेहता कर्मचारिर, बुद्धिजीविरा लोप्पा सिर्फ डावुट मत्तोर किन ओरु सच्चाई, ईमानदारी ता रुझान पोय्यना तम्मा पाड़ना इतिहास ता स्पष्ट विवरण हियाना, इंजे एवनल गुप्त मत्ता पोल्लोंग ओपन कीयाना इंजी आह्वान कीयाना। ‘खुद तन्ना बारे ते स्पष्टीकरण’ आंदोलन ता कार्यभार संबंधित संगठन ता नेताल किन तेहना; आंदोलन लोप्पा विचार वात्ता लेक्का उसूल लागू कीयाना अनि जोर-जबरदस्ती कीयानायो। हर संगठन काजे इदिना टाईम कम मंदाना, इदिन बेरसी कीयानायो। इदिना काजे लागू कित्ता

कार्यनीति, बहुसंख्या तुन मना पक्ष ते कीयाना ओसो अल्पसंख्या तुन अलगाव ते वाटना, इंगम ते ओसो ज्यादा जांच कीयाना तैयारी कीयाना। इद जांच मुन्ने नेतृत्वकारी संस्थान, सार्वजनिक सुरक्षा संस्थान ओसो बाकी पक्के महत्वपूर्ण मंदना विभाग कुना लोप्पा कीयाना। पेरके अविना लोप्पा दोरकी कित्ता अनुभव कुना प्रचार-प्रसार कीयाना। सरकारी विभाग, स्कूल ओसो कारखाना लोप्पा इद्रम ता जांच कीयानास्के इदिना जिम्मेदारी एतना कमेटिंग लोप्पा गैर-पार्टी मानेय किन वेने शामिल कीयाना जरूरी मंता। इद्रम कीतेके पार्टी-सदस्य अलगाव ते वासी कार्यवाही कीयाना तुकू बचेमाया परितोर।

5. प्रतिक्रांतिकारीरा दमन कीयाना वर्तमान महान संघर्ष लोप्पा पूरा देश ता हर जागा ते जनता ना नडमा सार्वजनिक सुरक्षा कमेटिंग ना स्थापना कीयाना जरूरी मंता। इद्रम ता कमेटिंग नहाकुना इलाका लोप्पा हर श्यांग ता लोकुर ओसो शहर कुना हर विभाग, संगठन, स्कूल, कारखाना ओसो टोला ता लोकुर चुनेमायना जरूरी मंता। कमेटी ता सदस्य लोरा संख्या कम से कम मूंड ओसो ज्यादा से ज्यादा ग्यारह मदांना। सार्वजनिक सुरक्षा ता रक्षा कियाला काजे उंदी संयुक्त मोर्चा लेक्का संगठन बने कियाला काजे ताना लोप्पा विश्वासनीय गैर-पार्टी देशभक्त लोर किन शामिल कीयाना। इद्रम ता कमेटिंग पोरो बुनियादी स्तर ता सरकार ओसो सार्वजनिक सुरक्षा संस्थान कुना नेतृत्व ते प्रतिक्रांतिकारीर किन खत्म कीयाना, देशद्रोही, जासूस लोर किन रोमी कीयाना, राष्ट्रीय, सार्वजनिक सुरक्षा ता रक्षा कीयाना लोप्पा जनताना सरकार कुन सहायता कीयाना जिम्मेदारी मंता। इद्रम ता कमेटिंग ना स्थापना पूरा मार्गदर्शन संगे सिर्फ भूमि सुधार पूरा आता ओसो सिर्फ प्रतिक्रांतिकारीरा दमन कीयाना

काम सही तरिका ते ताकसोर मत्ता इलाकांग लोप्पाने कीयाना
अनि गैर तत्व कुन मौका दोरकी कीसी नेंगला हियानायो।

प्रतिक्रांतिकारीरा दमन कीयानास्के गट्टिक मंजी, चुकवा लेवा ओसो जीवाकिवा लेवा हमला कीयाना¹²

दिसम्बर 1950-सितम्बर 1951

1

मीटु प्रतिक्रांतिकारीरा दमन कीयानास्के प्रतिक्रांतिकारीरा दमन कीयानास्के गट्टिक मंजी, चुकवा लेवा ओसो जीवाकिवा लेवा हमला कीयाना पोल्लो पोरो ध्यान हियाना।

(19 दिसम्बर 1950)

2

पश्चिमी हुनान ता 21 काउंटिंग लोप्पा डाकु लोरा नेता लोर, स्थानीय निरंकुश तत्व ओसो खुफिया एजेंट लोरा उंदी ग्रुप तुन खत्म किताद मंता। इयेंड स्थानीय अथॉरिटी ओरा ओसो उंदी ग्रुप तुन खत्म कियार। नावा हिसाब ते इद्रम कार्रवाईंग कीयाना वेल्ले जरूरी मंता बारांकु इत्तेके इद्रमे माटु दुश्मन ता घमंड तेंडा परितोम अनि जनता ना हिम्मत बेरसी किया परितोम।

माटु कमजोरी ओसो दुलमुल तोहतेके, माटु सहनशीलता ओसो दया तोहतेके जनता तुन नुकसान आयार अनि माटु जनता तल अलग-थलम आयकोम।

¹² प्रतिक्रांतिकारीरा दमन कियाना आंदोलन ता बारे ते चीनी कम्युनिस्ट पार्टी ता केंद्रीय कमेटी काजे रास्ता महत्वपूर्ण संदेश।

गट्टिक मंजी हमला कीयाना इत्तेके कार्यनीति पोरो ध्यान हियाना।
 चुकवा लेवा हमला कीयाना इत्तेके बोरे वेने मानेय किन गलती हिल्वा
 हौकनायो। जीवाकिवा लेवा हमला कीयाना इत्तेके सब्बे प्रतिक्रियावादि
 किन दृढ़ता ते हौकना। (बदे डावुट हिल्वा, हौकना लेक्का हिल्वोर किन
 इनपड़े हौकनायो।) माटु बोरे वेने मानेय किन गलती हिल्वाए हौकवेके
 पूंजीपति वर्ग कोलहार पोयतेकाई बच्चोन गलत प्रचार कीतेकाई माटु
 परेशान वेने आयोम आंतोम।

(17 जनवरी 1951)

3

शानतुंग ता उचुन जागा ने नरम परिस्थिति दिस्सा मंता उचुका जागा
 ने वेल्ले जल्दबाजी रुझान दिस्सा मंता। कुल मिलेकीसी रेंडासीए भटकाव
 देश ता सब्बे प्रांत ओसो नगर कुना लोप्पा मंतांगे इविन दूर कीयाना बगिल
 ध्यान हियाना जरूरत मंता। खासकर जल्दबाजी रुझान तले वेल्ले बेहरा
 खतरा पुट्टियार। बारांकु इत्तेके नरम मत्ता लोकर किन शिक्षित कीसी, समझे
 कीसी सक्रिय कियमूझायर। बोरे प्रतिक्रांतिकारी किन उचुन दिव्या मुन्ने
 लेवेके उचुन दिव्या पेरेके हामूर सजा हीतेके बदे अंतर मन्नो आंता। मति
 जल्दबाजी ते काम कीतेके ओसो गलती हिल्वाए गिरफ्तार कीयाना अनि
 हौकना कीतेके वेल्ले गलत असर अरिंता। अदिन काजे प्रतिक्रांतिकारीरा
 दमन कीयाना काम पोरो कड़ा नियंत्रण तासना अनि हर काम सतर्कता ते
 कीयाना, जल्दबाजी ता हर भटकाव कुन जरूर दूर कीयाना। माटु सब्बे
 प्रतिक्रांतिकारीरा दमन कीयाना वेल्ले जरूरी मंता मति बोनकिने गलती
 हिल्वा गिरफ्तार कीयाना लेवेके गलती हिल्वाए हौकना कार्यवाही इनपड़े
 कीयानायो।

(30 मार्च 1951)

4

कम्युनिस्ट पार्टी, जन मुक्ति सेना, जनताना सरकार शाखांग,
 शैक्षणिक, औद्योगिक-वाणिज्य ओसो धार्मिक रूप ते, जनवादी पार्टींग,

जन-संगठन कुना लोप्पाटल तेंडता प्रतिक्रांतिकारीरा पोरो केंद्रीय कमेटी दोड़ रास्ता लेक्का निर्णय कीता:

हामूर सज़ा हिल्वोर किन जीवामंदनाजोम जेल लेवेके तय कालम काजे जेल ते वाटना सज़ा हियमूडायर अनि जनताना देखरेख ओसो जांच-पड़ताल ते तासमूडायर। हामूर सज़ा दोरकता सब्बे प्रतिक्रांतिकारीरा लोप्पाटल सिर्फ हौकना अपराध कितोर, जनताना होंग भड़के कीयाना गंभीर अपराध कितोर, बचोनो महिला लोरा बलात्कार कितोर, बेहरा संख्या ते सम्पत्ति लूटे कितोर, राष्ट्रीय हित कुना वेल्ले नुकसान कितोर किने हौकना। अनि बाकी तोरा बारे ते हामूर सज़ा हीसी वेने ओरकिन दो साल टाईम हीसी ओरकिन मेहनत कियाला मजबूर कीयाना अनि ओरा व्यवहार ता जांचपड़ताल कीयाना नीति लागू कीयाना। इदु उंदी विवेकपूर्ण नीति आंदू। इदु नीति माकिन गलती कीयाना तुकू बचे कींता। इदिना कारण ते सब्बे रकम ता लोकरा समर्थन दोरका परिंता। इदु प्रतिक्रांतिकारी ताकत किन विघटित किया परिंता। प्रतिक्रांतिकारि किन पूराए खत्म कीयाना हित तेने मंता। इदे आयवा इदु मना राष्ट्रीय निर्माण ता हित ते मत्ता श्रमशक्ति तुन बेहरा संख्या ते बचे किया परिंता। अदिन काजे इदु सही नीति आंदू। पोरो वेहता पार्टी, सरकार, सेना, संगठन, शैक्षणिक, औद्योगिक-वाणिज्य, जन-संगठन लोप्पा तेंडता हामूर सज़ा दोरकता प्रतिक्रांतिकारिरा लोप्पा (लगभग 10-20 प्रतिशत) हौकना, दंगा कीयाना, राष्ट्रीय हित कुन वेल्ले नुकसान कीयाना अपराध कीतोरा संख्या वेल्ले कम मंता। हामूर सज़ा दोरकसी टाईम दोरकी कीयाना अपराधिरा संख्या लगभग 80 लेवेके 90 प्रतिशत मंता। इत्तेके 80-90 प्रतिशत अपराधिर किन हामूर सज़ा तुकू बचे कियमूडंता। वीर प्रतिक्रांतिकारी लोकर नाहकुना डाकू लोरा नेताल, पक्का लूटे कियानोर ओसो स्थानीय निरंकुश तत्व, शहर कुना लोप्पा स्थानीय निरंकुश तत्व, डाकू लोरा नेतालोर, पक्का लूटे कियानोर, गुंडा-बदमाश लोरा नेतालोर ओसो प्रतिक्रियावादी गुप्त सोसायटिंग ना मुखिया लोर, राष्ट्रीय हित कुना नुकसान कीयाना खुफिया एजेंट लोरगडल अलग मंतोरा। बारांकु इत्तेके ओरु जनता होंग कीयाना लेक्का हौकना लेक्कटा

गंभीर अपराध किताद हिल्ले। ओरु राष्ट्रीय हित कुन गंभीर नुकसान कित्तोर मति इद वेल्ले गंभीर नुकसान हिल्ले। ओरु हामूर सजा दोरकना अपराध कित्तोर मति जनता किन प्रत्यक्ष रूप ते नुकसान आताद हिल्ले। माटु इद्रम तोर किन खत्म कीतेके जनता समझेमायो आयर अनि माकिन समाज ता सम्माननीय लोकुरा पूर्ण समर्थन दोरको आयार; संगेने माटु श्रमशक्ति पोह्हंतोम अनि दुश्मन तुन गोंदा गोदा कीयाना उद्देश्य वेने पूरा किया परवोम आंतोम; इदे आयवा माटु इद सवाल पोरो गलतिंग वेने किया परिंतोम। अदिन काजे इद्रम तोरा बारे ता केंद्रीय कमेटी हामूर सजा हियाना घोषणा कीतेकाई ओरकिन टाईम हियाना अनि व्यवहार ते जांचपड़ताल कीयाना इंजी निर्णय कित्ता। माटु ओरा लोप्पटल उचुन मुल किन इद्रम कीसी सुधरे कियवेके ओरकिन हौकमूड वेने आयार। सब्बे स्थानीय अथॉरिटी किन पार्टी, सरकार, सेना ता संगठनकु, शैक्षणिक, औद्योगिक-वाणिज्य, जन-संगठन लोप्पाटल परहकता प्रतिक्रांतिकारीरा दमन कीयानास्के पोरो वेहता नीति लागू कीयाना इंजी मांग कित्ता। हौकना सजा दोरकतोरा संख्या 10-20 प्रतिशते मंता। ओरा बारे ते पेरके मुन्ने आयवा लेवा प्रशासनिक, फौजी यूनिटकुना मुन्ने पेश कीयाना जरूरी मंता। संयुक्त मोर्चा पोरो असर वाटना लेक्कटा प्रमुख प्रतिक्रांतिकारी किन हौकनास्के केंद्रीय अथॉरिटी तले अनुमोदन दोरकना जरूरी मंता। इदे आयवा नहाकुना इलाकांग ना प्रतिक्रांतिकारीरा लोप्पा वेने माटु सिर्फ जनता ना कट्टर दुश्मन किने हामूर सजा हियाना। ओरा लोप्पा वेने उचुन मुल काजे टाईम हियाना नीति लागू कीयाना। मति हामूर सजा हियाला जनता मांग कीयानास्के जरूर हामूर सजा हिंसी जनता ना होंग तुन शांत कीयाना।

(8 मई 1951)

5

“रेंडु साल ता टाईम हियाना” इत्तेके हौकना अपराध कित्ता गंभीर अपराध कित्ता ओसो जनता हौकना मांग कीसोर मत्ता अपराधिर किन वेने हौकनायो इंजी आयो। इद्रम कीयाना गलत आयार। माटु जिला, नाहकुना कार्यकर्ता, जनता किन स्पष्ट रूप ते जनता ना होंग शांत कियाला काजे

गंभीर अपराध कित्ता अपराधिर किन जरूर हौकमूझायर इंजी समझे कीयाना। अनि रेंडु साल टाईम दोरकता अपराधिर किन ओरा मेहनत, व्यवहार संगे जांच कीयाना इंजी स्पष्ट समझे कीयाना।

(15 जून 1951)

6

प्रतिक्रांतिकारीरा दमन कीयाना पूरा काम अलग-अलग स्तर ता पार्टी-कमेटींग ना एकीकृत नेतृत्व ते कीयाना जरूरी मंता। सब्बे सार्वजनिक सुरक्षा संस्थान ओसो इद काम संबंधित बाकी संस्थान कुना जिम्मेदार कामरेड्स पार्टी-कमेटींग ना नेतृत्व तुन दृढ़तापूर्वक स्वीकार कीयाना।

(10 सितम्बर 1951)

‘ऊ श्युन ना जीवनी’ फिल्म पोरो तेदता वाद- विवाद पोरो गंभीर आसी ध्यान हियाना¹³

20 मई 1951

‘ऊ श्युन ना जीवनी’ लोप्पा तेहता सवाल स्वरूप दृष्टि ते उंदी बुनियादी सवाल आंदू। छिंग राजवंश ता आखरी साल लोप्पा विदेशी हमलावर ओसो स्थानीय प्रतिक्रियावादी सामंती शासक लोरा खिलाफ चीनी जनता ना महान संघर्ष कालम ते, ऊ श्युन¹ लेक्काटोर सामंती आर्थिक आधार लेवेके अदिना पोरोटा ढांचा तुन उचुन वेने बदले कीयाना कोशिश कीवोर; उल्टा ओरु वेल्ले बेहरा बेय्यल लेक्का सामंती संस्कृति ता प्रचार कित्तोर। इदे आयवा प्रतिक्रियावादी सामंती शासक लोरा कालकु आहचना सेवा लोप्पा उचुन वेने कमी तासोर आतोर। इद्रम कीसी ओरु सामंती संस्कृति तुन प्रचार कीयाना ओहदा दोरकी किया परतोर। माटु इद्रम ता सुडला हूडना लेक्कटा व्यवहार ता समर्थन कीयाना या? माटु बस्केने जनता लोप्पा इद्रम ता सुडला हूडना व्यवहार कीयाना तुन सहेमाया परवोमा खासकर ‘जनता ना सेवा कीयाना’ क्रांतिकारी झंडा तेरिहचोर, किसान लोरा क्रांतिकारी संघर्ष ता असफलता तुन उल्टा उदाहरण लेक्का इस्तेमाल कीसोरे मंदानास्के इत्तेके इनपड़े सहेमाया परवोमा इद्रम कीयाना अनुमति हियाना, अदिन सहेमायना इत्तेके किसान लोरा क्रांतिकारी संघर्ष, चीन ता इतिहास ओसो चीन राष्ट्र पोरो चिकला वाटना प्रतिक्रांतिकारी

¹³ ‘जन दैनिक’ काजे रास्ता उंदी संपादकीय ता संक्षिप्त टिप्पणी।

प्रचार तुकू अनुमति हियाना, सहेमायना ओसो इद्रम ता प्रचार तुन सही मानेमायना लेक्का आयारा।

‘ऊ श्युन ना जीवनी’ पोरोल ता फिल्म ता अच्चन प्रचार आयना ओसो विशेष रूप ते ऊ श्युन इद फिल्म ता बारे ते तारीफ कीयाना मावा देश ता सांस्कृतिक कार्यकर्ता लोरा लोप्पा विचाधारात्मक भ्रम बचोन फैलेमाता इंजी वेहिंता!

बचोन लेखक लोर इतिहास ता विकास पाड़ना जागा ने पूना ता स्थापना आयवा, पाड़ना किन विनाश तुकू हर संभव बचे कीयाना कोशिश कीयाना संगे आंता इंतोर; वर्ग-संघर्ष ताकी कीसी प्रतिक्रियावादी सामंती शासक लोरा तख्ता पलट कीयाना संगे आयवा उत्पीड़ित लोकुरा वर्ग संघर्ष ता निषेध कीयाना ओसो शासक लोरा मुन्ने तल्ला वर्हाना संगे आंता, ऊ श्युन कित्ता लेक्का। मना लेखक लोर इतिहास ता अध्ययन कीसी चीनी जनता ना उत्पीड़न कीयाना दुश्मन बोरु ओसो दुश्मन मुन्ने आत्मसमर्पण कीतोरु, ओरा सेवा कीतोरु, ओरा लोप्पा बदे तारीफ कीयाना लेक्कटा पोल्लो मत्ताया हिल्ले इंजी जांच कीयाना कोशिश कीवोरा। इदे आयवा ओरु 1840 ता अफीम युद्ध तल इंजे एवनल उंदी शताब्दी तुकू ज्यादा कालम ते चीन लोप्पा समाज ता आर्थिक संरचना ता पूना रूप, पूना वर्ग शक्तिंग, बोना लोप्पा बद पूना विचार पैदा आता इंजी पुंदाला कोशिश कीवोरा। बव पूना बदलावकु समाज लोप्पा आर्थिक संरचना ता पाड़ना रूप ओसो अविना पोरोटा ढांचा (राजनीतिक, सांस्कृतिक लेक्कटविना) खिलाफ संघर्ष कीतांग इंजी पुंदाना कोशिश कीवोरा। इद्रम कीसी मत्तेके ओरु बदिना तारीफ कीयाना बदिना आयो, बदिना निंदा कीयाना बदिना आयो इंजी पुंजी मन्नेरा।

उचुन कम्युनिस्ट लोर मार्क्सवाद तुन लागू कित्तोर इंजी इंतोर ओरा बगिल विशेष ध्यान हियाना। ओरु सामाजिक विकास ता इतिहास (ऐतिहासिक भौतिकवाद) ता जानकारी दोरकी कोतोर मति ठोस ऐतिहासिक घटना, ठोस ऐतिहासिक लोकुर (ऊ श्युन लेक्काटोर),

इतिहास धारा ता विपरीत ठोस विचारकु ('ऊ श्युन ना जीवनी' पोरोल ता फिल्म ओसो ऊ श्युन ना बारे ते रास्ता रचनांग लोप्पा वेहता विचार कुना लेक्का) ना सामना आतास्के ओरु तम्मा गुण-दोष विवेचन क्षमता पोहिहंतोर अनि उचुन मुल इद्रम प्रतिक्रियावादी विचार कुना मुन्ने आत्मसमर्पण वेने कींतोर। प्रतिक्रियावादी पूंजीवादी विचार जुझारू कम्युनिस्ट पार्टी लोप्पा वेने नेंगताद मंता इंदानदु निज्जम हिल्ले या? उचुन कम्युनिस्ट लोर लागू कित्ता मार्क्सवाद बेगा मंता?

पोरो वेहता कारण कुना कारण ते इव सवाल कुना बारे ते भ्रम ता विचार कुन दूर कियाला काजे 'ऊ श्युन ना जीवनी' पोरोल ता फिल्म ओसो ऊ श्युन ना संबंधित किताब, लेख कुना पोरो वाद-विवाद कीयाना जरूरी आता।

नोट

1. ऊ श्युन (1838-96) ना जन्म शानतुंग प्रांत ता थांगई पोरोल ता जागा ते आता। शुरू ते ओरु वरोर आवारा मानेय मत्तोर। 'स्कूल काजे दान' पोरोल ते ओरु लोकरिगडल पैसा जमा कियानोर अनि जमीन अस्सिसी ब्याज ते हियानोर। पेरके ओरु वरोर बेहरा जमींदार ओसो सूदखोर बनेमातोर। निरंकुश जमींदार लोरा संगे कलियसी ओरु 'मुफ्त स्कूल' खोले कित्तोर, ताना लोप्पा वेल्ले जोरशोर ते सामंती संस्कृति ता प्रचार-प्रसार कित्तोर, शोषक वर्ग ता नैकु तैयार कित्तोर। ताना पेरके प्रतिक्रियावादी शासक लोरिगडल शाबाशी दोरकी कित्तोर।

मूंड जन आंदोलन कुना लोप्पा दोरकी कित्ता

महान सफलतांग¹⁴

23 अक्तूबर 1951

कमेटी सदस्य लोरा ओसो कामरेड्स,

मावा जनताना राजनीतिक सलाहकार सम्मेलन ता पहली राष्ट्रीय कमेटी ता तीसरा अधिवेशन इंजे शुरू आया मंता। इद अधिवेशन लोप्पा राष्ट्रीय कमेटी ता सदस्य लोरे आयवा चीनी जन स्वयंसेवक लोर ओसो जन मुक्त सेना ता प्रतिनिधि, उद्योग, कृषि कीयाना आदर्श किसान लोरा प्रतिनिधि ओसो पाड़ना आधार इलाकांग ना प्रतिनिधि, शिक्षा, कला-साहित्य लोप्पा काम कीयाना कार्यकर्ता लोर, उद्योगपतिर, व्यापारि, अलग-अलग स्तर ते काम कीयाना विशेषज्ञ, धार्मिक, अल्पसंख्यक राष्ट्रीयतांग, प्रवासी चीनी लोकुर, महिला, नौजवान लोरा प्रतिनिधि ओसो प्रांतीय म्युनिसिपल सलाहकार समितिंग ना प्रतिनिधि ओसो बचोनो सरकारी कार्यकर्ता लोर वेने विशेष निमंत्रण संगे इगा एवताद मंता। इद अधिवेशन लोप्पा शामिल आयना सदस्य ओसो विशेष निमंत्रण ते वात्ता लोकुरा लोप्पा वेल्लेटोर सर्वसम्मान दोरकता युद्ध-वीर, आदर्श श्रमिक, कार्यकर्ता लोर वेने शामिल मंतोर। अधिवेशन लोप्पा वासी बेहरा स्तर ते चीन लोक गणराज्य हर मोर्चा ता महत्वपूर्ण सफलतांग दोरकी कित्ता अनि विकसित आता इंजी साबित आंता।

¹⁴ चीनी जन राजनीतिक सलाहकार सम्मेलन ता पहली राष्ट्रीय कमेटी ता तीसरी अधिवेशन ता उद्घाटन-भाषण।

हत्ता उंदी साल लोप्पा माटु मना देश लोप्पा बेहरा स्तर ते मूंड आंदोलनकु इत्तेके अमेरीका आक्रमण, प्रतिरोध कीयाना, ओसो कोरिया ता सहायता कीयाना आंदोलन भूमि सुधार आंदोलन ओसो प्रतिक्रांतिकारीरा दमन कीयाना आंदोलन कीसी महान सफलतांग दोरकी किताद मंता। मुख्य रूप ते पिस्ता प्रतिक्रांतिकारीरा दमन कीयाना काम इंजे जल्दिए सफल आयारा। बाकी अल्पसंख्यक राष्ट्रीयतांग मंदाना उंदी-रेंडु जागांग विडचसी 1952 ते भूमि सुधार काम पूरा कियमूडायरा। अमेरिका आक्रमण ता प्रतिरोध कीयाना ओसो कोरिया ता सहायता कीयाना आंदोलन लोप्पा पूरा चीनी जनता मुन्ने तुकू बचोनो ज्यादा व्यापक रूप ते एकताबद्ध आता अनि अमेरिका साम्राज्यवादी आक्रमणकारी ताकत कुना खिलाफ दृढ़ता ते संघर्ष ताकी किया मंता। चीनी जनता ना महान संकल्प तुन वेहचोरे चीनी जन स्वयंसेवक लोर कोरिया ता जन सेना संगे तालमेल कीसी अमेरिका साम्राज्यवादि कोरिया जनवादी लोक गणराज्य पोरो आक्रमण कीसी अधिकार कित्ता पेरके चीन ता मुख्य भूमि पोरो कब्जा कियाला काजे कित्ता षडयंत्र तुन गुंडा कीसीतोरा। इद्रम कोरिया, चीन, एशिया ओसो दुनिया ता शांतिप्रिय जनता तुन प्रोत्साहन दोरकता अनि शांति ता रक्षा कीयाना, आक्रमण ता प्रतिरोध कीयाना जनता ना आत्म-विश्वास बेरसता। माटु वीर चीन जन स्वयंसेवक ओसो वीर कोरिया जन सेना ता अभिनंदन कीतोम!

मूंड जन आंदोलन कुना लोप्पा दोरकी कित्ता सफलतांग कुना कारण ते, अलग-अलग स्तर ते जनताना सरकार ओसो अलग-अलग जनता कलियसी कित्ता कोशिश कुना कारण ते मावा देश लोप्पा मुन्ने बस्केने हिल्वा उंदी एकता बनेमाता। तिब्बत ता समस्या तुन शांतिपूर्ण तरीका ते हल कियमूडाता। मावा राष्ट्रीय प्रतिरक्षा तुन मुन्ने तुकू ज्यादा मजबूत कियमूडाता। जनता ना जनवादी कब्जा तुन सुदृढ़ बने किताद मंता। मावा मुद्रा ओसो चीजकुना मोला स्थिर मंतांग, मावा आर्थिक निर्माण,

सांस्कृतिक, शैक्षणिक काम तुन दुबारा शुरू कीयाना, विकसित कीयाना लोप्पा वेने वेल्ले बेस काम किताद मंता।

उद्योग ओसो कृषि मोर्चा लोप्पा लगातार विकसित आया मंता। उत्पादन बेरसी कीयाना देशभक्तिपूर्ण आंदोलन मावा देश ता उंदी पूना ओसो खुशी ता घटना आंदू नहाकुना इलाकांग लोप्पा भूमि सुधार आयना कारखानांग, बाकी कारोबार कुना लोप्पा जनवादी सुधार आयना कारण ते मावा मजदूर, किसान उत्पादन बेरसी कीयाना तम्मा देशभक्तीपूर्ण कोशिश कुना लोप्पा वेल्ले सक्रियता तोहना लोप्पा ओसो तम्मा भौतिक, सांस्कृतिक पिस्वल ते सुधार कीयाना लेक्का आतोर। माटु मजदूर, किसान लोरा संगे एकता कियाला, ओरकिन शिक्षित कियाला, ओरा पोरो भरोसा तासला निपुण आतेके उत्पादन बेरसी कियला देशभक्तीपूर्ण आंदोलन लोप्पा उंदी राष्ट्रव्यापी उभार जरूर वायार।

मावा सांस्कृतिक, शैक्षणिक मोर्चा, सब्बे रकम ता बुद्धिजीविरा लोप्पा, केंद्रीय जनताना सरकार निर्धारित कित्ता उसूल कुना अनुसार आत्म-शिक्षण, खुद ता पूना बदलाव ता उंदी आंदोलन व्यापक रूप ते ताका मंता। इदु वेने मना देश लोप्पा उंदी पूना ओसो खुशी ता घटना मंता। राष्ट्रीय कमेटी ता दूसरा अधिवेशन मारनास्के नन्ना आलोचना ओसो आत्मालोचना ता तरीका ते आत्म-शिक्षण, खुद ता पूना बदलाव कीयाना प्रस्ताव तासताना। इद प्रस्ताव तुन तीरम-तीरम अमल किया मंतोमा। विचारधारात्मक पूना बदलाव कीयाना, मुख्य रूप ते सब्बे रकम ता बुद्धिजीविरा विचाराधारात्मक पूना बदलाव कीयाना सब्बे इलाकांग लोप्पा जनवादी सुधार कुना काम पूरा कीयाना अनि मना देश ता औद्योगिकरण कियाला काजे उंदी महत्वपूर्ण शर्त मंता। अदिन काजे माटु आत्म-शिक्षण ओसो पूना बदलाव आंदोलन दृढता ते मुन्ने हंजोरे वेल्ले बेहरा सफलतांग दोरकी कियार इंजी आशा कीतोमा।

सब्बे तथ्य लोप्पटल जनता ना जनवादी कब्जा वाले मना व्यवस्था पूंजीवादी देश कुना राजनीतिक व्यवस्था तुकू बचोनो बेस मंता इंजी

साबित आता। इद व्यवस्था लोप्पा मना देश ता जनता तन्ना ताकत तुन पूरा इस्तेमाल किया परिंता। इद ताकत बदे वेने दुश्मन तुकू हारेमाया परवो।

अमेरिका आक्रमण ता प्रतिरोध कीयाना ओसो कोरिया ता सहायता कीयाना महान संघर्ष इंजे जारी मंता। इदिन अमेरिका सरकार शांतिपूर्ण समाधान कीवो अस्के एवनल जारी तासना। माटु बदे वेने देश लोप्पा अतिक्रमण कीयाना उद्देश्य तासोम; माटु सिर्फ साम्राज्यवाद मना देश पोरो कित्ता आक्रमण ता विरोध कीतोम। सब्बेतोर पुत्ता लेक्काने अमेरिका फौजकु मावा थाइवान पोरो अधिकार कियवेके कोरिया जनवादी लोक गणराज्य पोरो आक्रमण कियवेके मावा उत्तर-पूर्वी सीमा पोरो हमला कियवेके इंजे चीनी जनता ओरा संगे लड़ेमासोर मन्नो आसी मनवर। मति अमेरिका आक्रमणकारि मावा पोरो हमला कित्तोर अदिन काजे माटु वेने आक्रमण ता प्रतिरोध झंडा तेहवा मंदा परवोम। इद्रम कीयाना वेल्ले जरूरी ओसो न्यायपूर्ण मंता अनि पूरा राष्ट्र इद्रम कीयाना अनिवार्य मंता इंजी पुत्तादे। माटु अमेरिका आक्रमण ता प्रतिरोध कीयाना ओसो कोरिया ता सहायता कीयाना मना कोशिश कुन लगातार बेरसी कीयाना, चीनी जन स्वयंसेवक लोरा समर्थन कियाला काजे उत्पादन बेरसी कीयाना ओसो सख्त बचत कीयाना जरूरी ओसो न्यायिक संघर्ष लोप्पा डटेमासी मंदांना जरूरी मंता। नेंडु चीनी जनता ना केंद्रीय काम ओसो अदिना अनुसार मना वर्तमान अधिवेश ता केंद्रीय काम वेने इदे मंता।

माटु वेल्ले मुन्ने ने कोरिया ता समस्या तुन शांतिपूर्ण तरीका ते हल कीयाना इंजी आल्सतोम अनि नेंडु वेने माटु इद्रमे आल्संतोम। अमेरिका सरकार हत्ता कालम ते कित्ता लेक्का अलग-अलग रकम ता लज्जा वायना लेक्कटा तरीकांग लागू कीसी वार्ता भंग कीयाना बाधा वाटना कीवेके कोरिया लोप्पा युद्ध-विराम वार्ता सफलतापूर्वक समाप्त आया परिंता; लेवेके इद्रम आयना असंभव आंता।

चीन लोक गणराज्य ता स्थापना तल इंजे एवनल हत्ता रेंडु साल लोप्पा माटु सब्बे रकम ता काम लोप्पा महान सफलतांग दोरकी कीतोम।

इव सफलतांग माटु एकता कित्ता सब्बे ताकत कुना पोरो आधार आसी दोरकी किताद मंता। देश लोप्पा माटु मजदूर वर्ग ओसो कम्युनिस्ट पार्टी ता नेतृत्व ते सब्बे राष्ट्रीयतांग, जनवादी वर्ग, जनवादी पार्टिंग, जन-संगठनकु ओसो देशभक्त जनवादी लोकुरा सुदृढ एकता पोरो आधार आसी मत्तोमा। माटु सोवियत संघ नेतृत्व ते ताकना अंतरराष्ट्रीय शांति ओसो ग्रुप ता सुदृढ एकता ओसो पूरा दुनिया ता शांतिप्रिय जनता ना गटिंग समर्थन पोरो आधार आसी मंतोमा। अदिनके माटु सब्बे रकम ता काम लोप्पा महान सफलतांग दोरकी कीतोमा। मना दुश्मन किन इदु पोल्लो समझेमाया परवो। मना दुश्मन पूना चीन लोक गणराज्य मुन्ने वेल्ले मुश्किलकु मंतांग अनि संगेने मना खिलाफ आक्रमणकारी युद्ध शुरू किया मंतांग इंजी आलिसंतोरा। अदिन काजे माटु मना मुश्किल कुना पोरो काबू कीयाना ओसो आक्रमणकारिरा पोरो जवाबी हमला किया परवोमा। ओरु आल्सना विपरीत माटु मना मुश्किल कुना पोरो काबू कीयाना ओसो आक्रमणाकारिरा पोरो जवाबी हमला कियाला सही साबित आतोमा। मना दुश्मन वेल्ले कमजोर दिमाग वालेर मंतोर, ओरु मना महान स्थानीय, अंतरराष्ट्रीय एकता ता ताकत बचोन बेहरा मंता, चीन लोक गणराज्य ता स्थापना संगे विदेशी साम्राज्यवाद चीनी जनता पोरो राज कीयाना जमाना हमेशा काजे खत्म आयानादु हूडा परवोर आंतोरा। ओरु समाजवादी सोवियत संघ, चीन लोक गणराज्य ओसो जनता ना लोकशाही वाले देश कुना जन्म आतांकु, चीन ओसो सोवियत संघ लेक्कटा महान देश कुना नड्मा दोस्ती, एकता ता समझौतांग पोरो आधार आसी स्थापना आता सुदृढ एकता ता कारण ते, शांति, जनवाद ग्रुप ता सुदृढ एकता ता कारण ते ओसो इद महान ग्रुप ता बारे ते दुनिया ता व्यापक शांतिप्रिय जनता ना गटिंग समर्थन मत्तांकु साम्राज्यवाद दुनिया पोरो तन्ना कब्जा किया परना जमाना पूराए खत्म आताद वेने हूडा परवोर। मना दुश्मन इंजे वेने चीन लोक गणराज्य पोरो राज कीयाना ओसो दुनिया पोरो तम्मा कब्जा कीयाना उद्देश्य तासा मंतोरा। मति कामरेड्स नन्ना ओरा उद्देश्य बेय्यल लेक्का मंता अदु बस्केने सफल आया परवो इंजी पक्का वेहिताना। कामरेड्स सोवियत

संघ लोप्पा महान अक्तूबर समाजवादी क्रांति ता जीत संगे दुनिया ता जनता जरूर सफलता दोरकी कियार इंजी साबित आता। इंजे चीन लोक गणराज्य, जनता ना लोकशाही वाले देश कुना स्थापना ता कारण ते इद संभावना वेल्ले गर्ते वात्ता। पहली विश्व युद्ध ओसो रूस ता अक्तूबर क्रांति पेरेके ऐतिहासिक कालम ते मूंड साम्राज्यावदी देशकु जर्मन, इटली ओसो जापान दुनिया लोप्पा तम्मा कब्जा कीयाना कोशिश कितादु निज्जमे; इद पोल्लो चीन लोक गणराज्य, जनता ना लोकशाही वाले देश कुना स्थापना तुकू मुन्नेटा आंदू मति इदिना कारण ते बातल आता? इव मूंड साम्राज्यवादी देश कुना उद्देश्य बेय्यल लेक्का ओसो अंगडम साबित आताद हिल्ले या? ओरा विचार वात्ता लेक्का आता लेवेके ओरा विचार तुकू उल्टा आता? दुनिया पोरो कब्जा कियाला आल्सना सब्बे साम्राज्यवादीर किन हौकताद मंता या हिल्ले? इंजे परिस्थिति इनपडे अलग मंता; महान चीन लोक गणराज्य ता स्थापना आता। जनता ना लोकशाही वाले देश कुना स्थापना आता। दुनिया ता जनता ना राजनीतिक चेतना बेरसता। पूरा एशिया ओसो उत्तरी अफ्रीका लोप्पा राष्ट्रीय मुक्ति संघर्ष पुट्टा मंतांग। पूरा साम्राज्यवादी गुट ता ताकत वेल्ले कमजोर आता। मना गटिग एकता कित्ता सोवियत संघ ता ताकत वेल्ले बेरसताद वेल्ले महत्वपूर्ण पोल्लो मंता। इद्रम ता परिस्थिति ते बदे साम्राज्यवादी देश जर्मनी, इटली, जापान इव मूंड आक्रमणकारी देश कुना हरदे ताकना कोशिश कीतेके बाताल आयार इंजी मुन्ने ने आल्सा परमूडांता या आयो? संक्षिप्त ते, नेंडु इद दुनिया जनता ना दुनिया मंदानादु मत्ता, हर देश ता जनता तन्ना शासन खुद ताकी कीयाना। अद दुनिया लोप्पा साम्राज्यवाद ओसो ओरा नैयकु लगातार जुल्म कीयाना दुनिया इनपडे मंदानायो। मना देश ता जनता गटिग एकताबद्ध आयार इंजी आशा कीताना मना एकता कित्ता देश सोवियत संघ ता जनता ना लोकशाही वाले सब्बे देश कुना संगे ओसो मावा समर्थन कीयाना दुनिया ता सब्बे देश कुना संगे दुनिया ता सब्बे राष्ट्र, जनगण संगे एकता कियार। अनि आक्रमण विरोधी संघर्ष लोप्पा मना

महान देश ता निर्माण कियाला ओसो दीर्घकालीन विश्व शांति ता रक्षा
कियाला लगातार मुन्ने हंजोर मंदियार। कामरेड्स माटु इद्रम कीतेके जरूर
सफल आयकोम इंजी विश्वास कींतान।

“मूंड गलतिंग” विरोधी ओसो “हेय्युंग गलतिंग”

विरोधी संघर्ष¹ कुना बारे ते¹⁵

नवम्बर 1951- मार्च 1952

1

भ्रष्टाचार, फिजूलखर्ची खिलाफ संघर्ष ताकी कीयाना पूरा पार्टी ता उंदी मुख्य कार्य मंता। माटु मीकिन इदिना पोरो गंभीरतापूर्वक ध्यान हियाना इंजी वेहताद मंता। भ्रष्टाचार ता सब्बे समस्यांग बचोन बेहरा, सुडला, मध्यम मत्तेकाई अविना पर्दाफाश कियाला काजे माटु पूरा पार्टी ता व्यापक रूप ते शुद्धिकरण कीयाना जरूरी मंता। मना हमलांग ना मुख्य निशाना बेहरा-बेहरा भ्रष्ट लोकर किन बने कीयाना अनि मध्यम ओसो सुडला स्तर ता भ्रष्ट लोकर किन शिक्षित कीयाना ओरा पूना बदलाव कीयाना नीति लागू कीसी ओरकिन सुधरेमायना मौका हियाना। सिर्फ इद्रम कीसीए पूंजीपति वर्ग ता बचोनो पार्टी-सदस्य लोरा व्यवहार-भ्रष्ट कीयाना गंभीर खतरा तुन रोमी कियमूडांता। इद्रम कीसी सातवीं केंद्रीय कमेटी ता दूसरी पूर्ण अधिवेशन लोप्पा कित्ता आंकलन कित्ता परिस्थिति तुन दूर कियमूडांता अनि माने ता व्यवहार किन भ्रष्ट बनेमायना तुन रोमी कियाला काजे इद अधिवेशन लोप्पा तय कित्ता नीति तुन लागू कीयाना। मीटु इदिना पोरो जरूर ध्यान हियाकिर इंजी आशा कीताना।

(30 नवम्बर 1951)

¹⁵ इव महत्वपूर्ण निर्देशकुना मसौदा कामरेड माओ त्सेतुंग चीनी कम्युनिस्ट पार्टी ता केंद्रीय कमेटी काजे तैयार कित्तोरा।

2

पूँजीपति वर्ग उचुन कार्यकर्ता लोरा व्यवहार-भ्रष्ट कींतांकु वेरु वेल्ले भ्रष्टाचार कीसोर मंतोर, तथ्य पोरो खास ध्यान हियाना। इद्रम तोर किन परहकसी जरूर एक्सपोज कीयाना अनि सजा हियाना। इदिन उंदी मुख्य संघर्ष समझेमायना।

(30 नवम्बर 1951)

3

भ्रष्टाचार, फिजूलखर्ची, नौकरशाही खिलाफ ताकी कीयाना संघर्ष पोरो वेने प्रतिक्रांतिकारीरा दमन कियाला काजे ताकी कीयाना संघर्ष लेक्काने जोर हियाना। इद संघर्ष लोप्पा वेने जनवादी पार्टिंग, अलग-अलग रकम ता लोकरु संगे व्यापक जनता तुन गोलबंद कीयाना। इद संघर्ष ता व्यापक रूप ते प्रचार-प्रसार कीयाना, नेतृत्वकारी कार्यकर्ता लोर व्यक्तिगत जिम्मेदारी एतना अनि खुद वेने संघर्ष लोप्पा डेयना। लोकरु खुद तम्मा गलतिंग मानेमासोरे दूसरोरा गलतिंग ना रिपोर्ट कीयाना इंजी आह्वान कीयाना। कम गलती मत्तोर आलोचना कीयाना अनि ओरकिन शिक्षित कीयाना। गंभीर गलती मत्तोर किन पद तल तेंडना अनि सजा हियाना, कैद कीयाना (परिश्रम संगे सुधरे कियाला काजे), वेल्ले गंभीर अपराध कीयाना भ्रष्ट लोकरु किन फैरिंग कीसी हौकसियाना कीयाना। सिर्फ इद्रमे इद सवाल तुन हल कियमूडांता।

(8 दिसम्बर 1951)

4

देश ता सब्बे शहर कुना लोप्पा सबसे मुन्ने रिश्वत हियाना, टैक्स-चोरी कीयाना, राष्ट्रीय सम्पत्ती चोरी कीयाना, सरकारी अनुबंध कुना लोप्पा धोखाधड़ी कीयाना, राज्य ता आर्थिक सूचनांग ना चोरी कीयाना कार्रवाईंग संगे कानून ता उल्लंघन कीयाना बेहरा, मध्यम शहर कुना लोप्पा माटु मजदूर वर्ग पोरो आधार आसी कानून ता पालन कीयाना पूँजीपति, बाकी नागरिक लोरा संगे एकता कीसी पूँजीपतिरा विरुद्ध बेहरा स्तर ते दृढतापूर्वक ओसो सही तरीका ते संघर्ष ताकी कीयाना। माटु इद

संघर्ष ता तालमेल पार्टी, सरकार, सेना, जन-संगठन कुना लोप्पा भ्रष्टाचार, फिजूलखर्च, नौकरशाही विरुद्ध ताकी कीयाना संघर्ष संगे शुरू कीयाना। इद्रम कीयाना वेल्ले जरूरी मंता। इद संघर्ष लोप्पा सब्बे शहर कुना पार्टी संगठन अलग-अलग वर्ग, जनता ना ताकत ता वेल्ले सतर्कता ते वर्गीकरण कीयाना। अंतरविरोध तल फायदा एतना, विभाजन कीयाना, बहुसंख्या संगे एकता कीयाना, अल्पसंख्या तुन अलगाव ते वाटना कार्यनीति लागू कीयाना। अनि संघर्ष ताकनास्के “हेय्युंग गलतिंग” ना खिलाफ उंदी संयुक्त मोर्चा बने कीयाना। उंदी बेहरा शहर लोप्पा “हेय्युंग गलतिंग” विरोधी संघर्ष जोरशोर ते ताकिहचोर मत्तास्के इद्रम ता संयुक्त मोर्चा लगभग मूंड हत्तांग लोप्पा बनेमाया परिंता। बेगा उंदी बेरा संयुक्त मोर्चा बनेमाता अगा वेल्ले गंभीर अपराध कीयाना प्रतिक्रियावादी पूंजीपति अलगाव ते वांतोर अनि मना राज्य उंदी सुदृढ़ परिस्थिति ते वांता। ताना लोप्पा ज्यादा विरोध ता सामना कियवा लेवाए रक-रकम ता सजा हियाना, जुर्माना वाटना, सम्पत्ति जब्त कीयाना, गिरफ्तार कीयाना, कैद कीयाना, हौकना, लेक्कटवु मंतांग। मना सब्बे बेहरा शहर कुन (प्रांतीय राजधानिंग वेने शामिल मंतांग) फरवरी शुरू ता दस दिव्यांग लोप्पा “हेय्युंग गलतिंग” विरोधी संघर्ष शुरू कीयाना। इदिना तुरंत व्यवस्था कीयाना।

(26 जनवरी 1952)

5

- 1) “हेय्युंग गलतिंग” ना विरोधी आंदोलन लोप्पा औद्योगिक-वाणिज्य इकाइंग ना समस्या हल कियाला काजे बुनियादी उसूल इगा रास्ता लेक्का मंतांग: पाइना अपराध कुना पोरो छूट ओसो पूना अपराध कुना पोरो कठोर रुझान लागू कीयाना (उदाहरण तुक् सिर्फ 1951 ते कित्ता टैक्स-चोरी ता रकम वापिस पोयना); बहुसंख्या संगे छूट ओसो अल्पसंख्या संगे कठोर व्यवहार कीयाना; मना अपराध कुन मानेमातोरा संगे छूट हियाना व्यवहार

कीयाना ओसो तम्मा अपराध कुन मानेमायला इनकार कियानोरा संगे कठोर व्यवहार कीयाना; उद्योग संगे छूट ओसो वाणिज्य संगे कठोर व्यवहार कीयाना; आम वाणिज्य संगे छूट ओसो सट्टेबाजी संगे कठोर व्यवहार कीयाना। अलग-अलग स्तर ता पार्टी कमेटींग किन अवु “हेय्युंग गलतिंग” विरोधी आंदोलन लोप्पा पोरो रास्ता उसूल कुन अमल कीयाना इंजी मांग कीतोमा।

- 2) “हेय्युंग गलतिंग” विरोधी आंदोलन ता उद्देश्य तुन सुरता तासिसी निजी औद्योगिक-वाणिज्य इकाइंग ना विभाजन इव हेय्युंग श्रेणिंग ने कियाना: कानून ता पालन कीयाना इकाइंग, बुनियादी रूप ते कानून ता पाल कीयाना इकाइंग, आंशिक रूप ते कानून ता पालन कीयाना ओसो आंशिक रूप ते अदिना उल्लंघन कीयाना इकाइंग, गंभीर रूप ते कानून ता उल्लंघन कीयाना इकाइंग ओसो पूर्ण रूप ते कानून ता उल्लंघन कीयाना इकाइंग। बेहरा शहर कुना सवाल तुन पहली, दूसरी ओसो तीसरी श्रेणी ता इकाइंग ना संख्या कुल इकाइंग ना लगभग 95 प्रतिशत मंता ओसो चौथी, पांचवी श्रेणी ना इकाइंग ना संख्या कुल इकाइंग ना लगभग 5 प्रतिशत मंता। अलग-अलग बेहरा शहर कुना लोप्पा इव इकाइंग ना प्रतिशत लगभग उंदी लेक्काने मंता अदिन काजे ताना लोप्पा सुडला-बेहरा अंतर जरूर मंदिता। मध्यम शहर कुना लोप्पा इव इकाइंग ना प्रतिशत पोरोटा प्रतिशत तुकू वेल्ले अलग मंता।
- 3) इव हेय्युंग श्रेणिंग लोप्पा पूंजीपति ओसो गैर-पूंजीपति स्वतंत्र दस्तकार, परिवार ताकी कीयाना कारोबार लोप्पा मत्ता व्यापारी शामिल मंतोर। मति ताना लोप्पा फेरी वालेर शामिल मंतोर। बेहरा शहर कुना लोपा फेरी वालेर किन इंजे विडसमूडांता। मति स्वतंत्र दस्तकार ओसो परिवार ताकी कीयाना कारोबार लोप्पा मत्ता व्यापारिरा समस्या इंजे हल कीतेके बेस आयर। मध्यम शहर कुना काजे इद आंदोलन लोप्पा स्वतंत्र दस्तकार, व्यापारिर ओसो फेरी

वालेरा समस्या हल कीतेके बेस आयर। मावा बेहरा, मध्यम शहर कुना लोप्पा मजदूर लेवेके दुकान-कर्मचारि तासा परवा लेक्कटा (ओरा लोप्पा वेल्ले तोर पूना करियानोर किन तासतोर) स्वतंत्र दस्तकार, व्यापारिरा संख्या वेल्ले ज्यादा मंता। ओरा लोप्पा वेल्लेटोर कानून ता पालन कियवा मंदानोर मंतोर। अनि वेल्लेटोर बुनियादी रूप ते कानून ता पालन कीसोर मत्तेकाई आंशिक रूप ते अदिना उल्लंघन कियानोर इत्तेके ओरा सुडला स्तर ते टैक्स-चोरी कीयाना लेक्कटा सुडला-बेहरा समस्या मंता। आंशिक रूप ते कानून ता पालन कीतेकाई आंशिक रूप ते अदिना उल्लंघन कियानोर, तूलनात्मक रूप ते बेहरा स्तर ते टैक्स-चोरी कियानोर कम मंतोर। वर्तमान “हेय्युंग गलतिंग” विरोधी आंदोलन लोप्पा माटु सुडला पूंजीपतिरा उंदी बेहरा संख्या ता समस्या हल कीयाना ओरा बारे ते निर्णय कीयाना जरूरी मंता। संभव आतेके लगभग सुडला पूंजीपतिर अचोन संख्या मत्ता स्वतंत्र दस्तकार, व्यापारिरा संगे वेने समस्या हल कीयाना ओसो ओरा बारे ते निर्णय कीयाना कोशिश कीयाना। इद्रम कीयाना वर्तमान “हेय्युंग गलतिंग” विरोधी आंदोलन ओसो वायना कालम ते आर्थिक निर्माण काजे फायदा आयार। सुडला पूंजीपति ओसो स्वतंत्र दस्तकार, व्यापारिरा गंभीर अपराध कुनगडल मुक्त आंतोर अनि ओरा बारे ते निर्णय कीयाना हल्को आंता। इद्रम कीतेके माटु व्यापाक जन समुदाय ता समर्थन दोरकी क्रिया परितोमा मति उंदी-रेंडु शहरकु ओरा काजे मुन्ने औद्योगिक-वाणिज्य इकाइंग ना बारे ते निर्णय कीयाना अनि पेरके स्वतंत्र दस्तकार, व्यापारिरा काजे निर्णय कीयाना ज्यादा बेस आयर इंजी आल्सतेके अवु इद्रम क्रिया परितांगा।

- 4) शहर कुना असली परिस्थिति अनुसार माटु औद्योगिक-वाणिज्य इकाइंग कुन मुन्ने नालुंग श्रेणिंग आयवा हेय्युंग श्रेणिंग ने

पुनर्विभाजित कीयाना निर्णय कीतोम। इत्तेके कानून ता पालन कीयाना इकाइंग ओसो बुनियादी रूप ते कानून ता पालन कीयाना इकाइंग लोप्पा विभाजित किताद मंता अनि पिस्ता मूंड श्रेणिंग लोप्पा बदे बदलाव किताद हिल्ले। पेकिंग ता 50 हजार औद्योगिक-वाणिज्यिक इकाइंग (इविना लोप्पा स्वतंत्र दस्तकार, व्यापारी शामिल मंतोर मति फेरी वाले शामिल हिल्लेर) लोप्पा लगभग 10 प्रतिशत कानून कुना पालन कीयानावु मंतांग अनि 60 प्रतिशत बुनियादी रूप ते कानून ता पालन कीयानावु मंतांग। 25 प्रतिशत आंशिक रूप ते कानून ता पालन ओसो आंशिक रूप ते अदिना उल्लंघन कीयानावु मंतांग। 4 प्रतिशत गंभीर रूप ते कानून ता उल्लंघन कीतांग, 1 प्रतिशत पूर्ण रूप ते कानून ता उल्लंघन कीतांग। पूर्ण रूप ते कानून ता पालन कीयाना इकाइंग ओसो बुनियादी रूप ते कानून ता पालन कीयाना इकाइंग नडमा सुडला-बेहरा अंतर कुन चिह्नित कीयाना। ताना पेरके बुनियादी रूप ते कानून ता पालन कीयाना इकाइंग लोप्पा वेने सुडला स्तर ता टैक्स-चोरी कीयाना इकाइंग ओसो तूलनात्मक रूप ते बेहरा स्तर ते टैक्स-चोरी कीयाना इकाइंग संगे अलग-अलग व्यवहार कीयाना वेल्ले सही साबित आंता।

- 5) उचुन बेहरा, मध्यम नगर कुना पार्टी कमेटिंग “हेय्युंग गलतिंग” विरोधी आंदोलन वेल्ले जल्दी शुरू कीतांग। बारांकु इत्तेके बाकी सब्बे श्रेणिंग ना औद्योगिक-वाणिज्य इकाइंग ना परिस्थिति इनपडे पुनवा लेक्का मत्ता। इव इकाइंग ना संगे अलग-अलग रकम ता व्यवहार कीयाना कार्यनीति तुन वेने स्पष्ट रूप ते समझेमायवा मत्तांग, ट्रेड यूनियन, सरकार लोहता कार्य दल (जांच पड़ताल ग्रुप) कुना संगठन, प्रशिक्षण वेल्ले लापरवाही ते किताद मत्ता। अद्रमासी उचुन गड़बड़ आता। इव शहर कुना पार्टी कमेटिंग इद परिस्थिति पोरो ध्यान हीसी जल्दी सुधरे कियानुंग इंजी आशा

कीतोमा इदे आयवा कानून ता उल्लंघन कीयाना औद्योगिक-वाणिज्य इकाइंग ना जांच पड़ताल काम वेने नगर पार्टी कमेटींग, नगर सरकार ता कड़ा नियंत्रण लोप्पा कीयाना जरूरी मंता। दूसरा संगठन तुन इदिना जांच पड़ताल कियाला काजे तम्मा विचार ता मानेय लोहना अनुमति हिल्ले। पूंजीपतिरा संगे पूछताछ कियाला काजे ओरकिन तम्मा ऑफिस ते तत्ताना अनुमति इनपड़े हिल्ले। “मूंड गलतिंग” विरोधी आंदोलन मत्तेकाई लेवेके “हेय्युंग गलतिंग” विरोधी आंदोलन मत्तेकाई लोकरिगडल जुर्म कबूल कियाला काजे शारीरिक यातना हियाना इनपड़े मना मंता। आत्महत्या ता घटनांग रोमी कियाला काजे सख्त निर्णय एतना जरूरी मंता। बेगा आत्महत्या ता घटनांग आतांग, अगा वायना कालम इद्रम ता घटनांग रोमी कियाला काजे तुरंत सख्त निर्णय एतना अनि रेंडासी आंदोलनकु सही हरीं ते ताका मंतांग अनि सही विकसित आसोर दाया मंतांग अविना लोप्पा पूर्ण सफलता दोरकियार इंजी गारंटी कीयाना।

- 6) “मूंड गलतिंग” विरोधी ओसो “हेय्युंग गलतिंग” विरोधी आंदोलन इंजे काउंटींग, जिलांग ओसो श्यांग कुना लोप्पा ताकसोर हिल्ले। अविना लोप्पा इव आंदोलनकु वायना कालम ते बस्के ओसो बद्रम ताकानुंग इंदानदिना बारे ते केंद्रीय कमेटी पेरके निर्णय कियार। उंदी-रेंडु काउंटी-केंद्र कुना लोप्पा “हेय्युंग गलतिंग” विरोधी आंदोलन ओसो उंदी-रेंडु जिलांग लोप्पा “मूंड गलतिंग” विरोधी आंदोलन तुन शुरू कित्ताद मंता अगा इविना पोरो सख्त नियंत्रण तासना अनि वसंत कालम ते खेतीबाड़ी ओसो बाकी आर्थिक कामकाज कुना लोप्पा बाधा वायवा लेक्का हूडना। “हेय्युंग गलतिंग” विरोधी आंदोलन सब्बे मध्यम शहर कुना लोप्पा उंदे बेरा आयवा अलग-अलग समूह लोप्पा ओसो सख्त नियंत्रण ते ताकी कीयाना।

(5 मार्च 1952)

- 7) “हेय्युंग गलतिंग” विरोधी संघर्ष ताकनास्के ओसो ताना पेरके माटु दोड़ रास्ता सफलतांग दोरकी कियाना:
- 1) निजी उद्योग-वाणिज्य बारे ते स्पष्ट जानकारी दोरकी कियाना अनि पूंजीपति वर्ग संगे एकता कियाना, अदिन नियंत्रण कियाना देश लोप्पा योजनाबद्ध अर्थव्यवस्था ता विकास कियाना काम वेल्ले बेस कियाना। परिस्थिति ता स्पष्ट जानकारी दोरकवा लेवा योजनाबद्ध अर्थव्यवस्था असम्भव मंता।
 - 2) मजदूर वर्ग पूंजीपति वर्ग नड़मा स्पष्ट विभाजन कियाना, ट्रेड यूनियन कुना लोप्पा भ्रष्टाचार तुन जनता तल अलग मंदाना नौकरशाही तुन खत्म कियाना अनि पूंजीपति नैकुन खत्म कियाना। इद्रम ता नैकुन ओसो श्रम-पूंजी नड़मा मंदाना तत्व हर जागा ता ट्रेड यूनियन कुना लोप्पा मंतांग। माटु संघर्ष ताकनास्के मध्यपंथी तत्व कुन शिक्षित कियाना अनि मना पक्ष ते कियाना, गंभीर अपराध कित्ता पूंजीपतिरा नैकुन तेंडसियाना वेल्ले जरूरी मंता।
 - 3) व्यवसायिक परिषदकु ओसो उद्योग-वाणिज्य संघ कुना पुनर्गठित कियाना, इव संगठन कुना नेतृत्वकारी निकाय कुनगडल पूरा “हेय्युंग गलतिंग” कीतोरु, पूरा बदनाम आतोरु बाहर कियाना अनि ओरा जागा ते “हेय्युंग गलतिंग” विरोधी आंदोलन ताकनास्के तूलनात्मक रूप ते बेस काम कित्तोरु किन शामिल कियाना। इव संगठन कुन लोप्पा कानून ता पूर्ण रूप ते उल्लंघन कियानोर किन विड़चसी अलग-अलग श्रेणिंग ना उद्योगपतिर, व्यापारिरा प्रतिनिधिर मंदाना जरूरी मंता।
 - 4) चीनी जनवादी राष्ट्रीय निर्माण संघ तुन सुधरे कियाना अदिना नेता लोरा सहायता कियाना। पूंजीपति वर्ग, मुख्य रूप ते औद्योगिक पूंजीपति वर्ग ता न्यायिक हित कुना प्रतिनिधित्व कियाना ओसो

प्रोग्राम ता वायना कालम ओसो “हेय्युंग गलतिंग” विरोधी आंदोलन ता उसूल कुना अनुसार पूंजीपतिर किन शिक्षित कीयाना उंदी बेसता राजनीतिक संगठन बने क्रियाला काजे “हेय्युंग गलतिंग” कीतोरु, जनता ना कोंडा ते अपराधी मत्तोरु, इद संगठन लोप्पा बचोनो तूलनात्मक बेसता लोकरु किन भरती कीयाना। पूंजीपतिरा अगल-अलग ग्रुप कुना गुप्त संगठन, “बृहस्पतिवार प्रीतीभोज क्लब”² कुन भंग क्रियाला काजे निर्णय एतना जरूरी मंता।

- 5) “हेय्युंग गलतिंग” किन खत्म कीयाना, सट्टेबाजी तुन खत्म कीयाना अनि पूरा पूंजीपति वर्ग राज्य ता कानून, आदेश कुना पालन कीयाना, राष्ट्रीय अर्थव्यवस्था, जनता ना पिस्वल काजे फायदा मत्ता औद्योगिक-वाणिज्यिक कामकाज कीयाना। राज्य तय कित्ता नियम कुना अनुसार निजी उद्योग कुना विकास कीयाना (पूंजीपतिर इदिना काजे तैयार मंदाना, ओसो इद कार्यवाही प्रोग्राम ता अनुसार मंदाना जरूरी मंता), निजी वाणिज्य तुन तीरम-तीरम कम कीयाना। निजी उद्योगिक कारोबार कुना माल ता ब्रिकी, अनुबंध कुना पोरु इजारेदारी कीयाना सरकारी योजना ता स्तर हर साल बेरसी कीयाना संगेने निजी उद्योग-वाणिज्य बारे ते मावा योजना ता हंदी हर साल बेरसी कीयाना। निजी पूंजी काजे मुनाफा ता उंदी पूना प्रतिशत तय कीयाना, अनि उचुन मुनाफा एतना मति हंदी तुकू ज्यादा मुनाफा एतनायो।
- 6) गुप्त बही-खाता तासना व्यवस्था तुन खत्म कीयाना, हिसाब-किताब ता ब्यौरा सार्वजनिक रूप ते पेश कीयाना, तीरम-तीरम मजदूर, दुकान-कर्मचारी उत्पादन, प्रबंध काम ता निरीक्षण कीयाना लेक्कटा व्यवस्था बने कीयाना।
- 7) टैक्स-चोरी ता रकम वापिस पोयना, चोरी कित्ता सरकारी सम्पत्ति वापिस पोय्यना, जुर्माना एतना, सम्पत्ति जव्त कीयाना तरिकांग

संगे राज्य, जनता ना ज्यादातर आर्थिक नुकसान ता भरपाई कीयाना।

- 8) बेहरा, मध्यम आकार ता सब्बे निजी कारोबार कुना मजदूर, दुकान-कर्मचारिरा लोप्पा पार्टी शाखांग बने कीयाना अनि पार्टी काम तुन सुदृढ कीयाना।

(23 मार्च 1952)

नोट

1. “मूंड गलतिंग” विरोधी आंदोलन भ्रष्टाचार, फिजूलखर्ची, नौकरशाही खिलाफ संघर्ष मत्ता। अदिन 1951 ता आखरी ते सरकारी विभाग, सरकारी कारोबार कुना कर्मचारिरा नडमा ताकी किताद मत्ता। “हेय्युंग गलतिंग” विरोधी आंदोलन रिश्वत हियाना, टैक्स-चोरी कीयाना, सरकारी सम्पत्ति चोरी कीयाना, सरकारी अनुबंध कुना लोप्पा धोखाधडी कीयाना, राज्य ता आर्थिक सूचनांग चोरी कीयाना खिलाफ ताकी किताद मत्ता। इदिन 1952 ता शुरू ते निजी औद्योगिक-वाणिज्यिक कारोबार ता मालिक लोरा नडमा किताद मत्ता।
2. “बृहस्पतिवार प्रीतिभोज क्लब” छंगकिंग ता उचुन पूंजीपतिरा उंदी गुप्त संगठन मत्ता। इदु कानून ता गंभीर रूप ते उल्लंघन कीसोरे सिलसिलेवार बचोनो गुप्त कार्यावहिंग किता। “हेय्युंग गलतिंग” विरोधी आंदोलन ताकनास्के इद संगठन तुन एक्सपोज कीसी इदिन गैरकानूनी घोषित किताद मत्ता।

कृषि लोप्या आपसी सहयोग, सहकारिता काम तुन उंदी मुख्य काम बने कीयाना¹⁶

15 दिसम्बर 1951

इद सरकुलर संगे मीकिन कृषि-उत्पादन ते आपसी सहयोग, सहकारिता बारे ते प्रस्ताव ता ड्राफ्ट लोहा मंतोमा इद ड्राफ्ट तुन छापे कीसी काउंटी, जिला एवनल सब्बे पार्टी कमेटिंग लोप्या वितरित कीयाना इंजी अनुरोध कीतोमा इद ड्राफ्ट ता विचार अनुसार परताचोन जल्दी पार्टी लोप्या ओसो बाहर इदिना बारे ते प्रचार कीयाना अनि इदिन लागू कीयाना कोशिश कीयाना। इद काम भूमि सुधार काम पूरा आता सब्बे जागा ने कीयाना ओसो मीटु इदिन मीवा मुख्य काम बने कीयाना। प्रस्ताव ता ड्राफ्ट पार्टी प्रकाशन लोप्या छापे कियमूझांता मति पार्टी तुकू बाहर समाचार-पत्र, पत्रिकांग लोप्या प्रकाशित कीयानायो बारांकु इत्तेके इंजे इद सिर्फ उंदी ड्राफ्ट आंदू।

¹⁶ इद उंदी ऐतिहासिक महत्वपूर्ण पार्टी सरकुलर आंदू इदिन कामरेड माओ त्सेतुंग ल्यू शाओ-ची कित्ता कृषि-सहकारिता ता विरोध ता खंडन कियाला काजे रास्ताद मत्ता। जुलाई 1951 ते ल्यू शाओ-ची कामरेड माओ त्सेतुंग ओसो पार्टी ता केंद्रीय कमेटी ता मुकुल परेके तम्मा पोरोल ता उंदी लेख रास्तोर अनि वितरण कित्तोर। ताना लोप्या ओरु कृषि उत्पादन लोप्या आपसी सहयोग, सहकारिता ता विकास कियाना बारे ते शानशी प्रांत ता पार्टी कमेटी ता उंदी रिपोर्ट पोरो विचार वात्ता लेक्का हमला कित्तोर। इद लेख लोप्या ओरु कृषि ता समाजवादी बदलाव ता बारे ते कामरेड माओ त्सेतुंग ना कार्यदिशा ता विरोध कित्तोर। अदिन “कृषि समाजवाद ता गलत, खतरनाक, काल्पनिक धारणा” इंजी आरोप वाटतोर। अदे साल सितम्बर ते कामरेड माओ त्सेतुंग ना व्यक्तिगत निर्देश ते “कृषि-उत्पादन लोप्या आपसी सहयोग, सहकारिता ता बारे ते चीनी कम्युनिस्ट पार्टी ता केंद्रीय कमेटी ता प्रस्ताव (मसौदा)” तैयार कीताद मंता। प्रस्ताव वितरण आयानास्के 15 दिसम्बर ते ओरु इद सरकुलर रासिसी पूरा पार्टी किन कृषि लोप्या आपसी सहयोग, सहकारिता काम तुन उंदी मुख्य काम बने कियाना इंजी आदेश हित्तोर।

पूना साल ता संदेश

1 जनवरी 1952

माटु सब्बे तोर (जनताना सरकार ता कार्यकर्ता लोर, जन स्वयंसेवक, जन मुक्ति सेना ता कमांडर, योद्धा, जनवादी पार्टिंग, जन संगठन, अल्पसंख्यक राष्ट्रीयतांग ओसो पूरा देश ता जनता) मना काम ता हर मोर्चा ते सफलता दोरकी कीयाना इंजी आशा कींतान!

माटु अमेरिका आक्रमण ता प्रतिरोध कीयाना कोरिया ता सहायता कीयाना आंदोलन लोप्पा सफलता दोरकी कीयाना इंजी आशा कींतान!

राष्ट्रीय प्रतिरक्षा ता मोर्चा ते सफलता दोरकी कीयाना इंजी आशा कींतान!

भूमि सुधार काम सफल कीयाना!

प्रतिक्रांतिकारीरा दमन कीयाना आंदोलन लोप्पा सफल आयना!

आर्थिक, वित्तीय मोर्चा ते सफल आयना!

सांस्कृतिक, शैक्षणिक मोर्चा ते सफल आयना!

समाज ता अलग-अलग लोकुर ओसो सबसे मुन्ने बुद्धिजीविरा विचारधारात्मक नव-रूपानतर कीयाना मोर्चा ते सफलता दोरकी कीयाना!

नन्ना माटु उंदी पूना मोर्चा इत्तेके पाड़ना समाज विडसता पूरा गंदगी ओसो जहर तुन साफ कियाला काजे बेहरा स्तर ते पूरा देश ता 99 प्रतिशत जनता, कार्यकर्ता किन भ्रष्टाचार, फिजूलखर्ची, नौकरशाही ता जोरशोर ते गड्ढिक मंजी विरोध कीयाना संघर्ष लोप्पा सफलता दोरकी कीयाना इंजी वेने आशा कींतान!

कामरेड्स, 1951 ते माटु इव सब्बे मोर्चांग पोरो जीत दोरकी किताद मंता। इविना लोप्पा वेल्ले महान जीतकु मंतांग। माटु 1952 ते मना

कलियसी कित्ता कोशिश कुना संगे सब्बे काम कुना लोप्पा वेल्ले महान
जीत कु दोरकी किया परितोम इंजी आशा कीतोम।
चीन लोक गणराज्य जिंदाबाद!

तिब्बत लोप्पा मना काम संबंधित नीतिंग बारे चीकपा केंद्रीय कमेटी ता निर्देश¹⁷

6 अप्रैल 1952

दक्षिण-पश्चिमी ब्यूरो, दक्षिण-पश्चिमी फौजी इलाकांग 2 अप्रैल ते तिब्बत ता कार्यकारी कमेटी, फौजी विभाग कुना पोरोल ते चिड्डी लोहता आदेश कुन केंद्रीय कमेटी बुनियादी रूप ते मंजूर कींता। केंद्रीय कमेटी चिड्डी ते रास्ता बुनियादी नीतिंग (तिब्बती सेना ता पुनर्गठन विडचसी) ताना लोप्पा प्रस्ताव कित्ता बचोनो ठोस निर्णय सही मंतांग। सिर्फ अविना पोरो अमल कीसीए मना सेना तिब्बत ते जीड़ा परिंता।

तिब्बत ता परिस्थिति सिनच्यांग ता परिस्थिति तुकू अलग मंता। राजनीतिक रूप ते हूडतेके लेवेके आर्थिक रूप ते तिब्बत ता परिस्थिति सिनच्यांग ता परिस्थिति तुकू बचोनो ज्यादा बेस मंता। मति वांग चंग ना कमान ते मावा सेना सिनच्यांग ते नेंगतास्के सबसे मुन्ने आर्थिक रूप ते मजबूत आयना, आत्मनिर्भरता अमल कीयाना ओसो खुद ता जरूरी चीज कुना उत्पादन कीयाना बगिल पूरा ध्यान हीता। इंजे अदु तन्ना काल पोरो नित्तिता अनि अदिन अल्पसंख्यक राष्ट्रीयतांग ना वेल्ले गिर्दा ते समर्थन दोरकता। इस्सल लगान, सूद कम कीयाना काम किया मंता। इयेंड इरंगम ते भूमि-सुधार कीसी जनता ना ओसो ज्यादा समर्थन दोरकी कियमूडायरा।

¹⁷ उंदी पार्टी निर्देश ता मसौदा, इदिन कामरेड माओ त्सेतुंग चीनी कम्युनिस्ट पार्टी ता केंद्रीय कमेटी काजे तैयार कित्तोरा। इदिन दक्षिण-पश्चिमी ब्यूरो ओसो तिब्बत ता कार्यकारी कमेटी तो पोरोल ते लोहताद मत्ता। इद सूचना उत्तर-पश्चिमी ब्यूरो ओसो सिनच्यांग उपब्यूरो तुकू लोहताद मत्ता।

सिनच्यांग ता सड़क तल देश ता प्रदेश कुना संगे बेस सम्पर्क आता। इद्रमे अल्पसंख्यक राष्ट्रीयतांग कुन तम्मा भौतिक परिस्थिति सुधरे कियाला मावा मदद दोरकता। तिब्बत लोप्पा कम से कम रेंडु-मूंड साल एवनल लगाम कम कियमूडायर भूमि सुधार किया परमूडायो। सिनच्यांग लोप्पा हान जाति ता बचोनो लाख लोकुर मंतोर अनि तिब्बत ते इद जाति ता लोकुर मंतोरा हिल्लेर इंदानदु पुन्नोम; अगा मावा सेना उंदी अलग अल्पसंख्यक राष्ट्रीयता वाले इलाका ते मंता। जनता तुन मना पक्ष ते कीयाना ओसो उंदी जीडना परिस्थिति ते एवला काजे माटु रेंडु बुनियादी नीतिंग पोरो निर्भर मंदाना। पहली नीति हालनाचोन बजट, सेना ता जरूरत ता सामान ता उत्पादन कीयाना, अनि जनता ना पोरो मना प्रभाव विस्तार कीयाना; इदु उंदी मुख्य कड़ी मंता। सड़क बने कीतेके वेल्ले अनाज लोहमूडायरा। भारत आदान-प्रदान पोरो आधार आसी तिब्बत लोप्पा उचुन अनाज, माल लोहला तैयार आयना लेक्का मंता; मति इदिना काजे माटु वायना कालम ते बस्केनाई भारत अनाज-माल लोहना बंद कीतेके वेने मना सेना ता काम ताकना लेक्का नीतिंग लागू कीयाना। दलाई ओसो उच्च वर्गीय गुट ता लोकुरा बहुसंख्या तुन मना पक्ष ते कीयाना अनि मुट्टामेंड लब्बड़ ता तत्व कुन अलगाव ते वाटना पूरा कोशिश कीयाना। इदिना काजे हर निर्णय एतसी वायना कालम ते बचोनो साल नेत्तुर पोहवा तिब्बत ता आर्थिक, राजनीतिक व्यवस्था तुन बदले कीयाना उद्देश्य तुन पूरा किया परितोम; दूसरा बगिल माटु लब्बड़ तत्व तिब्बत सेना पोयसी बगावत कीसी मावा पोरो हमला कित्ता परिस्थिति ता सामना कियाला काजे वेने तैयार मंदाना अनि तिब्बत लोप्पा टिकेमासी, डटेमासी मंदाना। इव सब्बे हालनाचोन बजट, जरूरत ता सामान ता उत्पादन पोरो आधार आसी मंदितांग। दूसरा नीति, भारत संगे ओसो मना देश ता गुंडे लेक्का मत्ता प्रदेश कुना संगे व्यापारिक संबंध स्थापित कीयाना ओसो माल तिब्बत ते एवसी कीयाना, अगाटल बाहर लोहना नडमा तालमेल कीयाना नीति लागू कीयाना। इद्रम कीसी मना सेना ता कारण ते तिब्बत जनता ना पिस्वल स्तर दोड़ रैय्यना जागा ते अदिना लोप्पा सुधार वायना लेक्का

हूडना। बस्के एवनल माटु उत्पादन ओसो व्यापार ता रेंडु समस्यांग हल कीवोम, अस्के एवनल मना सेना काजे भौतिक आधार बने माया परवो अनि लब्बड़ तत्व कुनगा मना विरोध कियाला काजे पेरके अरता जनता, तिब्बती सेना तुन भड़के कीयाना साधन वेने दोरकसोर मंदानुंग, बहुसंख्या संगे एकता कीयाना, अल्पसंख्या तुन अलगाव ते वाटना मना नीति कमजोर मंदियर, कारगर मन्नो आयार।

दक्षिण-पश्चिमी ब्यूरो 2 अप्रैल ते चिट्टी लोप्पा वेहता सिर्फ उंदे पोल्लो पोरो (तूलनात्मक कम टाईम ते तिब्बत सेना ता पुनर्गठन कीयाना ओसो फौजी, प्रशासनिक कमीशन ता स्थापना कीयाना संभावना जरूरी मंता या हिल्ले इंजी) ओसो उंदी बेरा आल्सना मंता। मना हिसाब ते इंजे तिब्बत फौज ता पुनर्गठन कीयाना, फौजी उपक्षेत्र लेवेके फौजी, प्रशासनिक कमीशन ता व्यवहारिक रूप ते स्थापना कीतेकेने बेस आंता। इंजे सब्बे बद्रम मत्ता अद्रमे मंदा हियाना। उंदी लेवेके रेंडु साल पेरके मना सेना निज्जमे तन्ना जरूरत ता चीज उत्पादन कियार, जनता ना समर्थन दोरकी कियार अस्के इव सवाल कुना पोरो आल्समूडायार। हिक्के उंदी लेवेके रेंडु साल लोप्पा रेंडु संभावनांग पैदा आया परिंतांग: पहली, उच्च वर्गीय गुट संगे संयुक्त मोर्चा बने कीयाना नीति (इदिना लोप्पा बहुसंख्या संगे एकता कीयाना अनि अल्पसंख्या तुन अलगाव ते वाटना) कारगर साबित आयना संभावना मंता। तिब्बत जनता तीरम-तीरम मावा गरें वांता अनि लब्बड़ तत्व, तिब्बती फौज कुन बगावत किया परवो आंता। दूसरा संभावना लब्बड़ तत्व मनम कमजोर मंतोम, माकिन वेरयी कियमूडांता इंजी आल्संतांग, तिब्बती फौज कुना संगे कलियसी बगावत कीयाना परिस्थिति ते मना सेना आत्मरक्षा काजे जवाबी हमला कीयाना अनि ओरा पोरो गोड्डेल देब्बा वाटना। पोरो वेहता रेंडासी परिस्थितिंग मावा काजे फायदा तावे मंतांग। तिब्बत फौज ता पुनर्गठन कीयाना बदे कारण हिल्ले। मति उचुन साल कुना लोप्पा परिस्थिति बदलेमायर। अस्के ओरकिन समझौता पूराए लागू कीयाना, तिब्बती फौज ता पुनर्गठन कीयाना विड़चसी ओरा मून्ने दूसरा बदे हरीं हिल्ले इंजी समझेमायर। तिब्बती फौज

उंदी बेरा लेवेके बचोनो बेरा बगावत कियार अनि हर बेरा जवाबी हमला संगे ओरा पोरो दमन कीसी मनम तिब्बती फौज ता पुनर्गठन कीयाना पोरो वेल्ले प्रभाव वाटितोमा सिर्फ रेंडासी सीलीनो² किने आयवा दलाई ओसो गुट ता ज्यादातर लोकरु किन वेने इद समझौता स्वीकार किया लागता लेक्का मंता। इदिन ओरु लागू कियाला तैयार हिल्ले। इंजे एवनल मना मुन्ने समझौता तुन पूराए लागू कीयाना भौतिक आधार हिल्ले ओसो जनता ना समर्थन ओसो उच्च वर्गीय गुट ता समर्थन ता आधार हिल्ले। इद्रम ता परिस्थिति ते समझौता तुन जबरदस्ती लागू कीतेके फायदा आयवा नुकसान ज्यादा आयार। ओरु समझौता तुन लागू कियवेके माटु मंदाला हियाना अनि हरीं हूड़ना। बचोन लेट आयर अचोने मना परिस्थिति ज्यादा मजबूत आयर अनि ओरा परिस्थिति अचोनो ज्यादा कमजोर आसोर दायर। लेट आतेके माटु ज्यादा नुकसान आयो आयर, इदिना उल्टा फायदा आयना लेक्का मंता। ओरकिन जनता ना खिलाफ क्रूरतापूर्ण अत्याचार कियाला हियाना अनि माटु सिर्फ उत्पादन, व्यापार, सड़क-निर्माण, चिकित्सा सेवा, संयुक्त मोर्चा ता काम (बहुसंख्या संगे एकता कीयाना ओसो शिक्षित कीयाना) लेक्कटा बेसता काम कीसोर मंदाना। अस्केने जनता किन मना पक्ष ते किया परितोम, परिस्थिति अनुकूल मत्तास्केने समझौता तुन पूरा लागू कियाला सवाल कीयाना। ओरा काजे प्राईमरी स्कूल ताकी कीयाना वेने सही हिल्लेके इद काम तुन बंद कीसीयाना।

हत्ता दिय्या ने ल्हासा ते आता प्रदर्शन सिर्फ रेंडू सीलीनों ओसो बाकी लब्बड़ तत्व कुना बारे तेने आयवा दलाई गुट ता बहुसंख्या माकिन हीता उंदी इशारा लेक्का समझेमायना। ओरा याचिका वेल्ले होशियारी ते रास्ताद मंता। बारांकु इत्तेके ताना लोप्पा संबंध-विच्छेद ता बारे ते वेहतद हिल्ले अनि सिर्फ झूट मांग किताद मंता। ताना लोप्पा उंदी पोल्लो छिंग राजवंश प्रथा तुन ओसो शुरू कीयाना, इत्तेके तिब्बत ते मुक्ति सेना तैनात कीयानायो इंजी इशारा कीता। मति असल इत्तेके इदु ओरा असली मांग आयो। ओर स्पष्ट रूप ते इद्रम किया परवा लेक्का मंता इंजी पुत्तोर। ओरु

इद मांग पेश कीसी दूसरा “मांग” कुना सौदा कीयाना इंजी आल्सा मंतोरा याचिका लोप्पा चौदावी दलाई ना आलोचना किताद मंता, अदिना उद्देश्य इद प्रदर्शन ता राजनीतिक जिम्मेदारी तल मुक्त आयनादू मंता। ओरु तिब्बती राष्ट्रीय ता हित कुना रक्षा कीयाना ढोंग कींतोर अनि फौज लोप्पा माकिनकु कमजोर मंतोर, मति सामाजिक प्रभाव लोप्पा माकिनकु वेल्ले शक्तशाली मंतोरा। माटु निज्जमे (सिर्फ पोरो-पोरो आयवा) इद याचिका तुन स्वीकार कीयाना अनि समझौता तुन पूरा लागू कीयाना बंद कीयाना। इद प्रदर्शन आयनास्के वेल्ले आल्सिसी चुने कितोर अनि पंचन ना तिब्बत एव्वना मुन्ने ने प्रदर्शन कितोर। पंचन ल्हासा एवता पेरके ओरु ओनकिन तम्मा गुट ते शामिल कीयाना पूरा कोशिश कियानूर। माटु मना काम बेस कीतेके पंचन ओरा जाली ते हिरकवा लेवा सुरक्षित शिगात्से एवतेके परिस्थिति मना काजे तूलनात्मक रूप ते अनुकूल आयार। इद्रम आतेकाई इव रेंडासी परिस्थितिंग इतेके मावा काजे भौतिक आधार ता कमी मंदाना ओसो सामाजिक प्रभाव लोप्पा ओरु माकिनकु ज्यादा शक्तिशाली मंदानादु इंजे बदलेमायोंग। ओसो दलाई गुट समझौता तुन पूराए लागू कियावा मंदाना परिस्थिति वेने बदलेमायो आंता। इस्सल माटु पोरो-पोरो आक्रामणात्मक रुझान लागू कींतोम अनि इद प्रदर्शन, याचिका ता उल्लंघन तुन निंदा कीयाना मति असल ते छूट हियाला तैयार मंदाना अनि वायना कालम ते परिस्थिति अनुकूल आतास्के माटु इद समझौता तुन लागू कियाला तैयार मंदाना।

इदिना बारे ते मीटु बाता आल्सितोर? इदिना पोरो विचार कीमुट अनि चिट्टी रासिसी उत्तर लोहाटू।

नोट

1. इगा 23 मई 1951 ते आता ‘तिब्बत ता शांतिपूर्ण मुक्ति ता तरीकांग बारे ते केंद्रीय कमेटी जनताना सरकार ओसो तिब्बत ता स्थानीय सरकार ता समझौता’ ता बारे ते रास्ताद मंता।
2. “सीलोन” दलाई लोप्पा सर्वोच्च प्रशासनिक अफसर मंतोरा। इगा वेहता इरवुर सीलोन प्रतिक्रियावादी भूदास-मालिक लूखांगवा ओसो लोजांग ताशी आंदुर।

चीन लोप्या मजदूर ओसो पूंजीपति वर्ग नडमा ता अन्तरविरोध प्रधान अंतरविरोध आंदू¹⁸

6 जून 1952

जर्मीदार वर्ग नौकरशाह-पूंजीपति वर्ग ता तख्ता पलट कित्ता पेरके चीन लोप्या मजदूर वर्ग ओसो राष्ट्रीय पूंजीपति वर्ग नडमा ता अन्तरविरोध प्रधान अंतरविरोध बनेमाता; अदिन काजे इंजेटल राष्ट्रीय पूंजीपति वर्ग तुन मध्यम वर्ग पोरोल हियानायो।

¹⁸ चीनी कम्युनिस्ट पार्टी ता केंद्रीय कमेटी ता संयुक्त मोर्चा कार्य विभाग तैयार कित्ता उंदी दस्तावेज पोरो रास्ता उंदी पोल्लो। तीना लोप्या कामरेड् माओ त्सेतुंग इद विभाग ता प्रधान ना गलत दृष्टिकोण ता खंडन कित्तोर। अदिना अनुसार राष्ट्रीय पूंजीपति वर्ग तुन उंदी मध्यम वर्ग मानेमाताद मंता।

एकता आसी मना ओसो दुश्मन नडमा स्पष्ट विभाजन-रेखा पिडंगाटू¹⁹

4 अगस्त 1952

हत्ता पूरा उंदी साल लोप्पा माटु युद्ध कीयाना, समझौता-वार्ता कीयाना ओसो परिस्थिति अनुकूल कीयाना मूंड काम संगे-संगेने किया मंतोम।

कोरिया ते युद्ध ता परिस्थिति ते हत्ता साल जुलाई पेरके अनुकूल परिस्थिति वात्ता। मति देश लोप्पा वित्तीय, आर्थिक परिस्थिति लोप्पा वेने अनुकूल परिस्थिति तत्ताद मंता या हिल्ले इंजी तय आसोर हिल्ले। माटु “चीज कुना सही दाम बुनियादी रूप ते स्थिर मंता अनि कमाई ओसो खर्च नडमा तालमेल मंता” इंजी इत्तोमः इत्तेके चीज कुना दाम इंजे स्थिर आताद हिल्ले ओसो कमाई, खर्च नडमा इंजे वेने तालमेल आताद हिल्ले इंजी मत्ता। कमाई कम मत्ता अनि खर्च ज्यादा मत्तांकु इद उंदी सवाल लेक्का मत्ता। अदिन काजे सालमेंड सितम्बर ते चीनी कम्युनिस्ट पार्टी ता केंद्रीय कमेटी उंदी मीटिंग केयता अनि उत्पादन बेरसी कीयाना ओसो बचत जरूर कीयाना इंजी आह्वान कित्ता। अक्तूबर ते इदिन नन्ना राजनीतिक सलाहकार सम्मेलन ता प्रथम राष्ट्रीय कमेटी ता तीसरी अधिवेश लोप्पा ओसो उंदी बेरा मुन्ने वाटतान। उत्पादन बेरसी कीयाना अनि बचत कीयाना आंदोलन ताकनास्के भ्रष्टाचार, फीजुलखर्ची, नौकरशाही लेक्कटा वेल्ले गंभीर समस्यांग ना पर्दाफाश कित्ताद मंता। दिसम्बर ते “मूंड गलतिंग” विरोधी आंदोलन ताकी कित्ता पेरके “हेय्युंग गलतिंग” विरोधी आंदोलन ताकी

¹⁹ चीनी जन राजनीतिक सलाहकार सम्मेलन ता प्रथम राष्ट्रीय कमेटी ता स्थायी समिति ता 38वीं मीटिंग लोप्पा हीता भाषण ता मुख्य मुद्दा।

किताद मंता। इंजे इव रेंडासी आंदोलनकु सफलतापूर्वक मारतांग अनि परिस्थिति स्पष्ट आता।

हत्ता साल माटु अमेरिका आक्रमण ता प्रतिरोध कीयाना, कोरिया ता मदद कीयाना युद्ध लोप्पा कित्ता खर्चा देश लोप्पा निर्माण-कार्य लोप्पा कित्ता खर्चा ता बराबर लेक्का मत्ता; इयेटा परिस्थिति अद्रम हिल्ले। इयेंड युद्ध लोप्पा आयना खर्चा नीरे तुकू सिर्फ आधाए मंदियार। इंजे मना फौज मुन्ने तुकू कम मंता मति हथियारबंद ज्यादा बेस आताद मंता। हत्ता बीस साल तुकू ज्यादा जोम माटु वडियु सेना लेवाए युद्ध कीतोम अनि युद्ध लोप्पा दुश्मन ता बमबारी ता निशाना बनेमातोम। इंजे मनगा मना वडियु सेना मंता अनि विमान ते दलगना लेक्का तोपकु, तोपखाना, टैंक वेने मंतांग। अमेरिका आक्रमण ता प्रतिरोध कीयाना, कोरिया ता मदद कीयाना उंदी बेहरा युद्ध स्कूल मंता, अगा माटु बेहरा स्तर ते सैनिक प्रशिक्षण कीतोम; इद सैनिक प्रशिक्षण फौजी अकादमी ताकी कीयाना तुकू बेस मंता। इद लड़ाई पेरेंड एवनल ताकसोर मत्तेके मना स्थल सेना ता सब्बे सेक्शन कु उंदी-उंदी कीसी अगा हंजी फौजी ट्रेनिंग एता परितांग।

इद युद्ध लोप्पा मना मुन्ने शुरू ते मूंड समस्यांग मत्तांग: पहली मना लड़ेमायना क्षमता; दूसरा मना डटेमासी मंदाना क्षमता; तीसरा मना तिंदाना-उंडना जमा कीयाना क्षमता।

मना लड़ेमायना क्षमता ता समस्या रेंडु-मूंड महीनांग लोप्पा हल आता। दुश्मन ता तोपकु मना तोप किनकु ज्यादा मत्तांग, मति ओरा लोप्पा लड़ेमायना क्षमता वेल्ले कम मत्ता; ओरु कच्ची-उपकरण कुना अमीर मत्तोर, मति मनोबल तुकू कंगाल मत्तोर।

मना डटेमासी मंदाना क्षमता ता समस्या हत्ता साल हल किताद मंता। इदिना तरीका सुरंग पंडनादु मत्ता। माटु रेंडु स्तर ते किलेबंदी ता निर्माण कीतोम। मना पोरो दुश्मन हमला आतास्के माटु सुरंग लोप्पा नेंगानोरोम। बस्के-बस्के दुश्मन पोरो मत्ता स्थल सेना पोरो कब्जा कियानोर मति जमीन दोड़ ता जागा मावा कैदे मंदानवु। दुश्मन पोरोटा जागा पोरो कब्जा कीतेके माटु ओरा पोरो जवाबी हमला कियनोरोम अनि ओरकिन बेहरा संख्या ते

नुकसान कियानोरमा इद्रम माटु देशी तरीका ते विदेशी तोप-बंदूक जमा कियानोरोमा मना मुन्ने दुश्मन टिके माया परवोर आतोर।

तिंदना-उंडना जमा कीयाना समस्या वेल्ले जोम हल आया परवो आता। मुन्ने माटु सुरंग तरविसी अनाज जमा किया परितोम इंजी पुनवा मत्तोमा इंजे हर डिवीजन लोप्पा मूंड महीनांग ना अनाज जमा मंता, अदिना भंडार वेने मंता; सुरंग लोप्पा पिस्वल बेस ताका मंता।

इंजे मना नीति स्पष्ट आता अनि मावा मोर्चा वेने सुदृढ़ आता। मावा राशन ता गारंटी किताद मंता, हर सैनिक आखरी एवनल डटेमासी मंदाना इंजी पुत्तोर।

इद लड़ाई बस्के एवनल ताकियर, इद समझौता-वार्ता बस्के मारियर? नन्ना समझौता-वार्ता आसोर मंदियर अनि लड़ाई वेने ताकसोर मंदियर मति युद्धविराम वेने जरूरी मंता इंतान।

युद्धविराम बारांकु जरूरी मंता? तीस साल एवनल लेवेके सौ साल एवनल युद्ध जारी मंदाना संभावना मंता बारांकु इत्तेके वेल्ले जोम ताकना युद्ध अमेरिका ता हित कुना संगे कलियो आंता।

मुन्ने युद्ध लोप्पा लोकर जीवा हियानोर। दस हजार तुकू ज्यादा युद्धबंदिर किन नजरबंद कियाला काजे किता युद्ध लोप्पा ओरु तीस हजार तुकू ज्यादा लोकरा जीवा हिया लागियर। ओरगा माकिनकु ज्यादा लोकर मंतोर।

दूसरा, युद्ध लोप्पा धन खर्च आंता। ओरकिन हर साल दस अरब तुकू ज्यादा डालर खर्च किया लागिंता। ओरा तूलना ते माटु वेल्ले कम धन खर्च किताद मंता अनि इयेंड मावा खर्च हत्ता साल तुकू सिर्फ 50 प्रतिशत मंता। “मूंड गलतिंग” विरोधी आंदोलन ओसो “हेयुंग गलतिंग” विरोधी आंदोलन ता हिसाब-किताब ता जांच कितास्के दोरकता रकम संगे माटु डेढ़ साल एवनल लड़ाई जारी तासा परितोम। उत्पादन बेरसी कीयाना, बचत कीयाना कीतांकु पूरा धन देश लोप्पा निर्माण-कार्य ते वाटमूडांता।

तीसरा, ओरकिन देश-विदेश ते हल किया परवा लेक्कटा अन्तरविरोध कुना सामना किया लागिता।

चौथा, उंदी रणनीतिक सवाल वेने मंता। अमेरिका रणनीतिक केंद्र योरोप ते मंता। ओरु तम्मा सेना लोहची कोरिया पोरु आक्रमण कितास्के माटु कोरिया ता सहायता कियाला काजे मना स्वयंसेवक लोहितोम इंजी पुंजी मंदितोर।

मावा काम तूलनात्मक रूप ते हल्को मंता। अंदरूनी समस्यांग लोप्पा माटु खुद लोता मालिक मंदितोमा मति माटु अमेरिका ता चीफ ऑफ स्टाफ मन्मोम आंतोमा अमेरिका ता चीफ ऑफ स्टाफ ओरा तम्माए मानेय मंदितोर। अदिन काजे कोरिया युद्ध जारी मंता या हिल्ले इंदाना निर्णय कीयाना अधिकार कोरिया ओसो माकिन बराबर मंता।

संक्षेप ते परिस्थिति ता दबाव कारण ते अमेरिका युद्ध विराम कियाला इनकार कीयाना लेक्का मन्मो आंता।

तीसरी विश्वयुद्ध वेल्ले जल्दी आयार इंदानदु लोकुरा लोप्पा सिर्फ कंदरेम कीयाना प्रचार आंदू।

उद्योग ता निर्माण कीयाना ओसो सुदृढ़ बुनियाद निल्पी कियाला काजे माटु दस साल टाईम दोरकी कीयाना कोशिश कीयाना। माटु मना कार्यकर्ता लोरा लोप्पा घनिष्ठ एकता कीयाना अनि मना ओसो दुश्मन नडमा स्पष्ट विभाजन-रेखा पिडंगना। नेंडु माटु शक्तिशाली मंतोम बारांकु इत्तेके पूरा देश ता जनता एकताबद्ध मंता अनि नेटा सभा लोप्पा मत्ता सब्बे लोकुर सब्बे जनवादी पार्टिंग, जन संगठन कु मना संगे सहयोग कींतांग। एकता कीसी मना ओसो दुश्मन नडमा स्पष्ट विभाजन-रेखा पिडंगना वेल्ले महत्वपूर्ण मंता। डा. सुन-यात सेन वरोर निष्ठावान मानेय आंदुरा। मति ओना नेतृत्व ते ताकना 1911 ता क्रांति असफल बारांकु आता? अदिना कारणकु: पहली, जमीन ता बंटावारा कीवोर; दूसरा प्रतिक्रांतिकारीरा दमन कीयाना जरूरत तुन समझेमायोर; तीसरा, साम्राज्यावादिरा विरुद्ध तीव्र संघर्ष कीवोर। मावा ओसो दुश्मन नडमा स्पष्ट विभाजन-रेखा पिडंगना आयवा माटु मना पांत लोप्पा वेने सही ओसो गलत नडमा विभाजन-रेखा

पिडंगना। पहली विभाजन-रेखा ता तुलना ते दूसरा विभाजन-रेखा गौण मंता। उदाहरण तुकू भ्रष्ट लोकर कीने हूडाटू, ओरा लोप्पाटल ज्यादातर लोकरा लोप्पा सही ओसो गलत नडमा ओरकिन सुधरे कीयाना लेक्का मंता। वीरु प्रतिक्रांतिकारीर किनकु अलग मंतोर।

जनवादी पार्टिंग, धार्मिक लोकर किन साम्राज्यवादिरा धोखा तल बचे कियाला, दुश्मन तुकू बचे कियाला शिक्षित कीयाना। बौद्ध धर्म किने हूडाटू अदिना सम्पर्क साम्राज्यावाद संगे कम आता, मुख्य रूप ते सामंतवाद संगे सम्पर्क आता। अदिन काजे सामंतवाद विरोधी संघर्ष भूमि सवाल संबंध ते मत्तांकु इदिना असर भिक्षु लोरा पोरो वेने अरिंता अनि मठाधीश, प्रधान पुरोहित लोर हमला ता निशाना बनेमांतोर। बेगा उंदी बेरा इद्रम ता इरुवर-मुवुरा तख्ता पलट आंता अगा 'लू च-शन'¹ लेक्कटा साधारण भिक्षु लोर मुक्त आंतोर। नन्ना बौद्ध धर्म पोरो विश्वास कीवोन मति बौद्ध लोरा धार्मिक संघ ता स्थापना कीयाना ता विरोध वेने कीवोन। बारांकु इत्तेके इद्रम कीसी ओरु एकता आंतोर अनि मना ओसो दुश्मन नडमा स्पष्ट विभाजन-रेखा पिडंगा परितोर। संयुक्त मोर्चा बस्के ने समाप्त आंता या? नावा हिसाब ते नन्ना अदिन समाप्त कीयाना पक्ष ते हिल्लेना बोर मत्तेकाई ओरु निज्जमे मना ओसो दुश्मन नडमा स्पष्ट विभाजन-रेखा पिडंगतेके, जनता ना सेवा कीतेके, माटु ओरा संगे एकता कीयाना।

मना देश ता वायना कालम वेहच ते मंता ओसो वेल्ले संभावनांग संगे निंडसी मंता। मुन्ने माटु मूंड साल लोप्पा राष्ट्रीय अर्थव्यवस्था ता पुनर्स्थापना काम पूरा आयर इंजी आल्सतोमा ढाई साल ता कठिन संघर्ष पेरके इंजेने इद काम पूरा आता अनि योजनाबद्ध निर्माण कार्य शुरू किताद मंता। वाटु, माटु सब्बे तोर एकता आसी मना ओसो दुश्मन नडमा स्पष्ट विभाजन-रेखा पिडंगकाल अनि देश ता विकास काजे भरपूर कोशिश कियाकाल।

नोट

1. चीन ता क्लासिकी उपन्यास 'दा वाटर मार्जिन' उंदी भूमिका, (ल्यांगशान मेट्टा पोरो हंजी किसान सेना ते शामिल आयना मुन्ने वरोर साधारण बौद्ध भिक्षु मत्तोर)।

चीनी जन स्वयंसेवक लोरा असाधारण सफलता ता अभिनंदन!²⁰

24 अक्तूबर 1952

मावा स्वयंसेवक लोर कोरिया जन सेना संगे कलियसी 18 सितम्बर तल सब्बे मोर्चा ने युद्ध कौशलपूर्ण जवाबी हमला शुरू कित्तोर। उंदी महीना लोप्पा दुश्मन सेना ता तीस हजार तुकू ज्यादा सैनिक लोरा नुकसान कीसी जीत दोरकी कित्तोर। केंद्रीय कमेटी ओसो फौजी कमीशन बगिल तल मीटु सब्बे कमांडर, योद्धा लोर किन जीवा तल बधाई हींतोमा। इव फौजी कार्रवाईंग ना बारे ते उचुन इद्रम वेहमूडांता: पहली, युद्ध-कौशल ता दृष्टि ते चुने कित्ता नाजुक जागा ने मना सैनिक ताकत, गोलाबारी ताकत तुन केंद्रीत कीसी दुश्मन ता सम्पूर्ण प्लाटून, सम्पूर्ण कम्पनी लेवेके सम्पूर्ण बटालियन पोरो अचानक हमला कीयाना अनि सब्बे तोर किन या ओरा उंदी बेहरा हिस्सा तुन खत्म कीयाना; दूसरा दुश्मन ता जवाबी हमला कित्तास्के बार-बार आयना लड़ाईंग ताकनास्के दुश्मन तुन बेहरा स्तर ते नुकसान कीयाना; तीसरा, परिस्थिति हूडसोरे रक्षा किया परना लेक्कटा मना कब्जा ते मत्ता किलेबंदिंग ना दृढ़ता ते रक्षा कीयाना अनि रक्षा किया परवा किलेबंदिंग किन विडसना। इद्रम कीसी माटु वायना कालम ते जवाबी हमला कीयाना तैयारिंग किया परिंतोमा। इद्रम ता फौजी कार्रवाईंग जारी मत्तेके माटु दुश्मन ता गुडंगा जरूर पोय्या परिंतोम अनि अदिन

²⁰ चीनी जन स्वयंसेवक लोरा नेतृत्वकारी सदस्य लोरा पोरोल ते लोहता उंदी निर्देश, इदिना मसौदा कामरेड माओ त्सेतुंग चीनी कम्युनिस्ट पार्टी ना केंद्रीय कमेटी ओसो अदिना फौजी कमीशन काजे तैयार कीसि मत्तोर।

समझौता कियाला, कोरिया युद्ध मापला मजबूर किया परितोमा। हत्ता साल ता जुलाई तल मना सेनांग मोर्चेबद्ध लड़ाई शुरू कितारके दुश्मन किन आता नुकसान मुन्नेटा सब्बे चलायमान युद्ध ता अभियान कुना तुलना ते बचोनो ज्यादा मंता। इदिना उल्टा मावा नुकसान वेल्ले कम आया मंता। सिर्फ सैनिक लोरा ओसो ओरा लोप्पा स्वयंसेवक लोरा नुकसान तुन हूडतेके ओरा संख्या हत्ता साल ता जुलाई तल इंजे एवनल 15 महीनांग लोप्पा इदिनकु मुन्नेटा 8 महीनांग ना तुलना ते हर महीना औसतन दो तिहाई तुकू ज्यादा घटेमाता। बारांकु इत्तेके मोर्चेबंदी पोरो आधार आसी फौजी कार्यवाही कीयाना पोरो वेहता तरीका लागू कीतांके आता। 28 सितम्बर तल इंजे एवनल फौजी कार्यवाही ता इद तरीका पूरा मोर्चा ओसो वेल्ले सुसंगठित अनि व्यापक रूप ते लागू कितान मंता। अदिन काजे खास ध्यान हियाना लेक्का मंता।

कोरिया युद्ध लोप्पा चीनी जन स्वयंसेवक लोर शामिल आयना दूसरा वर्षगांठ ता मौका ते माटु, मीटु मीवा अनुभव कुना निचोड़ तेंडितिर, संगठनात्मक चेतना बेरसी कीतिर, युद्ध कौशल बेस कीतिर, गोलाबारूद इस्तेमाल कम कियाकिर, कोरिया कामरेड्स, कोरिया जनता ना संगे ओसो ज्यादा गटिंग एकता कीतिर अनि वायना कालम ता लड़ाईंग लोप्पा ओसो ज्यादा बेहरा जीतकु दोरकी कीयाना पूरा कोशिश कीतिर इंजी आशा कीतोमा।

नौकरशाही, फरमानशाही ओसो कानून लेवेके अनुशासन तोड़ेकीयाना ता विरोध कीमूट²¹

5 जनवरी 1953

नौकरशाही, फरमानशाही ओसो कानून लेवेके अनुशासन तोड़ेकीयाना ता विरोध कीयाना काम बगिल मना अलग-अलग स्तर ता नेतृत्वकारी कमेटी कुना ध्यान पिड़ंगना।

“मूंड गलतिंग” विरोधी आंदोलन ताकनास्के मना पार्टी केंद्र, अथॉरिटिंग, प्रांत, म्युनिसिपलटी, प्रिफेक्चरकु कुना वेल्ले कार्यकर्ता लोरा लोप्पा मत्ता भ्रष्टाचार, फिजूलखर्च ता समस्यांग कुन बुनियादी रूप ते हल किताद मंता। अदु उंदी रकम ता नौकरशाही ता कारण ते वेल्ले नेतृत्वकारी कार्यकर्ता लोर तम्मा दोड़ काम कीयाना ऑफिस ता कर्मचारिरगल अलग-थलग आता नौकरशाही पोरो वेने बुनियादी रूप ते काबू किता। मति वेल्ले इलाकांग, विभाग, काम कीयाना इलाकांग लोप्पा दोड़ रास्ता लेक्कटा नौकरशाही ता सवाल इंजे एवनल बुनियादी रूप ते हल किताद हिल्ले: नेतृत्वकारी कार्यकर्ता लोर जनता ना तिप्पल कुना बारे ते पुन्नोर, तम्मा ऑफिस तल उचुने जेक मत्ता इकाइंग ना परिस्थिति ता बारे ते पुन्नोर, काउंटिंग, जिला ओसो श्यांग मूंड स्तर ता कार्यकर्ता लोरा लोप्पा मत्ता फरमानशाही ता बारे ते ओसो कानून, अनुशासन ता उल्लंघन संबंधित वेल्ले गलत लोकर ओसो गलत पोल्लोंग ना बारे ते पुन्नोर, इद्रम तोर ओसो इद्रम ता पोल्लो ना बारे ते उचुन-उचुन पुत्तेकाई नजरअंदाज कींतोर, अविन चिह्नित कीवोर, इद सवाल बचोन गंभीर मंता इंजी आल्सोर अदिन काजे बेसता लोकरा समर्थन कियाला ओसो गलत लोकर किन सजा हियाना बेसता पोल्लोंग किन प्रोत्साहन हियाना, गलत पोल्लोंग कुन रोमी

²¹ उंदी पार्टी निर्देश ता मसौदा आंदा। इदिन कामरेड माओ त्सेतुंग चीनी कम्युनिस्ट पार्टी ता केंद्रीय कमेटी काजे तैयार कीसि मंतोर।

कियाला काजे सक्रिय निर्णय कीवोर आंतोर। जनता लोहता चिडिंग ना पोरो कीयाना काम तुने हूडाटू। बदे प्रांतीय जनताना सरकार सत्तर हजार तुकू ज्यादा चिडिंग कुन बद्रम मत्ता अद्रमे मंदाला हित्तोर, अविन हल किताद हिल्ले। प्रांत ता दोड़ ता अलग-अलग स्तर ता पार्टी संगठन, सरकारी संगठन कुना बारे ते हूडतेके माटु अवु जनता बचोन चिडिंग बद्रम मत्ता अद्रमे मंदाला हीताद मंता मति अविना संख्या बचोन मंता इंजी पुन्नोमा ज्यादातर चिडिंग लोप्पा माकिन माटु ओरा सवाल कुन हल कियाला मदद कीयाना इंजी अपील किताद मंता अनि वेल्ले चिडिंग लोप्पा बचोनो कार्यकर्ता लोरा पोरो कानून भंग कीयाना आरोप वाटताद मंता। इद्रम ता समस्या तुन तुरंत हल कीयाना।

मना पार्टी, सरकार काजे नौकराशाही, फरमानशाही सिर्फ वर्तमान कालम ते उंदी बेहरा समस्याए आयवा वायना कालम ते वेने वेल्ले जोम उंदी बेहरा समस्या लेक्का मंदिता। सामाजिक उत्पत्ति अनुसार हूडतेके इद कार्यशैली जनता ना समस्या हल कीयानास्के प्रतिक्रियावादी शासक वर्ग लागू कीयाना प्रतिक्रियावादी कार्यशैली (जन विरोधी कार्यशैली, क्वोमिंगतांग ता कार्यशैली) ता अवशेष कुन मना पार्टी, सरकार लोप्पा तोहिंता। मना पार्टी, सरकार ता संगठन कुना नेतृत्वकारी भूमिका ओसो अविना नेतृत्व कीयाना तरीकांग ना बारे ते हूडतेके, काम सौंपे कीयानास्के नीति ता लिमिटेशन ओसो सही कार्यशैली तुन स्पष्ट रूप ते समझे कीयानायो लेक्का मंता। इत्तेके मध्य, दोड़ ता स्तर ता कार्यकर्ता लोर किन काम सौंपे कीयानास्के नीति लिमिटेशन ओसो कार्यशैली ता बारे ते सही आदेश हियवा मंदाना। अलग-अलग स्तर ता काउंटी, जिला, श्यांग स्तर ता कार्यकर्ता लोरा निरीक्षण कियवा मंदाना। इव मूंड स्तर कुना संगठन कुना लोप्पा पार्टी ता सुदृढीकरण आंदोलन ताकी कियवा मंदाना अनि इद आंदोलन ताकवा जागा ते फरमानशाही पोरो अमल कीयाना ओसो कानून, अनुशासन ता उल्लंघन कियानोर किन चिह्नित कीसी बाहर तेंडना संघर्ष कीयानायो। प्रिफेक्चर, ताना पोरोटा नेतृत्वकारी संगठन ता कार्यकर्ता लोरा लोप्पा इंजे वेने मत्ता नौकरशाही खिलाफ संघर्ष कियवा मंदाना अनि

खत्म कियवा मंदानादु जनता ना तिप्पल, बुनियादी संगठन कुना परिस्थिति तुकू सतर्क हिल्ला मंदानादिन तोहिंता। मना नेतृत्वकारी भूमिका मजबूत आयर, मावा नेतृत्व तरीका सुधरेमायर अस्के जनता तुन नुकसान कीयाना नौकरशाही, फरमानशाही, तीरम-तीरम कम आसोर दायार, मना पार्टी, सरकार ता वेल्ले संगठन क्वोमिंगतांग ता इद कार्यशैली संगे जल्दिए दूर कियार। इद्रम मना पार्टी, सरकार लोप्पा नेंगता वेल्ले गलत लोकरु किन जल्दिए तेंडमूड़ायर अनि इंजे मत्ता वेल्ले गलत पोल्लोंग कुन जेक कियमूड़ायार।

अदिन काजे मीकिन 1953 ते मीटु जनता लोहता चिडिंग पोरो काम कीयाना शुरू कीसी पार्टी ता सुदृढीकरण, पार्टी-निर्माण ओसो बाकी काम संगे तालमेल कीसोरे, नौकरशाही, फरमानशाही संबंधित समस्यांग ओसो कानून, अनुशासन ता उल्लंघन कियानोरा जांच किया लागियर। ओरा खिलाफ दृढतापूर्वक संघर्ष कीयाना। नौकरशाही, फरमानशाही, कानून, अनुशासन ता उल्लंघन संबंधित विशिष्ट उदाहरण कुना समाचार-पत्र ना संगे व्यापक रूप ते पर्दाफाश कीयाना। गंभीर अपराध कितोर कुन कानून अनुसार सजा हियाना, ओरु पार्टी सदस्य मत्तेके पार्टी अनुशासन अनुसार हल कीयाना। अलग-अलग स्तर ता पार्टी-कमेटींग कानून, अनुशासन ता उल्लंघन कियानोर किन सजा हियाना पक्का कोशिश कीयाना। जनता वेल्ले होंग मत्तोर किन पार्टी, सरकार ता संगठन तल बाहर तेंडना अनि ओरा लोप्पटल सबसे ज्यादा गलत लोकरु किन हौकना सजा हियाना अनि जनता ना होंग शांत कीयाना। इद्रम कीसी कार्यकर्ता लोर, जनता किन शिक्षित कीयाना। मति गलत लोकरु, गलत पोल्लोंग ना विरुद्ध ताकी कीयाना व्यापक संघर्ष उंदी मंजिल ते एवतास्के माटु अलग-अलग जागा ने बेसता लोकरु, बेसता पोल्लोंग कित्ता आदर्श कुन परहकना, अविना विश्लेषण कीयाना, अविना तारीफ कीयाना अनि सब्बे पार्टी-सदस्य लोरा बेसता आदर्श कुन पोयसी ताकना कोशिश कीयाना। मना पूरा देश लोप्पा इद्रम ता वेल्ले आदर्शकु मंतांग।

हान शोविनिज्म ता आलोचना कीमूट²²

16 मार्च 1953

उचुक जागा ने अलग-अलग राष्ट्रीयतांग नडमा ता संबंध वेल्ले असामान्य मंतांग। इदु परिस्थिति कम्युनिस्ट लोरा काजे सहन कीयाना लेक्का हिल्ले। वेल्ले पार्टी-सदस्य, पार्टी-कार्यकर्ता लोरा लोप्पा मत्ता हान शोविनिज्म वाले गंभीर विचार कुना माटु गंभीर रूप ते आलोचना कीयाना; इव विचारकु अलग-अलग राष्ट्रीयतांग नडमा ता संबंध कुना लोप्पा वेहता जर्मीदार वर्ग, पूंजीपति वर्ग ता प्रतिक्रियावादी विचार, क्वोमिंगतांग विचारकु आंदुंगा। इदिना बारे ते आता गलतिंग तुरंत सुधरे कीयाना। अल्पसंख्यक राष्ट्रीयतांग मत्ता जागा ते दौरा कियाला काजे मना राष्ट्रीयता नीति ता बारे ते पूंजी मत्ता, भेदभाव संगे पीडित अल्पसंख्यक राष्ट्रीयतांग ना देशवासिरा हार्दिक समर्थन कीयाना कामरेड्स ना नेतृत्व ते प्रतिनिधि मंडल लोहना। इद प्रतिनिधि मंडल “घोड़ा पोरो उदसी पुंगार हूडना” जागा ते वेल्ले बेस जांच-पडताल ओसो अध्ययन कीयाना अनि समस्यांग परहकना अविन हल कियाला पार्टी, सरकार ता स्थानीय संगठन कुना मदद कीयाना।

वेल्ले रिपोर्ट कुना पोरो आधार आसी अल्पसंख्यक राष्ट्रीयतांग मत्ता जागा ने इंजे हल कियवा मत्ता समस्यांग मंतांग अविना लोप्पा उचुक वेल्ले गंभीर केंद्रीय कमेटी आल्सता। पोरोटल हूडतेके शांत दिसिंतांग मति असल ते वेल्ले गंभीर समस्यांग मंतांग। इगा रेंडु-मूंड साल लोप्पा अलग-अलग जागा ने मत्ता समस्यांग वेहच ते वातांग अद्रमासी हान शोविनिज्म लगभग सब्बे जागा ते मंता इंजी साबित आता। माटु सही टाईम ते शिक्षित

²² इद पार्टी निर्देश ता मसौदा तुन कामरेड माओ त्सेतुंग चीनी कम्युनिस्ट पार्टी ता केंद्रीय कमेटी काजे तैयार कीताद मत्ता।

कीवेके, पार्टी लोप्पा ओसो आम जनता लोप्पा हान शोविनिज्म तुन दूर कीवेके वेल्ले खतरनाक साबित आंता। वेल्ले जागा ने अलग-अलग राष्ट्रीयतांग नड़मा ता संबंध कुना बारे ते पार्टी लोप्पा ओसो जनता नड़ना मत्ता समस्यांग हान शोविनिज्म ता अवशेषके आयवा अविना गंभीर रूप वेने मंतांग। पूंजीवादी विचार ता प्रभाव ज्यादा मत्ता कामरेड्स ओसो मार्क्सवादी शिक्षा दोरकवा मत्ता केंद्रीय कमेटी ता राष्ट्रीयता नीति तुन लागू कित्ताद हिल्ले। अदिन काजे ओरकिन वेल्ले बेस करहना अनि समस्या तुन हल कीयाना। इदे आयवा अखबार लोप्पा ठोस तथ्य कुना पोरो आधार आसी ज्यादा से ज्यादा लेख प्रकाशित कीयाना अनि हान शोविनिज्म ता खुल्लम-खुल्ला आलोचना कीसी पार्टी सदस्य, जनता तुन शिक्षित कीयाना।

“वीड़ता हेय्युंग” समस्यांग ना हल कीमूट²³

19 मार्च 1953

- 1) नहाकुना इलाकांग ना मना काम लोप्पा पार्टी, सरकार ता संगठन कु किसान लोरकिन अलग-थलग तासना, किसान लोर ओसो ओरा सक्रिय तत्व कुना हित कुन नुकसान कीयाना संबंध ते गंभीर समस्यांग मंतांग; इव समस्यांग कुन “वीड़ता हेय्युंग” समस्यांग इंतोरा। इव “वीड़ता हेय्युंग” समस्यांग इगा रास्ता लेक्का मंतांग: ज्यादा काम सौंपे कीयाना वीडता, ज्यादा मीटिंग, ट्रेनिंग कोर्स वीडतांग, दस्तावेजकु, रिपोर्ट रासना, आंकड़ांग जमा कीयाना फार्मकु निहानां संख्या वीडतांग, वेल्ले संगठनकु बनेकीयाना संख्या वीडता, ओसो सक्रिय तत्व कुना काजे ज्यादा कामकु हीयना वेने वीडता। इतेके इद बोजा लेक्का आत्ता। इव समस्यांग वेल्ले मुन्नेटले मंतांग। इविना लोप्पा उचुन समस्यांग ना बारे ते केंद्रीय कमेटी अलग-अलग स्तर ता पार्टी कमेटिंग किन निर्देश हीता। ताना लोप्पा अवु इविना पोरो ध्यान हियाना अनि हल कीयाना इंजी अपील किताद मंता। मति हल आयना जागा ते इव समस्यांग दिव्या-दिव्या तुकू ओसो गंभीर आया मंतांग। बारांकु इतेके इव समस्यांग किन सही तरीका ते हल किताद हिल्ले। केंद्र, अथॉरिटिंग, प्रांत (म्युनिसिपल) प्रिफेक्चर ओसो काउंटी स्तर ता पार्टी, सरकारी नेतृत्वकारी अंग कुना लोप्पा मत्ता विक्केंद्रीयता, नौकरशाही खिलाफ संघर्ष कियवा मंदाना अदिनकु

²³ इदु पार्टी निर्देश ता मसौदा कामरेड माओ त्सेतुंग चीनी कम्युनिस्ट पार्टी ता केंद्रीय कमेटी काजे तैयार कीताद मत्ता।

ज्यादा महत्वपूर्ण कारण मंता। बारांकु इत्तेके जिला ओसो श्यांग ते मत्ता “वीड़ता हेय्युंग” कु तम्मा इलाका तेने आयवा पोरोटा अंग कुना लोप्पा वेने पुटतांग; अबु काउंटी ओसो अविना पोरोटा स्तर ता पार्टी, सरकार ता नेतृत्वकारी अंग कुना लोप्पा गंभीर रूप ते मत्ता विकेंद्रीयता, नौकरशाही ता कारण तेने मंतांग। इद्रमताए उचुक पोल्लॉग क्रांतिकारी युद्ध भूमि सुधार कीयानास्के पुटसी मत्ता अनि बदे बदलाव आयवा नेंडु वेने मंतांग। अदिन काजे 1953 ते नौकरशाही, फरमानशाही ता विरोध कीयाना ओसो कानून, अनुशासन ता उल्लंघन ता विरोध कीयाना ता बारे ते केंद्रीय कमेटी ता निर्देश तुन लागू कीयानास्के माटु नेतृत्वकारी अंग कुना लोप्पा मत्ता नौकरशाही, विकेंद्रीयता तुन जेक कीयाना काम तुन मजबूत कीयाना। अनि मुन्ने इस्तेमाल कित्ता नियमकु, तरीकांग कुन बदले कीयाना। सिर्फ इद्रमे इद समस्या तुन हल किया परितोमा अलग-अलग स्तर ता नेतृत्वकारी अंग कुन काम सौपे कीयाना, मीटिंग केयना, ट्रेनिंग कोर्स ताकी कीयाना, दस्तावेज आंकड़ांग जमा कीयाना फार्म लोहना, दोड़ ता इकाईंग निगडल रिपोर्ट ताल्कना, जिलांग, श्यांग कुना संगठनात्मक ढांचा तय कीयाना ओसो नाह कुना लोप्पा सक्रिय तत्व कुना लोप्पा इस्तेमाल कीयाना लेक्कटवु इंजेटल काउंटी ओसो अदिनकु पोरोटा पार्टी कमेटिंग, सरकार कुना प्रमुख नेतृत्वकारी कामरेड्स असल परिस्थितित अनुसार सब्बे हंदी तय कीयाना; उचुन समस्यांग लोप्पा खुद केंद्रीय कमेटिंग एकीकृत रूप ते हंदी तय कीयाना। मुन्ने पार्टी, सरकार, जनता ना संगठन लोप्पा अलग-अलग स्तर ता विभाग तम्मा इकाईंग कुन खुद तम्मा बगिल तल काम सौपे कियानवु। तम्मा दोड़ काम कियानोर, नाहकुना सक्रिय तत्व कुना मीटिंग, ट्रेनिंग कोर्स लोप्पा शामिल आयला काजे आल्सवा लेवाए केयानोर। दस्तावेज, आंकड़ांग जमा कीयाना फार्म कु वाटसितोर अनि तम्मा दोड़ काम कीयाना इकाईंग लेवेके नाहकुल

तम्मा विचार वात्ता लेक्का रिपोर्ट तालिंकंतोरा। इव सब्बे गलत नियम, गलत तरीकांग कुन दृढ़तापूर्वक रोमी कीयाना। अविना जागा ते असल परिस्थिति अनुकूल नियम, तरीकांग कुन लागू कीयाना। हर श्यांग लोप्पा रक-रकम ता कमेटिंग मंदाना, सक्रिय तत्व कुना संगे बचोनो जिम्मेदारिंग सौंपे कीयाना लोप्पा वेने दृढ़तापूर्वक बदलाव कीयाना बारांकु इत्तेके इव उत्पादन लोप्पा बाधा वांतांग अनि इविना कारण ते जनता तल अलग आयना परिस्थिति पुटिता।

- 2) पार्टी, सरकार, जन संगठन कुना राष्ट्रीय स्तर ता विभाग कुना बारे ते केंद्रीय कमेटिंग, केंद्रीय कमेटी ता विभाग, केंद्रीय जन सरकार ता अथॉरिटी परिषद ओसो अदिना दोड़ मत्ता वित्तीय, आर्थिक कमेटी, सांस्कृतिक, शैक्षणिक कमेटी ओसो राजनीतिक, न्यायिक कमेटी ता जिम्मेदार कामरेड्स “वीड़ता हेय्युंग” समस्यांग पुट्टी कीयाना सब्बे कार्य-पद्धतिंग कुन खत्म कीयाना काम सौंपे कीयाना अनि सब्बे नियम, तरीकांग तय कीसी केंद्रीय कमेटी तुन रिपोर्ट कीयाना।
- 3) प्रशासनिक इलाकांग ओसो प्रांत, म्युनिसिपलटिंग लोप्पा केंद्रीय कमेटी ना ब्यूरोंग, उपब्यूरोंग ओसो प्रांतीय, म्युनिसिपल पार्टी कमेटिंग, समान स्तर ता प्रशासनिक संस्थान कुना जिम्मेदार कामरेड्स “वीड़ता हेय्युंग” समस्यांग ना जांच-पड़ताल कीयाना अविना हल कीयाना तरीका तय कीयाना ओसो केंद्रीय कमेटी तुन रिपोर्ट कीयाना जिम्मेदारी एतना। इद उद्देश्य पूरा कियाला काजे माटु केंद्रीय कमेटी ता ब्यूरोंग, उपब्यूरोंग ओसो प्रांतीय, म्युनिसिपल पार्टी कमेटिंग “हेय्युंग अतिरिक्त” समस्यांग ना जांच पड़ताल कियाला काजे तम्मा-तम्मा विशेष निरीक्षण-दल लोहना, तम्मा दोड़ मत्ता उंदी लेवेके रेंडु जिलांग ओसो श्यांग (शहर लोप्पा उंदी लेवेके रेंडु इलाकांग ओसो मोहल्ला) कुना परिस्थिति ता जांच कीयाना। अविना समस्यांग कुन हल कियाला काजे टाईम सामग्री जमा कीयाना।

- 4) प्रिफेक्चर, काउंटिंग लोप्पा मत्ता “वीड़ता हेय्युंग” सवाल कुन हल कियाला काजे निर्देशन हियाना जिम्मेदारी प्रांतीय पार्टी-कमेटिंग पोरो मंता।
- 5) कृषि-उत्पादन नाहकुना लोप्पा सबसे महत्वपूर्ण काम मंता; बाकी सब्बे काम अदिना सहायक मंदितांग। बद काम लेवेके तरीकांग किसान लोरा उत्पादन तुकू बाधा मंदितांग अविनगडल बचेमायना। मावा वर्तमान कृषि अर्थव्यवस्था इंजे वेने बिखरेमासी मत्ता सुडला किसान लोरा अर्थव्यवस्था लेक्का मंता। ताना लोप्पा पाइना तरीका ता औजार कुना इस्तेमाल आंता; इद सोवियत संघ ता मशीनीकृत सामूहिक कृषि तुकू वेल्ले अलग मंता। अदिन काजे वर्तमान संक्रमण कालम ते माटु कृषि लोप्पा, राजकीय फार्म कुन विड़चसी, एकीकृत, योजनाबद्ध उत्पादन आया परवो अनि किसान लोरा समस्यांग लोप्पा वेल्ले हस्तक्षेप किया परवोंगा। माटु सिर्फ मना मूल्य नीति संगे ओसो जरूरी, व्यवहारिक आर्थिक, राजनीतिक काम संगेने कृषि-उत्पादन ता मार्गदर्शन किया परितोम। उद्योग संगे तालमेल किया परितोम अनि अदिन राष्ट्रीय आर्थिक योजना लोप्पा शामिल कीयाना। कृषि लोप्पा बदे “योजना” ओसो नाहकुना लोप्पा बदे “काम” इद हंदी तुन वेंडिता, अदु जरूर अमल कीयाना लेक्का हिल्ले अनि किसान लोर जरूर अदिना विरोध कींतोरा। इद्रम मना पार्टी, मना राष्ट्र ता कुल आबादी ता 80 प्रतीशत तुकू ज्यादा मत्ता किसान जनता तल अलग-थलग आयारा। निज्जमे इदु वेल्ले खतरनाक मंता। जिला, श्यांग कुना मना काम लोप्पा मत्ता “वीड़ता हेय्युंग” समस्यांग ज्यादातर किसान लोरा लोप्पा इद्रमे वेल्ले हस्तक्षेप कुन तोहिंतांग (अदिना उंदी सुडला अंश क्रांतिकारी युद्ध, भूमि सुधार ता जरूरत आंता)। इद समस्या तल किसान लोरा लोप्पा होंग वांता अदिन काजे बदलाव तत्ताना जरूरी मंता।

बदे अधिकार हिलवा केंद्रीय कमेटी ता पोरोल
ते दस्तावेज जारी कीसी अनुशासन ता उल्लंघन
कित्ता कारण ते ल्यू शाओ-ची ओसो यांग
शांग-खुन ना आलोचना²⁴

19 मई 1953

1

नेटल केंद्रीय कमेटी पोरोल ते लोहना सब्बे दस्तावेज, टेलीग्राम सिर्फ जांच आता पेरकेने लोहना। लेवेके अविन गलत समझेमायमूडायर अदिनके इदिना पोरो ध्यान हीमुटा।

2

- 1) हत्ता साल 1 अगस्त तल (1 अगस्त तुकू मुन्नेटा दस्तावेज, टेलीग्राम कुना जांच कित्ताद मंता) इयेटा 5 मई एवनल केंद्रीय कमेटी लेवेके अदिना फौजी कमीशन पोरोल ते लोहता सब्बे टेलीग्राम, दस्तावेज कुना जांच कीयाना जिम्मेदारी एतना। इविना लोप्पा बदे जांच कियवा टेलीग्राम, दस्तावेज मंता या हिल्ले इंजी हूडना, इद्रम ताव बचोक मंतांग (अविना लोप्पा नन्ना निरीक्षण कियाला बाहर हत्तास्के लेवेके बीमार मत्तास्के लोहता टेलीग्रामा, दस्तावेजकु शामिल कित्ताद हिल्लेंग), अदिना कारण नाकिन वेहाटु।
- 2) बचोनो बेरा पार्टी ता केंद्रीय कमेटी कित्ता मीटिंग लोप्पा मानेमाता प्रस्ताव नावा जांच-पड़ताल लेवाए जारी कित्ताद मत्ता। इदु उंदी गलत ओसो अनुशासन ता उल्लंघन आंदू।

²⁴ कामरेड माओ त्सेतुंग रास्ता लेक्कारेंडु बेरा ल्यू शाओ-ची ओसो यांग शांग-खुन ना आलोचना कित्ताद मंता।

आम कार्यदिशा तल भटकेमाता दक्षिणपंथी विचार कुना खंडन कीमुट²⁵

15 जून 1953

संक्रमण कालम¹ ते पार्टी ता आम कार्यदिशा ओसो आम काम दस तल पंद्रह साल लोप्पा लेवेके इदिनकु ज्यादा टाईम ते देश ता औद्योगिकरण, कृषि, दस्तकारी ओसो पूंजीवादी उद्योग-वाणिज्य ता समाजवादी बदलाव तुन बुनियादीर रूप ते पूरा कीयाना। इद आम कार्यदिशा मावा सब्बे काम कुन तोहना वेहच मंदिता। इद आम कार्यदिशा तल भटकेमायनायो लेवेके “वामपंथी”, दक्षिणपंथी गलतिंग आंतांग।

उचुन मुल संक्रमण कालम वेल्ले जोम मंदिता इंजी आल्सिंतोर ओरा लोप्पा वेल्ले जल्दबाजी पुट्टता। इदु परिस्थिति “वामपंथी” गलतिंग बगिल ओंता। उचुन मुल जनवी क्रांति ता जीत पेरके वेने ओरु मुन्ने मत्ता जागा तेने नितसी मंदिंतोर। ओरु क्रांति ता स्वरूप लोप्पा बदलाव तुन समझेमाया परवोर अनि समाजवादी बदलाव लेवा इंजे वेने तम्मा “नवजनवाद” पोरो अडेमासी मंदिंतोर। इद परिस्थिति दक्षिणपंथी गलतिंग बगिल ओंता। मावा कृषि ता उदाहरण पोय्या परिंतोम, अदिना काजे सिर्फ समाजवादे उंदी हर्ी मंदिता। नहाकुना इलाकांग लोप्पा पार्टी ता केंद्रीय काम आपसी

²⁵ चीनी कम्युनिस्ट पार्टी ता केंद्रीय कमेटी ता राजनीतिक ब्यूरो ता उंदी मीटिंग लोप्पा हीता भाषण ता उंदी अंशा। तीना लोप्पा कामरेड माओ त्सेतुंग ल्यू शाओ-ची ओसो बाकी लोकुर पेश किता “नवजनवादी सामाजिक व्यवस्था तुन निल्पी कीसि तासना” लेक्कटा दक्षिणपंथी अवसरवादी विचार कुना खंडन कित्तोर।

सहकारिता आंदोलन विकास कीयाना अनि कृषि उत्पादन तुन लगातार बेरसी कीयाना।

दक्षिणपंथी भटकाव इव मूंड पोल्ल्लोंग तोहिंतांगः

“नवजनवादी सामाजिक व्यवस्था बेस तासना”। इद उंदी नुकसानदायक सिद्धांत मंता। संक्रमण कालम ते बदलाव आसोर मंता अनि हर दिव्या समाजावादी तत्व पुटसोरे मंदिता। इद्रम ता परिस्थिति ते “नवजनवादी सामाजिक व्यवस्था” बद्रम बने कियमूडायर? अदिन बद्रम “निल्पी कीसी तासना” वेल्ले कठिन मंता! उदाहरण तुकू निजी उद्योग-वाणिज्य ता बदलाव आया मंता, इयेटा 6 महीनांग लोप्पा बदे व्यवस्था “निल्पी” कीतेके वायना साल बेस मंदियारा। कृषि लोप्पा वेने आपसी संघर्ष कुना संगे निंडसी मंदिता। मावा वर्तमान क्रांतिकारी संघर्ष कालम ते सशस्त्र क्रांतिकारी संघर्ष तुकू बचोनो ज्यादा गंभीर रूप एतसी मंदिता। इदु उंदी पूंजीवादी व्यवस्था ओसो शोषण ता बाकी सब्बे व्यवस्थांग कुन पूराए मिस्सिसियाना लेक्कटा क्रांति आंदू। “नवजनवादी सामाजिक व्यवस्था तुन निल्पी कीसी तासना” इंदाना विचार संघर्ष ता असल परिस्थिति ता प्रतुकूल मंदिता अनि समाजवादी काम ता विकास लोप्पा बाधा वारिंता।

“नवजनवाद तल समाजवाद बगिल दायना” प्रस्ताव स्पष्ट हिल्ले। माटु हर साल इदिना बगिले हंजोर मंदाना, दूसरा बाताले कीयानायो, 15 साल आतेके वेने लगातार अदे बगिल हंजोर मंदाना या? बदे लक्ष्य बगिल सिर्फ मुन्ने हंजोरे मंदाना इत्तेके अद लक्ष्य तुन पूरा किया परवा मंदाना आंता। इद प्रस्ताव हूडला-केंजला बेस मंता मति गंभीर रूप ते आल्सतेके इनपडे अंगडम मंता।

“निजी सम्पत्ति तुन बचे कीसी तासना”। मध्यम किसान “वेल्ले दिस्सना” अनि तम्मा सम्पत्ति “सामूहिकरण” कीयाना तुक वेरियंतोरा। अदिन काजे उचुन मुल ओरकिन शांत कियाला काजे इद नारा पेश कींतोर, इद्रम कीयाना गलत मंदिता।

माटु तीरम-तीरम समाजवाद बगिल दायना सही प्रस्ताव पेश कीतोम। माटु “तीरम-तीरम” इत्तोम इत्तेके इद काम तुन 15 साल लोप्पा

ओसो हर साल ता 12 महीनांग लोप्पा विस्तार कीसी पूरा कीयाना। वेल्ले जल्दी दायना इत्तेके “वामपंथ” बगिल दायाना अनि मत्ता जागा ते नितसी मंदानदु “दक्षिणपंथ” बगिल वेल्ले जल्दी भटके मायना आंता। माटु “वामपंथी” ओसो “दक्षिणपंथी” भटकाव कुना विरोध कीयाना अनि मुन्ने दायना सम्पूर्ण प्रक्रिया पूरा आयना जोम मुन्ने हंजोरे मंदाना।

नोट

- 1) इगा “संक्रमण काल” इत्तेके चीन लोक गणराज्य ता स्थापना तल समाजवादी बदलाव ता काम बुनियादी रूप ते पूरा आयना जोम ता कालम ता बारे ते वेहताद मंता। इद संक्रमण कालम लोप्पा पार्टी ता आम कार्यदिशा ओसो आम कार्य उंदू तूलनात्मक रूप वेल्ले जोम चीन ता औद्योगिकरण, कृषि, दस्तकारी ओसो पूंजीवादी उद्योग-वाणिज्य ता समाजवादी बदलाव तुन बुनियादी रूप ते पूरा कियानदु मत्ता। इद संक्रमण कालम सितम्बर 1962 ते पार्टी ता 8वी केंद्रीय कमेटी ता 10वी पूर्ण अधिवेशन लोप्पा ओसो ताना पेरके कामरेड माओ त्सेतुंग चर्चा कित्ता संक्रमण कालम तुकू अलग मंता। अद संक्रमण कालम पूंजीवाद तल कम्युनिज्म एवनल संक्रमण कीयाना पूरा ऐतिहासिक कालम ता बारे ते मत्ता।

नौजवान संघ नौजवान लोरा विशेषतांग कुन सुरता तासिसी काम कीयाना²⁶

30 जून 1953

नौजवान संघ पार्टी तुकू अलग मंदाना पोल्लोंग कीयाना समस्या उंदी पाड़ना कालम ता चीज लेक्का आता। नेंडु समस्या नौजवान संघ ता स्वतंत्र कार्रवाईंग ना कमी ता मंता।

नौजवान संघ तुकू तन्ना कार्रवाईंग ना समन्वय पार्टी ता केंद्रीय कमेटी कामकाज संगे कीयाना जरूरी मंता। मति इद्रम कीयानास्के तन्ना स्वतंत्र कार्रवाई जारी मंदना ओसो नौजवान संघ ता विशेषताकुन ध्यान ते तासना। 1952 लोप्पा नौजवान संघ ता केंद्रीय कमेटी कामरेड्स संगे वार्तालाप कीयानास्के नन्ना नौजवान संघ ता केंद्रीय कमेटी मुन्ने रेंडु सवाल पेश कितानः पहली, पार्टी नौजवान संघ ता नेतृत्व बद्रम कीयाना। दूसरा, नौजवान संघ तना काम बद्रम कीयाना। रेंडासी सवाल कुना लोप्पा नौजवान लोरा विशेषतांग कुन सुरता तासना पोल्लो शामिल मंता। अलग-अलग जागा ना पार्टी-कमेटींग नौजवान संघ ता कामकाज ता तारीफ कीतांग, बारांकु इत्तेके अदु तन्ना कामकाज पार्टी ता केंद्रीय काम संगे कित्ता। मति इंजे नाराज आयना टाईम वात्ता इत्तेके नौजवान लोरा विशेषतांग कुन सुरता तासिसी कीयाना नौजवान संघ ता स्वतंत्र कार्रवाईंग ना कमी आसोरे मंता। पार्टी ओसो नौजवान संघ ता नेतृत्वकारी अंग कु नौजवान संघ ता नेतृत्व बद्रम कीयाना इंजी करियाना, अदु नौजवान लोरा व्यापक समुदाय तुन संगठित कियाला, शिक्षित कियाला काजे तम्मा

²⁶ चीनी नवजनवादी नौजवान संघ ता दूसरी राष्ट्रीय कांग्रेस ता अध्यक्ष मंडल संगे मुलाकात कीतास्के कित्ता पोल्लोंग।

कार्वाइंग ना समन्वय पार्टी ता केंद्रीय कार्य संगे कीयाना अनि नौजवान लोरा विशेषतांग कुन सुरता तासिसी काम कियाला निपुण बने मायना।

पार्टी नेतृत्व ते नौजवान संघ हर क्रांतिकारी काम लोप्पा सक्रिय मत्ता अनि वेल्ले सफलतांग दोरकी कित्ता। अदु कारखान आई लेवेके नार, फौजी यूनिटकु आई लेवेके स्कूल लोप्पा आई नौजवान संघ लेवा मावा क्रांतिकारी काम सफल आया परवो आंता। चीनी नौजवान वेल्ले अनुशासनबद्ध मंता, पार्टी सौपे कित्ता सब्बे काम पूरा कित्ता। नेंडु कोरिया लोप्पा युद्ध विराम आया मंता अनि भूमि सुधार पूरा आता मना देश लोप्पा काम ता गुरुत्व-केंद्र समाजवादी बदलाव ओसो समाजवादी निर्माण बनेमासोर दाया मंता। मावा काजे अध्ययन कीयाना जरूरी मंता। नौजवान संघ बेहरा उम्र ता लोकुरा संगे कलियसी नाहकुना लोप्पा कृषि काम ओसो शहर ते उद्योग काम बेस कीयाना, विद्यालय कुना लोप्पा बेस अध्ययन कीयाना, सरकारी ऑफिस लोप्पा तम्मा ड्यूटी बेस सम्भाले कीयाना अनि फौजी यूनिट कुना लोप्पा ट्रेनिंग काम बेस कीयाना, राष्ट्रीय प्रतिरक्षा सेना तुन उंदी आधुनिक सेना लेक्का बदले कीयाना काम लोप्पा नौजवान लोरा नेतृत्व बद्रम कीयाना इंजी करियाना।

14 तल 25 साल एवनल नौजवान अध्ययन ओसो काम लोप्पा लगे मायना जरूरत मंता। मति इदे ओरा बेरसना उम्र मंदिता अदिन काजे ओरा स्वास्थ्य तुन नजर अंदाज कीतेके वेल्ले खतरनाक आयर। नौजवान लोरा काजे अध्ययन वेल्ले जरूरत मंता, बारांकु इत्तेके ओरकिन बेहरा उम्र ता लोकुर करियसी मत्ता वेल्ले पोल्लोंग करियाना जरूरत मंदिता। मति ओरकिन अध्ययन लेवेके काम ता वेल्ले बोजा वाटनायो। खासकर 14 तल 18 साल एवनल नौजवान लोरा काम बेहरा उम्र ता लोकुराचोन मंदनायो। नौजवान लोर किन सुडलास्के करसना, मनोरंजन कीयाना एंदना-डाका वाटना कियाला वेल्ले टाईम दोरकना। लेवेके ओरु खुश मन्नोर आंतोर। ओरु टाईम वात्तास्के जीवा कियानूर अनि मर्मिग वेने कियानूर। इव सब्बे पोल्लो ओरु बेहरा उम्र ता लोकुर किनकु अलग मंदितांग।

उचुक पोल्लोंग नन्ना मना नौजवान संगे कियाला आल्सा मंतानः पहली, नन्ना ओरु स्वस्थ मंदाना इंजी आशा कीतान; दूसरा, ओरु अध्ययन-कार्य लोप्पा सफलता दोरकी कीयाना; तीसरा ओरु तम्मा काम लोप्पा सफलता दोरकी कीयाना इंजी आशा कीतान।

नन्ना सब्बे विद्यार्थिर कुन हुंजना टाईम उंदी घंटा बेरसी कीयाना इंजी सुझाव हींतान। ओरु हुंजला काजे 8 घंटांग दोरकिंतांग मति ओरा काजे असल इत्तेके सिर्फ 6 लेवेके 7 घंटांगे दोरकिंतांग अनि इदु टाईम ओरा काजे हालो आंता। नौजवान विद्यार्थिरा मोरकुल कमजोर आयर, अदिन काजे ओरु हल्कोए हुंजोर आंतोर अनि हुंजता पेरेके हल्कोए तेदोर आंतोरा। 9 घंटांग हुंजना नियम बने कीयाना। इदिना पोरो उंदी आदेश जारी कीयाना अनि लागू कीयाना अनिवार्य कीयाना, इदिना काजे वाद-विवाद कीयाना जरूरता हिल्ले। नौजवान लोर किन ओसो अध्यापक लोर किन वेने हुंजला काजे वेल्ले टाईम दोरकना।

क्रांति मावा काजे वेल्ले बेसता चीज तत्ता। मति संगेने उंदी उचुन लब्बड़ चीज वेने तत्ता। सब्बे तोर वेल्ले सक्रिय ओसो वेल्ले गिर्दा ते मत्तांकु ओरु वेल्ले दोगिंतोरा। इंजे माटु वीर सब्बे इत्तेके मजदूर, किसान, योद्धा, विद्यार्थी ओसो कार्यकर्ता लोर किन स्वस्थ तासना गारंटी कीयाना। बदे डायुट हिल्ला स्वास्थ्य बेस मत्तेके मीवा अध्ययन वेने बेसी मंदियार इंजी आयो, बारांकु इत्तेके अध्ययन काजे सही तरीका लागू कीयाना जरूरी मंदिता।

इस्सल जूनियर मिडिल स्कूल लोप्पा विद्यार्थिरा काजे क्लास टाईम ज्यादा आता, कम कीतेके बेस आयारा। सक्रिय तत्व कुना मीटिंग वेने वेल्ले ज्यादा आया मंतांग, अविन कम कीयाना लागियर। उंदी बगिल अध्ययन ओसो दूसरा बगिल मनोरंजन, आराम, हुंजना पोरो ध्यान हियाना। नौजवान, मजदूर, किसान ओसो सैनिक लोर तम्मा काम संगे-संगे अध्ययन वेने कींतोर अनि ओरा काम, अध्ययन पोरो संगे ने ओरा मनोरंजन, आराम, हुंजना पोरो वेने हालानाचोन ध्यान हियाना। माटु इव रेंडांसी पोल्लोंग इत्तेके उंदी बगिल अध्ययन, काम ओसो दूसरा बगिल

हुंजना, आराम, मनोरंजन तुन गटिग पोयसी तासना। मुन्ने माटु सिर्फ उंदी पोल्लो तुन मजबूत पोयसी तासिस मत्तोम, दूसरा पोल्लो तुन कम गटिग पोयसी मत्तोम लेवेके इनपड़े पोयवा मत्तोमा। इंजे उचुन मनोरंजन कीयाना वेने जरूरी आता, अदिना काजे टाईम सुविधांग मंदाना वेने जरूरी आता, अदिना काजे इदिन वेने गटिग पोयसी तासना। पार्टी ता केंद्रीय कमेटी मीटिंग ता संख्या ओसो अध्ययन कियाला कटौती कीयाना निर्णय किताद मंता। मीटु इद निर्णय पोरो अमल कींतिर कीविर इंजी हूडकाला बोरे इदिना पोरो अमल कियाला इनकार कीतेके मीटु इदिना विरोध कीयाना।

संक्षिप्त ते नौजवान लोरा काजे बेस अध्ययन कीयाना ओसो बेस काम कीयाना लेक्का परिस्थिति बने कीयाना। उचुन नेतृत्वकारी कामरेड्स नौजवान लोर किन सिर्फ काम कियाला वेहंतोर, ओरा स्वास्थ्य पोरो वेल्ले कम ध्यान हींतोर। पोरो वेहता पोल्लोंग कीसी मीटु ओरा विरोध किया परिंतिर। मीटु उंदी मजबूत आधार भूमि पोरो नितसी मंतिर इत्तेके मीटु युवा पीढ़ी तुन मजबूत कियाला काजे ओरा रक्षा किया मंतिर। मावा पीढ़ी तुन वेल्ले नुकसान आता बारांकु इत्तेके अस्के मुयतोर तम्मा पिल्ला-पेकोर पोरो ध्यान हीवोर। मुयतोर काजे तिंदना-उंडना टेबल मति पिल्ला-पेकोरा काजे हिलवा मत्ता। पिल्ला-पेकोर किन परिवार लोप्पा वडकना अधिकार हिलवा मत्ता, ओरु किलतेके केव्वी बट्टा ते उंदी कै वाटसियानोर। नेंडु पूना चीन लोप्पा माटु मना रुझान बदले कीसी पिल्ला-पेकोर, नौजवान लोरा हित कुना पोरो वेल्ले ध्यान हियाना।

नौजवान कार्यकर्ता लोर नौजवान संघ ता केंद्रीय कमेटी ता सदस्य लेक्का चुने कीयाना। मुव्वुर राजा लोरा कालम ते, छाओ छाओ तन्ना बेहरा सेना यांगत्सी डोड्डा एवनल ओसी पूर्वी चीन ते मत्ता ऊ राज्य पोरो हमला कितोर। अस्के उमर ता हिसाब ते “नौजवान संघ ता सदस्य” मत्ता चओ खी ऊ सेना ता सेनापति चुनेमातोर। छंग फू ओसो बाकी सेनापतिर इदिना विरोध कितोर मति पेरके ओरकिन समझे कीसी चओ खी ना नेतृत्व ते काम कीयाना स्वीकार कितोर। आखरी ते युद्ध लोप्पा जीत दोरकता। नेंडु माटु “चओ खी” ना वर्तमान रूप कुन नौजवान संघ ता

केंद्रीय कमेटी ता सदस्य चुनेमायला आल्सिंतोम, मति लोकर इदिना पोरो वेने विरोध कितोर! नौजवान संघ ता केंद्रीय कमेटी ता सदस्य लोरा उम्मीदवार सिर्फ बेहरा उग्र वाले लोकुरे मंतोर, नौजवान लोर वेल्ले कम मंतोर। इद्रम मत्तेके काम ताका परिंता या? बदे ड़ावुट हिल्ला माटु सिर्फ उमर पोरो आधार आसी आयवा क्षमता पोरो आधार आसी वेने निर्णय कीयाना। शुरू ते नौजवान संघ ता केंद्रीय कमेटी ता सदस्यता उम्मीदवार पोरोल ता लिस्ट लोप्पा 30 साल तुकू कम उमर वाले लोकुरा संख्या सिर्फ 9 मत्ता अनि केंद्रीय कमेटी ता विचार-विमर्श पेरके इंजे इद संख्या 60 आता। इद्रम बेरसता पेरके वेने इद संख्या कुल संख्या तुकू एक-चौथाई तुकू उचुने ज्यादा मंता। 30 साल तुकू ज्यादा उमर वाले उम्मीदवार लोरा संख्या इंजे वेने तीन-चौथाई मंता, मति उचुन कामरेड्स इद हालो इंजी आल्सिंतोर। नन्ना इदु हालनाचोन मंता इंताना 60 तुकू ज्यादा सब्बे नौजवान लोरा लोप्पा सब्बे रकम ता क्षमता मंता या? उचुन कामरेड्स पक्का वेहमूडायो इंतोर। माटु मना नौजवान लोरा पोरो पूरा विश्वास कीयाना, ओरा लोप्पा ज्यादातर लोकुर तम्मा पद काजे सही साबित आंतोर। ओरा लोप्पा वरोर-इरवुरे तम्मा काम किया परवा लेक्का मंतोर मति इदिना बारे वेल्ले आल्सना जरूरत हिल्ले, वायना चुनाव ते ओरा जागा ते दूसोर किन चुने कियमूडायर। इद्रम कीतेके मना बुनियादी दिशा गलत मन्नो। नौजवान लोर वेल्ले अनुभवी मन्नोर, मुयतोर अनुभवी मंदिंतोर, बदे ड़ावुट हिल्ला ओरा लोप्पा क्षमता मंता। मति दूसरा बगिल ओरा शारीरिक ताकत लगातारा कमजोर आंता हूडना-केंजना ताकत मुन्ने लेक्का हिल्ले ओसो ओरा कै-कालकु नौजवान लोरा लेक्का मजबूत हिल्ले। इदु प्रकृति ता नियम आंदु। बोरु इदिन मानेमायोर ओरिन समझे कीयाना।

नौजवान संघ नौजवान लोरा विशेषतांग कुन सुरता तासना। ओरु तम्मा-तम्मा काम कीयाना, संगेने ओरकिन समान स्तर ता पार्टी कमेटिंग ना नेतृत्व वेने स्वीकार कीयाना। इदु बदे पूना पोल्लो आयो इदु वेल्ले मुन्नेटले ताका मंता ओसो इदु मुन्नेटले मार्क्सवाद नियमें मंता। इदिन

असल ते प्रस्ताव कीयाना इंतोरा। नौजवान लोर, नौजवान लोरे मंदितोर, इद्रम हिल्वेके नौजवान संघ ता जरूरते हिल्ले या? नौजवान लोर बेहरा उग्र ता लोकर लेक्का मन्नोर, लेय्यास्कु लेय्योरा लेक्का मन्नोंगा। मीटु इव विशेषतांग कुन सुरता तासवेके जनता तल अलग-थलग आंतिरा। इंजे नौजवान संघ ता सदस्य लोर 90 लाख मंतोर, मीटु नौजवान लोरा विशेषतांग कुन नजरअंदाज कीतेके सिर्फ 10 लाख सदस्य लोरे मीवा समर्थन कियानूर अनि 80 लाख सदस्य लोरा समर्थन दोरको आयारा।

मीटु काम कीयानास्के नौजवान संघ तुन तम्मा सदस्य लोरा बहुसंख्या पोरो ध्यान हियाना अनि ओरा लोप्पा मत्ता विकसित तत्व कुना पोरो वेने ध्यान हियाना। इद्रम कीसी विकसित तत्व नाराज आयना लेक्का मंतोर बारांकु इत्तेके ओरु नौजवान संघ ता संगठन तम्मा सब्बे सदस्य लोर मांग कीयाना इंजी आल्संतोरा। मति इद्रम कीयाना गलत मंता इंजी समझे कीयाना। नौजवान संघ ता संविधान ता ड्राफ्ट लोप्पा कर्तव्य वेल्ले मंता ओसो अधिकार वेल्ले कम; बहुसंख्या कलियसी ताकना लेक्का तीना लोप्पा उचुन ढील हियाना। मीटु मीवा ध्यान बहुसंख्या पोरो केंद्रित कीयाना सिर्फ अल्पसंख्या पोरो आयो।

मीवा संविधान ता ड्राफ्ट लोप्पा बोरे सदस्य नालुंग महिनांग नौजवान संघ ता बुनियादी इकाई कीयाना नियमित मीटिंग लोप्पा शामिल आयवेके ओरु खुद नौजवान संघ तल पेसिंतोर इंजी नियम बने कीयाना। इदु उंदी वेल्ले सख्त नियम आंदू। पार्टी ता संविधान लोप्पा वेने 6 महीनांग ना नियम पंडताद मंता; मीटु वेने इद्रम किया परविरा? नौजवान संघ ता संविधान लोप्पा अमल किया परवा लेक्कटा लेवेके सिर्फ 10 लाख सदस्य लोरा काजे संभव आयना ओसो बाकी 80 लाख सदस्य लोरा असम्भव मत्ता बदे नियम पंडनायो। नियम कुना लगू कीयानास्के लचीलापन अमल कीयाना जरूरी मंता। असल ते मत्ता ओसो मंदाना मत्ता नडमा अंतर मंता। उचुन कानून कुन पूराए लागू कियाला वेने बचोनो साल लागिंगता। उदाहरण तुकू मर्मिंग कानून ता बचोनो धारांग मंतांग अविन पूरा लागू कियाला काजे कम से कम 3 पंचवर्षीय योजनांग ना टाईम लागिंगता। “भोरकुल पेरेके

पोंगडिंग कीयानायो”, इद धारा नियमानुसार सही मंता मति इदिन नौजवान संघ संविधान लोप्पा शामिल कीयाना जरूरत हिल्ले। उदारतावाद ता विरोध कीयाना उंदी दीर्घकालीन काम मंता, इदु पार्टी लोप्पा वेल्ले मंता। माटु मोरकुल पेरे पोंगडिंग कीयाना मना कींतिर मति असल ते संभव हिल्ले। हिरपा लेक्का डारवेंडा पंडमाटु। मुख्य रूप ते मना ओसो दुश्मन नडमा उंदू स्पष्ट विभाजन-रेखा पिडंगना।

सम्मान तीरम-तीरम दोरकिता। उंदी बेरा सेना लोप्पा उचुन मुल दूसरोर किन पासकला काजे पाटा पारिंदूर। माटु इदिन रोमी किवोम ओसो जांच-पडताल वेने कीवोम मति मना सेना तहस-नहस आयो। माटु सिर्फ उचुके प्रमुख पोल्लोंग कुन मजबूत पोयसी तासतोम-अनुशासन ता मूंड मुख्य नियम, ध्यान हियानाचोन 8 पोल्लोंग ओसो इद्रम मावा सशस्त्र सेनांग तीरम-तीरम सही हर्दे ताकना शुरू कीतांग। नेताल लोरा पोरो जनता क्रांतिकारी व्यवहार तुन पुत्ता पेरकेने जीवा कीयाना शुरू कित्ता। असल परिचय आता पेरके ने विश्वास आता। नेंडु नौजवान संघ ता केद्रीय कमेटी तुन वेल्ले सम्मान दोरकताद मंता। उचुन मुल इंजे वेने ओरा विश्वास कीवो मति ओरु तीरम-तीरम इद्रम कियानूर। वरोर नौजवान मुन्ने पहल कीसी पद ते चुनेमातास्के सम्मान वेल्ले दोरकिता। मति तीना बारे ते आल्सना जरूरत हिल्ले बारांकु इत्तेके ओरिन उचुन रांगड ओसो उचुन आलोचना केंजलाए लागिंयरा। “मोरकुनल पेरके पोंगडिंग कीयाना” कारण ते “आमने-सामने पोल्लोंग कीयाना” मौका दोरकवा मंदानदु मंता। पूर्ण जनवाद पोरो अमल कीतेके मीटु दूसरोर किन खुल्ला अनुमति हीतेके पोंगडिंग कियाला अनुमति हीतेके वेने ओरु माकिन इद्रम कियाला टाईम हिल्ले इंदानूर अनि आराम कियाला आल्सानूर। इद्रम आतेकाई समस्यांग पुटसोरे मंदानुंग अविन उंदे बेरा हल कियमूडांता इंजी आल्समाटु; समस्यांग नेंडु वेने मंतांग ओसो नाडी वेने मंदानुंग।

संक्रमण कालम ते पार्टी ता आम कार्य 3 पंचवर्षीय योजनांग लोप्पा समाजवादी बदलाव ता काम तुन बुनियादी रूप ते पूरा कीयाना मंता। 3 पंचवर्षीय योजनांग ना टाईम 15 साल कु मंता हर साल उंदी सुडला डाका

मुन्ने वाटना अनि हर पाँच साल लोप्पा उंदी बेहरा डाका मुन्ने दायना, मूंड बेहरा डाका मुन्ने वाटता पेरके इदु काम लगभग पूरा आयार। “बुनियादी रूप ते पूरा आयाना” इत्तेके “सही तरीका ते पूरा” कीयाना आयो। “बुनियादी रूप ते पूरा कीयाना उंदी विवेक पूर्ण पोल्लो आंदू; हर काम कीयानास्के विवेकशील मंदाना हेमशा बेस मंदिता।

वर्तमान कालम ते चीन ता कृषि अर्थव्यवस्था ता स्वरूप व्यक्तिगत मंता ओसो तीरम-तीरम इदिना समाजवादी बदलाव कीयाना जरूरत मंता। कृषि लोप्पा आपसी सहयोग, सहकारिता आंदोलन ता विकास कीयानास्के माटु खुद शामिल आयना नियम पोरो नितसी मंदाना। इद आंदोलन ता विकास कियवा मंदाना पूंजीवाद बगिल ओयना ओयार अनि इदु उंदी दक्षिणपंथी भटकाव मंदिता। इद्रम आतेके विकास ता रफ्तार वेल्ले बेरसी कीतेके वेने काम ताको आयार, बारांकु इत्तेके इदु उंदी “वामपंथी” भटकाव आयार। इद आंदोलन तुन तीरम-तीरम ओसो पूर्ण तैयारी किता पेरके ताकी कीयाना। माटु तैयारी कियवा मत्ता ओसो जीत दोरकना संभावना हिल्ला मत्ता बदे लड़ाई लड़ेमायोम ओसो बदे लड़ाई ता तैयारी कीतेकाई ताना लोप्पा जीत दोरकना संभावना हिल्ला मत्तास्के वेने लड़ेमायोम। मटु च्यांग काई-शेक संगे लड़ेमायनास्के शुरू ते उचुन मुल मनोगतवादी गलतिंग कितोर मति पेरके ओरु शुद्धीकरण आंदोलन संगे मनोगतवाद तुन दूर कितोर अनि माटु जीत दोरकी कीतोम। नेंडु माटु समाजवादी अभियान ताकी कीयाना मंतोम, समाजावादी औद्योगीकरण, कृषि, दस्तकारी ओसो पूंजीवादी उद्योग-वाणिज्य ता समावादी बदलाव कार्य तुन पूरा कियाला काजे संघर्ष किया मंतोम। इदु पूरा जनता ना आम कार्य आंदू। इद आम कार्य तुन नौजवान संघ बद्रम पूरा कीयाना, इदिना काजे मीटु नौजवानलोरा विशेषतांग कुन सुरता तासिसी सब्बे नियमकु बनेकीयाना।

राष्ट्रीय पूंजीवाद ता बारे ते²⁷

9 जुलाई 1953

चीन लोप्पा वर्तमान पूंजीवादी अर्थव्यवस्था ता ज्यादातर हिस्सा जनताना सरकार ता नियंत्रण ते मंता। इदु राष्ट्रीय सम्पत्ती वाले समाजवादी अर्थव्यवस्था संगे अलग-अलग रकम ते कलियसी मंता अनि मजदूर लोरा कैदे मंता। इदु उंदी साधारण पूंजीवादी अर्थव्यवस्था आयवा उंदी पूना रकम ता पूंजीवादी अर्थव्यवस्था आंदू। इदिना अस्तित्व ता मुख्य उद्देश्य पूंजीपतिरा काजे मुनाफा कमै कीयाना आयवा जनता ओसो राज्य ता जरूत कुन पूरा कीयानाद मंता। मजदूर लोर पुट्टी कीयाना मुनाफा ता उंदी अंश नेंडु वेने पूंजीपतिरा कैदे दांता, पूरा मुनाफा ता सिर्फ उंदी सुडला हिस्सा इतेके लगभग एक-चौथाई हिस्सा मंता। तीन-चौथाई हिस्सा मजदूर लोरा काजे (कल्याण निधि लेक्का), राज्य काजे (आय-कर) ओसो संयंत्र बेरसी कियाला काजे (इदिना सुडला हिस्सा पूंजीपतिरा काजे मुनाफा पैदा कीतां) मंता। अद्रमसा पूना रकम ता राष्ट्रीय पूंजीवादी अर्थव्यवस्था ता स्वरूप समाजवादी स्वरूप लेक्का मंता, इदु मजदूर ओसो राज्य काजे फायदा ता मंता।

²⁷ 1953 ता एही कालम ते आता वित्तीय, आर्थिक काम पोरो राष्ट्रीय सम्मेलन ता उंदी दस्तावेज पोरो रास्ता टिप्पणी।

संक्रमण कालम काजे पार्टी ता आम कार्यदिशा²⁸

अगस्त 1953

चीन लोक गणराज्य ता स्थापना तल समाजवादी बदलाव ता काम बुनियादी रूप ते पूरा आयना जोम उंदी संक्रमण कालम मंदिता। इद संक्रमण कालम ते पार्टी ता आम कार्यदिशा ओसो आम कार्य उंदी वेल्ले जोम देश लोप्पा औद्योगिकरण, कृषि, दस्तकारी ओसो पूंजीवादी उद्योग-वाणिज्य ता समाजवादी बदलाव तुन बुनियादी रूप ते पूरा कीयानादु मंता। इद आम कार्यदिशा ते मना सब्बे काम कीयाना, बेगा माटु लेसिंतोम अगा दक्षिणपंथी लेवेके वामपंथी गलतिंग कींतोम।

इद आम कार्यदिशाम लोप्पा वेल्ले नीतिंग, वेल्ले मुन्ने मार्च 1949 ते आता पार्टी ता सातवीं केंद्रीय कमेटी ता दूसरी पूर्ण अधिवेशन ता प्रस्ताव लोप्पा पेश किताद मत्ता अनि अविना पोरो नियमानुसार निर्णय कीयाना। वेल्ले कामरेड्स दूसरी पूर्ण अधिवेशन ता निर्णय कुना अनुसार काम कियाला तैयार हिल्लेर अनि वेल्ले बेरा अधिवेश ता निर्णय कुना उल्टा हरीं पोयसी ताकिंतोर, लेवेके इदिनकु मुन्ने हंजी ताना लोप्पा तय किता नियम कुना खुल्लमखुल्ला उल्लंघन कींतोर।

²⁸ 1953 ता एद्दी ते किता वित्तीय, आर्थिक काम बारे ते राष्ट्रीय सम्मेलन ते कामरेड चओ ऐन-लाई पेश किता सारंश ता जांच कियानास्के रास्ता उंदी महत्वपूर्ण निर्देशा

पार्टी लोप्या पूंजीवादी विचार कुना विरोध कीमुट²⁹

12 अगस्त 1953

मावा इद सम्मेलन सफल आता, प्रधामंत्री चओ वेल्ले बेसता सारांश पेश कित्तोर।

इंजे “मूंड गलतिंग” विरोधी ओसो “हेय्युंग गलतिंग” विरोधी आंदोलन ता बारे ते पार्टी लोप्या स्वरूप ता दृष्टि ते रेंडु अलग रकम ता गलतिंग मंता। उंदी रकम ता गलतिंग साधारण स्वरूप वाले इत्तेके “वीइता हेय्युंग”। इव गलतिंग बारे वेने किया परितोर, बस्के वेने किया परितोर। “वीइता हेय्युंग” “कम आता हेय्युंग” लेक्का वेने बदलेमाया परितांग। दूसरा रकम ता गलतिंग उसूल कुना संबंधित मंतांग, पूंजीवाद बगिल दायना रुझान लेक्का। इद्रम ता गलतिंग पार्टी लोप्या पूंजीवादी विचार कुना लेक्का मंतांग अनि मार्क्सवाद-लेनिनवाद ता विपरीत रुझान कुना संबंधित मंतांग।

“मूंड गलतिंग” विरोधी ओसो “हेय्युंग गलतिंग” विरोधी आंदोलन पार्टी लोप्या मत्ता पूंजीवादी विचार कुना पोरो गोडेल देब्बा हीता। मति अस्के सिर्फ भ्रष्टाचार ओसो फिजूलखर्च संबंधित पूंजीवादी विचार कुना पोरो बेहरा हमला आता मति पार्टी ता कार्यदिशा संबंधित सवाल कुना लोप्या दिस्सना पूंजीवादी विचार कुना संगे हल आया परवो। इद्रम ता पूंजीवादी विचार सिर्फ वित्तीय ओसो आर्थिक कार्य लोप्याने आयवा राजनीतिक, न्यायिक, सांस्कृतिक, शैक्षणिक ओसो बाकी जागा ने वेने

²⁹ 1953 ता एही ते आता वित्तीय, आर्थिक राष्ट्रीय सम्मेलन लोप्या भाषणा

मंतांग अनि राष्ट्रीय स्तर ता कामरेड्स, स्थानीय स्तर कामरेड्स ना लोप्पा वेने मंतांगा।

हत्ता साल दिसम्बर तल इत्तेके कामरेडे पो ई-पो “सार्वजनिक ओसो निजी कारोबार नडमा समानता”¹ वाले पूना टैक्स-व्यवस्था पेश किताद मत्ता, मना वित्तीय, आर्थिक काम लोप्पा मत्ता गलतिंग ना कड़ी आलोचना आसोर मत्ता अनि वर्तमान सम्मेलन ते वेने आता। पूना टैक्स-व्यवस्था ता विकास आयला हीतेके अदु मार्क्सवाद-लेनिनवाद ता उल्लंघन कीसी, संक्रमण कालम काजे तय कित्ता पार्टी ता आम कार्यदिशा ता उल्लंघन कीसी माकिन अनिवार्य रूप ते पूंजीवाद बगिल ओंता।

संक्रमण कालम माकिन बेगा ओयार, समाजवाद ते लेवेके पूंजीवाद ते? पार्टी ता आम कार्यदिशा अनुसार अदु माकिन समाजवाद ते ओयारा। अदिना काजे वेल्ले जोम संघर्ष कीयाना जरूरत मंता। पूना टैक्स-व्यवस्था ता गलती चांग च-शान² ना गलती तुकू अलग मंता अनि वैचारिक सवाल ओसो पार्टी ता आम कार्यदिशा तल भटकेमायना सवाल संबंधित मंता। माटु पार्टी लोप्पाटा पूंजीवादी विचार कुना खिलाफ उंदी संघर्ष शुरू कीयाना। वैचारिक रूप ते पार्टी लोप्पा मूंड रकम ता कामरेड्स मंतोर: उचुन कामरेड्स सुदृढ़ ओसो अविचल मंतोर अनि ओरा विचार मार्क्सवादी-लेनिनवादी मंता; वेल्ले मुल बुनियादी रूप ते मार्क्सवादी-लेनिनवादी मंतोर मति उचुन गैर-मार्क्सवादी-लेनिनवादी विचार कुना संगे ग्रस्त मंतोर; सिर्फ उचुने कामरेड्स ना विचार गैर-मार्क्सवादी-लेनिनवादी मंता। पो ई-पो ना गलत विचार कुना आलोचना कीयानास्के ओरा गलती ना स्रोत निम्न-पूंजीवादी व्यक्तिवाद मंतोर इंतोर; इद राय बेस हिल्ले। ओरा आलोचना कीयानास्के मुख्य रूप ते पूंजीवाद काजे मुनाफा ओसो समाजवाद काजे नुकसानदायक मत्ता ओरा पूंजीवादी विचार कुना आलोचना कीयाना। सिर्फ इद्रमे ओरा आलोचना आयारा। माटु मुन्ने वेहता लेक्का “वामपंथी” अवसरवादी गलतिंग पार्टी लोप्पा निम्न-पूंजीवाद ता रूप आंदू; इव गलतिंग माटु पूंजीपति वर्ग तल संबंध देहता पेरके आतांगा। माटु क्वोमिंगतांग, कम्युनिस्ट पार्टी ता आपसी सहयोग ता पहली कालम

ते, जापानी-आक्रमण-विरोधी युद्ध कालम ते ओसो वर्तमान कालम ते माटु पूंजीपति वर्ग संगे सहयोग कीतोम अस्के पार्टी लोप्पा बचोनो लोकुर पूंजीपति विचार कुनल प्रभावित आसी डुलमुल आतोर। पो ई-पो ना गलती वेने इद्रमताए परिस्थिति ते आता।

पो ई-पो ना गलती अलग हिल्ले। इद्रम ता गलतिंग सिर्फ राष्ट्रीय स्तर ताए आयो अदु अर्थोरिटी कुना लोप्पा, हर प्रान्त, म्युनिसिपलटिंग लोप्पा दिसिंता। हर अर्थोरिटी ओसो हर प्रांत, म्युनिसिपलटी उंदी मीटिंग केयसी सातवी केंद्रीय कमेटी ता दूसरा पूर्ण अधिवेशन ता प्रस्ताव ओसो वर्तमान सम्मेलन ता सारांश ता वेहच ते तन्ना-तन्ना काम शुरू कीयाना अनि कार्यकर्तो लोर किन शिक्षित कीयाना।

इंजेने नन्ना ऊहान ओसो नानकिंग ता दौरा कितास्के वेल्ले जानकारी दोरकता अदु वेल्ले फायदेमंद साबित आता। पेकिंग ते मंजी नाकिन बाताले केंजा वायो अदिन काजे नन्ना दौरा कीसोरे मंतान। केंद्रीय नेतृत्वकारी उंदी विचार कुना उत्पादन कीयाना कारखाना आंदू। अदिन दोड़ ता स्तर ता परिस्थिति ता जानकारी हिल्वेके तन्ना काम काजे बदे कच्चा माल लेवेके अर्ध-प्रोसेसशुदा उत्पादन दोरकवेके अदु बदे वेने उत्पादन बद्रम किया परिंता? बस्के-बस्के उचुन उत्पादन स्थानीय स्तर ता कमेटिंग वेने तैयार कींतांग अनि केंद्रीय नेतृत्वकारी अविन किन पूरा देश लोप्पा लागू कींता। उदाहरण तुकू पाड़ना, पूना “मूंड गलत” विरोधी आंदोलन³ तुन मुन्ने स्थानीय कमेटिंगे शुरू कीतांग। केंद्र लोप्पा अलग-अलग विभाग विचार वाते लेक्का निर्देश जारी कीतांग। इव विभाग कुनल वायना उत्पादन हाई क्वालिटी ता मत्तेकाई असल ते उत्पादन वेल्ले अंगडम मंदितांग अनि ज्यादातर बेकार वेने मंदितांग। अर्थोरिटी कुना लोप्पा प्रांत, म्युनिसिपलटिंग ना नेतृत्वकारी कमेटिंग विचार कुना उत्पादन कीयाना स्थानीय कारखानांग आंदुंग अविना उत्पादन वेने वेल्ले हाई क्वालिटी ताए मंदांना।

पो ई-पो ना गलती पूंजीवादी विचार कुन वेहिंता। अदु पूंजीवाद काजे फायदा ओसो समाजवाद, अर्ध-समाजवाद काजे नुकसान मंता। सातवी केंद्रीय कमेटी ता दूसरा अधिवेश ता प्रस्ताव ता उल्लंघन कींता।

माटु बदिना पोरो आधार आसी मंतोम? मजदूर वर्ग पोरो लेवेके पूंजीपति वर्ग पोरो? सातवी केंद्रीय कमेटी ता दूसरा अधिवेशन ता प्रस्ताव लोप्पा “माटु पूरा जीवा कीसी मजदूर वर्ग पोरो आधार आसी मंदाना” इंजी वेल्ले मुन्ने ने स्पष्ट किताद मत्ता। प्रस्ताव लोप्पा उत्पादन ता पुनरुद्धार ओसो विकास कीयाना बारे ते दोड़ रास्ता पोल्लोंग किने नियम लेक्का मानेमासी ताकना इंजी वेहता मंता: राष्ट्रीय उद्योग ता उत्पाद सबसे मुन्ने वांता, निजी उद्योग कुना उत्पादन दूसरा नम्बर ते दस्तकारी उद्योग ता उत्पादन तीसरा नम्बर ते वांता। उद्योग पोरो ओसो सबसे मुन्ने बेहरा उद्योग पोरो जोर हियमूड़ांता, बारांकु इत्तेके इदु राष्ट्रीय सम्पत्ति मंदिता। मावा वर्तमान अर्थव्यवस्था ता हेय्युंग विभाग कुना लोप्पा राष्ट्रीय अर्थव्यवस्था ता नेतृत्वकारी विभाग मंता। पूंजीवादी उद्योग-वाणिज्य कुन तीरम-तीरम राष्ट्रीय पूंजीवाद बगिल ओयना।

दूसरा पूर्ण अधिवेशन ता प्रस्ताव लोप्पा उत्पादन ता विकास पोरो आधार आसी मजदूर ओसो बाकी मेहनतकश लोकुरा पिस्वल स्तर तुन सुधरे कीयाना इंजी वेहताद मंता। पूंजीवादी विचार वालेर इद पोल्लो पोरो ध्यान हीवोर अनि पो ई-पो इदे विचार ता प्रतिनिधित्व कींतोर। माटु उत्पादन ता विकास पोरो जोर हियाना जरूरी मंता मति माटु उत्पादन ता विकास पोरो ओसो जनता ना पिस्वल सुधरे कीयाना पोरो वेने ध्यान हियाना जरूरी मंता। जनता ना भौतिक कल्याण काजे जरूर बातालाई कीयाना मति अदु वेल्ले कीयाना लेवेके इनपड़े कीयानायो इंदाना लेक्का मंदानायो। इंजे जनता पिस्वल पोरो ओसो ओरा दुक्कम पोरो ध्यान हियाना कार्यकर्ता लोर वेल्ले मंतोर। क्वेइचओ प्रांत लोप्पा उंदी रेंजीमेंट किसान लोरा खेती कीयाना जमीन ता उंदी बेहरा हिस्सा तुन तन्ना कब्जा ते कीसी मत्ता। इदु जनता ना हित कुना पोरो गंभीर अतिक्रमण आंदू जनता ना

पिस्वल पोरो ध्यान हियवा मंदाना सही हिल्ले, मति जोर उत्पादन ओसो निर्माण पोरोने दियाना।

अर्थव्यवस्था लोप्पा पूंजीवाद ता फायदा एतना, सीमित कीयाना अदिना बदले कीयाना सवाल तुन वेने दूसरा पूर्ण अधिवेश लोप्पा स्पष्ट कीतद मंता। ताना लोप्पा मानेमाता प्रस्ताव लोप्पा निजी पूंजीवादी अर्थव्यवस्था तुन अनियंत्रित रूप ते विकसित कीयाना अनुमति हियानाए आयवा अदिना संगे बचोनो बगिल तल सीमित कीयाना। अदिना काम कीयाना इलाका लोप्पा, टैक्स नीति संगे, हाटुम-रेट संगे ओसो श्रम ता शर्त कुना संगे सीमित कीयाना। समाजवादी अर्थव्यवस्था ओसो पूंजीवादी अर्थव्यवस्था नडमा ता संबंध नेतृत्व कीयाना ओसो नेतृत्व ते ताकना नडमा मंदना संबंध मंता। नवजनवादी राज्य लोप्पा, नियंत्रित कीयाना ओसो नियंत्रण ता-प्रतिरोध वर्ग-संघर्ष ता मुख्य रूप आंदू इंजे पूना टैक्स-व्यवस्था लोप्पा “सार्वजनिक ओसो निजी कारोबार नडमा समानता” ता पोल्लोंग किताद मंता; इदु राष्ट्रीय अर्थव्यवस्था तुन नेतृत्वकारी तत्व मानेमासोर दायना कार्यदिशा ता उल्लंघन कीता।

व्यक्तिगत कृषि, दस्तकारी ता सहकारी बदलाव लोप्पा दूसरा पूर्ण अधिवेशन ते स्पष्ट रूप ते वेहताद मंता:

इद्रम ता सहकारी समितिंग मेहनतकश जनता ना सामूहिक आर्थिक संगठन निजी मालिकाना पोरो आधार आसी मंता, सर्वहारा वर्ग ता नेतृत्व ते ताकना राजसत्ता ता निर्देश ते काम कीता। चीनी जनता सांस्कृतिक रूप पेरके अरसी मत्तांकु ओसो सहकारी समितिंग कुन संगठित कीयाना परम्परा हिल्ले, सहकारिता आंदोलन ता प्रचार-प्रसार ओसो विकास कियाला माकिन वेल्ले मुश्किल कुना सामना कीयाना लागियर; मति सहकारी समितिंग संगठित किया लागियरे अनि इद्रम जरूर कीयाना अनि अविना प्रचार-प्रसार कीयाना अविन विकसित कीयाना। मावगा सिर्फ राष्ट्रीय अर्थव्यवस्था मत्तेके ओसो सहकारी अर्थव्यवस्था हिल्वेके मावा काजे माटु मेहनतकश जनता ना व्यक्तिगत अर्थव्यवस्था तुन तीरम-तीरम सामूहिकरण बगिल ओयना मुश्किल आयार। मावा काजे माटु

नवजनवादी राज्य तुकू मुन्ने हंजी वायना कालम ता समाजवादी राज्य लोप्पा एवना ओसो मावा राजसत्ता लोप्पा सर्वहारा वर्ग ता नेतृत्व तुन सुदृढ कीयाना मुश्किल आयारा।

इद प्रस्ताव मार्च 1949 ते स्वीकार किताद मत्ता मति वेल्ले कामरेड्स इदिना पोरो ध्यान हीताद हिल्ले। ओरा काजे अदु पाइना पोल्लो वेने पूना खबर लेक्का आया मंता। पोई-पो “नहाकुना इलाकांग लोप्पा पार्टी ता राजनीतिक काम तुन सुदृढ कीयाना” हेडिंग ता तन्ना लेख लोप्पा आपसी सहयोग ओसो सहकारिता संगे सामूहिकरण एवनल एव्वना व्यक्तिगत किसान लोरा हरीं “सिर्फ उंदी कंजकड़ आंदू, बारांकु इत्तेके इंजेटा व्यक्तिगत अर्थव्यवस्था पोरा आधार आसी मत्ता सहयोग दल कुना तीरम-तीरम सामूहिक फार्म लेक्का विकसित आयाना असम्भव आता अनि इद हरीं ते ताकसी कृषि ता सही सामूहिकरण आयना संभव हिल्ले” इत्तोरा इद पोल्लो पार्टी ता प्रस्ताव तुकू उल्टा मंता।

इंजे रेंडु संयुक्त मोर्चा ओसो रेंडु एकता मंतांग। उंदी एकता मजदूर वर्ग ओसो किसान लोरा नडमा मंता; इद उंदी आधार आंदू, दूसरा एकता मजदूर वर्ग ओसो राष्ट्रीय पूंजीपति वर्ग नडमा मंता। किसान लोर श्रमिक मत्तांकु मजदूर वर्ग ओसो किसान लोरा नडमा एकता उंदी दीर्घकालीन एकता मंदिता। मति मजदूर वर्ग ओसो किसान लोरा नडमा अंतरविरोध वेने मंदिता। माटु खुद ता उसूल कुना अनुसार किसान लोर किन व्यक्तिगत मालिकाना तल तीरम-तीरम सामूहिक मालिकाना बगिल ओयना। वायना कालम ते राष्ट्रीय मालिकाना ओसो सामूहिक मालिकाना नडमा वेने अंतरविरोध मंदितांग। इव सब्बे अंतरविरोध कु दुश्मनी तावु मन्नोंग। दूसरा बगिल मजदूर वर्ग ओसो पूंजीपति वर्ग नडमा ता अंतरविरोध दुश्मनी तावे मंदिता।

पूंजीपति वर्ग लोकर किन पतन बगिल जरूर ओंता ओरकिन तम्मा शकर ते मुडंदसी मत्ता गोलिंग ना निशाना बने कींता। तन्ना शकर ते मुडंदसी मत्ता गोलिंग रेंडु रकम तांग मंदितांग, उंदी भौतिक ओसो दूसरा मानसिक। उंदी मानसिक गोली पो ई-पो किन तन्ना निशाना बने किता।

ओरु पूंजीवादी विचार कुना प्रभाव ते वासी गलती कितोर। पूना टैक्स-व्यवस्था ता प्रचार कीयाना सम्पादकीय हूडसी पूंजीपति वर्ग चपोटांग नेकिह कीसी तारीफ कित्ता अनि पो ई-पो खुश आतोर। पूना टैक्स-व्यवस्था लागू कीयाना मुन्ने ओरु पूंजीपति वर्ग तल राय एतितोर ओरा संगे उंदी समझौता कित्तोर मति अदिना रिपोर्ट केंद्रीय कमेटी तुन हीवोरे। अस्के वाणिज्य मंत्रालय ओसो सप्लाई, क्रय-विक्रय सहकारी समिति महासंघ विरोध कित्ता, हल्के उद्योग मंत्रालय वेने नाराज आता। वित्तीय, आर्थिक ओसो व्यापारिक काम कियानोर 11,00,000 कार्यकर्ता, कर्मचारिरा लोप्पा बेहरा संख्या बेसता लोरादे मंता। ताना लोप्पा सिर्फ उचुने मुल लब्बड़ तोर मंतोर। लब्बड़ तोर वेने रेंडु रकम तोर मंतोर:उंदी रकम तोर प्रतिक्रियावादि मंदितोर अदिनके ओरकिन तेंडसियाना; दूसरा रकम तोर क्रांतिकारी मंदितोर ओरा लोप्पा गलतिंग कित्ता पार्टी सदस्य ओसो गैर पार्टी सदस्य लोर मंतोर अदिनके ओरा आलोचना अनि शिक्षा संगे ओरा पूना बदलाव कीयाना।

समाजवाद ता गारंटी कियाला काजे माटु पूरा पार्टी लोप्पा ओसो सबसे मुन्ने केंद्रीय स्तर ते ओसो अथॉरिटीकु, प्रांतकु, म्युनिसिपलिटि स्तर ते पार्टी, सरकार, सेना ओसो जन संगठन कुना नेतृत्वकारी शाखांग लोप्पा गलत दक्षिणपंथी अवसरवादी रुझान (पूंजीवादी विचार कुना) खिलाफ संघर्ष कीयाना जरूरी मंता। अथॉरिटीकु, प्रांतकु, म्युनिसिपलिटिंग कीयाना मीटिंग कुना लोप्पा प्रिफेक्चर कुना पार्टी-कमेटिंग ना सचिव ओसो प्रिफेक्चर कुना कमिश्नर⁴ शामिल आयना। अगा आलोचना ओसो वाद-विवाद कीयाना, समाजवादी हरी ओसो पूंजीवादी हरी ता सवाल कुन स्पष्ट कीयाना।

समाजवादी जीत ता गारंटी कांजे माटु विकेंद्रीयता ओसो मनोगतवाद ता विरोध कीयाना। सिर्फ अंधाधुंध प्रगति लेक्का दिस्सना मनोगतवादे आयवा रूढ़ीवाद लेक्का दिस्सना मनोगतवाद ता वेने विरोध कीयाना। नवजनवादी क्रांति ताकनास्के दक्षिणपंथी ओसो “वामपंथी” रेंडासी रकम ता मनोगतवादी गलतिंग किताद मंता। छन तू-श्यू ओसो चांग

क्वो-थाओ दक्षिणपंथी गलतिंग कितोर अनि वांग मिंग मुन्ने “वामपंथी” ओसो पेरके दक्षिणपंथी गलतिंग कितोर। येनान ता शुद्धीकरण आंदोलन लोप्पा कठमुल्लावाद ता विरोध किताद मत्ता, संगेने अनुभववाद ता विरोध कीयाना कोशिश वेने किताद मत्ता। इव रेंडासी मनोगतवाद ता अलग-अलग रूप आंदुंगा। सिद्धांत तुन व्यवहार संगे काल्पवा लेवाए क्रांति जीड़ा परवो। शुद्धीकरण आंदोलन लोप्पा इद समस्या तुन हल किताद मंता। वायना कालम ता गलतिंगनल बचेमायला काजे पाड़ना गलतिंग निगडल करियाना अनि बीमारी तल बचे कियाला काजे बीमारी ता इलाज कीयाना नीति लागू कीयाना। इदिना बारे ते पो ई-पो ना आलोचना दृढ़ता ते कीयाना ता उद्देश्य गलतिंग कियानोर किन तम्मा गलतिंग सुधरे कियाला मदद कीयाना ओसो समाजवाद ता सफलतापूर्वक विकास ता गारंटी कीयानादे मंता। समाजवादी क्रांति ता वर्तमान कालम ते वेने मनोगतवाद ता अस्तित्व मंता। दुस्साहसवाद ओसो रूढ़ीवाद इव रेंडासी ठोस परिस्थितिंग ना उल्लंघम कींतांग अनि रेंडासी मनोगतवाद ता अलग-अलग रूप आंदुंगा। बस्के एवनल मनोगतवाद तुन हारे कीवोम अस्के एवनल क्रांति ओसो निर्माण कार्य सफल आया परवो। जनवादी क्रांति ताकनास्के शुद्धीकरण संगे मनोगतवाद ता गलती सुधरे किताद मंता; अद्रमासी पूरा पार्टी एकता आता, ताना लोप्पा सही कार्यदिशा अमल कियानोर ओसो गलतिंग कियानोर शामिल मत्तोर। वीरु येनान तल अलग-अलग युद्ध भूमि ते हत्तोर अनि मावा पूरा पार्टी तन्ना पूरा ताकत तुन केंद्रित कीसी देश व्यापी जीत दोरकी किता। नेंडु मना कार्यकर्ता लोर मुन्ने तुकू ज्यादा परिपक्व आतोर अनि ओरा राजनीतिक स्तर मुन्ने तुकू पोरो हत्ता; ओरकिन तम्मा नेतृत्वकारी कार्य लोप्पा मनोगतवाद तुन बुनियादी रूप ते दूर कियाला काजे वेल्ले टाईम पोय्यो आयार इंजी आशा कींतोमा।

इव सब्बे समस्यांग कुन हल कीयाना कुंजी सामूहिक नेतृत्व तुन सुदृढ़ कीयाना ओसो विकेंद्रीयता ता विरोध कीयाना। माटु हमेशा विकेंद्रीयता विरोध कींतोमा। 2 फरवरी 1941 ते केंद्रीय कमेटी तन्ना ब्यूरो

ओसो फौजी कमांडर लोरा पोरोल ते जारी कित्ता उंदी आदेश लोप्पा पूरा देश संबंधित सब्बे सर्कुलर, टेलीग्राम, घोषणापत्र ओसो पार्टी आदेश जारी कीयाना मुन्ने अविन केंद्रीय कमेटी तल मंजूर कीयाना जरूरी मंता निर्णय कित्ता। मई ते केंद्रीय कमेटी अलग-अलग आधार इलाकांग कित्ता बाहरी प्रचार काम ता एकीकरण कीयाना आदेश जारी कित्ता। अदे साल 1 जुलाई ते पार्टी ता स्थापना ता 20वी जयंती ता मौका ते केंद्रीय कमेटी पार्टी विचार कुन मजबूत कीयाना निर्णय कित्ता। ताना लोप्पा विकेंद्रीयता ता विरोध कीयाना पोरो जोर हीताद मंता। 1948 ते विकेंद्रीयता ता विरोध कियाला काजे केंद्रीय कमेटी बचोनो आदेश जारी कित्ता। 7 जनवरी ते केंद्रीय कमेटी रिपोर्ट कीयाना व्यवस्था ता बारे ते उंदी आदेश जारी कित्ता अनि मार्च ते अदिना संगे जोड़े कीसी ओसो उंदी आदेश वेने जारी कित्ता। अदे साल सितम्बर ते केयता राजनीतिक ब्यूरो ता उंदी मीटिंग ते केंद्रीय कमेटी तल आदेश एतना ओसो रिपोर्ट कीयाना संबंध ते नियम कुना बारे ते उंदी प्रस्ताव स्वीकार कित्ताद मंता। 20 सितम्बर ते केंद्रीय कमेटी पार्टी कमेटी व्यवस्था तुन सुदृढ़ कीयाना बारे ते उंदी निर्णय कित्ता। 10 मार्च 1952 ते केंद्रीय कमेटी सरकारी काम लोप्पा तन्ना नेतृत्व तुन सुदृढ़ कीयाना बारे निर्णय कित्ता अनि सरकारी विभाग केंद्रीय कमेटी ता नेतृत्व तल अलग आयना खतरा तुकु बचेमायाना कोशिश कित्ता।

केंद्रीयता ओसो विकेंद्रीयता नड़मा लगातार अंतरविरोध मंदिता। बस्केटल माटु शहरकुना लोप्पा वातोम अस्केटल विकेंद्रीयता बेरसात। इद अंतरविरोध तुन हल कियाला काजे मुन्ने पार्टी कमेटी ता सब्बे मुख्य ओसो महत्वपूर्ण समस्यांग कुना बारे ते विचार-विमर्श ओसो निर्णय कीयाना। ताना पेरके निर्णय कुन लागू कियाला काजे अविन सरकार तिगा लोहना। उदाहरण तुकू थ्येनआनमन मैदान ते जनताना पडियोरा स्मारक ता निर्माण कीयाना अनि पेकिंग नगर ता दीवाल मुड्डिहना लेक्कटा महत्वपूर्ण निर्णय केंद्रीय कमेटी कित्ता अनि सरकार अविन लागी कित्ता। कम महत्व ता समस्यांग कुन हल कीयाना काम सरकारी विभाग कुना नेतृत्वकारी पार्टी-ग्रुप कुन सौंपे कियमूडांता। सब्बे समस्यांग पोरो केंद्रीय

कमेटी उंदी अधिकार कीतेके काम ताको आंता। विकेंद्रीयता ता विरोध तुन व्यापाक समर्थन दोकिंता, बारांकु इत्तेके ज्यादातर कामरेड्स सामूहिक नेतृत्व पोरो ध्यान हितोर। सामूहिक नेतृत्व पोरो लागू कित्ता रुझान पार्टी लोप्पा मूंड श्रेणिंग ना लोकर मंतोर। पहली श्रेणी ता लोकर सामूहिक नेतृत्व पोरो ध्यान हींतोर। दूसरी श्रेणी ता लोकर इदिना पोरो ज्यादा ध्यान हीवोर, अनि पार्टी कमेटींग ओरकिन वरोरे विडसतेके बेस आयर इंजी आल्संतोर मति ओरकिन जांच कीयाना तुकू मना कीवोर आंतोर। “वरोरे विडस्तेके बेस आया” इंदाना तल ओरा लोप्पा पार्टी विचार ता कमी मंता इंजी साबित आंता। अनि “जांच कियाला इनकार” कियवा मत्तांकु ओरा लोप्पा उचुन पार्टी विचार मत्ता लेक्का आंता। अदिन काजे माटु “जांच कियाला इनकार हिल्वा” पोल्लो तुन पोय्यना अनि शिक्षित कीयाना ओसो समझे कीयाना तरीका ते इद्रम ता कामरेड्स कुना पार्टी विचार बेरसी कियाला मदद कीयाना। इद्रम कियवेके हर मंत्रालय तन्ना हरीं ते ताकियर अनि केंद्रीय कमेटी मंत्रालय कुना जांच किया परवो आया। मंत्रि विभाग, ब्यूरो ना प्रधान लोरा जांच किया परवोर, विभाग कुना प्रधान लोरा जांच किया परवो आयनुर। संक्षिप्त ते वेहाना इत्तेके बोरे वेने जांच किया परवोर आयनुर। इद्रम आतेके स्वतंत्र राज्य वायर अनि सैकड़ों सामंती राजा लोरा जनम आया। तीसरी श्रेणी ता लोकर सिर्फ मुट्टा मेंडे मंतोर। ओरु सामूहिक नेतृत्व ता दृढ़ता ते विरोध कींतोर अनि हमेशा स्वतंत्र मंदाला आल्संतोर। पार्टी विचार तुन सुदृढ़ कीयाना निर्णय लोप्पा ठोस रूप ते जनवादी केंद्रीयता लोप्पा अनुशासन ता सख्त पालन कीयाना इंजी वेहताद मंता। इत्तेके अल्पमत बहुमत अनुसार मंदाना, मानेय संगठन अनुसार मंदाना, दोड़ ता स्तर पोरोटा स्तर अनुसार मंदाना अनि पूरा पार्टी केंद्रीय कमेटी अनुसार मंदाना (इदिना लोप्पा बहुमत तुन अल्पमत अनुसार तासतद मंता बारांकु इत्तेके इदु अल्पमत बहुमत ताए प्रतिनिधित्व कींता)। राय पेश कीयाना ता स्वागत कींतोम मति पार्टी एकता ता मोदोल कोय्यना उंदी वेल्ले लज्जा वायना लेक्कटा पोल्लो आंदू। सिर्फ गोहड़ी ता राजनीतिक अनुभव, विवेक पोरो आधार आसी पार्टी, राज्य ता नेतृत्व सही हरीं ते ताकसोर

मंदियार, पार्टी ता कैडर कुना एकता देगवा लेवा मंदियार इंजी गांरटी कियमूडांता।

इद सम्मेलन लोप्पा लयी शाओ-ची ओसो कामरेड तंग श्याओ-फिंग उचुक गलतिंग कीतोम इंजी वेहतोरा। बोरे वेने गलती कितास्के आत्मालोचना कीयाना जरूरी मंदिता, पेरेके-मुन्ने आयवा लेवा हर मानेय पार्टी ता जांच ओसो विभिन्ना स्तर ता पार्टी कमेटिंग ना नेतृत्व तुन स्वीकार कीयाना जरूरी मंता। इदु पार्टी कार्य कुन पूरा कियाला काजे उंदी मुख्य शर्त मंदिता। पूरा देश लोप्पा वेल्ले लोकुर अराजकाता पुट्टी कींतोर, ओरु पो ई-पो ना लेक्काने मंदिंतोर। राजनीतिक ओसो विचारधारात्मक रेंडासी रकम ते ओरा व्यवहार भ्रष्ट आसी मंदिता। अदिन काजे ओरा आलोचना कीयाना वेल्ले जरूरी मंदिता।

आखरी पोल्लो मावा काजे नम्रता, अध्ययनशीलता ओसो दृढता, साहसिक भावना तुन प्रोत्साहन हियाना जरूरी मंता।

माटु साहस, दृढता ते काम कीयाना जरूरी मंता। उदाहारण तुकू अमेरिका आक्रमण ता प्रतिरोध कीयाना ओसो कोरिया ता सहायता कीयाना युद्ध लोप्पा माटु अमेरीका साम्राज्यवाद ता मोरकुल पोरो देब्बा वाटतोम अनि ताना जीवा सांगी कीतोम। इदु मावा देश ता निर्माण काजे वेल्ले महत्वपूर्ण तत्व मत्ता। सबसे ज्यादा महत्वपूर्ण मावा शस्त्र ताकत इदिनिगडल फौलाद बनेमासी पेसता अनि मावा सैनिक लोर वीरता, कमांडर लोर समझादारी तोहतोरा। मावा मानेय नुकसान आतोर अनि मावा पैसा खर्च आतादु निज्जमे; माकिन कुर्बानी हिया लागता। मति माटु बलिदान हियाला बस्के वेरियोम; बेगा उंदी बेरा काम शुरू कीतोम अदिन पूरा कियवा लेवा विडसोम। मावा सिर्फ उंदे काउंटी-केंद्र पिसिस मत्तास्के वेने हू चुंग-नान शेनशी-कानसू-निंगश्या सीमा इलाका पोरो आक्रमण कितोर अस्के माटु सीमा इलाका ते डटेमासी मत्तोम। मर्रा आकिंग तिंजी पिसतोम मति हिम्मत हारेमायोम। मावा लोप्पा इद्रम ताए दृढता ओसो साहस मंदाना।

माटु अध्ययन कीयाना, अंहकार कीयानायो, दूसरोरा तिरस्कार कीयानायो। हंस ता मेस्कु कोर् मेस्कुन बाताले समझेमायोंग इंदान लेक्कटा तिरस्कार वैज्ञानिक हिल्ले। चीन उंदी बेहरा देश मत्ता, मना पार्टी उंदी बेहरा मंता मति माटु सुडला देशकु ओसो सुडला पार्टींग ना तिरस्कार कीयाना बदे कारण हिल्ले। माटु भाईचारा देश कुना जनता तल करियाला काजे हमेशा तैयार मंदाना ओसो असली अंतरराष्ट्रीय विचार तासना जरूरी मंता। मावा विदेशी व्यापार लोप्पा उचुन मुल घमंड तोहितोर ओरु खुद किन तीसमारखां समझेमाया मंतोर; इदु पोल्लो गलत मंता। पूरा पार्टी विदेश ते काम कीयाना कर्मचारि किन शिक्षित कीयाना जरूरी मंता। माटु मेहनत ते अध्ययन कीयाना, मेहनत ते काम कीयाना अनि समाजवादी औद्योगीकरण, समाजवादी बदलाव ता काम तुन 15 साल लोप्पा लेवेके इदिनकु उचुन ज्यादा टाईम ते बुनियादी रूप ते पूरा कीयाना। अस्के मावा शक्तिशाली आतास्के वेने माटु नम्रता तासना अनि करियाला काजे हमेशा तैयार मंदाना।

सातवी केंद्रीय कमेटी ता दूसरी पूर्ण अधिवेशन लोप्पा अधिवेशन प्रस्ताव लोप्पा रास्वा मत्ता नियमकुन वेने मानेमाताद मत्ता। अविना पहला जन्म दिवस मानेमायनायो। जन्मदिय्या मानेमातेके बोनाए पिस्वल बेरसो आंता। असल इतेके माटु मावा काम बेस कीयानादु महत्वपूर्ण मंदिता। दूसरा नियम उपहार हियानायो, कम से कम पार्टी लोप्पा इद्रम कीयानायो। तीसरा नियम कम से कम दाङ्गो पेश कीयाना। खास मौका ने दाङ्गो पेश कीयाना अनुमति हियमूङ्गंता। चौथा नियम कम से कम चपोटांग नेकिह कीयाना। जनता चपोटांग नेकिह कीयानास्के ओरकिन नेकिहला हियाना। पाँचवाँ नियम मानेय ना पोरोल ते जागा ता पोरोल तासनायो। छठी नियम चीनी कामरेड्स किन मार्क्स, एंगेल्स, लेनिन ओसो स्टालिन ना बराबरी ता दर्जा हियानायो। ओरा संगे मावा संबंध गुरु-शिष्य लेक्काने मंदाना। इव नियम कुना पालन कीयानाए असली नम्रता मंदिता।

सक्षिप्त ते माटु नम्रता तासना, करियाला तैयार मंदाना, दृढता ते काम कीयाना अनि सामूहिक नेतृत्व पोरो डटेमासी मंदाना जरूरी मंता। इद्रम

कीसीए समाजवादी बदलाव कार्य तुन पूरा कियमूडांता अनि समाजवाद तुन सफल कियमूडांता।

नोट

- 1) इदु पूना टैक्स-व्यवस्था दिसम्बर 1952 ते पेश किताद मत्ता अनि जनवरी 1953 ते लागू किताद मत्ता। तीना लोप्पा पोरो तुके “सार्वजनिक ओसो निजी कारोबार नडुमा समानता” ता पोल्लोंग किताद मंता मति असल ते निजी औद्योगिक वाणिज्यिक कारोबार ता टैक्स कम कीसी राष्ट्रीय, सहकारी कारोबार कुना टैक्स बेरसी किताद मंता। इद्रम अदु राष्ट्रीय, सहकारी कारोबार कुना हित कुन नुकसाल किता अनि पूंजीपति हित कुना सेवा किता। कामरेड माओ त्सेतुंग इदिना आलोचना किता उचुक दिय्यंग पेरके इद गलती सुधरे किताद मंता।
- 2) चांग च-शान बस्के ने चीनी कम्युनिस्ट पार्टी ता थ्येनचिन प्रिफेक्चर कमेटी ता सचिव मत्तोर। पूंजीपति वर्ग ता प्रभाव ते वासी ओरु बेहरा भ्रष्टाचारी बनेमातोर। “मूंड गलतिंग” विरोधी आंदोलन लोप्पा ओनकिन हौकना सजा दोरकता।
- 3) पाइना “मूंड गलतिंग” ना विरोध कीयाना आंदोलन 1951 ते भ्रष्टाचार, फिजूलखर्ची, नौकरशाही खिलाफ शुरू किता संघर्ष मत्ता। पूना “मूंड गलतिंग” ना विरोध कीयाना आंदोलन 1953 ते नौकरशाही, फरमानशाही खिलाफ, कानून, अनुशासन ता उल्लंघन कीयाना कार्रवाईंग खिलाफ शुरू किता संघर्ष मत्ता।
- 4) वीर प्रांतीय, स्वायत्त प्रदेशीय जन परिषद कुना एजेंसिंग लेक्का स्थापना किता कामिश्रर ऑफिस कुना प्रशासनिक प्रधान मत्तोर।

पूँजीवादी उद्योग ओसो वाणिज्य लोप्पा बदलाव ता सिर्फ उंदी हरीं³⁰

7 सितम्बर 1953

पूँजीवादी तुन समाजवाद ते बदले कीयाना काम राष्ट्रीय पूँजीवाद संगे पूरा आयारा।

- 1) हत्ता मूंड साल तुकू ज्यादा टाईम ते माटु इद इलाका लोप्पा उचुन काम किताद मंता मति दूसरा काम लोप्पा डटेमासी मत्तांकु हालानाचोन कोशिश किताद हिल्ले। इंजेटल माटु इदे दिशा ते वेल्ले कोशिश कीयाना।
- 2) हत्ता मूंड साल तुकू ज्यादा टाईम ता अनुभव पोरो आधार आसी निजी उद्योग-वाणिज्य ता समाजवादी बदलाव कार्य राष्ट्रीय पूँजीवाद संगे पूरा कीयाना उंदी तूलनात्मक नीति ओसो तरीका मंता इंजी वेहा परितोमा।
- 3) प्रोग्राम ता धारा 31¹ लोप्पा तय किता नीति तुन इंजे स्पष्ट रूप ते समझेमायना अनि अदिन सफल कीयाना। “स्पष्ट रूप ते समझेमायना” इत्तेके केंद्रीय, स्थानीय स्तर ता सब्बे नेतृत्वकारी लोकुरा विचार ते सबसे मुन्ने पूँजीवादी उद्योग, वाणिज्य ता बदलाव कियाला काजे ओसो समाजवाद बगिल दायना काम तुन पूरा कियाला काजे राष्ट्रीय पूँजीवादे उंदी हरीं मंता इंजी विश्वास मंदाना। इद समझदारी स्तर ते बोरे कम्युनिस्ट पार्टी सदस्य लेवेके बोरे

³⁰ 7 सितम्बर 1953 ते जनवादी पार्टींग, उद्योग, वाणिज्य लोप्पा उचुन प्रतिनिधिरा संगे किता विचार-विमर्श ता रूप रेखा।

जनवादी मानेय एवताद हिल्ले। वर्तमान मीटिंग² इदे उद्देश्य तुन पूरा कियाला काजे आया मंता।

- 4) दिमाग शांत तासिसी मुन्ने दायना जल्दबाजी ते आयो। पूरा देश ता निजी उद्योग, वाणिज्य तुन बुनियादी रूप ते राष्ट्रीय पूंजीवाद हरदे ओयला काजे कम से कम 3 तल 5 साल लागियर अदिन काजे वेरियना लेवेके परिशान आयना जरूरत हिल्ले।
- 5) संयुक्त राष्ट्रीय निजी व्यवस्था; राज्य सप्लाई कीयाना पूरा कच्चा माल ओसो तैयार माल तेहना तरीका पोयसी निजी कारोबार तुन कच्चा माल ता प्रोसेस कीयाना लेवेके तैयार कीयाना आदेश हियाना; राज्य पूरा आयवा ज्यादातर तैयार माल तेहना कॉन्ट्राक्ट कीसी आदेश हियाना। इवु राष्ट्रीय पूंजीवाद ता 3 रूप कुन निजी उद्योग कुना लोप्पा लागू कियमूडायर।
- 6) निजी वाणिज्य लोप्पा वेने राष्ट्रीय पूंजीवाद तुन लागू कियमूडांता। “इदिना बहिष्कार कीमूट” इंजी इदिन खारिज कियमूडायो। इदिना बारे ते मावा अनुभव सीमित मंता, वेल्ले अध्ययन कीयाना जरूरत हिल्ले।
- 7) निजी उद्योग, वाणिज्य लोप्पा लगभग 38 लाख मजदूर, दुकानदार काम कींतोर, राज्य ता उंदी बेहरा सम्पत्ति आंदु, राज्य ता अर्थव्यवस्था ओसो जनता ना पिस्वल लोप्पा वेल्ले बेहरा भूमि निभे कीतांग। अवु राज्य काजे माल सप्लाई कीयानाए आयवा पूंजी-संचय ओसो कार्यकर्ता-प्रशिक्षण वेने किया परिंतांग।
- 8) उचुन पूंजीपति तन्ना किन राज्य तुकू वेल्ले जेक तासिंतोर अनि मुनाफा तुन सबसे पोरो तासना तम्मा रुझान तुन बदले किताद हिल्ले। उचुन मजदूर वेल्ले जल्दी मुन्ने दाया मंतोर, पूंजीपतिर किन मुनाफा कमई कीयाना अनुमति हियाला आल्सोर। माटु इव रेंडासी रकम ता लोकुर किन शिक्षित कीयाना अनि ओरकिन राज्य ता नीति अनुसार तैयार कीयाना इत्तेके चीन ता निजी उद्योग, वाणिज्य तुन मुख्य रूप

ते राज्य ता अर्थव्यवस्था ओसो जनता ना पिस्वल ता सेवा कीयाना ओसो आंशिक रूप ते पूंजीपतिरा काजे मुनाफा कमई कियानोर बने कीयाना अनि राष्ट्रीय पूंजीवाद हरीं ते ओयना नीति अनुसार तैयार कियाला कोशिश कीयाना।

दोड़ बने कित्ता टेबल लोप्पा राष्ट्रीय-पूंजीवादी कारोबार ता मुनाफा ता बंटवारा ता विवरण पेश कित्ताद मंता:

आयकर	34.5 %
कल्याण निधि	15 %
संचित निधि	30%
पूंजीपतिर किन फायदा	20.5%
कुल	100.0%

- 9) पूंजीपतिर किन देशभक्ति ता शिक्षा हियाना काम जारी तासना जरूरी मंता। इद उदेश्य तुन पूरा कियाला काजे माटु योजनाबद्ध प्रशिक्षण संगे पूंजीपतिरा लोप्पाटल दूरदर्शी मत्ता ओसो कम्युनिस्ट पार्टी, जनताना सरकार कुना गरें वायला काजे तैयार मत्ता उचुन मुल किन तैयार कीसी ज्यादातर बाकी पूंजीपतिर किन समझे कीयाना।
- 10) राष्ट्रीय पूंजीवाद तुन लागू कीयाना काम सिर्फ जरूरी ओसो सम्भावना पोरो आधार आसीए आयवा पूंजीपतिरा इच्छा पोरो वेने आधार आसी मंदाना बारांकु इत्तेके इदु उंदी सहयोग ता काम आंदू उंदी सहयोग जोर-जबरदस्ती ता अनुमति हीवो। इद तरीका माटु जर्मीदार लोरा संगे लागू कित्ता तरीका तुकू अलग मंता।
- 11) हत्ता उचुक साल कुना लोप्पा मावा देश ता विभिन्न राष्ट्रीयतांग, जनवादी वर्ग, जनवादी पार्टिंग ओसो जन संगठन महत्वपूर्ण प्रगति कित्ता। नाकिन वायना 3-5 साल लोप्पा ओरु अवु वेल्ले प्रगति कींतांग इंजी विश्वास मंता। अदिन काजे 3-5 साल लोप्पा निजी उद्योग, वाणिज्य कुन बुनियादी रूप ते राष्ट्रीय पूंजीवाद हरीं ते ओयना

संभव मंता। राष्ट्रीय कारोबार ता प्रधानता इद काम तुन पूरा कियाला काजे उंदी भौतिक गारंटी मंता।

- 12) सम्पूर्ण संक्रमण काम तुन पूरा कीयाना सवाल लोप्पा राष्ट्रीय औद्योगिकरण, कृषि, दस्तकारी, पूंजीवादी उद्योग, वाणिज्य ता समाजवादी बदलाव तुन बुनियादी रूप ते पूरा कीयाना काम वातांग। अविन 3-5 साल लोप्पा आयवा बचोनो पंचवर्षीय योजनांग संगे पूरा कीयाना। इद सवाल ता बारे ते इदिन अनिश्चित काल एवनल हल कियवा तासना विचार ओसो जल्दबाजी संगे हल कीयाना विचार, रेंडासी ना विरोध कीयाना जरूरी मंता।
- 13) वरोर नेतृत्व कींतोर अनि दूसरोर नेतृत्व ते तार्कितोर; वरोर निजी हित तुकु जेक मंतोर अनि दूसरोर उंदी निश्चित मात्रा ते इंजे वेने निजी हित ता पेरेके तार्कितोर इंदान लेक्कटावु; इव रेंडासा ना लोप्पा इदे अंतर मंता। मति मना वर्तमान परिस्थिति ते निजी उद्योग, वाणिज्य मुख्य रूप ते राष्ट्रीय अर्थव्यवस्था, जनता ना पिस्वल ता (मुनाफा ता बंटवारा कीयानास्के कुल मुनाफा ता तीन चौथाई हिस्सा दोरकिंता) सेवा कींता। अदिन काजे माटु निजी कारोबार कुना मजदूर लोर किन समझे किया परिंतोम अनि ओरकिन ओरु राष्ट्रीय कारोबार ता मजदूर लोरा लेक्काने व्यवहार कीयाना समझे कीयाना। इत्तेके उत्पादन बेरसी कीयाना, बचत कीयाना, श्रम-प्रतियोगिता ताकी कीयाना, श्रम-उत्पादन बेरसी कीयाना, उत्पादन ता लागत घटे कीयाना, अदिन मात्रा ओसो गुण लोप्पा उन्नत कीयाना अनि राष्ट्रीय, निजी, श्रम ओसो पूंजी तुन फायदा आयाना लेक्का हूइना।

नोट

- 1) प्रोग्राम ता धारा 31 लोप्पा रास्ताद मत्ता: “राज्य ओसो निजी पूंजी संयुक्त रूप ते संचालित कारोबार राष्ट्रीय-पूंजीवादी कारोबार आंदू जरूरत आतास्के ओसो संभव आतास्के निजी पूंजी तुन राष्ट्रीय पूंजीवादी दिशा ते विकसित कियाला काजे इव तरिका ने प्रोत्साहित कीयाना। राष्ट्रीय कारोबार काजे प्रोसेसिंग काम कीयाना,

राज्य संगे संयुक्त कारोबार ता संचालन कीयाना लेवेके पट्टा ते राष्ट्रीय कारोबार ता संचालन कीयाना ओसो राष्ट्रीय साधन-स्रोत कुना दोहन कीयाना कीयाना लेक्कटावु।”

- 2) इगा 8-11 सितम्बर 1953 ते कित्ता राजनीतिक सलाहकार सम्मेलन ता राष्ट्रीय कमेटी ता स्थाई समिति ना 49वी मीटिंग ता बारे ते वेहताद मंता।

अमेरिका आक्रमण ता प्रतिरोध कीयाना ओसो कोरिया ता सहायता कीयाना युद्ध लोप्पा मना महान जीत ओसो मना वायना काम³¹

12 सितम्बर 1953

अमेरिका आक्रमण ता प्रतिरोध कीयाना ओसो कोरिया ता सहायता कीयाना युद्ध लोप्पा 3 साल पेरके माटु महान जीत दोरकी कित्तोमा इंजे युद्ध-विराम आता।

इद जीत बद्रम दोरकता? इंजे सदस्य लोर सही नेतृत्व मत्तांकु आता इंतोर। नेतृत्व इदिना उंदी कारण आंदू; सही नेतृत्व हिल्वा बदे वेने काम सफल आया परवो। मति असल इत्तेके माकिन इद जीत मना युद्ध उंदी लोक युद्ध मत्तांकु ओसो इदिना समर्थन पूरा जनता कीतांकु, तीना लोप्पा चीन ओसो कोरिया ता जनता हट्टा ते हट्टा काल्पसी लड़ेमातांकु दोरकता।

माटु अमेरिका साम्राज्यवाद संगे लड़ेमातोमा ताना कैदे माकिनकु बचोनो गुना बेसता हथियारकु मत्तांग मति माटु अदिन हारे कीतोम अनि युद्ध-विराम काजे मजबूर कीतोम। युद्ध विराम बारांकु संभव आता? पहली, सैनिक रूप ते अमेरिका आक्रमणकारी प्रतिकूल परिस्थिति ते मत्ता। अदु युद्ध विराम स्वीकार कियवेके ओरा पूरा युद्ध मोर्चा भंग आयर अनि सियोल कोरिया जनता ना कैदे वासी मनवड़ा इदु परिस्थिति हत्ता साल एही कालम ते दिसता।

³¹ केंद्रीय जन सरकार परिषद ता 24वी अधिवेशन ते भाषणा

युद्ध कीयाना रेंडासी पक्ष तन्ना-तन्ना युद्ध मोर्चा तुन उंदी कच्ची ता किला लेक्का समझेमातांग। मावा युद्ध मोर्चा निज्जमे उंदी कच्ची ता किला आंदू। मना सैनिक ओसो कार्यकर्ता लोरा समझदारी ओसो साहस संगे निंडसी मंतोर ओरु कुर्बानी हियाला वेरयोर। इदिना उलटा अमेरिका आक्रमणकारी सैनिक लोर हामुर तुकू वेरियंतोर अनि ओरा अफसर लोर जरूरत तुकू ज्यादा सख्त मंतोर, ओरा लोप्पा लचीलापन हिल्ले। ओरा युद्ध मोर्चा सुदृढ़ हिल्ले अदिन बदे वेने परिस्थिति ते कच्ची ता किला इनमूडायो।

मना पक्ष सामना कीसोर मत्ता समस्यांग लोप्पा सबसे पहली समस्या माटु लड़ेमाया परितो मा? ताना पेरके माटु मना मोर्चा ता बचाव किया परितोमे परवोम, माटु राशन-सप्लाई ता गारंटी किया परितोमे परवोम, माटु युद्ध तुन विफल किया परितोमे परवोम इंदान लेक्कटा समस्यांग मत्तांग। इव नालुंग समस्यांग कुन उंदी पेरके उंदी हल कीयाना। युद्ध ताकनास्के मना सेना शक्तिशाली आसोर हत्ता। इयेटा एद्दी कालम ते माटु दुश्मन ता 21 किलोमीटर लम्बा मोर्चाबंदी तुन सिर्फ उंदी घंटा लोप्पा ओहला तैयार आयना, सिर्फ उंदी केंद्रित हमला लोप्पा लाखों गोलांग वाटना अनि दुश्मन इलाका लोप्पा 18 किलोमीटर एवनल नेंगना। माटु इद्रमे लड़ाई जारी तासिस मत्तेके 2-3-4 हमलांग कीसी मत्तेके पूरा युद्ध-मोर्चा देगसी मनवड।

दूसरा राजनीतिक रूप ते मना दुश्मन वेल्ले अंदरूनी अंतरविरोध कुना सामना किया लागा मंता। बारांकु इत्तेके अविन हल किया परमूडायो अनि पूरा दुनिया ता जनता शांति ता मांग किया मंता।

तीसरा, आर्थिक रूप ते दुश्मन कोरिया पोरो आक्रमण कीयाना युद्ध लोप्पा वेल्ले धन खर्च किताद मत्ता अनि अदिना बजट लोप्पा आमदनी ओसो खर्च नडमा तालमेल खराब आसी मत्ता।

इवे सब्बे कारण कु कलियसी दुश्मन तुन समझौता काजे मजबूर कीतांग। इविना लोप्पा पहली कारण मुख्य मत्ता। अद लेवेके दुश्मन संगे युद्ध विराम कीयाना हल्को हिल्ला मत्ता। अमेरिका साम्राज्यवाद वेल्ले अक्खडू मंता; संभव आताचोन विचारशील पोल्लो मानेमायोर उचुन

विचारशील पोल्लो मानेमायला काजे सिर्फ लाचार आसिए तैयार आयमूडांता।

कोरिया युद्ध लोप्पा दुश्मन ता 10,90,000 मानेय नुकसान आतोरा। माकिन वेने कुर्बानी हिया लागता। मति मना नुकसान कुना संख्या वेल्ले कम मत्ता, माटु सुरंग बने कीतांकु वेने कम आता। लडाई संगेने माटु मजबूत आसोर हत्तोम। अमेरिका मना मोर्चाबंदी देहहा परवेके; माटु ओरा यूनिट कुन नष्ट कीतोम।

इंजे मीटु नेतृत्व ता बारे ते उंदी कारण ता लेक्का वेहतिरा। नावा हिसाब ते नेतृत्व उंदी कारण लेक्काने मंता, मति असल कारण जनता ना रक-रकम ता तरिकांग ना सुझाव हियानदु मंता। मना कार्यकर्ता लोर, सैनिक लोर लडेमायना वेल्ले तरिकांग परहकतोरा। इगा नन्ना उंदी उदाहरण हियाकान, युद्ध ता पहली महीना ते माटु वेल्ले बेहरा संख्या ते ट्रक कुना नुकसान किया लागता। इद्रम ता परिस्थिति ते माटु बाता किया परितोम? नेतृत्व सुझाव हीता तरीकांग लेवा माटु मुख्य रूप ते जनता सुझाव हीता तरिकांग पओरो आधार आसी मत्तोम। दस हजार तुकू ज्यादा मानेय नेशनल हाईवे ता रेंडासी बगिल तैनात किताद मत्ता। दुश्मन ता हवाई जहाज वात्तास्के ओरु गोलीबारी कीयाना चेतावनी हियानोर। इद चेतावनी केंजिसी मना ड्राइवर लोर तम्म ट्रक कुन दुश्मन तल बचे कीसी रोसानोर लेवेके अविन किन बदे सुरक्षित जागा ते मकिहचियानोर। इदिना संगे ने नेशनल हाईवे तुन बेरसी वेने किताद मंता अनि वेल्ले पूना नेशनल हाईवे ता निर्माण वेने कीतद मंता। इद्रम मावा ट्रक बेरोकटोक दायना-वायना कीयाना शुरू कीतांग। अदिना कारण ते मना ट्रक कुना नुकसान आयना शुरू आता। शुरू ते 40 प्रतिशत मत्ता पेरके 1 प्रतिशत तुकू वेने कम आता। पेरके वेने भूमिगत गोदाम ओसो भूमिगत सभा-भवन कुना निर्माण वेने किताद मत्ता। दुश्मन पओरोटल बमबारी कियानोर अनि माटु भूमि दोड मीटिंग कियानोरम। पेकिंग लोप्पा मंदाना लोकर कोरिया युद्ध भूमि ता बारे ते आल्सतेके ओरु अगा वेल्ले खतरा मंता इंजी जरूर आल्संत मंदानूर।

बदे ड़ावुट हिल्ला अगा खतरा जरूर मत्ता मति सब्बे तोर तरिकांग परहकतास्के अचोन खतरा हिल्ला मत्ता।

मावा अनुभव जनता पोरो आधार आसी, सही नेतृत्व संगे दोड़ स्तर ता साजो-सामान संगे बेसता साजो-सामान संगे लैस मत्ता दुश्मन तुन हारे किया परितोम इंजी मंता।

अमेरिका आक्रमण प्रतिरोध कीयाना ओसो कोरिया ता सहायता कीयाना युद्ध जीड़ना उंदी महान जीत ता वेल्ले महत्व मंता।

मुन्ने कोरिया जनता ना हट्टा ते हट्टा काल्पसी लड़ेमासोरे 38 वी सीमा रेखा एवनल वापिस हत्तोर अनि अगा डटेमासी मत्तोरा इदु उंदी वेल्ले महत्वपूर्ण पोल्लो मंता। माटु 38वी सीमा रेखा एवनल हनवेके मावा अग्रिम मोर्चा इंजे वेने यालू डोड्डा, थूमन डोड्डा पोरोने मत्तेके शनयांग, आनशान ओसो फूशुन ता जनता काजे उत्पादन कीयाना असंभव आयारा।

दूसरा माटु फौजी अनुभव दोरकीतोमा चीनी जन स्वयंसेवक लोरा स्थल सेना, वायु सेना, नौसेना तन्ना पैदल, तोपखाना, इंजीनियरी, टैंक, रेलवे, वायु-प्रतिरक्षा ओसो सिमनल कोर कुना संगे चिकित्सा, सैन्य-संचरण यूनिटकु अमेरिका आक्रमणकारी फौज कुना संगे लड़े मायना व्यवहारिक अनुभव कु दोरकतांग। इंजे माटु अमेरिका सशस्त्र सेनांग ना एम्बुश कीतोमा माटु इद्रम कीवेके मीटु ओरकिन वेरियसी मन्नेरिर। माटु ओरा संगे 33 महीनांग लड़ाई कीतोम अनि ओरा क्षमता ता जानकारी दोरकी कीतोम। अमेरिका साम्राज्यवाद वेल्ले वेरियाना लेक्का हिल्ले अदिन वेरियाना जरूरत हिल्ले। मावा अनुभव बदे ड़ावुट हिल्ला वेल्ले बहुमूल्य अनुभव मंता।

तीसरा, पूरा देश ता जनता ना राजनीतिक चेतना बुलंद कीयाना।

पोरो वेहता मूंड मुदांग लोप्पाटल चौथा मुदा वेने पेसिंता: चीन पोरो साम्राज्यावादी आक्रमण ता उंदी पूना युद्ध ओसो तीसरा विश्व युद्ध तुन रोमी क्तिताद मंता।

साम्राज्यवादी आक्रमणकारिण इंजे चीनी जनता संगठित आता, अदिन कंदरेह कीयाना हल्को हिल्ले इंजी समझेमायना। अदु होंग आतेके वेल्ले कठिन परिस्थिति वायारा।

दुश्मन संगे युद्ध शुरू कीतेके अदु इद्रम कीवेके वेने अदु जरूर तोड़फोड़ कीयाना कार्रवाईग कियाला काजे तम्मा खुफिया एजेंट लोहियरा थाइवान, हांगकांग ओसो जापान लेक्कटा जागा ने अदिन खुफिया विभाग कुना विस्तृत जाल फैलेमासी मंता। मति अमेरिका आक्रमण ता प्रतिरोध कीयाना ओसो कोरिया ता सहायता कीयाना आंदोलन ताकनास्के माटु बस्के एवनल जनता तुन गोलबंद कीसोर मंदाकोम, जनता पोरो आधार आसी मंदाकोम अस्के एवनल दुश्मन ता सामना कीयाना तरीका जरूर तेंडाकोम इंजी अनुभव दोरकी कीतोम।

नेंडु मावा परिस्थिति 1950 ते इरंगम कालम ता परिस्थिति तल अलग मंता। अस्के अमेरिका आक्रमणकारी 38वी सीमा रेखा ता दूसरा बगिल मत्तोर रा? हिल्ले, ओरु अगा हिल्ला मत्तोर। ओरु यालू डोड्डा ओसो थूमन डोड्डा ता दूसरा बगिल मत्तोर। माटु अस्के अमेरिका आक्रमणकारिण खिलाफ लड़ेमायना अनुभव मत्ता या? हिल्ले, माकिन इदिना अनुभव हिल्ला मत्ता। माटु अस्के अमेरिका सेना ता बारे ते पुंजी मत्तोमा? हिल्ले, माटु पुनवा मत्तोमा। इंजे परिस्थिति बदलेमाताद मंता। अमेरिका साम्राज्यवाद तन्ना पूना आक्रमणकारी युद्ध तुन रोमी कीवो अनि “नन्ना लड़ेमायकान!” इंता अस्के माटु मुन्ने 3 मुद्दांग कुना पोरो आधार आसी अविना मुकाबला किया परितोम। मति अदु “नन्ना लड़ेमायोन!” इत्तेके चौथा मुद्दा पैदा आंता। इदु वेने मना जनता ना जनवादी तानाशाही ता सबूत आंदू।

माटु दूसरोरा पोरो हमला कीतोमा? हिल्ले, माटु बोनाए पोरो वेने हमला कीवोम। मति दूसरोरा पोरो हमला कीतेके माटु ओरा मुकाबला कियाला काजे जरूर लड़ेमांतोम अनि आखरी जीत दोरकी कियाला लड़ेमांतोम।

चीनी जनता इद रुझान पोरो अविचल रूप ते नितसी मंता: माटु शांति स्थापना कियाला आल्लिसंतोम मति माटु युद्ध तुकू वेने वेरियोम; माटु रेंडासी परिस्थितिग काजे तैयार मंतोम। माकिन जनता ना समर्थन मंता। अमेरिका आक्रमण ता प्रतिरोध कीयाना ओसो कोरिया ता सहायता कीयाना युद्ध ताकनास्के मना जनता लोप्पा सेना ते भर्ती आयना होइ मत्ता। भर्ती ता शर्त वेल्ले कठिन मत्ता, सौ लोप्पाटल सिर्फ वरोरे चुनेमायनोरा लोकर इव शर्तकु बोरे तन्ना मियाइ काजे दामाद चुने कीयानास्के तासना शर्त किनकु ज्यादा सख्त मंतांग इंजी इंदानोरा अमेरिका साम्राज्यवाद ओसो उंदी बेरा युद्ध शुरू कीतेके माटु जरूर ओसो उंदी बेरा लडेमायकोमा

युद्ध लोप्पा धन खर्च आंता। मति अमेरिका आक्रमण ता प्रतिरोध कियाला ओसो कोरिया ता सहायता कीयाना युद्ध लोप्पा माटु वेल्ले धन खर्च किताद हिल्ले। युद्ध उचुन साल ताकतेकाई ताना लोप्पा उद्योग-वाणिज्य तल उंदी साल लोप्पा दोरकता टैक्स ता बराबर रकम वेने खर्च आताद हिल्ले। बदे डावुट हिल्ला माटु इद युद्ध किया लागवेके, इद धन खर्च किया लागवेके बेस आसी मनवइ। बारांकु इत्तेके नेंडु देश ता निर्माण कार्य काजे धन ता जरूरत मंता अनि किसान लोर किन इंजे वेने मुशिकल कुना सामना किया लागिता। हत्ता साल ओसो अदिनकु मुन्नेटा साल कृषि-कर उचुन ज्यादा मत्ता; अद्रमासी उचुन मुल किन वइकना मौका दोरकता। ओरु किसान लोरा हित कुना प्रतिनिधित्व कीसोर मत्ता लेक्का “जीवा कीयाना नीति” ता मांग कितोर। माटु ओरा इद राय तुकू सहमत मंतोमा? हिल्ले, माटु सहमत हिल्लेमा। अस्के माटु अमेरिका आक्रमण ता प्रतिरोध कीयाना ओसो कोरिया ता सहायता कीयाना युद्ध लोप्पा जीत दोरकी कियाला कोशिश कीसी हूइना मत्ता। बद पोल्लो किसान लोरा हित कु, पूरा देश ता जनता ना हित कुना हित ते मत्ता या? उचुन जोम मुशिकल कुना सामना ओसो जीइला काजे संघर्ष कीयाना? लेवेके अमेरिका आक्रमण ता प्रतिरोध कियवा मंदाना ओसो कोरिया ता सहायता कियवा मंदाना, इद धन तुन बचे कीयाना या? युद्ध लोप्पा जीइना ओरा हित ते मंता इंदाना लोप्पा बदे डावुट हिल्ले। युद्ध काजे धन ता जरूरत मत्ता,

अदिन काजे हत्ता साल ओसो अदिनकु मुन्नेटा साल माटु उचुन ज्यादा कृषि-कर वसूल कीतोमा इयेटा परिस्थिति अलग मंता। माटु कृषि-कर बेरसी किताद हिल्ले, अदिन सीमित किताद मंता।

“जीवा कीयाना नीति” ता सवाल लोप्पा बदे डावुट हिल्ला माटु इदिना पक्ष ते मंतोमा मति सबसे ज्यादा जीवा कीयाना नीति बाताल मत्ता? अमेरिका आक्रमण ता प्रतिरोध कीयाना ओसो कोरिया ता सहायता कीयाना। सबसे बेहरा जीवा कीयाना नीति लागू कियाला काजे माकिन कुर्बानी हिया लागिंता, धन खर्च किया लागिंता अनि कृषि-कर बेरसी कीसी वसूल किया लागता। उचुन ज्यादा कृषि-कर वसूल किताद मत्ता अदिन काजे उचुन मुल कोल्हार कींतोर अनि किसान लोरा हित कुना प्रतिनिधित्व कींतोम इत्तोर। नन्ना इद पोल्लो तुकू सहमत मंतान।

अमेरिका आक्रमण ता प्रतिरोध कीयाना अनि कोरिया ता सहायता कीयाना जीवा कीयाना नीति तुन अमल कीयाना आंदू। नेटा औद्योगिक निर्माण कीयाना वेने जीवा कीयाना नीति तुन लगागू कीयानादे आंदू।

जीवा कीयाना नीति रेंडु रकम ता मंता: उंदी जनता ना तात्कालिन हित कुना ध्यान तासिंता। दूसरा जनता ना दीर्घकालीन हित कुना राका कींता। अमेरिका आक्रमण ता प्रतिरोध कीयाना ओसो कोरिया ता सहायता कीयाना उद्योग कुना निर्माण कीयाना किता लेक्का। पहली नीति कम जीवा कीयाना नीति, दूसरा वेल्ले जीवा कीयाना नीति। माकिन इव रेंडासी रकम ता नीतिंग कुन सुरता तासना गलत आया। इंजे जीवा कीयाना नीति पोरो अमल कीयानास्के माटु वेल्ले उद्योग कुना निर्माण पोरो जोर हियाना। निर्माण काजे धन ता जरूरत मंता। अदिन काजे जनता ना पिस्वल सुधरे कीयाना जरूर मंता, मति इंजे अदिना लोप्पा वेल्ले सुधार किया परमूडायो। दूसरा पोल्लो माकिन जनता ना पिस्वल सुधरे कीयाना मति ताना लोप्पा वेल्ले सुधार कीयानायो; माटु जनता ना सुख-सुविधांग बगिल ध्यान हियाना, मति वेल्ले ज्यादा ध्यान हियानायो। वेल्ले जीवा कीयाना नीति ता जागा ते कम जीवा कीयाना नीति पोरो वेल्ले ध्यान हीतेके असल हरीं तल भटके मायमूडांता।

नेंडु उचुन दोस्त लोर कम जीवा कीयाना नीति पोरो उंदी बगिल जोर हींतोर; ओरु अमेरिका आक्रमण ता प्रतिरोध ओसो कोरिया ता सहायता कीयाना युद्ध कीयानायो इंजी आल्लिसंतोरा। इंजे माटु मावा वेल्ले उद्योग कुना निर्माण कीयानायो इंजी आल्लिसंतोमा। माटु इद गलत विचार ता आलोचना कीयाना। इद विचार कम्युनिस्ट पार्टी लोप्पा वेने मंता; येनान लोप्पा माकिन अदिना सामना किया लागता। 1941 ते शेनशी-कानसू-निंगश्या सीमा इलाका ते माटु रेंडु लाख तान¹ अनाज वसूल कीतोमा अस्के उचुन मुल कम्युनिस्ट पार्टी किसान लोरा पोरो ध्यान हीवो इंजी कोल्हार कित्तोर। पार्टी लोप्पा उचुन नेतृत्वकारी कार्यकर्ता लोर वेने जीवा कीयाना नीति लागू कीयाना समस्या पेश कित्तोर। नन्ना अस्के वेने इद्रम ता विचार कुना आलोचना कितान। अस्के सबसे बेहरा समस्या जीवा कीयाना नीति बद मत्ता? जापानी साम्राज्यवाद तुन खत्म कीयाना माटु किसान लोरगडल कम अनाज वसूल कीतेके माकिन आठवी राह सेना ओसो पूना चौथी सेना ता संख्या कम किया लागसी मनवड़ अनि इद पोल्लो जापानी साम्राज्यवाद ता हित ते मत्ता। अदिन काजे बोरू इद विचार पेश कित्तोर ओरु जापानी साम्राज्यवाद बगिल तल वड़का मंतोर ओराए सेवा किया मंतोर।

इंजे अमेरिका आक्रमण ता प्रतिरोध कीयाना ओसो कोरिया ता सहायता युद्ध बंद आता। अमेरिका ओसो उंदी बेरा युद्ध शुरू कीतेके माटु वेने ओसो उंदी बेरा लड़ेमायकोमा। अद परिस्थिति ते माटु किसान लोरगडल अनाज वसूल किया लागियर, किसान लोरा लोप्पा काम किया लागियर अनि ओरकिन समझे किया लागियर अनि ओरकिन तम्मा हिस्सा दान कियाला तैयार किया लागियर। इद्रम कितास्के ने किसान लोरा हित कुना असल सेवा आयार। कोल्हार कीयानादु असल इत्तेके अमेरिका साम्राज्यवाद ता सेवा कीयाना आंता।

इगा मुख्य ओसो गौण रेंडु रकम ता उसूल मंता। पूरा देश ता जनता ना पिस्वल स्तर हर साल उन्नत कीसोर दायना, वेल्ले कीयानायो। अदिन वेल्ले उन्नत कीतेके माटु अमेरिका आक्रमण ता प्रतिरोध ओसो कोरिया

ता सहायता युद्ध किया परवोम आसी मन्नोरोमा। कोरिया मोर्चा तुकू जरूत मत्ता चीज मना देश लोप्पा मत्तेके माटु अदिन हीताद मंता। हत्ता उचुन साल कुना लोप्पा माटु इद्रमे किताद मंता।

नोट

- 1) अनाज ता उंदी माप (शेनशी-कानसू-निंगश्या सीमा इलाका लोप्पा उंदी तान 150 किलोग्राम ता बराबर मत्ता), मति बाकी जागा ने अलग-अलग मत्ता।

ल्यांग शू-मिंग ना प्रतिक्रियावादी विचार कुना खंडन³²

16-18 सितम्बर 1953

- 1) श्री ल्यांग शू-मिंग वरोर “ईमानदार मानेय” मत्तोरा? ओरु शांति-वार्ता कीयानास्के बद्रम ता भूमिक निभे कितोर? श्री ल्यांग खुद किन वरोर “ईमानदार मानेय” वेहितोर। हांगकांग ता प्रतिक्रियावादी प्रेस श्री ल्यांग कुन मुख्य भूमि ता “सबसे ईमानदार मानेय” वेहिंता। थाइवान रेडियो-प्रसारण कुना लोप्पा वेने ओना बारे ते प्रचार कींता। माटु निज्जमे “ईमानदार” मंतरा? निज्जम मत्तेके मीटु मीवा पाइना पिस्वल ता बारे ते वेहाटू, मीटु कम्युनिस्ट पार्टी, जनता ना विरोध बद्रम कीतिर? मीवा कलम संगे लोकर किन बद्रम हौकतिर? हान फू-च्ची, च्यांग तुंग-सुन, छन ली-फू ओसो चांग छुन ना संगे मीवा संबंध बद्रम मत्तांग? वीर सब्बे तोर मीवा गरे ता दोस्त लोर मत्तोरा? नावो दोस्त लोर वेल्ले तोर हिल्लेरा। ओरु मीकिन वेल्ले मानेमांतोर, ओरु मीकिन श्री इंजी केयंतोर मति असल इत्तेके “डाकू” इंजी आरोप वाटितोर। मीटु बद पार्टी संगे मंतरि बद गुट संगे मंतरि इंजी नन्ना पुन्नोन! सिर्फ नन्नाए आयो वेल्ले लोकर वेने इद्रमे आल्संतोर।

³² 16-18 सितम्बर 1953 ते पेकिंग लोप्पा आता केंद्रीय जन सरकार परिषद ता 27वी अधिवेशन लोप्पा कामरेड माओ त्सेतुंग ल्यांग शू-मिंग ना आलोचना कीतादिना मुख्य अंश। इद अधिवेशन लोप्पा चीनी जन राजनीतिक सलाहकार सम्मेलन ता राष्ट्रीय कमेटी ता पेकिंग ते मत्ता सदस्य लोर वेने वासी मत्तोरा।

इंजे-इंजे ने प्रधानमंत्री चओ भाषण हीतांकु सब्बे तोर किन क्वोमिंगतांग संगे मावा रेंडु शांति-वार्ता ताकनास्के कमजोर परिस्थिति वात्तास्के श्री ल्यांग च्यांग कार्ई-शेक ना पूरा पक्ष एतितोर इंजी पुत्तिरा शांति-वार्ता काजे च्यांग कार्ई-शेक ना सहमती सिर्फ उंदी ढोंग मत्ता। नेंडु इगा मावा नड़मा मत्तोर लोप्पा शांति-वार्ता काजे पेकिंग वात्ता प्रतिनिधिर वेने मंतोर, ओरु सब्बेतोर च्यांग कार्ई-शेक निज्जमे शांति स्थापना कीयाना आल्संतोरा आल्सोर इंजी पुत्तोर।

असल इत्तेके च्यांग कार्ई-शेक लोक्कुर किन बंदूक संगे हौकतोर अनि ल्यांग शू-मिंग कलम संगे। लोक्कुर किन हौकना रेंडु तरिकांग मंतांगः उंदी बंदूक संगे अनि दूसरा कलम संगे। कलम संगे हौकनादु सबसे ज्यादा खतरनाक ओसो कवर ते मंजी उचुन वेने नेत्तुर पोह्वा लेवा हौकमूडांता। मीटु इद्रमे हौंकिंतिर।

ल्यांग शू-मिंग सौ प्रतिशत प्रतिक्रियावादीर आंदुर, मति ओरु ओनकिन वरोर आदर्श मानेय इंतोर। ओरु श्री फू च्वो-ई लेक्का हिल्लेरा। श्री फू च्वो-ई खुलेआम ओरु सौ प्रतिशत प्रतिक्रियावादी आंदुर इंजी स्वीकार कित्तोर, मति ओरु पेकिंग ता शांतिपूर्ण मुक्त ते जनता ना हित काजे योगदान हित्तोर। मीटु बाता योगदान कीतिर, ल्यांग शू-मिंग साहब? मीटु मीवा पिस्वलमेंड जनता ना हित ते बाता योगदान कीतिर? बातले हिल्ले, उचुन वेने हिल्ले। बोनकिन मीटु वेल्ले बेस वेहिंतिर ओरु शी श, वांग चाओ चुन किन वेने पेरके अरहा परितोर अनि यांग क्वेइ फेइ संगे वेने होइ वाटा परितोर।

2) ल्यांग शू-मिंग “पूना स्वर्ग ओसो पूना नर्क” ता बयान हित्तोर। ओरु “मजदूर पोरो पूना स्वर्ग ते ओसो किसान लोर दोइ पूना नर्क ते मंतोर” इंजी आरोप वाटतोर। “मजदूर तम्मा ट्रेड यूनिशन पोरो भरोसा किया परितोर, अनि किसान लोरा पोरो भरोसा किया परवोर, पार्टी, नौजवान संघ, महिला संघ पोरो भरोसा कियमूडांता; गुण ओसो परिमाण रेंडासी ना लोप्पा सब्बे स्तर ता दोइ मंता अनि उद्योग-

वाणिज्य महा संघ तुकू वेने लब्बड़ मंता। अदिन काजे नाकिन इदिना पोरो विश्वास हिल्ले।” इदु पोल्लो तुन “आम कार्यदिशा ता समर्थन” इनमूडांता या? हिल्ले! इदु सौ प्रतिशत प्रतिक्रियावादी धारणा आंदू; इदु उंदी प्रतिक्रियावादी प्रस्ताव आंदू, उंदी सही प्रस्ताव आयो। जनताना सरकार इद्रम ता प्रस्ताव स्वीकार किया परिंता या? नावा हिसाब ते इद्रम किया परवो।

- 3) श्री ल्यांग “योजनांग ना बारे ते वेल्ले जानकारी” हियाना इंजी वेहतोरा। इदिना नन्ना विरोध कींताना। इदिना उल्टा माटु श्री ल्यांग लेक्काटोर किन गोपनीय पोल्लोंग वेल्ले कम वेहाना; बचोन कम जानकारी हींतोम अचोने बेस आंता। ल्यांग शू-मिंग भरोसा कीयाना लेक्कटा मानेय आयोर। माटु बाकी लोकर किन गोपनीय पोल्लोंग वेहा परिंतोम मति मीकिन आयोर। जनवादी पार्टी ता सीमित मीटिंग कितास्के ल्यांग शू-मिंग किन शामिल कीयाना जरूरत हिल्ले।
- 4) श्री ल्यांग माटु ओरकिन गैर-प्रगतिशील तत्व कुना श्रेणी ते तासनायो इंजी अपील कित्तोर। इदिना बारे ते माटु बाता कीयाना? नावा हिसाब ते माटु सतर्क मंदाना अनि आल्सवा लेवा ओनकिन मान्यता हियानायो। लेवेके माटु धोखा तिंतोम।
- 5) श्री ल्यांग तन्ना उंदी वेल्ले बेसता फोटी पिडंगतोर। ओरु बचोना शताब्दी मुन्ने ने देश ता योजनाबद्ध निर्माण कीयाना सपना हूडतोर, इदु ओना अनुसार नवजनवाद लेवेके समाजवाद ता वेल्ले गरे मंता इंतोर। अदु निज्जमे वेल्ले बेस मंता या? इद्रम हिल्ला लेक्का मंता। नन्ना ओनकिन वेल्ले बेस पुत्तान, बस्के ओरु कलियंतोर अस्के नन्ना ओना आलोचना कींताना उंदी बेरा नन्ना ओना मुन्ने “नन्ना मीवा माल पोरो बस्के ने विश्वास कीवोन” इत्ताना ओना सब्बे पोल्लोंग “चीन लोप्पा वर्ग ता अस्तित्व हिल्ले”, “चीन ता समस्या उंदी सांस्कृतिक समस्या आंदू”, “उंदी पारदर्शी सरकार”¹ मंदाना अनि

“चीनी क्रांति ता कारण सिर्फ बाहरी मंता अंदरूनी हिल्ले” इंदान लेक्कटवु शामिल मंतांगा। इंजे “पूना स्वर्ग ओसो पूना नरक”, “कम्युनिस्ट पार्टी किसान लोर किन विडसताद मंता” अनि “उद्योग-वाणिज्य महा संघ ता तुलना ते कम्युनिस्ट पार्टी वेल्ले विश्वास कीवो” इंदाना ओना महान पोल्लोंग कुन वेने जोड़े कीयाना। इव सब्बे पोल्लोंग नावा विश्वास जीड़ा परवोंग! नन्ना चीन ता विशेषता उंदी अर्ध औपनिवेश ओसो अर्धसामंती देश मंता इंतान। मीटु इदिन पुनविर अदिनके साम्राज्यवाद, सामंतवाद ता सहयता कीतिरा। अदिनके मीवा माल पोरो बोरे विश्वास कीवो। जनता कम्युनिस्ट पार्टी पोरो विश्वास कीता। प्रतिक्रियावादीर ओसो लेस्किस् मत्ता दिमाग वालेर किन विडचसी मीवा पोल्लोंग केंजानोर, मीवा पुस्तकिंग बोरे पढेमायो। इदे आयवा ल्यांग साहब च्यांग काई-शेक ना वेने विरोध कीवा लेक्का मंतोर। नेंड एवनल ओरु च्यांग काई-शेक ओसो ओना प्रतिक्रियावादी क्वोमिंगतांग ता विरोध किताद हिल्ले। नन्ना ओरा बदे लेख पढेमाताद हिल्ले ओसो ओरा बदे पोल्लो वेने केंजताद हिल्ले। अदिन काजे मीटु इदिना पोरो आल्सना इंजी मीवा मुन्ने इद सवाल पेश कीतान। इद्रम तोर किन जनता ना राज्य तन्ना योजनांग ओसो बाकी गोपनीय पोल्लोंग ना बारे ते वेल्ले जानकारी हियाना इंजी अपील कीयाना अधिकार मंता या? नावा हिसाब ते ओरकिन अधिकार हिल्ले। माटु ओना अपील मानेमायनायो।

- 6) श्री ल्यांग माटु ओरकिन प्रगतिशील तत्व लेवेके क्रांतिकारी श्रेणिंग लोप्पा तासना, गैर-प्रगतिशील तत्व, प्रतिक्रियावादिरा श्रेणी ने तासनायो इंजी वेने अपील कित्तोर। इदु “क्षमता तय कीयाना” समस्या आंदु, इदिन बद्रम हल कीयाना? पोरो चर्चा कित्ता परिस्थिति ता वेहच ते माटु ओनकिन प्रगतिशील तत्व लेवेके क्रांतिकारी तत्व कुना लोप्पा तासा परितोमा? ओना लोप्पा प्रगतिशीलता बेगा मंता, ओरु क्रांति लोप्पा बस्के शामिल आतोर? अदिन काजे माटु ओना

इद अपील तुन तुरंत मानेमायोम। माटु मुन्ने बाताल आंता इंजी हर्ी हूइना।

- 7) हत्ता साल नाकिन बचोनो लोकुरा बचोनो चिडिंग दोरकतांग अविना लोप्पा कम्युनिस्ट पार्टी प्रतिक्रियावादीरा संगे सहयोग बारांकु कींता इंजी सवाल कित्तोर। प्रतिक्रियावादिरे इत्तेके (सरकारी कर्मचारिरे किन हियाना न्यूनतम जरूरत कुना कमी मत्ता) समाचार पत्र लोप्पा, सार्वजनिक मौका ने साम्राज्यवाद, सामंतवाद, च्यांग काई-शेक ओसो ओरा प्रतिक्रियावादी क्वोमिंगतांग ता विरोध कित्ताद हिल्ले। मुख्य रूप ते वीरु च्यांग काई-शेक ना विरोध कीवोर अदिन काजे थाइवान ता रेडियो-प्रसारण ओसो हांगकांग ता समाचार पत्र कुना लोप्पा वीरा बारे वेल्ले बेस-बेस तोहमूडांता; अविना लोप्पा वीर किन बस्केने रांगमूडायो। वीरु भूमि पोरो “सबसे ज्यादा इमानदार मानेय” आंदुर इंजी इंतोर। ल्यांग शू-मिंग इद्रम तोरा लोप्पटल वरोर आंदुर। मति दूसरा बगिल मावा उचुन दोस्त लोर इद रेडियो-प्रसारण ओसो समाचार पत्र वेल्ले गलत प्रचार कींतोर। बदे डावुट हिल्ला थाइवान विचार कीयाना लोकुर वेल्ले कम मंतोर मति वेल्ले ध्यान हियाना लेक्का मंतोर। उचुन मुल नेंडु वेने च्यांग काई-शेक ना खिलाफ उंदी वेने पोल्लो वडकवा लेवा मंडाला आल्संतोर। साम्राज्यवाद खिलाफ रेंडु-मूड पोल्लोंग वडकला ओरकिन बाताले आयो। प्रेस लेवेके सार्वजनिक स्टेटमेंट कुना लोप्पा ओरु हत्ता कालम ता चर्चा कीयाना साहस कीवोर बारांकु इत्तेके इंजे वेने जीवा ते हत्ता कालम तुन पोयसी तासिंतोर। नन्ना इद्रम तोरा संख्या वेल्ले मंता इंजी आल्संताना। देशभक्ति मूड रकम ता मंता: असली देशभक्ति, नकली देशभक्ति ओसो दुलमुल देशभक्ति। हर मानेय ओरु बद्रम ता देशभक्ति लोप्पा वांतोर इंजी पुत्तोर, ल्यांग शू-मिंग खुद वेने इद पोल्लो बेसे पुत्तोर। माटु साम्राज्यवाद, थाइवान गिरोह तल संबंध देहतोर, ओरु बचोन पेरेके अरसी मत्तेकाई ओरा सब्बे तोरा स्वागत कींतोम। इद्रम तोरे असली

देशभक्त मंतोर। नकली देशभक्त लोर तम्मा चेहरा ते उंदी सुंदर मास्क केरसी मंतोर; मति अंदरूनी ओसो अलग मंतोर। दुलमुल तत्व तीसरा रकम तोर मंतोर; ओरु वडिय वात्ता लेक्का काम कींतोर। तीसरी विश्व युद्ध आयवेके च्यांग काई-शेक वापिस हनवेके कम्युनिस्ट पार्टी संगे मुन्ने दांतोर। तीसरी विश्व युद्ध आतेके ओरु मना कार्रवाईंग पोरो वेने आल्सना शुरू कींतोर। वीर मूंड रकम ता लोकरा लोप्पा बद्रम तोरा संख्या वेल्ले मंता? असली देशभक्त लोरा संख्या वेल्ले मंता। असली देशभक्त लोरा संख्या हत्ता उचुक साल कुना लोप्पा बेरसता अनि दुलमुल देशभक्त लोरा अल्पसंख्या ते मंतोर। नकली देशभक्त लोर सिर्फ मुट्टामेंडे मंतोर मति ओरा अस्तित्व इंजे वेने मंता। इद सही मंता या हिल्ले मीटु आल्सा परितिर।

- 8) नन्ना ल्यांग शू-मिंग किन उंदी काम कीयाना इंजी आल्संताना ओना काम “किसान लोरा प्रतिनिधित्व” कीसी जनताना सरकार तल “ओरा मुक्ति काजे अपील” कीयानाए आयवा ओरु तम्मा जनविरोधी प्रतिक्रियावादी विचार कुना बचोनो साल कुना विकास ता बारे ते स्पष्ट रूप ते वेहाना इंजी अपील कीयाना। ओरु स्पष्ट रूप ते हत्ता कालम ते ओरु जमींदार लोरा प्रतिनिधित्व कीसोरे कम्युनिस्ट पार्टी ओसो जनता ना विरोध बद्रम कित्तोर, इंजे ओरु जमींदार लोरा प्रतिनिधित्व कीयाना विडचसी “किसान लोरा प्रतिनिधित्व कीयाना” रुझान बद्रम लागू कींतोर। ओरु इद बदलाव ता बारे ते स्पष्ट कीसी लोकरा विश्वास जीडना अस्केने ओनकिन बद श्रेणी ते तासना इंजी निर्णय किया परितोम। ओना व्यवहार लोप्पा प्रतिक्रियावादी रुझान बदलेमायना लेक्का दिस्सो। मति पेशेंट किन बचे क्रियाला काजे ओना बीमारी ते इलाज कीयाना उद्देश्य ओरकिन तम्मा गलति पोरो आल्सला काजे टाईम हियाना अनि ओना बारे ते बदे निर्णय कियवा लेवा इद काम राजनीतिक सलाहकार सम्मेलन ता राष्ट्रीय कमेटी तुन सौंपे कीयाना इंजी सुझाव हींताना।

9) “हर मानेय लोप्पा लज्जा मंदिता”² बोनिगा लज्जा हिल्ले ओनिगडल बाताले आशा कियमूडायो। श्री ल्यांग किसान लोरा समस्या ना बारे ते ओरु कम्युनिस्ट पार्टी तुकू ज्यादा विवेकशील मंतोर इंतोर। ओना इद पोल्लो पोरु बोरे विश्वास किया परितोर। इदु शिल्प-शिरोमणी लू पान ना मुन्ने बढई मत्ता लेक्का तोहना कोशिश कींतोर। उदाहरण तुकू बोरे “माओ त्सेतुंग भूमिका निभे कियाला श्री मेई लान-फान किनकु वेने ज्यादा निपुण लेवेके सुरंग तरवला जन स्वयंसेवक लोरकिनकु, हवाई जहाज ताकि कीयाना वायु सेना ता वीर चाओ पाओ-थुंग किनकु वेने ज्यादा निपुण मतेके” इदु वेल्ले लज्जा हिल्ला लेक्का मंता। अदिन काजे श्री ल्यांग तेहता सवाल गंभीर मत्ता लेक्का मंता ओसो हिल्ले वेने मति झूठ मंता। ओरु किसान लोरा प्रतिनिधित्व कियाला कम्युनिस्ट पार्टी तुकू ज्यादा बेस मंतोर इत्तोर; इदु झूठ मंता। इस्सल वेल्ले लोकुर “किसान लोरा प्रतिनिधि” बनेमासी वेलियंतोर। ओरु बोना प्रतिनिधित्व कींतोर? ओरु किसान लोरा प्रतिनिधित्व किंतोर? नाकिन ओसो किसान लोर किन ओरु किसान लोरा प्रतिनिधित्व कित्ता लेक्का दिस्सोर। ओरु जर्मीदार वर्ग ताए प्रतिनिधित्व कींतोर अनि ओनाए हित कुना सेवा कींतोर। ओरा लोप्पा सबसे प्रमुख मानेय ल्यांग शू-मिंग आंदुर। वीरु तम्मा मिंगता-मिंगता पोल्लोंग कीसी दुश्मन ता मदद कींतोर। ओरा लोप्पा बाकी मानेय लेस्कता दिमाग वालेर वेल्ले बकवल लेक्का पोल्लोंग कींतोर मति ओरु देशभक्त मंतोर अनि ओरु चीन पोरु जीवा कींतोर। वीरु उंदी रकम ता तोर आंदुर। दूसरा रकम तोर ल्यांग शू-मिंग लेक्काटोर मंतोर। ओराए लेक्का “किसान लोरा प्रतिनिधित्व” कीयाना ढोंग कियानोर वेने मंतोर। धोखा हियानोर जरूर मंतोर माटु इंजे ओरा सामना किया मंतोम। वानर राज सुन ऊ-खुंग अलग-अलग रूप एता परितोर मति ओनकिन मुशिकल कुना सामना किया लागिंता; ओरु तम्मा तोका बद्रम बदले कीयाना इंजी पुन्नोर। उंदी बेरा ओरु उंदी मंदिर लेक्का बनेमातोर अनि तन्ना तोका उंदी झंडा

लेक्का बनेमाता। मति भगवान सैनिक यांग अङ्ग-लांग ओना षडयंत्र कुन चीनेमातोर। ओरु इद्रम बारांकु किया परतोर? बारांकु इत्तेके ओरु वानर राज ता तोका तुन चीनेमातोर। असल ते उंदी रकम तोर बदे वेने रूप एतितेकाई तम्मा तोका बस्केने मकिह किया परवोर आंतोर। ल्यांग शू-मिंग वरोर पाखंडी मानेय मत्तोर। ओरु राजनीति लोप्पा इंटेरेस्ट हिल्ले इंतोर, अफसर बनेमायोम इंतोर ओरु असल इत्तेके बोल्लिंतोर। ओरु असल ते “नाहकुना निर्माण” ता काम किया मंतोर, ओरु बद्रम ता “नाहकुना निर्माण” मत्ता? अदु असल इत्तेके जमींदार लोरा काजे निर्माण मत्ता, नाहकुना ता ध्वस्त ओसो राष्ट्रीय सर्वनाश मत्ता!

- 10) ओरा संगे वाद-विवाद मना बेसता रुझान लागू कीयाना अंगङ्गम मंता। मीटु ओरा संगे वाद-विवाद कीसी बदे समस्या हल किया परविर बारांकु इत्तेके ओरु तर्क कियवा सिर्फ बोल्लिंतोर। अदिन काजे नन्ना ओरा समस्या तुन राजनीतिक सलाहकार सम्मेलन ता राष्ट्रीय कमेटी तुन सौंपे कीयाना अनि वाद-विवाद कीयाना इंजी सुझाव हींताना संगेने नन्ना मीकिन इदिना असल समाधान ता आशा कियामाटू इंजी चेतावनी हींताना इत्तेके “विचार-विमर्श पेरके वेने बदे निर्णय आयो आयार, बदे निर्णय आयवेके अदिना पोरो अमल कियमूडायो आयार अनि चर्चा अंगङ्गम आयार।” इद्रम आतेक वेने मना मीकिन माटु चर्चा कीसी हूङ्गना इंजी सुझाव हींतान, बारांकु इत्तेके इद्रम कियानदु ओरा बोल्लुङ्ग केंजला काजे “इरवुर-मुव्वुर किन” लोहना तुकू ज्यादा बेस आयार।
- 11) माटु ओरा संगे संबंध देहला दाया मंतोमा? आयो, बस्के एवनल ओरु मावा संगे संबंध तासिंतोर अस्के एवनल माटु वेने ओरा संगे संबंध तासला तैयार मंतोमा। नन्ना इंजे वेने राजनीतिक सलाहकार सम्मेलन ता दूसरा पूर्ण अधिवेशन ते ओरु राष्ट्रीय कमेटी ता सदस्य चुने कीयाना इंजी आशा कींतान। बारांकु इत्तेके नेंडु वेने हल्कोए धोखा

तिंदाल लेक्काटोर मंतोर। ओरु इंजे वेने सही भूमि निभे किया परितोर। ओरु बस्के एवनल तम्मा प्रतिक्रियावादी विचार कुना प्रचार-प्रसार कियाला काजे राजनीतिक सलाहकार सम्मेलन मंच ता प्रयोग कीयाना तम्मा विचार त्याग कीवोर अस्के एवनल दोबार चुने मायना लेक्क मंदानूर।

नन्ना इंजे वेहता लेक्का ल्यांग शू-मिंग बदे योगदान कीवोर। ओरु उद्योगपतिर ओसो व्यापारिरा लेक्काने मावा काजे उत्पादन उपलब्ध कींतोर अनि माकिन तना कमाई पोरु टैक्स हींतोर। हिल्ले इद्रम कीवोर। ओरु उत्पादन ता विकास कींतोर अनि अर्थव्यवस्था तुन समृद्ध कींतोर। हिल्ले ओरु इद्रम कीवोर। ओरु बस्केने विद्रोह कीतोर। हिल्ले, बस्के ने कीवोर। ओरु बस्केने च्यांग काई-शेक, साम्राज्यवाद ता विरोध कीतोर। हिल्ले, ओरु बस्केने साम्राज्यवाद, सामंतवाद ता तख्ता पलट कियाला चीनी कम्युनिस्ट पार्टी संगे एकता कीतोर। हिल्ले, ओरु इद्रम किताद हिल्ले। इत्तेके ओरु बदे वेने योगदान हीताद हिल्ले।

वीरु अमेरिका आक्रमण ता प्रतिरोध कीयाना ओसो कोरिया ता सहायता कीयाना आंदोलन लेक्का महान संघर्ष कुना वेने समर्थन कीवोर। इद्रम मत्तेकाई ओरु राजनीतिक सलाहकार सम्मेलन ता राष्ट्रीय कमेटी ता सदस्य बद्रम चुनेमातोर? ओनकिन चीनी कम्युनिस्ट पार्टी इद कमेटी ते बारांकु चुने किता? इदिना कारण इंजे वेने उचुन मुल धोखा हिया परितोर इंजी मंता, ओरा लोप्पा इंजे वेने चालाकी मंता। धोखा हियाना ओरा पहचान आंदु अनि इदे ओरा पूंजी आंदू।

ल्यांग शू-मिंग ना हिसाब ते बोर ओनकिन सही मानेमांतोर ओना लोप्पा “बेहरा जीवा” मंता इंतोर अनि बोरु इद्रम कीवोर ओना लोप्पा जीवा हिल्ले इंतोर। इद्रम ता “बेहरा जीवा” मावा लोप्पा हिल्ले बहे। मति मावा लोप्पा ल्यांग शू-मिंग साहब किन राजनीतिक

सलाहकार सम्मेलन ता राष्ट्रीय कमेटी सदस्य लेक्का तासनाचोन
“बेहरा जीवा” ता जरूरत हिल्ले।

12) नावा हिसाब ते कनफ्यूशियस ना लोप्पा जनवाद पोरो अमल कीवा मंदानादु मत्ता अनि ओना लोप्पा आत्मालोचना कीयाना ता कमी मत्ता। इदिना बारे ते ल्यांग ना संगे वेल्ले कलियनादु। कनफ्यूशियस “इंजेटल नन्ना च लू किन तन्ना शिष्य बने कितास्के नन्ना नावा आलोचना बस्केने केंजा लागो”³, ओना विद्यालय “मूंडू बेरा शिष्य लोरा संगे निंडसी मत्ता अनि मूंडू बेरा खाली आता”⁴, ओरु “तन्ना पद पोयता पेरके सिर्फ मूंडू महीनांग लोप्पा शाओचंग माओ किन हौकतोर”⁵ ओरु वरोर निरंकुश शासक लेक्का मत्तोर अनि ओना व्यवहार फासीवाद लेक्का। नन्ना नावा दोस्त, ओसो ल्यांग साहब, कनफ्यूशियस ना हर्दे ताकिंतोर, मीटु इद्रम कीवेके वेल्ले बेस आयार इंजी आशा कीतान।

13) श्री ल्यांग ना प्रोग्राम अमल कीतेके चीन लोप्पा लोप्पा समाजवाद वायना संभव हिल्ले अनि मावा पार्टींग (कम्युनिस्ट पार्टी ओसो दूसरा पार्टींग), मावा राज्य तुन नुकसान ता सामना किया लागसी मनवड। ओरा कार्यदिशा उंदी पूंजीवादी कार्यदिशा मत्ता। पो ई-पो ना गलती मना पार्टी लोप्पा पूंजीवादी विचार कुन लागू कीयानादु मत्ता। मति पो ई-पो ल्यांग शू-मिंग किन ज्यादा बेस मंता।

ल्यांग शू-मिंग मजदूर “पोरो पूना स्वर्ग ते मंतोर” अनि किसान लोर “दोडू पूना नरक ते मंतोर” इंतोर। असल इत्तेके ओरा नडमा अंतर मंता, किसान लोरा तुलना ते मजदूर लोरा आमदनी उचुन ज्यादा मंता; भूमि सुधार पेरके किसान लोर किन जमीन ओसो लोन दोरकता अनि ओरा पिस्वल सुधरेमासोर हत्ता। उचुन किसान लोरा परिस्थिति मजदूर लोर किनकु ज्यादा बेस मंता। उचुन मजदूर इंजे वेने मुशिकल ते मंतोर। आमदनी बेरसी कियाला किसान लोरा मदद कियाला काजे बद्रम ता तरीकांग लागू कित्तोर? मीवगा बदे सुझाव मंता या, ल्यांग शू-मिंग साहब? मीवा हिसाब

ते “गड़बड़ वस्तु ता कमी ता कारण ते आयो वितरण ता असमानता ता कारण ते आंता।”⁶ मीटु किसान लोर उत्पादन कीसी तम्मा आमदनी बेरसी कीयाना इंजी आल्सविर। मीटु मजदूर ओसो किसान लोप्पा आमदनी समानता तत्ताला काजे मजदूर लोरा आमदनी ता उंदी हिस्सा किसान लोर किन हियाना इंजी आल्संतर। मीवा हिसाब ते काम कीतेके चीन ता उद्योग-धंधा खत्म आयर। मजदूर लोरा आमदनी ता उंदी हिस्सा तुन इद्रम वितरित कीयाना इतेके मावा राज्य ओसो मावा पार्टिंग कुन विनाश बगिल ओंता। अद्रमासी सिर्फ कम्युनिस्ट पार्टी ताए विनाश आयर, जनवादी पार्टिंग ना वेने विनाश आयार इंजी आल्समाटु। मीटु मजदूर “पोरो पूना स्वर्ग ते मंतोर” इतेके मीटु बद स्वर्ग ते मंतरि, ल्यांग शू-मिंग साहब? मीटु पोरो सबसे पूना स्वर्ग ते मंतरि, पूना तुकू पूना स्वर्ग ते मंतरि, बारांकु इतेके मीटु मजदूर लोर किनकु बचोनो ज्यादा तनख्वाह दोरकी कींतिर! मति मीटु सबसे मुन्ने मीवा वेतन ते आयवा मजदूर लोरा मजदूरी कम कीयाना प्रस्ताव पेश कींतिर। नन्ना इदिन सही समझेमातांन। मीटु सही व्यवहार कीतेके सबसे मुन्ने मीवा वेतन कम कीयाना, बारांकु इतेके मीटु “पूना स्वर्ग” तुकू बचोनो ज्यादा पोरो मंतरि! हत्ता मूंड दशक किनकु ज्यादा टाईम तल मना पार्टी मजदूर-किसान एकता ता समर्थन कीसोर वात्ता। मार्क्सवाद-लेनिनवाद मजदूर ओसो किसान एकता ओसो सहयोग ताए समर्थन कींता। चीन लोप्पा रेंडु रकम ता एकता मंता: उंदी मजदूर वर्ग ता किसान लोरा संगे एकता, दूसरा मजदूर वर्ग ता पूंजीपति, प्रोफेसर, वरिष्ठ तकनीशियन, मना पक्ष ते वायना क्वोमिंगतांग जनरल, धार्मिक नेताल लोर, जनवादी पार्टिंग ओसो निर्दलीय जनवादी लोकुरा संगे एकता। रेंडासी एकता जरूरी मंता। इव रेंडासी ना लोप्पा बद एकता आधार अनि बद प्राथमिक महत्व ता मंता? इदु मजदूर वर्ग ता किसान लोरा संगे एकता। ल्यांग शू-मिंग मजदूर-किसान एकता बरबाद आता अनि राष्ट्रीय निर्माण ता आशा हिल्ले इंतोर। दूसरा माटा ने ल्यांग शू-मिंग ना राय मानेमातेके मजदूर किसान एकता सफल आयना लेक्का हिल्ले, राष्ट्रीय निर्माण सुचारू रूप ते ताका परवो अनि समाजवाद ता वेने बद आशा मन्ने

आयार! बदे डावुट हिल्ला बदे “मजदूर-किसान एकता” ता ल्यांग शू-मिंग समर्थन कींतोर अद सफल आयना ता बदे आशा हिल्ले। मीवा कार्यदिशा पूंजीवादी कार्यदिशा आंदू। मीवा कार्यदिशा लागू कीतेके चीन ता विनाश आयर चीन उंदी अर्ध-औपनिवेशिक, अर्ध-सामंती पाडना हरीं ते मलसी दांता, पेकिंग ते च्यांग काई-शेक ओसो आइजनहावर ता स्वागत कियाला काजे रैली कियमूडायर। नन्ना ओसो उंदी बेरा वेहिंतांनः माटु मीवा कार्यदिशा तुन इनपडे लागू कीवोम! ल्यांग शू-मिंग माटु बस्केटल शहर ते नेंगतोम अस्केटल नाकुनोर किन “मरंगतोम” अनि ओरा लोप्पा उंदी “दूरी” वांता इंजी गटिंग वेहितोर। इदु असल इत्तेके हौंग पुट्टि कीयाना कोशिश आंदू। हत्ता मूंड साल लोप्पा माटु मना मुख्य ताकत तुन नाहकुना काम कियाला वाटतोम। सिर्फ इयेंडे माटु मना मना नेतृत्वकारी कार्यकर्ता लोरा उंदी बेहरा संख्या शहर लोप्पा वाटताद मंता। मति मना ज्यादातर कार्यकर्ता लोर इंजे वेने काउंटिंग, जिलांग ओसो श्यांग लोप्पाने काम किया मंतोर। माटु नहाकुनोर किन बद्रम मरंगा परितोम!

ल्यांग शू-मिंग मना नाहकुना कामकाज “पेरके अरता” इंजी, मना दोड़ स्तर ता कार्यकर्ता लोर “कानून, अनुशासन ता उल्लंघन कींतोर” इंजी आरोप वाटितोर। मना नहाकुना इलाकांग लोप्पा इंजे वेने पेरके अरता श्यांग मंतांगे। मति अविना संख्या सिर्फ 10 प्रतिशत मंता। अवु बारांकु पेरके अरसी मंतांगे? इदिना मुख्य कारण प्रतिक्रियावादी तत्व, दुश्मन ता सशस्त्र पुलिस, एजेंट, प्रतिक्रियावादी गुप्त सोसायटिंग ना नेताल लोर, गुंडा लोर, लंपट, जर्मीदार ओसो धनी किसान लोर मौक हूडसी नेंगतोर, कार्यकर्ता लोर बनेमातोर। ओरु नाहकुना सरकार कुना सत्ताधिकार हडपे कित्तोर, ओरा लोप्पाटल उचुन मुल कम्युनिस्ट पार्टी लोप्पा वेने नेंगतोर। कानून, अनुशासन ता गंभीर उल्लंघन कीयाना कार्यकर्ता लोरा लोप्पा 80-90 प्रतिशत लोकर इद्रम तोरे मंतोर अनि बाकी पतनशील कार्यकर्ता लोर मंतोर। अदिन काजे पेरके अरता श्यांग कुना लोप्पा मुख्य समस्या प्रतिक्रांतिकारीरा पोरो हमला कीयाना संगेने पतनशील कार्यकर्ता लोरा छंटाई कीसी ओरकिन बाहर तेंडना वेने जरूरी मंता। पूरा देश लोप्पा बेसता

ओसो तूलनात्मक बेसता श्यांग कुना संख्या बचोन मंता? 90 प्रतिशता माटु इद परिस्थिति तुन स्पष्ट समझेमायना जरूरी मंता अनि ल्यांग शू-मिंग ना धोखा ते वायनायो।

14) माटु अभिवादन कुन ठुकरे कींतोम अनि मना गलतिंग कुन स्पष्ट रूप ते मानेमायोम? श्री ल्यांग पेश कित्ता विचार कुन वेने “अभिवादन” कुना पोरोल हीतेके, माटु जरूर “अभिवादन कुन ठुकरे कींतोम” इंजी नन्ना ऐलान कींताना। मति माटु मना गलतिंग इनपडे मकिह कीवोम। माटु सब्बे तोरा पोरो (मजदूर, किसान, उद्योगपतिर, व्यापारिर, विभिन्न राष्ट्रीयतांग, विभिन्न जनवादी पार्टिंग, विभिन्न जन संगठन, उद्योग, कृषि, राजनीतिक-फौजी समस्यांग, सक्षिप्त ते हर चीज पोरो) सर्वहारा वर्ग ता नेतृत्व ता दृढता ते समर्थन कींतोम अनि एकता, संघर्ष ता समर्थन कींतोम। मीटु मावा मनोवृत्ति पुंदाला आल्सा मंतिर इत्तेके मावा मनोवृत्ति इदे मंता, इदिना स्वरूप बुनियादी मंता।

15) ल्यांग शू-मिंग ना समस्या ता राष्ट्रव्यापी महत्व मंता। पो ई-पो ना समस्या लेक्काने इद वेने पूरा पार्टी, पूरा देश मुन्ने पेश कीयाना अनि इदिना पोरो वेने बहस कीयाना। नमूना पेश कीयाना उदाहरण कु परहकाटु अनि आलोचना, आत्मालोचना कीमूटा। पूरा राष्ट्र तुन आम कार्यदिशा पोरो बहस कियाला हीमुटा।

आलोचना ता रेंडु तरीकांग मंदितांग: उंदी आत्मालोचना अनि दूसरा आलोचना। मीवा पोरो माटु बद तरीका लागू कीयाना, माटु आत्मालोचना ता तरीका लागू कीयाना या? आयो माटु पोरो आलोचना ता तरीका लागू कियाकोम।

ल्यांग शू-मिंग ना आलोचना कीयाना लोप्पा मावा उद्देश्य सिर्फ ओना विरोध कीयानाए आयो इद्रम कीसी माटु ओरु प्रतिनिधित्व कीयाना प्रतिक्रियावादी विचार कुना पर्दाफाश कीयाना वेने मंता। ल्यांग शू-मिंग प्रतिक्रियावादी आंदुर मति माटु ओनाकिन विचारधारात्मक पूना बदलाव कीयाना लोप्पा तासिंतोम। ओना पूना बदलाव कीयाना या कीयानायो। इद उंदी दूसरा सवाल मंता। ओना पूना बदलाव कीयाना वेल्ले संभावना मंता।

इद्रम कीवेके बाताले आयो, बारांक इत्तेके ओरु सिर्फ वरोरे मंतोर। मति ओना संगे वाद-विवाद कीयाना फायदा आयार। इद्रम कीवेके समस्या बेरसियार अनि वाद-विवाद कीयाना लेक्का मन्नो आयार। ओना संगे वाद-विवाद कीसी समस्या तुन स्पष्ट कियाला मदद दोरकियार। इंजे बद सवाल पोरो वाद-विवाद कीयाना आया मंता? आम कार्यदिशा पोरो आया मंता आयो इंदाना सवाल तुन स्पष्ट कीयाना मावा काजे बेस आयार।

नोट

- 1) “उंदी पारदर्शी सरकार” ता बारे ते चर्चा कीसोरे ल्यांग शू-मिंग सरकार बदे वेने पार्टी लेवेके गुट ता आयवा वर्गविहीन सरकार मंदना इंजी प्रचार कींतोर।
- 2) मेनशियस “काओ च”, भाग-1
- 3) इदु चीन ता प्रचीन ऐतिहासिक ग्रन्थ “ऐतिहासिक अभिलेख” तले पोयताद मंता च लू कनफ्यूशियस ना शिष्य ओसो प्रचारक मंतोर। च लू कनफ्यूशियस ना प्रचारक बनेमातास्केटल कनफ्यूशियस ना केव्वी ते प्रतिकूल राय बस्के ने केंजा वायो।
- 4) “कनफ्यूशियस ना विद्यालय मूंड बेरा शिष्य लोरा संगे निंडता अनि मूंड बेरा खाली आता” इदु हान राजवंश ता वांग छुंग ना “समीक्षात्मक निबंध” पोरोल ता लेख ता “शकुनो ता बारे ते” हेडिंग वाले लेख तल पोयताद मंता। कनफ्यूशियस प्रतिक्रियावादी दास-प्रथा ता पालन कियाला काजे लू राज्य ते उंदी विद्यालय तेरियतोर। शाओचंग माओ वेने उंदी विद्यालय तेरियेतोर ताना लोप्प कनफ्यूशिय ना वेल्ले शिष्य लोर क्लास एतानोर। अद्रमासी शाओचंग माओ ना विद्यालय शिष्य लोरा संगे निंडसी मंदानादु अनि कनफ्यूशियस ना विद्यालय हमेशा खाली मंदानादु।
- 5) “ऐतिहासिक अभिलेख” अनुसार कनफ्यूशियस मुन्ने लू राज्य ता न्यायमंत्री पद अनि पेरके कार्यकारी प्रधानमंत्री पद ते मंतोर। दूसरा पद पोरो वात्ता पेरके मूंड महीनांग लोप्पा ओरु तन्ना प्रतिद्वंद्वी शाओचंग माओ किन हौकतोर।
- 6) “कनफ्यूशियस ना सूक्ति-संग्रह”, खंड 16, “ची श”।

कृषि लोप्या आपसी सहयोग, सहकारिता बारे ते रेंडु वार्तांग³³

अक्तूबर ओस नवम्बर 1953

1.

15 अक्तूबर ता वार्ता

कृषि-उत्पादन सहकारी समितिंंग कुन सफल कीतंकु आपसी सहयोग दल कुना बेहरा स्तर ते विस्तार आता।

पूना मुक्त इलाकांग लोप्या हर काउंटी पूरा तैयारी किता पेरके इरंगम काल ते ओसो वसंत कालम ते उंदी-रेंडु सफल सहकारी समितिंंग बने कीयाना। कम से कम उंदी रेंडु-मूंड सहकारी समितिंंग बने कीयाना; इद्रम कीयानादु अगटा काम बचोन बेस आता इंदान पोरो आधार आसी मंता। कोटा तय कीसी काम कीयाना। वेल्ले बेहरा कोटा मत्तेके दुस्साहस संगे मुन्ने दायना आंता अनि वेल्ले कम कोटा मत्तेके दक्षिणपंथी भटकावा। कोटा तय कीयानास्के ओरकिन खुद तय कीयाना अनुमति हीतेके कोटा वेने छूमंतर आया। रेंडु-मूंड लेवेके अदिनकु ज्यादा सहकारी समितिंंग वेने किया परमूडांता? बस्के एवनल इव सहकारी समितिंंग मांग संगे कलियानुंग, नियम, प्रस्ताव कुना अनुसार मंदांनुंग, सहमति पोरो आधार आसी मंदांनुंग, कर्मठ नेतृत्वकारी कार्यकर्ता (रेंडु मुख्य क्षमतांग निष्पक्षता

³³ चीनी कम्युनिस्ट पार्टी ता केंद्रीय कमेटी ता नाहकुना कार्य विभाग ता नेतृत्वकारी सदस्य लोरा मुन्ने कृषि लोप्या आपसी सहयोग, सहकारिता बारे ते तीसरी सम्मेलन तुकू मुन्ने पेश किता 2 वार्तांग। इद सम्मेलन तुन 26 अक्तूबर 153 एवनल केंद्रीय कमेटी ताकी कीता।

ओसो कार्य-कुशलता मत्तेके) लोरा मंदांनुंग अनि बेस ताकि कियमूडायर अस्के एवनल अविना संख्या बचोन मत्तेके अचोन बेसे। हान शिन संचालन कीसोर मत्ता सैन्य दल कुना संख्या ता बारे ते वेहता लेक्का।¹

प्रिफेक्चर, काउंटिंग ना पार्टी कमेटिंग इद काम तुन पूरा ताकत संगे कीयाना अनि सफल कीयाना इंजी वेहिंतोमा। केंद्रीय कमेटी ता ब्यूरो ओसो प्रांतीय, म्युनिसिपल पार्टी कमेटिंग ना नाहकुना कार्य विभाग कु इदिन गटिंग पोयसी तासना अनि इदिन तम्मा काम ता धुरी लेक्का बने कीयाना।

मावगा उंदी नियंत्रित संख्या मंदांना अनि माटु कोटा तय कीयाना। कोटा तय कीयानास्के जबरदस्ती कीयानाद फरमानशाही आयो। अक्तूबर सम्मेलन पेरेके इद काम काजे 4-5 महीनांग दोरकतांग इत्तेके इयेटा नवम्बर ओसो दिसम्बर महीना, वायना साल ता जनवरी ओसो फरवरी महीना, अनि उत्तर ते मार्च महीना वेने दोरकयरा। इंजे माटु स्पष्ट रूप ते इद काम ता जांच काजे वायना साल ता शुरू ते उंदी मीटिंग ताकियर इंजी वेहिंतोमा अस्के इद काम बद्रम ताका मंता इंजी जांचा ताकियरा।

भूमि सुधार काम इंजे पूरा आयवा मत्ता अल्पसंख्यक राष्ट्रीयतांग ना उचुक इलाकांग कुन सहकारी समितिंग ना स्थापना तुकू मुक्त कियमूडांता। पेरेके अरता, अयोग्य पार्टी-सचिव मत्ता, सहकारी समितिंग स्थापना आतेके गड़बड़ आयना 30-40 प्रतिशत श्यांग कुन इंजे मुक्त तासना अनि अविना काजे बदे कोटा तय कीयानायो। प्रांत, प्रिफेक्चर कुना पार्टी कमेटिंग इद्रम काउंटिंग ना कामकाज तुन सही तरीका ते कीयाना अनि वायना साल ता इंगम ता फसल कटाई पेरेके इंगम ते इद काम शुरू कियाला काजे जरूरी परिस्थितिंग तैयार कियाला ओरा सहायता कीयाना जिम्मेदारी एतना।

आपसी सहयोग दल तल शुरू कीसी सहकारी समिति ता स्थापना कीयाना मति सीधा सहकारी समितिंग ना स्थापना कीयाना कोशिश कीयाना अनुमति हियाना। सीधा हरीं पोयना अनि सफल कीयाना इद्रम कीतेके काम जल्दी आया परिंता।

सब्बे स्तर ता नाहकुना कार्य विभाग कु आपसी सहयोग, सहकारिता तुन वेल्ले महत्वपूर्ण समझेमायना। व्यक्तिगत रूप ते खेतीबाड़ी कीयाना किसान लोर तम्मा उत्पादन बेरसी किया परवोर अदिन काजे माटु आपसी सहयोग, सहकारिता ता विकास कीयाना। नाहकुना मोर्चा पोरो समाजवाद कब्जा कियवेके पूंजीवाद जरूर कब्जा कियारा। पूंजीवादी लेवेके समाजवाद हरीं विड़चसी बदे दूसरा हरीं पोयसी ताकना संभावना मंता या? पूंजीवादी हरीं वेने उत्पादन बेरसी कीयाना बगिल ओया परिंता मति ताना काजे वेल्ले टाईम लागियर अनि अद हरीं वेल्ले मुश्किल मंता। माटु पूंजीवाद पोरो आयवा समाजवाद पोरो अमल कीयाना।

वायना अक्तूबर ते आयना सम्मेलन ते आ कार्यदिशा, आम प्रोग्राम, औद्योगिकरण ओसो समाजवादी बदलाव बारे ते विचार-विमर्श कियमूझायरा।

“निजी सम्पत्ति तासना” ओसो “नालुंग बेहरा आजादिंग”² धनी किसान ओसो खुशहाल मध्यम किसान लोरा हित ते मंतोर। मति इदिना पोरो बदे कानून हिल्ले। कानूल लोप्पा निजी सम्पत्ति ता राका जरूर किताद मंता, मति “पक्का” किताद हिल्ले। इस्सल उचुन किसान तम्मा भूमि वम्मा मंतोर इदु बेस हिल्ले। कानून इदिना अनुमति हीवो मति माटु ओरकिन इद्रम कियाला हियानायो। सहकारी समितिं बने कीयाना समस्या हल आताद मंता। आपसी सहयोग दल किसान लोर किन तम्मा जमीन वम्मला रोमी कियाला हालोंग। सिर्फ बेहरा सहकारी समितिंगे इद्रम किया परिंतांग। इदे आयवा बेहरा सहकारी समितिं मत्तेके किसान लोरा काजे तम्मा जमीन ठेका ते हियाना वेने जरूरत मन्नो आयार। बारांकु इत्तेके सौ-रेंडु सौ परिवार कु उंदी बेहरा सहकारी समिति, विधवा, अनाथ ओसो बाकी गरीब परिवार कुन तम्मा लोप्पा शामिल कीसी इद सवाल तुन हल किया परिंताम। इद्रमे सुडला सहकारी समितिं वेने सुडला परिवार कुन तम्मा लोप्पा शामिल किया परिंतांग? इद सवाल पोरो आल्सना जरूरी मंता। आपसी सहयोग दल कु वेने विधवा, अनाथ ओसो गरीब परिवार कुना सहायता कीयाना। माटु बेहरा सहकारी समितिं बने परवेके मध्यम

सहकारी समितिग कीयाना कोशिश किमूट; मीटु मध्यम सहकारी समितिग बने क्रिया परवेके सुडला सहकारी समितिग बने कीयाना कोशिश कीमुटा मति मध्यम, बेहरा सहकारी समितिग बने कीयाना संभावना मतेके जरूर बने कीयाना। बेहरा सहकारी समितिग हूडूसी टोडडी गोय्योह कीयानायो। सौ-रेंडू सौ परिवार वाले सहकारी समितिग ना गिनती बेहरा सहकारी समितिग लोप्पा कीयाना, 3-4 सौ परिवार वाले सहकारी समितिग बने कीयाना संभावना वेने मंता। उंदी बेहरा सहकारी समिति लोप्पा बचोनो उप-सहकारी समितिग बने कीयाना, उंदी पूना तरीका आंदू अदिन भंग कीयाना जरूरत हिल्ले। सहकारी समिति तुन बेस ताकी कीयाना इत्तेके हर चीज बेस ताकी कीयाना। सब्बे रकम ता अनुभव कुन पोयसी ताकना अनि उंदे नमूना हर जागा थोपे क्रियायो।

पाइना मुक्त इलाकांग लोप्पा वेल्ले सहकारी समितिग बने कीयाना। मति उचुन पूना मुक्त इलाकांग लोप्पा पाइना मुक्त इलाका तुकु ज्यादा जल्दी सहकारी समितिग बने कीयाना। उदाहरण तुकू मध्य शेन शी मैदान ता विकास उत्तरी शेनशी तुकू ज्यादा जल्दी वेने आया परिंता। छंगतू मैदान ता विकास फूफिंग ओस अदिना लेक्कटा बाकी जागा ना विकास तुकू ज्यादा जल्दी आया परिंता। माटु पूना मुक्त इलाका ना विकास ता गति अनिवार्य रूप के तीरम कीयाना धाराण तुन खत्म कीयाना। उत्तर-पूर्व पाइना मुक्त इलाका आयो। अदिना दक्षिण हिस्सा ता लम्बा दीवार ता दक्षिण ते मत्ता पूना मुक्त इलाका तुकू ज्यादा अलग हिल्ले। च्यांगसू ओसो हांगचओ-च्याशिंग-हचओ इलाका, शानतुंग ओसो उत्तरी चीन ता मेड्रा इलाका ता पाइना मुक्त इलाकांग मुन्ने हत्तांग। पूना मुक्त इलाकांग इद काम काजे वेल्ले टाईम हियना, कर्मठ कार्यकर्ता लोर मत्ता जागा ते वेल्ले आबादी मत्ता जागा ते समतल भूमि ते उचुन आदर्श सहकारी समितिग ना स्थापना आता तुरंत पेरेके अविना संख्या वेल्ले बेरसना संभावना मंता।

इंजे उत्तरी चीन लोप्पा 6 हजार सहकारी समितिग मंतांग। इद संख्या तुन डबल कीयाना इत्तेके कोटा तय कीयाना। इद संख्या तुन 3 गुना बेरसी कीयाना इत्तेके संबंधित लोकुरा संगे सलाह-मशविरा कीयाना। माटु सही

मात्रा ते कोटा तय कीयाना, मावगा उंदी नियंत्रित संख्या मंदाना। लेवेके माटु बदे स्पष्ट लक्ष्य लेवा काम कीसोर मंदाकोमा। उत्तर-पूर्वी चीन तुन सहकारी समिति ना संख्या ते 100 प्रतिशत, 150 प्रतिशत, 200 प्रतिशत बेरसी कीयाना अनि उत्तरी चीन तुन वेने इद्रमे कीयाना। स्थानीय अर्थोरिटी तुन वेंडला काजे नियंत्रण संख्या वेल्ले बेरसी कीयाना।

सहकारी समितिग ना विकास लोप्पा मात्रा, गुण ओसो बचत पोरो जोर हियाना। बचत इत्तेके सफल आयना। असफल आतेके किसान लोरा मेहनत अंगडम आंता अनि राजनीतिक रूप ते अनाज-उत्पादन नुकसान आंता। मावा आखरी उद्देश्य ज्यादा मात्रा ते अनाज, कपास, गन्ना ओसो कुसिर-काया ता उत्पादन कीयानादु मंता। बस्के एवनल अनाज ता उत्पादन बेरसी कीवोम अस्के एवनल सफल आया परवोमा इद्रम ता परिस्थिति मतेके राज्य लेवेके जनता किन बदे फायदा आयो। उपनगर कुना लोप्पा कुसिर-काया वेल्ले पुट्टी कीयाना। उपनगर कुना उपजाऊ जमीन समतल मंता अनि सार्वजनिक भूमि मंदिता अदिन काजे अगा बेहरा सहकारी समितिग मुन्ने बने कीयाना। ताना लोप्पा डारुट हिल्ला इद्रम काम वेल्ले बेस कीयाना बारांकु इत्तेके कुसिर काया पंडिह कीयाना अनाज पंडिह कीयाना तुकू अलग मंता। लापरवाही कीतेके काम ताको। माटु प्रयोगात्मक सहकारी समितिग बने कीयाना अनि दुस्साहस संगे मुन्ने दायना तुकू बचेमायना जरूरी मंता।

शहरकुना कुसिर-काया ना मांग पूरा कियाला काजे माटु व्यक्तिगत रूप ते खेतीबाडी कीयाना किसान लोर पुट्टी कित्ता फसल हाटुम ते वम्मना तरीका पोरो भरोसा क्रिया परवोमा उत्पादन ओसो सप्लाई, अस्सना-वम्मना लोप्पा वेने सहकारी समितिग तरीका परहकना। बेहरा शहर कुना काजे कुसिर काया ना मांग ओसो सप्लाई नडमा इंजे बेहरा अंतरविरोध मंता।

अनाज, कपास ता मांग ओसो सप्लाई नडमा वेने उंदी बेहरा अंतरविरोध मंता। उचुन पेरके हव्विंग, चर्बी ओसो तिंदाना निय वेने वायरा मांग वेल्ले बेरसा मंता अनि अदिना सप्लाई आया परसोर हिल्ले।

मांग ओसो सप्लाई नडमा ता अंतरविरोध तुन हल कियाला काजे मालिकाना, उत्पादन ताकत कुना नडमा ता अंतरविरोध तुन हल कीयाना जरूरी मंता। मालिकाना व्यक्तिगत मंदाना या सामूहिक? पूंजीवादी मंदाना या समाजवाद? व्यक्तिगत मालिकाना वाले उत्पादन-संबंध ओसो बेहरा मात्रा ते कीयाना सप्लाई उंदी दूसरा एकदम विरोधी मंता। व्यक्तिगत मालिकाना तले सामूहिक मालिकाना, समाजवाद ते बदले कीयाना। शुरुआत ते सहकारी समितिं लोप्पा तम्मा-तम्मा भूमि शेयर लेक्का शामिल कींतोरा। उन्नत स्तर ता सहकारी समितिं लोप्पा भूमि पोरो सामूहिक मालिकाना इत्तेके सहकारी समितिं ना मालिकाना मंदिता।

आम कार्य दिशा ता उद्देश्य उंदी हिसाब ते मालिकाना ता सवाल किन हल कीयाना आंदू। राष्ट्रीय मालिकाना ता विस्तार, पूना राष्ट्रीय कारोबार ता स्थापना ओसो पाडना राष्ट्रीय कारोबार ता पुनरुद्धार, विस्तार कीसी कीयाना। निजी मालिकाना रेंडु रकम ता मंता। मेहनतकश जनता ना ओसो पूंजीपति वर्ग ता। इव रेंडासी कुन सामूहिक मालिकाना ओसो राष्ट्रीय मालिकाना (संयुक्त राष्ट्रीय निजी व्यवस्था संगे समाजवाद लोप्पा एकीकरण) ते बदले किया लागियरा। सिर्फ इद्रम कीसीए उत्पादन ताकत तुन बेरसी कियमूडायर अनि चीन ता औद्योगिकरण ता काम पूरा आयारा। उत्पादन शक्तिं विकसित आतास्केने मांग ओसो सप्लाई नडमा ता अंतरविरोध हल आया परिंता।

2.

4 नवम्बर ता वार्ता

माटु असल परिस्थिति तुन सुरता तासिसी काम कीयाना लेवेके गलत आयारा। असल परिस्थिति तुन सुरता तासिसी काम कियाला काजे बाता जरूरत मंता बाता संभव मंता इंजी आल्सना जरूरत मंता। संभव मत्तेके राजनीतिक ओसो आर्थिक, कार्यकर्ता लोरा परिस्थिति पोरो आधार आसी मंता। इंजे कृषि उत्पादन सहकारी समितिं कुन विकसित कीयाना

जरूरीत वेने मंता अनि संभव वेने अनि क्षमता वेने। इद क्षमता पोरो तुन उजागर कीवेके उंदी जागा नितसी ताकसोर मत्ता लेक्का आया। मनम ताकला काजे हमेशा उंदे जागा ते नितसी मंदाना सही हिल्ले। असल परिस्थिति अनुसार स्थापना कित्ता सहकारी समितिंग कुन जबरदस्ती भंग कीयानायो। बदे परिस्थिति ते वेने इद्रम कीयानायो। “जल्दबाजी” ओसो दुस्साहस संगे मुन्ने दायना रोमी कीयाना कोशिश उंदी वडिय लेक्का मत्ता। अदु पोरोटल वात्ता अनि उचुन कृषि उत्पादन सहकारी समितिंग कुन भंग कित्ताद मत्ता। इद्रम ता सहकारी समितिंग कुना जांच-पडताल कीयाना स्पष्ट रूप ते गलती मानेमायना लेवेके अगा श्यांग कार्यकर्ता ओसो सक्रिय काम कियानोर नाराज आयानूर।

माटु समाजवाद काजे काम कीयाना। “निजा सम्पत्ति अद्रमे तासना” उंदी पूंजीवादी धारणा आंदू। “पोड्रमॅड संगे-संगे मंतोर अनि बुनियादी उसूल कुना बारे ते बस्केने वडकवा लेवा सिर्फ सुडला-सुडला काम कीसी खुश आंतोर। इदु निज्जमे वेल्ले दुक्कम ता पोल्लो मंता!” “बुनियादी उसूल कुना बारे ते बस्केने वडकवा मंदाना” इत्तेके समाजवाद बारे ते बस्केने वडकवा मंदाना, समाजवा काजे बस्केने काम कियवा मंदाना। कृषि-ऋण हियाना, अनाज तूसना, दर अनुसार टैक्स वसूल कीयाना, कानून अनुसार टैक्स कम कीयाना ओसो छूट हियाना, सुडला स्तर ते एयर-बचे कीयाना योजना निर्माण कीयाना, सुवा, नहर तरवना, पूहना अनि रोपे कीयाना तरीका लागू कीयाना, खत्तुम सही तरिका ते इस्तेमाल कीयाना, पूना रकम ता नांगेल, एयर ते ताकना चक्किंग, हिद्कना-यंत्र, कीटनाशक दवाई तुन प्रचार कीयाना, लेक्कटवु बेसे। मति इव सब्बे काम कुन समाजवाद पोरो आधार आसी कीयाना जागा ते लघु-किसान अर्थव्यवस्था पोरो आधार आसी कीयाना इत्तेके किसान लोरा सुडला कल्याण कीयाना आंता। बेगा उंदी बेरा इव पोल्लॉग कुन आम कार्यदिशा ओसो समाजवाद संगे जोडे कीतोम अगा परिस्थिति इनपडे बदलेमायार अनि इव सुडला-सुडला कल्याण मन्नोंग आयनुंग। माटु समाजवाद काजे काम कीयाना अनि सही पोल्लॉग विडसना जरूरत हिल्ले। “निजी सम्पत्ति

तासना”, “नालुंग बेहरा आजादी” वेल्ले सुडला कल्याणकु आंदुंगा। इदे आयवा इव कल्याणकु धनी किसान ओसो खुशहाल मध्यम किसान लोरा हित ते मंतोरा। अनाज ता उत्पादन बेरसी कीयाना ओसो खाद्य समस्या, राष्ट्रीय अर्थव्यवस्था, जनता ना पिस्वल ता सबसे महत्वपूर्ण समस्या तुन हल कियाला काजे समाजवाद पोरो आयवा लघु-किसान अर्थव्यवस्था पोरो ज्यादा महत्व हियाना। व्यक्तिगत अर्थव्यवस्था पोरो आधार आसी सुडला-सुडला कल्याण पोरो आधार आयनायो।

इदु पाडना पीटो “कीके पोय्यला जाली वाटना मुख्य रस्सी तुन पिडंगतेके जाली खुलेमांता!” सिर्फ मुख्य कड़ी तुन मजबूत पोयसी तास्तेके बाकी सब्बे सही जागा ते एविंतांगा। मुख्य कड़ी इत्तेके प्रधान विषय-वस्तु। समाजवाद ओसो पूंजीवाद नडमा ता अंतरविरोध ओसो इद अंतरविरोध ता हल कीयाना प्रधान विषय-वस्तु मुख्य कड़ी आंदू। इद मुख्य कड़ी तुन मजबूत पोयसी तास्तेके किसान लोरा सहायता कीयाना सब्बे रकम ता राजनीतिक ओसो आर्थिक काम लोप्पा वांतांगा।

कृषि उत्पादन सहकारी समितिंग लोप्पा ओसो बाहर रेंडासी जागा अंतरविरोध मंतांगा। वर्तमान सहकारी समितिंग अर्ध समाजवादी मंतांगा, किसान सहकारी समितिंग ना बाहर व्यक्तिगत रूप ते खेती कींतांगा। अवु पूरा निजी मालिकाना वाले व्यवस्था लोप्पा वांतांगा। अदिन काजे इव रेंडासी ना नडमा अंतरविरोध मंता। आपसी सहयोग दल कृषि उत्पादन सहकारी समितिंग लेक्का हिल्लेंगा। इवु सिर्फ सामूहिक श्रम क्रिया मंतांगा, मालिकाना हिल्ले। वर्तमान सहकारी समितिंग निजी मालिकाना पोरो आधार आसी स्थापना आतांगा। अविना लोप्पा सदस्य लोर व्यक्तिगत मालिकाना वाले भूमि पोरो पूहितोर, टडियंतोर, कोंदांग, बेहरा-बेहरा कृषि औजार कुन शेयर लेक्का शामिल कींतोर। अदिन काजे सहकारी समितिंग लोप्पा समाजवादी तत्व ओसो निजी मालिकाना नडमा अंतरविरोध मंता। इद अंतरविरोध तीरम-तीरमे हल आंता। वायना कालम ते मावा वर्तमान अर्ध सार्वजनिक, अर्ध निजी मालिकाना सामूहिक मालिकाना लेक्का बदलेमांता अनि हल आंता। माटु ठोस निर्णय एता मंतोमा। माटु आपसी

सहयोग दल कुना लोप्पा समाजवाद ता विज्जा वीता मंतोमा मुन्ने अर्ध-समाजवादी सहकारी समितिग बगिल अनि पेरके पूर्ण समाजवादी सहकारी समितिग बगिल (माटु अस्के वेने कृषि उत्पादन सहकारी समितिगे इंतोम, सामूहिक फार्म आयो) दांतोमा आपसी सहयोग दल इंजे वेने कृषि उत्पादक सहकारी समितिग ना बुनियाद आंदू।

मना बचोनो दस्तावेज कुना लोप्पा आपसी सहयोग, सहकारिता ता बारे ते वेहताद हिल्ले। नन्ना सब्बे दस्तावेज कुना लोप्पा इद्रम ता आपसी सहयोग, सहकारिता ना विकास कीयाना लेवेके जरूरत, संभावना ना अनुसार राजनीतिक, आर्थिक काम कीयाना लेक्कटा शब्द जोड़े किताना उचुन मुल लघु किसान अर्थव्यवस्था तुन वेल्ले महत्व हियाला आल्लिसंतोरा। अदिन काजे ओरु किसान लोरा बारे विशेष रूप ते विरोध कींतोरा। अस्के वल्ले हस्तक्षेप दिसतांगा। “वीड़ता हेय्युंग” कुन विभिन्न दोड़ स्तर कुना पोरो वाटसियानोर अद्रमासी गड़बड़ आयनदु। नाटे आई, कारखाना लोप्पा लेवेके फौजी यूनिट कु “वीड़ता हेय्युंग” कुन अनुमति हियानायो। हस्तक्षेप ता विरोध कियाला काजे केंद्रीय कमेटी बचोनो दस्तावेज जारी कीतोमा। अद्रमासी उचुन फायदा आता। वेल्ले हस्तक्षेप इत्तेके असल परिस्थिति तुकू उल्टा ओसो जरूरत, संभावना तुन ध्यान तासवा लेवा मनोगतवादी योजनांग बने कीयाना, असल परिस्थिति तुन सुरता तासीसि योजनांग बने कीतेकाई अविन लागू कियाला फरमानशाही अमल कीयाना। मनोगतवाद ओसो फरमानशाही हमेशा गलत रुझानकु मत्तांग अनि दस हजार साल पेरके वेने अवु गलत रुझानके मंदांनुंगा। अवु बिखरेमाता लुघ-किसान अर्थव्यवस्था काजेने आयवा सहकारी समितिग काजे वेने गलत मंतांग। मति जरूरत ओसो संभावना मत्तांकु ओसो फरमानशाही पोरो अमल कियवा लेवा काम कीयाना तुन हस्ताक्षेप इंदा परोवमा। मावा काम शुरू कीयानास्के मापदंड ता इस्तेमाल कीयाना। उंदे जागा नितसी ताकसोर मंदांना, मुन्ने हनवा मंदांना दक्षिणपंथी भटकाव आंदू। संभावना तुकू ज्यादा काम कीयाना “वामपंथी” भटकाव आंदू। इव रेंडासी मनोगतवाद तुन पोयसी ताकितांगा। दुस्साहस संगे मुन्ने दायना गलत

मंता, स्थापना किया परना सहकारी समितिं कुन स्थापना कियवा मंदांना वेने गलत आंता। सहकारी समितिं कुन जबरदस्ती भंग कीयाना वेने गलते।

“नाहकुना लोप्पा पिस्वल वेल्ले मुशिकल मंता अगा ज्यादातर सुविधांग हिल्लेंग, अगा लागू कीयाना तरीकांग लघु किसान अर्थव्यवस्था संगे कलियोंग” इंदान लेक्कटा पोल्लोंग पार्टी लोप्पा ओसो बाहर वेने मंतांग। नाहकुना पिस्वल कठिन मंता इंदानदु निज्जमे मति माटु इदिना पूर्ण विश्लेषण कीयाना। असल ते अगा पिस्सना अचोन मुशिकल हिल्ला। अनाज ता कमी वाले किसान परिवार सिर्फ 10 प्रतिशत मंता ताना लोप्पाटल आधा परिवार विधवा, अनाथ ओसो बेसहारा लोकुर श्रम-शक्ति ता कमी मत्तांकु वेल्ले मुशिकल पिस्वल पिस्संतोर। मति आपसी सहयोग दल ओसो सहकारी समितिं ओरकिन उचुन-उचुन सहायता कींतांग। मति ओरा परिस्थिति क्वोमिंगतांग कालम तुकू वेल्ले बस मंता अनि ओरा लोप्पा भूमि वितरण किताद मंता। प्राकृतिक तिप्पलकु सहेमासोर मत्ता लोकुरा पिस्वल निज्जमे कठिन मंता मति ओरकिन मदद कियाला काजे अनाज तूसताद मंता। आम किसान लोरा पिस्वल बेसे मंता ओसो बेस आया मंता। अदिन काजे ओरा लोप्पा 80-90 प्रतिशत लोकुरे खुश मंतोर अनि सरकार ता समर्थन कींतोर। नाहकुना कुन कुल संख्या ता लगभग 7 प्रतिशत हिस्सा जमींदार, धनी किसान लोर वांतोर, वीरु सरकार तुकू नाराज मंतोर। “नाहकुना लोप्पा पिस्वल कठिन मंता अगाटा परिस्थिति वेल्ले वेरी वेस्सना लेक्का मंता” इंजी नन्ना बस्केने आल्सोना उचुन मुल नाहकुना तिप्पल संगे-संगे ओरा तिप्पल ता चर्चा कींतोर इत्तेके लघु-किसान अर्थव्यवस्था ता बिखरेमासी मत्ता स्वरूप ता चर्चा कींतोर। मति इद्रम कीयानास्के ओरु सहकारी समितिं ना स्थापना ता बारे वडकोर आंतोर। व्यक्तिगत अर्थव्यवस्था ता समाजवादी बदलाव कीयाना, आपसी सहयोग, सहकारीता तुन प्रोत्साहन कीयाना, सहकारी समितिं बने कीयानादु उंदी अमल कीयाना दिशाए आयवा मावा मुन्ने मत्ता उंदी फौरी काम आंदू।

जुलाई-अगस्त ते वित्तीय, आर्थिक काम पोरो सम्मेलन कियवेके आम कार्यदिशा वेल्ले कामरेड्स ना काजे स्पष्ट हिल्ले। इद सम्मेलन ता उद्देश्य मुख्य रूप ते इदे समस्या तुन हल कीयाना मत्ता। माटु पो इ-पो ना आलोचना कीतोम बारांकु इत्तेके ओरु आम कार्यदिशा तल भटकेमायना गलती कितोर। सारांश ते आम कार्यदिशा इत्तेके तीरम-तीरम मावा देश ता समाजवाद औद्योगिकरण काम तुन पूरा कीयाना, कृषि दस्तकारी ओसो पूंजीवादी उद्योग-वाणिज्य ता समाजवादी बदलाव ता काम पूरा कीयाना। इंजेने अनाज ता योजनाबद्ध खरीदारी ओसो सप्लाई ता व्यवस्था लागू आतांकु समाजवाद तुन वेल्ले प्रोत्साहन दोरकता। ताना पेरके आपसी सहयोग, सहकारिता बारे ते आता वर्तमान सम्मेलन संगे अदिन ओसो उंदी बेरा प्रोत्साहन दोरकियर। इद सच्चाई तुन सुरता तासिसी आपसी सहयोग, सहकारिता आंदोलन इयेंड वेल्ले जोम ठहराव ते मत्ता। वर्तमान सम्मेलन इदिना पोरो वेल्ले सक्रिय आतेके बेस आयार। मति लोकर किन मावा नीतिंग ना बारे ते वेहाना, मना नीति ना बारे ते वेहाना वेल्ले महत्वपूर्ण मंता।

“सक्रिय नेतृत्व ओसो स्थिर विकास” वेल्ले बेस मंता। इद आंदोलन इयेंड मुन्ने हनवा लेवा उंदी जागा नितसी ताकसोर मत्ता। इदु वेल्ले बेस हिल्ले, मति इदिना उंदी सकारात्मक पहलू वेने मंता। इदु युद्ध लडेमायना लेक्का मंता। हर लड़ाई पेरके दूसरी लड़ाई शुरू कीयाना मुन्ने आराम, सुदृढीकरण काजे टाईम दोरकना जरूरी मंता। उचुन जागा ने मावा वेल्ले मोर्चांग कुन विडसमूडाता, अनि उचुक जागा ने वेल्ले मोर्चांग विडसना समस्या मंता मति बेगा विकास कीयाना संभावना मंता अगा विकास कीवेके बदे वेने रकम ता विकास क्रियाला अनुमति हियवा मंदाना समस्या मंता। अद्रमासी विकास कीयाना गैर-कानूनी आता। इद दुनिया लोप्पा वेल्ले पूना चीजकु सही मंदितांग मति अविन गैर-कानूनी समझेमायमूडांता। मुन्ने माटु वेने “गैर-कानूनी” मत्तोम, क्वोमिंगतांग “कानूनी” मत्ता। मति इव गैर-कानूनी सहकारी समितिंग इंजे एवनल मंतांगे अनि बेसे ताकसोर मंतांग। माटू इंजे वेने अविन मान्यता हियाला इनकार

किया परिंतिरा? अवु कानूनी मंतांग इंजी मीटु स्वीकार किया लागियर, बारांकु इत्तेके अवु सफलता दोरकी कीतांग।

इद सम्मेलन ते सक्रिय नेतृत्व ओसो विकास ता बारे ते विचार-विमर्श किताद मंता, मति गड़बड़ आयर इंजी मीटु मुन्ने अंदांजा वाटना। मीटु सक्रिय नेतृत्व ओसो ओसो विकास ता पोल्लोंग कीतेके वेने अविन अमल कियाला असफल आया परिंतिरा। सक्रिय नेतृत्व ओसो विकास काजे मावगा उंदी संख्या मंदाना, काम तय कीयाना अनि अद पूरा आता या आयो इंजी जांच कीयाना जरूरी मंता। काम पूरा कियान लेक्कटा काम कुन पूरा कीयाना। अविन पूरा किया परवेके समाजवादी बगिल दायना रफ्तार कम आयार। माटू कित्ता जांच-पड़ताल अनुसार 5-10 प्रतिशत सहकारी समितिंग ना उत्पादन कम आतांकु बेस ताकसोर हिल्लेंग। इद्रम सक्रिय नेतृत्व हिल्वांकु आता। उचुक सहकारी समितिंग लोप्पा उत्पादन कम आयना कारण सही नितृत्व हिल्वादे आंदू इंदान लोप्पा बदे डावुट हिल्ले। 20 प्रतिशत तुकू ज्यादा सहकारी समितिंग ना उत्पादन कम आतेके समस्या वायर।

आम कार्यदिशा इत्तेके उत्पादन संबंध लोप्पा बदलाव तत्ताना। स्टालिन वेहता लेक्का मालिकाना व्यवस्था उत्पादन-संबंध पोरो आधार आसी मंता।³ सब्बे कामरेड्स इद पोल्लो तुन स्पष्ट रूप ते समझेमायना। इंजे निजी मालिकाना ओसो समाजवादी सार्वजनिक मालिकाना कानूनी मंता मति निजी मालिकाना गैर कानूनी बनेमायर। मूंड मू भूमि ता “निजी सम्पत्ति तासना” ओसो “नालुंग बेहरा आजादिंग” पोरो अमल कीयाना इत्तेके पूरा आबादी वेल्ले अल्पसंख्यक धनी किसान लोरा संख्या बेरसी कियाला मदद आयार अनि पूंजीवादी हरीं ते मुन्ने दायना।

काउंटी, जिला स्तर ता कार्यकर्ता लोर तम्मा काम तुन तीरम-तीरम कृषि उत्पादन लोप्पा आपसी सहयोग सहकारिता दिशा ते ओयना, समाजवाद तुन प्रोत्साहन हियाना दिशा ते ओयना जरूरत मंता। ओरु समाजवाद काजे काम कीवेके बोना काजे काम कीयाना? व्यक्तिगत अर्थव्यवस्था काजे काम कीयाना या? काउंटी, जिला स्तर ता पार्टी

कमेटींग ना सचिव समाजवाद काजे कीयाना काम तुन वेल्ले महत्वपूर्ण काम समझमायना जरूरी मंता। पार्टी सचिव तम्मा-तम्मा जिम्मेदारी एतना जरूरी मंता। नन्ना खुद वेने केंद्रीय कमेटी ता सचिव आंदना केंद्रीय कमेटी ता ब्यूरो सचिव, प्रांत, प्रिफेक्चर, काउंटी, जिला स्तर ता पार्टी कमेटींग ना सचिव, सब्बे स्तर ता सचिव तम्मा-तम्मा जिम्मेदारी एतना अनि खुद वेने इद काम लोप्पा शामिल आयना। इंडे केंद्रीय कमेटी तन्ना 70-80 प्रतिशत ताकत कृषि तुन समजावादी बदलाव ता काम ते वाटा मंता। इद्रमे पूंजीवादी उद्योग-वाणिज्य बदलाव कीयाना काम वेने समाजवाद काजे कीयाना काम आंदू। सब्बे स्तर ता नाहकुना कार्य विभाग कुना कामरेड्स अनि इद सम्मेलन लोप्पा मत्ता सब्बतोर, कृषि तुन समाजवाद बगिल ओयना काम ता विशेषज्ञ बनेमायना अनि सिद्धांत, कार्यदिशा, नीति ओसो तरीकांग लोप्पा निपुण मंदाना।

शहर कुना काजे कुसिर कायांग सप्लाई कीयाना मुख्य रूप ते योजनाबद्ध सप्लाई पोरो आधार आसी मंता। बेहरा ओसो पूना नगर कुना लोप्पा आबादी वेल्ले मंता, कुसिर काया लोवा ओरा काम बद्रम ताकियर? इद सवाल तुन हल कीयाना जरूरी मंता। उपनगर कुना लोप्पा आपसी सहयोग दल कुना स्थापना कितास्के वेने कुसिर काया ता उत्पादन ओसो सप्लाई ता गारंटी कीवेके इद मंजिल तुन वेंडसी सीधा अर्ध समाजवादी सहकारी समितिंग, पूर्ण समाजवादी समितिंग वेने निल्पी किया परमूडांता। इद सवाल पोरो विचार कीयाना जरूरत मंता।

कृषि उत्पादन सहकारी समितिंग ना विकास काजे उंदी योजना पेश किताद मंत्ता। इंगम कालम ते ओसो वायना कालम ता वसंत कालम ते शरद फसल कोय्यना मुन्ने 32,000 तुकू ज्यादा सहकारी समितिंग बने कीयाना। 1957 ते इद संख्या 7,00,000 आता। मति अविना संख्या बस्केनाई अचानक बेरसना मुन्ने अंदाजा वाटना। सहकारी समितिंग ना संख्या दस लाख एव्वा परिंता लेवेके अदिनकु ज्यादा आया परिंता। संक्षिप्त ते सहकारी समितिंग ना स्थापना बेहरा संख्या ते कीयाना, अविना सक्रिय नेतृत्व ओसो विकास कीयाना।

इद सम्मेलन सफल आता। माटु इद सम्मेलन कीवा मत्तेके वायना साल ता जनवरी एवनल हर्री हूइसी मत्तेके वेल्ले बेरा आसी मनवड़ अनि इद इरंगम कालम वेने मारसी मनवड़। वायना साल 26 मार्च ते माटु दूसरा सम्मेलन कीसी, मना योजना बचोन अमल आता इंजी जांच कियाकोम। इद सम्मेलन लोप्पा वायना कालम ता सम्मेलन ता तारीख तय कीयाना अनि वर्तमान सम्मेलन ते मानेमाता प्रस्ताव बचोन लाग आता इंजी जांच आयर इंजी आल्सनादु बेसे। वायना साल इरंगम कालम ते माटु वायना कालम ता काम बारे ते विचार-विमर्श कीयाना अनि अविन तय कियाला काजे उंदी दूसरा सम्मेलन कियाकोम।

नोट

- 1) हान शिन हान राजवंश ता प्रथम सम्राट ल्यू पांग ना वरोर मुख्य सेनापति मत्तेरा। “ऐतिहासिक दस्तावेजकुना” अनुसार ल्यू पांग उंदी बेरा हान शिन किन बचोन सेन्य दल कुना संचालन किया परितोर इंजी पूछेमातोर। ओरु: “अविना संख्या बचोन ज्यादा मत्तेके अचोन बेस” इंजी वेहतोर।
- 2) जे.वी.स्टालिन: “द्वन्द्व्वात्मक ऐतिहासिक भौतिकवाद” लेख।

चीन लोक गणराज्य ना संविधान ता ड्राफ्ट ता बारे ते³⁴ 14 जून 1954

संविधान ता ड्राफ्ट तुन आम जनता ना समर्थन दोरकता। पेकिंग ता 500 तुकू ज्यादा मानेय, विभिन्न प्रांत, म्युनिसिपलटिंग ना विभिन्न सक्रिय तत्व कीयाना विचार-विमर्श पोरो आधार आसी (पूरा देश ता प्रतिनिधित्व कीयाना 8 हजार तुकू ज्यादा लोकुर कीयाना विचार-विमर्श) ड्राफ्ट तैयार किताद मंता अनि इदिन आम लोकुर स्वीकार कितोर अनि समर्थन दोरकता। नेटा अधिवेशन लोप्पा वेल्ले लोकुर इदिन अंगडम वेहतोर।

इद्रम ता व्यापक विचार-विमर्श बारांकु किताद मंता? इदिना पहली फायदा कम लोकुर तैयार कित्ता ड्राफ्ट तुन व्यापक लोकुरा समर्थन दोकिंता या? विचार-विमर्श तले शुरुआती मूल पाठ ता मुख्य धारा ओसो बुनियादी उसूल कुन आम लोकुरा समर्थन दोरकता। शुरुआती मूल पाठ लोप्पा कित्ता पोल्लोंग सही मंतांग अविन सुरक्षित तासताद मंता। उचुन नेताल लोरा विचार कुन हजारों लोकुरा समर्थन दोरकतांकु इव विचार कु सही मंतांग इंजी साबित आता। अद्रमासी मावा लोप्पा अत्माविश्वास पैदा आंता। दूसरा, विचार-विमर्श कीयानास्के 5,900 तुकू ज्यादा सुझाव कुन (सवालकु वेने शामिल हिल्लेंग) जमा किताद मंता। इव मूंड रकम ताव मंतांग। पहली रकम ता सुझाव सही हिल्ले। दूसरा रकम ता सुझाव पूराए गलत मंतांग, अविन स्वीकार कीयानायो। इव सुझाव कुन स्वीकार कीयानायो इत्के इविन जमा बारांकु किताद मंता, इद्रम कीतांगकु बदे

³⁴ केंद्रीय जन सरकार परिषद ता तीसवीं अधिवेशन लोप्पा भाषणा

फायदा मंता या? इंगो मंता। इद्रम कीतेके माटु संविधान ता बारे ते 8 हजार तुकू ज्यादा मानेय लोप्पा इद्रम ता विचारकु मंतांग इंजी पुंदा परिंतोम अनि उंदी तूलनात्मक अध्ययन क्रिया परिंतोमा तीसरा रकम ता सुझाव स्वीकार किताद मंता। बदे डावुट हिल्वा अवु वेल्ले बेसतांग ओसो जरूरी मंतांग। इव सुझावकु दोरकवा मत्तेके शुरुआती मूल पाठ बुनियादी रूप ते सही मत्तेके अधूरा मंजी मनवड़। ड्राफ्ट ता वर्तमान रूप ते इंजे वेने कर्मिंग मंदाना मंता इदिना बारे ते माटु पूरा देश ता जनता ना राय एता लागियर।

इद ड्राफ्ट तुन आम जनता ना समर्थन बारांकु दोरकता? नावा हिसाब ते इद ड्राफ्ट तैयार कीयानास्के माटु नेतृत्वकारी विचार कुन जनता ना विचार कुना संगे काल्पना तरिका लागू कीतोम अदिन समर्थन दोरकता। संविधान ड्राफ्ट लोप्पा उचुन नेताल लोरा विचारकुन 8 हजार तुकू ज्यादा लोकुरा विचार कुना संगे काल्पताद मंता, इद छापे कीसी पेरके पूरा देश ता जनता विचार-विमर्श कीसी केंद्रीय कमेटी ता विचार कुन पूरा जनता ना विचार कुना संगे काल्पना। इदे नेतृत्व तुन जनता ना संगे ओसो सक्रिय तत्व कुना बेहरा आबादी संगे काल्पना तरीका आंदू। माटु मुन्ने वेने इद तरिका लागू कीतोम अनि वायना कालम ते वेने इद्रमे क्रियाकोम। सब्बे महत्वपूर्ण कानून बने कीयानास्के इदे तरीका लागू कीयाना। इद तरीका लागू कीसी माटु नेंडु संविधान ता उंदी बेसता ओसो सही ड्राफ्ट तैयार आताद मंता।

इगा मत्ता सब्बे तोर ओसो सक्रिय तत्व कुना बेहरा संख्या संविधान ता इद ड्राफ्ट किन समर्थन बारांकु दोरकता इदिन बेस बारांकु समझेमांतोर? इदिना रेंडु मुख्य कारण मंतांगः पहली कारण लोप्पा हत्ता कालम ता अनुभव कुना सारांश तेंडताद मंता। दूसरा कारण लोप्पा उसूल तुन लचीलापन संगे काल्पताद मंता।

पहली कारण लोप्पा हत्ता कालम ता अनुभव कुना विशेष रूप ते हत्ता 5 साल कुना लोप्पा क्रांति, निर्माण ते माटु दोरकी कित्ता अनुभव कुना सारांश तेंडताद मंता। तीना लोप्पा साम्राज्यवाद, सामंतवाद, नौकरशाही-पूंजीवाद खिलाफ सर्वहारा वर्ग ता नेतृत्व ते ताकना जन क्रांति

लोप्पा माटु दोरकी कित्ता अनुभव कुना ओसो हत्ता उचुक साल कुना लोप्पा सामाजिक सुधार, आर्थिक निर्माण, सांस्कृतिक निर्माण, सरकारी कामकाज लोप्पा माटु दोरकी कित्ता अनुभव कुना सारांश तेंडताद मंता। इदे आयवा, तीना लोप्पा छिंग राजवंश ता आखरी साल तल इंजे एवनल संविधान-रचना ता अनुभव कुना इतेके छिंग राजवंश ता आखरी दिव्या ना “19 संवैधानिक धारांग”¹ नले 1912 ता “चीन गणराज्य ता अस्थाई संविधान”², उत्तरी युद्ध-सरदार लोरा सरकार ता बचोनो संविधान कु ओसो संविधान कुना ड्राफ्ट³, प्रतिक्रियावादी च्यांग काई-शेक शासन ता “राजनीतिक कालम ते चीन गणराज्य ता अस्थाई संविधान” ओसो च्यांग काई-शेक ना बोगस संविधान एवनल संविधान-रचना ता अनुभव कुना सारांश तेंडताद मंता। अविना लोप्पा सिर्फ उंदी संविधान ता स्वरूप सकारात्मक मत्ता अनि बाकी सब्बे नकारात्मक मत्तांग। 1912 ते बने कित्ता “चीन गणराज्य ता अस्थाई संविधान” अस्केटा उंदी तूलनात्मक सबसे बेसता संविधान मत्ता। बदे डावुट हिल्ला अदिना लोप्पा गलतिंग मत्तांग मति ताना लोप्पा उचुन क्रांतिकारी, जनवादी तत्व वेने मत्तांग। अवु वेल्ले संक्षिप्त मत्तांग अनि अद ड्राफ्ट तुन वेल्ले जल्दबाजी ते तैयार कित्ताद मत्ता; ड्राफ्ट तैयार कीयानास्केटल स्वीकार कीयाना लोप्पा सिर्फ उंदी महीना लागता। कुल मिले कीसी बाकी सब्बे संविधान, ओसो संविधान ता ड्राफ्ट प्रतिक्रियावादी मत्तांग। मावा संविधान ता ड्राफ्ट लोप्पा मुख्य रूप ते क्रांति, निर्माण लोप्पा मावा अनुभव कुना सारांश तेंडताद मंता, मति संगेने अव स्थानीय ओसो अंतरराष्ट्रीय अनुभव कुना संश्लेषित रूप वेने आंदू। मावा संविधान उंदी समाजवादी रकम ता संविधान आंदू। अदु मुख्य रूप ते मावा अनुभव कुना पोरो आधार आसी मंता, मति सोवियत संघ ओसो जनता ना लोकशाही वाले देश कुना संविधान लोप्पा मत्ता तत्व कुन ग्रहण कित्ताद मंता। संविधान ता चर्चा कीयानास्के पूंजीपति वर्ग माकिनकु मुन्ने संविधान बने कीयाना शुरू कित्ता। अदु ब्रिटिश आई फ्रांस आई लेवेके अमेरिका आई इव देश कुना लोप्पा पूंजीपति वर्ग उंदी अस्के उंदी क्रांतिकारी मत्ता। अस्के ने पूंजीपति वर्ग संविधान बने कीयाना शुरू

किता। माटु इतिहास लोप्पा पूंजीवादी संविधान ता बदे जागाए हिल्ले इंजी पूंजीवादी जनवाद तुन कलम संगे उंदे बेरा कोय्यनायो। नेंडु वेने पूंजीवादी संविधान बेस हिल्ले, विशेष रूप ते साम्राज्यावादी देश कुना संविधान कुना लोप्पा जनता ना बेहरा संख्या तुन धोखा हियाना ओसो उत्पीड़न कियाला काजे बने किताद मत्ता। मावा संविधान उंदी पूना, समाजवादी रकम ता संविधान आंदू, पूंजीवादी रकम ता बदे वेने संविधान तुकू अलग मंता। अदु पूंजीपति वर्ग ता संविधान तुकू, अदिना क्रांतिकारी कालम ते बने किता संविधान तुकू बचोनो ज्यादा प्रगतिशील मंता। माटु पूंजीपति वर्ग तुकू वेल्ले बेस मंता।

दूसरा, मावा संविधान ता ड्राफ्ट लोप्पा उसूल तुन लचीला कीयाना। रेंडु बुनियादी उसूल मंतांग, जनवाद ता उसूल ओसो समाजवादी ता उसूल। मावा जनवाद पूंजीवादी जनवाद आयवा जनता ना जनवाद आंदू, इतेके जनता ना जनवादी तानाशाही आंदू, इदिना नेतृत्व मजदूर-किसान एकता पोरो आधार आसी मत्ता सर्वहारा वर्ग कींता। जनता ना जनवाद ता उसूल मावा पूरा संविधान लोप्पा मंता। दूसरा समाजवाद उसूल आंदू। समाजवाद नेंडु मावा देश लोप्पा मंता। संविधान लोप्पा समाजवादी बदलाव पूरा कीयाना ओसो देश ता समाजवादी औद्योगीकरण तुन साकार कीयाना जरूरी मंता इंजी वेहताद मंता। इदे मावा उसूल आंदू समाजवाद ता इद उसूल तुन लागू कीयाना इतेके माटु पूरा देश ता हर इलाका ते उंदी दिव्या समाजवाद तुन साकार रूप हियाना। इद पोरो-पोरो वेल्ले क्रांतिकारी दिसिंता, मति अदिना लोप्पा लचीलापन ता कमी मंता अदिन काजे इदिन अमल कियमूडायो इदिन विरोध ता सामना क्रिया लागियर, आखरी ते इदु असफले आयार। काम पूरा आवेके अदिन तीरम-तीरम पूरा कीयाना कोशिश कीयाना। उदारण तुकू राष्ट्रीय पूंजीवाद किने हूडाटू। तय कितास्के तीरम-तीरम अमल कीयाना। सिर्फ संयुक्त राष्ट्रीय निजी आयवा विभिन्न रूप धारण कींता। “तीरम-तीरम” ओसो “विभिन्न” इव रेंडासी शब्द कुना पोरो ध्यान हीमुटा। इतेके राष्ट्रीय पूंजीवाज तुन तीरम-तीरम विभिन्न रूप ते अमल कीयाना अनि पूरा जनता ना समाजवाद मालिकाना तुन साकार

कीयाना। पूरा जनता ना समाजवादी मालिकाना उंदी उसूल आंदू, मति अदिन साकार कीयानास्के लचीलापन संगे काल्पसी लागू कीयाना। लचीलापन इत्तेके सिर्फ “विभिन्न” रूप धारण कीयाना राष्ट्रीय पूंजीवाद तुन अमल कीयाना अनि उंदे दिया आयवा “तीरम-तीरम” अमल कीयाना। इद्रम कीतेके लचीलापन वांता। व्यवहार ते लागू कीयानादिन संविधान लोप्पा रासिंतोम अनि लागू कीयाना लेक्का हिल्वादिन तेंडसिंतोमा उदाहरण तुकू नागरिक अधिकार कुना लोप्पा भौतिक गारंटी कीयाना पोल्लो तुने हूडाटू। वायना कालम ते उत्पादन विकास संगे-संगे अदिन वेने बेरसी कियमूडायर मति संविधान लोप्पा सिर्फ “तीरम-तीरम” बेरसी कीयाना शब्द तुने चुने किताद मंता। इद वेने लचीलापन ताए रूप आंदू ओसो उंदी उदाहरण हड़तेके संयुक्त मोर्चा मंता, अदिन प्रोग्राम लोप्पा रास्ताद मत्ता। इंजे इदिन संविधान ता ड्राफ्ट ता प्रस्तावना लोप्पा ओसो उंदी बेरा रासमूडाता। “सब्बे जनवादी वर्ग, जनवादी पार्टिंग, ग्रुप, जन संगठनकु ना उंदी व्यापक जनता ना जनवादी संयुक्त मोर्चा” मंदाना जरूरी मंता। इद्रम मत्तेके विभिन्न सामाजिक तबकांग, राष्ट्रीय पूंजीपति वर्ग, जनवादी पार्टिंग, किसान, शहरी निम्न-पूंजीपति वर्ग तुन सहायता दोरकियर। अल्पसंख्यक राष्ट्रीयतांद ना समस्या वेने मंता, ताना लोप्पा सामान्यता ओसो विशिष्टता वेने मंता। संविधान ता सामान्य धारांग अदिन सामान्यता तुन तोहिंतांग अनि विशिष्ट धारांग अदिना विशिष्टता तुन तोहिंतांग। अल्पसंख्यक राष्ट्रीयतांग तम्मा, राजजनीतित, आर्थिक, सांस्कृतिक विशेषतांग मंतांग। अविना अर्थव्यवस्था ता विशेषतांग बातांग मंतांग? उदाहरण तुकू संविधान ता ड्राफ्ट ता धारा 5 लोप्पा चीन लोक गणराज्य लोप्पा उत्पादन साधन कुना मालिकाना ता नालुंग रूपकु मंतांग मति असल ते मना अल्पसंख्यक राष्ट्रीयतांग लोप्पा मालिकाना ता दूसरा रूपकु वेने मंतांग इंजी वेहताद मंता। मावा देश लोप्पा आदिम कम्यून वाले मालिकाना इंजे वेने मंता या हिल्ले? नावा हिसाब ते उचुन अल्पसंख्यक राष्ट्रीयतांग ना इलाकांग लोप्पा इंजे मंतांगे। अद्रमे दास-मालिकाना वाले मालिकाना ओसो सामंती मालिकाना वेने मंता। वर्तमान कालम लेक्का

दास व्यवस्था, सामंती व्यवस्था ओसो पूंजीवादी व्यवस्था गलत मत्तांग मति ऐतिहासिक रूप ते सब्बे आदिम कम्यून व्यवस्था तुकू प्रगतिशील मत्तांग। इव व्यवस्थंग शुरू ते प्रगतीशील मत्तांग मति पेरके प्रगतिशील हिल्वा मत्तांग अदिन काजे इविना जागा ते दूसरा व्यवस्थांग वासोर हत्तांग। मावा संविधान ता ड्राफ्ट ता धारा 70 लोप्पा अल्पसंख्यक राष्ट्रीयतांग ना इलाकांग “बदे विशेष इलाका लोप्पा आयवा उंदी राष्ट्रीयता लेवेके बचोनो राष्ट्रीयतांग ना राजनीतिक, आर्थिक, सांस्कृतिक विशेषता ना अनुसार स्वायत्त-शासन ता नियम लेवेके विशेष नियम बने कियमूडायार” इंजी रास्ताद मंता। इव सब्बे उसूल कुन लचीलापन संगे काल्पना उदाहरणकु मत्तांग।

संविधान ता ड्राफ्ट तुन व्यापाक रूप ते समर्थन दोरकतादिना रेंडु कारणकु मत्तांग। ताना लोप्पा सही तरीका ते हत्ता कालम ता अनुभव कुना सारांश तेंडताद मंता। ताना लोप्पा सही तरीका ते उसूल कुन लचीलापन संगे काल्पताद मंता। लेवेके नावा हिसाब ते लोकुर इदिना समर्थन कीवोर आसी मन्नेर।

संविधान ड्राफ्ट अमल कीयाना पूरा संभव ओसो जरूरत मंता। बदे डावुट हिल्वा इंजे वेने उंदी ड्राफ्टए मंता मति उचुन महिनांग परेक राष्ट्रीय जन प्रतिनिधि सभा इदिन स्वीकार कितास्के उंदी संविधान बनेमायार। इंजे माटु इदिन लागू कियाला काजे तैयार आया लागियर। इदिना स्वीकार आतास्के पेरकेमुन्ने आयवा लेवा पूरा राष्ट्र इदिना पालन कियार। विशेष रूप ते राष्ट्रीय कर्मचारिर, सबसे मुन्ने इगा मत्ता लोकुर इदिना पालन कियाला मुन्ने वायनूरा। संविधान ता पालन कियवा मंदानादु अदिना उल्लंघन कीयाना आंता।

संविधान ता ड्राफ्ट ता ऐलान कितास्के पूरा जनता ना समर्थन दोरकिया अनि जनता ना सक्रियता बेरसियार। उंदी संगठन लोप्पा नियम कु मंदाना जरूरी मंता। अद्रमे उंदी राज्य लोप्पा वेने नियम कु मंदाना जरूरी मंता। संविधान असलते आम नियम कुना समूह आंदू, इदु उंदी बुनियादी कानून मंदिंता। जनता ना जनवाद ओसो समाजवाद ता उसूल कुन उंदी

बुनियादी कानून लेक्का उंदी संविधान लेक्का मूटा कीयाना अनि पूरा देश ता जनता ना मुन्ने उंदी स्पष्ट हरीं तेरियाना अनि जनता तुन इद स्पष्ट ओसो सही हरीं ते ताकला विश्वास हियाना, अस्केने जनताना सक्रियता बेरसियार।

संविधान ता इद ड्राफ्ट ता ऐलान कीतेके दुनिया पोरो इदिना बदे प्रभाव आयार। जनवादी ग्रुप लेवेके पूंजीवादी देश रेंडासी ना पोरो असर अरियर। जनवादी ग्रुप ता लोकुर माटु मना काजे उंदी स्पष्ट ओसो सही हरीं पोयताद हूडसी खुश आयनूर। ओरु वेने जरूर खुश आयनूर, बारांकु इतेके माटु चीनी लोकुर खुश मंतोम। पूंजीवादी देश ना उत्पीड़ित, शोषित जनता पुंजी मत्तेके ओरु वेने खुश आयनूर। बदे डावुट हिल्ला साम्राज्यवाद ओसो च्यांग काई-शेक लेक्काटोर खुश आयोर। माटु च्यांग काई-शेक कुन वेल्ले बेस पुत्तोमे ओरु जरूर इदिना विरोध कियानूर। अध्यक्ष आइजनहावर वेने खुश आयोर आसी मंदानूर। ओरु इद संविधान मावा काजे उंदी स्पष्ट सही मंता मति वेल्ले लब्बड़ ओसो गलत हरीं मंता, इदिन समाजवाद ओसो जनता ना जनवाद पोरो अमल कीयाना वेल्ले गलत आयर इंतोर। ओरकिन मावा लचीलापन तुन वेने विचार कीवोर आयानुर। ओरु माटु उंदे नरका जादू कित्ता लेक्का समाजवाद तुन साकार कीयाना इंजी आल्सिंतोर। माटु इद्रम कीतेके ओरु निज्जमे वेल्ले खुश आयनूर। ओरु चीन लोप्पा उंदी संयुक्त मोर्चा बने कीयाना अनि माटु सिर्फ “उंदे पक्ष वाले खेल” करसना इंजी आल्सिंतोर। मावा संविधान ता राष्ट्रीय विशिष्टतांग मंतांग मति संगे अविना अंतरराष्ट्री स्वरूप वेने मंता; इदु उंदी राष्ट्रीय घटना मत्ता संगे ने उंदी अंतरराष्ट्रीय घटना वेने आंदू। वेल्ले राष्ट्र साम्राज्यवाद, सामंतवाद ता उत्पीड़न ता शिकार आंतांग, मुन्ने माटु आता लेक्का अनि दुनिया ता बेहरा जन संख्या इवे राष्ट्र लोप्पा मंता। मावगा उंदी क्रांतिकारी संविधान मंदाना जनता ना उंदी जनवादी संविधान मंदाना, उंदी स्पष्ट ओसो सही हरीं मंदानादु इवे देश कुना जनता काजे सहायक आयार।

मावा आम उद्देश्य उंदी महान समाजवादी देश कुना निर्माण कियाला कोशिश कीयाना। मावा राज्य 60 करोड़ जनता मंदाना बेहरा राज्य मंता।

समाजवादी औद्योगिकरण कार्य ओसो कृषि ता समाजवादी बदलाव, मशीनीकरण काम तुन पूरा कियान अनि चीन तुन उंदी महान समाजवाद देश बने कियाला बचोन टाईम लागिअर? इंजे माटु उंदी सही टाईम वेहा परवो। उंदी बुनियाद तैयार कियाला 3 पंचवर्षीय योजनांग ना टाईम इत्तेके 15 साल कुना टाईम लागता। अस्के चीन उंदी महान देश बनेमांता या? अस्के चीन उंदी पूना रूप एतियार अदु नेटा लेक्का मन्नो आयार। नेंडु माटु बाता-बाता बने किया परितोम? माटु टेबल-कुर्सी ओसो ग्लास, कप-बस्सी बने किया परितोम, अनाज पुट्टी किया परितोम, अदिन नोरसी पिंडी बने किया परितोम, कागज तैयार किया परितोम। मति माटु मोटर-कार, हवाई जहाज, टैंक लेवेके ट्रैक्टर लेक्कटवु बने किया परवोम। अदिन काजे माटु पोंगडिंग कीयाना लेवेके घमंड कीयानायो। बदे डावुट हिल्ला माटु उंदी मोटर-कार किया परतेके घमंड कीयाना, दस मोटर-कार बने कीतेके ज्यादा घमंडी आयना लेवेके बचोन ज्यादा मोटर-कार बने कीतेके अचोने घमंडी आयना इन्नोन। इद्रम कीयानायो। 50 साल परेके मावा देश उंदी पूना रूप एतियार अस्के वेने माटु नेटा लेक्का विनम्र मंदाना। अस्के माटु घमंड कीतेके बाकी तोर किन सुडला हूडना लेक्का आयर। माटु उंदी सौ साल परेके वेने घमंड कीयानायो। माटु बस्के वेने घमंड कीयानायो।

मावा इद संविधान उंदी समाजवादी रकम ता संविधान मंता मति इदु उंदी पूर्ण समाजवादी संविधान आयो। इद उंदी संक्रमणकालीन संविधान आंदू। उमदी महान समाजवादी देश ता निर्माण कीयाना संघर्ष लोप्पा माटु पूरा देश ता जनता तुन एकता कीयाना अनि एकता किया परना लेक्कटा सब्बे ताकत कुना संगे एकता कीयाना। इद संविधान तुन इदे उद्देश्य काजे बने किताद मत्ता।

आखरी ते स्पष्टीकरण के उचुन पोल्लोंग कियाकाना उचुन मुल उचुन लोकुरा असाधारण नम्रता ता कारण ते उचुक धारांग संविधान ता ड्राफ्ट तल गुचिह किताद मंता इंजी इंतोर। इदिना कारण नम्रता आयवा इद्रम ता धारांग कुन शामिल कीयाना गलत ओसो अवैज्ञानिक मंदितांग। मावा लेक्कटा जनता ना जनवादी राज्य ता संविधान लोप्पा इद्रम ता गलत

घारांग रास्ताद हिल्ला। विज्ञान लोप्पा नम्रता मंदाना लेवेके मंदानायो इंजी सवाल तेदिता। संविधान बने कीयाना वेने उंदी विज्ञान ता पोल्लो मंता। माटु सिर्फ विज्ञान पोरो विश्वास कीयाना, बाकी बदिनाए पोरो आयो। इत्तेके बदे वेने अंधविश्वास तासनायो। सही तुन सही अनि गलत तुन गलत इंदाना, अदिन संबंध चीनी लोरा संगे मत्तेकाई लेवेके विदेशिरा संगे अदिन संबंध हातोरा संगे मत्तेकाई लेवेके पिसिर मत्तोरा संगे, अदिन अंधविश्चे इनमूडायरा। माटु अंधविश्वास तुन तिलांजली हियाना। अदु पाड़ना मत्तेकाई माटु सिर्फ सही पोरो ने विश्वास तासना गलत पोरो आयो। इदे आयवा माटु गलत ता आलोचना वेने कीयाना, इदे उंदी वैज्ञानिक रुझान आंदू।

नोट

- 1) इगा नवम्बर 1911 ते छिंग सरकार जारी किता “उन्नीस महत्वपूर्ण संवैधानिक धारांग” ना बारे ते वेहताद मंता।
- 2) “चीन गणराज्य ता अस्थाई संविधान” ता ऐलान डा. सुन यात-सेन कित्तोरा ओरु 1911 ता क्रांति पेरके चीन गणराज्य ता अस्थाई राष्ट्रपति पद एतितोरा।
- 3) इगा य्वान श-खाए सरकार ता 1913 ता स्वर्ग मंदिर संविधान ता ड्राफ्ट, अदिना 1914 ता अस्थाई संविधान, छाओ खुन सरकार ता 1923 ता संविधान ओसो त्वान छी-रुइ ना अस्थाई सरकार ता 1925 ता संविधान ता ड्राफ्ट ता बारे ते वेहताद मंता।

उंदी महान समाजवादी देश ता निर्माण काजे भरपूर कोशिश कीयाना³⁵ 15 सितम्बर 1954

प्रतिनिधि कामरेड्स,

चीन लोक गणराज्य ता पहली राष्ट्रीय जन प्रतिनिधि सभा ता पहली अधिवेशन नेंडु मावा राजधानी पेकिंग ते शुरू आया मंता।

प्रतिनिधिरा कुल संख्या 1226 मंता, ताना लोप्पा 1211 लोकुर तम्मा पोरोल रजिस्टर ते रास्तोर अनि 15 प्रतिनिधि बीमार मत्तांकु ओसो बदे कारण ते छुट्टी एतसी मत्तांकु तम्मा पोरोल रासा परबोर आतोर। 70 प्रतिनिधि पोरोल रासतोर मति वेल्ले बीमार मत्तांकु ओसो उचुन कारण कुना कारण ते इगा वाया परताद हिल्ले। नेंडु मीटिंग लोप्पा प्रतिनिधिरा असल संख्या 1141 मंता, अद्रमासी कोरम पूरा आता।

चीन लोक गणराज्य ता पहली राष्ट्रीय जन प्रतिनिधि सभा तुकू मुन्ने अधिवेशन तुन महत्वपूर्ण का काम सौंपे किताद मंता।

वर्तमान अधिवेशन ता काम,

संविधान तुन स्वीकार कीयाना,

बचोनो महत्वपूर्ण कानून बने कीयाना,

सरकार ता काम ता रिपोर्ट तुन स्वीकार कीयाना,

राज्य ता पूना नेतृत्वकारी पदाधिकारीरा चुनाव कीयाना।

मावा वर्तमान अधिवेशन उंदी महान ओसो ऐतिहासिक महत्व ता अधिवेशन आंदू। इद 1949 ते मावा लोग गणराज्य ता स्थापना पेरके मावा

³⁵ चीन लोक गणराज्य ता राष्ट्रीय जन प्रतिनिधि सभा ता पहली अधिवेशन लोप्पा उद्घाटन भाषणा

जनता दोरकी कित्ता पूना सफलता अनि पूना प्रगति ता चिन्हा आंदू इद अधिवेशन लोप्पा मानेमाता संविधान मावा देश लोप्पा समाजवादी काम तुन वेल्ले प्रोत्साहन हियारा।

मावा आम काम उंदी महान समाजवादी देश ता निर्माण कीयाना, विश्व शांति ता राका कीयाना ओसो मानव जाति ता प्रगति काम तुन मुन्ने ओयला काजे कीयाना संघर्ष लोप्पा पूरा जनता तुन एकता कीयाना ओसो विदेश ते तम्मा सब्बे दोस्त लोरा समर्थन दोरकी कित्ता।

मना देश ता जनता मेहनत ते काम कीयाना, सोवियत संघ ओसो बाकी भाईचारा देश कुना अनुभव कुनिगडल करियाना पूरा कोशिश कीयाना। ईमानदार, मेहनती, उंदी-दूसरा तुन प्रोत्साहन हियाना अनि उंदी दूसरा ता सहायता कीयाना, हर रकम ता घमंड तल बचेमायना, मना देश ता आर्थिक, सांस्कृतिक रूप ते पेरके अरसी मंता बचोनो पंचवर्षीय योजनांग लोपा सबसे बेहरा योजना आधुनिक संस्कृति संगे निंडसी मत्ता उंदी महान औद्योगिक देश लेक्का बने कियाला काजे एकताबद्ध आयाना।

मावा काम उंदी न्यायिक कार्य आंदू उंदी न्यायिक कार्य बदे वेने दुश्मन तुकू बस्केने हारेमाया परवो।

मावा काम ता नेतृत्व कीयाना केंद्रीय ताकत चीनी कम्युनिस्ट पार्टी आंदू।

मावा विचार कुना मार्गदर्शन कीयाना सैद्धांतिक आधार मार्क्सवाद-लेनिनिवाद आंदू।

माटु सब्बे मुशिकल कु ओसो तिप्पल कुन दूर कीसी मना देश तुन उंदी महान समाजवादी गणराज्य बने क्रिया परितोम इंजी विश्वास मंता।

माटु मुन्ने दाया मंतोमा।

माटु इंजे उंदी महान ओसो वेल्ले महत्वपूर्ण काम क्रिया मंतोम, उंदी काम कीसोर मंतोम इदिन मावा पुरखा नोर मुन्ने बस्केने कीवोरा।

मावा लक्ष्य जरूर पूरा आयारा।

मावा लक्ष्य पक्का पूरा आयारा।

मावा पूरा देश ता 60 करोड़ जनता उंदी आयना अनि मावा काम
पूरा कियाला भरपूर कोशिश कीयाना! मावा महान मातृभूमि जिंदाबाद!

“लाल भवन ता सपना” बारे ते अध्ययन पोरो चिट्ठी³⁶ 16 अक्तूबर 1954

इद चिट्ठी संगे खी फिंग-पो ना खंडन कियाला काजे रास्ता रेंडु लेख रास्ताद मंता। मीटु अविन पढेमायमुटा हत्ता 30 साल तुकू ज्यादा टाईम ते “लाल भवन ता सपना” ता बारे ते अध्ययन कीयाना ता बारे ते रासना विद्वान लोरा गलत विचार कुना पोरो गंभीर हमला किताद मंता। इव लेख कुना लेखक नौजवान संघ ता इरवुर सदस्य लोर मंतोरा। सबसे मुन्ने ओरु “साहित्यिक गजट” पोरोल ते रास्ता चिट्ठी रासिसी खी फिंग-पो ना आलोचना कीयाना सही मंता या गलत इंजी पूछेमातोरे मति ओरकिन नजरअंदाज कियमूडाता। इद्रम ता परिस्थिति तुकू मजबूर आसी मीटु मातृ-विद्यालय (शानतुंग विश्वविद्यालय) ता वरोर अध्यापक ना पोरोल ते चिट्ठी रास्तोरा। “लाल भवन ता सपना” ता उंदी संक्षिप्त समीक्षा ता खंडन ओना लेख इद विश्वविद्यालय ता पत्रिका “साहित्य, इतिहास ओसो दर्शन” ते प्रकाशित आता। ताना पेरके इद सवाल पेकिंग लोप्पा ओसो उंदी बेरा तेदता। उचुन मुल वाद-विवाद ओसो आलोचना शुरू कियाला काजे इद लेख “पीपुल्स डेली” लोप्पा वेने छापे कीयाना इंजी सुझाव हित्तोरा। मति इद्रम आया परवो आता बारांकु इत्तेके उचुन मुल रक-रकम ता कारण वेहची इदिना विरोध कित्तोर (ताना लोप्पा मुख्य कारण “महत्वहीन लोकुर रास्ता लेख” ओसो “पार्टी ता चिट्ठी स्वतंत्र वाद-विवाद ता मंच आयो”

³⁶ चीनी कम्युनिस्ट पार्टी ता केंद्रीय कमेटी ता राजनीतिक ब्यूरो ता कामरेड्स ओसो बाकी संबंधित लोकुरा पोरोल ते रास्ता उंदी चिट्ठी।

इंजी मत्ता। इद लेख तुन “साहित्यिक गजट” लोप्पा वेने छापे कीयाना अनुमति हीताद मत्ता। ताना पेरके “क्वांगमिंग दैनिक” ता “साहित्यिक विरासत” लोप्पा खी फिंग-पो रास्ता “लाल भवन ता सपना” ता बारे ते उंदी अध्ययन पोरोल ता पुस्तक ता खंडन किसोरे वीर इरवुर नौजवान लोरा उंदी लेख छपेमाता। हत्ता 30 साल तुकू ज्यादा टाईम ते नौजवान लोरा दिमाग ओसो जीवा ते जहर फैले कीसोर मत्ता क्लासिकी साहित्य लोप्पा हू श ना विचारशाखा ता पूंजीवादी आदर्शवाद खिलाफ इंजे संघर्ष शुरू आयना लेक्का मंता। संघर्ष ता सिद्धांत इरवुर “महत्वहीन लोकुर” बने कित्तोर, अनि “महत्वपूर्ण लोकुर” इदिना बगिल ध्यान हीवोरा अद संघर्ष लोप्पा ओरु हमेशा कित्ता लेक्का बाधा वाटतोर। ओरु आदर्शवाद ता सवाल ता बारे ते पूंजीवादी लेखक लोरा संगे संयुक्त मोर्चा बने कीयाना पक्ष एतितोर, खुद पूंजीवादी वर्ग ता बंदी बनेमांतोर। इद परिस्थिति “छिंग राजदरबार ता अंदरूनी कहानी”¹ ओसो “ऊ श्युन ना जीवनी” पोरोल ता फिल्म तोहतास्केटा परिस्थिति लेक्का मंत्ता। “छिंग राजदरबार ता अंदरूनी कहानी” पोरोल ता फिल्म तुन उचुन मुल देशभक्ति फिल्म इत्तोर मति असल इत्तेके अदु उंदी देशद्रोहीपूर्ण फिल्म मत्ता, देशमेंड तोहताद मंता मति अदिना आलोचना इंजे एवनल आताद हिल्ले। “ऊ श्युन ना जीवनी” ता आलोचना किताद मंता मति तानगडल सबक इंजे एवनल एतितोद हिल्ले। अदे आयवा खी फिंग-पो ना आदर्शवाद तुन वेल्ले बेस सहन किताद मंता मति उचुन “महत्वहीन लोकुरा” आलोचनात्मक निबंध कुना पोरो प्रतिबंध वाटताद मंता। इद पोल्लो ध्यान हियाना लेक्का मंता।

बदे डावुट हिल्ला खी फिंग-पो लेक्कटा पूंजीवादी बुद्धिजीविरा बारे ते माटु एकता आयना मति नौजवान लोरा लोप्पा जहर फैले कीयाना सब्बे गलत विचार कुना आलोचना कीयाना। ओरा मुन्ने बस्के आत्मसमर्पण कीयानायो।

नोट

- 1) “छिंग राजदरबार ता अंदरूनी कहानी” उंदी प्रतिक्रियावादी फिल्म मत्ता, अदिना लोप्पा 1900 देशभक्तिपूर्ण ई हो थ्वान आंदोलन ता गलत प्रचार आता अनि साम्राज्यवाद मुन्ने आत्मसमर्पण ता ढिंढोर नेकिहतोर। ल्यू शाओ-ची इद देशद्रोहपूर्ण फिल्म तुन “देशभक्तिपूर्ण” इंजी अदिन प्रचार कित्तोर।

चीनी जनता तुन परमाणु बम संगे वेरिय किया परमुड़ आयो³⁷

28 जनवरी 1955

चीन ओसो फिनलैंड दोस्त देश आंदू। मावा संबंध ते शांतिपूर्ण इसाब ते संगे मंजि पिस्वल ता हेय्युंग सिद्धांत कुना पोरो आधार आसी मंता।

चीन ओसो फिनलैंड नडमा बस्केने मुठभेड़ आयो। हत्ता कालम ते यूरोपीय देश कुना लोप्पा सिर्फ ब्रिटिश, फ्रांस, जर्मनी, जारशाही रूस, इटली, आस्ट्रो-हंगेरियन साम्राज्य ओसो हालैंड संगे चीन ता युद्ध आता। ब्रिटिश-फ्रांस संयुक्त सेना ओसो अमेरिका, जापान संगे 8 ताकत कुना संयुक्त सेना हमला कित्ता लेक्का सब्बे देश कु चीन पोरो आक्रमण कियाला वातांग। कोरिया पोरो आक्रमण कियाला काजे शुरू कित्ता युद्ध लोप्पा 16 देश कु शामिल आतांग, अविना लोप्पा तुर्की, लकजमवर्ग वेने शामिल मत्ता। इव सब्बे आक्रमणकारी देशकु शांति प्रिय देश कु मंतांग इंतांग अनि उल्टा कोरिया, चीन पोरो ने आक्रमणकारी मंदाना आरोप वाटितांग।

नेंडु, विश्व युद्ध ता खतरा पैदा कीयाना ओसो चीन तुन धमकी हियाना स्रोत आंदू मुख्य रूप ते अमेरिका जंगबाजा ओरु चीन ता थाइवान ओसो थाइवान जलडमरू पोरो कब्जा कीसी मत्तोर अनि उंदी परमाणु युद्ध शुरू कियाला आलिसंतोर। मावा रेंडु उसूल मंता: पहली, माकिन युद्ध ता जरूरत हिल्ले। दूसरा, बोरे मुन्ने हमला कीतेके माटु दृढ़ता ते जवाबी हमला

³⁷ चीन लोप्पा चुनेमाता पहली फिनिश राजदूत कार्ल-जोहान (काए) संडस्ट्राम परिचय पत्र पेश कियानास्के ओना संगे कित्ता वार्तालाप ता मुख्य मुद्दांग।

कियाकोमा। कम्युनिस्ट पार्टी सदस्य लोर ओसो पूरा राष्ट्र तुन माटु शिक्षित कीयाना। चीनी जनता तुन अमेरिका परमाणु बम संगे वेरियी किया परवो। मावा देश लोप्पा 60 करोड़ आबादी मंता 96 लाख वर्ग-किलोमीटर बेहरा इलाका मंता। अमेरिका तन्ना परमाणु बम ता सुडला डग्गी संगे चीनी राष्ट्र तुन नष्ट किया परवो। अमेरिका परमाणु बम चीन पोरो वाटतास्के भूमि तुकू आरपार आसी उंदी बूका पंडसियानाचोन शक्तिशाली हिल्ले।

मावगा कोद्दा ओसो बंदूक ता जोड़ी मंता। अमेरिका अदिनगा विमान ओसो परमाणु बम ता जोड़ी मंता। मति अमेरिका तन्ना विमान ओसो परमाणु बम ता जोड़ी संगे चीन खिलाफ आक्रमणकारी युद्ध शुरू कीतेके चीन कोद्दा ओसो बंदूक ता जोड़ी संगे ताना पोरो जरूर जीत दोरकी कियार। पूरा दुनिया ता जनता मावा समर्थन कियार। पहली विश्वयुद्ध ताकतांकु रूस लोप्पा जारशाही, जमींदार, पूंजीपतिर किन खत्म किताद मंता। दूसरा विश्वयुद्ध ता कारण ते चीन लोप्पा च्यांग काई-शेक ओसो जमींदार लोरा तख्ता पलट किताद मंता, पूर्वी यूरोप ता देश ओसो उचुन एशियाई देशकु मुक्त आतांग। अमेरिका तीसरी विश्व युद्ध शुरू कीतेके 8 लेवेके 10 साल ताकतेके अमेरिका, ब्रिटिश ओसो बाकी इविना भाईचारा देश कुना शासक वर्ग खत्म आयार अनि दुनिया ता ज्यादातर देशकु कम्युनिस्ट पार्टींग ना नेतृत्ववाले देश कुना लेक्का बदलेमायनुंग। विश्वयुद्ध आतांकु जंगबाज लोरा हित कुना लोप्पाने आयवा कम्युनिस्ट पार्टींग, दुनिया ता क्रांतिकारी जनता ना हित कुना जीत आयार। जंगबाज तुन युद्ध शुरू कीयाना मत्तेके ओरा लेक्काने माटु क्रांति कीतोम इंजी ओरा पोरो आरोप वाटना लेवेके “उन्मूलनकारी कार्रवाईंग” कीयानायो। ओरु युद्ध रोमी कीवेके ओरु भूमि पोरो वेल्ले जोम मंदा परवोर आयनुर। ओरु बचोन जल्दी युद्ध शुरू कियानूर अचोने जल्दी ओरु वेने भूमि पोरो टल नीर बने मायनूर। अमेरिका जंग रोमता पेरके शांघाई, यूरोप लेवेके न्यूयार्क ता बदे जागा ते जनता ना संयुक्त राष्ट्र संघ स्थापित आयार।

चीनी कम्युनिस्ट पार्टी ता राष्ट्रीय सम्मेलन ते भाषण मार्च 1955

उद्घाटन भाषण 21 मार्च 1955

चीनी कम्युनिस्ट पार्टी ता राष्ट्रीय सम्मेलन ता डेलिगेट कामरेड्स,
मावा वर्तमान राष्ट्रीय सम्मेलन ता एजेंडा ते मूंड मुद्दांग शामिल
किताद मंता:

1) राष्ट्रीय अर्थव्यवस्था ता विकास ता पहली पंचवर्षीय योजना
ओसो इद योजना ता बारे ते रिपोर्ट, 2) काओ कांग ओसो राओ शू-श ना
पार्टी-विरोधी गठजोड़ ता बारे ते रिपोर्ट, 3) केंद्रीय कंट्रोल कमीशन ता
स्थापना।

संक्रमण कालम ता बारे ते लेनिन ना शिक्षा पोरो आधार आसी
केंद्रीय कमेटी चीन लोक गणराज्य ता स्थापना पेरके दौरकता अनुभव कुना
सारांश तेंडसी 1952 ते राष्ट्रीय अर्थव्यवस्था ता पुनर्स्थापना ता मंजिल
समाप्त आयनास्के संक्रमण कालम काजे पार्टी ता आम कार्यदिशा पेश
किताद मंता। इद आम कार्यदिशा ठोस रूप ते 3 पंचवर्षीय योजनांग
ताकनास्के देश ता समाजवादी औद्योगिकरण ओसो संगेने कृषि,
दस्तकारी ओसो पूंजीवादी उद्योग-वाणिज्य ता समाजवादी बदलाव ता
काम तुन तीरम-तीरम पूरा कीयाना अनि इद्रम चीन लोप्पा उंदी समाजवादी
समाज ता निर्माण ता लक्ष्य पूरा कीयाना। व्यवहार ते पार्टी ता आम

कार्यदिशा सही मंता अदिन लागू कियाला काजे लागू कित्ता सब्बे महत्वपूर्ण नीतिंग, तरीकांग सही मंतांग इंजी साबित आता। मना पार्टी ता सब्बे कामरेड्स ओसो पूरा देश ता जनता ना कोशिश ते काम महान सफलतांग दोरकतांग। मति कमजोरिंग, गलतिंग वेने दिसतांग। माटु तेंडता बचोनो तरीकांग सही मंतांग अनि लागू कीयानास्के पूना अनुभव कुना वेहच ते अविना लोप्पा संशोधन कीयाना जरूरी मंता।

राष्ट्रीय अर्थव्यवस्था विकास ता पहली पंचवर्षीय योजना पार्टी ता आम कार्यदिशा तुन साकार कीयाना दिशा ते उंदी वेल्ले महत्वपूर्ण निर्णय मंता। वर्तमान राष्ट्रीय सम्मेलन इद योजना ता ड्राफ्ट पोरो मावा व्यवहारिक अनुभव ता वेहच ते वेल्ले बेस विचार-विमर्श कीयाना अनि अदिन अमल कीयाना लेक्का बने कीयाना।

मावा लेक्का अर्थव्यवस्था मुन्ने वेल्ले पेरके अरसी मत्ता बेहरा देश लोप्पा समाजवादी समाज निर्माण कीयाना काम हल्को हिल्ले। माटु 3 पंचवर्षीय योजनांग ताकनास्के उंदी समाजवादी समाज ता निर्माण किया परिंतोम, मति उंदी शक्तिशाली, उन्नत औद्योगिकरण समाजवादी देश ता निर्माण कियाला काजे बचोनो दशाब्दिंग एवनल (50 साल एवनल इतेके इद शताब्दी ता उत्तरार्ध ता पूरा कालम एवनल), कठोर परिश्रम कीयाना जरूरत मंता। मावा काम माटु जनता नड़मा ता संबध कुन खासकर मजदूर वर्ग ओसो किसान लोरा नड़मा ता संबध कुन बेस निभे कीयाना इंजी मांग कीता। मावा देश ता विभिन्न राष्ट्रीयतांग नड़मा ता संबध कुन बेस निभे कीयाना, माटु उंदी महान समाजवादी देश सोवियत संघ संगे, जनता ना लोकशाही वाले देश संगे घनिष्ठ सहयोग बेरसी कीयाना काम लगातार ताकना, पूंजीवादी दुनिया ता सब्बे शांतिप्रिय देश, जनता संगे सहयोग बेरसी कीयाना इंजी मांग कीता।

माटु मना काम लोप्पा सफलतांग दोरकी कित्तास्के मना लोप्पा घंमड पैदा आयानायो, माटु सब्बे कामरेड्स विनम्र मंदाना ओसो देश ता जनता तल करियाना अनि गलतिंग कीयानायो इंतोम। नन्ना वर्तमान पार्टी सम्मेलन ते इव सब्बे पोल्लोंग ओसो उंदी कीयाना जरूरी मंता। काओ

कांग ओसो राओ शू-श ना पार्टी-विरोधी समस्या तले मना पार्टी लोप्पा अति उत्साह, घमंड मंता इंजी स्पष्ट आतां अनि उचुन कामरेड्स नडमा बदे डावुट हिल्वा इद समस्या गंभीर रूप एतसी मंता। इविना पोरो काबू कियाला सफल आयवेके समाजवादी समाज ता निर्माण काम पूरा आया परवो आयार।

मीटु सब्बे कामरेड्स काओ कांग ओसो राओ शू-श ना पार्टी-विरोधी गठजोड़ ता उदय अचानक आयवा वर्तमान मंजिल ते मावा देश लोप्पा ताकसोर मत्ता तीव्र वर्ग-संघर्ष ताए तीव्र रूप मत्ता। इद पार्टी-विरोधी गठजोड़ ता षडयंत्रकारी उद्देश्य मत्ता। मना पार्टी लोप्पा दरार पुट्टी कीयाना, षडयंत्रकारी तरीकांग संगे पार्टी राज्य ता सर्वोच्च सत्ता पोरो कब्जा कीसी ओसो उंदी बेरा प्रतिक्रांतिकारी शासन ता स्थापन कियाला काजे हरीं तेरियाना मत्ता। केंद्रीय कमेटी ता एकीकृति नेतृत्व ते मावा पूरा पार्टी इद पार्टी-विरोधी गठजोड़ तुन खत्म कित्ता। अद्रमासी मुन्ने तुकी ज्यादा एकताबद्ध ओसो सुदृढ़ आता। इद समाजवादी काम काजे मावा संघर्ष ता उंदी महत्वपूर्ण जीत मत्ता।

काओ कांग ओसो राओ शू-श ना समस्या मना पार्टी काजे उंदी महत्वपूर्ण सबक मत्ता। सब्बे सदस्य लोर इदिन उंदी चेतावनी समझेमायना अनि पार्टी लोप्पा इद्रम ता घटनांग वायना कालम ते बस्केने आयला हियानायो। काओ कांग ओसो राओ शू-श पार्टी लोप्पा षडयंत्र कित्तोर, गुप्त कार्रवाईंग कित्तोर, कामरेड्स ना लोप्पा फूट वाटना कोशिश कित्तोर अनि तम्मा गतिविधिं किन मकिह कियाला काजे मास्क करतोर। इव सब्बे लब्बड़ ओसो लज्जा हिल्वा लेक्का कित्ता कार्रवाईंग मत्तांग, इविना लोप्पा जमींदार वर्ग ओसो पूंजीपति वर्ग तावे मत्तांग। “कम्युनिस्ट पार्टी ता घोषणापत्र” लोप्पा मार्क्स ओसो एंगेल्स “कम्युनिस्ट तम्मा विचार कुना उद्देश्य कुन मकिह कीयाना लब्बड़ ता पोल्लो इंजी आल्संतोर” इत्तोर। वरोर कम्युनिस्ट मत्तांकु ओसो इदिन ज्यादा वरोर वरिष्ठ पार्टी कार्यकर्ता मत्तांकु माटु सब्बे तोर राजनीतिक रूप ते स्पष्ट व्यवहार कीयाना अन तम्मा राजनीतिक विचार कुन खुल्लम खुल्ला पेश कीयाना अनि हर महत्वपूर्ण

राजनीतिक मुद्दा ता पक्ष लेवेके विपक्ष ते मना राय तासला हमेशा तैयार मंदाना। माटु काओ कांग ओसो राओ शू-श ना हरदे ओसो ओना लेक्का षडयंत्र इनपडे कीयानायो। इद उंदी समाजवादी समाज निर्माण कीयाना उद्देश्य ते केंद्रीय कमेटी पाडना अनुशासन-निरीक्षण कमीशन ता जागा ते पार्टी संविधान अनुसार उंदी केंद्रीय कंट्रोल कमीशन ता स्थापना कीयाना जरूरी मंता इंजी समझेमांता। इदिना उद्देश्य तीव्र वर्ग संघर्ष काजे पूना कालम ते पार्टी अनुशासन तुन मजबूत बने कीयाना, कानून, अनुशासन ता उल्लंघन कीयाना सब्बे रकम ता कार्रवाईंग खिलाफ संघर्ष तेज कीयाना मत्ता। खासकर काओ-राओ ना पार्टी विरोधी गठजोड़ लेक्कटा घटनांग, पार्टी हितकुन गंभीर रूप ते नुकसान कींतांग, इविनगडल बचेमायना।

हत्ता कालम ते दोरकता विभिन्न सबक कुन हूडसोर व्यक्तिगत बुद्धि सिर्फ सामूहिक बुद्धि काल्पसी वेल्ले बेस इस्तेमाल कीतेके गलतिंग कम आंतांग। केंद्रीय कमेटी, सब्बे स्तर ता पार्टी कमेटींग सामूहिक नेतृत्व ता उसूल कुनापोरो नितसी मंदाना, रेंडु रकम ता भटकाव, व्यक्तिगत तानाशाही ओसो विकेंद्रीयता ता विरोधी जारी तासना जरूरी मंता। माटु सामूहिक नेतृत्व ओसो व्यक्तिगत जिम्मेदारी रेंडासी उंदी दूसरा संगे जुड़ेमासी मंतांग इंजी समझेमायना अनि सामूहिक नेतृत्व ता उसूल कुना उल्लंघन कीयाना व्यक्तिगत जिम्मेदारी, व्यवक्तिगत तानाशाही रेंडासी उंदी दूसरा ता विपरीत मंतांग।

वर्तमान अंतरराष्ट्रीय परिस्थिति मावा समाजवादी निर्माण काजे अनकूल मंता। सोवियत संघ नेतृत्व कीयाना समाजवादी ग्रुप शक्तिशाली मंता, अदिना कैडर एकताबद्ध मंतांग अनि साम्राज्यवाद ग्रुप कमजोर मंता, बस्केने हल आयवा अंतरविरोध, संकट संगे निंडसी मंता। मति माटु इंजे वेने साम्राज्यवादी ताकत ता घेराव ते मंतोम माटु हर आपातकालीन परिस्थिति ता सामना कियाला काजे तैयार मंदना। साम्राज्यवादर वायना कालम ते युद्ध शुरू कीतेके ओरु अचानक आक्रमण कीयाना संभावना मंता, ओरु दूसरी विश्वयुद्ध लोप्पा कित्ता लेक्का। अदिन काजे माटु मानसिक, भौतिक रूप ते तैयार मंदाना, अनि इद्रम अचानक आयना घटना

कुना सामना कीयाना। इदु समस्या ता दूसरा पहलू आंदू। दूसरा पहलू देश लोप्पा पिस्ता प्रतिक्रांतिकारी ताकत कु इंजे वेने वेल्ले सक्रिय मंतांग, माटु इद तथ्य कुना पोरो आधार आसी योजनाबद्ध रूप ते ओसो फर्क कीयाना तरीका लागू कीसोरे ओरी पोरो हमला कीयाना। इद्रम कीतेके इव मकसी मत्ता प्रतिक्रांतिकारी ताकत कुन ओसो वेल्ले कमजोर बन कियमूडंता, मावा समाजवादी निर्माण सुरक्षा गारंटी कीयाना। माटु इव रेंडासी पहलुंग ना बारे ते सही निर्णय एतितेके मना दुश्मन गंभीर नुकसान आयोर आयनूर; लेवेके माटु गलितंग कीयाना संभावना मंता।

कामरेड्स इंजे माटु पूना ऐतिहासिक कालम तल वेंडा मंतोम। 60 करोड़ आबादी वाले पूर्वी देश तुन, समाजवादी क्रांति कीयाना, मना इतिहास ता दिशा बदले कीयाना ओसो तन्ना बदलाव किया ठोस रूप ते 3 पंचवर्षीय योजनांग ताकनास्के तन्ना बुनियादी औद्योगिकरण, कृषि, दस्तकारी ओसो पूंजीवादी उद्योग-वाणिज्य ता समाजवादी बदलाव काम पूरा कियाला, उचुके दशाब्दिंग लोप्पा दुनिया ता सबसे शक्तिशाली पूंजीवादी देश कुना बराबर एव्वना अनि अविनकु वेने मुन्ने पेसना, इव सब्बे काम पूरा कीयाना अनिवार्य रूप ते जनवादी क्रांति कालम लेक्का लेवेके अदिनकु वेने ज्यादा मुश्किल कुना सामना किया लागियरा। मति कामरेड्स माटु कम्युनिस्ट लोकुर मुश्किल कुना संगे दृढ़ता ते सामना कीतोरा। कार्यनीतिक रूप ते माटु सब्बे मुश्किल कुन पूरा-पूरा सुरता तासना। माटु हर ठोस मुश्किल ता बारे वेल्ले सही रुझान पोय्यना, अदिन हल कियाला काजे जरूरी परिस्थिति तैयार कीयाना ओसो तरीकांग ना अध्ययन कीयाना, मुश्किल कुन उंदी-उंदी कीसी उंदी-उंदी समूह लेक्का दूर कीयाना। हत्ता उचुक दशाब्दिंग ना मना अनुभव कुनल माटु इद्रम ता हर मुश्किल तुन दूर कियाला सफल आतोम इंजी साबित आता। कम्युनिस्ट लोरा मुन्ने हर रकम ता मुश्किल कुन तल्ला वरहा लागितारा। “मेड्वांग तल्ला वरहिंतांग अनि डोड्वांग हरीं हींतांग” इंदाना पीटो लेक्का। इदिनगडल माटु मुश्किल कुन कम समझेमांतोम। इगा माटु रणनीतिक पोल्लोंग किया मंतोम, सम्पूर्ण परिस्थिति ता पोल्लोंग किया मंतोम।

मुश्किल बचोन बेहरा मत्तेकाई माटु हल्कोए वेंडा परितोमा मुश्किल सिर्फ समाज लोप्पा मत्ता मावा दुश्मन ओसो प्रकृतिए मावा मुन्ने निल्पी कींता। माटु साम्राज्यवादी, स्थानीय प्रतिक्रांति, मावा पार्टी लोप्पा मत्ता ओरा एजेंट लेक्कटोर सिर्फ डोलसोर मत्ता ताकत आंदू, माटु खुद पूना ताकत आंदोम अनि सच्चाई मावा पक्ष ते मंता। ऐतिहासिक रूप ते माकिन इद पोल्लो समझेमायो। 1921 ते मावा पार्टी ता स्थापना कीतोम अस्के अदु वेल्ले सुडला पार्टी मत्ता अनि ओरगा सिर्फ उचुने दर्जन सदस्य मत्तोर मति पेरके ओरा ताकत बेरससोर हत्ता। अदु तन्ना शक्तिशाली स्थानीय दुश्मन ता तख्ता पलट कियाला सफल आता। प्रकृति पोरो वेने उंदी दुश्मन लेक्काने जीत दोरकी कियमूड़ांता। प्रकृति आई समाज आई रेंडासी ना लोप्पा सब्बे पूना ताकत कु जीडिंतांग। इदिना उल्टा सब्बे पाड़ना ताकत कुन अविना संख्या बचोन बेहरा मत्तेकाई, अनिवार्य रूप ते खत्म कियमूड़ायर। अदिन काजे माटु इदु दुनिया लोप्पा मत्ता सब्बे मुश्किल कुना सामना किया परिमंतोमा अवु बचोन बेहरा मत्तेकाई अविन माटु वेल्ले तिरस्कार कीयाना, इदे मावा आशावाद आंदू इद उंदी वैज्ञानिक आधार पोरो नितसी मंता। माटु मार्क्सवाद-लेनिनवाद ओसो प्राकृतिक विज्ञान ता जानकारी बेरसी कीतेके, माटु असल दुनिया ता नियम कुना जानकारी बेरसी कीतेके, मनोगतवाद रकम ता गलतिंग कम कीतेके माटु क्रांति ओसो निर्माण लक्ष्य जरूर पूरा किया परितोमा।

समापन भाषण

31 मार्च 1955

कामरेड्स,

सब्बे लोकुर भाषण समाप्त आता। इंजे नन्ना इव समस्यांग ना बारे ते उचुन पोल्लोंग वेहाकानः वर्तमान सम्मेलन ता मूल्यांकन, पंचवर्षीय

योजना, काओ कांग ओसो राओ शू-श ना समस्या, वर्तमान परिस्थिति ओसो आठवी कांग्रेस।

1

इंजेटा सम्मेलन ता मूल्यांकन

ज्यादातर कामरेड्स सम्मेलन पूराए सफल आता इंजी सहमत मंतोरा। येनान ता शुद्धीकरण पेरके इद उंदी दूसरा शुद्धीकरण सम्मेलन आंदू। जनवाद तुन बेरसी किताद मंता, आलोचना, आत्मलोचना अमल किताद मंता। अदिनके माटु वरोर दूसरोर किन मुन्ने तुकू ज्यादा समझेमातोम, मुन्ने तुकू ज्यादा समान दिशा ते आल्सा परतोम अनि उंदी समझादारी दोरकी किया परतोम। मावा नड़मा मुन्ने वेने समझदारी मत्ता मति उचुन सवाल कुना बारे मावा राय अलग-अलग मत्ता इद सम्मेलन संगे माटु उंदी समझदारी ते वाया परतोम। विचारधारा, राजनीति ओसो विभिन्न नीतिंग बारे ते मावा समझदारी पोरो आधार आसी मना पार्टी ओसो बेस एकताबद्ध आयारा कामरेड चओ ऐन-लाई वेहत्ता लेक्का पार्टी ता सातवीं राष्ट्रीय कांग्रेस, अदिनकु मुन्ने पूरा पार्टी लोप्पा कीयाना विचारधारात्मक, राजनीतिक शुद्धीकरण मना पार्टी ता विचारधारात्मक एकता ता बुनियाद बनेमाता। इद एकता ता बुनियाद पोरो आधार आसी साम्राज्यवाद, सामंतवाद ओसो नौकरशाही-पूंजीवाद खिलाफ जनवादी क्रांति जीड़ा परितोम अनि वर्तमान सम्मेलन माटु समाजवाद जीत बगिल ओयारा।

इद सम्मेलन मावा पार्टी ता स्तर मुन्ने तुकू बचोनो पोरो तेदता इंजी साबित किता। मना पार्टी सिर्फ दस साल मुन्ने आता सातवी कांग्रेस तल आयवा 1949 ओसो 1950 ते आता सातवी केंद्रीय कमेटी ता दूसरी, तीसरी पूर्ण अधिवेशन तल इंजे एवनल बचोनो बेहरा डाका वाटताद मंता। इद सम्मेलन मावा प्रगति किन हर्हि तोहत्ता।

माटु इतिहास ता उंदी पूना कालम ते नेंगतोम, ताना लोप्पा बदे वेने काम कैदे पोयंतोम, आल्संतोम अदु समाजवादी औद्योगीकरण, समाजवादी बदलाव ओसो मावा राष्ट्रीय सुरक्षा ता आधुनिकीकरण संगे

जुड़ेमासी मंदिता, अनि परमाणु ताकत संगे जुड़ेमायना काम वेने कियाकोमा पूरा पार्टी ता कामरेड्स मना काम किन गंभीर रूप ते किंतोर, उचुन मुल इंजे मना काम ते गंभीर मन्नोर आंतोर, इद पोल्लो इद सम्मेनल ते मत्ता कामरेड्स कुना पोरो वेने लागू आंता। डाक्टर लोराए उदाहरण हूडाटू। उचुन डाक्टर लोर आपरेशन किया परितोर, उचुन डाक्टर्स किया परोरा। उचुन डाक्टर्स नस ते इंजेक्शन हिया परितोर अनि उचुन मुल इद्रम किया परवोर। उचुन डाक्टर्स सिर्फ तोला पोरो सुई वाटा परितोर। उचुन कामरेड्स मना काम ता गंभीरता तुन समझेमायोर मति ज्यादातर लोकुर इदिन समझेमांतोर, करियाता ओसो निपुण मत्तोर। संख्या वेल्ले मंता। इद सम्मेलन ताकनास्के साबित आता। बारांकु इत्तेक इंजे मावा मुन्ने पूना समस्यांग वात्ता, समाजवादी औद्योगिकरण, समाजवादी बदलाव, उंदी पूना सुरक्षा व्यवस्था, पूना कार्यक्षेत्र संबंधित समस्यांग वातांग। मावा काम पूना परिस्थिति इसाबते खुद किन तैयार कीयाना, काम किन गंभीरता ते कियाला एक्सपर्ट आयाना मंता। अदिन काजे इंजे मना काम ता गंभीरता पुन्नोर ओसो सिर्फ उंदी ओदा मंतोर, ओरकिन शिक्षित कियाला एक्सपर्ट आयना जरूरी मंता।

काओ कांग ओसो राओ शू-श ना पार्टी-विरोधी गठजोड़ खिलाफ ताकी कित्ता संघर्ष मावा पार्टी तुन वेल्ले मुन्ने ओयर।

माटु पार्टी लोप्पा ओसो बाहर मत्ता 50 लाख बुद्धिजीविर, सब्बे स्तर ता कार्यकर्ता लोरा लोप्पा द्वन्द्वात्मक भौतिकवाद ता प्रचार-प्रसार कीयाना, अस्के ओरु इदिन लागू कियानोर ओसो आदर्शवाद ता विरोध कियानोर। अस्केने माटु सैद्धांतिक कार्यकर्ता लोरा उंदी शक्तिशाली फौज तैयार किया परितोम, माकिन इदिना सख्त जरूरत मंता। इद वेने उंदी वेल्ले बेसता पोल्लो आयर।

माटु दसियों लाख लोकुरा मार्क्सवाद सिद्धांत आधार मंदना द्वन्द्वात्मक भौतिकवाद ओसो ऐतिहासिक भौतिकवाद ता अध्ययन कियानोर, सब्बे रकम ता आदर्शवाद ओसो यांत्रिक भौतिकवाद ता विरोध कियानोर। उंदी शक्तिशाली फौज बने कीयाना योजना तैयार

कीयाना। इंजे वेल्ले कार्यकर्ता सैद्धांतिक काम किया मंतोर, मति इंजे एवनल सैद्धांतिक कार्यकर्ता लोरा उंदी शक्तिशाली फौज आयवा सुडला फौज वेने बनेमात्ताद हिल्ले। इद्रम ता फौज लेवा मना पूरा पार्टी काम, मना देश ता समाजवादी औद्योगीकरण ओसो समाजवादी बदलाव, मावा राष्ट्रय प्रतिरक्षा ता आधुनिकीकरण, परमाणु ताकत ता खोज काम मुन्ने दाया परवो ओसो सफल आया परवो। अदिन काजे नन्ना सब्बे कामरेड्स दर्शनशास्त्र ता अध्ययन कीयाना इंजी सुझाव हीताना। दर्शनशास्त्र पोरो इंटेरेस्ट मंदना, अदिन पढ़ेमायला आदत मंदना कामरेड्स वेल्ले कम मंतोरा। इद्रम तोर पुस्तकिंग लेवेके सुडला-सुडल लेख पढ़ेमायना शुरू किया परितोर, ओरा लोप्पा इंटेरेस्ट पैदा आतेके 70 हजार लेवेके 80 हजार शब्द मंदना, पेरेके बचोनो लाख शब्द मंदना पुस्तकिंग वेने पढ़ेमाया परितोरा। मार्क्सवाद संगे ज्ञान दोरकी कीयाना बचोनो शाखांग मंतांगः मार्क्सवादी दर्शनशास्त्र, मार्क्सवादी अर्थशास्त्र ओसो मार्क्सवादी समाजवाद इत्तेके वर्ग संघर्ष ता सिद्धांत। मति मार्क्सवादी दर्शनशास्त्र इव सब्बेटविना बुनियाद आंदू। अदिन लागू कीवेके मावा बदे समान पोल्लोंग लेवेके समान नियम बनेमाया परवो, माटु समस्यांग कुन स्पष्ट समझेमायवा लेवा तर्क-वितर्क कीसोर मंदकोम। उंदी बेरा द्वन्द्वात्मक भौतिकवाद तुन लागू कीतेके वेल्ले समस्यांग जेक आयनुंग अनि वेल्ले गलतिंग कीयाना तुकू बचेमाया परितोमा।

2

पहली पंचवर्षीय योजना ता बारे ते

कामरेड्स ना हिसाब ते पंचवर्षीय योजना पोरो विस्तार-विमर्श कीयानास्के ज्यातातर भाषण बेस आता इंतोरा। उचुन भाषणकु वेल्ले बेस मत्तांग, बारांकु प्रतिनिधिर मना बारे ते पूर्ण रूप ते वेहतोर, वेल्ले निपुण लोकर वड़कसोर मत्ता लेक्का मत्ता। मति केंद्रीय कमेटी विभाग कुना बगिल तल

उचुन भाषण कुना बारे ते तूलनात्मक रूप ते दोड़ ता स्तर ता मत्तांग अविना लोप्पा विश्लेषण ओसो आलोचना ता कमी मत्ता। विभिन्न जागा तल वात्ता कामरेड्स उचुन भाषण कुना पोरो वेने लागू आंता। इदे आयवा उचुन भाषण कुना लोप्पा फिजूलखर्ची ता गंभीर समस्या ओसो बाकी गलतिंग ना पर्दाफाश कित्तोर मति हल कीयाना तरीकांग पोरो चर्चा किताद हिल्ले। उचुन कामरेड्स इद्रम ता भाषण कुना पोरो होंग आंतोर, नावा हिसाब ते ओरु इद्रम होंग आयना कारण मंता।

नन्ना प्रांतीय, म्युनिसिपल ओसो प्रिफेक्चर पार्टी कमेटींग ना सब्बे सचिव, केंद्रीय विभाग कुना इंचारज सब्बे कामरेड्स तम्मा मार्क्सवादी-लेनिनवादी चेतना ता स्तर बेरसी कीयाना पोरो आधार आसी राजनीतिक, आर्थिक काम लोप्पा निपुण बनेमायना पूरा कोशिश कींतोम इंजी आशा कींताना ओरु राजीनीतिक, विचारधारात्मक काम ओसो आर्थिक निर्माण काम बेस कीयाना जरूरी मंता। आर्थिक निर्माण काम करियाना वेल्ले जरूरी मंता।

स्थानीय अर्थोरिटीकु इद सम्मेलन लोप्पा बचोनो समस्यांग कुन केंद्रीय अर्थोरिटी मुन्ने हल कियला काजे पेश किताद मंता। इद्रम ता समस्यांग कुन हल कियाला काजे केंद्रीय कमेटी मार्गदर्शक उसूलकु तय कित्ता। बाकी समस्यांग ना बारे ते सम्मेलन ता सचिवालय इव समस्यांग कुन तेहना कामरेड्स कलियसी अविना हल परहकना अनि केंद्रीय कमेटी ता निर्णय काजे ताना मुन्ने रिपोर्ट पेश कीयाना।

इदे आयवा वेल्ले समस्यांग हल कीयानास्के केंद्रीय विभाग स्थानीय अर्थोरिटी संगे सहयोग कियाला आल्संतता। स्थानीय पार्टी कमेटींग किन विभिन्न जागा ने केंद्रीय विभान ता कारोबार, खासकर राजनीतिक, विचाराधारात्मक कार्य अनुसार देख-रेख कीयाना सहायता कीयाना इंजी अपील कित्ता। स्थानीय पार्टी कमेटींग इव कारोबार कुन तम्मा काम पूरा कियाला काजे मदद कीयाना। अदिन काजे सिर्फ स्थानीय अर्थोरिटी केंद्रीय अर्थोरिटी तले मांग कीयानादे आयवा केंद्रीय अर्थोरिटी वेने स्थानीय अर्थोरिटी तल मांग कींता। पहली पंचवर्षीय योजना तुन सफलतापूर्वक

लागू कियाला काजे केंद्रीय विभाग ओसो स्थानीय पार्टी कमेटिंग उंदी जीवा आसी पूरा कोशिश कीयाना अनि पूरा श्रम-विभाजन पोरो आधार आसी उंदी दूसरा ता मदद ते काम कीयाना।

3

काओ कांग ओसो राओ शू-श ना पार्टी-विरोधी गठजोड़ ता बारे ते

पहली, उचुन मुल “इद्रम ता गठजोड़ ता अस्तित्व मत्ता या हिल्ले? अगा रेंडु स्वतंत्र राज्य ओसो रेंडु अलग-अलग दुकान कुनाए अस्तित्व मत्ता ओसो गठजोड़ ता अस्तित्व हिल्ला मत्ता?” इंजी पूछेमातोर। उचुन मुल ओरु बदे दस्तावेज तोहोर अनि काओ ओसो राओ नडमा बदे गठजोड़ मत्तेके बदे रकम ता समझौता आयना वेने जरूरी मत्ता। इद समझौता ता लिखित रूप मंदाना जरूरी मत्ता। बेगाने लिखित समझौता हिल्ले, बेगाने दिस्सो। माटु काओ कांग ओसो राओ शू-श ना नडमा गठजोड़ जरूर मत्ता इंजी माटु बद्रम पुत्तोम? मुन्ने माटु वित्तीय, आर्थिक कार्य ता बारे सम्मेलन ते काओ कांग ओसो राओ शू-श संयुक्त काम कितादिना बारे ते पुत्तोमा दूसरी बेरा माटु राओ शू-श संगठनात्मक कार्य बारे ते सम्मेलन ताकनास्के पार्टी विरोधी कार्रवाईंग लोप्पा चांग श्यू-शान संगे एकता कितास्के पुत्तोमा तीसरी बेरा माटु राओ शू-श ना खुद तन्नाए वेहतास्के पुत्तोमा ओरु “इंजेटल क्वो फंग केंद्रीय कमेटी ता संगठन विभाग ता धुरी लेक्का काम कियार” इतोर। राओ शू-श संगठन विभाग ता निर्देशक मत्तोर, काओ कांग ना विश्वासनीय क्वो फंग ओना धुरी बनेमाया मंतोर। चौथी बेरा माटु काओ कांग ओसो राओ शू-श आन च-वन गैर-कानूनी चिट्ठी संगे तैयार किता राजनीतिक ब्यूरो ता सदस्य ना प्रस्ताव ता वेल्ले प्रचार कितोर। अदिन काजे आन च-वन किन अनुशासनात्मक चेतावनी किताद मत्ता। काओ कांग, राओ शू-श ओसो उचुन इद लिस्ट तुन संगठनात्मक कार्य सम्मेलन

लोप्पा शामिल आता सब्बे लोकुरा लोप्पा प्रचार कित्तोर। अदिन दक्षिण ता प्रांत कुना लोप्पा वेने प्रचार कित्तोर। अदिना इचोन ज्यादा प्रचार-प्रसार कीयाना उद्देश्य बाता मत्ता? पांचवी, माटु काओ कांग रेंडु बेरा नावा मुन्ने राओ शू-श किन बचे कीयाना राय हित्तोर अनि राओ शू-श काओ कांग किन आखरी एवनल बचेकीसोर मत्तास्के पुत्तोमा काओ कांग राओ शू-श वेल्ले मुश्किल ते अरतोर इंजी नाकिन वेहतोर अनि ओनकिन मदद कियाला वेहतोर। ओना मदद बारांकु किया मंतिन इंजी पूछेमातान? नन्ना वेने पेकिंग ते मंता, राओ शू-श वेने। ओरु तन्ना नीकिन बारांकु लोहतोर सीधा नावगा वासी बारांकु वड़कोर? और तिब्बत ते मंजी वेने चिड्डी लोहा परिंतोर। दूसरी बेरा ओरु काओ कांद ना पर्दाफाश आयना उंदी दिव्या मुन्ने ओरु ओसो उंदी बेरा राओ शू-श किन बचे कीयाना कोशिश कित्तोर। राओ शू-श आखरी एवनल काओ कांग किन बचे कीयाना कोशिश कित्तोर अनि काओ कांग संगे आता “अन्याय” ता बदला एतला आल्सतोर। काओ कांग किन पर्दाफाश कियाला काजे कित्ता केंद्रीय कमेटी ता राजनीतिक ब्यूरो ता विस्तृत मीटिंग ते नन्ना मुन्ने पेकिंग ते रेंडु हेडक्वार्टर मत्तांग इत्तान: पहली हेडक्वार्टर नावा नेतृत्व ते ताकिंता। दूसरा दूसरोरा नेतृत्व ते ताकींता। ओरु गुप्त रूप ते काम कींतोर। पार्टी लोप्पा राजनीतिक नेतृत्व ता स्रोत बचोन मत्ता? इगा वेहता बचोनो तथ्य कुना पोरो आधार आसी अव रेंडासी ना नड़मा उंदी पार्टी-विरोधी गठजोड़ जरूर किताद मंता। अवु रेंडु स्वतंत्र राज्य ओसो रेंडु अलग-अलग दुकान मत्तांग।

इंजे नन्ना उचुन कामरेड्स कीयाना डारुट ता चर्चा कियाकन। ओरु बदे लिखिल समझौता हिल्ले अदिन काजे गठजोड़ ता अस्तित्व वेने हिल्ले इत्तोर। इत्तेके षडयंत्रकारी कित्ता पार्टी-विरोधी गठजोड़ तुना सामान्य रकम ता खुला ओसो औपचारिक राजनीतिक ओसो आर्थिक गठबंधन कुना मुन्ने तासना, इव रेंडासी कुन उंदे लेक्का समझेमायना। ओरु साजिश कीसोर मत्तोर, उंदी साजिश काजे बदे वेने लिखित समझौता ता जरूरत मंदिता? लिखित समझौता हिल्लेवेके गठजोड़ आया परवो, रेंडासी पार्टी-विरोधी गुट कुना लोप्पा काओ कांग ओसो राओ शू-श अलग-

अलग नेतृत्व कीसोर मत्तोर किन बाता समझेमायना? काओ कांग चांग श्यू-शान, चांग मिंग-य्वान, चाओ त-च्युन, मा हुंग ओसो क्वो फंग संगे शामिल मत्ता गुट बदे वेने समझौता पोरो हस्ताक्षर किताद हिल्ले। माटु ओरा लिखित समझौता दिस्सो। इद पार्टी-विरोधी गुट ता अस्तित्व तुकू वेने इनकार कीयाना या? लिखित समझौता लेवा माटु गठजोड़ ता अस्तित्व मंदा परवो।

दूसरा, काओ ओसो राओ ना प्रभाव कामरेड्स ना पोरो अलग-अलग स्तर ते अरता उचुन मुल पोरो उचुन-उचुन अरता अनि इरवुर-मुवुर कामरेड्स ना पोरो गहरा प्रभाव अरता। ओरु काओ ओसो राओ संगे बचोनो विषय कुना बारे ते पोल्लोंग कित्तोर, गुप्त कार्रवाईंग कित्तोर, ओरा विचार कुना प्रचार-प्रसार कित्तोर। रेंडु रकम ता लोकुर लोरा लोप्पा फर्क मंता। इद प्रभाव बचोन ज्यादा आतेकाई ओरा ज्यादातर कामरेड्स वर्तमान सम्मेलन ते तम्मा रुझान स्पष्ट कित्तोर। उचुन मुल ता रुझान वेल्ले बेस मंता अनि इदिना सब्बे तोर स्वागत कित्तोर। उचुन मुलकुना रुझान उचुने बेस मत्ता अनि वेल्ले लोकुर स्वागत कित्तोर मति ताना लोप्पा कमी वेने मत्ता। उचुन भाषणकु बेश मत्तांग मति अविना उचुक अंश कु बेस हिल्ला मत्तांग। ओरु सब्बे तोर कम लेवेके ज्यादा मात्रा ते ओरु बेगा नितसी मंतोर इंजी वेहतोर, माटु इदिन स्वागत कीयाना। ओरु तम्मा रुझान स्पष्ट कियाला कोशिश कित्तोर। उचुन कामरेड्स वड़कला आल्सतोर मति टाईम कम मत्तांकु वड़का परवोर आतोर अनि तम्मा लिखित रिपोर्ट केंद्रीय कमेटी तुकू लोहतोर। लोकुर इंजे वड़का परवोर ओरा समस्या गंभीर हिल्ले ओरकिन सिर्फ हीकताचोन नोमुर् आता ओरु काओ ओसो राओ ना उचुक कार्रवाईंग कुन पुंजी वेने अविना पर्दाफाश कीवोर। वड़कतोर लोप्पा इंजे उचुन मुल पोल्लोंग मकिह क्रिया मंतोर? इंजे पंचवर्षीय योजना ता बारे ते आई लेवेके काओ ओसो राओ ना पार्टी-विरोधी गठजोड़ ता बारे ते सब्बे कामरेड्स तम्मा रिपोर्ट ओसो भाषण कुना संशोधन कियाला काजे वापिस पोय्या परितोर इंज निर्णय आता। वीर कामरेड्स तम्मा शब्द कुना पोरो सावधानी ते विचार कीयाना परितोर, 5 दिव्या ने गलतिंग सुधरे क्रिया

परितोरा सही वड़कतोरा काजे वायना कालम समस्या पुट्टी कीयानायो।
मीटु मीवा भाषण ता संशोधन कितादिने आखरी समझेमायना।

वीर सब्बे कामरेड्स ना सिर्फ पर्यवेक्षण कीयानाए आयवा ओरा
सहायता वेने कीयाना, ओरा गलतिंग सुधरे कियाला मदद कीयाना। ओरु
पर्यवेक्षण कीयानास्के सिर्फ ओरु तम्मा गलतिंग सुधरे कीतोरे, कीवोर इंजी
हूडनायो, ओरकिन गलतिंग सुधरे कियाला सहायता वेने कीयाना। हर
मानेय किन सहायता ता जरूरत मंता। पोवोड़ पुंगार वेल्ले सुंदर मंता मति
अदिन तन्ना सुंदरता बेरसी कियाला काजे आकिंग कुन हरियाली ता
जरूरत मंता। बाड़ा वाटला काजे मूंड मेड़ी ना जरूरत मंता। वरोर बेसता
मानेय किन मुवुर दूसरा मानेय ना सहायता ता जरूरत मंता। वरोरे काम
कियवा लेवा, दूसरोरा सहायता एतना जरूरी मंता। वीर लोकुरा जांच
कीयाना अनि ओरु तम्मा गलतिंग सुधरे किया मंतोर कीवोर इंजी हूडना
जरूरी मंता। सिर्फ जांच कीयाना उंदी नकारात्मक रुझान आंदू अदिनके
ओरकिन सहायता कीयाना वेने जरूरी मंता। काओ, राओ ना प्रभाव ते
वात्ता कामरेड्स सुधरेमासोर मत्तादू हूडसी माटु खुश आयना अनि
ओरकिन सुधरेमायला मदद कीयाना। गलतिंग कियानोरा पोरो
सकारात्मक रुझान लागू कीयाना।

प्रभाव ते वायवा कामरेड्स ना लोप्पा घमंड वायनाए आयो ओरु
इद्रम ता बीमारी तल वेने बचेमायना वेल्ले महत्वपूर्ण मंता। कामरेड्स ना
बारे ते पोरो वेहताद मंता, ओरा लोप्पा उचुन मुल धोखा तित्ता लेक्का मंता
अनि उचुन मुल गंभीर रूप ते फसेमातोर। मति गलतिंग कित्ता पेरके वीर
कामरेड्स सतर्क मत्तेके वायना कालम ते गलतिंग कीवोर आयनुर। उचुक
बीमारिग बीमार आता पेरके तम्माए शरीर ता रक्षा कींतांग। वैक्सीन ता
टीका वाटसी चेचक तुन रोमी कियमूडांता, मति बीमारी ता मोदोल तिंची
इलाज ता गारंटी किया परवोम। मति चेचक संगे बीमार आंतोम। अदिन
काजे मूंड लेवेके 5 साल पेरके उंदी बेरा वैक्सीन टीका वाटना, इत्तेके
वर्तमान सम्मेलन लेक्का ओसो उंदी सम्मेलन केयना। दूसरा कामरेड्स
घमंड कीयाना गलतिंग कीयाना तुकू बचेमायना। काओ ओसो राओ शू-

श ओरगा बारांकु हन्नोर? ओरा बचोनो श्रेणिंग मत्तांग पहली श्रेणी ते ओनकुन तम्मा दुश्मन समझेमायनोर वांतोर ओरु इद्रम तोर किन प्रभावित कीवोर। दूसरा श्रेणी ते ओरु महत्वहीन समझेमायना लोकरु वांतोर ओरकिन इंजे प्रभावित कीयाना जरूरत हिल्ले। बारांकु इत्तेके “देश पूरा कब्जा ते वात्तास्के” वीरु ओना वांतोर इंजी आल्संतोर। तीसरी श्रेणी तोरगा साहस ता कमी मंता अदिनेके ओरु सुरक्षित मत्ता लेक्का मंतोर, ओरा बारे ते वीनकिन जानकारी हिल्ले। इद्रम तोर ओरु तम्मा दुश्मन लेवेके महत्वहीन समझेमायोर मति ओरगा साहस ता कमी मंता। चौथी श्रेणी ते प्रभावति किया परवा लोकरु वांतोर। इद्रम ता महामारी फैलमायला टाईम लागिंता। ओरा मुट्टा तेरियाना काम उंदी साल एवनल लेट आतेके उचुन लोकरु किन इद बीमारी आयो आयार। अदिन काजे ओरु कोल्हार पोयसोरे “हूडाटू, मीटु गलत मंतरि अनि माटु सही” इंतोर! ओरा पर्दाफाश कीयाना काम उंदी साल ओसो लेट आतेके जरूरी वेल्ले लोकरु प्रभावित आयनूरा।

नन्ना ओरु वेहता पोल्लोंग पोरो काओ ओसो राओ ना प्रभाव ते वायनोर ओरा प्रभाव ते वायवोर, रेंडासी रकम ता लोकरु पोरो ध्यान हियाना इंजी आल्संताना।

तीसरा, नियम कुना पोरो माटु हमेशा सतर्क मंदाना, बोरे वेने वड़कना ओसो कीयाना लोप्पा पार्टी नियम कुना खिलाफ मत्तेके ओना संगे मंदानायो। बस्के ओरु वड़कना ओसो कीयाना लोप्पा पार्टी नियम तुन उल्लंघन कींतोर अस्के माटु ओरा संगे एकता कीयानायो। पार्टी नियम कुना संगे मेल तिंजोर मत्ता पोल्लोंग ओसो कार्रवाईंग पार्टी नियम कुना बदे डावुट लेवा दृढ़ता ता समर्थन कीयाना अविन पोयसी ताकना। उदाहरण तुकू पंचवर्षीय योजना, काओ ओसो राओ ना पार्टी गठजोड़ संबंधित प्रस्ताव ओसो रिपोर्ट, मावा सही नीतिंग, पार्टी ता सही नियमकु। पार्टी नियम कुना संगे मेल तिनवा पोल्लोंग कुन दूर कीयाना। अदिना बारे ते स्पष्ट विभाजन रेखा पिडंगना, अदिन मानेमायला इनकार कीयाना। इविन दूर कियाला काजे माटु मना पाड़ना दोस्त, पाड़ना वरिष्ठ अधिकारी, पाड़ना तम्मो दोड़ मत्ता मानेय, पाड़ना सहयोगी, सहपाठी लेवेके मना नगरवासीर,

ग्रामवासी मत्तांकु असफल आंतोमा काओ ओसो राओ ना वर्तमान पार्टी-विरोधी गठजोड़ लोप्पा, पार्टी लोप्पा रेंडु कार्यदिशांग ना संघर्ष कुनास्के माटु बार-बार इदे अनुभव हासिल कीतोमः बोनाए संगे पाड़ना गटिंग संबंध मत्तांकु, ओरकिन बाताले वेने इंदाला पेरके-मुन्ने आंतोर, ओनकिन अलग-थलग कीयाना, ओना पोल्लो मानेमायला इनकार कीयाना ओसो ओरा नड़मा स्पष्ट विभाजन रेखा पिड़ंगला असफल मत्तेके माटु ओसो ज्यादा फंसेमासोर दायकोमा अदिन काजे माटु उंदी सही रुझान पोय्यना अनि उसूल कुना पोरो नितसी मंदाना।

चौथी पोल्लो, उचुन मुल “माटु काओ ओसो राओ ना गलतिंग ना जानकारी मत्ता मति ओरा षडयंत्र कुना जानकारी दोरका परवो”। नावा हिसाब ते इद्रम तोरा रेंडु श्रेणिंग मत्तांगा पहली श्रेणी ते काओ ओसो राओ किन पार्टी उसूल कुना खिलाफ वेल्ले पोल्लोंग कीयानास्के केंजतोम, इदे आयो राओ तन्ना उचुन पार्टी-विरोधी गतिविधिंग ना बारे ते ओरा संगे सलाह-मशविरा वेने कित्ता लोकर वांतोर। इद्रम तोर किन षडयंत्र ता बारे जानकारी मत्ता। दूसरा श्रेणी ते ओरा षडयंत्र ता बारे ते उचुन पुत्तोर अति ओरकिन ओरु षडयंत्र किया मंतोर इंजी समझेमायो। इद्रम तोर किन दोषी मानेमायमूड़ायो, बारांकु इत्तेके षडयंत्र ता पता कीयाना ओरा काजे हल्को हिल्ले। ओरा पार्टी-विरोधी षडयंत्र ता पता केंद्रीय कमेटी 1953 तेने किया परता। वित्तीय, आर्थिक कार्य पोरो सम्मेलन ओसो संगठनात्मक कार्य पोरो सम्मेलन ते आता घटनांग संगे वित्तीय, आर्थिक कार्य पोरो सम्मेलन तुकू मुन्ने आता सब्बे षडयंत्र संगे माटु ओरा व्यवहार सही हिल्ले इंजी समझेमातोमा। वित्तीय, आर्थिक कार्य पोरो सम्मेलन ताकनास्के ओरा असामान्य गतिविधिंग पता कीतोम, हर बेरा ओरा कड़ी आलोचना कीतोमा। अदिनके पेरके ओरु वेल्ले गुप्त रूप ते तम्मा काम शुरू कित्तोर। वीरा बारे माटु 1953 ते पता कीतोमा। वेल्ले जोम काओ कांग ओसो राओ शू-श वेल्ले लब्बड़ ता मानेय आंदूर। इद्रम ता पोल्लोंग मुन्ने वेने आतांगा। चिंगकांगशान मेट्टा ते उचुन गद्दार लोर क्रांति तुकू गद्दारी कियानूर इंजी बदे

डावुट हिल्ला मत्ता। मीटु सब्बे तोर इद अनुभव इद्रम ता अनुभव दोरकी कीतिर।

इगा माटु सबक एतना: नकली बहारी रूप ता धोखा ते इनपडे वायनायो। मना कामरेड्स इद्रम ता रूप संगे वेल्ले धोखा तिंतोर। हर चीज लोप्पा बहारी रूप ओसो अंदरूनी रूप नडमा अंतरविरोध मंदिता। बदे ने बहारी रूप ते विश्लेषण, अध्ययन कीसीए अदिना सही जानकारी दोरकी कीयाना। अदिनके विज्ञान ता जरूरत मंता। इल्लेके माटु सिर्फ सहानुभूति पूर्ण बदे चीज ता जानकारी दोरकसी मत्तेके विज्ञान ता जरूरते हिल्ले आसी मनवड। अध्ययन ता जरूरते हिल्ले। अध्ययन ता जरूरत बहारी रूप ओसो अंदरूनी नडमा ता अंतरविरोध मत्ताके मंदिता। बदे वस्तु ता बाहरी रूप ओसो नकली बहारी रूप नडमा वेने अंतर मंता, बारांकु इत्तेके नकली बहारी रूप नकली मंदिता। अदिन काजे माटु सबक एतना। संभव आताचोन नकली बहारी रूप तुकू धोखा तिंदनायो।

पांचवी पोल्लो, घमंड ता खतरा। खुद किन तीसमारखां समझेमायनायो। मना काम ता सफलत वेल्ले लोकुरा पोरु आधार आसी मंता। उचुने मुल सिर्फ सीमित भूमिका निभे किया परिंतोर। उचुने मुल इत्तेके नेताल ओसो कार्यकर्ता लोर उंदी मान्यता हियाना लेक्का भूमिका निभे कींतोर मति ओरा भूमिका ता प्रमुख महत्व मन्नो आंता। प्रमुख महत्व ता भूमिका जनता ना मंता। कार्यकर्ता ओसो जनता नडमा सही संबंध कार्यकर्ता लोर अगा मंदांना जरूरत मत्तेके वेने असल काम जनताए कींता। कार्यकर्ता लोर सिर्फ नेतृत्व कींतोर, इद्रम ता भूमिका तुन बेरसी कीसी पेश कीयानायो। मीटु लेवेके काम ताका परवो या? मीटु लेवेके वेने काम ताकसोर मंदिथर, इद्रम ता इतिहास ओसो पिस्वल बचोनो तथ्य कुना संगे साबित आता। काओ कांग ओसो राओ शू-श लेवेके काम ताका परवो या? असल इत्तेके काम वेल्ले बेस ताका मंता। त्रात्स्की, चांग क्वो-थाओ ओसो छन तू-श्यू हिल्लेके वेने वेल्ले बेस काम ताकसोर हिल्ले या? वीर सब्बे तोर लब्बड ता लोकुर आंदुर। कनफ्यूशियस वेल्ले मुन्ने डोलतोर, चीन लोप्पा नेंडु मावगा उंदी कम्युनिस्ट पार्टी मंता अदु कनफ्यूशियस

किनकु ज्यादा विवेकशील मंता। अद्रमासी माटु कनफ्यूशियय लेवेके वेल्ले बेस काम ताकी किया परितोम इंजी साबित आता। इदे आयवा बेसता लोकर लेवेके काम ताका परवो इंदाना लेक्का वेने हिल्ले। ओरु लेवेके भूमि तिरियानदु रोमा परिता या? भूमि लगातार तिरियसोर मंदिता। पूरा काम मुन्ने लेक्का ताकसोर मंदियार, अदिनकु उचुन ज्यादा बेस वेने ताका परिता।

मावा रेंडु रकम ता लोकर मंतोरा। पहली रकम तोर अनुभवी मंतोर, मीवा लोप्पाटल वेल्ले लोकर वरिष्ठ मंतिर, दूसरा रकम ता लोकरा लोप्पा पूना नेत्तुर मंता ओरु नौजवान लोर आंदुरा। वीर रेंडु रकमतोरा लोप्पा बोरु ज्यादा बेस मंतोर? बदे डारुट हिल्ला नौजवान लोरे मंतोरा। कामरेड चओ ऐन-लाई वेहेता लेक्का, उचुन कामरेड्स पाड़ना क्रांतिकारी मत्तांके घमंड कींतोरा। इदु वेल्ले गलत मंता। घमंड तुन जायाज मानेमायना इत्तेके नौजवान लोरा घमंड तुन मानेमायना बारांकु इत्तेके ओरगा घमंड कीयाना लेक्का बाताले हिल्ले। चालीस-पचास साल तुकू ज्यादा उमर वालेर बचोन मुयिंतोर अचोने ज्यादा अनुभवी आंतोर अचोने ज्यादा ओरा लोप्पा विनम्रता मंदाना। नौजवानलोर किन माटु निज्जमे अनुभवी मंतोम इंजी खुद महसूस कियाला हीमुटः “वीर मुयतोर जरूर अनुभव तासिंतोर। माटु ओरा मूल्य कम समझेमायनायो। हूडाटु वीरु बचोन विनम्र मंतोरा।” चालीस लेवेके पचास साल तुकू ज्यादा मंदानोर तम्मा समृद्ध अनुभव ता कारण ते घमंड कीतेके बचोन कव्वा वेसन लेक्कटा पोल्लो आयार! इदिना पोरो नौजवान लोर “मीवा पूरा अनुभव अंगडम मंता, मीटु पिल्ला-पेकोर लेक्का व्यवहार कीतिर” इंदानूरा। सुडला पिल्ला-पेकोर उचुन घमंड कीतेके समझमायमूडांता। मति उमर मेंड अनुभव कित्ता लोकर घमंड कीयाना बोल्लना गैर-जरूरी मंता। “बेस व्यवहार कीयाना अनि तन्ना तोका रेंडु कालकु नडमा तासना” जी उंदी पीटो मंता। मानेय ना तोका हिल्लेके वेने तोका कालकु नडमा आहचिसी ताकना पोल्लोंग बारांकु कित्ताद मंता? इद पोल्लो समझे कियाला काजे उंदी नै दा उदाहरण हीतेके आसी मनवड। नै बस्केने तन्ना तोका पोरो तेहिंता अनि बस्के तन्ना रेंडु कालकुना नडमा

आहचिंता। अदिना पिटाई आसोर मत्तास्के अदु जरूर तन्ना तोका कालकुना नड्मा आहचिंता अनि बेस व्यवहार कीसोर मत्तास्के अदु जरूर तोका पोरो तेंहिता। मना सब्बे कामरेड्स खासकर मुयतोर तम्मा तोका पोरो तेहवा लेवा कालकुना नड्मा आहचिसी तासना, घमंड, जल्दबाजी कीयानायो, हमेशा विनम्रता तासना अनि मुन्ने दायना।

छठी पोल्लो, “वामपंथी” ओसो दक्षिणपंथी भटकाव कुनल बचेमायना। उचुन मुल “दक्षिणपंथी तुकु “वामपंथी” मंदाना ज्यादा बेस इंतोर”। इद पोल्लो तुन वेल्ले कामरेड्स बार-बार कींतोर। अस्ल इत्तेके लोप्पा “वामपंथी तुकू “दक्षिणपंथी” मंदाना ज्यादा बेस” इंदानोरा संख्या वेल्ले मंता मति ओरु खुल्लमखुल्ला मानेयमायोरा। सिर्फ ईमानदार मत्तोर इदिन खुला मानेमांतोर। अदिन काजे इगा रेंडु राय हीताद मंता। “वामपंथी” इत्तेके बाताल? इत्तेके वर्तमान परिस्थिति-विकास तुकू मुन्ने दायना, कार्यवाही ताकनास्के ओसो उसूल, नीति लोप्पा दुस्साहस संगे मुन्ने दायना रुझान संगे काम कीयाना, संघर्ष लेवेके विवाद ताकनास्के अंधाधुंध हमला कीयाना- इव सब्बे “वामपंथी” भटकाव आंदुंग, इव सब्बे गलत मंतांग। वर्तमान परिस्थिति-विकास संगे ताका परवा मंदाना ओसो जुझारू पन ता कमी मंदाना दक्षिणपंथी भटकाव आंदू अनि इव वेने गलत मंतांग। मना पार्टी लोप्पा सिर्फ “वामपंथी” मंदाला विचार कियानोरे आयवा दक्षिणपंथी मंदाना ओसो नड्मा मंदाला विचार कियानोर वेने मंतोर। इव रेंडासी रुझानकु गलत मंतांग। माटु इव रेंडासी ना पोरो संघर्ष कीयाना, “वामपंथी ओसो दक्षिणपंथी भटकाव कुना विरोध कीयाना जरूरी मंता।”

काओ कांग ओसो राओ शू-श ना पार्टी-विरोधी गठजोड़ ता बारे ते नन्ना सिर्फ इवे पोल्लोंग कियाला आल्सताना।

4.

वर्तमान परिस्थिति ता बारे ते

अंतरराष्ट्रीय परिस्थिति, स्थानीय परिस्थिति ओसो पार्टी लोप्पाटा परिस्थिति बद्रम मंता? वेहचते मत्ता पक्ष मजबूत मंता लेवेके हीकट ते मत्ता पक्ष? अंतरराष्ट्रीय परिस्थिति लेवेके स्थानीय परिस्थिति पार्टी लोप्पाटा परिस्थिति, वेहच ते मत्ता पक्ष हीकट ते मत्ता पक्ष पोरो हावी आसी मंता इंजी वेहाना जरूरी मंता। इदे पोल्लो मावा सम्मेलन पोरो वेने लागू आंता। हर चीज सिर्फ हीकट तेने मंता इंजी आल्सनायो बारांकु इत्तेके वेल्ले लोकुर आत्मालोचना कितोर। वीर कामरेड्स तम्मा गलतिग पोरो ने जोर हितोर अनि सकारात्मक पोल्लोंग चर्चा कितोर। क्रांति लोप्पा बस्के शामिल आतोर ओरु बद-बद लड़ाईंग लोप्पा जीत दोरकी कितोर अनि बद काम लोप्पा बद सफलता दोरकी कितोर इंदाना पोल्लोग विडसतोर। मीटु सिर्फ ओरा आत्मालोचना तुने परीक्षा बने कीतेके मीकिन सिर्फ हीकटे दिसियर। असल ते इद परिस्थिति ता सिर्फ उंदी पहलू आंदू वेल्ले कामरेड्स लोप्पा सिर्फ गौण पहलू मंता। काओ कांग ओसो राओ शू-श ओसो ओरा पाँच लेफिटनेंट (चांग श्यू-शान, चांग मिंग-ख्वान, चाओ त-च्युन, मा हुंग ओसो क्वो फंग) ना समस्या अलग ता। वेहच ते मत्ता पक्ष मजबूत मंता - इद मूल्यांकन ओरा पोरो लागू आयो। काओ कांग ना पोरो वेहच ते मत्ता पक्ष बेगा मजबूत मंता? अगा सिर्फ हीकटे मंता, अगा लेंज वेहच लेवेके पोडद वेने एव्वोए। मना कामरेड्स ना बारे ते परिस्थिति इनपडे अलग मंता। ओरा बदे कारियल दाग अरतेके वेने बार-बार साबुन संगे नोर्सि दूर कियमूडांता।

माटु घटनाक्रम लोप्पा अचानक मुकाबला कीयाना, प्रतिक्रांतिकरी पुनर्स्थापना ता मुकाबला कीयाना ओसो काओ-राओ लेक्कटा घटनांग ना पुनरावृत्ति ता मुकाबला कीयाना मना तैयार जारी तासना इंजी बारांकु आह्वान कीतोम? बारांकु इत्तेके माटु वेल्ले कठिन परिस्थिति काजे तैयार मत्तेके कम नुकसान ता सामना कीतोम। माटु बदे वने काम कीतोम ताना लोप्पा वेल्ले कठिन परिस्थितिग वायना संभावना तुन सुरता तासना अनि

अनुसार योजनांग पंडना। वेल्ले कठिन परिस्थितिंग:- साम्राज्यवाद उंदी पूना विश्वयुद्ध शुरू कीतेके, च्यांग काई-शेन पेकिंग सत्ता ते वातेके अनि काओ –राओ ना पाटी-विरोधी गठजोड़ लेक्कटा घटना ओसो उंदी आतेके वाया परितांगा। इद्रम ता घटनांग सिर्फ उंदी बेराए आयवा दस, सौ आतेके कठिन परिस्थितिंग वाया परितांगा। मति अविना संख्या बचोन बेहरा मत्तेकाई माट मुन्नेटाले तैयार मत्तेके कम नुकसान कुना सामना किया लागियर। इद्रता घटनांग दस मत्तेके वेने अविना पांच मंदिता अदिनके इविना पोरो कोल्हार कीयाना जरूरत हिल्ले, बारांकु इत्तेके माटु मुन्नेटले अविना अंदाजा वाटताद मंता। साम्राज्यवाद परमाणु बम ओसो हाड्रोडजन बम वेरिहचोर मंता मति अवु वेरी वेस्सना लेक्का हिल्लेंगा। दुनिया लोप्पा उंदी चीज तुन हारे कियाला दूसरा चीज जरूर मंता। बदे चीज तुन आक्रमण कियाला इस्तेमाल कीतेके ताना पोरो जीत दोरकी कियाला दूसरा चीज मंदाना अनिवार्य मंता। मीटु “वीर लोरा किन पेन बने कीयाना”¹ पोरोल ता उपन्यास पड़ेमातेके मीटु जीड़ा परवा लेक्का बदे “जादूई हथियार” हिल्ले इंजी पुंदाकिर। वेल्ले “जादूई हथियारकु” न असल इत्तेके हारे किताद मंता। माटु जनता पोरो आधार आसी मंतोम अस्के एवनल दुनिया ता बदे वेने “जादूई हथियार” पोरो जीत दोरकी किया परिंतोम।

5.

पार्टी 8वी राष्ट्रीय कांग्रेस तुन

सफलतापूर्वक केयला काजे पूरा कोशिश कीयाना

केंद्रीय कमेटी पार्टी ता आठवी राष्ट्रीय कांग्रेस 1956 साल नड़मा ते केयना इंजी निर्णय कित्ता। एजेंडा लोप्पा मूंड विषयकु मंदितांग: 1. केंद्रीय कमेटी कार्य रिपोर्ट: 2. पार्टी संविधान लोप्पा संशोधन: 3. पूना केंद्रीय कमेटी ता चुनाव। कांग्रेस काजे डेलिगेट चुने कीयाना, दस्तावेज तैयार कीयाना काम वायना साल जुलाई तुकू मुन्ने पूरा कीयाना। माटु उंदी साल तुकू ज्यादा टाईम दोड़ रास्ता सब्बे कार्यक्षेत्र लोप्पा प्रगति कियाला काजे

बेहरा डाका वाटना इंजी आह्वान कीतोमः अर्थव्यवस्था, संस्कृति, शिक्षा, फौजी, पार्टी, राजनीतिक विचारधारा, जन संगठन, संयुक्त मोर्चा ओसो अल्पसंख्यक राष्ट्रीयतांग।

इदिना संगे अल्पसंख्यक राष्ट्रीयता संबंधित काम बारे ते वेने वेहाकाना। माटु हान-शोविनिज्म ता विरोध कीयाना, सिर्फ हान राष्ट्रीयताए अल्पसंख्यक राष्ट्रीयतांग कुन मदद कीतांग इंजी आल्सनायो। असल इत्तेके अल्पसंख्यक राष्ट्रीयतांग वेने हान राष्ट्रीयता तुन वेल्ले मदद कीतांग। उचुन कामरेड्स अल्पसंख्यक राष्ट्रीयतांग कुन मदद कीयाना पोंगडिंग कीतोरम मति ओरु अल्पसंख्यक राष्ट्रीयतांग लेवा मावा काम ताका परवो इंजी समझेमायोर। मावा देश ता 50-60 प्रतिशत प्रादेशिक भूमि पोरो हान राष्ट्रीयता लेवेके बदे दूसरा राष्ट्रीयता मंता? अदिना पोरो अल्पसंख्यक राष्ट्रीयतांगे मंतांग। इव इलाकांग लोप्पा समृद्ध संसाधनकु ओसो मकसी मत्ता सम्पती मंता। इंजे एवनल माटु अल्पसंख्यक राष्ट्रीयतांग कुन वेल्ले मदद कीतोम अनि उचुन जागा ने इनपड़े मदद किया परताद हिल्ले मति अल्पसंख्यक राष्ट्रीयतांग हान राष्ट्रीयतांग कुन मदद हीतांग। उचुन अल्पसंख्यक राष्ट्रीयतांग मावा मदद दोरकी कित्ता पेरेके मावा मदद किया परिंतांग। राजनीतिक रूप ते अल्पसंख्यक राष्ट्रीयतांग हान राष्ट्रीयता तुन वेल्ले मदद कीतांग। ओरा चीनी राष्ट्र ता बेहरा परिवार लोप्पा शामिल आयना हान राष्ट्रीयता काजे उंदी रकम राजनीतिक मदद आंदू। पूरा देश ता जनता अल्पसंख्यक राष्ट्रीयतांग ओसो हान राष्ट्रीयता ता एकता तुन हूडसी वेल्ले खुश आता। इद्रम अल्पसंख्यक राष्ट्रीयतांग राजनीतिक रूप ते आर्थिक रूप ते ओसो राष्ट्रीय प्रतिरक्षा लोप्पा पूरा देश पूरा चीनी राष्ट्र तुन बेहरा मदद दोरकता। सिर्फ हान राष्ट्रीयताए अल्पसंख्यक राष्ट्रीयतांग कुन मदद कित्ता अनि अल्पसंख्यक राष्ट्रीयतांग हान राष्ट्रीयता कुन मदद कीवोंग लेवेके अल्पसंख्यक राष्ट्रीयतांग कुने उचुन मदद दोरकता इंजी घमंड कीसोर वेलियाना गलत मंता।

माटु उंदी साल लोप्पा इव सब्बे काम कियाला काजे बेहरा डाका वाटना इंतोम अस्के माटु मना दिसता गलतिंग सुधरे कीयाना। इद्रम कीवेके

सम्मेलन लोप्पा कित्ता किरियांग, वायना साल आठवी कांग्रेस आतेके इव गलतिंग बद्रम मत्ता अद्रमे मंदितांग। माटु आठवी कांग्रेस केयला काजे पूरा कोशिश कीयाना पोल्लो कीतोम इत्तेके माटु मना गलतिंग सुधरे कीयाना। उदाहरण तुकू माटु फिजूलखर्च ओसो बेहरा बिलिडंग बने कीयाना भवन-निर्माण शैली तुन विडिसियाला काजे ईमानदारी ते कोशिश कीयाना। मीटु वेल्ले किरियांग कीसी लोन हंजी डोलता लेक्का हुंजता लेक्का आयानायो। उचुन मुल इद्रम ता सम्मेलन हर साल लेवेक हर तीसरा साल आयना अनि कामरेड्स आपस ते वरोर-दूसरो ना जांच कीयाना। नावा हिसाब ते इदु आल्सना लेक्कटा पोल्लो मंता। मावा लेक्काटोरा निरीक्षण बोर कियानूर? आपसी परिनिरक्षण कीयाना बेसता विचार आंदू, इद्रम कीतेके पार्टी, राज्य ता काम तेज कियाला मदद आयारा। माटु प्रगति तेज कीयाना तीरम-तीरम आयो। हत्ता दस साल तले मावा पार्टी कांग्रेस आताद हिल्ले। बदे डारुट हिल्ले मुन्ने पाँच साल लोप्पा उंदी दूसरा पार्टी कांग्रेस केयना बेस आयो, बारांकु इत्तेके अस्के युद्ध ताकसोर मत्ता अनि देश लोप्पा उथल-पुथल आसी मत्ता अनि बारांकु इत्तेके सातवीं कांग्रेस समाप्त आसी मत्ता। दूसरा 5 साल लोप्पा उंदी कांग्रेस कियमूड़ासी मनवड़ मति किताद हिल्ले। इद्रम कियवांकु फायदा आता। कांग्रेस केयना मुन्ने काओ ओसो राओ ना समस्या ता मोदोल एवनल हत्तेके सही साबित आता। लेवेके आठवी कांग्रेस ता इस्तेमाल तन्ना उद्देश्य पूरा कियाला काजे कीसी मन्नेर। इदे मावा पंचवर्षीय योजना बेस ताका मंता माटु संक्रमण कालम काजे आम कार्यदिशा तय कीतोम अनि इस सम्मेलन संगे वेल्ले राय उंदी किताद मंता अनि पार्टी ता आठवी राष्ट्रीय कांग्रेस काजे हरी पंडताद मंता। वायना कांग्रेस ते हर डेलिगेट तन्ना आत्मालोचना कीयाना, मावा काम गलतिंग ना खुला आलोचना, आत्मालोचना कीयाना इंजी मांग कीयाना। इद मार्क्सवादी उसूल लागू कीयाना।

आलोचना तीखा आयाना। नावा हिसाब ते वर्तमान सम्मेलन ते उचुन कामरेड्स कित्ता आलोचना ज्यादा तीखा हिल्ला मत्ता। ओरु दूसरोरा जीवा नोयार इंजी वेरियंतोरा। मीवा पोल्लो तीखा हिल्लेके, मीवा हमला

गंभीर हमला कीवेके मीटु बोना आलोचना कींतिर ओनकिन नोमुर आयवेके ओरु मीवा पोल्लो पोरो ध्यान हीवोरा। इदिना संबंधित लोकरु अनि विभाग ता आलोचना पोरोल एतसी कियाना मीटु बेस काम कियविर अदिनके नन्ना नाराज मंतांग माटु मीकिन नोमुर आतेके आई। बाकी तोरा जीवा नोयिहला वेरियतेके, मीटु वोट पोहिंतिर अनि काम ताकनास्के बचोनो आपसी संबंध बिगड़ेमायनुंगा। मीटु नाकिन वोट हीवेके नावा गाटो डोप्पा कैदल दायर? इद्रम इनपड़े आयो आयारा। असल ते माटु मना पोल्लो स्पष्ट वेहतेके, समस्या तुन तीखा पेश कीतेके मीवा काजे दूसरोरा संगे मना संबंध निभे कीयाना ज्यादा हल्को आंता। मना कोहकु बस्केने उर्रहानायो। कोंदा ता रेंडु कोहकु बारांकु मंतांग? लड़ेमायला काजे, आत्मरक्षा कियाला काज ओसो हमला कियाला काजेने मंदितांग। नन्ना कामरेड्स किन ओरा तल्ला पोर कोहकु मंतांगे हिल्लेंग इंजी पूछेमांताना। कामरेड्स उचुन बोयसी हूडाटू मंतांगे, हिल्लेंग। नन्ना उचुन कामरेड्स ना कोहकु मंतांग, उचुन कामरेड्स ना “कोहकु” मंतांग मति अचोन तीखा हिल्लेंग अनि उचुन कामरेड्स ना “कोहकु” इनपड़े हिल्लादु हूंड़िताना। नावा हिसाब ते “कोहकु” मंदाना बेस मंता बारांकु इतेके इद मार्क्सवाद ता अनुकूल मंता। मार्क्सवाद ता उंदी उसूल आलोचना, आत्मालोचना ता उसूल मंता।

अदिन काजे आलोचना, आत्मालोचना काजे उंदी सही टाईम पेरके मीटिंग कीयाना कामरेड्स ना नड़मा आपसी जांच काजे ओसो पार्टी, राज्य ता काम बेरसी कियाला काजी उंदी बेसता तरीका मंता। नावा हिसाब ते प्रांतीय ओसो म्युनिसिपल पार्टी कमेटिंग मीटु सब्बे कामरेड्स इदिना पोरो विचार कीयाना अनि मीटु इद्रम किया परंतिर परविर इंजी हूड़ना। मीटु केंद्रीय कमेटी तल करियाला आल्सिंतिरे आल्सविर? मीटु इदिना बारे ते करिया परंतिर।

आखरी ते इगा मत्ता सब्बे कामरेड्स ओसो सब्बे पार्टी-सदस्य लोर किन आह्वान कींतान:

पार्टी ता आठवी राष्ट्रीय कांग्रेस 1956 ते सफलतापूर्वक केयना कोशिश कीयाना।

पहली पंचवर्षीय योजना तुन सफलतापूर्वक पूरा कियाला पूरा कोशिश कीमूट!

नोट

- 1) चीन ता उंदी पौराणिक उपन्यास अनुसार प्राचीन कालम ते शांग राज्य ओसो चओ राज्य नडमा ता संघर्ष तुन पृष्ठभि लेक्का इस्तेमाल कित्तोर।

“लोकमत ता एकरूपता” ता खंडन³⁸

24 मई 1955

हू फंग “लोकमत ता एकरूपता” इत्तोर अदु असल इत्तेके प्रतिक्रांतिकारीर किन तम्मा प्रतिक्रांतिकारी विचार प्रकट कीयाना अनुमति हिल्ले इत्तोर। बदे डावुट हिल्ला मावा व्यवस्था बोरे वेने प्रतिक्रांतिकारी किन वडकना आजादी हिल्ले, इद आजादी सिर्फ जनता किने मंता इंदानदु निज्जमे। जनता ना नडमा माटु लोकमत ता अनेकता ता अनुमति हीवोम, इत्तेके आलोचना कीयाना, अलग-अलग विचार पेश कीयाना अनि ईश्वरवाद लेवेके निरीश्वरवाद (भौतिकवाद) ता प्रचार-प्रसार कीयाना आजादी मंता। बदे समाज लोपा ओसो बदे वेने कालम ते हमेशा रेंडु रकम ता मानेय, रेंडु रकम ता विचारकु मंतांग, विकसित ओसो पेरके अरतोर मंतोर। इव रेंडासी, रेंडु विपरीत तत्व कुना लेक्का मंतांग अनि उंदी दूसरा संगे संघर्ष कीतांग, मुन्ने हत्ता विचार अनिवार्य रूप ते पेरके अरता विचार कुना पोरो हावी आंतांग। “लोकमत ता एकरूपता” संभव हिल्ले ओसो सही वेने हिल्ले। समाज सिर्फ विकसित चीज कुना पूर्ण विकास कितास्केने पेरके अरता चीजकु ना पोरो हावी आतास्केने प्रगति किया परिंता। मति वर्ग ओसो वर्ग संघर्ष कुना अस्तित्व देश-विदेश ते इंजे वेने मत्ता कालम ते मजदूर वर्ग ओसो जनता काजे राजसत्ता कैदे पोयतोर। काजे ओरु सब्बे प्रतिक्रांतिकारी वर्ग, ग्रुप ओसो व्यक्तिगत क्रांति ता प्रतिरोध कियाला काजे कीयाना कार्रवाईंग ना दमन कीयाना, पूर्व सत्ता ता पुनस्थापना कियाला काजे ओरु कीयाना कार्रवाईंग कुन विफल कीयाना, ओरकिन वडकना

³⁸ प्रतिक्रांतिकारी हू फंग गुट ता आलोचना कियाला काजे रास्ता उंदी लेख।

आजादी तुन प्रतिक्रांतिकारी उद्देश्य तुना पूरा कियाला काजे इस्तेमाल कीयाना अनुमति हियवा मंदाना जरूरी मंता। इद्रम हू फंग ओसो ओना लेक्कटा प्रतिक्रांतिकारीर किन “लोकमत ता एकरूपता” असुविधाजनक मंदिता। ओरा काजे असुविधाजनक मत्ता, अदिनाए माकिन जरूरत मंता अदे मावा काजे सुविधाजनक मंता। मावा देश लोप्पा लोकमत ता एकरूपता मंता या हिल्ले। जनता ना नडमा, मुन्ने हत्ता ओसो पेरके अरता रेंडसी रकम ता लोकुर किन उंदी दूसरा संगे कंपिटिशन कियाला काजे मावा समाचारपत्र, पत्रिकांग, गोष्ठिंग लेक्कटिना इस्तेमाल कीयाना अनि मुन्ने हत्ता लोकुर पेरके अरता लोकुर कुन समझे कीयाना जनवादी तरीका तल करिहाना अनि पेरके अरता विचारकु ओसो पेरके अरता व्यवस्था पोरो हावी आयला सफलता दोरकी कीयाना। उंदी अंतरविरोध हल आतेके पूना अंतरविरोध पैदा आंता, कंपिटिशन आंता। इद्रमे समाज लगातार प्रगति कींता। अंतरविरोध मंदाना इत्तेके एकरूपता हिल्ला मंदाना। अंतरविरोध ता हल कीतेके अस्थायी रूप ते एकरूपता वांता मति जल्दिए पूना अंतरविरोध पुष्टितांग, इद्रम आतेके एकरूपता आयवा मंदानादु मंता, इद्रम आतेके अव अंतरविरोध कुना ओसो उंदी बेरा हल कीयाना जरूरी आंता। जनता ओसो प्रतिक्रांतिकारीरा नडमा ता अंतरविरोधकु मजदूर वर्ग ओसो कम्युनिस्ट पार्टी ता नेतृत्व ते प्रतिक्रांतिकारीरा पोरो जनता ना तानाशाही लागू कीयाना लोप्पा मंता। इगा जनवादी तरीका आयवा तानाशाही ओसो एकतंत्रवाद ता तरीका इस्तेमाल कींतोर। दूसरा माटा ने प्रतिक्रांतिकारीरकिन तम्मा व्यवहार कीयाना अनि तम्मा वडकना, कीयाना लोप्पा अंतर कीयाना अनुमति हिल्ले। इदिना लोप्पा सिर्फ लोकमत तेने आयवा कानून लोप्पा वेने एकरूपता मंता। इद सवाल पोरो हू फंग ओसो ओना लेक्कटा प्रतिक्रांतिकारीरा पोल्लोंग केंजतेके, इद्रम ता पोल्लोंग केंजसी लेस्कनोर तम्मा पोल्लोंग किन कमजोर समझेमांतोर इंजी समझेमांता। उचुन आल्साटू “लोकमत ता एकरूपता” लेवेके “लोकमत ता कमी”, “आजादी ता दमन” इव सब्बे पोल्लोंग केंजा वेसवा लेक्का हिल्लेंग। वीरु इरवुर अलग-अलग रकम ता चीज कुना नडमा जनता ना

पांत कुना लोप्पटा चीज कुन ओसो जनता ना पांत कुना बाहर ता चीज कुना नडमा स्पष्ट रूप ते फर्क किया परवोर आंतोर। जनता ना पांत नडमा आजादी ता दमन कीयाना, जनता, पार्टी ओसो सरकार ता गलतिंग ना बारे ते कीयाना आलोचना ता दमन कीयाना, अध्ययन लोप्पा खुला वाद-विवाद ता दमन कीयाना उंदी जुर्म मंता। मावा व्यवस्था इद्रमे मंता। मति पूंजीवादी देश कुना लोप्पा सब्बे जायज मंता। जनता ना पांत कुना बाहर, प्रतिक्रांतिकारीर किन तम्मा वडकना ओसो कीयाना लोप्पा फर्क कीयाना खुला छूट हियाना जुर्म आंदू अनि ओरा पोरो तानाशाही लागू कीयाना जायज मंता। मावा व्यवस्था इद्रमे मंता। मति पूंजीवादी देश कुना लोप्पा परिस्थिति इदिना उल्टा मंता। अगा पूंजीपति वर्ग तम्मा तानाशाही लागू कींता, ताना लोप्पा क्रांतिकारी लोकुर तम्मा “वडकना लेवेके कीयाना लोप्पा बेलगाम” आयना अनुमति हिल्ले ओसो ओरकिन “तम्मा व्यवहार बेस सुधरे” कीयाना। शोषक, प्रतिक्रांतिकारी हमेशा ओसो हर जागा अल्पसंख्यक मंदितोर। शोषित, क्रांतिकारीर हमेशाए बहुसंख्याक मंदितोर। अदिन काजे शोषित, क्रांतिकारीरा तानाशाही सबसे बेस मंता अनि शोषक, प्रतिक्रांतिकारीर तानाशाही सबसे गलता हू फंग “पाठक लोरा बेहरा संख्या बदे संगठन लोप्पा मंता, अगा जोर-जबरदस्ती ता वातावरण मंता”। जनता नडमा फरमानशाही वालेर जोर-जबरदस्ती ता तरीकांग किन माटु अस्वीकार कींतोम अनि समझे कीयाना जनवादी तरीकांग पोरो नितसी मंतोम। इगा आजादी ता वातावरण मंदाना, “जोर-जबरदस्ती” ते काम कीयाना गलत आंता। “पाठक लोरा बेहरा संख्या बदे आई संगठन लोप्पा मंता” इदु वेल्ले बेसे। पाड़ना हजारों साल लोप्पा इद्रम बस्केने आयो। कम्युनस्ट पार्टी जनता ना नेतृत्व कीसी उंदी दीर्घकालीन, कठोर संघर्ष कित्ता अस्केने जनता कुदरी ते पोव्वता पेड़ेम लेक्कटा परिस्थिति तल उंदी प्रतिक्रियावादीर कीयाना शोषण, उत्पीड़न काजे अनुकूल मत्ता एकता ता परिस्थिति ते एवता। अदु तन्ना महान एकता तुन क्रांति ता जीत पेरके उचुने साल कुना लोप्पा निल्पी कित्ताद मंता। “जोर-जबरदस्ती” इत्तेके माटु प्रतिक्रांतिकारी पक्ष ता लोकुरा पोरो लागू कीयाना

“जोर-जबरदस्ती” इंजी हू फंग वेहितोरा। इंगो, ओरु निज्जमे वेरियसी सांगितोरा। ओरु उंदी “रोज मारतिंदना तुकू वेरियसोर मत्ता, दुक्कम ते मत्ता कोड़ियड़ लेक्का” मंतोरा। ओरू पूरा टाईम वेरियसोरे मंतोरा। माटु इदिन वेने उंदी जबरदस्त परिस्थिति समझेमांतोमा। हत्ता हजारो साल लोप्पा बस्केने वायवा परिस्थिति। कम्युनिस्ट पार्टी जनता ना नेतृत्व कीसी दीर्घकालीन, कठिन संघर्ष कित्ता, अस्केने वीर किन इचोन तिप्पल आया मंता। इत्तेके जनता तुकू खुशी ता दिव्या मत्तेके ओरा काजे दुक्कम ता दिव्या मंदिता। हर साल राष्ट्रीय दिवस लेक्का माटु सबसे मुन्ने इद्रमे खुशी ता दिया मानेमांतोमा। हू फंग “कला-साहित्य ता संबंध, यांत्रिकता पोरो अमल कीयाना असल ते सबसे हल्को आंता।” इगा “यांत्रिकता” इत्तेके द्वन्द्वात्मक भौतिकवाद काजे गाली लेक्का इस्तेमाल कित्तोरा। इदिन “सबसे ज्यादा हल्को” इंदानादू वेल्ले बोल्लना लेक्का मत्ता। आदर्शवाद ओसो अधिभौतिकवाद दुनिया ता सबसे ज्यादा हल्को मंता बारांकु इत्तेके इव असल परिस्थिति पोरो आधार आसी हिल्ला मंदाना ओसो इदिना जांच किताद हिल्ला कारण ते इदिन लोकुर विचार वात्ता लेक्का बोल्लित्तोरा। दूसरा बगिल भौतिकवाद ओसो द्वन्द्ववाद कठिन कोशिश ता मांग कींता। असल परिस्थिति पोरो आधार आसी मत्तेके व्यवहार संगे अदिना जांच आसी मंदाना। बोर मानेय बस्के एवनल कठिन कोशिश कीवोर अस्के एवनल ओरु आदर्शवाद ओसो अधिभौतिकवादी हर्दे वेलियाना संभावना मंता। हू फंग तम्मा चिट्टी¹ लोप्पा उसूल संबंधित मूंड सवाल कीसी मत्तोर अविना विस्तार ते खंडन कीयाना जरूरी समझेमांतोमा। इदे आयवा 1950 ते हू फंग तन्ना चिट्टी लोप्पा “इंजे हर जागा प्रतिरोध आया मंता, हर जागा मुन्नेटले वेल्ले मांग पेश क्रिया मंता” इंजी वेने रास्तोरा। अस्के मुख्य भूमि तल च्यांग कार्ड-शेक ना मुख्य सेना तुन इस्सले खत्म किताद मंता। वेल्ले प्रतिक्रांतिकारीरा दमन कीयानास्के बेहरा स्तर ते आंदोलन शुरू किताद हिल्ले अनि संस्कृति, शिक्षा ता पुनर्स्थापना कीयाना काम इंजे शुरू आताद हिल्ले। हू फंग ना पोल्लोंग लोप्पा तत्कालीन परिस्थिति दिसिंता मति उचुक पोल्लोंग इगा वेहताद

हिल्ले। अविन जोडे कीतेके ओरु इंजे हर जागा प्रतिक्रांतिकारीरा लोप्पा
क्रांति ता प्रतिरोध कीयाना विचार मंता, हर जागा क्रांतिक खिलाफ गड़बड़
कियाला काजे प्रतिक्रांतिकारीरा बगिल तल रक-रकम ता मांग मुन्ने तुकू
ज्यादा पेश किया मंता इंजी मन्नेर

नोट

- 1) इगा उंदी प्रतिक्रांतिकारी गोपनीय चिट्ठी ता बारे ते वेहतोर, हू फंग 13 अगस्त
1950 ते चांग चुंग-श्याओ ना पोरोल ते रास्तोर।

**“प्रतिक्रांतिकारी हू फंग गुट संबंधित सामग्री”
ता प्रस्तावना ओसो सम्पादकीय टिप्पणिंग
मई ओसो जून 1955**

**प्रस्तावना
15 जून 1955**

पाठकुना व्यापक समुदाय ता जरूरत पूरा कियाला काजे माटु प्रतिक्रांतिकारी हू फंग ना संबंधित सामग्री, 13 मई ओसो 10 जून 1955 नडमा “पीपुल्स डेली” पेपर लोप्पा मूंड बेरा प्रकाशित आता, “पीपुल्स डेली” ता 10 जून ता सम्पादकीय तुन पुस्तक लेक्का संकलित किताद मंता अनि अदिन पीपुल्स पब्लिसिंग हाउस प्रतिक्रांतिकारी हू फंग गुट संबंधित सामग्री, हेडिंग तासिसी प्रकाशित किताद मंता। इद पुस्तक ते हू फंग ना “नाना आत्मालोचना” वेने स्रोत-सामग्री लेक्का पुनःप्रकाशित किताद मंता मति अदिन शू ऊ¹ पेश कित्ता सामग्री पेरके परिशिष्ट लेक्का तासताद मंता। अद्रमासी पाठक लोर रेंडु चेहरा वाले इद प्रतिक्रांतिकारी अध्ययन किया परतोर। सामग्री मूंड बेरा सम्पादकीय टिप्पणिंग ओसो फुट नोट लोप्पा माटु बेगा-बेगाने शब्द कुन बदले किताद मंता। माटु दूसरा उचुन फुट नोट कुना लोप्पा संशोधन कीतोम, उचुन फुट नोट जोड़े कीतोम अनि रेंडु सम्पादकीय टिप्पणिंग बेरसी कीतोम। एकरूपता तत्ताला काजे पहली, दूसरी बेरा “पार्टी-विरोधी गुट” किन बदले कीसी “प्रतिक्रांतिकारी गुट” किताद मंता, तीसरी बेरा कित्ता लेक्का। बाकी सब्बे बद्रम मत्ता अद्रमे मत्तांग।

“पीपुल्स डेली” लोप्या प्रकाशित सामग्री ताए लेक्का इद पुस्तक ता प्रकाशन वेने रेंडु रकम ता लोकुरा ध्यान पिडंगिता। इदु उंदी बगिल प्रतिक्रांतिकारीरि ध्यान पिडंगिता अनि दूसरा बगिल बचोनो व्यापक जनता ना ध्यान पिडंगिता।

प्रतिक्रांतिकारीर ओसो उचुन प्रतिक्रांतिकारी विचार तासनोर तम्मा जीवा ते हू फंग तत्व नडमा आता पत्रव्यवहार ता लेंग केंजा वासोर मंदियर इंजी आल्सानूर। इद पुस्तक बोनगा एवियर ओरु बदे डावुट हिल्ला हू फंग ओसो गुट ता लोकुर सब्बे प्रतिक्रांतिकारी वर्ग, ग्रुप ओसो मानेय ना प्रवक्ताल आंदुर, क्रांति खिलाफ ओरु कित्ता अपशब्द कुना ओसो तम्मा गतिविधिर ताकनास्के लागी कित्ता कार्यनीति तुन सब्बे प्रतिक्रांतिकारी तारीफ कियानूर। इद्रम आतेके ओरु वर्ग-संघर्ष ता बारे ते उचुन प्रतिक्रांतिकारी शिक्षा हासिल कियानूर अनि विनाश आयनूर। हू फंग सामग्री ता लेख वेने साम्राज्यवाद ओसो च्यांग काई-सेक ना क्वोमिंगतांग ता सब्बे प्रतिक्रियावादी लेख कुना लेक्काने चीनी जनता ना विरोधी किताद मंता। सफलता आयवा असफलता ता लेखा-जोखा पेश कींता। अवु इद गुट तुन विनाश कियाला विफल आतांग।

व्यापक जनता तुन इद्रम ता सामग्री ता वेल्ले जरूरत मंता। प्रतिक्रांतिकारीर तम्मा दोहरी मुक्कम ता कार्यनीति तुन बद्रम लागू कींतोर? ओरु तम्मा नकली मुक्कम संगे माकिन बद्रम धोखा हींतोर, गुप्त रूप ते बद्रम षडयंत्र कींतोर? इव सब्बे पोल्लोंग ना बारे ते सही उद्देश्य तासना हजारों लोकुर किन बदे जानकारी हिल्ले। अदिनके वेल्ले प्रतिक्रांतिकारीर मावा पांत लोप्या वासी नेंगतोर। मना लोकुरा कोंडांग कमजोर मंतांग, ओरु बेसता ओसो गलत लोकुरा फर्क किया परवोर। लोकुर सामान्य परिस्थिति ते कार्रवाईंग कींतोर अस्के माटु सही, गलत लोकुरा नडमा फर्क तुन समझेमांतोम मति लोकुर असामान्य परिस्थिति ते कार्रवाईंग कींतोर अस्के माटु ओरा सच्चाई ता बारे पुंदाला निपुण मन्नोम आंतोम। हू फंग सामग्री तन्ना असली मोक्कम मकिह कियाला, नाडेह कियाला काजे उंदी मुखौटा केरना प्रतिक्रांतिकारी तत्व आंदू। मति ओरु क्रांति ता विरोध कींतोर

अदिनके तम्मा मोक्कम पूराए मकिह किया परवो आंतोरो। हू फंग गुट ता प्रमुख मानेय ना बारे ते हूइतेके ओरा संगे मुक्ति तुक् मुन्ने ओसो पेरके बचोनो बेरा मावा विवाद आतांग। ओरा वड़कना ओसो कीयाना सिर्फ कम्युनिस्ट लेक्काने आयवा गैर-पार्टी क्रांतिकारीरा, जनता मानेमाता जनवादी लोकुरा बेहरा संख्या लोप्पाटल वेने अलग मंता। इंजेने ओरकिन माटु ओरा खिलाफ बेहरा मात्रा ते ठोस सबूत दोरकतांके पर्दाफाश किताद मंता। हू फंग गुट ता बचोनो लोकुर किन माटु मना पार्टी संगठन, राष्ट्रीय अंग, जन संगठन, सांस्कृतिक, शैक्षणिक प्रतिष्ठान ओसो कारोबार कुना लोप्पा वाटना मुन्ने ओरा रिकार्ड कुना सखत जांच कियाला असफल आतांके माकिन धोखा हिया परतोरो। हत्ता कालम ते माटु क्रांति उर्वा वड़िय कालम तले वेंडसोर मत्तोम अनि जीत दोरकी कीतांकु सब्बे रकम ता लोकुर मावा गर्रे वायना कोशिश ते मत्तांकु वेने इद्रम कीयाना संभव आता। अद्रमासी गलत लोकुर बेसता लोकुरा नड़मा कलियतोर अनि माटु इंजे एवनल ओरा छानबीन किया परताद हिल्ला। इदे आयवा गलत तत्व कुना खोज कीयाना ओसो अविन मना पांत कुनल बाहर कीयाना लोप्पा सफलता दोरकी कीयाना नेतृत्वकारी संगठन कुना सही मार्गदर्शन तुन व्यापक जनता ना उन्नत स्तर ता राजनीतिक चेतना संगे काल्पना पोरा आधार आसी मंता। मति इद्रम कीतेके वेने हत्ता कालम ते मावा काम लोप्पा वेलले गलतिंग आतांग, माटु इव सब्बे गलतिंग निगडल सबक एतिताद मंता।

हू फंग ना पोरो माटु बारांकु महत्व हींतोम इत्तेके ओरु व्यापक जनता तुन सबसे मुन्ने पढ़ेमाता कार्यकर्ता लोर, बुद्धिजीविर किन शिक्षित कियाला इस्तेमाल कियाला आल्संतोर; माटु ओरु इद सामग्री तुन पढ़ेमासी तम्मा राजनीतिक चेतना स्तर बेरसी कीयाना इंजी सालह हींतोमा। इद “सामग्री” तन्ना तीखा ओसो स्पष्टता काजे वल्ले ध्यान हियाना लेक्का मंता। प्रतिक्रांतिकारी लोकुरा इदिना बगिल ध्यान दायना स्वाभाविके मंता। क्रांतिकारी लोकुर इदिना बगिल ध्यान हियाना ओसो ज्यादा स्वाभाविक मंता। इद सामग्री तल व्यापक क्रांतिकारी जनता तुन शिक्षा दोरकिंता अनि

ओरा क्रांतिकारी गिर्दा ते सही-गलत ता पहचान कीयाना ओरा क्षमता
बेरसिंता अनि माटु तीरम-तीरम हर रकम ता मकिस मत्ता प्रतिक्रांतिकारिरा
मुखौटा तेरियाला सफल आंतोमा।

सम्पादकीय टिप्पणिंग (चुने कित्ता अंशकु)

मई ओसो जून

1

गुट - इदिन मना पुरखा नोर “गिरोह” इंदानोर ओसो इस्सल लोकरु “मंडली” लेवेके “टोली” इंतोर। इदिन माटु वेल्ले बेस पुत्तोमा बोरु गुटपरस्ती ता कार्रवाईंग कींतोर ओरु तम्मा राजनीतिक उद्देश्य पूरा कियाला काजे हमेशा दूसरोरा पोरु गुटपरस्त मंदाना आरोप वाटितोर अनि गुटपरस्त मंदाना ईमानदारी ता निशानी इंतोर; ओरु खुद ईमानदार मंतोम इंतोर अनि ईमानदार लोकरु किन गुटपरस्ती संगे बदे लेना-देना मन्ने आंता। बोरु हू फंग ना नेतृत्व ते ताकिंतोर ओरकिन “उंदी पूंजीवादी सिद्धांत तासना”, “स्वतंत्र राज्य स्थापना कीसी मत्ता”, “होंग ते हूडना” ओसो “पेशान कीयाना” कम्युनिस्ट पार्टी “नौजवान लेखक” ओसो “क्रांतिकारी लेखक” इंदानोर। अदिना काजे हू फंग ओसो ओरा मंडली ता लोकरु बदला एतला आल्सतोर। “साहित्यिक गजट” ता समस्या “सिर्फ खोज कित्ता उंदी दरार” मत्ता, इदु “बद्रमाई उंदी समस्या” हिल्वा मत्ता। “व्यापाक ओसो सामान्य रूप हियाना” ओसो “इद समस्या गुटपरस्त शासन ता समस्या मत्ता” इंजी तोहना वेल्ले जरूरी मत्ता, इदिनकु मुन्ने हंजी “गुटपरस्त ओसो युद्धपतिवादी शासन” ता समस्या मत्ता।² इदु समस्या वेल्ले गंभीर मत्तांकु ओरु माकिन खतम कियाल काजे वेल्ले गोला-बारूद ता इस्तेमाल कित्तोर। इव सब्बे कीयानास्के लोकरु ध्यान हू फंग ओसो ओना गुट बगिल हत्ता। ओरा लोप्पा वेल्ले लोकरु सावधानी ते छानबीन कित्ता पेरके इद गुट ता आकार वेल्ले मंता इंजी जानकारी दोरकता। इदिनकु मुन्ने ओनकिन इंजी “उंदी सुडला ग्रुप” लेक्काने पुंदानोरुमा मति असल इतेके ओरा संख्या वेल्ले बेहरा मंता। मुन्ने

ओरकिन सिर्फ सांस्कृतिक ग्रुप लेक्का पुंदानोरोमा मति इंजे ओरु मौका दोरकी कीसी राजनीतिक, सैनिक, आर्थिक, सांस्कृतिक ओसो शैक्षणिक विभाग कुना लोप्पा नेंगना लोकर आंदुरा मुन्ने ओरु खुल्लम खुल्ला कार्ववाईंग कीयाना कार्ववाईंग ना ग्रुप लेक्का मंदानोरा इंजे ओरा लोप्पाटल ज्यादातर लोकरा पाड़ना पिस्वल वेल्ले गुप्त मंता। इद गुट ता मुख्य ताकत साम्राज्यवाद, क्वोमिंगतांग ता खुफिया एजेंट, त्रात्सकीवादी, प्रतिक्रियावादी फौजी अफसर ओसो कम्युनिस्ट पार्टी संगे गदारी कीयाना लोकर मंतोरा। इद्र तोर किन मेरुदंड बने कीसी क्रांतिकारी ग्रुप लोप्पा मकसी मत्ता प्रतिक्रांतिकारी गुट, उंदी भूमिगत स्वतंत्र राज्य बने कित्तोरा। इद प्रतिक्रांतिकारी गुट, भूमिगत राज्य, चीन लोक गणराज्य ता तख्ता पलट कियाला, साम्राज्यवाद ओसो क्वोमिंगतांग शासन स्थापना कीयाना जिम्मेदारी एतितान्गा। बेगा संभव आतागा बस्केनाई ओरु मावा गलतिंग तेंडना कोशिश कींतोर अनि तोड़फोड़ कियाला काजे बाहाना कींतोरा। बेगानाई ओरा लोकर बद्रमतांग आई घटनांग कींतोरा। मुक्ति पेरके इद प्रतिक्रांतिकारी गुट ता विस्तार आता, ओदिन रोमी कीवेके इदिना लगातार विस्तार आसोर दायारा। नेंडु हू फंग ओसो ओना ग्रुप ता सच्चाई पुत्तोम, वेल्ले घटनांग ना बारे बेस वड़कमूडांता अनि ओरा गतिविधिग रोमी कियमूडांता।

2

बदे डिवुट हिल्ला हू फंग पेरके लू त्येन ना आत्मरक्ष काजे आक्रमणात्मक कार्यनीति ता इस्तेमाल कीयाना सुझाव पोरो अमल कींतोरा। इद्रम ओरु काम ता मांग कीयाना पेकिंग वातोर अनि अदिना पोरो विचार-विमर्श कियाला वेहतोर, ओरु केंद्रीय कमेटी मुन्ने 3,00,000 वाले उंदी ज्ञापन पेश कित्तोरा। पेरके अदिन साहित्यिक गजट ता सवाल तेहची तन्ना हमला शुरू कित्तोरा। सब्बे रकम ता शोषक वर्ग ता प्रतिनिधि, प्रतिकूल परिस्थिति ते वातेके तम्मा बचाव काजे आक्रमणात्मक कार्यनीति लागू कींतोर अनि नेटा तम्मा अस्तित्व तुन बचे कींतोर अनि विकसित कींतोरा। वेल्ले तोका-तल्ला हिल्ला पोल्लोंग कींतोर अनि स्पष्ट रूप ते बोल्लितंतोर। विषय पोरो

हमला कियाला काजे उचुन पोरो-पोरोटा पोल्लोंग ना इस्तेमाल कींतोर। उचुन मुल ता तारीफ कींतोर अनि उचुन मुल किन पास्किंतोर। “उचुन जागा ना दरार पुट्टी कियाला” काजे तोड़-मरोड़ कीसी विषय पेश कींतोर ओसो बेरसी कीसी पेश कींतोर अनि माकिन कठिन परिस्थिति ते वाटितोर। सक्षिप्त ते ओरु हमेशा मावा खिलाफ बद्रम ता कार्यनीति लागू किया परमूडांता इंजी अध्ययन कींतोर अनि तम्मा उद्देश्य पूरा कियाला काजे “नालुंग बगिल ता खोज-खबर तासिंतारा” ओरु बस्के-बस्के “डोल्लना नाटक कींतोर” अनि “जवाबी हमला कीयाना” मौका हड़सोर मंतोर। ओरकिन वर्ग संघर्ष ता दीर्घकालीन अनुभव मंता अनि अलग-अलग रकम ता कानूनी ओसो गैर-कानूनी संघर्ष लोप्पा निपुणता दोरकसी मंता। ओरकिन हारे कियाला काजे माटु क्रांतिकारी राज्य काजे ओरा चाल समझेमायना अनि ओरा कार्यनीति ता अध्ययन कीयाना जरूरी मंता। मावा लोप्पा माटु जटिल वर्ग-संघर्ष तुन उंदी वेल्ले सीधा-सादा समस्या समझेमायना लेक्कटा किताबीपन ओसो भोलाबाला मंदानायो।

3

माटु क्रांतिकारी लोप्पा घमंड, अतिउत्साह मंदाना, सतर्कता ता कमी मंदाना, राजनीति ता नजरअंदाज कीसी रोज ता काम लोप्पा मुडंदसी मंदाना रुझान मत्तांकु वेल्ले प्रतिक्रांतिकारी मावा “मना लोप्पा नेंगला” सफल आंतोर। सिर्फ हू फंग गुट ता लोकुरे आयवा वेल्ले बाकी खुफिया एजेंट ओसो गलत लोकुर वेने नेंगतोर।

4

उदारतावादी रुझान ता कारण ते बोराई पार्टी-सदस्य ना आलोचना आंता अस्के हू फंग ओना पोरो हमला आया मंता इंतोर। ओना “जुझारी संकल्प उचुन कमजोर मंता” इत्तेके ओरु तन्ना उदारतावादी रुझान संगे तुंडसी मन्नो अनि पार्टी कित्ता आलोचना तुन स्वीकार कीयाना ओसो सही रुझान पोयला तैयार आंतोर इत्तेके हू फंग गुट ओनिगडल बदे आशा कीवो अनि

ओनकिन तन्ना बगिल पिङ्गना कोशिश कीवो। इदिना उल्टा उदारतावादी रुझान संगे तुंडसी मंदानोरा “जुझारू संकल्प” “उचुन कमजोर” आयवा “उचुन मजबूत” मत्तास्के ओरा बगिल आकर्षित आयना खतरा मंता। हू फंग तत्व इद्रमतोर किन जरूर तम्मा बगिल पिङ्गना कोशिश कींतोरा। ओनकिन कामरेड पोरोल ते केयना वेने शुरू कींतोरा। इदिन उंदी चेतावनी समझेमायनायो या? वरोर पार्टी-सदस्य ना विचारधारात्मक, राजनीतिक गलतिंग आतेके, इविना कारण ते ओना आलचोना आतेके ओरु बद्रम ता रुझान पोय्यना? ओना मुन्ने रेंडु हरींग मंदितांग पहली ओरु तन्ना गलतिंग सुधरे कीयाना अनि बेसता पार्टी-सदस्य बनेमायना। दूसरा ओरु पूरा खत्म आसी प्रतिक्रांतिकारी बनेमायाना। दूसरा हरीं निज्जमे मंता अनि प्रतिक्रांतिकार तत्व ओनकिन तम्मा बगिल केयला काजे इशारा कीसोर मंदाना संभावना वेने मंता।

5

बद्रम माटु अंतरराष्ट्रीय ओसो स्थानीय वर्ग संघर्ष लोप्पा ताकत ता सही मूल्यांकन कींतोम अद्रमे दुश्मन वेने कींतोरा। मति मावा दुश्मन पेरके अरसी मंतोर, कडियता-पुडियता प्रतिक्रियावादीर आंदुर, अदिन काजे ओरा सर्वनाश जरूर आघार। ओरकिन असल दुनिया ता नियम कुना जानकारी हिल्ले, ओरा आल्सना तरीका मनोगतवादी ओसो अधिभौतिकवादी मंता। अदिन काजे ओरा मूल्यांकन अनिवार्य रूप ते गलत आंता। मना वर्ग रुझान अनिवार्य रूप ते प्रेरित आसी खुद वेल्ले शक्तिशाली ओसो क्रांतिकारी ताकत कु हमेशा कमजोर मंदाना इंजी आल्संतोरा। ओरु अनिवार्य रूप ते तम्मा ताकत तुन बेरसी कीसी हूडिंतोर, अनि मना ताकत तुन कम। माटु उंदी पेरके उंदी बचोनो प्रतिक्रांतिकारीरा तख्ता पलट आसोर मत्तादु हूडतोम- छिंग राजवंश ता सरकार, उत्तरी युद्ध सरदार, जापानी सेना, मूसोलिनी, हिटलर ओसो च्यांग काई-शेक वीर सब्बे तोर आल्सना ओसो अलग कीयाना गलतिंग कित्तोर। वर्तमान कालम ते सब्बे साम्राज्यवादिर इद्रम ता गलतिंग कीयाना संभावना मंता। हू फंग तत्व कम्युनिस्ट पार्टी

नेतृत्व कीयाना चीनी जनता ना क्रांतिकारी ताकत कुना “सर्वनाश पक्का आयार” इंतांग, अवु “ पंडता कमकाल आकिंग”, “कड़िया ता लाशके” आंदुंग। मति हू फंग प्रतिनिधित्व कीयाना तत्व कुना प्रतिक्रांतिकारी ताकत कुना बारे ते बाता कीयाना? “उचुक हुय्युस्किन विहकसियमूडंता”, मति बाधांग कुन “वेंडसी” मजबूती ते मोड़ियसोर मत्ता हुय्युस्कुना संख्या वेल्ले मंदिता। फ्रांस ता पूंजीवादी राष्ट्रीय एसेम्बली लोप्पा नेंडु वेने राजतंत्रवादिरा प्रतिनिधिर कलियतेके पूरा भूमि पोरो शोषक वर्ग पूराए खत्म आता बचोनो साल पेरके वेने च्यांग काई-शेक वंश ता उचुन प्रतिनिधिर सक्रिय मंदितोर। ओरा लोप्पा सबसबे ज्यादा कट्टरपंथी मंतोर ओरु हारेमायोर आयनुर। अदिनके ओरु खुद किन ओसो दूसरोर किन धोखा हियाना जरूरी मंता, लेवेके ओरा पिस्सना मुश्किल आयार।

6

इद चिट्ठी लोप्पा इस्तेमाल कित्ता “मकिस मत्ता सामंती ताकत कु वेल्ले बेय्यल आता लेक्का हौका मंतोर” इंदाना वाक्य तल प्रतिक्रांतिकारी ताकत कुना दमन कियाला काजे मावा जनता ना क्रांतिकारी ताकत कु कित्ता महान संघर्ष तले प्रतिक्रांतिकारी हू फंग गुट वेरियतोर, अनि सब्बे प्रतिक्रांतिकारी वर्ग, ग्रुप ओसो मानेय वेने इद्रमे मंदितोर। क्रांतिकारी जनता गिर्दा ते वेडका कीयानास्के इद्रम ता प्रतिक्रांतिकारीर सांगितोर। “इतिहास लोप्पा मुन्ने बस्के ने आयवा” लेक्का इंदाना वेने सही मंता। सिर्फ आदिन कम्यून व्यवस्था ता जागा ते दास व्यवस्था स्थापना आसी मत्ता क्रांति तुन विडचसी हत्ता कालम ता बाकी सब्बे क्रांतिंग ना कारण ते उंदी शोषण-व्यवस्था ता जागा ते दूसरा शोषण-व्यवस्था ता स्थापना आता। अव ताकनास्के प्रतिक्रांतिकारीरा दमन कीयाना काम सही तरीका ताकी कीयाना जरूरत हिल्वा मत्ता। सिर्फ मावा क्रांति, इत्तेके सर्वहारा वर्ग ओसो कम्युनिस्ट पार्टी ता नेतृत्व ते जनता ना बेहरा संख्या ता क्रांतिए सब्बे शोषण-व्यवस्थांग ओसो सब्बे वर्ग कुन पूरा खत्म कीयाना लक्ष्य मना मुन्ने तास्ता। अदिन काजे खत्म कीसोर मत्ता शोषक वर्ग कु मुन्ने वासी तम्मा

प्रतिक्रांतिकारी राजनीतिक पार्टिंग ओसो ग्रुप कुना संगे लेवेके बोरो मानेय ना संगे प्रतिरोध कियानूर, अनि जनता ना बेहरा संख्या एकताबद्ध आसी इव प्रतिरोधकारी ताकत कुना दृढता ते ओसो सम्पूर्ण रूप ते दमन कीयाना। सिर्फ इद्रमे अविना दमन कीयाना जरूरी मंता अनि संभव “संघर्ष अनिवार्य रूप ते गंभीर आता” इंदाना सही मंता। मति “मकसी मत्ता सामंती ताकत” कुना पोरो हियाना गलत आंता। इदु “सर्वहारा वर्ग ओसो कम्युनिस्ट पार्टी ता नेतृत्व ते मजदूर-किसान एकता पोरो आधार आसी जनता ना जनवादी तानाशाही” काजे इस्तेमाल कित्ता उंदी अपशब्द आंदू। इद गुट “यांत्रिकता” तुन “द्वन्द्वात्मक भौतिकवाद” काजे उंदी गाली लेक्का इस्तेमाल कित्ता लेक्का।

7

इगा उंदी बेरा मावा सामना चांग चुंग-श्याओ ना संगे आता। ओनगा उंदी बेसता प्रतिक्रांतिकारी मोसोर मंता, वर्ग-चेतना ओसो राजनीतिक रूप ते अदिना स्तर मावा क्रांतिकारी पांत कुना लोप्पा मत्ता वेल्ले लोकुर किनकु (बचोनो कम्युनिस्ट वेने शामिल मंतोर) ज्यादा पोरो मंता। इव पोल्लोंग मना वेल्ले लोकुर हू फंग गुट ता लोकुरा तुलना ते वेल्ले पेरके मंतोर। माटु अध्ययन कीयाना अनि मना वर्ग-सतर्कता, राजनीतिक ताकत बेरसी कियान जरूरत मंता। वर्तमान संघर्ष संगे माटु मना राजनीतिक चेतना ओसो संवेदनशीलता ता स्तर वेल्ले पोरो तेहना, सब्बे प्रतिक्रांतिकारीरा दृढता ते दमन कीतोम ओसो मना क्रांतिकरी तानाशाही तुन वेल्ले सुदृढ कीतोम इदु हू फंग गुट ताए सकारात्मक देन आंदू। इद्रम माटु क्रांति किन आखरी एवनल जारी तासिंतोम अनि उंदी महान समाजवादी देश ता निर्माण ता लक्ष्य पूरा कीतोम।

नोट

- 1) इगा “प्रतिक्रांतिकारी हू फंग गुट संबंधित उचुन सामग्री” ता बारे ते वेहताद मंता। इदिन इदे गुट ता वरोर सदस्य शू ऊ पेश कित्तोर। इदिना लोप्पा बचोनो

प्रतिक्रांतिकारी गोपनीय चिट्ठी ता अंश हीताद मत्ता अदिन हू फंग मुक्ति तुकू मुन्ने ओसो पेरके अचुन साल लोप्पा शू ऊ ना पोरोल ते रास्ताद मत्ता।

- 2) 1954 ते अक्तूबर ता आखरी तल दिसम्बर शुरू एवनल चीनी कला-साहित्य संघ ओसो चीनी लेखक संघ ता अध्यक्ष मंडलकु विस्तृत संयुक्त मीटिंग केयसी, “लाल भवन ता सपना” पोरोल ता लेख ता अध्ययन ताकनास्के पेश आयना पूंजीवादी विचार कुना नौजवान लेखक लोर कित्ता आलोचना ता दमन कीयाना “साहित्यिक गजट” ता गलितिंग ना जांच कित्ता। हू फंग कम्युनिस्ट पार्टी पोरो हमला कीयाना मौका वात्ता इंजी हमला कीयाना शुरू कित्तोर। तम्मा वरोर अनुयायी ना पोरोल ते उंदी गुप्त चिट्ठी रासिसी “इदु सिर्फ खोज कित्ता उंदी दरार आंदु, इदिन व्यापक ओसो सामान्य रूप हियाना वेल्ले जरूरी मंता” इत्तोर।

कृषि ता सहकारी बदलाव कुना बारे ते ³⁹

32 जुलाई 1955

1

पूरा नहाकुना इलाका लोप्पा जल्दिए पूना समाजवादी जन आंदोलन लोप्पा उंदी उभार वायारा। मति मावा उचुन कामरेड्स काल दोहची मत्ता महिला ना लेक्का पेरके-मुन्ने आंतोर अनि शिकायत कीसोरे मंतोर। “मीटु वेल्ले पेरके ताका मंतिर अनि वेल्ले स्पीड ते ताका मंतिर”। वेल्ले गलतिंग तेंडना, जरूरत लेवाए शिकायत कीयाना, वेल्ले पेशानी तोहना ओसो रक-रकम ता गिनती हिल्ला नियम-निषेध कुना पोल्लोंग कीयाना इव सब्बे ओरु नहाकुना इलाकांग लोप्पा समाजवादी जन आंदोलन ता मार्गदर्शन कियाला काजे सही नीति समझेमांतोर।

हिल्ले, इदु सही नीति हिल्ले, इद गलत नीति मंता।

नहाकुना इलाकांग लोप्पा सामाजिक बदलाव ता ज्वार, सहकारिता ता ज्वार, बचोनो जागा ना तेदता अनि जल्दिए पूरा देश लोप्पा वेने तेदियार। इदु उंदी बेहरा समाजवादी क्रांतिकारी आंदोलन आंदू, तीना लोप्पा 50 करोड़ तुकु ज्यादा नाहकुना आबादी शामिल मंता। इदिना ज्यादातर विश्वव्यापी महत्व मंता। माटु इद आंदोलन ता सक्रियता ते, गिर्दा ते योजनाबद्ध रूप ते नेतृत्व कीयाना अनि बद्रमाई इदिन पेरके पिडंगनायो। इद प्रक्रिया ताकनास्के उचुन गलतिंग वेने आया परिंतांग, मति अविन

³⁹ चीनी कम्युनिस्ट पार्टी ता केंद्रीय कमेटी कित्ता प्रांतीय, म्युनिसिपल ओसो स्वायत्त प्रदेशीय पार्टी कमेटींग ना सचिव लोरा उंदी सम्मेलन लोप्पा पेश कित्ता रिपोर्ट।

सुधरे कीयाना मुश्किल मन्नो आंता। माटु सक्रियता ते ओरा मदद कीतेके कार्यकर्ता लोर ओसो किसान लोरा गलतिंग सुधरे कीयाना लेवके दूर किया परमूडांता। कार्यकर्ता ओसो किसान पार्टी ता नेतृत्व ते मुन्ने दाया मंतोर, बुनियादी रूप ते इद उंदी स्वस्थ आंदोलन आंदू उचुन जागा ने ओरु तम्मा काम लोप्पा उचुन गलतिंग कितोर। उदाहरण तुकू गरीब किसान लोरा मुश्किल कुन नजरअंदाज कीसी सहकारी समितिंग लोप्पा नेंगना अनुमति हिल्ले, खुशहाल मध्यम किसान लोरा हित तुन नुकसान कीसी अविन सहकारी समितिंग लोप्पा शामिल आयला काजे मजबूत किताद मंता। इव गलतिंग कार्यकर्ता ओसो किसान लोर किन शिक्षित कीसी कीयाना, ओरा संगे सिर्फ झगड़ा कीयानायो। सिर्फ रांगतेके बदे समस्या हल आया परवो। माटु आंदोलन ता साहस संगे मार्गदर्शन कीयाना, “मुन्ने नायुम तरस ओसो पेरके डुव्वल तुकू वेरियाना”। कार्यकर्ता ओसो किसान लोराए संघर्ष तले हंजोरे तम्मा पूना बदलाव कीसोर मंतोम। ओरकिन संघर्ष लोप्पा डेयला हीमूट, मुन्ने हंजोरे ओरकिन करियाला हीमूट अनि मुन्ने तुकू ज्यादा क्षमता बेरसी कियाला हीमूट। इद्रम वेल्ले श्रेष्ठ लोकुर मुन्ने वायनूर। “मुन्ने नायुम तरस अनि पेरके डुव्वल तुकू वेरियसी” माटु कार्यकर्ता लोर किन तैयार किया परवोम। कार्यकर्ता लोरा उंदी बेहरा संख्या तुन उचुन जोम ट्रेनिंग हीता पेरके सहकारी आंदोलन ता मार्गदर्शन कीयाना अनि ओरा सहायता हियाला काजे पोरोटल नहाकुना इलाकांग लोप्पा लोहना। मति ओरु काम बद्रम कीयाना इंजी करियाला काजे ओरनकिन खुद आंदोलन लोप्पा शामिल आया लागियर। ओरु सिर्फ बदे प्रशिक्षण कक्षा लोप्पा रेंडु-मूंड दर्जन मुद्दांग ना बारे ते प्राफेसर ना पोल्लोंग केंजीसी काम कियाला करियानूर।

सक्षिप्त ते नेतृत्व जन आंदोलन तुकू पेरके मंदानायो। मति नेता परिस्थिति ते जन आंदोलन नेतृत्व तुकू मुन्ने दाया मंता अनि नेतृत्व अदिना संगे ताका परसोर हिल्ले। इद परिस्थिति तुन बदले कियान लागियर।

राष्ट्रव्यापी सहकारी आंदोलन इंजे बेहरा डाका वाटसोरे मुन्ने दाया मंता, मति माटु इद्रम ता सवाल कुना बारे ते तर्क-वितर्क किया लागिंता, सहकारी समितिंंग लोप्पा गलतीकु आया परिंता या? अविन सुदृढ़ कियमूड़ांता या? उचुन कामरेड्स ना मूल समस्या बचोनो लाख वर्तमान अर्ध-समाजवादी सहकारी समितिंंग कुन सुदृढ़ कीयाना संभव मंता या हिल्ले इंजी मंता। इवु सुडलांगे मंतांग अनि अविना लोप्पा हर उंदी समिति लोप्पा 20 तुकू ज्यादा किसान परिवार शामिल मंतांग। बदे डावुट हिल्ला बस्के एवनल ओरकिन सुदृढ़ कीवोम अस्के एवनल अविना विकास ता सवाल तेदा परवो। हत्ता उचुन साल कुना सहकारिता विकास ता रिकार्ड तुन हूड़ता पेरेके वेने उचुन कामरेड्स इंजे एवनल विश्वास किया परवोर अ ओरु 1955 ता परिस्थिति लेक्कटा रूप एतियार इंजी हरीं हूड़ा मंतोर। ओरु उंदी साल एवनल ओसो हरीं हूड़ला आल्लिसंतोर बहे, 1956 ता आखरी एवनल ओसो वेल्ले सहकारी समितिंंग ना सुदृढ़ बने कियमूड़ायर। ओरु सिर्फ कृषि ता सहकारी बदलाव संभव मंता अनि मावा पार्टी ता केंद्रीय कमेटी ता नीति सही मत्तास्केने विश्वास कियानूर। अदिनके इव रेंडु साल कुना लोप्पा काम ता निर्णायक महत्व मंता।

कृषि सहकारिता ना व्यहारिकता तुन ओसो इदिना संबंध ते पार्टी ता केंद्रीय कमेटी नीति तुन सही साबित कियाला काजे मावा देश ता कृषि सहकारिता आंदोलन ता इतिहास शुरू कीयाना उचुन सही साबित आयना लेक्का मंता।

चीन लोक गणराज्य ता स्थापना तुकू मुन्ने 22 साल एवनल क्रांतिकारी युद्ध लोप्पा मावा पार्टी, भूमि सुधार पेरेके इद्रम बने कित्ता कृषि उत्पादक आपसी सहयोग संगठन कुना स्थापना समाजवाद ता शुरूआती रूप लेक्का मत्ता। किसान लोरा मार्गदर्शन कीयाना मुन्ने अनुभव दोरकी कित्तोर। अस्के च्यांगशी प्रांत लोप्पा आपसी सहयोग श्रम-समितिंंग, पूहना दल, उत्तरी शेनशी ते श्रम-विनिमय दल, ओसो उत्तरी, पूर्वी ओसो उत्तरी-पूर्वी चीन लोप्पा आपसी सहयोग दल मत्ता। बेगा-बेगाने उंदी-रेंडु कृषि

उत्पादक सहकारी समितिं ग वेने जन्म आसी मत्तांग। अविना स्वरूप अर्ध-समाजवादी ओसो समाजवादी मत्ता। उदाहरण तुकू जापानी आक्रमण विरोधी युद्ध ताकनास्के उत्तरी शेनशी ता आनसाए काउंटी लोप्पा समाजवादी स्वरूप वाले उंदी कृषि उत्पादक सहकारी समिति ता उदय आसी मत्ता। मति इद्रम ता सहकारी समितिं ग कुन अस्के व्यापक रूप ते विस्तार किताद हिल्ले।

चीन लोक गणराज्य ता स्थापना आता पेरके मना पार्टी तुलनात्मक रूप ते बेहरा स्तर ते कृषि-उत्पादक आपसी सहयोग दल कुना स्थापना कियाला ओसो इव दल कुना पोरो आधार आसी बेहरा संख्या ते कृषि उत्पादक सहकारी समितिं ग ना स्थापना काम शुरू कियाला किसान लोरा नेतृत्वा किंतोर। इंजे एवनल इद काम काजे लगभग छः साल ओसो लागता।

15 दिसम्बर 1951 एवनल मना पार्टी ता केंद्रीय कमेटी कृषि उत्पादन लोप्पा आपसी सहयोग, सहकारिता बारे ते प्रथम प्रस्ताव ता ड्राफ्ट स्वीकार किता अनि विभिन्न जागा ने अमल कियाला काजे स्थानीय पार्टी संगठन तिगा लोहना (इद दस्तावेज तुन उंदी औपचारिक पार्टी प्रस्ताव लेक्का मार्च 1953 तुकू मुन्ने समाचार पेपर लोप्पा प्रकाशित किताद हिल्ले) अस्के 300 तुकू ज्यादा कृषि उत्पादन सहकारी समितिं ग ना स्थापना आसी मत्ता। रेंडु साल पेरके, 16 दिसम्बर 1953 ते मना केंद्रीय कमेटी कृषि-उत्पादक सहकारी समितिं ग ना बारे ते प्रस्ताव जारी कीतेके ओरा संख्या 14,000 तुकू ज्यादा आता। इत्तेके रेंडु साल लोप्पा बेरसिसी 47 गुना आता।

इद प्रस्ताव लोप्पा कृषि उत्पादक सहकारी समितिं ग ना संख्या 1953 ता इंगिम ते 1954 ता शरद ऋतु ता फसल एवनल लगभग 14,000 तल बेरसिसी 35,800 कीयाना इत्तेके सिर्फ 150 प्रतिशत बेरसि कीयाना इंजी आह्वान किताद मंता। अदे साल सहकारी समितिं ग ना संख्या असल ते 1,00,000 एवता, इत्तेके 600 प्रतिशत तुकू वेने ज्यादा आता इंजी पेरके जानकारी दोरकता लेक्का।

अक्तूबर 1954 ते मावा पार्टी ता केंद्रीय कमेटी 500 प्रतिशत बेरसी कीयाना इंजी निर्णय कित्ता। इत्तेके 1,00,000 तले 6, 00,000 एवसी कीयाना। असल ते इद संख्या 6,70,000 एवता। जून 1955 ते सहकारी समितिंग ना शुरूआती रूप ते पुनर्स्थापना कित्ता पेरके इद संख्या लोप्पा 20,000 कटौती आता। अद्रमासी 6,50,000 सहकारी समितिंग इत्तेके योजना लोप्पा तय कित्ता लक्ष्य तुकू 50,000 ज्यादा सहकारी समितिंग पिस्तांग। इव सहकारी समितिंग लोप्पा शामिल आयना किसान परिवार ता संख्या 1,69,00,000 मंता। इत्तेके हर सहकारी समिति लोप्पा औसतन 26 परिवार शामिल मंता।

इव सहकारी समितिंग मुख्य रूप ते उत्तरी प्रांत लोप्पा मंतांग, इविना मुक्ति तुलनात्मक रूप ते मुन्ने आता। पेरके मुक्त आता वेल्ले प्रांत कुना लोप्पा बचोनो कृषि उत्पादक सहकारी समितिंग मंता। मति आनद्धेइ ओसो चच्यांग तुन विड़चसी पिस्ता प्रांत कुना लोप्पा अविना संख्या वेल्ले हिल्ले।

इव सहकारी समितिंग साधारण रूप ते सुडला मंता मति इविना लोप्पा उचुन बेहरा सहकारी समितिंग वेने मंतांग। बदे सहकारी समिति लोप्पा 70-80 परिवार मंतांग, बदे वेने 100 तुकू ज्यादा परिवार ओसो बदे-बदिनाए लोप्पा बचोनो सौ परिवारकु मंतांग।

इविना लोप्पाटल ज्यादातर सहकारी समितिंग ना स्वरूप अर्ध-समाजवादी मंता, मति इविना लोप्पा उचुक सहकारी समितिंग समाजवादी स्वरूप मत्ता उन्नत स्तर ता सहकारी समितिंग लेक्का विकसित वेने आतांग।

मावा देश ता कृषि उत्पादन लोप्पा किसान लोरा सहकारिता आंदोलन ता विकास संगे-संगे उचुन समाजवादी राष्ट्रीय फार्म कुना स्थापना वेने किताद मंता। 1957 एवनल मावगा 3,038 राष्ट्रीय फार्म कु 1,68,70,000 मू जमीन पोरो खेती क्रियानुंगा। इविनगडल 141 फार्म मशीनीकृत आयरा। (इविना लोप्पा 1952 ते मत्ता फार्म ओसो पहली पंचवर्षीय योजना लोप्पा स्थापना कित्ता फार्मकु रेंडासी रकम ता फार्मकु

शामिल मंतांग), ताना लोप्पा 75,80,000 मू जमीन पोरो खेती कियमूडायर अनि 2,897 फार्म स्थानीय अथॉरिटी लोप्पा गैर-मशीनीकृत राष्ट्रीय पार्म कुना लोप्पा 92,90,000 मू जमीन पोरो खेतीबाड़ी आयारा। दूसरा ओसो तीसरा पंचवर्षीय योजनांग लोप्पा राष्ट्रीय कृषि उत्पादन ता वेल्ले विकास आयरा।

1955 ता वसंत ते मावा पार्टी ता केंद्रीय कमेटी कृषि उत्पादन सहकारी समितिंग ना संख्या बेरसिसी दस लाख कीयाना इंजी निर्णय कित्ता। इत्तेके वर्तमान 6,50,000 सहकारी समितिंग लोप्पा सिर्फ 3,50,000 इत्तेके 50 प्रतिशत तुकू ज्यादा आयनुंग। नावा हिसाब ते इद बढ़ोत्तरी उचुन कम मंता। 6,50,000 संख्या लगभग दुगुना आया परिंता, इत्तेके 13,00,000 आया परिंता, उचुन सीमान्त इलाका तुन विडचसी, देश ता 2,00,000 तुकू ज्यादा श्यांग लोप्पटल हर श्यांग लोप्पा उंदी लेवेके उंदी तुकू ज्यादा सुडल-सुडला अर्ध-समाजवादी स्वरूप वाले कृषि उत्पादन सहकारी समितिंग लेक्का बने किया परतोमा। साल रेंडुस लोप्पा इव सहकारी समितिंग अनुभव दोरकी कियानुंग अनि पाड़ना आयनुंग, दूसरोरिगडल करियानुंग। इंजेटल अक्तूबर 1956 ता शरद ऋतु ता फसल कोय्यना जोम इंजे 14 महीनांग मंतांग, सहकारी समितिंग ना स्थापना कीयाना योजना तुन पूरा कीयाना संभव मंता। नन्ना विभिन्न प्रांतकु, स्वायत्त प्रदेश कुना जिम्मेदार कामरेड्स वापिस वात्ता पेरके इदिना पोरो विचार-विमर्श कियानूर, तम्मा इलाका ता ठोस परिस्थिति अनुसार पूरा योजनांग बने कियानूर अनि रेंडु महीनांग लोप्पा केंद्रीय कमेटी मुन्ने रिपोर्ट पेश कियानूर इंजी आशा कीताना। अस्के माटु इदिना पोरो ओसो उँदी बेरा विचार-विमर्श कियाकोम अनि आखरी निर्णय एताकोम।

सहकारी समितिंग कुन सुदृढ़ बने किया परमूडाता या? उचुन मुल हत्ता साल 5,00,000 सहकारी समितिंग बने कीयाना योजना वेल्ले बेहरा मंता। दुस्साहस संगे मुन्ने ओयना लेक्का मंता, इयेंड 3,50,000 सहकारी समितिंग बने कीयाना योजनांग वेने इद्रमे मत्तांग। ओरकिन इचोन ज्यादा

सहकारी समितिं ग बने कीतेके अविन सुदृढ़ बद्रम बने कीयाना इंडी डावुट मंता।

अविन सुदृढ़ बने कीयाना संभव मंता या?

निज्जमे समाजवादी औद्योगीकरण बदे सरल काम हिल्ले ओसो समाजवादी बदलाव वेने हल्कोए आया परवो। लगभग 11 करोड़ किसान परिवार व्यक्तिगत कृषि उत्पादन ता जागा ता सामूहिक कृषि उत्पादन लोप्पा वाटता पेरके कृषि तकनीकी बदलाव कियाला बचोनो मुशिकल कुना सामना किया लागता। मति मना पार्टी जनता ना नेतृत्व कीसी इव मुशिकल कुन वेंडा परिंता इंजी विश्वास मंदाना।

कृषि सहकारिता सवाल बारे ते नावा हिसाब ते मुन्ने गरीब किसान, पूना, पाड़ना मध्यम किसान' लोरा लोप्पा मत्ता निम्न-मध्यम किसान लोरा लोप्पा समाजवादी हरीं पोय्यना गिर्दा मंता अनि इव रेंडासी सहकारी बदलाव काजे मावा पार्टी कित्ता आह्वान पोरो नितसी गिर्दा ते अमल किया मंतोम विश्वास मंदाना। इद पोल्लो खासकर राजनीतिक चेतना बेरसिसी मत्तोर पोरु लोगू आंता। बारांकु इत्तेके गरीब किसान लोर उंदी कठिन आर्थिक परिस्थिति ता सामना किया लागा मंता बारांकु इत्तेके निम्न-मध्यम किसान इंजे खुशहाल आया परताद हिल्ले, ओरा आर्थिक परिस्थिति मुन्ने तुकू बेस आता।

दूसरा नावा हिसाब ते माटु मना पार्टी समाजवाद एवनल एवला पूरा देश ता जनता ना नेतृत्व किया परिंतोम इंजी विश्वास मंदाना। मना पार्टी जनता ना महान जनवादी क्रांति ता जीत बगिल नेतृत्व कीयाना लोप्पा मजदूर वर्ग ता नेतृत्व ते जनता ना जनवादी तानाशाही स्थापना कियाला सफल किया परतेके लगभग पंचवर्षीय योजना लोप्पा पूरा राष्ट्र ता नेतृत्व कीसी समाजवादी औद्योगीकरण काम, कृषि, दस्तकारी ओसो पूंजीवादी उद्योग-वाणिज्य ता समाजवादी बदलाव काम वेने बुनियादी रूप ते पूरा आया परिंता। कृषि लोप्पा वेने बद्रमाई पेरके हिल्लेम इंजी साबित कियाला काजे जोरदार ओसो विश्वासनीय सबूत मंता। मीटू 1954 ता इरंगम तुन तुकू मुन्ने स्थापना कित्ता ओसो इंजे सुदृढ़ बने कित्ताद मंता उचुन 300

सहकारी समितिग ना मुन्नेटा समूह ते 13,700 सहकारी समितिग दूसरा समूह पोरो ओसो 86,000 सहकारी समितिग ना तीसरा समूह पोरो, कुल 1,00,000 सहकारी समितिग पोरो हूडा परिंतिर। इद्रम मत्तास्के 1954-55 ते स्थापना आता 5,50,000 सहकारी समितिग ना चौथा समूह, 1955-56 ते स्थापना कीयाना सहकारी समितिग ना पांचवी समूह तुन (अस्थाई रूप ते तय कित्ता नियंत्रित संख्या 3,50,000 मंता, इदिना फाईनल रूप इंजे वात्ताद हिल्ले) सुदृढ बने किया परताद हिल्ले।

माटु जनता पोरो भरोसा कीयाना पार्टी पोरो भरोसा कीयाना जरूरी मंता। इव रेंडासी बुनियादी उसूल आंदुंगष माटु इव उसूल कुना पोरो डावुट कीतेके माटु बदे सफलता दोरकी किया परवोम।

3

मावा नहाकुना इलाकांग लोप्पा सहकारिता पोरो तीरम-तीरम अमल कियाला काजे माटु इंजे एवनल स्थापना आता सहकारी समितिग ना वेल्ले सतर्कता ते जांच-पड़ताल कीयाना अनि सुदृढ कीयाना जरूरी मंता।

माटु सहकारी समितिग ना गुण पोरो जोर हियाना, गुण कुन नजरअंदाज कीसी सिर्फ अविना संख्या ओसो अविना लोप्पा शामिल आयना परिवार ता संख्या बेरसी कीसोर दायना रुझान ता विरोधी कीयाना जरूरी मंता। अदिन काजे माटू सहकारी समितिग ना जांच-पड़ताल, सुदृढीकरण ता काम पोरो गंभीरतापूर्वक ध्यान हियाना जरूरी मंता।

जांच-पड़ताल, सुदृढीकरण काम साल लोप्पा सिर्फ उंदी बेरा आयवा रेंडु-मूंड बेरा कीयाना। उचुन सहकारी समितिग लोप्पा इद काम इयेटा पहली 6 महीनांग लोप्पा उंदी बेरा किताद मंता (उचुन जागाने इद काम गंभीरता ते आयवा वेल्ले लापरवाही ते कित्ता लेक्का मंता)। नन्ना इयेंड शरद ओसो हिरंगम ते इव सहकारी समितिग कुना जांच-पड़ताल, सुदृढीकरण काम दूसरी बेरा कीयाना ओसो वायना साल वसंत ओसो एही ते तीसरी बेरा कीयाना इंजी सुझाव हींताना वर्तमान 6,50,000 सहकारी समितिग लोप्पाटल 5,50,000 पूनांग मंतांग। इविन हत्ता साल हिरंगम ते

लेवेके इयेंड वसंत कालम ते स्थापित किताद मंता। इविना लोप्पा उचुन सुदृढ किता बचोनो पहली श्रेणी ता सहकारी समितिग² वेन मंतांग। 1,00,000 पाडना ओसो सुदृढ किता सहकारी समितिग कुन जोड़ कीतेके इंजे एवनल सुदृढ किता सहकारी समितिग ना संख्या कम हिल्ले। इव सहकारी समितिग तीरम-तीरम बाकी सहकारी समितिग कुन सुदृढ कियाला सहायता कीयाना परिंतांगे परवोंग? इदिना निज्जम जवाब इंगो।

माटु किसान ओसो कार्यकर्ता लोरा समाजवादी गिर्दा (कम मत्तेकाई वेल्ले मत्तेकाई) ता सम्मान कीयाना, इद्रम ता गिर्दा पोरो तोड़ियो वाटनायो। माटु सहकारी समितिग ना सदस्य ओसो कार्यकर्ता लोरा, काउंटी, जिला, श्यांग ता कार्यकर्ता लोरा सुख-दुःख ते शामिल आयना।

बस्के एवनल लगभग सब्बे सदस्य लोर अविन ताकि कीयाना विचार कीवोर अस्के एवनल सहकारी समितिग कुन भंग कीयाना निर्णय एतनायो। बदे वेने सहकारी समिति ता उचुन सदस्य अलग आंतोर अस्के ओरकिन अलग आयला हियाना पिस्तोर अद्रमे ताकसोर मंदाना। बहुमत अदिन ताकी कीयाना तुकू विरोध कीसोर मत्ता अनि अल्पमत ताकी कीयाना समर्थन कितास्के बहुमत तुन अलग आयला हियाना अनि अल्पमत ताना लोप्पा नितसी मंदाना। परिस्थिति इद्रम आतेके मंदाला हियाना। हपे प्रांत ता उंदी सुडला सहकारी समिति लोप्पा सिर्फ 6 परिवार मत्ता, मूंड पाडना मध्यम किसान परिवार ताना लोप्पाटल अलग आयला आल्सतांग अविन अलग आयला हीताद मंता मति बाकी मूंड गरीब किसान परिवार³ बद्रमाई समिति लोप्पाने मंदानुंग इंजी निर्णय कीतांग। अविन इद्रम कीसी अद सहकारी समिति तुन बचे कीतांग। असल ते इव मूंड गरीब किसान परिवार कुन लागी किता दिशा तुन देश ता 50 करोड़ किसान लागू किया मंतोर। इंजे व्यक्तिगत खेती कीयाना सब्बे किसान लोरो पेरके इव मूंड गरीब किसान परिवारकु दृढतापूर्वक लागू किता दिशा तुन लागू किया मंतोर।

चच्यांग प्रांत लोप्पा “दृढता ते कावना” नीति लागू कीतांकु (इद नीति चच्यांग प्रांतीय कमेटी ता निर्णय पोरो आधार आसी हिल्ला मत्ता)

प्रांत ता 53,000 सहकारी समितिंंग लोप्पाटल 15000 सहकारी समितिंंग (इविना लोप्पा 4,00,000 किसान परिवार शामिल मत्तां) उंदे हमला ते भंग आतांगा। अद्रमासी जनता ओसो कार्यकर्ता लोरा लोप्पा वेल्ले निराशा फैलेमाता, इदु वेल्ले गलत काम मत्ता। “दृढता ते कावना” नीति ता निर्णय वेरियसी मंजी किताद मंता। केंद्रीय कमेटी ता मंजूरी लेवाए इचोन बेहरा निर्णय कीयाना गलत मत्ता। इदे आयवा अप्रैल 1955 ते केंद्रीय कमेटी “1953 ताए लेक्का सहकारी समितिंंग कुन बेहरा स्तर ते भंग कीयाना गलती कीयानायो लेवेके मीकिन ओसो उंदी बेरा आत्मालोचला किया लागियर” इंजी चेतावनी हीता। मति उचुन कामरेड्स इद चेतावनी तुन नजरअंदाज किया मंतोरा।

सफलता दोरकी किता पेरेके रेंडु रकम ता रुझान कुन मत्ता लेक्का दिसिंतांगा। उंदी सफलता ता नशा ते होचना अनि “वामपंथी” भटकाव लेक्कटा गलतिंंग कीयाना। इद उंदी वेल्ले लब्बड़ पोल्लो इंजी बद डावुट हिल्ले। दूसरा रुझान सफलता तुकू वेरियाना अनि “दृढता ते कावना” लेक्कटा गलतिंंग कीयाना अनि दक्षिणपंथी भटकाव गलतिंंग कीयाना। इद वेने अचोने लब्बड़ मंता। इंजे दूसरा रुझान बाधा वाटा मंता बारांकु इतेके उचुन कामरेड्स बचोनो लाख सुडला-सुडला सहकारी समितिंंग किन वेरिया मंतोरा।

4

सहकारी समितिंंग ना स्थापना मुन्ने तैयारी ता काम वेल्ले बेस कीयाना जरूरी मंता। माटु शुरू तले गुण पोरो ध्यान हियाना अनि सिर्फ परिमाण पेरेके वित्तना रुझान ता विरोध कीयाना।

बदे तैयारी लेवा बदे लड़ाई लडेमायमाटु, जीत ता गारंटी हिल्ला बदे लड़ाई लडेमायमाटु। इद क्रांतिकारी युद्ध ताकनास्के मावा पार्टी ता उंदी वेल्ले इस्तेमाल आयना नारा मत्ता। इदिन समाजवादी निर्माण कार्य पोरो वेने लागू कियमूडांता। सफलता ता पक्का गारंटी कियाला काजे माटु तैयारी कीयाना जरूरी मंता। सिर्फ उचुने आयवा भरपूर तैयारी कीयाना।

बदे वेने प्रांत, प्रिफेक्चर लेवेके काउंटी लोप्पा कृषि-उत्पादक सहकारी समितिग ना पूना समूह ता स्थापना कीयाना मुन्ने तैयारी ता वेल्ले काम कीयाना जरूरी मंता। इद काम लोप्पा मुख्य रूप ते दौड़ रास्ता पोल्लोंग शामिल कीयाना:

- 1) गलत विचार कुना आलोचना कीयाना, पाड़ना काम ता अनुभव कुना निचोड़ तेंडना।
- 2) कृषि सहकारिता ता बारे ते मना पार्टी उसूल, नीतिंग ओसो तरीकांग ना किसान जनता नड़मा बार-बार प्रचार कीयाना। किसान लोर मानसिक रूप ते पूरा तैयार मंदाना इंजी इद्रम कीयानास्के सामना कीयाना बाधांग किना बारे वेहाना।
- 3) पूरा प्रांत, प्रिफेक्चर, काउंटी, जिला लेवेके श्यांग ता ठोस परिस्थिति ता वेहच ते कृषि सहकारिता ता विकास कियाला काजे उंदी बेहरा योजना बने कीयाना अनि अदिना अनुसार उंदी वार्षिक योजना बने कीयाना।
- 4) सहकारी समितिग ना स्थापना कियाला काजे अल्पकालीन कोर्स संगे कार्यकर्ता लोरकिन प्रशिक्षित कीयाना।
- 5) कृषि उत्पादन आपसी सहयोग दल कुना बेहरा स्तर ता उंदी बेहरा संख्या ते विकास कीयाना, संभव आताचोन इव दल कुन उंदी दूसरा संगे कलियसी संयुक्त आपसी सहयोग दल कुना लेक्का संगठित कीयाना, इद्रम इविना उंदी डाका मुन्ने हंजी सहकारी समितिग लेक्का संगठित आयला काजे उंदी बुनियाद तैयार आयारा।

इद सब्बे आता पेरके सहकारी समितिग ना विकास लोप्पा गुण ओसो परिमाण ता एकता ता समस्या तिन बुनियादी रूप ते हल कीयाना संभव आयारा। मति सहकारी समितिग ना हर समूह ता स्थापना आता तुरंत पेरके जांच-पड़ताल, सुदृढीकरण काम कीयाना जरूरी मंदिता।

सहकारी समितिं ग ना बदे वेने समूह ता स्थापना पेरके अदिन सुदृढ बने किया परमूडांता या आयो इंदानादु काम कीयाना मुन्ने बचोन बेस तैयारी किताद मंता इंदाना पोरो आधार आसी मंता। ताना पेरके जांच-पड़ताल ओसो सुदृढीकरण काम बचोन बेस आता इंदाना पोरो आधार आसी मंता।

सहकारी समितिं ग ना स्थापना काम लोप्पा ओसो जांच-पड़ताल, सुदृढीकरण काम लोप्पा श्यांग कुना पार्टी, नौजवान संघ ता शाखांग पोरो निर्भर आसी मंदाना जरूरी मंता। अदिनके इव रेंडासी काम कुन नहाकुना इलाकांग लोप्पा पार्टी, नौजवान संघ ता संगठन कुना निर्माण कीयाना ओसो अविन सुदृढ बने कीयाना काम ता घनिष्ठ रूप ते जोड़े कीयाना जरूरी मंता।

अदु सहकारी समिति ना स्थापना ता काम आई अविन जांच-पड़ताल, सुदृढीकरण, नहाकुना इलाका ता स्थानीय कार्यकर्ता लोर अदिना मुख्य ताकत लेक्का मंदाना। ओरकिन जिम्मेदारी एतला प्रोत्साहन हियाना, पोरोटला लोहता कार्यकर्ता लोर ओरा सहायक ताकत बनेमायना ओरा काम ता मार्गदर्शन कीयाना अनि सहायता कीयाना, हर चीज कैदे पोय्यनायो।

5

उत्पादन लोप्पा कृषि उत्पादक सहकारी समितिं ग काजे ओरु व्यक्तिगत खेती कीयाना किसान ओसो आपसी सहयोग दल कुना तूलना ते ज्यादा उत्पादन कीयाना जरूरी मंता। ओरा उत्पादन तुन व्यक्तिगत खेती कीयाना किसान लेवेके आपसी सहयोग दल कुना स्तर बेरसी कीसी अविन सहकारी समितिं ग लेक्का स्थापना कीयाना। उत्पादन कम कीयाना अनुमति हिल्ले। इंजे एवनल स्थापित 6,50,000 कृषि उत्पादन सहकारी समितिं ग लोप्पा 80 प्रतिशत तुकू ज्यादा सहकारी समितिं ग उत्पादन बेरसी कीतांग। अद्रमासी इविना सदस्य लोर वेल्ले गिर्दा ते उत्पादन कीसोर मत्ता

लेक्का दिस्सा मंता, अनि सहकारी समितिंंग आपसी सहयोग दल किनकु बेस मंतांग अनि व्यक्तिगत खेती तुकू बचोनो बेस मंता।

उत्पादन बेरसी कियाला काजे दोड़ रास्ता पोल्लोंग ना जरूरत मंता:

- 1) खुन शामिल आयना अनि आपसी फायदा ता उसूल कुना पोरु नितसी मंदाना:
- 2) प्रबंध-व्यवस्था (उत्पादन-प्लानिंग, प्राशासन, श्रम ता संगठन लेक्कटवु) सुधरे कियाना:
- 3) खेती कीयाना तकनीकी (कोल एवनल पूहना, गुत्तिंग-गुत्तिंग उरस्ना, रेंडु लेवेके मूंड फसल तेंडना इलाकांग ना विस्तार कीयाना वेल्ले रकम ता विज्जा वीतना, पूना रकम ता कृषि-औजार कुना प्रचार-प्रसार कीयाना, वनस्पति-रोग, नुकसान कीयाना पुडियकुना मुकाबला कीयाना) विकसित कीयाना।
- 4) उत्पादन साधन (खेतिहर जमीन, खाद, जल-सरंक्षण परियोजनांग, पूहना-टेडियाना काम वायना जानवर, कृषि-औजार लेक्कटवु) कुन बेरसी कीयाना।

सहकारी समितिंंग कुन सुदृढ़ बने कीयाना ओसो उत्पादन बेरसी कीयाना गारंटी कियाला काजे इव सब्बे अनिवार्य शर्तकु मंतांग।

खुद शामिल आयना ओसो आपसी फायदा ता उसूल कुना पोरु नितसी मंदाला काजे माटु इंजे दोड़ रास्ता समस्यांग बगिल ध्यान हियाना:

- 1) पूहना-टेडियाना काम वायान जानवर ओसो बेहरा कृषि-औजार कुन शेयर लेक्का सहकारी समिति ते शामिल कीयाना व्यवस्था तुन साल रेंडु साल काजे रोमी कीतेके बेस मंता या हिल्ले, अविन सही दाम ते हियाना या हियानायो ओसो अविना कीमत मालिक लोर किन बचोन टाईम ते हियाना?
- 2) जमीन ता शेयर पोरु आधार आसी मत्ता भुगतान ओसो श्रम पोरु आधार आसी मत्ता भुगतान नडमा पूरा अनुपात मंता या हिल्ले?
- 3) सहकारी समिति तम्मा जरूरत पूरा कियाला काजे फंड बद्रम जमा कीयाना?

- 4) उचुन सदस्य लोरा श्रमशक्ति ता उंदी अंश उचुन सहायक कामकाज लोप्पा वाटमूडांता या हिल्ले? (माटु स्थापना कीयाना कृषि उत्पादन सहकारी समितिंंग ना स्वरूप इंजे अर्ध-समाजवादीए मंता, अदिन काजे इव नालुंग समस्यांग कुन पूर्ण रूप ते हल कीयाना बगिल ध्यान हियाना जरूरी मंता। इद्रम कीतेके गरीब किसान ओसो मध्यम किसान नडुमा आपसी फायदा ता उसूल ता उल्लंघन आयो आंता।)
- 5) सदस्य लोरा निजी इस्तेमाल काजे बचोन भूमि सुरक्षित तासना?
- 6) सहकारी समिति ना सदस्य लोरा वर्ग-संरचना ता समस्या लेक्कटवु।

इगा नन्ना सहकारी समिति ना सदस्य लोरा वर्ग संरचना ता समस्या ता चर्चा कियोकाना नावा हिसाब ते वायना कालम ता रेंडु साल लोप्पा, बेगाने सहकारी आंदोलन इंजे विस्तार आयाना शुरू आतांग अनि फैलेमाता जागा ते (इंजे ज्यादातर इलाकांग लोप्पा आता लेक्का) माटु मुन्ने जनता ना दोड़ रास्ता श्रेणिंग नडुमा तल सक्रिय तत्व कुन संगठित आयाला हियाना: 1) गरीब किसान 2) पूना मध्यम किसान लोप्पा मत्ता निम्न-मध्यम किसान, ओसो 3) पाड़ना मध्यम किसान लोप्पा मत्ता निम्न-मध्यम किसान। मति ओरा लोप्पटल इंजे उचुन मुल विचार कीवोर मति ओरकिन विचार लेवा सहकारी समितिंंग लोप्पा पिडुंगनायो। ओरकिन समूह लोप्पा सहकारी समितिंंग लोप्पा ओरा राजनीतिक चेतना स्तर बेरसतास्के, ओरु सहकारी समितिंंग लोप्पा इंटेरेस्ट एतनास्केने शामिल कीयाना। इव श्रेणिंग आर्थिक स्तर कम, ज्यादा लगभग उंदी लेक्का मंता। वीरु इंजे वेने कठिन पिस्वल पिस्सा मंतोर (जमीन दोरकतांकु मुक्त तुकू मुन्ने मत्ता परिस्थिति तुकू उचुन बेस परिस्थिति ते मत्तेकाई इंजे वेने श्रमशक्ति, पूहना-टेडियाना काम वायना जानवर ओसो कृषि-औजार ता कमी मत्तांकु तम्मा पिस्वल ते मशिकल कुना सामना किया लागिंता) ओसो इंजे वेने खुशहाल हिल्ले (निम्न-मध्यम किसान)। अदिन काजे वीरु सहकारी समितिंंग बने कियाला गिर्दा आंतोर। बदे कारण ते ओरा गिर्दा

उंदी लेक्का मन्नो आंता, उचुन मुल इंजे अचोन गिर्दा ते हिल्लेर अनि उचुन मुल इंजे हर्ी हूडा मंतोर। अदिन काजे माटु इंजे सहकारी समितिंग लोप्पा शामिल आयवोर, गरीब, निम्न-मध्यम किसान लोर मत्तेकाई ओरकिन शिक्षित कीयाना, उचुन जोम कोशिश कीसोर मंदाना। बस्के एवनल ओरु राजनीतिक रूप ते वेल्ले जागरूक आयोर अस्के एवनल माटु हर्ी हूडना। ओरा मरजी खिलाफ हंजी सहकारी समितिं लोप्पा ओरकिन पिडंगनायो।

पूना ओसो पाडना उच्च-मध्यम किसान इत्तेके आर्थिक रूप ते खुशहाल मत्ता मध्यम किसान लोर, सिर्फ समाजवादी हर्ी ते ताकला के राजनीतिक रूप ते जागरूक मत्तोर किन विडचसी ओसो निज्जमे सहकारी समिति ते शामिल आयला आल्सानोर किन इंजे सहकारी समिति लोप्पा शामिल कीयानायो अनि ओरा खिलाफ हंजी इदिना लोप्पा इनपडे शामिल कीयानायो। बारांकु इत्तेके ओरु वेने समाजवादी हर्ी पोय्यला काजे राजनीतिक रूप ते जागरूक हिल्लेर। ओरु सहकारी समितिंग लोप्पा शामिल कीयाना निर्णय सिर्फ नहाकुना इलाकांग लोप्पा बहुसंख्या सहकारी समितिंग लोप्पा शामिल आतास्केने, सहकारी समितिंग ना हर मू उत्पादन ओरा उत्पादन ता बराबर लेवेके अदिन कु ज्यादा आयनास्के, ओरु व्यक्तिगत रूप ते खेती कीयाना ओरा काजे प्रतिकूल मंता अनि सहकारी समिति लोप्पा शामिल आयवा लेवा ओरा काम मुन्ने हन्नो इंजी समझेमातास्केने ओरकिन शामिल कियाला निर्णय कियमूडायर।

अदिन काजे सबसे मुन्ने गरीब ओसो ज्यादा खुशहाल हिल्वोरा (ओरा संख्या कुल नाहकुना जन संख्या ता लगभग 60-70 प्रतिशत मंता) राजनीतिक चेतना स्तर अनुसार गोलबंद कीयाना अनि वायना उचुन साल कुना लोप्पा समूह ते सहकारी समितिंग ना स्थापना कियाला काजे प्रेरित कीयाना। अस्केने इव सहकारी समितिंग लोप्पा खुशहाल किसान लोर किन शामिल कीयाना। इद्रम कीसी माटु फरमानशाही तल बचेमाया परितोमा।

वायना उचुक साल कुना लोप्पा बुनियादी रूप ते इंजे सहकारी समितिंग ना काम आयवा इलाकांग लोप्पा सहकारी समितिंग लोप्पा

जमींदार ओसो धनी किसान लोर किन इनपड़े शामिल कीयानायो। मति बुनियादी रूप ते इद काम पूरा कित्ता इलाकांग लोप्पा सहकारी समितिंग सुदृढ़ आतगा, उचुक शर्तकु वाटसी, उंदी-उंदी मंजिल ओसो समूह ते (शोषण कीयाना विड़सता, श्रम कीयाना ओसो कानून ता पालन कीयाना,) पाड़ना जमींदार, धनी किसान लोर किन शामिल किया परमूड़ंता अनि ओरकिन श्रम संगे सुधरे कीयाना जारी तासना संगे-संगेने सामूहिक श्रम लोप्पा शामिल आयाना अनुमति हियाना।

6

सहकारी समितिंग ना दुस्साहस संगे विकास कीयाना ता आलोचना कीयाना। सहकारी समितिंग ना विकास वर्तमान परिस्थिति “असल संभावना तुकू मुन्ने हत्ता”, “जनता ना राजनीतिक चेतना स्तर तुकू मुन्ने हत्ता” इंदानदु गलत हिल्ले। असल परिस्थिति इद्रम मंता: चीन लोप्पा आबादी वेल्ले बेहरा मंता अनि खेतिहर भूमि हालनाचोन हिल्ले (पूरा देश लोप्पा हर मानेय औसतन मूंड मू ओसो दक्षिण प्रांत कुना बचोनो इलाकांग लोप्पा हर मानेय औसतन सिर्फ उंदी मू लेवेके अदिनकु वेने कम भूमि पोरु खेती कींतोर), प्राकृतिक बाधांग वासोरे मंतांग (हर साल खेति ता भूमि ता बेहरा हिस्सा पोरु बाढ़, फसल वेत्तना, तूफान, मच्छु, आदुरकू ओसो नुकसानदायक पुड़ियकुना लेक्कटा बाधांग ना सामना किया लागिंता), अनि पेरके अरता कृषि औजार कुना इस्तेमाल आंता। अद्रमासी भूमि सुधार पेरके किसान लोरा पिस्वल उचुन सुधरे माता अनि ओरा लोप्पा वेल्ले लोकरु इंजे वेने मुश्किल ते मंतोर। खुशहाल किसान लोरा संख्या वेल्ले कम मंता, अदिन काजे ज्यादातर किसान समाजवादी हरी ते ताकला काजे मुन्ने वांतोर। इद्रम मुन्ने वायनदु चीन ता समाजवादी औद्योगिकरण संगे ओसो अदिना सफलतांग संगे लगातार बेरससोर दांता। ओरा काजे समाजवादे उंदी हरी मंदिंता। इद्रम ता किसान लोरा संख्या नहाकुना इलाकांग ना कुल आबादी लोप्पा 60-70 प्रतिशत मंता। दूसरा माटा ने किसान लोरा संख्या काजे तम्मा गरीबी दूर कियाला, तम्मा पिस्वल सुधरे

कियाला ओसो प्राकृतिक बाधांग ना सामना कियाला समाजवादे उंदी तरीका मंदिता। गरीब किसान ओसो गैर-खुशहाल किसान लोर इद पोल्लो तुन वेल्ले जल्दी समझेमाया मंतोर। नहाकुना इलाका ना कुल 20-30 प्रतिशत मत्ता खुशहाल ओसो तूलनात्मक खुशहाल किसान लोरे दुलमुल आंतोर अनि ओरा लोप्पा उचुन मुल पूंजीवादी हरीं पोय्यना पूरा कोशिश कींतोर। नन्ना इंजे वेहता लेक्का गरीब किसान ओसो गैर खुशहाल किसान लोरा लोप्पा वेने वेल्ले तोर निम्न स्तर ता राजनीतिक चेतना ता कारण ते इंजे हरीं हूडना रुझान पोयसी मंतोर अनि दुलमुल आया मंतोर। मति खुशहाल किसान लोरा तुलना ते ओरा काजे समाजवाद तुन स्वीकार कीयाना हल्को मंता। इदे निज्जम आंदू मति मावा उचुन कामरेड्स बचोनो लाख पूना बनेमाता सुडला-सुडला अर्ध-समाजवादी कृषि उत्पादक सहकारी समितिंग “असल संभावना तुकू मुन्ने हत्तांग”, “जनता ना राजनीतिक चेतना स्तर तुकू मुन्ने हत्तांग” इंदाना निज्जम पोल्लो तुन नजरअंदाज कींतोर। अद्रमासी ओरा कोंडा बेहरा संख्या, इत्तेके गरीब किसान ओसो गैर खुशहाल किसान लोर किन नजरअंदाज कीसी खुशहाल किसान लोरा उचुन संख्या पोरो मंदिता। इदु उदी रकम ता गलत विचार आंदू।

इदे आयवा वीर कामरेड्स नहाकुना इलाका लोप्पा कम्युनिस्ट पार्टी नेतृत्व ता ताकत तुन व्यापक किसान लोर कीयाना पार्टी समर्थन तुन कम कीसी हूडिंतोर। ओरु इंजे एवनल स्थापना कित्ता बचोनो लाख सुडल-सुडला सहकारी समितिंग कुन सुदृढ बने कीयाना पार्टी काजे वेल्ले मुश्किल मंता, कृषि सहकारिता नेतृत्व कियाला काजे पार्टी कीयाना वर्तमान काम बारे ते बेहरा स्तर ते निराशाजनक तरीका ते “कार्यकर्ता लोरा अनुभव ता स्तर तुकू मुन्ने हत्ता” इंतोर। समाजवादी क्रांति उंदी पूना रकम ता क्रांति आंदू। मुन्ने मावा अनुभव सिर्फ पूंजीवादी-जनवादी क्रांति एवनले सीमित मत्ता अनि समाजवादी क्रांति ता माटु बदे अनुभव कीवा मत्तोमा मति इद्रम ता अनुभव माकिन बद्रम दोरका परिंता? बाताले कियवा हरीं हूडसोर मत्तेके, समाजवादी क्रांति ता संघर्ष लोप्पा डेयसी ओसो क्रांति

ताकनास्के अनुभव दोरकी कीसी? पंचवर्षीय योजना तुन लागू कियवा लेवा, समाजवादी औद्योगीकरण काम तुन कैदे पोयवा लेवा माटु औद्योगीकरण ता अनुभव बद्रम दोरकी किया परितोम? पंचवर्षीय योजना ता उंदी हिस्सा कृषि सहकारिता संबंधित मंता। माटु हर श्यांग ओसो हर नार लोप्पा उंदी लेवेके उंदी तुकू ज्यादा कृषि उत्पादन सहकारी समितिं ग ना स्थापना कियाला किसान लोरा नेतृत्व किया परवेके “कार्यकर्ता लोरा अनुभव स्तर” बद्रम बेरसियार? कृषि उत्पादन सहकारी समितिं ग ना विकास वर्तमान परिस्थिति “कार्यकर्ता लोरा अनुभव स्तर तुकू मुन्ने हत्ता” इंदाना नावा विचार गलत मंता। इद उंदी दूसरा रकम ता गलत विचार आंदू।

बद हिसाब ते वीर कामरेड्स इद समस्या तुन हूडिंतोर अदु गलत मंता। वीरु मुख्य पहलू तुन हूडवा लेवा गौण पहलू पोरो जोर हींतोरा। इगा गौण पहलू पोरो आधार आसी मत्ता समस्या तुन नजरअंदाज कीयानायो अनि अविन उंदी-उंदू कीसी हल कीयाना इंजी वेहाना। मति अविन मुख्य पहलू समझेमायनायो लेवेके माटु मना दिशा पोहितोम।

सहसे मुन्ने वेरा लोप्पा व्यापक किसान लोर पार्टी नेतृत्व ते समाजवादी हरीं पोय्यला तैयार मंतोर इंजी विश्वास मंदाना जरूरी मंता। दूसरा मना पार्टी इद हरीं पोरो किसान लोरा नेतृत्व कियाला तैयार मंतोरा। इव रेंडासी पोल्लोंग ना सार अविना मुख्या धारा आंदू। मावा लोप्पा इद विश्वास हिल्वेके समाजवाद ता निर्माण लगभग मूंड पंचवर्षीय योजनांग टाईम ते बूनियादी रूप ते पूरा कीयाना असंभव आयार।

7

सोवियत संघ समाजवाद निर्माण लोप्पा दोरकी कित्ता महान ऐतिहासिक अनुभव कु मना जनता तुन प्रेरित कित्ता अनि चीन लोप्पा समाजवाद निर्माण कियाला काजे मावा लोप्पा पूरी विश्वास पुट्टी कित्ता। मति अद अंतरराष्ट्रीय अनुभव ता बारे वेने अलग-अलग मत मंता। उचुन कामरेड्स कृषि सहकारिता विकास समाजवादी औद्योगीकरण संगे कलियसी कीयाना मना केंद्रीय कमेटी ता नीति तुन स्विकार कीवोर मति इद नीति ता

सच्चाई सोवियत संघ लोप्पा साबित आता। ओरु औद्योगिकरण ता रफतार इंजे तय किताद मंता इंजी मनेमांतोर। कृषि सहकारिता तुन वेल्ले तीरम-तीरम बेरसी कीयाना अनि अदिना काजे औद्योगिकरण ता रफतार संगे उंदी डाका काल्पना जरूरी मंता। इद सोवियत संघ ता अनुभव ता उल्लंघन कीयाना आंदू। वीर कामरेड्स समाजवादी औद्योगिकरण तुन कृषि ता सहकारी बदलाव तुकू अलग ताकी पूरा कियमूडायो। सबसे मुन्ने सब्बे तोर, चीन लोप्पा व्यापारिक अनाज ओसो औद्योगिक कच्चा माल ता उत्पादन स्तर इंजे दोड़ मंता। अनि इव राष्ट्रीय मांग हर साल बेरससोरे दायामंता। इद उंदी तीव्र अंतरविरोध मत्ता। माटु कृषि सहकारिता समस्या तुन लगभग मूंड पंचवर्षीय योजनांग लोप्पा बुनियादी रूप ते हल किया परवो इत्तेके मना कृषि कोंदांग-एर्मिंग संगे ताकना कृषि औजार कुना संगे आयना सुडला स्तर ता खेती तल बेहरा स्तर ता मशीनीकृत खेती लोप्पा डेया परवेके, पूना नाहकु उदिह कीयाना संगे मशीन कुना इस्तेमाल कीसी फडी भूमि तुन खेती कीयाना लेक्का बने कीयाना काम राज्य व्यापक रूप ते संगठित कीवेके (मूंड पंचवर्षीय योजनांग लोप्पा 40 करोड़ मू फडी भूमि तुन खेती कीयाना लेक्का बने कीयाना लक्ष्य पोयता) माटु व्यापारिक अनाज ओसो औद्योगिक कच्चा माल ता लगातार बेरसोर मत्ता मांग ओसो मुख्य फसल कुना वर्तमान उत्पादन स्तर नडमान अंतरविरोध तुन हल कियाला असफल मत्तेके मना समाजवादी औद्योगिकरण काम लोप्पा वेल्ले मुश्किल ते अरिंतोम अनि अविन पूरा किया परवोम आंतोमा समाजवादी निर्माण कीयानास्के इदे समस्या ता सामना किया लागतना सोवियत संघ कृषि ता सामूहिकरण कार्य ता योजनाबद्ध नेतृत्व ओसो विकास कीसी इद समस्या तुन हल कित्ता। माटु वेने मना समस्या तुन सिर्फ इद्रमे हल किया परिंतोमा। दूसरा मना उचुन कामरेड्स दोड़ वेहता रेंडु पोल्लोंग नडमा ता संबंध पोरो इत्तेके समाजवादी औद्योगिकरण ता सबसे ज्यादा महत्वपूर्ण शाखा मत्ता बेहरा उद्योग, कृषि काजे ट्रैक्टर, बाकी कृषि-यंत्र, रासायनिक खाद, परिवहन ता आधुनिक साधनकु, निय्य, बिजली लेक्कटा उत्पादन कीयाना पोरो इनपडे ध्यान हियानायो। इव सब्बे ना

इस्तेमाल कीयाना लेवेके व्यापाक रूप ते इस्तेमाल कीयाना सिर्फ बेहरा स्तर ता सहकारी खेती ता प्रधानता मत्ता कृषि पोरो आधार आसी संभव मंता। इंजे माटु सिर्फ सामाजिक व्यवस्था लोप्पा निज्जी मालिकाना तुन सार्वजनिक मालिकाना ते बदले कीयाना क्रांति ए आयवा प्रौद्योगिक लोप्पा दस्तकारी उत्पादन तुन बेहरा स्तर ता आधुनिक मशीनीकृत उत्पादन लेक्का बदले कीयाना क्रांति वेने ताकी किया मंतोम अनि इव रेंडासी क्रांतिंग उंदी दूसरा संगे जुड़ेमासी मंतांग। कृषि लोप्पा मत्ता परिस्थिति तुन हूडसोरे सहकारिता तुन बेहरा-बेहरा मशीन कुना इस्तेमाल कीयाना मुन्ने लागू कीयाना जरूरी मंता(पूंजीवादी देश लोप्पा कृषि ता विकास पूंजीवादी तरीका तेने आंता)। अदिन काजे माटु बद्रमासी उद्योग ओसो कृषि तुन समाजवादी औद्योगिकरण ओससो कृषि ता समाजवादी बदलाव तुन उंदी दूसरा तले अलग समझेमायनायो। बदे वेने परिस्थिति ते इविना लोप्पाटल बदे उंदी पोरो ज्यादा जोर हीसी दूसरा पोरो नजरअंदाज कीयानायो। इदिना लोप्पा वेने सोवियत अनुभव माकिन हरीं तोहिंता, मति उचुन कामरेड्स इदिना पोरो ध्यान हीवोर आंतोर, अनि इविना हमेशा अलग-अलग समझेमांतोर। तीसरी पोल्लो मना उचुन कामरेड्स रेंडु ओसो उचुक पोल्लो ना नडमा ता संबंध पोरो इत्तेके राष्ट्रीय औद्योगीकरण ओसो कृषि तकनीकी बदलाव काजे वेल्लाए पूंजी ता जरूरत मंदिता, इद पूंजी ता वेल्ले बेहरा हिस्सा कृषि संगे जम्मा कियमूडंता। इद का सीधा कृषि टैक्स वसूल कीयाना आयवा किसान लोरा जरूरत ता उपभोक्ता माल (ग्राहक लोरा काजे) वेल्ले उत्पादन कीयाना, सुडला उद्योग कुना विकास कित्ता पेरेके ओरा उत्पादन ता किसान लोरा व्यापारिक अनाज ओसो सुडला उद्योग कुना काम वायना कच्चा माल संगे विनिमय कींतोर, इद्रम कीसी सिर्फ किसान ओसो राज्य ता भौतिक जरूरत कुन पूरा कीयानाए आयवा राज्य काजे निधि वेने जमा कींतोर। इदे आयवा सुडला उद्योग कुना बेहरा स्तर ते विकास कियाला काजे सिर्फ बेहरा उद्योग कुनाए आयवा कृषि ता वेने विकास कीयाना। बारांकु इत्तेके इद काम लघु-किसा अर्थव्यवस्था पोरो आधार आसी आया परोवा। इदिन बेहरा स्तर ता कृषि

काजे हरीं हूडा लागियर इत्तेके मना देश लोप्पा समाजवादी सहकारी कृषि तुकू हरीं हूडा लागियर। सिर्फ इदिना संगेने किसान लोरा क्रय-शक्ति नेता तूलना ते बचोनो बेरसा परिंता। उंदी बेरा सोवियत संघ ता अनुभव मना मुन्ने मंत्ता, मति मना उचुन कामरेड्स इदिना बगिल ध्यान हीवोर आंतोरा। ओरु पूंजीपति, धनी किसान, ओसो पूंजीवाद बगिल दायना स्वतःस्फूर्त रुझान तासना खुशहाल मध्यम किसान लोरा रुझान पोय्यसोरे, हमेशा सिर्फ उचुने लोकुरा हित ते आल्सिंतोर अनि मजदूर वर्ग ता रुझान पोयंतोर, पूरा देश, पूरा जनता ना हति ते आल्सा परवोर आंतोरा।

8

उचुन कामरेड्स चीन लोप्पा कृषि सहकारिता ते मना वर्तमान काम लोप्पा जल्दबाजी ओसो दुस्साहस संगे मुन्ने दायना रुझान खिलाफ सोवियत ता कम्युनिस्ट पार्टी इतिहास तले उंदी रकम ता दस्तावेज परहकता कामरेड्स वेने मंतोरा। “सोवियत संघ ता कम्युनिस्ट पार्टी (बोलशेविक) ता इतिहास, संक्षिप्त कोर्स” माकिन बस्केने सोवियत संघ लोप्पा वेल्ले स्थानीय पार्टी संगठन सामूहीकरण ता रफ्तार पोरो जल्दबाजी ओसो दुस्साहस संगे मुन्ने दायना गलती कींतांग इंजी वेहिंता। माकिन इद अंतरराष्ट्रीय अनुभव बगिल ध्यान हियाना जरूरत हिल्ले या?

माटु सोवियत संघ ता इद अनुभव बगिल ध्यान हियाना ओसो जल्दबाजी, दुस्साहस संगे मुन्ने दायना रुझान वाले सब्बे विचार कुना जरूर विरोध कीयाना। बारांकु इत्तेके इवु तैयारी काम तुन नजरअंदाज कींतांग अनि किसान लोरा राजनीतिक चेतना स्तर ता उल्लंघन कींतांग। मति माटु इगा वेहता कामरेड्स किन सोवियत संघ ता अनुभव तुन पत्ते तुकू मुन्ने ओयना विचार ता पर्दापाश कियाला काजे कवर लेक्का इस्तेमाल कीयाना अनुमति हिल्ले। मना पार्टी ता केंद्रीय कमेटी चीन लोप्पा कृषि सहकारिता तुन बद्रम लागी कीयाना निर्णय किताद मंता?

पहली अदु योजना तुन 18 साल लोप्पा बुनियादी रूप ते पूरा कियाला आल्सिंता। अक्तूबर 1949 ते चीन लोक गणराज्य ता स्थापना

आता पेरकेटल 1952 एवनल मूंड साल तुकू उचुन ज्यादा टाईम राष्ट्रीय अर्थव्यवस्था ता पुर्स्थापना ते वाटताद मंता। कृषि लोप्पा माटु इद टाईम ते भूमि सुधार कीयाना ओसो उत्पादन ता पुर्नस्थापना कीयानाए आयवा सब्बे पाड़ना मुक्त इलाकांग लोप्पा कृषि उत्पादन आपसी सहयोग दल कुना संगठन कार्य ता वेल्ले विस्तार कीतोम। अगा अर्ध-समाजवादी कृषि उत्पादक सहकारी समितिंग निल्पी कीयाना वेने शुरू कीतोम अनि उचुन अनुभव दोरकी कीतोम। ताना पेरके पहली पंचवर्षीय योजना वात्ता, इदु 1953 ते शुरू आता। अस्केटल इंजे एवनल लगभग मूंड साल आतांग, इद नडमा माटु कृषि सहकारी आंदोलन पूरा देश लोप्पा विस्तार आता अनि मना अनुभव वेने बेरस्ता। चीन लोक गणराज्य ता स्थापना तल तीसरी पंचवर्षीय योजना ता आखरी एवनल 18 साल लोप्पा आंता। इयेंड माटु समाजावादी औद्योगीकरण ओसो दस्ताकारी, पूंजीवादी उद्योग-वाणिज्य ता समाजवादी बदलाव संगे-संगे कृषि ता समाजवादी बदलाव ता काम वेने बुनियादी रूप ते पूरा कियाला आल्संतोम। इद्रम कीयाना संभव मंता या? सोवियत अनुभव माकिन पूर्णरूप ते संभव मंता इंजी वेहिंता। सोवियत संघ लोप्पा गृहयुद्ध 1920 ते समाप्त आता, कृषि सामूहिकरण 1921 तल 1937 एवनल 17 साल लोप्पा ओसो इद काम ता मुख्य हिस्सा 1929 तल 1934 एवनल 6 सालत लोप्पा पूरा आता। अदिनके इद कालम लोप्पा सोवियत संघ ता उचुन स्थानीय पार्टी संगठन “सफलता ता नशा ते होचिसी” मत्तांग, “सोवियत संघ ता कम्युनिस्ट पार्टी (बोलशेविक) ता इतिहास, सक्षिप्त कोर्स” लोप्पा वेहता लेक्का, मति जल्दिए गलती सुधरे किताद मंता। पेरके, सोवियत संघ पूरा कोशिश कीसी तन्ना पूरा कृषि ता समाजवादी बदलाव काम तुन सफलतापूर्वक पूरा कित्ता। संगेने कृषि ता समाजवादी बदलाव ते बेहरा काम वेने पूरा कित्ता। सोवियत संघ पोयता हरीं मावा काजे उंदी आदर्श हरीं मत्ता।

दूसरा, कृषि ता समाजवादी बदलाव ता काम लोप्पा माटु तीरम-तीरम मुन्ने दायना तरीका पोय्या मंतोर। पहली डाका, समाजवाद सिर्फ उंदी हुय्युम लेक्का मत्ता, अविना लोप्पाटल सिर्फ हर दल लोप्पा सिर्फ

उचुने मुल लेवेके 10-15 परिवारके शामिल मत्ता, किसान लोर किन विचार मत्तेके शामिल आयना अनि आपसी फायदा ता उसूल कुना पोरो नितसी कृषि उत्पादक आपसी सहयोग दल कुन संगठित कीयाना इंजी आह्वान कीयाना। दूसरा डाका, किसान लोर किन तम्मा विचार ते शामिल आयना, आपसी फायदा ता उसूल कुनाए अनुसार इव आपसी सहयोग दल कुना पोरो आधार आसी सुडला कृषि उत्पादक सहकारी समितिग किन संगठित कीयाना, अर्ध-समाजवादी स्वरूप मत्ता, अविना लोप्पा जमीन शेयर कीयाना लेक्का शामिल कीयाना, एकीकृत प्रबन्ध व्यवस्था मत्ता सहकारी समितिग कुन संगठित कीयाना इंजी आह्वान कीयाना। ताना पेरके तीसरा डाका, किसान लोर किन इगा वेहता उसूल कुना पोरो आधार आसीए इव सुडला अर्ध-समाजवादी सहकारी समितिग पोरो आधार आसी, एकजूट आयना, बेहरा आकार ता पूर्ण समाजवादी सहकारी समितिग कुन संगठित कीयाना इंजी आह्वान कीयाना। इव निर्णयकुना कारण ते किसान लोरा काजे व्यक्तिगत अनुभव संगे तन्ना समाजवादी चेतना बेरसी कीयाना, तम्मा पिस्वल-शैली बदले कीयाना अनि इद्रम ओरकिन अचनाक आता बदलाव ता सामना कीयाना हल्को आयारा इद निर्णय कीतांग उत्पादन लोप्पा मुन्ने उंदी-रेंडु साल लोप्पा आयना नुकसान तले बचेमायमूडायरा। इदे आयवा उत्पाद लोपा हर साल बढ़ोत्तरी ता गारंटी कीयाना वेने जरूरी मत्ता। वर्तमान 6,50,000 कृषि उत्पादक सहकारी समितिग लोप्पा 80 प्रतिशत तुकू ज्यादा सहकारी समितिग तम्मा उत्पादन बेरसी कीतांग, सिर्फ 10 प्रतिशत तुकू ज्यादा सहकारी समितिगे मुन्ने बचोन मत्ता अचोने उत्पादन कीतांग अनि 10 प्रतिशत तुकू कम सहकारी समितिग ना उत्पादन घटेमाता। पेरकेटा रेंडासी श्रेणिग वाले सहकारी समितिग लोप्पा परिस्थिति उचुन खराब मत्ता, खासकर उत्पाद घटेमाता आखरी श्रेणी वाले सहकारी समितिग लोप्पा इद्रम ता सहकारी समितिग ना जांच पड़ताल कीयाना अनि अविन सुदृढ़ बने कियाला काजे वेल्ले कोशिश कीयाना जरूरी मत्ता। 80 प्रतिशत तुकू ज्यादा सहकारी समितिग तम्मा उत्पादन (10-30 प्रतिशत मत्ता) बेरसी कीतांग, 10 प्रतिशत तुकू

ज्यादा सहकारी समितिंंग ना उत्पादन मुन्नेटा साल बेरसताद लेवेके घटेमाताद हिल्ला मति जांच पड़ताल, सुदृढीकरण पेरके दूसरा साल अदु बेरसी कित्ता। उत्पादन घटेमासोर मत्ता 10 प्रतिशत तुकू कम सहकारी समितिंंग लोप्पा वेने जांच पड़ताल, सुदृढीकरण पेरके दूसरा साल बेरसी कित्ता लेवेके वेल्ले घटेमाता। अदिन काजे कुलमिले कीसी मना सहकारी आंदोलन ता विकास बेस आता अनि माटु उत्पादन बेरसी कीयाना गारंटी ओसो उत्पादन घटेमायना तुकू बचेमायला तैयार मंता इंजी गारंटी कीयाना। इदे आयवा इव निर्णयकु कार्यकर्ता लोर किन प्रशिक्षित कीयाना वेल्ले बेसता पाठ्यक्रम आंदू। इद्रम सहकारी समितिंंग काजे बेहरा संख्या ते प्रशासनिक, तकनीकी कर्मचारिर तीरम-तीरम प्रशिक्षित कीयाना।

तीसरा, हर साल सहकारिता ता विस्तार कियाला काजे असल परिस्थिति ता वेहच ते उंदी नियंत्रित संख्या तय कीयाना अनि बचोनो बेरा निरीक्षण कीयाना। इद्रमे हर साल बदलेमासोर मत्ता परिस्थितिंंग ओसो सहकारिता काम लोप्पा दोरकता सफलतांग अनुसार हर प्रांत, काउंटी ओसो श्यांग लोप्पा सहकारीता विस्तार कियाला काजे ठोस निर्णय एतमूडांता। उचुक जागा ने उचुन जोम विस्तार कार्य रोमी कीसी जांच पड़ताल, सुदृढीकरण किया परितोम। उचुन जागा ने विस्तार ओसो जांच पड़ताल, सुदृढीकरण काम संगे-संगेने कियमूडांता। उचुन सहकारी समितिंंग लोप्पा उचुन सदस्य लोर अलग आयना अनुमति मंदिता अनि उंदी-रेंडु सहकारी समितिंंग कुन अस्थाई रूप ते भंग कीयाना अनुमति वेने मंदिता। उचुन जागा ने पूना सहकारी समितिंंग बेहरा संख्या ते स्थापना कियमूडांता अनि उचुक जागाने वर्तमान सहकारी समितिंंग लोप्पा किसान परिवार कुना संख्या बेरसी कीयानाए आयवा बदे रकम ता बढ़ोत्तरी कीयानायो। हर प्रांत लेवेक काउंटी लोप्पा सहकारी समितिंंग ना उंदी समूह ता स्थापना आतेके अविना विस्तार कार्य तुन रोमी कीयाना अनि पूना समूह ना स्थापना कीयाना मुन्ने जांच पड़ताल, सुदृढीकरण कीयाना। बस्केने रोमला हियानायो इंदाना विचार गलत मंता। सहकारी आंदोलन ता जांच पड़ताल पार्टी ता केंद्रीय कमेटी, प्रांतीय, स्वायत्त प्रदेशीय,

म्युनिसिपल ओसो प्रिफेक्चर कमेटींग इदिन मजबूती पोयसी तासना अनि हर साल इद काम सिर्फ उंदी बेरा आयवा बचोनो बेरा कीयाना इंजी गारंटी कीयाना। बदे समस्या वातेके तुरंत हल कीयाना, वेल्ले समस्यांग जमा आता पेरेकेने हल कीयाना कोशिश कीयानायो। सही टाईम ते आलोचना कीयाना, सिर्फ घटना आता पेरेकेने आलोचना कीयाना आदत वाटनायो। उदाहरण तुकू इयेटा सात महिनांग लोप्पा सिर्फ केंद्रीय कमेटीए नाहकुना कुना लोप्पा सहकारिता ता सवाल कुना पोरो विचार कियाला काजे देश ता विभिन्न हिस्सा ने नेतृत्वकारी कामरेड्स मूंड सम्मेलनकु कित्तोरा अविना लोप्पा वर्तमानल सम्मेलन वेने शामिल मंता। माटु लागू कीयाना तरिका तुन स्थानीय परिस्थिति अनुसार बने कीयाना अनि सही मार्गदर्शन कीयाना तरीका मना काम लोप्पा तूलनात्मका कम गलतिंग आयनंग अनि गलतिंग आतेके वेने अविन सुधरे कियमूडांता इंजी गारंटी कींता।

पोरो वेहता सब्बे पोल्लोंग सुरता तासिसी माटु मना पार्टी ता केंद्रीय कमेटी कृषि सहकारित ना मार्गदर्शन कियाला काजे लागू कित्ता नीति उंदी सही नीति मत्ता। अदिन काजे इद आंदोलन ता सही विकास ता गारंटी हिंता। इद नीति तुन “दुस्साहस संगे मुन्ने ओयना” इंजी पोरोल तासना गलत आयरा।

9

उचुन कामरेड्स मजदूर-किसान एकता ता वेल्ले महत्वपूर्ण सवाल पोरो गलत रुझान पोयंतोर, बारांकु इत्तेके ओरु पूंजीपति वर्ग, धनी किसान, पूंजीवाद बगिल ता स्वतःस्फूर्त रुझान तासना खुशहाल मध्यम किसान लोरा रुझान पोयसी मुन्ने दांता। ओरु सहकारी आंदोलन लोप्पा वर्तमान परिस्थिति वेल्ले खतरनाक मंता इंजी आलिसंतोर, सहकारी हर्दे वर्तमान अभियान लोप्पा माटु “तुरंत कोडा पोरोटल रैयना” इंजी सलाह हींतोमा ओरु माकिन “मीटु तुरंत कोडा पोरोटल रैयवेके मजदूर-किसान एकता देगना खतरा पैदा आयरा” इंजी चेतावनी हींतोर। माटु इद सच्चाई तुकू उल्टा मंता इंजी आलिसंतोमा मजदूर-किसान एकता देगना खतरा सिर्फ

“तुरंत कोडा पोरो तरगवेके” पैदा आयार। इगा सिर्फ उंदी शब्द ता फर्क मंता (उंदी बगिल “रैय्यना” ओसो दूसरा बगिल “तरगना”) इंजी वेहताद मंता। मति इवु रेंडु कार्यदिशांग नड़मा ता फर्क तोहिंता। सब्बे तोर पुत्ता लेक्का मावगा उंदी मजदूर-किसान एकता मुन्नेटले मंता, इदिन साम्राज्यवाद, सामंतवाद खिलाफ पूंजीवादी-जनवादी क्रांति पोरो आधार आसी स्थापना किताद मंता। इद क्रांति लोप्पा किसान लोर किन सामंतवाद तल मुक्त कियाला काजे भूमि जमींदार लोरगडल पोयसी किसान लोर किन तूसताद मंता। मति इद क्रांति मारता अनि सामंती मालिकाना खत्म किता। नेंडु नहाकुना इलाकांग लोप्पा धनी किसान लोरा पूंजीवादी मालिकाना मंता अनि व्यक्तिगत किसान लोरा मालिकाना उंदी समुद्र लेक्का मंता। हत्ता उचुक साल कुना लोप्पा नहाकुना इलाकांग लोप्पा पूंजीवाद ता स्वतःस्फूर्त ताकतकु बेरसतांग, हर जागा पूना धनी किसान लोर पुट्टा मंतोर, अनि वेल्ले खुशहाल मध्यम किसान धनी किसान बने मायना कोशिश किया मंतोर इंजी सब्बे तोर पुत्तोर। दूसरा बगिल वेल्ले गरीब किसान इंजे वेने उत्पादन साधन कुना कमी मत्तांकु गरीबी तेने पिस्वल पिस्सा मंतोर, ओरा लोप्पाटल उचुन मुल कर्ज तो बोजा ते दबेमासी मंतोर अनि उचुन मुल तम्मा जमीन तुन वम्मिंतोर लेवेके बटाई ते हींतोर। इद्रमे कीसोर मत्तेके नाहकुना लोप्पा ध्रुवीकरण दिय्या-दिय्या तेज आसोर दायर। किसान लोरा लोप्पा तम्मा जमीन पोहिहंतोर अनि गरीबी ता परिस्थिति ते वांतोर, माटु ओरिकिन नुकसान तल बचे कियाला काजे ओसो तिप्पलकु दूर कियाला मदद कियाला काजे बाताले कीवोम इंजी आल्सनूर। पूंजीवाद बगिल दायना खुशहाल मध्यम किसान लोर नाराज आयनुर, बारांकु इत्तेके ओरा मांगकु माटु बस्के एवनल पूंजीवादी हरीं पोयना निर्णय कीवोम अस्के एवनल पूरा कीयानायो। इद्रम ता परिस्थिति ते मजदूर-किसान एकता सुदृढ़ आया परिंता या? हिल्ले अदु सुदृढ़ आया परवो। इद समस्या ता हल उंदी पूना आधार पोरो आधार आसी कीयाना विड़चसी दूसरा बदे हरीं हिल्ले। इत्तेके तीरम-तीरम समाजवादी औद्योगिकरण ओसो दस्तकारी, पूंजीवादी उद्योग-वाणिज्य ता समाजवादी

बदलाव संगे-संगे पूरा कृषि ता समाजवादी बदलाव कीयाना। दूसरा माटा ने नाहकुना लोप्पा मंदाना जनता तुन खुशहाल कियाला काजे सहकारिता पोरो अमल कीयाना, नहाकुना इलाकांग लोप्पा धनी किसान अर्थव्यवस्था ओसो व्यक्तिगत अर्थव्यवस्था तुन खत्म कीयाना। मजदूर-किसान एकता तुन सुदृढ़ कीयाना इदे उंदी सही तरीका मंता, इद्रम कीवेके एकता भंग आयना खतरा पैदा आंता। इद सवाल पोरो माकिन “कोडा पोरोटल रैय्यना” सलाह हियानोरा विचार गलत मंता।

10

नहाकुना इलाकांग लोप्पा जल्दिए समाजवादी बदलाव ता उंदी राष्ट्रव्यापी उभार वाया मंता, 1958 ता वसंत एवनल पहली पंचवर्षीय योजना ता आखारी साल ता आखरी ते ओसो दूसरा पंचवर्षीय योजना ता पहली साल ता शुरूआत एवनल अर्ध समाजवादी स्वरूप वाले सहकारी समितिंग लोप्पा लगभग 25 करोड़ लोकुर, 5 करोड़ 50 लाख किसान परिवार(औसतन साढ़े चार हर परिवार) शामिल आयनूर, इत्तेके नहाकुना इलाकांग लोप्पा कुल आबादी ता लगभग आधा संख्या अविना लोप्पा शामिल आसी मंदियर। अस्के एवनल वेल्ले काउंटींग ओसो उचुक प्रांत कुना लोप्पा कृषि अर्थव्यवस्था ता अर्ध-समाजवादी बदलाव ता काम बुनियादी रूप ते पूरा आसी मंदियर अनि देश ता हर हिस्सा ते उचुन अर्ध-समाजवादी सहकारी समितिंग पूर्ण समाजवादी बने मासी मंदानुंग। 1960 एवनल इत्तेके दूसरी पंचवर्षीय योजना ता शुरूआत ते माटु कृषि अर्थव्यवस्था ता पिस्ता हिस्सांग (नाहकुना आबादी ता पिस्ता हिस्सा शामिल मंता) अर्ध-समाजवादी बदलाव बुनियादी रूप ते पूरा आसी मंदियर। अस्के एवनल अर्ध समाजवादी सहकारी समितिंग नल पूर्ण समाजवादी सहकारी समितिंग लेक्का विकसित आयना सहकारी समितिंग ना संख्या बेरसिस मंदियर। पहली ओसो दूसरी पंचवर्षीय योजनांग लोप्पा नहाकुना इलाकांग लोप्पा बदले कीयाना काम मुख्य रूप

ते सामाजिक ओसो सिर्फ गौण रूप ते तकनीकी मंदिता। बेहरा-बेहरा कृषि-मशीन कुना संख्या जरूर बेरसयिर मति वेल्ले बेरसो आयरा। तीसरा पंचवर्षीय योजनांग लोप्पा नहाकुना इलाकांग ना सामाजिक ओसो तकनीकी बदलाव ता काम संगे-संगे आयारा। हर साल वेल्ले संख्या बेहरा-बेहरा कृषि-मशीन कुना इस्तेमाल आंता, सामाजिक बदलाव लोप्पा 1960 पेरेके अर्ध समाजवादी सहकारी समितिंग, तीरम-तीरम, अलग-अलग समूह ने उंदी-उंदी मंजिल वेंडसोरे पूर्ण समाजवादी सहकारी समितिंग लेक्का विकसित आसोर दायनुंग। बस्के एवनल सामाजिक, आर्थिक व्यवस्था ता समाजवादी बदलाव पूर्ण रूप ते आयो अस्के एवनल चीन ता सामाजिक, आर्थिक स्वरूप पूर्ण रूप ते बदलेमायो अनि तकनीकी लोप्पा हर संभव शाखा, जागा ते मशीन ता इस्तेमाल आयो आयरा। देश ता वर्तमान आर्थिक परिस्थिति तुन हूडतेके तकनीकी बदलाव लोप्पा सामाजिक बदलाव तकू ज्यादा टाईम पोय्यना लेक्का मंता। कृषि राष्ट्रव्यापी तकनीकी बदलाव ता काम बुनियादी रूप ते पूरा आयला लगभग 4-5 पंचवर्षीय योजनांग इतेके 20 -25 साल पोय्यना संभावना मंता। इद महान काम तुन पूरा कियाला काजे पूरा पार्टी पूरा कोशिश कीयाना।

11

सही योजना ओसो कारगर नेतृत्व जरूरी मंता।

सहकारिता ता उंदी-उंदी मंजिल विकसित कियाला काजे राष्ट्रीय प्रांतीय, प्रिफेक्चर, काउंटी, जिला ओसो श्यांग पोरो तम्मा-तम्मा योजनांग बने कीयाना जरूरी मंता। बद्रम-बद्रम काम मुन्ने दांता इव योजनांग असल परिस्थिति ता वेहच ते लगातार संशोधन कीयाना। प्रांतीय, प्रिफेक्चर, काउंटी, जिला ओसो श्यांग स्तर ता पार्टी, नौजवान संघ ता सब्बे संगठकु नाहकुना समस्यांग बगिल गंभीर रूप ते ध्यान हियाना ओसो नाहकुना काम लोप्पा मना नेतृत्व काम तुन जीवा कीसी सुधरे कीयाना जरूरी मंता। पार्टी, नौजवान संघ ता विभिन्न स्तर ता स्थानीय कमेटिंग ना इंचार्ज,

नेतृत्वकारी कामरेड्स कृषि सहकारिता काम ता अध्ययन ते अर्रना अनि निपुण बने मायना। संक्षिप्त ते ओरु निष्क्रिय आयवा पहलकदमी तोहना, नेतृत्व ता परित्याग कीयानाए आयवा अदिन मजबूत कीयाना।

12

अगस्त 1954 ते (बदे डावुट हिल्ला इंजे बदे पूना खबर हिल्ले), चीनी कम्युनिस्ट पार्टी ता हेल्गुंगच्यांग प्रांतीय कमेटी तन्ना रिपोर्ट ते वेहतोर:

नाहकुना सहकारिता ता उभार ओसो विस्तार संगे-संगे, नहाकुना इलाकांग लोप्पा विभिन्ना रकम ता आपसी सहयोग, सहकारी संगठन, विभिन्न समूह कुना लोकर, वीर सब्बे कम-ज्यादा मात्रा ते सक्रिय आसोर दांतोर। वर्तमान कृषि उत्पादक सहकारी समितिंग तम्मा सदस्यता बेरसी कीयाना योजनांग बने किया मंतांग अनि तैयारी किया मंतंग, सहकारी समितिंग लेक्का बदलेमायना कृषि उत्पादन आपसी सहयोग दलकु, वेल्ले परिवार कुन शामिल कियाला योजना बने किया मंतांग। इंजे इद स्तर एववा मत्ता आपसी सहयोग दलकु मुन्ने दायना ओसो उंदी मंजिल पोरो दाय मंतांग। उचुन मुल पूना सहकारी समितिंग लोप्पा शामिल आयना तैयारी ते ओसो उचुन वर्तमान सहकारी समितिंग लोप्पा शामिल आयना तैयारी ते मिडंदसि मंतोर। इयेंज सहकारी समितिंग लोप्पा शामिल आयला तैयार हिल्ले ओरु आपसी सहयोग दल कुना लोप्पा शामिल आयना बारे ते सक्रियता ते विचार किया मंतोर। इद जन आंदोलन व्यापक रूप ते तेदता। इद कृषि सहकारिता ता विकास उंदी पूना ओसो असाधारण लक्षण आंदू मति उचुन काउंटिंग ओसो जिलांग ना उचुन नेतृत्वकारी कामरेड्स इद पूना लक्षण कुना अनुसार मुन्ने ने वेल्ले कारगर तरीका ते नेतृत्व किताद हिल्ले। अदिन काजे छुनोंग ओसो थुनों लोप्पा (नोट: हेल्गुंगच्यांग प्रांत लोप्पा छुन लम्बा दीवार ता दक्षिणी प्रांत कुना श्यांग स्तर ता प्रशासनिक इकाई मंदितांग, अनि थुन प्रशासनिक इकाई मन्नोंग, इगा वेहता प्रांत कुना नाहकुना बराबर मंदितांग) उचुन गलत रुझान कु पुट्टना शुरू आंता। उदाहरण तुकू सदस्य काजे लोकर परहकना शुरू कींतोर अस्के क्षमता मत्ता

लोकुरे क्षमता मत्ता लोकुर किन चुने कींतोर अनि गैर-खुशहाल किसान लोर किन उंदी बगिल दोब्बिंतोर। मोरकुल ता भूमिका निभे कीयाना सक्रिय तत्व ओसो सदस्य लोरा बारे ते कोल्हार पोयिंता अनि दरार वांता, मोरकुल ता भूमिका निभे कीयाना सक्रिय तत्व कुन अंधाधुंध तरीका ते बदे उंदी जागा केंद्रित कीयाना, धनी किसान ओसो तूलनात्कम गंभीर पूंजीवादी रुझान तासना खुशहाल किसान लोर इद मौका ता फायदा एतसी दोड़ स्तर ता आपसी सहयोग दलकन, धनी किसान लोरा सहकारी समितिंग निल्पी किसिंतोर। इव सब्बे पोल्ल्लोंग कृषि सहकारिता वेल्ले विकसित आतेके पार्टी ता नीति अमल कीयानास्के ओसो आंदोलन ता मार्गदर्शन कीयानास्के सिर्फ पूना सहकारी समितिंग ना स्थापना कीयाना अनुसार आल्सना हालो इंजा स्पष्ट आंता। पूरा छुन (इत्तरे पूरा श्यांग) अनुसार ओसो पूरा कृषि सहकारिता आंदोलन तुन मुन्ने ओयना उद्देश्य ते पाड़ना सहकारी समितिंग ना विस्तार कीयाना संगे-संगे पूना सहकारी समितिंग ना स्थापना कीयाना, सहकारी समितिंग ना विकास कीयाना संगे-संगे आपसी सहयोग दल कुन पोरो तेहना। इयेंड कित्ता काम संगे-संगे वायना साल ओसो अदिनकु मुन्नेटा साल ते कीयाना काम पोरो वेने ध्यान हियाना। इद पार्टी ता नीति पोरो पूरा अमल कीयाना ओसो कृषि सहकारिता आंदोलन तुन विकसित कीयाना गारंटी कीयाना सिर्फ इदे तरीका मंता।

इद सिर्फ हेलुंगच्यांग प्रांत लोप्पाने “उचुन काउंटिंग ओसो जिला ता उचुन नेतृत्वकारी कामरेड्स इद पूना लक्षण अनुसार वेल्ले कारगर तरीका ते नेतृत्व कीयानायो या?” इद्रम ता परिस्थिति सिर्फ उचुके काउंटिंग ओसो जिलांग लोप्पाने मंता या? पूरा देश लोप्पा बचोनो नेतृत्वकारी संगठन कुना लोप्पा नेतृत्व ता आंदोलन तुकू पेरके अरसी मंदाना इद गंभीर परिस्थिति तुन तोहना लेक्काटोर वेल्ले मंदाना संभावना मंता।

हेलुंगच्यांग प्रांतीय पार्टी कमेटिंग तम्मा रिपोर्ट ते मुन्ने इद्रम वेहतोरः श्यांगछंग काउंटी ता शीछिन छुन लोप्पा नेतृत्व कीयाना उसूल तुन जनता खुद शामिल आयना उसूल संगे काल्पना तरीका संगे पूरा छुन काजे

उंदी योजना बने कीयाना। सहकारिता ता बेहरा स्तर ता विकास कियाला काजे इद नेतृत्व ता उंदी पूना तरीका आंदू। इदिना महत्व सबसे मुन्ने इद्रम ता योजनांग संगे नहाकुना इलाका कुना लोप्पा पार्टी ता वर्ग-दिशा पोरो पूरा अमल किताद मंता। इद्रम कीतेके गरीब ओसो निम्न-मध्यम किसान लोरा नड़मा ता एकता मजबूत आता अनिक धनी किसान लोरु खिलाफ उंदी जोरदार संघर्ष ताकता। कृषि सहकारिता आंदोलन ता विस्तार ओसो विकास काजे मोरकुल लेक्का भूमिका निभे कीयाना सक्रिय तत्व कुन तूसताद मंता। विभिन्न सहकारी समितिंंग नड़मा सहकारी समितिंंग ओसो आपसी सहयोग दल कुना नड़मा ता संबंध कुन मजबूत किताद मंता। अद्रमासी कृषि सहकारिता आंदोलन वेल्ले बेस मुन्ने हत्ता। दूसरा, इद्रम ता योजनांग संगे कृषि सहकारिता ता बेहरा स्तर ते विस्तार कीयाना काम ठोस रूप ते दोड़ बुनियादी स्तर एवनल ता नेतृत्वकारी कमेटी ओसो जनता तुन सौंप कीयाना। इद्रम कीतेके छुन पार्टी शाखा नेतृत्व बद्रम कीयाना इंजी पुंजी मंदाना। पाड़ना सहकारी समितिंंग मुन्ने बद्रम दायना इंजी पुंजी मंदाना। पूना सहकारी समितिंंग तम्मा स्थापना बद्रम कीयाना कीयाना इंजी पुंदाना। आपसी सहयोग दलकु मुन्ने दायला काजे सही दिशा बद मंता इंजी पुंदाना। इद्रम छुन पार्टी शाखा ओसो व्यापक जनता ना पहलकदमी ता भरपूर विकास आता। पार्टी शाखा पोरो ओसो जनता ना अनुभव, विवेक पोरो आधार आसी मंदाना सही उसूल तुन सही तरीका ते लागू किताद मंता। आखरी ते इद्रमे माटु छुन ता असली परिस्थिति ता वेल्ले जानकारी दोरकी किया परतोम अनि पार्टी नीति तुन ठोस रूप ते ओस पूर्ण रूप ते अमल किया परतोम। अदिन काजे उंदी बगिल जल्दबाजी ओसो दुस्साहस संगे मुन्ने दायना रुझान तल बचेमायना अनि दूसरा बगल रूढ़ीवाद ओसो नियंत्रणहीनता ता परिस्थिति तल बचेमायना, इद्रम केंद्रीय कमेटी तय कित्ता “सक्रिय नेतृत्व ओसो सही विकास” ता नीति तुन सही तरीका ते लागू कीयाना संभव आता।

हेलंगच्यांग प्रांतीय पार्टी कमेटी ता रिपोर्ट लोप्पा रास्ता उचुक “लब्बड़ ता घटनांग” कुन बद्रम हूड़ना? रिपोर्ट लोप्पा इद सवाल ता स्पष्ट

उत्तर हीताद हिल्ले। मति प्रांतीय पार्टी कमेटी ता रिपोर्ट संगे काल्पता श्वांगछंग काउंटी ता पार्टी कमेटी ना रिपोर्ट लोप्पा इदिना उत्तर हीताद मंता। ताना लोप्पा: पार्टी शाखा कीयाना नेतृत्व तुन जनता खुद शामिल आयना संगे काल्पना तरीका पोयसी बने कित्ता योजना कारण ते गैर-खुशहाल किसान परिवार कुन सहकारी समितिंग नल अलग कीयाना भटकाव कुन सुधरे किताद मंता। मोरकुल ता भूमिका निभे कीयाना वेल्ले सक्रिय तत्व कुन, सदस्य लोरा बारे ते कोल्हार बंद आता। सहकारी समितिंग ओसो आपसी सहयोग दल कुना नड़मा ता संबंध ओसो गटिग आता। धनी किसान, खुशहाल मध्यम किसान धनी किसान लोरा सहकारी समितिंग लेवेके निम्न स्तर ता आपसी सहयोग दल कुन उल्टा-सीधा तरीका ते निल्पी कियाला काजे कित्ता कोशिश कु असफल आतांग अनि पार्टी शाखा ता योजना अमल आता। रेंडु पाड़ना सहकारी समितिंग ना सदस्य-संख्या 40 प्रतिशत बेरसता। 6 पूना सहकारी समितिंग ना संगठन ता ढांचा निल्पी किताद मंता अनि रेंडु आपसी सहयोग दल संगठित किताद मंता। परिस्थिति अनुकूल मत्तेके वायना साल (इत्तेके 1955 ते) पूरा छुन लोप्पा सहकारी समितिंग ना स्थापना आयारा। इंजे पूरा छुन ता जनता कृषि सहकारिता ना विस्तार योजना इयेंड पूरा कीयाना, उत्पादन बेरसी कीयाना ओसो बेसता फसल ता गारंटी कियाला काजे वेल्ले जोश ते कोशिश कीयाना। छुन ता कार्यकर्ता लोर साधारण रूप ते “माटु इव सब्बे कितादु बेस आता लेवेके गड़बड़ आसी मनवड़। इद गड़बड़ इयेंडे आयवा वायना साल वेने आया परिंता।”

वाटु, माटु वेने अद्रमे काम कीयाना।

सही योजना ओसो वेल्ले कारगर नेतृत्व-इदे मावा उसूल आंदू।

नोट

- 1) कृषि ता सहकारी बदलाव कीयानास्के मुन्ने गरीब किसान मत्तोर किन पूना मध्यम किसान इंतोम, ओरु भूमि सुधार पेरेके मध्यम किसान लेक्का मंतोरा।

मुन्नेटा आर्थिक परिस्थिति लोप्पा बदे बदलाव आयवा मत्ता मध्यम किसान लोरकिन, मध्यम किसाने इनमूडांता।

- 2) अस्के बेस ताकी कियावा कृषि उत्पादन सहकारी समितिंग कुन पहली श्रेणी, दूसरी श्रेणी ओसो तीसरी श्रेणी ता सहकारी समितिंग इंतोमा।
- 3) इगा वेहता गरीब किसान परिवारकु हपे प्रांति ता आनफिंग काउंटी, नानवांगच्वांग नाहकुना निवासी वांग ख्वी-खुन, वांग श्याओ-छी ओसो वांग श्याओ-फांग परिवार मत्तांग। ओरु निल्पी कित्ता कृषि उत्पादक सहकारी समिति वर्तमान नानवांगच्वांग जन कम्यून पोरोल ते अतुपादक-ब्रिगेड ता शुरूआती सहकारी समितिंग मत्तांग।

कृषि ता सहकारी बदलाव ता कार्य पार्टी, लीग ता सदस्य ओसो गरीब, निम्न-मध्यम किसान लोरा पोरो आधार आसी मंदाना⁴⁰

7 सितम्बर 1955

“गरीब किसान लोरा पोरो (अविना लोप्पा मुन्ने गरीब किसान मत्ता सब्बे पूना मध्यम किसान शामिल मंतोर) आधार आसी मंदाना अनि मध्यम किसान लोरा संगे वृद्धता ते एकता कीमूट” इंदाना नारा नेंडु वेने बुनियादी रूप ते सही मंता। मति 1) पूना मध्यम किसान लोरा नडमा खुशहाल मध्यम किसान (उच्च-मध्यम किसान) लोरा उदय आता अनि उचुन लोकरा राजनीतिक चेतना स्तर बेरसिस मत्तोर ओसो इंजे सहकारी समितिंग लोप्पा शामिल आयला तैयार हिल्वोर किन विडचसी; 2) पाडना मध्यम किसान लोरा नडमा मत्ता निम्न-मध्यम किसान सहकारी समितिंग लोप्पा शामिल आयना विचार तासोर आंतोर, बारांकु इत्तेके आर्थिक रूप ते पूना मध्यम किसान लोरा नडमा मत्ता निम्न-मध्यम किसान लोरा लेक्का मंतोर, बारांकु इत्तेके ओरु मुन्नेटल खुशहाल हिल्वा मत्तोर अनि ओरा लोप्पटल उचुन मुल ता हितकुना भूमि सुधार कीयानास्के गलत तरीका ते अतिक्रमण किताद मत्ता। इव रेंडु कारण कुना कारण ते सहकारी काम इंजे बेरसताद हिल्वा जागा ने ओसो खुशहाल मध्यम किसान लोरा लोप्पा राजनीतिक चेतना ता कमी मत्ता सब्बे जागा ने मुन्ने दोड़ रास्ता मूंड श्रेणिंग ना लोकर कुन (ओरा राजनीतिक चेतना स्तर ता अनुसार ओसो तूलनात्कम रूप ते

⁴⁰ इद उंदी पार्टी निर्देश आंदू, इदिना मसौदा कामरेड माओ त्सेतुंग चीनी कम्युनिस्ट पार्टी ता केंद्रीय कमेटी काजे तैयार कीताद मंता।

राजनीतिक स्तर बेरसिस मत्ता लोकुरिगडल शुरू कीसी, अलग-अलग समूह ने) सहकारी समितिंंग लोप्पा शामिल कीयाना सही आयर: 1) गरीब किसान 2) पूना मध्यम किसान नडमा मत्ता निम्न-मध्यम किसान (कामरेड माओ त्सेतुंग ना रिपोर्ट ता संशोधित हिस्सा लोप्पा मध्यम किसान लोर किन सिर्फ रेंडु श्रेणिंग लोप्पा विभाजित किताद मंता। 1. उच्च-मध्यम ओसो 2. निम्न मध्यम किसान, नडमा ता मध्यम किसान लोरा बारे ते वेहताद हिल्ले। इद्रम कीसी उंदी वेल्ले तीव्र वर्ग-विभाजन ता कारण ते फर्क कीयाना मुश्किल आयाना परिस्थिति तुकू बचे मांतोमा इंजे निम्न मध्यम किसान लोरा बारे ते वेहता पोल्लो लोप्पा (पूना मध्यम किसान लोरा नडमा मत्ता) निम्न-मध्यम किसान ओसो मध्यम स्तर ता मध्यम किसान लोरा बारे ते वेहताद हिल्ले। 3) पाड़ना मध्यम किसान लोरा नडमा मत्ता निम्न-मध्यम किसान। इंजे सहकारी समितिंंग लोपा शामिल आयला तैयार हिल्ला मत्ता, पूना ओसो पाड़ना मध्यम किसान लोरा मर्जी खिलाफ दायनायो। इंजे बचोनो जागा ने खुशहाल मध्यम किसान लोर किन सहकारी समितिंंग लोप्पा जबरदस्ती शामिल किताद मंता अनि अविना उद्देश्य पूहना-टेडियाना जानवर ओसो कृषि-औजार कुन (वेल्ले कम कीमत ते वेल्ले जोम इस्तेमाल कीयाना) सहकारी समितिंंग लोप्पा शामिल कीयाना। असल ते ओरा हित कुना अतिक्रमण ओसो “मध्यम किसान लोरा संगे दृढ़ता ते एकता कीयाना” उसूल ता उल्लंघन आंदू। माटु इद मार्क्सवादी उसूल ता उल्टा व्यवहार कीयाना जरूरत हिल्ले। बेगा इंजे स्थापना किता ओसो कमजोर मत्ता सहकारी समितिंंग लोप्पा माटु खुशहाल मध्यम किसान लोरा लोप्पा पक्का पूंजीवादी विचार तासना लोकुर किन जबरन सहकारी समितिंंग लोप्पा शामिल कीतेके, ओरु राजनीतिक चेतना संगे आयव नेतृत्व पोरो कब्जा कीयाना लक्ष्य ते खुद कोशिश कीसी सहकारी समितिंंग लोप्पा नेंगेतेके, ओरु हेलुंगच्यांग प्रांत ता श्वांगळंग काउंटी लोप्पा दिस्ता लेक्का बेकार सहकारी समितिंंग बने कीतेके, गरीब, निम्न-मध्यम किसान लोरा नेतृत्व कियाला काजे वेल्ले नुकसानदायक साबित आयार अनि सब्बे सहकारी समितिंंग लोप्पा इद्रम

ता नेतृत्व कीयाना जरूरी मंता। (बदे डावुट हिल्ला उचुन निष्पक्ष ओसो कुशल, तूलनात्मक रूप ते राजनीतिक चेतना संगे लैस मंतोर। उचुन मुल मावा वर्तमान प्रपोजल लोप्पा “गरीब किसान लोरा पोरो आधार आसी मंदाना ओसो मध्यम किसान लोरा संगे दृढ़ता ते एकता कीयाना” नारा तुन विडिसत्तद मंता। इद पोल्लो गलत मंता। माटु इद नारा तुन विडिसवा लेवा पूना परिस्थिति ता वेहच ते अदिन उंदी ठोस रूप हीतद मंता। इत्तेके माटु पाङना मध्यम किसान लोरा नडमा मत्ता निम्न-मध्यम किसान लोरा गिनती जनता ना उंदी श्रेणी लोप्पा कीतोम, मति पूना मध्यम किसान लोरा लोप्पाटल खुशहाल मध्यम किसान बनेतोर किन आयो। ओरा आर्थिक परिस्थिति अनुसार इद अंतर किताद मंता अनि ओरो सहकारी आंदोलन लोप्पा सक्रिय रूप शामिल आंतोरे आयोर इंदाना सुरता तासिसी किताद मंता। दूसरा माटा ने माटु पाङना गरीब किसान लेक्का मत्ता गरीब किसान ओसो निम्न-मध्यम किसान लोरा श्रेणिंग कुन ओसो पाङना मध्यम किसान लोरा लेक्का मत्ता उच्च-मध्यम किसान लोरा संगे एकता कियाला काजे ओरकिन सहकारी समितिंग लोप्पा कियाला काजे मजबूर कीयानायो अनि ओरा हितकुन नुकसान कीयाना।

नहाकुना इलाकांग लोप्पा बोना पोरो आधार आसी मंदाना? इद सवाल ता बारे ते उचुक पोल्ल्लोंग स्पष्ट कीयाना जरूरी मंता। सबसे मुन्ने माटु पार्टी, लीग ता सदस्य लोरा पोरो आधार आसी मंदाना। जिला स्तर तुकू पोरोटा मना पार्टी कमेटिंग ओसो नहाकुना इलाकांग ना काम ता निर्देशन कियाला काजे लोहता कार्यकर्ता लोर मुख्य रूप ते पार्टी ओसो लीग ता सदस्य लोरो पोरो आधार आसी मनवा लेवा ओरकिन वेने गैर-पार्टी, गैर-लीग ता सदस्य लोरा संगे काल्पना, गलत मंता। दूसरा गैर-पार्टी लोकुरा नडमा माटु तूलनात्मक रूप ते सक्रिय तत्व कुना पोरो आधारी आसी मंदाना। इविना संख्या नाहकुना आबादी लोप्पा लगभग 5 प्रतिशत (उदाहरण तुकू 2500 आबादी वाले श्यांग लोप्पा लगभग 125 सक्रिय तत्व) मंदाना संभावना मंता। माटु इद्रम ता सक्रिय तत्व कुना उंदी ग्रुप तैयार कीयाना पूरा कोशिश कीयाना अनि अदिन साधारण जनतो लोप्पा शामिल

कीयाना। तीसरा माटु गरीब किसान ओसो निम्न-मध्यम किसान लोरा रेंडु श्रेणिंग ना व्यापक जनता पोरो आधार आसी मंदाना। बोना पोरो आधार आसी मंदाना, बद्रम आधार आसी मंदाना इंदाना सवाल बारे ते स्पष्ट रुझान लागू कियाला असफल आतांकु सहकारी आंदोलन लोप्पा गलतिंग आतांगा।

कृषि सहकारी बदलाव ता बारे ते वाद-विवाद ओसो वर्तमान वर्ग-संघर्ष⁴¹

11 अक्तूबर 1955

मावा वर्तमान अधिवेशन उंदी बेहरा वाद-विवाद आंदू। इद वाद-विवाद पूंजीवाद तल समाजवाद लोप्पा दायला काजे मना पार्टी ता आम कार्यदिशा पूरा सही मंता या हिल्ले इंदाना सवाल ते जुडडेमासि मंता। इद पार्टी लोप्पा बेहरा वाद-विवाद कृषि ता सहकारी बदलाव ता बारे ते मना नीति संबंधित सवाल तल शुरू आंता। इदे सवाल पोरो वाद-विवाद वेने केंद्रित आसी मंता। मति इद वाद-विवाद वेल्ले बेहरा मंता अनि कृषि, उद्योग, संचार, परिवहन, वित्त, मुद्रा-विषय पोरो, व्यापक संस्कृति, शिक्षा, विज्ञान, सार्वजनिक स्वास्थ्य लेक्कटा विभाग कुन दस्तकारी उद्योग ओसो पूंजीवादी उद्योग, वाणिज्य वेल्ले, प्रतिक्रांतिकारीरा दमन, सशस्त्र सेनांग ओसो विदेशी समस्यांग कुना पोरो विवाद कींता। सक्षिप्त ते इदु मना सब्बे काम, मना पार्टी, मना सरकार, मना सशस्त्र सेनांग ओसो मना जन-संगठन कार्य तुन बोरियंता। इद्रम ता बेहरा वाद-विवाद मंदाना जरूरी मंता। बारांकु इत्तेके बस्केटल आम कार्यदिशा ता घोषणा किताद मंता अस्केटल इंजे एवनल मना पार्टी लोप्पा इद्रम ता वाद-विवाद बस्के ताकताद हिल्ले। माटु नाहकुना लोप्पो ओसो संगेने शहर कुना लोप्पा वेने इद वाद-विवाद ताकी कीसी हर इलाका लोप्पा मना काम ओसो गति, गुण आम कार्यदिशा सही साबित कीयाना अनि उंदी बहुमुखी योजना लोप्पा तासना।

इंजे नन्ना बचोनो सवाल कुना चर्चा क्रियाकान।

⁴¹ चीनी कम्युनिस्ट पार्टी ता सातवीं केंद्रीय कमेटी ता विस्तृत 6 वी पूर्ण अधिवेशन लोप्पा समापन भाषण।

1. कृषि सहकारिता ओसो पूंजीवादी उद्योग, वाणिज्य ता बदलाव नडमा ता संबंध

कृषि ता समाजवादी बदलाव, पूंजीवादी उद्योग, वाणिज्य ता समाजवादी बदलाव तन लगभग 3 पंचवर्षीय योजनांग लोप्पा बुनियादी रूप ते उंदे बेरा पूरा कीयाना इव कृषि सहकारिता ओसो पूंजीवादी उद्योग, वाणिज्य ता बदलाव नडमा ता संबंध असल ते कृषि सहकारिता ओसो पूंजीपति वर्ग नडमा ता संबंध आंदू।

माटु कृषि ता पूर्ण समाजवादी बदलाव आयनास्के मजदूर वर्ग ओसो किसान लोरा एकता उंदी पूना आधार पोरो समाजवाद पोरो आधार आसी तीरम-तीरम सुदृढ बनेमासोर दायार अस्केने शहरी पूंजीपति वर्ग ओसो किसान लोरा नडमा ता संपर्क पूरा तेहना, पूंजीपति वर्ग तुन पूराए अलगाव ते वाटना अनि पूंजीवादी उद्योग, वाणिज्य ता बदलाव तुन सुदृढ बने कियमूडायरा। कृषि ता समाजवादी बदलाव ता मना उद्देश्य बेहरा नहाकुना इलाकांग लोप्पा पूंजीवाद ता स्रोत तुन खत्म कियान मंता।

माटु इंजे कृषि सहकारिता काम पूरा किताद हिल्ले, मजदूर वर्ग इंजे किसान लोरा संगे तम्मा एकता तुन उंदी पूना आधार पोरो आसी सुदृढ किताद हिल्ले, इद एकता इंजे अस्थिर मंता। हत्ता कालम ते माटु भूमि क्रांति पोरो आधार आसी किसान लोरा संगे किता एकता तल किसान लोर इंजे खुश हिल्ले। ओरु इद एकता तल आता फायदा तुन मरंगतोर। इंजे ओरु बदे पूना फायदा इत्तेके समाजवाद काजे हूडा मंतोर। किसान इंजे वेने सामूहिक समृद्धि दोरकी किताद हिल्ले अनि अनाज, औद्योगिक कच्चा माल इंजे हालनाचोन हिल्ले। इद्रम ता परिस्थिति ते पूंजीपति वर्ग मावा काम लोप्पा गलतिंग तेंडना अनि मावा पोरो हमलांग कीयाना संभव मंता। मति उचुन साल लोप्पा मना मुन्ने उंदी पूना परिस्थिति वायर इत्तेके मजदूर वर्ग ओसो किसान लोरा नडमा उंदी पूना आधार ते एकता आयर, इद एकता मुन्ने तुकू बचोनो आयर।

जमींदार लोरा विरोध कीयाना, स्थानीय निरंकुश तत्व कुना तख्ता पलट कीयाना ओसो जमीन ता बंटवारा कियाला काजे कित्ता पाड़ना एकता उंदी अस्थाई एकता मत्ता। उंदी सही टाईम एवनल स्थिर मत्ता पेरके इंजे अदु अस्थिर आता। भूमि सुधार पेरके किसान लोरा नड़मा ध्रुवीकरण आता। माटु ओरकिन बदे पूना वस्तु हिया परवेके उत्पादन ताकत बेरसी कियाला, आमदनी बेरसी कीयाना ओसो सामूहिक समृद्धि दरोकी कियाला मदद कीवेके गरीब किसान लोर मावा पोरो मुन्ने लेक्का विश्वास कीवोर आयनूर अनि कम्युनिस्ट पार्टी ताकना तुकू बदे फायदा हिल्ले इंदानूर। ओरा नड़मा जमीन बंटवारा आता पेरके वेने ओरा गरीबी दूर आताद हिल्ले हिल्ले इंदानास्के ओरु मीवा पेरके बारांकु ताकानूर? खुशहाल धनी किसान मतोर वेने मावा पोरो विश्वास कीवोर आयनूर अनि अनिवार्य रूप ते कम्युनिस्ट पार्टी ता नीतिंग कुन लागू किया परवोर आयानूर। इद्रम आतेके मावा पोरो पहली, दूसरी श्रेणी ता किसान लोर लेवेके गरीब, धनी किसान लोर वेने विश्वास कीवोर आयनूर अनि मजदूर-किसान एकता कमजोर आयना शुरू आयरा। इद एकता तुन सुदृढ़ बने कियाला काजे माटु किसान लोरा समाजवादी हरीं ते ताकला नेतृत्व किया लागयिर अनि ओरकिन सामूहिक समृद्धि दोरकी कीयाना लेक्का बने किया लागयिर। सिर्फ गरीब किसान लोर किए आयवा सब्बे किसान लोर किन समृद्ध बने किया लागयिर, इदे आयवा वर्तमान खुशहाल किसान लोर किनकु ज्यादा समृद्ध बने किया लागयिर। उंदी बेरा नहाकुना इलाकांग लोप्पा सहकारिता ता प्रचार आतास्के नहाकुना इलाकांग ना पूरा जनता ना पिस्वल हर साल बेस आसोर दांता अनि वम्मना अनाज ओसो औद्योगिक कच्चा माल बेहरा मात्रा ते दोरकियर। अस्के पूंजीपति वर्ग ता टोड्डी बंद आयार अनि अदु अलगाव ते वायर।

इंजे माटु रेंडु एकता कीतोम, उंदी किसान लोरा संगे ओसो दूसरा राष्ट्रीय पूंजीपति वर्ग संगे। इव रेंडासी मावा काजे वेल्ले जरूरी मंतांग अनि कामरेड चओ ऐन-लाइ वेने इद पोल्लो वेहतोर। पूंजीपति वर्ग संगे एकता कीसी माकिन बाता फायदा आंता? इद्रम कीतेके माटु कृषि उत्पादन संगे

विनिमय कियाला काजे वेल्ले तैयार माल दोरकिया परितोमा इदे पोल्लो अक्तूबर क्रांतिकार पेरेके उंदी बेरा लेनिन ना दिमाग ते वेने मत्ता। राज्य तिगा विनिमय काजे तैयार माल हिल्ला मत्ता अदि काजे किसान लोर अदिन तम्मा राज्य तुन वम्मला इनकार कितोर, कम कीमत ते अनाज वम्मला इनकार कितोर। मति सर्वहारा राजसत्ता राष्ट्रीय पूंजीवाद संगे एकता कीसी नाहकुना लोप्पा स्वतःस्फूर्त पूंजीवादी ताकत कुना काजे वेल्ले तैयार माल दोरकी कीयाना।¹ किसान लोरा जरूरत कुन पूरा कियाला काजे वेल्ले तैयार माल दोरकी कीयाना, किसान लोरा अनाज, उचुन औद्योगिक कच्चा माल वम्मला पेरेके-मुन्ने आयना परिस्थिति पोरो काबू कीयाना उद्देश्य तल प्रेरित आसी माटु पूंजीपति वर्ग संगे एकता कीतोम अनि इंजे पूंजीवादी कारोबार कुन जब्त कियवा लेवा अविना इस्तेमाल कीयाना अविन बदले कीयाना नीति लागू किताद मंता। इत्तेके पूंजीपति वर्ग संगे मावा एकता तुन किसान लोर तम्मा अनाज वम्मला पेरेके-मुन्ने आयना परिस्थितु पोरो काबू कियाला इस्तेमाल कीयाना। दूसरा बगिल माटु किसान लोरा संगे मना एकता पोरो आधार आसी मंतोम अनि अनाज ओसो औद्योगिक कच्चा माल दोरकी कीतोम, अविना संगे पूंजीपति वर्ग तुन नियंत्रण कीतोम। पूंजीपति लोरगा बदे कच्चा माल हिल्ले अनि राज्य तिगा वेने बदे कच्चा माल हिल्ले। ओरकिन कच्चा माल लागतेके तम्मा तैयार माल राज्य तुन वम्मा लागियर अनि राष्ट्रीय पूंजीवाद पोरो अमल किया लागियर। ओरु इद्रम कियाला इनकार कीतेके माटु ओरकिन कच्चा माल हीवोम। हर परिस्थिति ते ओरकिन नियंत्रण ते तासना अनि स्वतंत्र हाटुम, कच्चा माल स्वतंत्र रूप ते दोरकी कीयाना ओसो तैयार माल स्वतंत्र रूप ते वम्मना पूंजीवादी हरी बंद आयार। संगेने पूंजीपति वर्ग राजनीतिक रूप ते अलगाव ते अरियर। इद्रम इव रेंडु एकतांग नडमा आपस ते जुडेमासी मंतांग। इव रेंडु एकतांग लोप्पाटल किसान लोरा संगे मावा एकता प्रधान, बुनियादी ओसो मुख्य मंता अनि पूंजीपति वर्ग संगे मावा एकता अस्थाई ओसो गौण मंता। आर्थिक रूप ते पेरेके अरता मना लेक्कटा देशकुना काजे इंजे रेंडुसी एकतांग वेल्ले जरूरी मंतांग।

भूमि सुधार माकिन जनवाद पोरो आधार आसी किसान लोरा संगे एकता कीयाना लेक्का, किसान लोर किन भूमि दोरकना लेक्का बने कित्ता, किसान लोर जमीन दोरकी कीयाना पूंजीवादी जनवादी क्रांति मत्ता बारांकु इत्तेके अदु सिर्फ सामंती मालिकाना तुन नष्ट कित्ता, पूंजीवादी मालिकाना ओसो व्यक्तिगत मालिकाना तुन आयो। इद एकता पहली बेरा पूंजीपति वर्ग तुन अलगाव ता परिस्थिति ते वाटिंता। केंद्रीय कमेटी ता 1950 ते आता तीसरा पूर्ण अधिवेश ते नन्ना नालुंग बगिल हमला कीयानायो इंजी इत्ताना। अस्के एवनल देश ता बेहरा इलाका लोपा भूमि सुधार इंजे आताद हिल्ले अनि किसान लोरा पूरा मावा पक्ष ते वायवा मत्तोर। माटु अस्के पूंजीपति वर्ग पोरो हमला शुरू कीतेके परिस्थिति प्रतिकूल आसी मनवड़। भूमि सुधार पेरके किसान लोर पूराए मना पक्ष ते वायनूर अस्के “मूंड गलतिंग” विरोधी आंदोलन ओसो “हेय्युंग गलतिंग” विरोधी आंदोलन शुरू कीयाना संभव अनि जरूरी आता। कृषि सहकारिता संगे माटु सर्वहारा समाजवाद पोरो आधार आसी पूंजीवादी जनवाद पोरो आधार आसीए आयवा किसान लोरा संगे मना एकता तुन सुदृढ़ बने किया वेने परिंतोमा। इद्रम कीतेके पूंजीपति वर्ग हमेशाए अलगाव ते अरिंता अनि पूंजीवाद तुन पूराए खत्म कियाला सहायता दोरकियारा। इदिना लोप्पा माटु क्रूर मंतोमा। इदिना लोप्पा मार्क्सवाद निज्जमे वेल्ले क्रूर मंता, बारांकु इत्तेके अदु साम्राज्यवाद, सामंतवाद, पूंजीवाद ओसो लघु-उत्पादन तुन मोदोल तिंची नष्ट कियाला काजे संकल्प कीसी मंता। मना उचुन कामरेड्स वेल्ले दयालु मंतोर, ओरु पक्का मार्क्सवादिर आयोर। 60 करोड़ आबादी वाले चीन देश लोप्पा, पूंजीपति वर्ग तुन ओसो पूंजीवाद तुन मोदोल तिंचे नष्ट कीयाना उंदी वेल्ले बेसता पोल्लो मंता इदु उंदी महत्वपूर्ण पोल्लो वेने मत्ता। मावा उद्देश्य पूंजीवाद तुन मोदोल तिंची नष्ट कीयाना अदिन भूमि पोरोटल पूराए खत्म कीयाना, अदिन उंदी मायता वस्तु बने कीयाना मंता। इतिहास लोप्पा बद वस्तु पुट्टिंता अदु अनिवार्य रूप ते मायिंता वेने। दुनिया लोप्पा हर वस्तु उंदी ऐतिहासिक घटना आंदू।

पिस्वल मंता इत्तेके हामूर वेने मंता उंदी ऐतिहासिक घटना लेक्का पूंजीवाद वेने मायारे।

वर्तमान अंतरराष्ट्रीय परिस्थिति मावा काजे संक्रमणकालीन आम कार्य पूरा कियाला काजे अनुकूल मंता। समाजवादी औद्योगिकरण अनि समाजवादी बदलाव काम बुनियादी रूप ते पूरा कियाला काजे 3 पंचवर्षीय योजनांग लोप्पा जरूरी मंता। माटु शांतिपूर्ण निर्माण काजे इचोन टाईम दोरकी कियाला पूरा कोशिश कीयाना वेल्ले जरूरत मंता। 15 साल लोप्पाटल 3 साल हत्तांग, बाकी 12 साल लोप्पा इद काम पूरा कीयाना। माटु इद टाईम दोरकी कीयाना पूरा कोशिश कीयाना। माटु विदेशी समस्यांग लोप्पा ओसो राष्ट्रीय प्रतिरक्षा संबंधित निर्माण लोप्पा मना कोशिश बेरसी कीयाना।

इव 15 साल लोप्पा देश ओसो विदेश लोप्पा वर्ग-संघर्ष वेल्ले तीत्र आयारा। इद वर्ग संघर्ष लोप्पा माटु इंजे एवनल बचोनो सफलतांग दोरकता अनि वायना कालम ते वेने दोरकसोर मंदियारा। आंतरिक वर्ग-संघर्ष लोप्पा 12 महीनांग लोप्पा माटु मुख्य रूप ते नालुंग काम किताद मंता: पहली, माटु आदर्शवाद खिलाफ संघर्ष कीतोमा। दूसरा, माटु प्रतिक्रांतिकारीरा दमन कीतोमा। तीसरा, माटु अनाज संबंधित सवाल हल कीतोमा। चौथा माटु कृषि सहकारिता सवाल हल कीतोमा। इव नालुंग समस्यांग संबंधित सब्बे संघर्ष कुना स्वरूप पूंजीपति वर्ग विरोधी संघर्ष मत्ता। माटु इद वर्ग पोरो तीत्र हमला कीतोम अनि लगातार घातक हमलांग क्रिया मंतोमा।

आदर्शवाद खिलाफ संघर्ष हत्ता साल तले जारी मंता, इदिना शुरूआत “लाल भवन ता सपना” पोरोल ता उपन्यास संबंधित सवाल तल आता अनि ताना लोप्पा “साहित्यिक गजट” ता आलोचना ओसो ताना पेरेके हू श ओसो ल्यांग शू-मिंग ना आलोचना वेने शामिल मंता। माटु आदर्शवाद खिलाफ उंदी बेहरा अभियान ताकि कीयाना अनि इद संघर्ष काजे माटु 3 पंचवर्षीय योजनांग ना टाईम हियाना जरूरी मंता। इद संघर्ष ताकनास्के मार्क्सवाद ओसो द्वन्द्वात्मक भौतिकवाद लोप्पा निपुण कार्यकर्ता लोरा दस्ता निर्माण कीयाना अनि मावा कार्यकर्ता लोर, जनता

ना बेहरा हिस्सा तुन मार्क्सवाद ता बुनियादी सिद्धांत संगे लैस कीयाना जरूरी मंता। प्रतिक्रांतिकारीरा दमन कीयाना योजना इयेटा पिस्ता टाईम ओसो वायना साल ता पूरा टाईम राष्ट्रीय कारखानांग, राष्ट्रीय व्यापार कारोबार, सहकारी समितिंग ओसो काउंटिंग, जिला ओसो श्यांग स्तर ता विभिन्न संगठन नडमा तल ओसो सेना लोप्पा काम कीयाना कार्यकर्ता लोर ओसो फैक्टरी-मजदूर लोरा नडमा (लगभग 1 करोड़ 20 लाख लोकुर नडमा) तल खत्म कियाला वाटना। प्रतिक्रांतिकारीर इंजे वेल्ले हिल्ला लेक्का मंता। मति माटु इदिना गंभीर जांच कीतोम अस्के ओरु पक्का मत्तादू दोकिंता। माटु इंजे-इंजे ओरा उंदी समूह परहकतोम। अनाज ता सवाल बारे ते वेने उंदी बेहरा संघर्ष ताकी किताद मंता। पूंजीपति वर्ग अनाज समस्या तुन मावा हमला कियाला इस्तेमाल कित्ता अनि पार्टी लोप्पा वेने बचोनो गलत प्रचार आतांग, अदिन काजे इद परिस्थिति ता मुकाबला कियाला काजे माटु आलोचनांग शुरू कीतोम। कृषि सहकारिता सवाल बारे ते माटु बचोनो संघर्ष ताकी कीतोम अनि वर्तमान अधिवेशन वेने तन्ना ध्यान केंद्रित कित्ता। इव नालुंग मुद्दांग बारे ते माटु तीव्र संघर्ष कीतोम, पूंजीपति वर्ग ता प्रतिरोध, आक्रमण ता मुकाबला कीतोम अनि पहलकदमी दोरकी कीतोम।

पूंजीपति वर्ग इव मुद्दांग ना बारे ते माटु ओरा खिलाफ ताकी कित्ता संघर्ष कुना संगे प्रतिक्रांतिकारीरा दमन कियाला काजे कीयाना कारवाईंग निगडल वेरियंता। माटु प्रतिक्रांतिकारीरा वेल्ले बेस दमन किताद मता। इद काम लोप्पा माटु तय कित्ता मापदंड कुना बगिल ध्यान हियाना। माटु इद्रम कीवेके वेल्ले खतरनाक आयार। प्रतिक्रांतिकारी लेबल सिर्फ तय कित्ता मापदंड साबित कीतोर ओराए पोरो वाटमूडांता। इत्तेके माटु असली प्रतिक्रांतिकारी किन परहकना, नकली प्रतिक्रांतिकारीर किन आयो। नकली प्रतिक्रांतिकारीर गुप्त मंदाणा संभावना वेने मंता। मति माटु इद्रम मनवा लेवा पूराए खत्म आयना लेक्का हूडिंतोम। प्रतिक्रांतिकारी साबित आतोर किन प्रतिक्रांतिकारी मानेमायना। निर्दोश लोकुर किन दोषी बने कीयानायो। दूसरा बगिल उचुन असली प्रतिक्रांतिकारी मावा कैदल

बचेमाया वेने परितोर। माटु ओरकिन पूराए खत्म कियाकोम इतिर। इदिना आशा कम मंता। बचोमायोर इंदाना मुश्किल मंता मति माटु इद्रमताविना संख्या कम आयना लेक्का कोशिश कीयाना।

2. सहकारिता संबंधित सवाल ता बारे ते वाद-विवाद ता सारांश

कृषि सहकारिता बारे ते जनता हीता पूना तरिकांग वेल्ले भ्रम ओसो गलत धारणांग कुन गुंडा किसितांग। इंजे बहस संगे बचोनो लोकर उचुन महीनांग मुन्ने स्पष्ट समझेमाया परवा बचोनो सवाल कुन हल कीतोम।

पहली, बद्रम विस्तार कीयाना, बेहरा स्तर ते लेवेके सुडला स्तर। इदु मुख्य समस्या आंदू इदिना लोप्पा वेल्ले मतभेद मत्तांग, इंजे इदिन हल किताद मंता। जनता बेहरा स्तर ते विस्तार कीयाना इंजी मांग कीता, संक्रमण कार्य कृषि उद्योग अनुसार आयना इंजी मांग कीता। अदिन काजे सुडला स्तर ते विस्तार कीयाना विचार गलत मंता।

दूसरा, वेल्ले पेरके मुक्त आयना इलाकांग लोप्पा मेड्डा इलाका ता पेरके अरता श्यांग, प्राकृतिक संकट ते मत्ता इलाकांग लोप्पा विस्तार-कार्य संभव मंता या हिल्ले इंजी मंता। इंजे इद्रम सवाल तुन हल किताद मंता। अव सब्बे जागा इद्रम कीयाना संभव मंता।

तीसरा, अल्पसंख्यंक राष्ट्रीयता इलाकांग लोप्पा सहकारी समितिंग ना स्थापना कियमूडांता या आयो। इंजे परिस्थिति अनुकूल मत्ता जागा ने स्थापना कियमूडांता इंजी साबित आता। उचुन जागा ने इत्तेके तिब्बत ओसो ताल्यांग, श्याओल्यांग मेड्डांग ने इंजे परिस्थिति अनुकूल आताद हिल्ले ओसो सहकारी समितिंग ना स्थापना आताद हिल्ले।

चौथा, सहकारी समितिंग कुन धनराशि, जानवर संगे ताकना गाडिंग, कोंदांग लेवा खुशहाल मध्यम किसान लोरा लेवा स्थापना कियमूडांता या आयो। इंजे इद्रम कीयाना संभव मंता इंजी साबित आता।

पांचवी, “उंदी सहकारी समिति ता स्थापना कीयाना हल्को मंता मति अदिन सुदृढ़ कीयाना मुश्किल” इंदाना गलत विचार तुन गलत साबित किताद मंता। बारांकु इत्तेके सहकारी समितिंग बने कीयाना ओसो

अविन सुदृढ़ बने कीयाना वेल्ले कठिन मंता। उंदी सहकारी समिति ता स्थापना कीयाना हल्को मंता ओसो सुदृढ़ कीयाना मुश्किल मंता इंदाना पोल्लो पोरो नितसी मत्तेके मीटु सिर्फ उंदी-रेंडु सहकारी समितिगे स्थापना कीयाना लेवेके बदे वेने सहकारी समितिंग ना स्थापना कीयाना समर्थन कीविर।

छठी, सहकारी समितिंग ना स्थापना कृषि-मशीन लेवा कीयाना या कीयानायो। सहकारी समितिंग ना स्थापना तुकू मुन्ने मशीन अनिवार्य रूप ते मंदाना इंजी इंजे वेल्ले प्रचार आताद हिल्ले मति अदु इंजे वेने मंता। इदिन पूर्ण रूप ते गलत साबित कियमूडांता।

सातवी, बेस ताकसोर हिल्ला सब्बे सहकारी समितिंग कुन भंग कीयाना या कीयानायो? ताका परवा सहकारी समितिंग आपसी सहयोग दल लेक्का पुनर्गठित आया परिंतांग मति इद्रम ता सहकारी समितिंग कुन भंग कियवा लेवा अविना जांच पड़ताल अनि सुदृढ़ीकरण कीसी सुधरे कियामूडांता।

आठवी, “मीटु तुरंत कोडा पोर्टल रैय्यवेके मजदूर-किसान एकता देगना खतरा पैदा आयर” पोल्लो उंदी “पोल्लोए” मत्ता लेक्का मंता, इदिन केंद्रीय कमेटी ता नाहकुना कार्य विभाग तुकू दोड़ प्रसारित किताद मंता। इद विभाग सिर्प गलत प्रचारे आयवा वेल्ले “पोल्लोंग” वेने बने कींता। नन्ना इद पोल्लो मुख्य रूप ते “सही” मंता इंतान। सिर्फ उंदी शब्द बदले कीयाना जरूरत मंता, इत्तेके “रैय्यना” जागा ते “तरगना” इंजी मंदाना। नाहकुना कार्य विभाग ता कामरेड्स निराश आयानायो बारांकु इत्तेके नन्ना मीवा लगभग सब्ब शब्द स्वीकार कितान अनि सिर्प उंदे शब्द बदले कितान। सिर्फ उंदे शब्द ता अंतर मंता, मावा मतभेद सिर्फ उंदे शब्द ता बारे ते मंता। मीटु कोडा पोर्टल रैय्यला आल्सिंतिर, अनि नन्ना कोडा पोरो तरगला आल्सिंताना। “मीटु तुरंत कोडा पोरो तरगवेके मजदूर-किसान एकता देगना खतरा वातेके” ओसो इद खतरा जरूर पैदा आयार।

9वी, “कोंदांग कुन नुकसान कियाला काजे सहकारी समितिंग दोषी मंतांग” इंदाना आरोप, असल परिस्थिति तुकू बचोनो जेक मंता। कोंदांग

नुकसान आयाना मुख्य कारण सहकारी समितिंंग आयवा कोंदा तोला ता रेट बेरसना अनि चारा हिल्लांकु आंता अनि उचुन मुदियाल आता कोंदांग वेने मंतांग अविन हौकना जरूरी मंता।

दसवीं, “नहाकुना इलाकांग लोप्पा कठिन परिस्थिति मंदांना बुनियादी कारण अगा जरूरत तुकू ज्यादा सहकारी समितिंंग स्थापना कीयाना” इंजी वेहाना गलत मंता। हत्ता वसंत कालम ते नाहकुना लोप्पा मत्ता कठिन परिस्थिति ता मुख्य कारण अनाज ता समस्या मत्ता। अनाज ता कमी वेल्ले बेरा झूठ मत्तांग। जमींदार, धनी किसान ओसो खुशहाल मध्यम किसान लोर इदिने पोयसी कोल्हार कींतोर। मावगा इदिना मुकाबला कियाल काजे व्यापक किसान जनता तुन शिक्षित कीयानाचोन टाईम हिल्ले। संगे ने अनाज संबंधित मावा काम लोप्पा कमी वेने मत्ता। हत्ता साल माटु 700 करोड़ चिन अनाज ज्यादा अस्सतोम, बारांकु इतेके अस्के माटु बचोन अनाज अस्सना बेस आयर इंजी पुन्वा मत्तोम। इंजे माटु 700 करोड़ चिन कम अनाज अस्सला आल्सा मंतोम। इयेटा बेसता फसल संगे काल्पसी नाहकुना ता कठिन परिस्थितिंंग अनुकूल कियाला मदद आयर।

यारहवी, “सहकारी समितिंंग ना महत्व सिर्फ मूंड साल एवनल मंदा परिंता” इंदाना पोल्लो उंदी निराशावादी पोल्लो आंदू। अविना महत्व सिर्फ मूंड साल एवनले मंदिता, बारांकु इतेके समाजवादी वेल्ले जोम मंदिता। वायना कालम ते समाजवाद ता महत्व मन्नो आयर अस्के तन्ना महत्व पोयसी कम्युनिज्म ताना जागा एतिंता।

बारहवी, माटु वायना कालम ते बचोनो उन्नत स्तर ता सहकारी समितिंंग ना स्थापना कीयाना या कीयानायो? हत्ता कालम ते इद सवाल स्पष्ट रूप ते हल आताद हिल्ले अनि इदिन वर्तमान अधिवेशन ते तेहताद मंता। इद्रम ता सहकारी समितिंंग ना उंदी समूह ता स्थापना कीयाना। अविना संख्या पोरो मीटु खुद विचार कीयाना।

तेरावी “पालो वाले ओडांग अनि जानवर गाडिंग संगे रोजी ताकी कीयाना लोकरा सहकारी समितिंंग ना स्थापना किया परमूडायो” इंदाना

पोल्लो गलत ता। माटु इंजे पालो वाले ओडांग ओसो जानवर ताकी गाडिंग संगे परिवहन काम कीयाना दसियों लाख मेहनतकश लोकुर वेने सहकारी समितिंग लोप्पा संगठित कित्ता लेक्का।

मीटु कित्ता बहस ता वेहच ते माटु इव सब्बे सवाल कुन हल कित्ताद मंता। इद केंद्रीय कमेटी ता वर्तमान पूर्ण अधिवेशन ता उंदी बेहरा सफलता आंदू।

3.सही योजना अनि कारगर नेतृत्व ता सवाल ता बारे ते

सही योजना ता काम लोप्पा पहली, सहकारी समितिंग ना स्थापना ता योजना बने कीयाना। दूसरा, कृषि उत्पादन ता योजना बने कीयाना अनि तीसरा पूर्ण आर्थिक योजना बने कीयाना शामिल मंदांना। नहाकुना काजे बने कीयाना आर्थिक योजना लोप्पा सहायक कारोबार, दस्तकारी उद्योग, चौमुखी आर्थिक उद्यम, बहुप्रयोजन उद्यम, हंदी भूमि सुधार, आबादी ता स्थानांतरण, सप्लाई, क्रय-विक्रय सहकारी समितिंग, ऋणदाता सहकारी समितिंग, बैंक ओसो तकनीक-प्रसार केंद्र लेक्कटवे आयवा मर्ग हिल्वा मेड्रांग ओसो नाहकुना लोप्पा मर्गक उर्सना वेने शामिल मंता। नावा हिसाब ते उत्तर ता बीटाल मेड्रांग लोप्प विशेष रूप ते मर्गक उर्सना, इद काम बदे डावुट हिल्वा कियमूडांता। मीवा लोप्पाटल उत्तर ता कामरेड्स ना लोप्पा इद काम कीयाना हिम्मत मंता या? दक्षिण ते वेने बचोनो जागा ने मर्गक उर्सना जरूरत मंता। माटु वायना उचुक साल कुना लोप्पा दक्षिण ओसो उत्तर ता विभिन्न मर्गक उर्सतेके बेस आयारा। इद्रम कीतेके कृषि, उद्योग ओसो बाकी सब्बेटविना लोप्पा वेने फायदा आयारा।

बद योजना बने कीयाना? संस्कृति, शिक्षा काजे वेने इंजी योजना बने कीयाना। तीना लोप्पा अनपढ़ता तुन दूर कीयाना, प्राइमरी स्कूल खोले कीयाना, नहाकुना इलाका ना जरूरत अनुसार सेकंडरी स्कूल खोले कीयाना, सेकंडरी स्कूल ता पाठ्यक्रम लोप्पा उचुन, कृषि-पाठ्य विषय जोड़े कीयाना, किसान लोरा जरूरत कुना अनुसार पुस्तकिंग प्रकाशित कीयाना, नहाकुना इलाकांग लोप्पा प्रसारण-केंद्र ता जाल वाटना ओसो

फिल्म-प्रदर्शन दल बने कीयाना, सांस्कृतिक, मनोरंजन संबंधित गतिविधिगं कीयाना, लेक्कटवु शामिल मंतांग। इदे आयवा पार्टी, नौजवान संघ ता संगठन ता सुदृढ बने कीयाना अनि अविना निर्माण कीयाना काम काजे, महिलांग संबंधित काम काजे ओसो प्रतिक्रांतिकारीर दमन कीयाना संबंधित काम काजे वेने योजनांग बने कीयाना। इव सब्बे काम लोप्पा चौतरफा योजना लोप्पा शामिल कियाना।

योजनांग इद्रम मंदाना: 1) नाहकुना सहकारी समिति ना योजना। हर सहकारी समितिगं बचोन सुडला मतेकाई तम्मा काजे योजना बने कीयाना अनि अविन बद्रम बने कीयाना इंजी करियाना। 2) पूरा श्यांग ता योजना। मावा देश लोप्पा 2,20,000 तुकू ज्यादा श्यांग मंतांग, अविना लोप्पा हर श्यांग ता तन्ना योजना मंदाना। 3) पूरा काउंटी ता योजना। माटु हर काउंटी तन्ना-तन्ना योजना बने कीता इंजी आशा कीतोमा उचुक काउंटीगं वेल्ले बेसता योजनांग बने कीतांग अवु पढेमायना लेक्का मंतांग। अगा कामरेड्स ना दिमाग मुक्त आताद मंता, ओरा लोप्पा हंदी हिल्ला साहस मंता अनि ओरु बदे बंधन संगे दोहची हिल्लेर ओरा योजनांग गतिशील मंतांग: 4) पूरा प्रांत (लेवेके स्वायत्त प्रदेश ओसो म्युनिशिपलटी ना उपनगरीय इलाका) ता योजना। इगा पूरा श्यांग ओसो पूरा काउंटी ना योजनांग पोरो जोर हियाना। इव रेंडु कडिंग कुन मजबूत तासना अनि बचोनो योजनांग तुरंत तैयार कीयाना। उदाहरण तुकू हर प्रांत लोप्पा मूंड-नालुंग काउंटीगं ना योजना तैयार कीयाना अनि अविन नमूना लेक्का वितरित कीयाना।

सहकारी बदलाव कुना योजनांग लोपा अलग-अलग इलाकांग काजे विकास ता अलग-अलग रफतार तय कीयाना। मूंड रकम ता इलाकांग मंतांग। पहली रकम ता इलाकांग लोप्पा मना नहाकुना इलाकांग ना बेहरा हिस्सा शामिल मंता, दूसरा रकम ता इलाका मना लोप्पा नहाकुना इलाकांग ना न्यूनतर हिस्सा ता उंदी अंश शामिल मंता अनि तीसरा रकम ता इलाकांग लोप्पा मना नहाकुना इलाकांग ना न्यूनतर हिस्सा ता बाकी अंश शामिल मंता। मावा नहाकुना इलाकांग ना बेहरा हिस्सा लोप्पा विकास काम मूंड लहर कुने इत्तेके हिरगम-वसंत ता मूंड कालम कुना

लोप्पा कीयाना। इव मूंड लहर कुना लोप्पा इयेटा हिरंगम ओसो वायना साल ता वसंत, वायना साल ता हिरंगम ताना पेरेके वायना साल ता वसंत ओसो अदिनकु पेरेकेटा साल ता हिरंगम ओसो अदिनकु पेरेके टा साल ता वसंत शामिल मंता। हिरंगम ओसो वसंत ता मूंड कालम कु मूंड लहर कुना लेक्का मंतांग, उंदी पेरेके उंदी वासोरे दांतांग, मति रेंडु मेट्टांग नड्मा गाटुम मत्ता लेक्का अविना नड्मा वेने उंदी गाटुम मंदानाए पहली रकम ता इलाकांग लोप्पा 1958 ता वसंत ता अर्ध समाजवादी सहकारी बदलाव बुनियादी रूप ते पूरा आसी मंदियर। दूसरा रकम ता इलाकांग काजे उत्तर चीन ओसो उत्तर-पूर्व इलाकांग ओसो उचुक उपनगरीय इलाकांग काजे मत्ता लेक्का रेंडु हिरंगम कालम ओसो रेंडु वसंत कालम लेवेके रेंडु लहरके हालिंतांग। अविना लोप्पा उचुक इलाकांग लोप्पा वायना वसंत कालम एवनल सहकारी बदलाव काम बुनियादी रूप ते पूरा आयर, इद्रम ओरु सिर्फ उंदे लहर ते तम्मा लक्ष्य पूरा कींता। तीसरी रकम ता इलाकांग काजे इत्तेके मना नहाकुना इलाकांग ना न्यूनतर हिस्सा ता पिस्ता अंश काजे, हिरंगम-वसंत ता 4-5-6 कालन कुना जरूरत मंदिता। इविना लोप्पा अल्पसंख्यक राष्ट्रीयतांग ना ताल्यांग, श्याओल्यांग, मेट्टांग, तिब्बत ओसो अल्पसंख्यक राष्ट्रीयतांग शामिल हिल्लेंग, अगाटा परिस्थिति इंजे अनुकूल आताद हिल्ले, अगा सहकारी समितिंग स्थापना कीयानायो। अर्ध-समाजवादी सहकारिता ता बुनियादी रूप ते पूरा आतेके 70-80 प्रतिशत नाहकुना आबादी अर्ध-समाजवादी सहकारी समितिंग लोप्पा शामिल आता। इद संख्या लगभग 70 प्रतिशत मंता अनि 75 प्रतिशत, 80 प्रतिशत लेवेके अदिनकु उचुन ज्यादा मंदाना संभावना वेने मंता। अर्ध-समाजावादी सहकारिता ता बुनियादी रूप ते पूरा आयना इत्तेके इद्रमे आंता। ताना पेरेके पिस्ता नाहकुना आबादी सहकारिता लोप्पा वांता। वेल्ला तीरम ताकना बेस हिल्ले ओसो वेल्ले स्पीड ताकना वेने बेस हिल्ले, इव रेंडासी रुझान अवसरवादी आंदुंग। अवसरवाद रेंडु रकम ता मंदिता, तीरम ताकना अनि जल्दी ताकना। इद्रम वेहतेके आम जनता तुन हल्कोए समझेमांता।

प्रांत (म्युनिसिपलटी लेवेके स्वायत्त प्रदेश), प्रिफेक्चर ओसो काउंटिंग इव मूंडासी इद आंदोलन ता विकास ता जानकारी लगातार दोरकी कीसोर मंदाना अनि बदे समस्या वातेके हल कीसोर दायना। मीटु समस्या ता जांच कीयाना मुन्ने अविन डग्गी आयला हियानायो इंजी गारंटी कीयाना। इद्रम कीतेके लेट फायर कीयाना आयारा। हत्ता कालम ते मावा वेल्ले काम इद्रने किताद मंता। समस्या वात्तास्के अविन हल कियवा लेवा अविन डग्गी आयला हीतोम अनि अविना जांच कियवा लेवा आलोचना कीसी काम मारिह कीतोम। उचुन कामरेड्स “मूंड गलत” विरोधी ओसो “हेय्युंग” विरोधी आंदोलन ताकनास्के इदे गलती आता। सिर्फ घटना आता पेरके आलोचना कीयाना तरिका पोय्यनायो। बदे डावुट हिल्ला घटना आता पेरके आलचोना कीयाना वेने जरूरी मंता मति सबसे बेस गलती समझेमातास्केने आलोचना शुरू कीयाना। सिर्फ घटना आता पेरके आलोचना कीयाना ओसो बदलेमासोर मत्ता परिस्थितिंग अनुसार मार्गदर्शन किया परवा मंदाना गलत मंता। परिस्थिति मना प्रतिकूल आतास्के बाता कीयाना? तुरंत ब्रेक वाटना अनि रोमना। इद कार ताकी कीयाना लेक्क मंता। सीधा गोड़गा तल दोड़ रैय्यनास्के माकिन खतरा ता सामना किया लागिंता अस्के माटु तुरंत ब्रेक वाटितोम। प्रांत, प्रिफेक्चर ओसो काउंटी इव सब्बे स्तर ता अर्थॉरिटी कुन ब्रेक वाटना अधिकार मंता। “वामपंथी” भटकाव तल बचेमायना बगिल ध्यान हियाना जरूरी मंता। “वामपंथी” भटकाव तल बचेमायना मार्क्सवाद आंदू, अवसरवाद आयो। मार्क्सवाद “वामपंथी” भटकाव कुना मांग कीवो अनि “वामपंथी” अवसरवाद मार्क्सवाद आयो।

सहकारी समितिंग ना स्थापना कीयानास्के माटु इंजे बद शर्त तासना? माटु क्वालिटी, सही नमूना ता होड़ वाटना। मात्रा ओसो गति ता बारे ते माटु इंजे-इंजे ने वेहता लेक्का अदु बेसे मंता। इंजे क्वालिटी पोरो जोर हियाना। क्वालिटी तुन मापे कीयाना तरिका उत्पादन बेरसना ओसो जानवर कुना नुकसान आयना मंता। उत्पादन बद्रम बेरसी कीयाना, जानवर कुन नुकसान बद्रम रोमी कीयाना? इद उद्देश्य तुन पूरा कियाला काजे खुद

शामिल आयना आपसी फायदा एतना नियम पोरो अमल कीयाना चौतरफा योजांग बने कीयाना, लचीलापन संगे मार्गदर्शन कीयाना। नावा हिसाब ते इद्रम ता परिस्थिति ते सहकारी समितिग ना क्वालिटीग मुन्ने तुकू बेस आया परिंताना, उत्पादन बेरसा परिंता, जानवर नुकसान तले बचे कियमूडांता। माटु बस्केने सोवियत संघ लोप्पा कित्ता गलतिंग कीयाना तुकू पूरा बचेमायना कोशिश कीयाना। बारांकु इत्तेके इदिना कारण ते जानवर कुना बेहरा संख्या तुन हौकताद मंता। वायना रेंडु साल मुख्य रूप ते वायना 5 महीनांग, इत्तेके हिरंगम ओसो वसंत कालमकु मंतांग। नन्ना मीटु जरूर इयेटा नवम्बर तल वायना साल मार्च एवनल बदे गंभीर गडबड पैदा कीयानायो अनि बेहरा संख्या ते जानवर कुना आयला हियानायो। मावगा सिर्फ उचुने ट्रेक्टर मंता, अदिन काजे कोंदांग मावा मूल्यवान निधि आंदू, कृषि उत्पादन ता मुख्य साधन आंदू।

वायाना 5 महिनांग लोप्पा प्रांत, प्रिफेक्चर, काउंटी, जिला, श्यांग स्तर ता नेतृत्वकारी कार्यकर्ता लोर सबसे मुन्ने पार्टी सचिव, उपसचिव लोर किन, सहकारी समितिग लोप्पा नेंगसी अविना संबंधित विभिन्न समस्यांग ना जानकारी एतना। इद टाईम वेल्ले कम मंता या? मीटु बेस कोशिश कीतेके नावा हिसाबत 5 महिनांग हालानाचोन मंतांग। ताना लोप्पा बदे डावुट हिल्ला प्रांतीय स्तर ता कामरेड्स ना काजे इद्रम कीयाना वेल्ले महत्वपूर्ण मंता। मति काउंटी, जिल, ओसो श्यांग स्तर ता कामरेड्स सहकारी समितिग ना बारे ते जानकारी दोरकी कियवा लेवाए बेहरा संख्या ते अविना स्थापना कीतेके वेल्ले खतरनाक आयारा। बोरे कामरेड इद्रम किया परवेके बाता कीयाना? इद्रम कीयाना जागा ते बदे दूसरा काम सौंपे कीयाना। केंद्रीय कमेटी इंजे 5 महिनांग पेरेके इत्तेके वायाना साल मार्च पेरेके, इद्रमे ओसो उंदी सम्मेलन आयारा। अस्के माटु क्वालिटी ता होड वार्टितोम, सम्मेलन लोप्पा वक्ता लोर किन तम्मा वर्तमान भाषण कुन दुहरे कीयाना इंजी आशा कीतोम, बारांकु इत्तेके मीटू पूना पोल्लोंग कीयाना अनि प्लानिंग, मैनेजमेंट संबंधित ओसो नेतृत्व ता तरीकांग संबंधित सवाल कुना पोरो जोर हियाना। ओरु वेल्ले ओसो बेसता सहकारी

समितिंग जल्दी स्थापना कीयाना कारगर तरीकांग ना चर्चा कीयाना। दूसरा माटा ने ओरु क्वालिटी ता सवाल ता चर्चा कीयाना।

नेतृत्व कीयाना तरीकांग ना वेल्ले महत्व मंता। गलतिंग कीयाना तुकू बचेमायल काजे माटु इव तरीकांग पोरो ध्यान हियाना अनि नेतृत्व तुन सुदृढ़ बने कीयाना जरूरी मंता। नन्ना नेतृत्व ता तरीकांग ना बारे ते मीटु इव तरीकांग अमल आया मंतांगे हिल्लेंग इंजी हूडाना इंजी सुझाव हींताना। माटु इंजे कीसोर मत्ता लेक्का तात्कालिक समस्यांग कुन हल कियाला काजे हर साल बचोनो सुडला-बेहरा मीटिंग कीयाना इंजी वेहिंताना। बस्केने बदे समस्या वातेके मीटु बदे विशिष्ट सार्वभौमिक तत्व बद मंता इंजी हूडना। “सुडला मत्तेकाई कोडका पिट्टे ता मेंदुल लोप्पा सब्बे मुख्य अंग मंतांगे” इंजी साबित कियाला काजे मीटू सब्बे कोडका पिट्टेंग पोयसी चीरफाड़ कीयाना जरूरत हिल्ले। इद्रम बोर वैज्ञानिक बस्केने वेहताद हिल्ले। उंदी बेरा मीटु उचुन सहकारी समितिंग कुन स्पष्ट रूप ते समझेमातेके मीटु सही योजना तेंडा परितोमा। मीटिंग केयना तरीका इस्तेमाल कियवा लेवा मीटु चिट्टी, टेलिफोन ता इस्तेमाल वेने किया परितोम अनि निरीक्षण दौरा वेने किया परितोम। इद वेने नेतृत्व ता वेल्ले महत्वपूर्ण तरीका मंता। इदे आयवा हर प्रांत तन्ना प्रकाशन बेस ताकी कीयाना अनि सुदृढ़ बने कियाला सही कर्मचारिं कुन चुने कीयाना अनि अनुभव कुना आदान-प्रदाना कीयाना। मीटु इदिने पोरो अमल कियाला कोशिश कींतिर इंजी आशा कींताना। नन्ना 11 दिव्यंग वाटसी 120 तुकू उचुन ज्यादा रिपोर्टकु पढेमातन अनि अविन सुधरे कितान, अविना पोरो टिप्पणि रास्ताना। इद्रम नन्ना “सब्बे राज्य लोप्पा वेलियतान”, जेक मत्ता यूनान, सिनच्यांग “वेलियसोरे”² कनफ्यूशियस किनकु वेने ज्यादा वेलियताना। हर प्रांत ओसो स्वायत्त प्रदेश लोप्पा हर साल, हर 6 महीनांग लोप्पा उंदी पुस्तक रासमूडांता, ताना लोप्पा हर काउंटी तल उंदी लेख शामिल कीसी सब्बे काउंटींग ना अनुभव कुना आदान-प्रदान कीयाना। इद्रम कीतेके सहकारी आंदोलन तुन जल्दी विस्तार कीयाना सहायता दोरकियर। बुलेटिन जारी कीयाना उंदी दूसरा तरीका आंदू काउंटी ना पार्टी

कमेटी प्रिफेक्चर ना पार्टी कमेटी मुन्ने, प्रिफेक्चर पार्टी कमेटींग प्रांत लेवेके स्वायत्त प्रदेश ता पार्टी कमेटी मुन्ने ओसो प्रांत लेवेके स्वायत्त प्रदेश ता पार्टी कमेटींग कुन केंद्रीय कमेटी मुन्ने पेश कीयाना। ताना लोप्पा बचोन सहकारी समितिंग बने किताद मंता, अविना लोप्पा बद-बद समस्या वात्ता इंजी मंदाना। इव बुलेटिन कुना संगे विभिन्न स्तर ता नेतृत्व-मंडल परिस्थिति ता जानकारी दोरकी किया परिंता अनि समस्यांग वातेके अविन हल कींता। इव नेतृत्व ता तरीका संबंधित उचुक सुझावकुना पोरो इगा मत्ता सब्बे कामरेड्स आल्सना।

4. विचारधारात्मक संघर्ष ता बारे ते

हत्ता पूरा अनुभव तल विचारधारात्मक संघर्ष लोप्पा सही निशाना पोरो हमला कीयाना जरूरी मंत इंजी साबित आता। विचार कुना नडमा टक्कराव आयना जरूरी मंता। लड़ाई लोप्पा मीटु मीवा तलवार मावा पोरो वार कींतिर अनि नन्ना नावा तलवार संगे मीवा पोरो हमला कीतांन रेंडासी तलवारकु उंदी-दूसरा संगे टकरेमांतांग, इदिन टक्कराव इंतोरा। विचार कुना टकराव लेवा स्पष्टता ओसो विस्तृत आया परवोंग इद पोल्लो बेस हिल्ले। इद अधिवेशन लोप्पा मावा विचार कुना नडमा टकराव आता अनि इद्रम माटु अविना लोप्पा स्पष्टता, व्यापकता तत्ताना। इद्रम कीतेके वेल्ले कामरेड्स किन समस्यांग कुन स्पष्ट रूप ते समझे कियाला मदद दोरकिंता अनि दूसरा इद्रम कीतेके गलती कीयाना कामरेड्स किन तम्मा गलती सुधरे कियाला मदद दोरकिंता।

गलतिंग कीयाना कामरेड्स काजे नावा हिसाब ते सिर्फ रेंड पोल्लोंग जरूरी मंता: पहली, ओरा खुद लोप्पा क्रांति कीयाना विचार मंदाना: दूसरा, बाकी लोकुर क्रांति कीयाना जरूरी मंता। खुद क्रांति रोमी कियाला आल्सना लोकुर वेने मंतोरा। उदाहण तुकू छन तू-श्यू, च्यांग क्वा-थाओ, काओ कांग ओसो राओ शू-श लेक्काटोरा। मति इद्रम तोर सिर्फ मुट्टामेंडे मंदिंतोरा। ज्यादातर लोकुर क्रांति जारी तासला आल्संतोरा। संगे ने दूसरा पोल्लो वेने जरूरी मंता: ओरु क्रांति जारी तासना जरूरी मंता। माटु “आ

क्यू ना असली कहानी” ता आ क्यू किन बहिष्कार कीयाना नकली विदेशी जानवर लेक्का व्यवहार कीयानायो अनि इद्रमे दूसरोर किन क्रांति लोप्पा शामिल आयला रोमी कीयाना “कछार ता वीर” ता सफेदपोश विद्वान वांग लुन³ ना वेने समर्थन कीयानायो। बोरु लोकर किन क्रांति लोप्पा शामिल आयला हीवोर ओरकिन खुद वेल्ले खतरनाक परिस्थिति ता सामना किया लागिয়ার। पंडरी गेत्तंग केरता विद्वान वांग लुन (बाकी तोर किन क्रांति लोप्पा शामिल आयला हीवोर) आखरी ते तन्ना पिस्वल पोह्हतोर। काओ कांग वेने बाकी तोर किन क्रांति लोप्पा शामिल आयला हीवोर ओरु वेने पेरके डोलतोर।

ऐतिहासिक अनुभव तल कठमुल्लावाद लेवेके अनुभववाद ता गलतिंग कियानोरा बेरा संख्या तन्ना गलतिंग सुधरे किया परित्ता। मति अदिना काजे रेंडु शर्तकु तासना जरूरी मंता, उंदी गंभीरता ते आलोचना कीयाना अनि दूसरा सहायक रुझान लागू कीयाना। सहायक रुझान पोयके संबंध बिगडेमायना संभावना मंता। हर मानेय जरूर गलतिंग कींतोर इदिना उचुन मुल बेहरा गलतिंग कींतोर अनि उचुन सुडला गलतिंग कींतोर। छन तू-शुयू, क्वो-थाओ, काओ कांग, राओ शू-श ओसो छन क्वांग ओसो ताए ची-इंग लेक्का तम्मा गलतिंग संगे टुंडसी मंदाना लोकर वेल्ले कम मंतोर। इद्रम ता इरवुर-मुव्वुर मानेय किन विडचसी गलतिंग कीयाना बाकी सब्बे तोर किन बचे कीयाना। अनि ओरा गलतिंग सुधरे कियाला मदद कीयाना। माटु इद्रमे काम कीयाना अनि मावा लोप्पा इद्रमता विश्वास मंता। गलतिंग कियानोर किन वेने इद विश्वास मंदाना।

केंद्रीय कमेटी ता नाहकुना-कार्य विभाग ता उचुन कामरेड्स मुख्य रूप ते कामरेड तंग च-ह्वेइ गलतिंग कित्तोर। इंजे ओरा गलति ता स्वरूप दक्षिणपंथी भटकाववादी ओसो अनुभववादी मंता। कामरेड तंग च-ह्वेइ आत्मालोचना कित्तोर। मति ग्रुप मीटिंग लोप्पा उचुन कामरेड्स ओरु बेस आत्मालोचना कीवोर इंजी आल्सतोर मति राजनीतिक ब्यूरो ओसो उचुन मुल इदिना पोरो विचार किताद मंता अन बेस समझेमाया मंतोमा। ओरु इंजे तोहता समझदारी वेल्ले बेस मंता। कामरेड तंग च-ह्वेइ दीर्घकालीन

क्रांतिकारी संघर्ष ताकनास्के वेल्ले काम कित्तोर अनि बचोनो योगदान हित्तोर इंजी स्वीकार कीयाना। मति ओरु तन्ना योगदान कुन बाधा बनेमायला हियानायो। इद पोल्लो ओरु खुद स्वीकार कित्तोर, तन्ना योगदान कुना उचुन तारीफ कित्तोर। माटु विनम्र मंदना जरूरी मंता। कामरेड तंग च-ह्वेइ विनम्र बने मासी मत्तेके, मना कामरेड्स ना सहायता तुन स्वीकार कियाला काजे तैयार आतेके ओरु जरूर तम्मा गलतिंग सुधरे कियानूर।

कामरेड्स तंग च-ह्वेइ उंदी बेरा इदे कार्यक्रम ता प्रस्ताव पेश कित्तोर, ताना लोप्पा व्यापारि (पूंजीपति वर्ग) पोरो आधार आसी मंदाना, “नालुंग बेहरा आजादिंग” ना बारेते वेहताद मत्ता। अद प्रस्ताव गलत मत्ता अनि अदिना स्वरूप पक्का पूंजीपति वर्ग ता प्रोग्राम ता मत्ता। उंदी पूंजीवादी प्रोग्रामे आयवा अदु सर्वहारा वर्ग, पूंजीपति वर्ग तुन सीमित कीयाना बारे ते सातवी केंद्रीय कमेटी ता दूसरा पूर्ण अधिवेशन ता निर्णय ता उल्टा वेने मंता। इंडे माटु शहरी पूंजीपति वर्ग ओसो नाहकुना पूंजीपति वर्ग (धनी किसान) लोर किन सीमित कीयाना नीति पोय्या मंतोमा अदिन काजे “नालुंग बेहरा आजादिंग” पोरो इनकार कीयाना जरूरी मंता। इविना लोप्पा मजदूर तासना, व्यापार कीयाना, सूद हियाना ओसो बटाई ते जमीन हियाना बंद कीतद हिल्ले। इव “नालुंग सुडला आदिंग आंदु” इंताना इगा अंतर सुडला-बेहरा नडमा मंता। सीमित कीतेके पूंजीपति वर्ग इव आजादिंग सिर्फ उचुने मात्रा ते दोरकितांग। माटु पूंजीपति वर्ग तुन सुडला आजादिंग वेने दोरकवा लेक्कटा परिस्थितिंग तैयार कीयाना। शहरी पूंजीपति वर्ग पोरो माटु इस्तेमाल कीयाना, सीमित कीयाना ओसो बदलाव कीयाना नीति पोयंतोमा। माटु अदिन इस्तेमाल कीयाना जरूरी मंता मति अदिना राष्ट्रीय अर्थव्यवस्था ओसो जनता ना पिस्वल काजे नुकसानदायक मत्ता पहलू तुन वेने सीमित कीयाना जरूरी मंता। इद नीति “वामपंथी” ओसो दक्षिणपंथी आयो। वेल्ले सीमित कीयाना, इत्तेके पूंजीपति वर्ग तुन बदे वेने उद्यम कीयाना अनुमति हियवेके “वामपंथी” रुझान बगिल ओल्लना आंता। लेनिन वेहता लेक्का कोटी-कोटी लघु

उत्पादनकु मंदानास्के पूंजीवाद तुन उंदी बेरा खत्म कियाला कोशिश कीयाना वेने राजनीतिक पार्टी काजे सिर्फ बकवल काम कीयानाए आयवा आत्मघातक वेने आयारा⁴ मति कामरेड तंग च-ह्वेइ ना प्रस्ताव केंद्रीय कमेटी ओसो अदिना दूसरा पूर्ण अधिवेश ता प्रस्ताव तुकू अलग मत्ता।

पार्टी प्रस्ताव ओसो मुन्नेटले पार्टी लागू कीसोर मत्ता नीतिंग बगिल ध्यान हियवा मंदाना लोकर वेने मंतोर। ओरु इविन बस्के पढेमातद लेवेके केंजताद वेने हिल्ले। ओरु इद्रम बारांकु कींतोर पुन्नोना उदाहरण तुकू केंद्रीय क्रांतिकारी आधार इलाकाग लोप्पा, येनाना ओसो हर आधार इलाकांग लोप्पा आपसी सहयोग सहकारी आंदोलन बचोनो साल तीक किताद मंत मति ओरु अदिना बारे ते उचुन वेने पुनवा-केंजवा लेक्का मंतोर। 1951 ता हिरंगम ते केंद्रीय कमेटी कृषि उत्पादन लोप्पा आपसी सहयोग, सहकारित ता बारे ते उंदी प्रस्ताव स्वीकार किताद मंता। अविना वेने उचुन कामरेड्स उल्लंघन कित्तोर। 1953 एवनल वेने ओरु बुनियादी उसूल कुना बारे ते बस्के ने बदे पोल्लो कीवोर अनि सुडला-सुडला काम कीसी खुश मंदानोर। ओरु बुनियादी उसूल बारे ते बस्केने बदे पोल्लो कीवोर इंजी इंतोम इत्तेके ओरु समाजवाद ता बारे ते बस्केने बदे पोल्लो कीवोर, ओरु सिर्फ सुडला-सुडला काम कीसी खुश आंतोर इत्तेके ओरु “नालुंग बेहरा आजादिंग” हूइसीए खुस आंतोर। इत्तेके पार्टी प्रस्ताव ओसो वेल्ले जोम तल लागू आयना पार्टी नीतिंग ओसो प्रोग्राम कुना पोरु ध्यान हियवा मंदाना उचुन कामरेड्स वेने मंतोर। इदिना उल्टा ओरु तम्माए हरदे ताकिंतोर। ओरु इद्रम ता सवाल कुना पोरु मुन्ने विचार-विमर्श आता या आयो अनि आता इत्तेके बद्रम आसी मंदार इंजी पता कीयाना कोशिश कीवोर। उचुन इतिहासकार लोर परहकता प्राचीन कच्छप-लेख, ताम्र-पत्र, प्रस्तर-लेख ओसो उचुक अवशेष कुना वेल्ले विचारपूर्क अध्ययन कींतोर, वीर कामरेड्स माकिनकु उचुन मुन्ने हत्ता कालम पोरु इनपडे ध्यान हीवो आयनोर अनि ताना पोरु विचार कियाला इत्तेके उचुन वेन आल्सोर। संक्षिप्त ते ओरु तम्मा हंदी तुकू बाहर ता घटनांग कुन इनपडे नजरअंदाज कियानोर अनि तम्मा विचार वात्ता लेक्का रासानोर। उदाहरण तुकू ओरु

“नालुंग बेहरा आजादिंग” लेक्का पोंगडिंक कियानोर अद्रमासी ओरु गूडी पोरो तल्ला तोकिह कित्तोर।

उचुन कामरेड्स हमेशा विकेंद्रीकरण तुन विचार कियानोर ओरु स्वतंत्रता पोरो जोर हियानोर अनि इदिनकु मुन्ने हंजी स्वतंत्रता निल्पी कींतोर अनि ओरकिन तानाशाही ता आदत आंता। शुरू ते ओरु तम्मा काजे सुविधाजनक परिस्थिति पुट्टी कीयाना उद्देश्य ते स्वतंत्र राज्य कुना स्थापना कित्तोर अनि अगा तम्मा तानाशाही घोषित कित्तोर। मति पेरेके ओरा आलोचना आता अस्के ओरा काजे वेल्ले असुविधाजनक परिस्थिति पुटता। “राज्यभिषेक” पोरोल ता उंदी ऑपेरा लेक्का हिल्ले या? उचुन हूडाटू श्वे फिंग-क्वेइ किन बादशाह बने मातास्के बचोन खुश आतोर, बारांकु इत्तेके अस्के आत्मालोचना पोरो ता बदे वस्तु हिल्वा मत्ता। इदु बदे बेसता पोल्लो आयो। वेल्ले लोकुर दूसरोरिगडल सलाह-मशविरा बस्केने कीवोर। वेल्ले लोकुर सामूहिक नेतृत्व ता पोल्लोंग कींतोर मति असल ते व्यक्तिगत तानाशाह तुन विचार कींतोर। नेताल बनेमायला काजे तानाशाह मंदाना जरूरी हिल्ले, मीटु पुनविरा? पूंजीपति वर्ग तिगा पूंजीवादी जनवाद मंता, अदु तन्ना वर्ग-तानाशाही पोरो जोर हींता। अद्रमे सर्वहारा वर्ग ओसो कम्युनिस्ट पार्टी काजे वेने तन्ना वर्ग-तानाशाही लागू कीयाना जरूरी मंता अनि व्यक्तिगत तानाशाही पोरो अमल कीयाना गलत मंता। बदे समस्या वातेके दूसरोरा संगे सलाह-मशविरा कीयाना अदिन सामूहिक रूप ते हल कीयाना, बचोनो लोकुरा विचार जमा कीयाना जरूरी मंदिंता। इदु वेल्ले बेसता तरीका मंता।

इगा उंदी दूसरा पोल्लो ता बारे ते वेहना वेने जरूरी मंता। वेल्ले कामरेड्स ऑफिस ता कामकाज लोप्पा मुडंदसी मंतोर अनि समस्यांग ना अध्ययन कीवोर आंतोर। ऑफिस ता कामकाज जरूर कीयाना, बारांकु इत्तेक अदिन नजरअंदाज कीतेके काम ताको आंता मति सिर्फ ऑफिस ता कामकाज कीसोर मंता ओसो समस्यांग कुना अध्ययन कियवा मंदाना खतरनाक साबित आंता। माटु कार्यकर्ता लोरा नडुमा ओसो जनता नडुमा हंजी ओरा नडुमा हंजी सिर्फ ओरा बारे ते पुंजोर मनवा लेवा विचार कुना

आदान-प्रदान कियाला काजे “नावा इद विचार ता बारे ते मीटु बाता आल्संतरि? मीटु मीवा राय हीमुट” इंजी सलाह-मशिविरा कीतेके मीटु राजनीतिक वातावरण तुन समझेमाया परविर आयाकिर, माटु असंवेदनशील आयकिर अनि मीकिन राजनीतिक बीमारी आया। उंदी बेरा बीमार आताके मीटु काल विशेष ता परिस्थिति बद्रम मंता इंजी वेहा परविर आयकिर। नेंडु कामरेड छन ई वेहता लेक्का बदे वस्तु ता उदय आता इत्तेके माटु अदिन मजबूती ते पोयसी तासना। बोरे मानेय व्यापक रूप ते ओसो बेहरा मात्रा ते विद्यमान वस्तुंग हूडा परतेके जरूर ओरु वरोर वेल्ले असंवेदनशील मानेय आंदुर। इद परिस्थिति बगिल ध्यान हियाना जरूरी मंता। सिर्फ ऑफिस ता कामकाज ते मत्ता, समस्यांग नाए अध्ययन कीयाना, जनता, कार्यकर्ता लोरा नडमा दायना अनि सलाह-मशिवरा कीयाना तुन नजरअंदाज कीयानायो।

5.ओसो उचुक सवालकु

इंजे चर्चा कीयाना सवालकु ज्यादातर इगा कामरेड्स तेहता सवालकु आंदुंग।

पहली, खुशहाल मध्यम किसान लोर किन सहकारी समितिंंग ना नेतृत्वकारी पद कुनल गुचिह कीयानास्के बद निर्णय एतना बद तरिका पोय्यना इंदाना पोरो ध्यान हियना जरूरी मंता। और सब्बे तोर किन उंदे बेरा बरखास्त कीयानायो। ओरु नेताल बने मायना लेक्का हिल्लेकाई मेहनतकशे मंतोर। हर समस्या ता बारे ते ओरा क्षमता पोरो आधार आसी निर्णय कीयाना। इद मानेय ना व्यवहार पोरो आधार आसी मंता। उचुन खुशहाल मध्यम किसान लोर तम्मा तल गुचना जरूरी मंता बारांकु इत्तेके ओरु तम्मा पद ते मंदाना अनुमति इनपडे हियानायो। मति जनता (उदाहरण तुकू सहकारी समिति सदस्य) किन ओसो खुशहाल मध्यम किसान किन ओरु निज्जमे नेताल बने मायना लेक्का हिल्लेर इंजी स्पष्ट कीयाना। ओसो उंदी शर्त वेने मंता इत्तेके बस्के एवनल तम्मा पद तल गुच्चोर बस्के एवनल सही मानेय ओना जागा एतला तैयार आयोर, ओना जागा एतला

प्रशिक्षित आयोर अस्के एवनल ओरकिन तम्मा पद तल गुचिह कीयानायो। उचुन खुशहाल मध्यम किसान, आत्मालोचना कीयाना ओसो गलतिंग सुधरे कित्ता परेके तम्मा पद ते मंदाला हियाना। उचुन खुशहाल मध्यम किसान लोर कुन उपनेताल ओसो कमेटी सदस्य बने कीयाना। बदे डावुट हिल्वा बेस काम कीसोर मत्तोर किन ओरु खुशहाल मध्यम किसान मत्तेकाई गुचिह कीयानायो। खुशहाल मध्यम किसान संगे धनी किसान लोरा संगे कित्ता लेक्का व्यवहार कीयानायो। ओरु धनी किसान लोर आयोरा। ओरकिन उंदे बेरा बरखास्त कीयानायो। इद समस्या वेल्ले सतर्कता ते हल कीयाना जरूरी मंता। प्रांत ओसो विभिन्न स्थानीय अर्थोरिटी कु पोरो वेहता बचोनो तरिकांग अमल कीयाना लेक्का मंतांगे हिल्लेंग इंजी आल्सना इंजी आपील आशा कीतोमा।

दूसरा पार्टी शाखांग लोप्पा ओसो जनता नडमा निम्न-मध्यम किसान ओसो उच्च-मध्यम किसान रेंडु अलग-अलग सामाजिक श्रेणिंग मंतांग इत्तेके माटु अविन वर्ग विश्लेषण ओसो उंदी बेरा कीतोमा। बारांकु इत्तेके अलग-अलग सामाजिक श्रेणिंग असल ते सहकारी बदलाव पोरो अलग-अलग रुझान लागू कीतांग इंजी स्पष्ट कीयाना। अविना लोप्पटल उचुक श्रेणिंग सक्रिय रुझान पोयंतांग अनि उचुक निष्क्रिय रुझान पोयसी ताकिंतांग, उंदे श्रेणी ता लोकुरा नडमा इदे अंतर मंता। उदाहरण तुकू गरीब किसान लोरा नडमा वेने इंजी सहकारी समितिंग लोप्पा शामिल आयला तैयार हिल्वोरे मंतोरा। इद सच्चाई तुन खुशहाल मध्यम किसान लोर किन प्रभावित कियाला काजे इस्तेमाल कियमूडांता: “हूड़ाटू! गरीब, निम्न-मध्यम किसान लोरा नडमा वेने उचुन निष्क्रिय लोकुर मंतोरा। ओरु लोप्पा वायला आल्सोर अदिन काजे माटु ओरकिन शामिल आयला इन्नोमा। मीटु खुशहाल मध्यम किसान लोर वेने इंजे लोप्पा वायला तैयार हिल्वेके मीटु वेने बाहर मंदाना परंतिरा।” माटु मुन्ने शामिल आयला तैयार मत्तोर किन शामिल कीयाना। पेरके दूसरा ग्रुप ता लोकुर नडमा बस्के एवनल सहकारी समितिंग लोप्पा शामिल आयला आल्सोर अस्के एवनल प्रचार काम कीसोर मंदाना ताना पेरके तीसरा ग्रुप नडमा प्रचार काम कीयाना। इद

काम मंजिल-दर-मंजिल ओसो अलग-अलग ग्रुप कुना लोप्पा कीयाना। टाईम वात्तास्के सब्बे तोर सहकारी समितिग लोप्पा शामिल आंतोरा अदिन काजे इद वर्ग विश्लेषण ओसो उंदी बेरा कीयाना सवाल हिल्ले।

तीसरा, जर्मीदार ओसो धनी किसान लोरा सहकारी समितिग लोप्पा शामिल आयना बारे ते माटु इद तरीका पोय्यना: श्यांग, काउंटी तुन इकाई मानेमायना (सिर्फ काउंटी तुने इकाई मानेमायना हालो, बारांकु इत्तेके काउंटी बुनियादी रूप ते सहकारी बदलाव ता काम पूरा कीसी मंदिता मति अदिना उचुक श्यांग कुना लोप्पा उंदी वेने सहकारी समिति हिल्ला संभावना वेने मंदिता)। बदे काउंटी ओसो श्यांग बुनियादी रूप ते सहकारी बदलाव काम पूरा कीतेके इत्तेके 70-80 प्रतिशत किसान परिवार सहकारी समितिग लोप्पा शामिल आतेके सुदृढ़ आता सहकारी समितिग जर्मीदार ओसो धनी किसान लोरा व्यवहार हूडसी, अलग-अलग ग्रुप ओसो मंजिल-दर-मंजिल काम शुरू कीयाना। बोना रिकार्ड बेस मंता, ईमानदार, कानून ता पालन कींतोर ओरकिन सहकारी समितिग ना सदस्यता हियाना। उंदी दूसरा रकम ता लोकुर सहकारी समितिग ना सदस्य हिल्लेकाई, सिर्फ समीक्षाते मंदना सदस्य लेक्क मंजी सामूहिक श्रम ते शामिल आया परितोर तम्मा हिस्सा ता रोजी दोरकी किया परितोर। ओरा व्यवहार बेस मत्तेके ओरु वेने सदस्य बनेमाया परितोम, इद्रम ओरा प्रगति ता हरीं तेरियसी मंदिता। तीसरा ग्रुप ता लोकुर इंजे सहकारी समितिग लोप्पा शामिल आयना अनुमति हिल्ले। इद सवाल तुन पेरके अलग-अलग हल कियमूडायरा। सहकारी समितिग लोप्पा शामिल कित्ता जर्मीदार धनी किसान किन पदाधिकारी बने कीयानायो। जांच पड़ताल कित्ता जर्मीदार, धनी किसान लोरा परिवार ता शिक्षित नौजवान लोर किन नाहकुना लोप्पा साक्षरता काम सौंपे कीयाना। बाकी बुद्धिजीविर कम मत्ता जागा ते पाटी शाखांग ओसो सहकारी समितिग ना मैनेजमेंट कमेटी ना नेतृत्व, निरीक्षण लोप्पा ओरकिन साक्षरता-शिक्षक काम हियाना। इंजे प्राइमरी स्कूल ता टीचर लोरा लोप्पा जवान लोरा संख्या वेल्ले कम मंता। जर्मीदार, धनी किसान लोरा परिवार ता वीर नौजवान सिर्फ 17-18 साल उम्र तोरे मंतोर

अनि ओरु प्राइमरी लेवेके जूनियर मिडिल स्कूल ता पढ़ाई इंजे-इंजे ने पूरा कित्तोर। नन्ना ओरकिन साक्षरता-शिक्षक लेक्का काम हियवेके ओरो पोरो सख्त रुझान पोयता लेक्का आंता। माटु ओरकिन किसान लोर किन पढ़ेमायला-रासला करहना, अनपढ़ता दूर कीयाना काम ते वाटा परितोमा मीटु इद्रम आया परिता परवो इंजी आल्साटु ओरकिन हिसाब-किताब तासना लेक्का काम हियाना खतरनाक साबित आंता।

चौथा, नावा हिसाब ते उन्नत स्तर ता सहकारी समितिग ना स्थापना ता परिस्थितिग ना अध्ययन कीयाना, अनि इविना बारे ते वायना साल ते इविना पोरो विचार-विमर्श कियाकाल इंतोमा अलग-अलग स्थानीय अथॉरिटी कुना लोप्पा अविना परिस्थितिग ना अनुसार निर्णय कियमूडायरा संक्षिप्त ते इद्रम ता सहकारी समितिग सिर्फ अनुकूल परिस्थितिग मत्ता जागा नेये स्थापना कियमूडंता, बाकी जागा ने आयो, मीटु शुरु ते सिर्फ उचुन सहकारी समितिग ना स्थापना कीयाना अनि पेरेके तीरम-तीरम अविना संख्या बेरसी कीसोर दायना।

पांचवी, मुन्नेटल उचुक इलाकांग लोप्पा कीसोर मत्ता लेक्का हर साल सहकारी समितिग ना स्थापना सिर्फ हिरंगम, वसंत तेने आयवा उचुक सहकारी समितिग ना स्थापना एद्दी ओसो शरद ऋतु ते वेने स्थापना कीयाना। मति रेंडु लहर कुना नड़मा आराम, सुदृढीकरण काजे उंदी घाटुम मंदाना जरूरी मंता अनि सहकारी समितिग ना उंजी समूह ता स्थापना आता पेरेके बाकी सहकारी समितिग ना स्थापना तुकू मुन्ने जांच पड़ताल, सुदृढीकरण काम कीयाना। इद युद्ध भूमि लोप्पा लड़ाईंग लड़ेमायना लेक्का मंता। रेंडु लड़ाईंग ना नड़मा आराम, सुदृढीकरण आयना। इद्रम कीवेके, घाटुम हिल्वेके ओसो नेस्कला काजे रोमवेके वेल्ल गलत आयरा बदे वेने सेना लोप्पा आराम, सुदृढीकरण लेवेके वेने काम ताका परिता इंदाना विचार मंता। मति नेस्कला टाईम हियाना जरूरी मंता, पूरा टाईम कूल कीसोर मंदाना, पूरा टाईम लड़ेमासोर दायना निज्जमे संभव हिल्ले। मानेय काजे हुस्कड़ पूरा कीयाना जरूरी मंता। मावा नेटा सभा तुन मारिह कियवा लेवा लगातार आखरी एवनल ताकिह कीतेके नाकिन पोयसी हर

मानेय इदिना विरोध कियानूर। मानेय रोज वेल्ले जोम ओराम, सुदृढीकरण ता जरूरत मंदिता (7-8 घंटा लेवेके कम से कम 5-6 घंटा हुस्कड़ जरूर पूरा कीयाना) तीना लोप्पा पिय्यल उचुन-उचुन जोम बचोनो बेरा आराम कीयाना वेने शामिल मंता। सहकारी समितिंग ना स्थापना काम लोप्पा आराम-सुदृढीकरण कीयाना जरूरत हिल्ले इंदानदु वेल्ले अंगडम पोल्लो मंता। इद्रम कीयाना वेल्ले महत्वपूर्ण मंता।

छठवी, “सहकारी समितिंग कुन परिश्रम, अर्थ व्यवस्था संगे ताकना” नारा उंदी बेसता नारा मंता। इद नारा बुनियादी स्तर ता लोकु पेश कीतांद मत्ता। सख्ती ते बचे कीयाना अमल कायना ओसो फिजूल खर्च खिलाफ संघर्ष कीयाना जरूरी मंता। इंजे शहर ओसो नाहकुना लोप्पा फिजूलखर्ची खिलाफ उंदी जोरदार अभियान ताका मंता। माटु मना परिवार ताकी कियाला, मना सहकारी समितिंग ताकी कियाला ओसो मना देश ता निर्माण कियाला, परिश्रम, आर्थिक व्यवस्था संगे काम कीयाना विचार तुन प्रोत्साहन हियाना जरूरी मंता। मावा राष्ट्र काजे मुन्ने परिश्रम ओसो आर्थिक व्यवस्था जरूरी मंता: माटु आलसी ओसो राजाल लेक्का खर्च कीयाना तुक बचेमायना। कोडही नुकसान बगिल ओंता। सहकारी समितिंग किन परिश्रम, आर्थिक व्यवस्था संगे ताकला काजे श्रम-उत्पादकता बेरसी कीयाना सख्त बचत कीयाना, उत्पादन ता लागत घटे कीयाना, आर्थिक लेखा-जोखा पद्धति लागू कीयाना, शाहखर्ची (राजा लेक्का खर्च कीयाना), फिजूलखर्ची खिलाफ संघर्ष कीयाना जरूरी मंता। सब्बे सहकारी समितिंग तन्ना श्रम-उत्पादकता तुन बेरसी कीयाना अनि उत्पादन लागत तुन घटे कीयाना। आर्थिक लेखा-जोखा तुन तीरम-तीरम लागू कियमूडांता। बद्रम-बद्रम सहकारी समितिंग बेरससोर दायनुंग अनि आर्थिक लेखा-जोखा नियम लागू कियवा लेवा काम ताका परवो। इद काम तीरम-तीरम करियना जरूरी मंता।

सातवी, राष्ट्रीय फार्म कुना बारे ते बोरे वेने बाताले वडकोर इद अधिवेशन ता इंद उंदी कमी मत्ता। केंद्रीय कमेटी, नाहकुना कार्य विभाग,

कृषि मंत्रालय इद सवाल ता अध्ययन कियानुंग इंजी आशा कीताना वायना कालम ते राष्ट्रीय फार्मकु वेने हर साल बेरससोर दायर।

आठवी, माटु हान शोविनिज्म ता लगातार विरोध कीयाना जरूरी मंता। इद उंदी रकम ता पूंजीवादी विचारधारा आंदू हान जाति ता लोकुरा संख्या वेल्ले मत्तांकु अल्पसंख्यक राष्ट्रीयतांग कुन सुडला हूडताद मंता ओरा वेल्ले जीवा कीसी मदद कीयाना। अदिन काजे माटु हान शोविनिज्म खिलाफ दृढ़ता ते संघर्ष कीसोर मंदाना। स्वाभाविक रूप ते अल्पसंख्यक राष्ट्रीयतांग लोप्पा वेने संकीर्ण राष्ट्रवाद वाया परिंता, अदिना वेने विरोध कीयाना। मति इव रेंडासी ना लोप्पा मुख्य वस्तु हान शोविनिज्मे आंदू इदिना मुन्ने वेने विरोध आता। हान राष्ट्रीयता कामरेड्स सही रुझान पोयसोर मतेके अल्पसंख्यक राष्ट्रीयतांग संगे न्यायोचित व्यवहार कीसोर मंदाकोम अस्के एवनल ओरु लागू कीयाना राष्ट्रीयता नीति ओसो राष्ट्रीयता संबंध कुना बारे ते ओरा रुझान पूर्ण रूप ते मार्क्सवादी मंदिता अनि पूंजीवादी दृष्टीकोण ते आयो, इत्तेके बस्के एवनल ओरु हान शोविनिज्म तल मुक्त मंदानूर अस्के एवनल अल्पसंख्यक राष्ट्रीयतांग नडमा संकीर्ण राष्ट्रवादी दृष्टीकोण पोरो काबू कीयाना हल्को आयार। इंजे वेल्ले हान शोविनिज्म इंजे वेने मंता। उदाहरण तुकू अल्पसंख्यक राष्ट्रीयतांग पोरो एकाधिकार कीयाना, ओरा रीति-रिवाज, तरिकांग ना सम्मान कियवा मंदाना, घमंडी मंदाना, अल्पसंख्यक राष्ट्रीयतांग कुन सुडला हूडना अनि ओरु पेरके अरता लोकुर इंदाना। हत्ता मार्च महीना ते मावा पार्टी ता राष्ट्रीय सम्मेलन लोप्पा नन्ना चीन ता काम मना अल्पसंख्यक राष्ट्रीयतांग लेवा ताका परवो इत्ताना। चीन लोप्पा बीसियों लाख अल्पसंख्यक राष्ट्रीयतांग मंतांग। बव इलाकांग लोप्पा अल्पसंख्यक राष्ट्रीयतांग मत्ता इलाकांग हान राष्ट्रीयतांग मंदाना ओसो अलग-अलग रकम ता भौतिक सम्पति संगे सम्पन्न मत्ता इलाका तुकू बेहरा मंतांग। अल्पसंख्यक राष्ट्रीयतांग ना आर्थिक व्यवस्था लेवा मना राष्ट्रीय अर्थव्यवस्था ता काम ताका परवो।

नौवी, अनपढ़ता दूर कीयाना आंदोलन तुन जारी तासना बेस आयार। उचुक जागा ने इद आंदोलन तुन खत्म किताद मंता। इद बेस आयो। सहकारी बदलाव आयनास्के अनपढ़ता तुन खत्म कीयाना आंदोलन तुन आयो।

दसवी, उचुन मुल “वामपंथी” ओसो दक्षिणपंथी भटकाव इत्तेके बाताल? माटु बचोनो बेरा मुन्ने वेने हर वस्तु देश-कालम लोप्पा गतिशील मंदिता इंजी वेहतोमा। माटु मुख्य रूप ते कालम सवाल पोरो विचार कीयाना। वस्तु ता गति ता बारे ते मीवा आकलन असल परिस्थिति संगे मेल तिनेवेके, टाईम तुकू मुन्ने निर्णय “वामपंथी” भटकाव इंतोम अनि टाईम तुकू पेरके दायना निर्णय दक्षिणपंथी भटकाव आंदू। उदाहरण तुकू सहकारी आंदोलन तुने हूडाटू। जनता लोप्पा जोश मंता, आपसी सहयोग दल व्यापक रूप ते मंतांग अनि पार्टी ता नेतृत्व मंदाना लेक्कटा परिस्थितिंग अनुकूल मंतांग मति उचुन कामरेड्स मानेमायला तैयार हिल्लेरा। नेंडु सहकारी आंदोलन ता बेहरा स्तर ते विकास कीयाना (बचोनो साल मुन्ने आयवे इंजेने) संभव आता। मति ओरु संभव हिल्ले इंतोरा। इद दक्षिणपंथी भटकाव आंदू। दूसरा बगिल किसान लोरा राजनीतिक चेतना स्तर ओसो पार्टी नेतृत्व बद परिस्थितिंग इंजे अनुकूल आताद हिल्लास्के पूरा राष्ट्र ता 80 प्रतिशत हिस्सा कम टाईम तेने सहकारिता हरीं पोय्यना, इंजी “वामपंथी” भटकाव आंदू। चीन लोप्पा पाड़ना पीटो: “तरबूज पंडतास्के टोंडा तल देगसी अरिंता” अनि “एर पोंगना जागा ते हिल्ला बनेमांता।” माटु ठोस परिस्थितिंग ना अनुसार काम कीयाना अनि मना उद्देश्य तुन स्वाभाविक रूप ते दोरकी कीयाना, जोर-जबरदस्ती आयो। पिल्ला पुट्टना उदाहरणे हूडाटू। इदिना काजे नौ महिनांग टाईम लागिंता। डाक्टर सात महिनांग लोप्पाने पोट्टा तल पिल्ला जबरदस्ती तेंडतेके बेस आयो आयर, इदु “वामपंथी” भटकाव आंदू। दूसरा बगिल नौ महिनांग पूरा आतांग अनि बाहर वायला काजे तैयार मंता मति अदिन बाहर वायना अनुमति हियवा मंदानादु दक्षिणपंथी भटकाव आंदू। संक्षिप्त ते हर वस्तु सही टाईम तेने गतिशील आंता। बदे काम कीयाना सही टाईम वात्ता इत्तेके

अद काम जरूर कियाना। बदे काम टाईम तुकू मुन्ने जबरदस्ती कीयानादु
“वामपंथी” भटकाव इंतोरा।

ग्यारहवी, उचुन मुल “वामपंथी” भटकाव वाले गलतिंग आयना संभावना हिल्ले? इंजी पूछेमांतोरा। मावा जवाब इदिना पूरा संभावना मंता इंजी मंता। बदे जागा ता नेतृत्व, श्यांग ता पार्टी शाखा आई, जिला, काउंटी, प्रिफेक्चर लेवेके प्रांत ता पार्टी कमेटी, जनता ना राजनीतिक चेतना स्तर ओसो आपसी सहयोग दल कुना विकास ता मंजिल पोरो ध्यान हीवो, अद योजनांग बने कीयाना, नियंत्रण तासना, सहकारी समितिंग कुन मंजिल-दर-मंजिल ओसो समूह लोप्पा स्थापित कियवा लेवा सिर्फ मात्रा पोरो ध्यान हींता गुण पोरो आयो इत्तेके अदु गंभीर “वामपंथी” भटकाव वाले गलतिंग आयना अनिवार्य मंता। जनता नडमा जोश वासोर मंता, हर मानेय सहकारी समितिंग लोप्पा शामिल आयला आल्सा मंतोर अस्के हर रकम ता मुशिकल, हर संभव प्रतिकूल परिस्थितिंग ना आंकलन कीयाना, अविना बारे ते जनता तुन स्पष्ट रूप ते वेहाना अनि अविना पोरो जनता तुन पूर्ण रूप ते आल्सला हियाना। ओरा लोप्पा वेरीं हिल्वेके ओरु शामिल आया परितोर अनि वेरीं मत्तेके ओरु शामिल आयनायो। बदे डावुट हिल्वा माटु ओरकिन वेरिहचसी पूंडनायो। नन्ना मीकिन वेरिहची पूंडोन, बारांकु इत्तेके माटु इचोन दिव्यानल अधिवेशन ताकी किया मंतोम। लोकुरा दिमाग ते सही टाईम ते शांत कीयाना जरूरी मंता। इद्रम कीतेके ओरा मानसिक संतुलम सही मंदिता।

वेल्ले आल्सना ओसो वेल्ले रोक, नियम-विनियम कुना माटु विरोध कीतोम। इत्तेके माटु उचुन वेने आल्सनायो इंजी आयो। मावा काजे बदे रोक मंदानायो, बदे नीति-नियम मंदानायो इंजी आयो। जरूरत अनुसार आल्सना, जरूरी नीति-नियमकु वेने मंदाना जरूरत मंता। रोम लेवा, उचुक नीति-नियमकु लेवा माटु मना काम ताकी किया परवोम। अदिन काजे जरूरत मत्ताचोन आल्सना, रोक, नीति-नियम ओसो विराम, घाटुम मंदाना ओसो जरूरी ब्रेक, रोक मंदना सही मंता।

लोकुर अंहकारी ओसो घमंडी बनेमांतोर अस्के ओरकिन पूना काम सौंपे कीयाना (उदाहरण तकू, इंजे माटु काम ता गुण पोरो ध्यान हियाना इंजी प्रस्ताव तासतोम अनि वायना साल ते मीटु इगा वासी काम ता गुण तुलना आयार। अस्के एवनल परिमाण ता सवाल गौण बने मासी मंदियर) अनि ओरकिन अंहकार कीयाना मौका दोरको आयर बारांकु इत्तेके ओरगा टाईमें मन्नो आयार। माटु इद तरीका मुन्ने वेने लागू कीतोम। बदे फौजी यूनिट बदे लड़ाई लोप्पो जीत दोरकी कींता अनि अद यूनिट ता कामरेड्स ता हेरे-गरे तल्ले तेहची अदिना चर्चा कींतोर अनि सफलता ता संगे होचिस मंतोर, अस्के ओरकिन उंदी पूना काम सौंपे कीयाना- बदे दूसरा लड़ाई लड़ेमायना काम सौंपे कीयाना। बारांकु इत्तेके बदे पूना काम सौंपे कीतेके ओरकिन इदिना संबंधित समस्यांग पोरो विचार किया लागिंता, तैयारिग कीयाना लागिंता अदिन काजे अंहकारी ओसो सफलता संगे होचना टाईम दोरको आंता।

बारहवी, उचुन कामरेड्स 10 प्रतिशत घटे कीयाना बेरसी कीयाना अधिकार काउंटी स्तर तुन हियाना इंजी सुझाव हितोर। सहकारी समितिग ना स्थापनी कित्ता लेक्का। अविन संख्या 10 प्रतिशत कम लेवेके 10 प्रतिशत ज्यादा मंदाना परिंता। नावा हिसाब ते इद सुझाव तुन स्वीकार कियमूडांता। इद उंदी वेल्ले बेसत सुझाव आंदू, वस्तु तुन वेल्ले ज्यादा गैर-लचीला मंदानायो। मीटु इदिना पोरो आल्साटू।

तेरहवी, मावा निर्णय तुन पलटे कीयाना पोरो जोर हियानोर वेने मंतोरा? हिल्ले, इद्रमतोर कम मंतोर। ओरु सहकारी समितिग बेकार साबित आंतांग इंजी आल्संतोर। माटु बाता कीयाना मंतोम अविन पेरके पलटे कियमूडायर, माटु मार्क्सवादी आयवा अवसरवादीर आंदोम। मति नावा हिसाब ते आम रुझान तुन हूडतेके इद निर्णय अपरिवर्तनीय मंता।

चौदहवी, उचुम मुल, वायना कालम ते बद रुझान मंदिंता। लगभग 3 पंचवर्षीय योजनांग ना टाईम ते समाजवादी औद्योगीकरण तुन, कृषि, दस्तकारी ओसो पूंजीवादी उद्योग-वाणिज्य समाजवादी बदलाव तुन बुनियादी रूप ते पूरा कीयाना रुझान मंदिंता। नावा हिसाब ते इदे रुझान

मंदिता। इदे आयवा तीना लोप्पा ओसो उंदी पोल्लो जोड़े कियमूडांता इदिना चर्चा नन्ना पार्टी ता मुन्नेटा सम्मेलन लोप्पा किताद मत्ता: लगभग 50 तुकू तल 75 साल टाईम इत्तेके 10 तल 15 पंचवर्षीय योजनांग ना टाईम ते माटु चीन तुन उंदी शक्तिशाली समाजवादी देश बने किया परितोमा।

50-75 साल ता इद टाईम ते माटु जरूर देश-विदेश ते ओसो पार्टी लोप्पा बचोनो गंभीर, जटिल मुठभेड़, सघर्ष कुना सामना किया लागियर, बचोनो कठिन परिस्थितिंग ना सामना किया लागियर। मावा अनुभव ते माकिन इंजे एवनल बचोन सशस्त्र, शांतिपूर्ण, रक्तपातपूर्ण, रक्तपातहीन मुठभेड़ कुना सामना किया लागता। अदिन काजे वायना कालम ते मुठभेड़कु कम आयवा वेल्ले आयनुंग इंजी गारंटी किंतोमा। इविन लोप्पा विश्वयुद्ध शुरू आयना, परमाणु बम एस्सना, बेरया, काओ कांग, चांग क्वो-थाओ ओसो छन तू-श्यू लेक्काटोरा उदय आयना शामिल मंता। वेल्ले पोल्लोना बारे आंकलन किया परवा लेक्का वेने मंता। मति माटु मार्क्सवादीर सब्बे कठिन परिस्थितिंग पोरो काबू किया परमूडांता अनि उंदी शक्तिशाली समाजवादी चीन ता उदय जरूर आयार इंजी आल्सिंतोमा इद्रम आयना जरूरी मंता या? इत्तेके इंगो, इद्रम आयना जरूरी मंता। मार्क्सवादी अनुसार इद्रम जरूर आयार। पूंजीपति वर्ग तन्ना गुमिय तरवनोर किन तैयार किता। इद वर्ग ता गुमिया तैयार आता।

पंद्रहवी, मीटु रेंडु दस्तवेजकु (प्रस्ताव ओसो नीति-नियमकु) लोप्पा संशोधन कीयाना बारे ते बचोनो सुझाव पेश कीतिर। वेल्ले बेस आता। माटु मीवा सुझाव कुना पोरो आल्साकोम स्वीकार आता प्रस्ताव कुना उचुन दिव्या पेरके राजनीतिक ब्यूरो संशोधन ओसो प्रकाशित कियमूडायर। नीति-नियम कुना संशोधन, प्रकाशन लोप्पा उचुन टाईम लागियर। लोकुर मानेमाता जनवादी लोकुरा सालह-मशविरा एता लागियर, कानून ता पालन किया लागियर। अनिवार्य भर्ती बिल लेक्का नीति-नियम कुन मुन्ने राष्ट्रीय जन प्रतिनिधि सभा ता स्थाई समिति मुन्ने पेश कीयाना अनि राय एतला काजे अविन राज्य-परिषद तुकू लोहना।

अस्थाई रूप ते उचुन जोम काजे स्थानीय अर्थोरिटी लोप्पा वायना साल राष्ट्रीय जन प्रतिनिधि सभा मुन्ने पेश कीयाना जोम नीति-नियम कुना लेक्का लागू कियमूड़ायो।

आखरी ते मीटु मीवा लेखन पोरो ध्यान हियाना इंजी आशा कींताना। इगा मत्ता सब्बे लोकर “निबंध-लेखन ता अध्यापक” बनेमायनूर। मीटु मुन्ने वेने लेख रास्ताद मंता मति अविना लोप्पा उचुक गलतिंग मंतांग। मीटु दूसरोरा लेखन-शैली ते सुधार कियाला मदद हियाना पोरो ध्यान हियाना। इस्साल बचोनो कामरेड्स रास्ता लेख कुना लोप्पाटल उचुन लेख वेल्ले लम्बा ओसो सारहीन मंतांग, मति अविना संख्या वेल्ले कम मंताः अविना लोप्पा मुख्य गलतिंग क्लासिकी चीनी शब्दावली ता जरूरत तुकू ज्याद इस्तेमाल आता अनि प्राचीन भाषा, आधुनिक भाषा ता संगे-संगे इस्तेमालल कीयाना शैली वेल्ले कम लागू आता। लेख रासनास्के माटु तर्कशक्ति पोरो ध्यान हियाना। इत्तेके माटु बदे वेने लेख लेवेके भाषण ता पूरा ढांचा पोरो ध्यान हियाना अनि शुरूआत, नडमा, ओसो आखरी नडमा उंदी रकम ता संबंध, उंदी रकम ता आंतरिक संबंध बने कीयाना अनि इव मूंडासी ना नडमा अर्थ हिल्वा लेक्का आयला हियानायो। माटु व्याकरण ता नियम ता पालन कीयाना वेने जरूरी मंता। वेल्ले कामरेड्स वाक्य ता कर्ता ओसो कर्म तुन जरूरी हिल्ले इंजी विडसिंतोर अनि क्रिया-विशेषण कुन क्रिया लेक्का इस्तेमाल कींतोर, बस्के-बस्के क्रिया तुन वेने विडसिंतोर। इद्रम कीयाना सब्बे व्याकरण नियम कुना उल्लंघन आंदू। अलंकारपूर्ण शैली, सजीव लेखन-शैली बगिल ध्यान हियाना जरूरी मंता। संक्षिप्त ते तर्कशक्ति, व्याकरण ता नियम कुना पालन ओसो अलंकारपूर्ण शैली- इव मूंडासी ना पोरो मीटु लेखन कार्य कीयानास्के ध्यान हियाना।

नोट

- 1) वी. आई, लेनिन, “माल रूप ते टैक्स”।
- 2) इगा कामरेड माओ त्सेतुंग संकलित “कृषि-उत्पादन सहकारी समितिंग कुन बद्रम ताकी कीयाना” पोरोल ता लेख ता बारे ते वेहताद मंता। इदिन ओरु

विभिन्न जागा ने कृषि-सहकारिता बारे ते लोहता रिपोर्ट कुन पद्देमाता पेरेके रास्तोर। “चीन ता नाहकुना लोप्पा समाजवादी उभार” ता प्रस्ताव हूड्डा।

- 3) चीन ता क्लासिकी उपन्यास “दा वाटर मार्जिन” लोप्पा किसान विद्रोहीर ल्यांगशान मेड्रा पोरो कब्जा कित्ता पेरेके वांगलुन(वीना दूसरा पोरो “सफेदपोश स्कालर” मंता) विद्रोहिरा मुखियाल बनेमातोर अनि मुखियाले मंदाला आल्सतोर। राजधानी गैरिजन ता मुख्य प्रशिक्षक लिन छुंग मजबूर आसी अधिकारिरा खिलाफ बगावत कींतोर अनि ल्यांग शान मेड्रा पोरो डेरा वार्तितोर। अस्के वांग लुन मुन्ने ओनकि बाहर तेंडना कोशिश कींतोर अनि पेरेके बचोनो बाधांग वार्तितोर। पेरेके ओरु विद्रोही किसान नेताल छाओ काए ओसो ओना संगे तोर किन ल्यांगशान मेड्रा ता विद्रोहिरा संगे कलियना अनुमति हियाला इनकार कित्तोर। लिन छुंग आखरी ते वांग लुन किन हौकतोर।
- 4) वी.आई. लेनिन, “माल ता रूप ते टैक्स”।

“चीन ता नाहकुना लोप्पा समाजवादी उभार”

ता प्रस्तावकु

सितम्बर ओसो दिसम्बर 1955

प्रस्ताव 1

25 सितम्बर 1955

पूँजीवाद तल समाजवाद लोप्पा दायनास्के चीनी कम्युनिस्ट पार्टी ता आम कार्यदिशा, चीन ता औद्योगिकरण, कृषि, दस्तकारी, पूँजीवादी उद्योग-वाणिज्य ता समाजावादी बदलाव तुन बुनियादी रूप ते पूरा कीयाना मत्ता। इद संक्रमण कालम ठोस रूप ते 18 साल मंदिता इत्तेके 3 साल ता पुनस्थापना कालम ओसो 3 पंचवर्षीय योजनांग ना कालम। पोरोटल हूडतेके आम कार्यदिशा ता इद प्रस्ताव ता बारे ओसो अस्केटा टाईम तय कीयाना बारे ते मावा पार्टी ता राय उंदी मत्ता लेक्का दिसिंता मति असल ते इदिना लोप्पा वेल्ले मतभेदकु मंतांग। इंजे मुख्य रूप ते कृषि ता समाजवादी बदलाव इत्तेके कृषि - सहकारिता ता सवाल बारे ते वाया मंतांग।

उचुन मुल किन हत्ता उचुक साल कुनल कृषि-सहकारिता लोप्पा उंदी ठोस नियम लागू आसोर मत्तादू दिसिंता। इत्तेके हिरंगम ते अविना विस्तार बेरसी क्रियमुडांता आंता अनि वसंत ते उचुन मुल दुस्साहस संगे मुन्ने दायना तुकू विरोध कींतोर इंतोर। इद पोल्लो ता कारण वेने मंता, बारांकु इत्तेके ओरु बचोनो बेरा दुस्साहस संगे मुन्ने दायना कार्यवाही ता विरोध आसोर मत्तादू हूडतोर। उदाहरण तुकू 1952 ता हिरंगम ते कृषि-सहकारित ता विस्तार किताद मंता मति 1953 ता वसंत ते अदिन

दुस्साहस संगे मुन्ने दायना पोरोल हीसी विरोध कित्तोर। 1954 ता हिरंगम ते ओसो उंदीबेरा अदिना विस्तार किताद मंता मति वायना साल वसंत ते ओसो उंदी बेरा दुस्साहस संगे मुन्ने दायना पोरोल हीसी अदिन विरोधी कित्तोर। दुस्साहस संगे मुन्ने दायना कार्यवाही ता विरोध कीयाना इत्तेके कृषि-सहकारिता ता विस्तार पूरा रोमी कीयानाए आयवा इंजे एवनल बेहरा संख्या ते स्थापना कित्ता सहकारी समितिंग ना जबरन “भंग” कीयाना आंता। इद्रम कार्यकर्ता लोर ओसो किसान लोरा नडमा निराशा फैलमांता। उचुन किसान लोर वेल्ले होंग आंतोर अनि तिंदना-उंडना विड़सिंतोर, कटुल पोरो हुंजिसीए मंतोर, लेवेके 10-12 दिव्यांग काम कियाला हन्नोर आंतोर। ओरु “मीटे माकिन सहकारी समितिंग स्थापना कियाला वेहतिर अनि इंजे मीटे माकिन अविन भंग कियाला वेहा मंतिर इंतोर।” सहकारी समितिंग भंग आतेके खुशहाल मध्यम किसान खुश आयनुर, मति गरीब किसान वेल्ले दुःखी आयनुर। कृषि-सहकारी ता विस्तार रोमी कीयाना लेवेके सहकारी समितिंग कुन भंग कीयाना खबर हुपे प्रांत ता गरीब किसान लोरगा एवेतेके “ओरा जोश शांत आया” मति उचुन मध्यम किसान लोर “इद मूलान मेड्डा ता तीर्थयात्रा कीयाना लेक्का मंता” इत्तोर। (हुपे प्रांत ता ह्वांगफी काउंटी लोप्पा मत्ता मूलाने मेड्डा पोरो मूलान मंदिर मंता, अदिन किसान लोर तम्मा तीर्थस्थल मानेमांतोर)।

उचुन कामरेड्स बारांकु दुलमुल आया मंतोर, अनि इदिन ज्यादातर लोकरु गैर जरूरी समझेमांतोर? बारांकु इत्तेके ओरु उचुन मध्यम किसान लोरा प्रभाव ते वात्तोर। सहकारी आंदोलन ता शुरूआत ते उचुन मध्यम किसान, खासकर पूंजीवाद बगिल दायना ज्यादा संभावना मत्ता खुशहाल मध्यम किसान लोर समाजवादी बदलाव बगिल दायला तैयार हिल्ला मत्तोर। सहकारी आंदोलन लोप्पा मध्यम किसान लोरा बारे ते पार्टी ता नीति ओसो काम कीयाना तरीका महत्वपूर्ण मंता। वेल्ले मध्यम किसान, मुख्य रूप ते वेल्ले खुशहाल हिल्ला, राजनीतिक चेतना स्तर बेरसता पूना ओसो पाड़ना निम्न-मध्यम किसान लोर सहकारी समितिंग लोप्पा शामिल आयला आल्सिंतोर। इद्रम ता परिस्थिति ते माटु गरीब किसान, मध्यम

किसान लोरा काजे फायदा मत्ता ओसो मावा काम कीयाना तरीका मंदाना नीति अमल कीयाना। मति माटु इद नीति पोरो अमल कीतेके वेने मध्यम किसान इंजे सहकारी समितिंग नल बाहर मंदाला लेवेके “रेंडु-मूंड साल काजे मुक्त” मंदाला वेने आल्सानू। इद पूरा पोल्लो समझेमांता बारांकु इत्तेके सहकारिता इत्तेके किसान लोरा उत्पादन साधन कुना निजी मालिकाना ओसो मैनेजमेंट तरीका लोप्पा बदलाव कीयाना, ओरा काजे इद बुनियादी बदलाव मंदिता। अदिन काजे इदिना पोरो वेल्ले सतर्कता ते विचार कीयाना अनि उचुन जोम काजे निर्णय कियाला वायना मुशिकल कुना अनुभव कीयाना। मावा उचुन कामरेड्स पार्टी ता नीति ओसो अदिना काम ता तरीका अनुसार समस्यांग किन हल कियाला असफल आतोर अनि ओरकिन खुशहाल मध्यम किसान लोरा शिकायत ओसो मावा काम ता उचुक गलतिंग ना सामना किया लागता। आस्के ओरु वेल्ले होंग आतोर अनि “दुस्साहस संगे मुन्ने दायना” खिलाफ कोल्हार पोयना शुरू कित्तोर, ओरु सहकारी समितिंग कुन तम्मा विचार वात्ता लेक्का “भंग” कित्तोर। मति परिस्थिति असल इत्तेके इद्रम हिल्वा मत्ता। मावा काम लोप्पा कमजोरिंग जरूर मत्तांग मति आंदोलन कुल मिले कीसी बेसे ताकसोर मत्ता। गरीब, निम्न-मध्यम किसान लोरा व्यापक समुदाय सहकारी समितिंग ना स्वागत कींता उचुन मध्यम किसान लोर हरीं हूडला आल्सतेके ओरकिन इद्रम कियाला हियाना। खुशहाल मध्यम किसान लोरा लोप्पा सिर्फ सहकारी समितिंग लोप्पा तम्मा विचार ते शामिल आयला आल्सानोर किन विड़चिसी बाकी तोर किन हरीं हूडला आल्सला ओसो वेल्ले टाईम हियाना। इंजे आंदोलन लोप्पा मुख्य कमी वेल्ले जागाने पार्टी नेतृत्व अदिन संगे ताका परवादु मंता। जिम्मेदार कामरेड्स पूरा आंदोलन ता नेतृत्व तन्ना कैद पोय्यतद हिल्ले, ओरगा प्रांत, काउंटी, जिला लेवेके श्यांग काजे बदे नालुंग बगिल ता योजना हिल्ले। इदिना उल्टा ओरु बद काम पोयंतोर अदिन कीयाना रुझान पोय्या मंतोर ओरा लोप्पा पहलकदमी, सक्रियता, जोश, अनुसमर्थन ओसो हायना-पिस्सना कामा कीयाना विचार ता कमी मंता। इद्रम उंदी बेहरा समस्या पुट्टिता।

आंदोलन ता बुनियादी स्तर पोरो व्यापक रूप ते प्रचार आता मति पोरोटा स्तर अदिना पोरो ध्यान हिया परवांकु गड़बड़ आता। इद्रम ता गड़बड़ कुना सामना आतास्के मना कामरेड्स वेल्ले सुदृढ नेतृत्व ओसो सही प्लानिंग ता सहारा एतना जागा ते उंदी नकारात्मक रुझान लागू कींतोर अनि आंदोलन ता प्रगति तुन रोमी कायना कोशिश कींतोर लेवेके वेल्ले जल्दबाजी ते बचोनो सहकारी समितिंंग कुन “भंग” कींतोर। बदे डायुट हिल्वा इद्रम कीयाना गलत मंता अनि इदिनगडल जरूर गड़बड़ पैदा आंता।

“कृषि-उत्पादक सहकारी समितिंंग कुन बद्रम ताकी कीयाना”¹ पोरोल ता उंदी पुस्तक माटु इंजे-इंजे ने तैयार कीतोम। ताना लोप्पा विभिन्न प्रांत, म्युनिसिपलटिंग ओसो स्वायत्त प्रदेश कुना असल उदाहरण शामिल कित्ताद मंता। पुस्तक लोप्पा कुल 120 तुकू ज्यादा लेख मंतांग ज्यादातर सामग्री जनवरी-अगस्त 1955 ते ओसो बाकी सामग्री 1954 ता दूसरा 6 महीनांग संबंधित मंता। ज्यादातर लेख प्रांत, म्युनिसिपलटिंग, स्वायत्त प्रदेशकुना पार्टी प्रकाशन तल पोयतद मंतांग। उचुक लेख समाचार पत्र तल, उचुक पार्टी कमेटिंग लेवेके कार्यकर्ता लोरा उच्च स्तर ता पार्टी कमेटिंग ना मुन्ने पेश कित्ता रिपोर्ट कुना लेक्का मंतांग अनि उंदी लेख सहकारी समिति ना वरोर निर्देशक ना भाषण ता असली रिकार्ड मंता, ओनकिन पेकिंग तल केतद मत्ता। माटु इद सामग्री ता मूल विषय-वस्तु तुन बद्रम मत्ता अद्रमे तासतोम, ताना लोप्पा सिर्फ उचुके शब्द कुना बदलाव कीतोम। उचुक लेख कुना पोरो माटु टिप्पणिंग वेने रास्तोम। मना टिप्पणिंग कुन मूल प्रकाशन ता सम्पादकीय टिप्पणिंग नल अलग क्रियाला काजे मावा टिप्पणिंग कुन “सम्पादक ना टिप्पणी” पोरोल हीताद मंता। मावा हिसाब इगा हीता सामग्री लेखक लोरपेश कित्ता विचार सही ओसो बुनियादी रूप ते सही मत्ता लेक्क मंतांग। इद सामग्री संगे पढेमायनोर देश लोप्पा ताकना सहकारी आंदोलन ता स्तर ओसो दिशा तुन अदिन विकास ता संभावनांग कुन हूडा परितोर। इद सामग्री तले इद आंदोल वेल्ले बेस मंता इंजी समझेमांता। पार्टी कमेटिंग सही मार्गदर्शन क्रियाला असफल

आता जागा ते ने गडबड आता। मति बेगा इद आंदोलन संगे उंदी बेरा अवु ताकतांग अवु पार्टी ता केंद्रीय कमेटी ता नीति अनुसार सही मार्गदर्शन कीयाना शुरू कीतांग अगा समस्या तुरंत हल आता। इद सामग्री वेल्ले प्रभावी मंता। इद इंजे आंदोलन तल निष्क्रिय मत्ता लोकर किन वेने सक्रिय बने कीसिंता। इद इंजे सहकारी समितिंग बद्रम ताकी कीयाना इंजी पुनवा मत्तोरकिन बद्रम ताकी कियमूडांता इंजी करिहिंता। इदे आयवा सहकारी समितिंग कुन विचार वात्ता लेक्का “भंग” कियाला आल्सना लोकर किन वेने रोमी किंता।

दसियों करोड़ किसान लोरा नडमा कृषि ता समाजवादी बदलाव कीयाना असल इत्तेके वेल्ले कठिन काम मंता। इद आंदोलन तुन पूरा देश लोप्पा दीर्घकालीन ताकी कीसोर हिल्लेम, ताना लोप्पा इंजे एवनल दोरकता अनुभव वेल्ले हिल्लेंगा। खासकर माटु पूरा पार्टी लोप्पा इंजे एवनल इदिना लोप्पा व्यापक ओसो प्रभावी प्रचार-काम किताद हिल्ले। अद्रमासी वेल्ले कामरेड्स इद मुद्दा पोरो ध्यान हिया परोवर अनि इद आंदोलन संबंधित उसूल, नीतिंग ओसो तरीकांग कुन समझेमाया परवोरा। अदिन काजे इंजे वेने पार्टी लोप्पा एकीकृत संकल्प ता कमी मंता। इद मुद्दा ता बारे ते वाद-विवाद कियाला काजे मावापार्टी ता केंद्रीय कमेटी ता छठवी पूर्ण अधिवेशन जल्दिए आयार अनि इदिना पोरो उंदी पूना प्रस्ताव स्वीकार आयार। माटु इद प्रस्ताव अनुसार व्यापक ओसो प्रभावी प्रचार-काम शुरू कीयाना अनि पूरा पार्टी लोप्पा एकीकृत संकल्प पैदा कीयाना। इद पुस्तक ता प्रकाशन तल मावा प्रचार-कार्य लोप्पा उचुन सहायता दोरकियार।

प्रस्ताव 2

27 दिसम्बर 1955

इद उंदी स्रोत ग्रन्थ आंदू, इदिना नहाकुना इलाकांग लोप्पा काम कियानोरा काजे तैयार किताद मंता। अदिना काजे उंदी प्रस्ताव² सितम्बर लोप्पा

रास्ताद मंता। इंजे मूंड महीनांग पेरके अद प्रस्ताव पाड़ना आतांकु उंदी पूना प्रस्ताव तैयार किया लागता।

मुन्ने इद पुस्तर तुन रेंडु बेरा सम्पादित किताद मंता, उंदी बेरा सितम्बर ते ओसो दूसरी बेरा दिसम्बर ते। पहली बेरा 121 लेख शामिल किताद मंता। ज्यादातर लेख लोप्पा 1955 ता पहली 6 महिनांग ना परिस्थिति तुन तोहताद मंता अनि उचुक लेख कुना लोप्पा 1954 ता दूसरा 6 महिनांग ना परिस्थिति तुन तोहताद मंता। पुस्तकिंग प्रांतकु, म्युनिसिपलटिंग, स्वायत्त प्रदेश ओसो प्रिफेक्चर कुना पार्टी कमेटिंग ना जिम्मेदार कामरेड्स नडमा ओरा राय एतला काजे तूसताद मत्ता। वीर कामरेड्स 4 तल 11 अक्तूबर 1955 एवनल ताकता चीनी कम्युनिस्ट पार्टी ता सातवी केंद्रीय कमेटी ता छठी पूर्ण अधिवेशन ते शामिल मत्तोर। वीर कामरेड्स इद पुस्तक लोप्पा ओसो उचुक पोल्लो जोड़े कीयाना जरूरत मंता इंजी आल्सतोर। अधिवेशन पेरके ज्यादातर प्रांत, म्युनिसिपलटिंग ओसो स्वायत्त प्रदेश कु उचुन सामग्री लोहता। ताना लोप्पटल ज्यादातर सामग्री 1955 ता दूसरी 6 महीना ना परिस्थिति किन तोहिंता। इद्रम पुस्तक तुन ओसो उंदी बेरा सम्पादित किया लागता। माटु 121 मूल लेख कुना लोप्पाटल 30 लेख तेंडसितोम अनि 91 लेख ताना लोप्पा तासतोम, पूना सामग्री लोप्पाटल 85 लेख चुने कीसी जोड़े किताद मंता अद्रमासी इद पुस्तक लोप्पा कुल 176 लेख-लगभग 9,00,000 शब्द आतांग। इद्रम वर्तमान संकलन तैयार किताद मंता। सम्पादन-कार्य काजे जिम्मेदारी कामरेड्स सब्बे सामग्री तुन पढ़ेमातोर, ताना लोप्पा शाब्दिक बदलाव कितोर, कठिन शब्द कुना बारे ते नोट जोड़े कितोर, अनि विषयानुसार उंदी तालिका वेने तैयार कितोर। इदे आयवा उचुन गलत विचार कुना आलोचना कीयाना लेवेके उचुन सुझाव हियाला माटु वने उचुक लेख कुना लोप्पा मना टिप्पणिंग जोड़े कीतोम। इव टिप्पणिंग ओसो मूल लेख कुना सम्पादकीय टिप्पणिंग नडमा अंतर कियाला काजे मना टिप्पणिंग कुन “सम्पादकीय टिप्पणी” पोरोल हीताद मंता। मना उचुक टिप्पणिंग सितम्बर ते ओसो उचुक टिप्पणिंग दिसम्बर ते रास्ताद मंता, अदिनके इविना अचोन अंतर हिल्ले।

मति इद सिर्फ सामग्री संबंधित समस्याए आयो। 1955 ता दूसरा 6 महिनांग लोप्पा चीन ता परिस्थिति ने बुनियादी बदलाव आता। चीन ता 11 करोड़ किसान परिवार लोप्पटल 7 करोड़ तुकू ज्यादा (60 प्रतिशत तुकू ज्यादा) किसान परिवार चीनी कम्युनिस्ट पार्टी ता केंद्रीय कमेटी ता आह्वान ते इंजे एवनल (दिसम्बर 1955 ता आखरी एवनल) अर्ध-समाजवादी कृषि-उत्पादक सहकारी समितिंग लोप्पा शामिल आतोर। कृषि ता सहकारी बदलाव बारे ते मना जुलाई 1955 ता रिपोर्ट लोप्पा नन्ना सहकारी समितिंग लोप्पा शामिल किसान परिवार कुना संख्या कुल 1,69,00,000 वेहतान। मति उचुके महीना लोप्पा इद संख्या 5 करोड़ तुकू ज्यादा आता। इद उंदी असाधारण घटना मत्ता। इद घटना तले स्पष्ट रूप ते माटु कृषि ता अर्ध-समाजवादी सहकारी बदलाव ता काम बुनियादी रूप ते पूरा कियाला काजे सिर्फ 1956 साल उंदी साले लागिंता इंजी साबित आता। पेरके मूंड लेवेके नालुंग साल लोप्पा इत्तेके 1959 लेवेके 1960 एवनल माटु अर्ध-समाजवादी सहकारी समितिंग ना पूर्ण समाजवादी सहकारी समितिंग लोप्पा बदले कीयाना काम मुख्य रूप ते पूरा कीतोमा। इद घटना तले माटु चीन ता दस्तकारी उद्योग ओसो पूंजीवादी उद्योग-वाणिज्य ता समाजवादी बदलाव योजना तुकू मुन्ने पूरा कीयाना कोशिश कीयाना अनि कृषि ता विकास कीयाना जरूरत कुना पूरा कीयाना। इद घटना तले चीन ता औद्योगिक ओसो अदिना विज्ञान, संस्कृति, शिक्षा, स्वास्थ्य काम लेक्कटवु विकास काम ता स्तर, रफ्तार मुन्ने लेक्का आयवा उचुन बेरसी कीयाना।

कृषि सहकारिता, इंजे तेज आताद मंता या? लेवेके अदिना बेस विकास आया मंता या? अदिना बेस विकास आसोर मंता। हर जागा तल पार्टी संगठन आंदोलन ता चौतरफा नेतृत्व किया मंतोर। किसान लोर आंदोलन लोप्पा हायना-पिस्सना परवाह कियावा वेल्ले बेस काम किया मंतोर। उत्पादन काजे ओरा जोश मोय्योल पोरो एव्वा मंता। व्यापक जना तुन पहली बेरा तम्मा वेहच ते मत्ता पिस्व स्पष्ट दिस्सा मंता। 1967 एवनल 3 पंचवर्षीय योजनांग पूरा आतास्के अनाज ओसो बचोनो फसलकु ना

उत्पादन लोक गणराज्य ता स्थापना तुकू मुन्ने सबसे पोरो मत्ता वार्षिक उत्पादन तुकू दोगुना लेवेके तिगुना आयारा। 7-8 साल लोप्पा अनपढ़ता खत्म आयारा। इंजे लोकुरा काजे वेल्ले नुकसानदायक सिस्टोसोमियासिस लेक्कटा बीमारिंग ना मुकाबला किया परितोमा उंदी पोल्लो ते वेहाना इत्तेके जनता तम्मा पिस्वल वेल्ले वेहच ते मत्तादू हूड़ता।

पूरा पार्टी ओसो जनता ना मुन्ने इंजे कृषि ता समाजवादी बदलाव ता रफ्तार संबंधित दक्षिणपंथी रूढ़ीवादी विचार कुना आलोचना कीयाना समस्या हिल्ले। इद समस्या हल आताद मंता। उंजी पूरा पूंजीवादी उद्योग-वाणिज्य तुन उंदी-उंदी व्यवसाय कीसी संयुक्त राष्ट्रीय-निजी कारोबार कुना लेक्का बदले कीयाना रफ्तार संबंधित समस्या तुन वेने हल कीतद मंता। दस्तकारी उद्योग ता समाजवादी बदलाव ता रफ्तार 1956 ता पहली 6 महिनांग लोप्पा विचार-विमर्श कीयाना अनि इद समस्या तुन वेने हल्कोए हल कीयाना आयारा। नेंडु मत्ता समस्या ता संबंध कृषि उत्पादन संगे मंता। उद्योग ता उत्पादन (राष्ट्रीय उद्योग, संयुक्त राष्ट्रीय-निजी उद्योग ओसो सहकारी उद्योग कुना उत्पादन शामिल मंता) तले मंता। दस्तकारी उद्योग ता उत्पादन तले मंता; उद्योग, संचार, परिवहन लोप्पा पूंजीगत-निर्माण स्तर, अदिना रफ्तार तले मंता; वाणिज्य ता तालमेल अर्थव्यवस्था ता बाकी शाखांग संग स्थापना कीयाना संगे मंता; विज्ञान, संस्कृति, शिक्षा ओसो स्वास्थ्य लेक्कटविना संबंधित काम ता तालमेल मना विभिन्न आर्थिक गतिविधिं ना संगे कीयाना लेक्कटवु मंतांगा। इव सब्बे लोप्पा परिस्थिति तुन सच्चाई तुकू कम हूड़ताद मंता। मना काम तु सम्पूर्ण परिस्थिति ता विकास संगे काल्पतेके इदिना आलोचना कीयाना अनि अद कमजोरी तुन दूर कीयाना जरूरी मंता। लोकुर बदलेमासोर मत्ता परिस्थिति अनुकूल तम्मा विचार कुन ढाले कीसोर मंदाना। बदे डावुट हिल्ला बोरे वेने सच्चाई ता उल्लंघन कीयानायो। योजना असल परिस्थिति संगे तिंजोर मत्तास्के ने बने कीयाना अनि बदे असम्भव काम कीयाना कोशिश कीयानायो। मति नेटा समस्या दक्षिणपंथी रूढ़ीवादी विचार इंजे वेने बचोने जागा ने गड़बड़ कींता अनि मावा काम तुन असल परिस्थिति ता विकास

संगे ताकला हीवो आंता। मेंडु संभव मत्ता काम तुन उचुन मुल असंभव समझेमांतोर इदे नेटा समस्या मंता। अदिन काजे दक्षिणपंथी रूढीवादी विचार कुना निश्चित रूप ते लगातार आलोचना कीयाना जरूरी मंता।

इद पुस्तक नहाकुना इलाका ने काम कीयाना कामरेड्स ना काजे तैयार किताद मंता। इदिन शहरी कामरेड्स पढ़ेमाया परितोरा? इंगो, इदिन ओरु वेने पढ़ेमायना जरूरी मंता। इदिना लोप्पा पूना-पूना घटनांग तोहताद मंता। समाजवादी निर्माण ताकनास्के बद शहर लोप्पा हर दिया पूना-पूना घटनांग आंतांग अद्रमे नाहकुना लोप्पा आया मंतांग। किसान लोर कीयाना काम ओसो मजदूर वर्ग, बुद्धिजीवी ओसो सब्बे देशभक्त लोकुर कीसोर मत्ता काम नडमा बाता संबंध मंता? इदिन समझेमायला काजे नहाकुना इलाकांग संबंधित सामग्री तुन पढ़ेमायना बेस आयारा।

नहाकुना इलाका ना वर्तमान परिस्थित तुन वेल्ले तोरे समझेमायना इंजी माटु पुस्तक ता उंदी सक्षिप्त संस्करण तैयार किया मंतोम, ताना लोप्पा 176 लेख लोप्पाटल 44 लेख ओसो लगभग 2,70,000 शब्द शामिल किताद मंता। इद्रम कीतांकु लोकुर पूरा संकलन पढ़ेमाया परवेक वेने इद विषय लोप्पा उचुन जानकारी दोरकी किया परितोर।

नोट

- 1) छापे कीयानास्के इद पुस्तक ता पोरोल बदले कीसी “चीन ता नहाकुना लोप्पा समाजवादी उभार” तासताद मंता।
- 2) इगा “प्रस्तावना 1” ता बारे ते वेहताद मंता।

“चीन ता नहाकुना लोप्पा समाजवादी उभार”

पोरो सम्पादक ना टिप्पणिंग⁴²

सितम्बर ओसो दिसम्बर 1955

1

इद लेख वेल्ले बेस रास्ताद मंता अनि पढेमायनोरा मुन्ने इद पुस्तक ता भूमिका रूप ते पेश कीयाना लेक्का मंता। इद लेख ता शुरूआत ते सिर्फ

⁴² “चीन ता नहाकुना लोप्पा समाजवादी उभार” ता सम्पादन कियानास्के कामरेड माओ त्सेतुंग 104 टिप्पणिंग रास्तोर, अविना लोप्पाटल 43 टिप्पणिंग कुन इगा संकलित कीताद मंता। मार्च 1958 ते चीनी कम्युनिस्ट पार्टी ता केंद्रीय कमेटी ता राजनीतिक ब्यूरो ता छंगतू लोप्पा आता विस्तृत मीटिंग लोप्पा इव टिप्पणिंग कुना उंदी अंश तुन ओसो उंदी बेरा छापे कीताद मत्ता। इदिना पोरो 19 मार्च 1958 ते कामरेड्स माओ त्सेतुंग उंदी स्पष्टीकरण रास्तोर, अदिना पूरा मजमून दोड़ रास्ता लेक्का मंता:

“चीन ता नहाकुना लोप्पा समाजवादी उभार” पोरोल ता पुस्तक लोप्पा प्रकाशित इव टिप्पणिंग सितम्बर ओसो दिसम्बर 1955 ते रास्तद मत्ता। इविना लोप्पा उचुक टिप्पणिंग ना महत्व नेंडु वेने कम आताद हिल्ले। मति टिप्पणिंग लोप्पा 1955 ते समाजवाद पूंजीवाद खिलाफ तन्ना महत्वपूर्ण लड़ाई ते बुनियादी जीत दोरकी कित्ता साल मत्ता इंजी रास्ताद मत्ता; इदिन सही तरिका ते पेश कीताद हिल्ले। अदिन इगा रास्ता लेक्का पेश कियाना मत्ता: 1955 ते उत्पादन संबंध कुना मालिकाना तासनोर किन बुनियादी रूप ते जीत दोरकता अनि उत्पादन संबंध तुकू पोरो इत्तेके विचारधारात्मक, राजनीतिक मोर्चा ते बुनियादी जीत दोरकताद हिल्ले अनि दोरकी कीतेकाई पूर्ण जीत दोरकी कीताद हिल्ले, वेल्ले कोशिश कियाना जरूरत मत्ता। माटु 1956 ते दुनिया लोप्पा वेल्ले बेहरा उर्रा वेडिय तेहना लेवेके मना देश लोप्पा अदे साल जनता ना जोश पोरो तोड़ियो वाटना “दुस्साहस संगे मुन्ने दायना रुझान ता विरोध” कियाना घटना आयार इजी आल्सतादे हिल्ले। इव रेंडासी घटनांग नल दक्षिणपंथी पागलपन संगे हमला कीता। इदिनगडल समाजवादी क्रांति, समाजवादी निर्माण हल्को हिल्ले अदिनके माटु देश-विदेश ते पुट्टना बचोनो मुश्किल परिस्थितिंग ना सामना कियाला तैयार मंदाणा इंजी सबक दोरकित्ता। अंतरराष्ट्रीय ओसो राष्ट्रीय परिस्थितिंग अनुकूल मंता इंदनादु पक्का मंता। मति वेल्ले गंभीर बाधांग वेने वांतांग, माटु विना सामना कियाला काजे जरूर तैयार मंदाणा।

इदिना बारे पुनवा कारण ते ओसो इदिना पोरो सवाल कियाला वेरियंतोर अदिनके “सहकारी समितिग लोप्पा वायला” वेरियंतोर ओरा बारे ते वेहताद मंता। इद्रम तोरा संख्या देश ता बचोनो हिस्सा ने इंजे वेने वेल्ले मंता। इद्रम “दृढता ते कावना” इत्तेके फरमान जारी कीसी सहकारी समितिग कुन बेहरा स्तर ते विघटित कीयाना वेने “सहकारी समितिग नल वेरियाना” रुझान ताए रूप आंदू इदिन लोप्पा सिर्फ ओरु वेरियाना निस्क्रिय रुझान पोयवा लेवाका वेल्ले सक्रिय रुझान पोयंतोर अनि उंदे हमला ते वेल्ले सहकारी समितिग कुन “भंग” कींतोर। वीर कैदे मर्स (गोडेल) पोयसी अविन भंग कींतोर अनि परेशान कीयाना समस्यांग नल वेरियांतोर। वीरु सहकारी समितिग ना संचालन कियाला रक-रकम ता मुश्किल कुना सामना किया लागिंता इंतोर अनि ओरा हिसाब ते इव मुश्किलकु आल्सा परवा लेक्कटव मंतांग। मति पूरा देश लोप्पा ओरा इद पोल्लो तुन गलत साबित कीयाना बचोनो उदाहारणकु मंतांग। हपे प्रांत ता चुनह्वा काउंटी ता अनुभव इद्रमताए उंदी उदाहरण मंता। 1952 ते अगा सहकारी समितिग ताकि कियाला बोरे पुनवा मत्तोर। इद सवाल ता हल ओरु सहकारी समितिग कुन ताकी कीयाना करियसी तेंडतोर। ओरा नारा: “पार्टी-सचिव खुद मैदान ते रैयना अनि सब्बे पार्टी सदस्य सहकारी समितिग ना संचालन कियाला मदद कीयाना। इद्रम कीतेके “जानकारी हिल्वेकाई वेल्ले जानकारी दोरकी कीयाना परिस्थिति वात्ता”, “उचुन मुल सहकारी समितिग ना संचालन कीयाना जानकारी वांताकु वेल्ले लोकुर अविना संचालन कीयाना जानकारी मंदाना परिस्थिति वात्ता”, “जिला स्तर ता कार्यकर्ता लोर सहकारी समितिग ना संचालन कीयाना जागा ते जनता अविना संचालन कीयाना लेक्का आता।” 1952 तल 1954 एवनल 3 साल लोप्पा हपे प्रांत ता चुनह्वा काउंटी ता दसवी जिलाता 11 श्यांगकु 4,343 किसान परिवार कुना लोप्पाटल 85 प्रतिशत तुन सहकारी समितिग लोप्पा शामिल कीसी अर्ध-समाजवादी सहकारी बदलाव काम बुनियादी रूप ते पूरा कित्ताद मंता। 1952 ता तूलना ते 1954 ते इद जिला लोप्पा कृषि, जंगल, जानवर दोड़ रास्ता लेक्का बेरसता: अनाज 76

प्रतिशत, बेहरा मर्राक 56.4 प्रतिशत, पंडिंग मर्रांग 62.87 प्रतिशत ओसो भेड़ांग 46.1 प्रतिशत।

इंजे इद सवाल तेहला काजे मावगा वेल्ले कारण मंतांगः इगा किया परतेके दूसरा जागा बारांकु किया परवोम? मीटु इद्रम बारांकु कीवीर? नन्ना सिर्फ उंदे कारण दिसिंता। अदु मुशिकल परिस्थिति तुकू वेरियाना लेवेके वेल्ले स्पष्ट माटा ने वेहाना इत्तेके दक्षिणपंथी अवसरवाद पोरो अमल कीयाना। अदिन काजे “सहकारी समितिंग नल वेरियाना” परिस्थिति मंता। अदिन काजे पार्टी-सचिव खुद मैदना ते वायवा सब्बे पार्टी-सदस्य लोरा सहकारी समितिंग ना संचालन कीयाना परिस्थिति मंता। अदिना काजे उचुन वेने जानकारी हिल्ला परिस्थिति इंजे एवनल इनपडे जानकारी हिल्ला परिस्थिति लेक्काने मंता। उचुन मुल सहकारी समितिंग ना संचालन कीयाना जानकारी मंदाना परिस्थिति मंता, जिला स्तर ता कार्यकर्ता लोर सहकारी समितिंग ना संचालन कीयाना परिस्थिति सिर्फ जिला स्तर ता कार्यकर्ता लोरे ताकी कीयाना परिस्थिति मंता। लेवेके ताकी किना मुशिकल मत्ता सब्बे सहकारी समितिंग कुन मर्स कैदे पोयसी सब्बे सहकारी समितिंग कुन भंग किया मंतोरा। इद पोल्लो हावी आतेके बदे काम पूरा आया परवो। माटु “सक्रिय नेतृत्व ओसो स्थिर विकास” ओसो “नालुंग बगिल ता प्लानिंग, वेल्ले कारगर नेतृत्व” लेक्कटा नारांग पेश कीतोमः माटु चुनह्वा काउंटी ता कामरेड्स पेश कित्ता “पार्टी-सचिव खुद मैदान ते रैय्यना अनि सब्बे पार्टी पार्टी सदस्य लो सहकारी समितिंग ना संचालन कियाला मदद कीयाना” नारा तुकू सहमत मंतोम। चुनह्वा काउंटी लोप्पा “सक्रिय नेतृत्व ओसो स्थिर विकास” पोरो अमल कित्ताद हिल्ले या? अगा “चौतरफा प्लानिंग ओसो वेल्ले कारगर नेतृत्व” पोरो अमल कीतद हिल्ले या? बदे डावुट हिल्ला इविना पोरो अमल कित्ताद मंता। इद खतरा मंता या? इद “दुस्साहस सगे मुन्ने दायना” आंता या? इंजे मना मुन्ने मत्ता खतरा असल इत्तेके “सहकारी समितिंग नल वेरियाना” खतरा आंदू। चुनह्वा काउंटी ता कामरेड्स इदिना पोरो काबू कित्तोरा। “दुस्साहस सगे मुन्ने दायना” ता विरोध कीयाना पोरोल ते सहकारी समितिंग ना बेहरा स्तर ते

“भंग कीयाना” खतरा वेने मंता। मति चुनह्वा काउंटी लोप्पा इद्रम आताद आयो। उचुन मुल वेहता लेक्का “सहकारी समितिंग ना विकास जनता ना राजनीतिक चेतना ओसो कार्यकर्ता लोरा नेतृत्व क्षमता स्तर मुन्ने” हत्तेके चुनह्वा काउंटी ते आता कारण बद्रम समझे मायार? बेगा जनता निज्जमे सहकारिता ता मांग कित्ता अगा कार्यकर्ता लोर जरूर जानकारी हिल्वा परिस्थिति तल वेल्ले जानकारी दोरकी कीयाना परिस्थिति ते वांतोर। हर मानेय ना कोंडा मंता ओरकिन चुनह्वा काउंटी ते मत्ता बदे खतरा दिससोर हिल्ले या? 3 साल ता लोप्पा सहकारी बदलाव काम तीरम-तीरम पूरा कीयानास्के अनाज 76 प्रतिशत बेरसता, बेहरा मर्राक 56.4 प्रतिशत बेरसता, पंडिंग मर्राक 62.87 प्रतिशत बेरसता, अनि भेडंग 463.1 प्रतिशत आता। इदिन बदे रकम ता खतरा मानेमायमूडांता या? इदिन “दुस्साहस संगे मुन्ने दायना” इनमूडांता या? इदिन “जनता ना राजनीतिक चेतना ओसो कार्यकर्ता लोरा नेतृत्व क्षमता स्तर ते मून्ने दायना” इनमूडांता या?

चुनह्वा काउंटी ता सहकारी आंदोलन ते वांग क्वो-फान सहकारी समिति वेने शामिल मंता। इदिन मुन्ने “कंगाल लोरा सहकारी समिति” इंदानोर, बारांकु इत्तेके अदिना 23 गरीब किसान परिवार लोप्पा गधा ता सिर्फ “मूंड कालकु” मत्तांग। तम्मा खुद ता कोशिश पोरो आधार आसी अविना सदस्य लोर 3 साल लोप्पा वेल्ले उत्पादन साधन कुन “मेड्टा तरवसी दोरकी कित्ताद मंता”। इद काम अगा मंदाना वेल्ले लोकुरा लोप्पा पूना जीवा तोस्ता लेक्का आता। नावा हिसाब ते इद मावा पूरा राष्ट्रीय स्वरूप तुन तोहिंता। 60 करोड़ “कंगाल” तम्मा खुद ता कोशिश ते उचुके दशक लोप्पा उंदी समृद्ध, शक्तिशाली समाजवादी देश ता निर्माण बद्रम किया परितोर? समाज ता सम्पत्ति मजदूर, किसान ओसो मेहनतकश बुद्धिजीवी पुट्टी कितोर। ओरु मना पिस्वल कैदे पोयतेके, ओरु मार्क्सवादी-लेनिनवादी कार्यदिशा पोयतेके अनि समस्यांग निगडल वेरियवा लेवा सकारात्मक रुझान पोयसी अविन हल कीतेके जरूर ओरु दुनिया ता हर मुश्किल कुन दूर किया परितोर।

आखरी ते माटु इद लेख ता लेखक ना धन्यवाद कीतोम, ओना पोरोल इगा रास्तद हिल्ले। ओरु वेल्ले जोरशोर ते ओसो वेल्ले सजीव शैली ते उंदी जिला ता सहकारी बदलाव ता बारे ते विस्तार ते रास्तोरा। इद पूरा देश ता सहकारी बदलाव काजे उंदी बेहरा योगदान मंता। माटु हर प्रांत, प्रिफेक्चर ओसो काउंटी इद्रम ता उंदी लेवेके उंदी तुकू ज्यादा लेख तैयार किया परिंतोरा। (“पार्टी-सचिव खुद मैदान ते रैयना अनि इंजे पार्टी-सदस्य सहकारी समितिंंग ना संचालन कियाला मदद कीयाना” हेडिंग ता लेख पोरो टिप्पणि)

2

1955 ते चीन लोप्पा वेल्ले लोकुरा भ्रम खत्म आया मंता। इयेटा पहली 6 महिनांग एवनल वेने वेल्ले लोकुर उचुन सवाल कुना बारे ते तम्मा विचार कुना पोरो गटिग नितसी मतोर। मति दूसरा 6 महिनांग एवनल ओरकिन तम्म विचार बदले किया लागता। उचुक उदाहरणकु दोड़ रास्ता लेक्का मंतांग:

ओरु “मूंड साल लोप्पा सहकारी बदलाव पूरा कीयाना” मांग सिर्फ उंदी विचार आंदू इंतोर। उत्तर चीन लोप्पा सहकारिता तुन जल्दी लागू कियमूडायर, मति दक्षिण ते आयो; पेरके अरता श्यांग, मेड्डा इलाकांग, अल्पसंख्यक राष्ट्रीयतांग इलाकांग, बहुराष्ट्रीय इलाकांग ओसो प्राकृतिक आपदा आता इलाकांग लोप्पा सहकारी समितिंंग ताकि कीयाना संभव हिल्ले; सहकारी समिति ता स्थापना कीयाना हल्को मंता, मति अदिन सुदृढ़ कीयाना मुश्किल मंता; किसान लोर वेल्ले गरीब मंतोर ओरगा पूंजी जमा कीयाना बदे तरिका हिल्ले; किसान लोर अनपढ़ मंतोर, अकाउंटेंट मन्नो आंता; ज्यादा सहकारी समितिंंग बने कीयाना इत्तेके वेल्ले बाधांग ना सामना कीयाना; सहकारी समितिंंग ना विकास जनता ना राजनीतिक चेतना ओसो कार्यकर्ता लोरा अनुभव स्तर तुकू मुन्ने हत्ता; पार्टी तय कित्ता अनाज अस्सना-वम्मना पोरो राज्य ता इजारेदारी नीति ओसो सहकारिता नीति संगे किसान लोरा उत्पादन ता जोश कम आयार; कम्युनिस्ट पार्टी

सहकारिता ता सवाल पोरो तुरंत पेरके गुचवेके अदिना मुन्ने मजदूर-किसान एकता देगना खतरा मंता; सहकारिता बदलाव तले अतिरिक्त श्रमशक्ति बेहरा मात्रा ते जमा आयार, इदिना इस्तेमाल कीयाना बदे हर्ही हिल्ले आयार इंतोरा। इद्रम ता वेल्ले उदाहरणकु वेने पेश कियमूड़ांता। सक्षिप्त ते इव सब्बे भ्रम मत्तांग। अक्तबर 1955 ते चीनी कम्युनिस्ट पार्टी ता सातवी केंद्रीय कमेटी ता छठी पूर्ण अधिवेशन (विस्तृत) आलोचना कित्ता पेरके इव सब्बे भ्रम खत्म आतांग। इंजे समाजवादी बदलाव ता ज्वार पूरा देश ता नहाकुना इलाकांग लोप्पा वेल्ले तेज आया मंता अनि जनता वेल्ले खुश मंता। इद सब्बे कम्युनिस्ट लोरा काजे उंदी गंभीर सबक मंता। जनता लोप्पा समाजवाद काजे वेल्ले जोश मंता, मति वेल्ले नेतृत्वकारी संगठन उचुक महिनांग मुन्ने इदिना बारे ते वेल्ले संवेदनहीन लेवेके वेल्ले कम संवेदनशील मत्तोरा? नेताल लोरा दिमाग ते मत्ता पोल्लोंग ओसो जनता ना दिमाग ते मत्ता पोल्लो ने इचोन अंतर बारांकु मंता? इदिनगडल सबक एतसी वायना कालम ते इद्रम ता पोल्लोंग ओसो समस्यांग कुन बद्रम हल कीयाना? इदिना जवाब माटु खुद जनता तल अलग कीयानायो, जनता ना स्वरूप पोरो आधार आसी अदिना जोश ता जानकारी एतला निपुण आया इंजीए मंता।

(“उंदी पेरके अरता नाटे ना हर रकम तुकू पेरके मंदाना जरूरी हिल्ले” हेडिंग ता लेख पोरो टिप्पणि)

3

बोरु हर अलग-अलग इलाका लोप्पा निम्न स्तर ता सहकारी बदलाव ता काम 3 साल लोप्पा पूरा कीयाना संभव मंता (3 साल लोप्पा सहकारी बदलाव पूरा कीयाना नारा जनता वाटता, अनि अवसरवादीर इदिना आलोचना कित्तोर) अनि पेरके मुक्त इलाकांग ओसो पाड़ना मुक्त इलाकांग लोप्पा सहकारी बदलाव ता काम संगे ने पूरा कीयाना संभव हिल्ले इंजी आल्सिंतोरा। ओरु सब्बे च्यांगसू प्रांत ता खुनशान काउंटी ता इद श्यांग तुन वेल्ले ध्यान ते हूडाटू। इगा सहकारी बदलाव कार्य कीयाना लोप्पा 3 साल

आयवा रेंडु साले पोयता। इद बदे पाडना मुक्त इलाकांग आयवा सौ प्रतिशत पेरके मुक्त आता इलाका आंदू, इद वेल्ले पाडना मुक्त इलाकांग नल मुन्ने हत्ता। इंजे मीटु इदिना बाता किंतिर? इदिन पेरके पिडिंगितिरा? बदे डावुट हिल्ला मीटु इद्रम किया परविर। अवसरवादिरा काजे तम्मा हारे मानेमायना विडचिसी दूसरा बदे हरी हिल्ले। जनता लोप्पा समाजवाद काजे वेल्ले जोश मंता। क्रांति ताकनास्के पाडना तरीकांग पोरोने ताकिंतोर ओरु इद जोश तुन समझेमाया परवोर। ओरकिन कोंडा हिल्ला लेक्का ओरा मुन्ने हीकटे-हीकट दिसिंता। बस्के-बस्के ओरु सही ओसो गलत तुन उंदी दूसरा संगे लेसिह कींतोर अनि उल्टा पेश किसिंतोर। इद्रम वेल्ले लोकुरा संगे बस्के ने मावा टक्कर आताद हिल्ले या? ओरु सिर्फ पाडना तरीकांग पोयसी बद्रम मंदाना इंजी पुत्तोर अनि जनता ना जोश तुन कम कीसी हूडिंतोर। बदे पूना वस्तु दिस्ते ओरु अदिन अस्वीकार कींतोर अनि मुन्नेने अदिना विरोध कीयाना शुरु कींतोर अनि पेरके तम्मा हार मानेमांतोर, उचुन आत्मालोचना वेने कींतोर। दूसरी बेरा वेने बदे पूना वस्तु दिस्तेके मुन्ने लेक्का अवे रेंडु रुझान कु लागू कींतोर। हर पूना वस्तु पोरो इद्रम ताए रुझान पोयंतोर। इद्रम तोर हमेशा निष्क्रिय मंदिंतोर अनि मेलियवा लेवा नितसी मंदिंतोर अनि सर्फ पेरके दोब्बतास्केने मुन्ने डाका वारिंतोर। इद्रम तोर किन खुद मुन्ने दायला ओसो बेस ताकला करियाला बचोन टाईम लागियर पुन्नोम? बोरकिन इद्रम ता बीमारी मंता ओरा इलाज वेने ता: ओरकिन उचुन जोम काजे तेंडसी जनता ना नडमा दायना, अनि ओरु बाता आल्सा मंतोर, बाता किया मंतोर इंजी हूडाना अनि तन्ना बेसता अनुभव कुना प्रचार-प्रसार कीयाना। दक्षिणपंथी अवसरवाद ता पाडना रोग ता इलाज काजे इद कारगर इलाज आंदू। इद रोग संगे बीमार मत्तोर किन इदे सलाह हियाना।

(“इद श्यांग लोप्पा सहकारी बदलाव काम सिर्फ रेंडु साल लोप्पा पूरा आता” हेडिंग ता लेख पोरो टिप्पणी)

4

इद वेल्ले बेसता लेख मंता। इदिन पढेमातेके वेवुर जाति ता किसान सहकारिता ता हरीं पोयला काजे बचोन तैयार मंतोर इंजी पुनमूडांता। ओरु अर्ध-समाजवादी सहकारी बदलाव काजे जरूरी कार्यकर्ता लोर वेने प्रशिक्षित कित्तोर। उचुन मुल अल्पसंख्यक राष्ट्रीयतांग नडमा सहकारिता सफल आया परवो इंतोर। मति इद सही हिल्ले। माटु मंगोल, ह्वेइ, वेवुर, म्याओ, च्वांग ओसो बाकी अल्पसंख्यक राष्ट्रीयतांग अलग-अलग ताकी कीसोर मत्ता ओसो बचोनो राष्ट्रीयतांग संयुक्त रूप ते ताकी कीसोर मत्ता सहकारी समितिं ग ना संख्या वेल्ले हूडतोम अनि इव वेल्ले बेस ताकतांगा। इद सच्चाई अल्पसंख्यक राष्ट्रीयतांग कुन तिरस्कार कीयाना गलत लोकुरा दृष्टिकोण ता खंडन कींता।

(“श्यांग ओसो नाह कुना कार्यकर्ता लोरा लोप्पा सहकारी समितिं ग ना स्थापना ता काम ता नेतृत्व कीयाना क्षमता मंता” हेडिंग ता लेख पोरो टिप्पणी)

5

इद लेख लोप्पा वेल्ले लोकुर किन प्रभावित कीयाना लेक्का मंता। इगा पार्टी-संगठन सहकारिता ता सवान पोरो बस्केने दुलमुल आताद हिल्ले। अदु गैर-खुशहाल किसान लोरा सहकारी समिति स्थापना कीयाना मांग दृढ़ता ते समर्थन कित्ता। अद्रमासी ओरु खुशहार मध्यम किसान लोरा संगे तम्मा होड़ जीड़तोर। सुडला सहकारी समिति तुन बेहरा सहकारी समिति लेक्का विकसित कित्ता अनि हर साल उत्पादन बेरसी कित्ता, अद्रमासी 3 साल तुकू कम टाईम ते पूरा नाटेना सहकारी बदलाव आता। खुशहाल मध्यम किसान रांगसोर मंदितोर: “उचुन हूडाटू वीर कंगाल लोकुर वेने सहकारी समिति स्थापना कीयाना पोल्लोंग कींतोर, बस्केने कोर पीसे ता मारेंग परियसी मोय्योल पोरा एविंता” इंजी केंजिरा? मति इव कोर पीसे ना मारेंग इद्रम कीसी तोहतांगा। इद समाजवाद ओसो पूंजीवाद नडमा ता संघर्ष आंदू चीन लोप्पा धनी किसान अर्थव्यवस्था वेल्ले कमजोर मंता(धनी

किसान लोरा जमीन ता अर्ध सामंती तरीका ते उत्पादन कीसोर मत्ता, ज्यादातर पाड़ना धनी किसान इंजे काम कियाला मजदूर तासवा ओसो सामाजिक रूप ते वेल्ले लब्बड़ मत्ता हिस्सा तुन भूमि-सुधार कीयानास्के कब्जा किताद मंता) मति खुशहाल ओसो तूलनात्मक रूप ते नाहकुना लोप्पा 20-30 प्रतिशत मत्ता खुशहाल मध्यम किसान लोरा आबादी वेल्ले शक्तिशाली मंता। चीन ता नाहकुना लोप्पा रेंडु हरीं नड़मा संघर्ष ता उंदी महत्वपूर्ण पहलू खुशहाल मध्यम किसान लोरा संगे गरीब, निम्न-मध्यम किसान लोरा शांतिपूर्ण होड़ लेक्का दिसिंता। रेंडु-मूंड साल लोप्पा तम्मा उत्पादन बोर बेरसी किया परितोर, व्यक्तिगत रूप ते काम कीयाना खुशहाल मध्यम किसान लेवेके गरीब, निम्न-मध्यम किसान लोर? लेवेके सहकारी समितिं लोप्पा कलियसी काम कींतोर ओरु? शुरु ते इद होड़ सिर्फ सहकारी समितिं लोप्पा संगठित उचुन गरीब, निम्न-मध्यम किसान ओसो व्यक्तिगत रूप ते काम कीयाना खुशहाल मध्यम किसान लोरा नड़मा मत्ता मति ज्यादातर गरीब, निम्न-मध्यम किसान अलग नितसी हूडिंतोर; रेंडासी पक्ष नड़मा ता होड़ जनता तुन तम्मा पक्ष ते कियाला काजे मत्ता। खुशहाल मध्यम किसान लोरा पेरके जर्मीदार, धनी किसान मत्तोर। वीरु बस्के ने ओपन अनि बस्केने गुप्त रूप ते और समर्थन कियनोरा सहकारी समितिं ना पक्ष ते कम्युनिस्ट पार्टी सदस्य लोर मत्तोर। वीरु सहकारी समितिं ना समर्थन ते आनयांग काउंटी ता नानछवेइच्वांग नाटे ना कम्युनिस्ट लोरा लेक्का दृढ़ता तोहना। मति नाहकुना कुना सब्बे पार्टी शाखांग वेल्ले दृढ़ता तोहोंग। अबु दृढ़ता तोहता जागा ते गड़बड़ आता। सबसे मुन्ने कोर पीसे ता मारेंग परियसी मोय्योल पोरो एव्वा परना पोल्लो पोरो लोकमत तैयार कीयाना सवाल मत्ता। बदे डावुट हिल्वा उंदी वेल्ले गंभीर सवाल मत्ता। हत्ता हजारों साल लोप्पा बोर ने इद कोर पीसे तुन परियसी मोय्योल पोरो एवतादू हूड़तोर? ओरु मोय्योल पोरो एव्वा परवा पोल्लो ओरा काजे उंदी खुद साबित कित्ता पोल्लो लेक्का मंदिंता। अस्के पार्टी इद पोल्लो ता खंडन कीवेके वेल्ले गरीब लेवेके निम्न-मध्यम किसान भ्रम ते अरसी मन्नेर। दूसरा कार्यकर्ता लोरा बारे ते ओसो तीसरा, कर्जा

लेक्कटा भौतिक संसाधन कुना बारे ते मंता। पार्टी, राज्य सहकारी समितिंंग ना सहायता कीवेके अविन वेल्ले मुश्किल कुना सामना किया लागिंग्ता। खुशहाल मध्यम किसान लोर किन “पीसे ता मारेंग परियसी मोय्योल पोरो एव्व परवोंग” इंदाना लेक्कटा पाड़ना अनि साबित आता पोल्लोंग प्रचार किया परतोर, बारांकु इत्तेके सहकारी समितिंंग तम्मा उत्पादन बेरसी किया परवोंग, निर्धन सहकारी समितिंंग धनी बनेमाया परवा मत्तांग अनि सहकारी समितिंंग ना संख्या उंदी-रेंडु तल हजारों-लाखों आयवा मत्ता। ओरु इद्रम कीयाना साहास बारांकु कितोर इत्तेके पार्टी इंजे एवनल सहकारी समितिंंग ना फायदा ता बारे ते जोरदार देशव्यापी प्रचार किताद हिल्ले अनि पार्टी स्पष्ट रूप ते पाड़ना, खुद साबित आता “पीसे ता मारेंग संगे परियसी मोय्योल पोरो एव्वा परवो” इंदाना पोल्लो इंजे समाजवादी युग ते निज्जम आया परवो इंजी इन्नो। गरीब लोकर तम्मा हत्ता पिस्वल तुन बदले किया मंतोर। पाड़ना व्यवस्था तुन खत्म किया मंतोर, अनि पूना व्यवस्था पुट्टा मंता। पीसे मारेंग निज्जमे परियसी मोय्योल पोरो एव्व परवोंग। सोवियत संघ लोप्पा इद साबित आताद मंता। चीन लप्पा इस्सल आया मंता। पेरके पूरा दुनिया लोप्पा वेने आयर। मावा वेल्ले स्थानीय पार्टी संगठन कुन अवु गैर-खुशहाल किसान लोरा दृढ़ता ते समर्थन कीवो इंजी पूर्ण दोषी मानेमायमूडायो बारांकु इत्तेके अस्के पोरो स्तर ता अवसरवादी विचार कुना पोरो गोड्डेल देब्बा अरवा मत्ता। सहकारी बदलाव तुन प्रोत्साहन हियाला काजे चौतरफा योजनांग बने किताद हिल्ला मत्ता, आंदोलन ता नेतृत्व देशव्यापी स्तर ता कारगर तरीका ते आयवा मत्ता। 1955 ते माटु इव सब्बे कीसी उचुके महीनांग लोप्पा परिस्थिति बदले कीतोमा। मुन्नेटले अलग नितसी हूडसोर मंदानोर इंजे गोहडिंग-गोहडिंग बेहरा संख्या ते सहकारी समितिंंग ना पक्ष ते वातोर। खुशहाल मध्यम किसान लोर वेने तम्मा विचार बदले कितोर। ओरा लोप्पा उचुने मुल सहकारी समितिंंग लोप्पा शामिल आयला काजे आवेदन कितोर अनि उचुन मुल आवेदन कीयाना तैयारी किया मंतोर। ओरा नडमा वेल्ले कट्टरपंथी मत्तोरु वेने मुन्ने लेक्का पीस परियसी मोय्योल पोरो एव्वा परवो

इंजी वड़कना हिम्मत कीवोरा जमींदार ओसो धनी किसान लोरा घंमड पोच्चांग पोयता। जनताना सरकार सार्वजनिक व्यवस्था लोप्प गड़बड़ कित्ता, सहकारी बदलाव काम लोप्पा तोड़फोड़ कित्ता बचोनो प्रतिक्रांतिकारीर किन सजा हीता सच्चाई वेने इदिना लोप्पा तन्ना भूमिका निभे कित्ता। सक्षिप्त ते 1955 चे दूसरा 6 महिनांग लोप्पा मावा देश ता वर्ग-शक्ति संतुलन लोप्पा बुनियादी बदलाव आता: समाजवाद ता भरपूर विकास आता अनि पूंजीवाद ता वेल्ले कमजोर आसोर हत्ता। उंदी साल एवनल कठिन परिश्रम कित्ता पेरके 1956 ते संक्रमणकालीन समाजवादी बदलाव ता बुनियाद मुख्य रूप ते तैयार आयारा।

(“पीसे परियसी मोय्योल पोरो एव्वा परिंता इंजी बोर इंतोर” हेडिंग वाले लेख पोरो टिप्पणी)

6

लगभग सब्बे जागा ने मत्ता लेक्का पार्टी लोप्पा दक्षिणपंथी अवसरवाद ओसो गरीब, निम्न-मध्यम किसान जनता सहकरिता हरीं पोय्यला बाधा वाटा मंता अनि समाज ता पूंजीवादी ताकत कुना संगे कलियसी कार्यवाही कींता। वर्तमान लेख लोप्पा उद परिस्थिति सही वर्णन किताद मंता। लेखक अवसरवादिरा वेल्ले होंग ते आरोप वाटतोर अनि गैर-खुशहाल किसान लोरा वेल्ले समर्थन कित्तोर। उचुन मुल खुद किन कम्युनिस्ट आंतोम इंतोर मति इंजे दाया मंतोर समाजवादी काम कियला आल्वा लेक्का मंतोर इंजी इंतोर। जोश संगे निंडसी मत्ता जनता ना समर्थन कियवा लेवावा अदिना जोश पोरो तोड़ियो वाटितोर। 1955 ते चीन लोप्पा समाजवाद ओसो पूंजीवाद नडमा महत्वपूर्ण संघर्ष ताकता। इद महत्वपूर्ण संघर्ष सबसे मुन्ने चीनी कम्युनिस्टी पार्टी ता केंद्रीय कमेटी मई, जुलाई ओसो अक्तूबर ते केयता 3 सम्मेल लोप्पा आता। 1955 ता पहली 6 महिनांग लोप्पा वातावरण वेल्ले खराब मत्ता अनि पूरा मोय्योल पोरो मोय्योल गुडूम आसी मत्ता। मति दूसरा 6 महिनांग लोप्पा परिस्थिति पूर्ण रूप ते बदलेमाता अनि वातावरण बेस आता। पार्टी ता केद्रीय कमेटी आह्वान पोरो बचोनो करोड़ किसान परिवार सक्रिय आतांग अनि सहकारी

समितिंग लोप्पा संगठित आतांग। सम्पादक ना इद टिप्पणी रासना जोम पूरा देश लोप्पा 6 करोड़ तुकू ज्यादा किसान परिवार सहकारी समितिंग लोप्पा शामिल आसी मत्तांग। इद उंदी बेहरा ज्वार बाटा मत्ता, इदु सब्बे दुश्मन कुन खत्म कित्ता। मावा समाड लोप्पा सब्बे रकम ता लोकरा मुक्कम स्पष्ट दिसिंतांग। पार्टी लोप्पा वेने इद्रम ताए परिस्थिति मत्ता। इयेटा आखरी एवनल समाजवाद ता जीत वेल्ले गरे वायरा। बदे डारुट हिल्ला वायना कालम ते वेल्ले लड़ाईंग लड़ेमाया लागियर अनि संघर्ष जारी तासा लागियर अनि वेल्ले कोशिश कीसोर मंदा लागियर।

(“अवसरवाद ता खराब वड़िय मारसोर दाया मंता, समाजवाद ता शुद्ध वड़िय बेरसोर दाया मंता” हेडिंग वाले लेख पोरो टिप्पणी)

7

इद लेख वेने वेल्ले ध्यान हियाना लेक्का मंता। विकास रोमी कीयाना कोशिश कीयाना अवसरवादी लगभर हर जागा ते मंतोर। मति अदिन रोमी किया परमूडायो अनि समाजवाद सब्बे बाधांग वेडंसोरे हर जागा सफलतापूर्वक मुन्ने दाया मंता। समाज दिव्या-दिव्या तुकू इद्रमे प्रगति कीसोर दांता अनि इद्रम आसोर मत्तास्के लोकुरा विचार ता बदलाव आसोर दांता, विशेष रूप ते क्रांति लोप्पा उभार वात्तास्के।

(“मजदूर परिवार जन सहकारी आंदोलन लोप्पा वेल्ले जोश तोहिंतांग” हेडिंग वाले लेख ता टिप्पणी)

8

इद लेख वेल्ले बेस मंता। पढ़ेमायनोर इदिन ध्यान हीसी पढ़ेमायनूर इंजी आशा कीताना। किसान जनता समाजवादी हरीं पोयला तैयार मंतोर इंजी मानेमायवोरु, सहकारी समितिंग कुन “भंग” कियाला कैदे मर्स पोयसी तैयार मंदानोर इदिना पोरो विशेष ध्यान हीसी पढ़ेमायना। पूरा नहाकुना इलाकांग लोप्पा समाजवादी तत्व हर दिव्या विकसित आसोर दांता, व्यापक किसान जनता सहकारी समितिंग ना स्थापना कीयाना मांग

कीयाना मंता अनि जनता नडमा बुद्धिमान, योग्य, न्यायप्रिय ओसो जोश ते मत्ता नेताल लोरा बेहरा सख्या मुन्ने वाया मंता। निज्जमे इदु वेल्ले गर्दा वायना लेक्कटा परिस्थिति आंदू वेल्ले जागा ने पार्टी ता नेताल लोर इद परिस्थिति संगे ताकला परवा मत्तादु वेल्ले बेहरा कमी मंता। मावा इंजेटा काम विभिन्ना स्तर ता स्थानीय पार्टी-कमेटिंग कुन इदिना बारे ते मार्क्सवादी-लेनिनवादी हरीं पोयसी ताकना, कृषि-सहकारिता ता पूरा जिम्मेदारी एतना, सक्रियता, जोश, समर्थन ओसो हायना-पिस्सना जोम काम कीयाना विचार संगे आंदोलन ता नेतृत्व कीयाना इंजी प्रेरित कीयाना मंता। वरोर धनी मानेय ना ड्रैगन-प्रेम ता कहानी ओसो उंदी बेरा बने कीयानायो। बचोनो साल एवनल समाजवाद ता पोल्लोंग कीसोर मत्तोर, समाजवादी ओना डारवेंडा ते वासी नित्तितास्के वेरीं ता मारे अचानक पांडरी पोयत्ता लेक्का आयनायो।

(“नेतृत्व ता विचार खिलाफ जनता स्थापित कित्ता उंदी सहकारी समिति” हेडिंग वाले लेख पोरो टिप्पणी)

9

इद श्यांग लोप्पा सही कार्यदिशा ता अमल आया मंता। इदिना लोप्पा इंजे एवनल हेय्युंग कृषि-उत्पादक सहकारी समितिंग, 7 संयुक्त आपसी सहयोग दलकु, 3 स्थाई आपसी सहयोग दलकु ओसो 14 अस्थाई आपसी सहयोग दलकु ना स्थापना कित्ताद मंता। इत्तेके संगठित कीयाना लेक्का किसान परिवार कुना लोप्पाटल 98.4 प्रतिशत परिवार इविना सदस्य बनेमातोर। दिसम्बर 1954 तुकू मुन्ने इद श्यांग ता पार्टी-शाखा तन्ना नेतृत्व-कार्य लोप्पा आपसी सहयोग, सहकारी आंदोलन पोरो जोर हीताद हिल्ले, अनि पार्टी सदस्य आपसी सहयोग दलकुना नेतृत्व कीयानास्के वात्ता मुश्किल कुन वेरियता। “पार्टी-सचिव लोर खुद मैदान ते रैय्यना अनि सब्बे पार्टी-सदस्य लोर सहकारी समितिंग ना संचालन कियाला मदद कीयाना” जागा ते इद पार्टी-शाखा कार्यदल पोरो निर्भर मत्ता (स्पष्ट रूप ते इद कार्यदल पोरोटल लोहतद मत्ता)। पूरा देश लोप्पा

कृषि-सहकारिता समस्या तुन हल किया परवा नाहकुना पार्टी-शाखांग ना संख्या वेल्ले मंता। इव पार्टी-शाखांगे आयवा उचुक उच्च पार्टी-कमेटिंग ना परिस्थिति वेने इद्रमे मंता। कृषि ता समाजवादी बदलाव देश ता औद्योगीकरण संगे कलियसी ताकता या ताको, सहकारी आंदोलन उत्पादन लोप्पा बढ़ोत्तरी ता गारंटी कीसोरे सही तरीका ते विकसित आया परिता या परवो इंदनदु विभिन्न स्तर ता स्थानीय पार्टी-कमेटिंग जल्दी-जल्दी ओसो सही तरीका ता तम्मा नेतृत्व ता जोर कृषि-सहकारिता पोरो हिया परिता या परवो इंदाना पोरो आधार आसी मंता। कार्य दल कुन जरूर लोहना मति अविन किन सिर्फ स्थानीय पार्टी-संगठन कुना मदद कियाला काजे लोहतद मंता, अविना जागा एतला काजे लेवेके अविनि निष्क्रिय कियाला लेवेके दूसरोरा पोरो आधार आसी मंदान लेक्का कियाला आयो इंजी स्पष्ट रूप ते समझे कीयाना। क्वेइचओ प्रांत ता इद श्यांग लोप्पा दिसम्बर 1954 ते नेतृत्व काम पोरो तन्ना रुझान बदले कित्ता पेरके सिर्फ 5 महीना तुकू उचुन ज्यादा टाईम तेने बेहरा सफलतांग दोरकतांग। कार्यदल पोरो आधार आसी मनवा लेवा खुद मैदान ते रैय्यता अनि पार्टी-सदस्य लोर मुशिकल कुनल वेरिया विडिसितोरा। इद्रम ता बदला सबसे मुन्ने सब्बे स्तर ता प्रांत, स्वायत्त प्रदेश, प्रिफेक्चर, स्वायत्त चओ, काउंटी, स्वायत्त काउंटी ओसो जिला, ना पार्टी-कमेटिंग ना सचिव लोर, पार्टी-शाखांग ना सचिव लोरा पोरो आधार आसी मंता; कृषि-सहकारिता ता पूरा जिम्मेदारी, अवु खुद एतना जरूरी मंता। मुशिकल कुनल वेरियना ओसो इद महान काम काजे मैदान ते रैयवा मंदाना, इद काम तुन सिर्फ पार्टी ता नाहकुना-कार्य विभाग, कार्यदल कुन सौपे कीयाना लेक्कटा रुझान पोयतेके सिर्फ काम पूरा कीयाना असंभवे आयवा वेल्ले मुशिकल कुन वेने पुड्डी कियमूडायरा।

(“फंगकांग काउंटी ता छुंगशिन श्यांग बद्रम पार्टी-शाखा ना नेतृत्व ते आपसी सहयोग, सहकारी आंदोलन ताकी कितोर” हेडिंग वाले लेख पोरो टिप्पणी)

10

इद लेख ता लेखक काउंटी ता सहकारी समितिं ना निर्देशक लोरा संयुक्त मीटिंग पेरेके ने इद सहकारी समिति अनिश्चित कालीन कॉन्ट्राक्ट प्रथा तल कालम अनुसार विकास कीयाना नियम लागू कित्ता। इदिनगडल स्पष्ट रूप ते काउंटी ता नेतृत्व वेल्ले महत्वपूर्ण मंता इंजी दिसिंता। माटु चीन ता रेंडु हजार तुकू ज्यादा काउंटींग लोप्पा हर काउंटी ता नेतृत्वकारी शाखा तन्ना सहकारी आंदोलन ता विकास ता गंभीरतापूर्वक जांच कीसी, समस्यांग तेंडसी अविन हल कियार, तम्मा सब्बे सहकारी समितिं लेवेके चुने कित्ता सहकारी समितिं ना निर्देशक लोरा मीटिंग टाईम ते कियार, निर्णय कीसी अविन जल्दी लागू कियार इंजी आशा कीतोम। बस्के एवनल समस्यांग डग्गी आसी वेल्ले समस्यांग पुट्टी कीवोंग अस्के एवनल अविन हल कीयाना कोशिश कियवा मंदानायो। नेताल लोर आंदोलन लोप्पा हिरावल भूमिका निभे कीयाना पेरेके मंदानायो। हर काउंटी लोप्पा काउंटी ता पार्टी-कमेटीए नेतृत्व काम लोप्पा मुख्य भूमिका निभे कीयाना।

(“कालम ता कॉन्ट्राक्ट कुना प्रथा” हेडिंग वाले लेख पोरो टिप्पणी)

11

इद सामग्री प्राभवित कीयाना लेक्का मंता। बदे इलाका लोप्पा सहकारी बदलाव बेस ताकनादु पार्टी नीतिंग ओसो काम कीयाना तरिकांग पोरो आधार आसी मंता। सहकारी बदलाव कुना काजे मावा पार्टी नीतिंग सही मतेके, सहकारी समितिं लोप्पा शामिल आयला काजे जनता तुन गोलबंद कीयाना मना पार्टी तरीका फरमानशाही ओसो बकवल लेक्का मंदानायो। जनता मुन्ने सच्चाई तुन समझे कीयाना ओसो अविना विश्लेषण कीयाना, ओरा पहलकदमी, खुद पोरो पूरा आधार आसी मंदाना तरीका मतेके सहकारी बदलाव काम पूर कीयाना ओसो उत्पादन बेरसी कीयाना मुश्किल आयार। हपे प्रांत ता शिंगथाए काउंटी ता तुंगछवानखओ नार पाइना मुक्त इलाका लोप्पा मंता। 1952 तुकू मुन्ने नाटे सब्बे 70 परिवार आपसी सहयोग दल लोप्पा शामिल आसी मत्तांग। अविना पार्टी-शाखा

वेल्ले मजबूत मत्ता अनि अविना नेतालल वांग च-छी जनता ना विश्वास दोरकी कीसी मत्तोर। सब्बे परिस्थितिंग अनुकूल मत्तांग। अदिन काजे 1952 ते इद नाटे उंदी महीना तुकू उचुने ज्यादा टाईम ते सहकारी समिति स्थापना आता अनि अर्ध-समाजवादी सहकारी बदलाव काम पूरा आता। इद नाटेना लेक्का अनुकूल परिस्थितिंग हिल्ला नाह कुना लोप्पा बाता कीयाना? इद्रम ता परिस्थितिंग पुट्टी कीयानादू मंता। इद काम उचुक महीनांग, उंदी साल लेवेके उचुन ज्यादा टाईम ते पूरा कियमूडांता। काम कीयाना संगे-संगे परिस्थितिंग पुट्टी कीयाना वेने जरूरी मंता। उचुन सुडला-सुडला सहकारी समितिंग ना स्थापना कीयानादु पूरा नार, पूरा श्यांग ओसो पूरा जिला ता सहकारी बदलाव काजे परिस्थितिंग पुट्टी कीयानादे आंदू। तुंगछवानखओ संबंधित इद सामग्री लोप्पा खासकर बद्रम उंदी पार्टी-शाखा तुन जनता नडमा प्रचार-प्रसार कीयाना, शिक्षित कीयाना काम कीयाना अनि बद्रम सहकारी समितिंग ना स्थापना कीयानास्के अदिन खुद जनता नाए पहलकदमी ओसो जनता ना विचार पोरो आधार आसी मंदांना इंजी समझे कित्ता। इद नाटे इस्तेमाल कित्ता “उलटा प्रचार”² ता तरीका वेने ध्यान हियाना लेक्का मंता। इद सामग्री लोप्पा इद सहकारी समिति बद्रम श्रम-संगठन, मैनेजमेंट संबंधित समस्यांग कुन हल कीयानास्के विंकोवंकोर हरीं पोयता अनि हर साल उत्पादन बेरसी कीयाना लोप्पा बेहरा सफलतांग दोरकी कित्ता इंजी समझे कित्ता। इद सच्चाई तल इद सहकारी समिति वेल्ले ठोस मंता इंजी साबित आता। बदे सहकारी समिति बचोन ठोस मंता इंजी पुंदाला काजे अगाटा उत्पादन बचोन बेरसता, बचोन घटेमाता इंदानदु हूडना।

(“सिर्फ उंदी महीना तुकू उचुने ज्यादा टाईम ते पूरा नाटे ना सहकारी बदलाव” हेडिंग वाले लेख पोरो टिप्पणी)

12

इद सामग्री बेस ताकवा सहकारी समितिंग कुन सुदुद कियमूडांता इंदाना सच्चाई पोरो कोंडा वाटिंता। सहकारी समिति ना सब्बे सदस्य

मेहनतकश किसान मंतोर, अदिन काजे ओरा विभिन्न श्रेणिंग नडमा बचोन मतभेद मत्तेकाई अविन दूर कियमूडंता। उचुन सहकारी समितिंग लोप्पा उचुन जोम काजे गडबड परिस्थिति जरूर वांता अनि इद्रम सिर्फ पार्टी ता नेतृत्व दोरकवा मंदाना, जनता मुन्ने पार्टी नीतिंग ओसो तरिकांग पेश कियवा मत्तांकु आंता। “माटु सहकारी समितिंग स्थापना कीयाना वेल्ले बेसता पोल्लो इंजी पुत्तोमा मति माटु सहकारी समितिंग स्थापना कितास्के मावा बोरे परवाह कीवोर, काउंटी पार्टी कमेटी, जिला पार्टी कमेटी ओसो स्थानीय पार्टी-शाखा लोप्पाटल बदे वेने मावा पोरो ध्यान हीवो।” वर्तमान परिस्थिति इदिना कारण ते ने पुटता। पार्टी ता नेतृत्व लेवा इद्रम ता परिस्थिति जरूर पुट्टिंता। सही ओसो कारगर नेतृत्व इद परिस्थिति अनूकूल आयार। इद सामग्री लोप्पा पेरके अरता नाहकुना लोप्पा वेने सहकारी समितिंग स्थापना कियमूडंता या आयो इंजी सवाल किताद मंता। अदिना जवाब “इंगो, कियमूडंता”। बद सहकारी समिति ता बारे ते लेखक वेहतोर अदु उंदी पेरके अरता नार लोप्पाने मंता। चीन ता लगभग 5 प्रतिशत नाहकु पेरके अरसी मंतांग; माटु इव नाहकुना लोप्पा सहकारी समितिंग स्थापना कीयाना ओसो इद संघर्ष ताकनास्के अविना पेरका अरता परिस्थिति तुन दूर कीयाना जरूरी मंता।

(“उंदी गडबड मत्ता सहकारी समिति तुन सुदृढ़ बने किताद मंता” हेडिंग वाले लेख पोरो टिप्पणी)

13

इद उंदी आम समस्या संगे-संगे उंदी गंभीर समस्या वेने आंदू। हर स्तर ता पार्टी-कमेटींग ओसो सहकारी बदलाव कार्य ता मार्गदर्शन कियला काजे नाहकुना लोप्पा लोहना कामरेड्स इदिना बगिल ध्यान हियाना जरूरी मंता। सहकारी समिति ना नेतृत्वकारी शाखा लोप्पा नेंड गरीब किसान ओसो पूना निम्न-मध्यम किसान लोर किन प्रमुख जागा ते ओसो पाड़ना निम्न-मध्यम किसान ओसो पूना, पाड़ना उच्च-मध्यम किसान लोर किन सहायक शक्ति लेक्का तासना जरूरी मंता। सिर्फ इद्रम कीसीए पार्टी

ता नीति अनुसार गरीब किसान ओसो मध्यम किसान लोरा नडमा एकता आचार, सहकारी समितिंंग कुन सुदृढ कियमूडायर, उत्पादन बेरसी कियमूडायर अनि पूरा नहाकुना इलाका लोप्पा समाजवादी बदलाव कार्य तुन सही तरीका ते पूरा कियमूडायर। इद्रम ता परिस्थिति हिल्लेके मध्यम किसान ओसो गरीब किसान लोरा नडमा एकता कीयाना, सहकारी समितिंंग कुन सुदृढ कीयाना, उत्पादन बेरसी कीयाना ओसो पूरा नहाकुना इलाकांग लोप्पा समाजवादी बदलाव काम पूरा कीयाना असंभव आचार। वेल्ले लोकुर इद पोल्लो तुन समझेमाया परवो। ओरु भूमि-सुधार कीयानास्के गरीब किसान लोर किन प्रमुख जागा ते तासना जरूरी मंता इंजी आलिसंतोर, बारांकु इत्तेके अस्के इद नाहकुना आबादी ता 50-60 लेवेके 70 प्रतिशत एवनल मत्ता गरीब किसान, इंजे मध्यम किसान लोरा गरे एवतोर अनि मध्यम किसान भूमि-सुधार बारे ते दुलमुल मंदिंतोर। अदिन काजे इद्रम कीयाना निज्जमे जरूरी मत्ता। ओरु इंजे माटु कृषि ता समाजवादी बदलावा कीयानास्के मुन्नेटा ज्यादातर गरीब किसान इंजे पूना मध्यम किसान बनेमातोर इंतोर। इदे आयवा ओरु माडना मध्यम किसान लोरगा वेल्ले उत्पादन साधनकु मंतांग अनि ओरकिन शामिल कियवा लेवा सहकारी समिति लोप्पा उत्पादन साधन कुना कमी ता सवाल हल आयना संभव हिल्ले इंतोर। अदिन काजे ओरु इंजे वेने माटु मुन्ने लेक्का गरीब किसान लोरा पोरो आधार मंदाना लेवेके ओरकिन प्रमुख जागा ते तासाना नारा वाटनायो, इद नारा वाटतेके सहकारी आंदोलन काजे नुकसानदायक मंदिता इंतोर। माटु इद विचार गलत मंता इंतोम। मजदूर वर्ग ओसो कम्युनिस्ट पार्टी पूरा नहाकुना इलाकांग लोप्पा उत्पादन साधन कुना पोरो सुडला किसान लोरा निजी मालिकाना बदलाव समाजवादी विचार ओसो समाजवादी व्यवस्था अनुसार पूर्ण रूप ते कीतेके ओरु इद काम तुन सिर्फ गरीब किसान लोरा लोप्पा, मुन्नेटा अर्ध-सर्वहारा वर्ग पोरो आधार आसी मंजिए पूरा कींतोर, लेवेके इदिन पूरा कीयाना ओरा काजे वेल्ले मुश्किल आचार। बारांकु इत्तेके नाहकुना अर्ध-सर्वहारा वर्ग उत्पादन साधन कुना पोरो सुडला किसान लोरा निजी माहिकाना संगे टुंडसी मंदाना जिद्द

कीवो; अदु समाजवादी बदलाव तुन स्वीकार कियाला काजे वेल्ले तैयार मंदिता। इद वर्ग ता ज्यादातर लोकरु इंजे पूना मध्यम किसान बनेमातोर, मति ओरा सिर्फ उंदी पूना खुशहाल मध्यम किसान बने माता हिस्सा विडचसी, वेल्ले पूना मध्यम किसान लोरा राजनीतिक चेतना ता स्तर पाड़ना मध्यम किसान लोरकिनकु ज्यादा बेरसता, बारांकु इत्तेके ओरु मुन्ने मत्ता तिप्पल कुन हल्कोए सुरता किया परितोर। ताना पेरके पाड़ना निम्न-मध्यम किसान वांतोर: आर्थिक, राजनीतिक रूप ते वीरू पूना निम्न-मध्यम किसान लोरा लेक्का मंदिंतोर मति पूना ओसो पाड़ना उच्च-मध्यम किसान, इत्तेके खुशहाल, तूलानात्मक रूप ते खुशहाल मध्यम किसान लोरकिनकु अलग मंतोर। अदिन काजे सहकारी बदलाव ताकनास्के माटु समाजवादी बदलाव तुन तुलनात्मक रूप ते हल्कोए स्वीकार कीयाना मूंड श्रेणिंग बगिल ध्यान हियाना- 1) इंजे वेने मुश्किल कुना सामना कीसोरे मत्ता गरीब किसान। 2) पूना निम्न-मध्यम किसान। 3) पाड़ना निम्न-मध्यम किसान। सबसे मुन्ने वीर किने उंदी-उंदी समूह ते ओसो उंदी-उंदी मंजिल ते सहकारी समितिंंग लोप्पा शामिल कियाला काजे ओरा मार्गदर्शन कीयाना। ओरा लोप्पा तुलनात्मक उच्च राजनीतिक चेतना ओसो तूलनात्मक रूप ते ज्यादा संगठनात्मक योग्यता वाले बचोनो लोकरु किन चुने कीसी सहकारी समितिंंग ना नेतृत्व ते मुख्य धुरीं लेक्का शिक्षित कीयाना। ओरकिन नेंडु गरीब किसान, पूना निम्न-मध्यम किसान लोरा नडमा तल चुने कीयाना पोरो विशेष जोर हियाना। इत्तेके नहाकुना इलाकांग लोप्पा वर्ग-स्वरूप ता सिर्फ ओसो उंदी बेरा निर्णय कीयानाए आयवा सहकारी बदलाव कीयानास्के पार्टी-शाखांग कुन ओसो इद काम ता मार्गदर्शन कियाला काजे नहाकुना इलाका लोप्पा लोहता कामरेड्स किन सतर्कता अमल कीयाना नीति आंदू। इद नीति ता बारे ते किसान लोर कुन स्पष्ट रूप ते वेहाना। इत्तेके खुशहाल मध्यम किसान लोर किन सहकारी समितिंंग न बाहर तासना इंजी आयो। इत्तेके सहकारी समितिंंग लोप्पा सिर्फ ओरा समाजवादी चेतना स्तर बेरसतास्के, ओरा लोप्पा सहकारी समितिंंग लोप्पा शामिल आयला विचार वात्तास्के, अनि गरीब

किसान (ओरा लोप्पा मुन्ने गरीब मत्ता किसान नेंडु गरीब किसान ओसो सब्बे पूना निम्न-मध्यम किसान लोर शामिल मंतोर) लोरा नेतृत्व तुन स्वीकार कियाला काजे तैयार आतास्केने शामिल कीयाना। सिर्फ ओरा कोंदा, कृषि-औजार कुन हूइसी ओरकिन सहकारी समितिग लोप्पा शामिल आयला मजबूर कीयानायो। सहकारी समितिग लोप्पा शामिल आतोर्, विचार मत्तेके मंदा परितोर। अलग आयला आल्सतोर, मति समझेकिता पेरेके तम्मा विचार बदले कितोर वेने मंदाना परितोर। सहकारी समितिग कुन तूलनात्मक रूप ते कम उत्पादन साधन कुना संगे वेने संगठित कियमूडांता। गरीब, निम्न-मध्यम किसान लोर संगठित किता बचोनो सहकारी समितिग नल साबित आता लेक्का। इदे आयवा बोरे वेने खुशहाल किसान किन सहकारी समिति ता कार्यकर्ता बनेमायना अनुमति हियनायो। तूलनात्मक रूप ते उच्च स्तर ता समाजवादी चेतना, न्यायप्रियता ओसो योग्यता मत्तांकु सहकारी समितिग ना ज्यादातर सदस्य लोर मानेमायना वरोर-इरवुर खुशहाल मध्यम किसान लोर वेने कार्यकर्ता बनेमाया परितोर। मति सहकारी समितिग लोप्पा गरीब किसान लोर किन प्रमुख जागा ते तासना जरूरत मंता (इगा ओसो उंदी बेरा मुन्ने गरीब किसान मत्ता नेटा गरीब किसान ओसो सब्बे पूना निम्न-मध्यम किसान शामिल मंतोर, वीर कलियसी नाहकुना आबादी ता बहुसंख्या बनेमांतोर इंजी वेहना)। नेतृत्वकारी शाखा कुना लोप्पा लगभग दो-तिहाई लोकुर गरीब किसान मंदाना, अनि मध्यम किसान (तीना लोप्पा पाड़ना निम्न-मध्यम किसान ओसो पूना, पाड़ना उच्च-मध्यम किसान शामिल मंतोर) लगभग एक-तिहाई मंदाना, इदिनकु ज्यादा आयो। मार्गदर्शन उसूल सहकारी समितिग गरीब किसान ओसो मध्यम किसान लोरा काजे फायदा मत्ता ओसो वीरा काजे नुकसानदायक हिल्वा नीतिग लागू कीयाना। इद उदेश्य तुन पूरा कियाला काजे गरीब किसान लोर किन प्रमुख जागा ते तासना जरूरत मंता। बव सहकारी समितिग लोप्पा प्रमुख जागा ते मध्यम किसान लोर कब्जा कीसी मंतोर अगा गरीब किसान लोर किन उंदी बगिल दोबसी तासतोर अनि ओरा हित कुन नुकसान किया मंतोर। हुनान प्रांत ता

छांगशान काउंटी ता काओशान श्यांग ता अनुभव तले गरीब किसान लोर किन प्रमुख जागा ते तासना अनि मध्यम कासना लोरा संगे दृढ़ता ते एकता कीयाना जरूरत ओसो संभव मंता अनि इद्रम कियवा मंदाना बचोन खतरनाक मंता इंजी साबित आता। इद लेख ता लेखक पार्टी ती कार्यदिशा तुन पूरा समझेमांतोर अनि इद कार्यप्रणाली तुन वेने इत्तेके सबसे मुन्ने उत्पादन बेरसी कीयाना फौरी काम तुन पूरा कीयाना ओसो ताना पेरेके नेतृत्व लोप्पा गरीब किसान लोर किन प्रमुख जागा ते तासना। इद्रम कीसी गरीब किसान लोरा तल्ला पोरो तेदिता अनि मध्यम किसान लोर वेने पूरा प्रभावित आतोर। लेखक उंदी दूसरा महत्वपूर्ण पोल्लो वेहतोर। अदु गड़बड़ मत्ता सहकारी समितिं कुन भंग कीयाना सही मंता या अविन सुदृढ़ कियाला सहयाता कीयाना सही मंता? इद्रम ता सहकारी समितिं कुन सुदृढ़ कीयाना संभव मंता या? लेखक वेल्ले प्रभावी तरीका ते माटु तीसरा स्तर ता सहकारी समितिं कुन भंग कीयाना जागा ते अनि सुदृढ़ कीयाना काम ते लागना इंतोर। इद्रम ता कोशिश पेरेके तीसरा स्तर ता सहकारी समितिं कुन पहली स्तर ता सहकारी समितिं लेक्का बने कीयाना संभव मंता। देश ता वेल्ले जागा ने वेने इद्रम ता अनुभव दोरका अनि छांगशान काउंटी ता काओशान श्यान ता विशिष्ट अनुभव हिल्ले।

(“छांगशान काउंटी ता काओशान श्यांग ता उथांग कृषि-उत्पादक सहकारी समिति लोप्पा मध्यम किसान लोरा जागा ते गरीब किसान लोर किन प्रमुख जागा ते बद्रम निल्पी कीयाना” हेडिंग वाले लेख पोरो टिप्पणी)

14

बद समस्या ता बारे ते इद लेख लोप्पा रास्ताद मंता अदिना नालुंग बगिल महत्व मंता। मध्यम किसान लोरा संगे एकता कीयाना जरूरी मंता, इद्रम कियवा मंदाना गलत मंता। मति मध्यम किसान लोरा संगे एकता कीयाना ओसो पूरा नहाकुना इलाकांग लोप्पा समाजवादी बदलाव काम पूरा कियाला मजदूर वर्ग ओसो कम्युनिस्ट पार्टी तुन नहाकुना लोप्पा बोरा

पोरो आधार आसी मंदाना? बदे डावुट हिल्वा गरीब किसान लोरा पोरोने आधार आसी मंदाना। हत्ता कालम ते भूमि-सुधार काजे जर्मीदार लोरा खिलाफ संघर्ष किताद मत्ता, अस्के इद्रम कियानदे सही मत्ता ओसो नेंडु वेने कृषि ता समाजवादी बदलाव कियाला काजे धनी किसान ओसो बाकी पूंजीवादी तत्व कुना खिलाफ संघर्ष कीयानाए सही मंता। इव रेंडासी क्रांतिकारी कालम कुना लोप्पा मध्यम किसान लोर शुरूआत ते दुलमुल तोहतोर। मध्यम किसान लोर स्पष्ट रूप ते बेके वडिय वांता हके दांतोर अनि ओरकिन क्रांति जीडना गरें वात्तास्केने क्रांति ता पक्ष ते वांतोर। गरीब किसान लोर किन मध्यम किसान लोरा नडमा काम कीसी ओरकिन मना पक्ष ते कीयाना लागियर, इद्रम बस्के एवनल आखरी जीत आयो अस्के एवनल हर दिव्या क्रांति ता विस्तार आसोर दायर। नेटा कृषि-उत्पादक सहकारी समितिंग ना मैनेजमेंट कमेटींग लोप्पा वेने हत्ता कालम ता किसान संघ लेक्का पाडना निम्न-मध्यम किसान ओसो उचुन पूना-पाडना उच्च-मध्यम किसान लोर किन शामिल कीयाना। इव इद श्रेणी ता प्रतिनिधित्व कींतांग, तूलनात्मक रूप ते उच्च स्तर ता राजनीतिक चेतना तासिंतांग, मति ओरा संख्या ज्यादा मंदानायो; लगभग एक-तिहाई हालिंता। पिस्ता दो-तिहाई लोकुर गरीब किसान लोरा लोप्पाटल (नेटा गरीब किसान ओसो मुन्ने गरीब मत्ता पूना निम्न-मध्यम किसान शामिल मंतोर) सहकारी समितिंग लोप्पा मुख्य पद ते गरीब किसान लोर किन चुने कीयाना। मति इद्रम ता पर कुने पाडना निम्न-मध्यम किसान ओसो उचुन राजनीतिक चेतना बेरसिस मत्ता, न्यायप्रिय मत्ता पूना, पाडना उच्च मध्यम किसान लोर किन वेने चुने कीयाना। फूच्येन प्रांत ता फूआन काउंटी लोप्पा गरीब किसान लोरा नेतृत्व ते ताकना सहकारी समिति ओसो मध्यम किसान लोरा नेतृत्व ते ताकना सहकारी समिति समाजवादी कार्य लोप्पा अलग-अलग रुझान लागू कींतांग; इद परिस्थिति हर जागा मंता, इदिना उंदी-रेंडु घटनांग इंजी समझेमायनायो।

(फूआन काउंटी लोप्पा“गरीब किसान लोरा सहकारी समिति” संगे-संगे “मध्यम किसान लोरा सहकारी समिति” मत्तास्के दोरकना सबक’ हेडिंग वाले लेख पोरो टिप्पणी)

15

इद सामग्री वेल्ले महत्वपूर्ण मंता ओसो व्यापक रूप ते ध्यान हियना लेक्का मंता। तीना लोप्पा नहाकुना लोप्पा मत्ता विभिन्न श्रेणी ना रुझान कुना बारे ते वेहताद मंता। गरीब किसान लोरा लोप्पा सहकारी बदलाव बाते वेल्ले जोश मंता। वेल्ले मध्यम किसान “उचुन जोम हरीं हूडला” आल्सिंतोर अनि “बाहर आजाद मंदाला” आल्सिंतोर, मुख्य रूप ते ओरु तम्मा उत्पादन साधन कुन सहकारी समितिंग लोप्पा शामिल कीयाना ओरा काजे फायदा आंता या आयो इंजी हूडला आल्सिंतोर; ओरु रेंडासी ना लोप्पा बदिना बगिल दाया परिंतोर। वेल्ले टोर खुशहाल मध्यम किसान लोर किन सहकारिता तल होंग मंदिंता; ओरा लोप्पा सबसे ज्यादा खराब रुझान मंदानोर तम्मा उत्पादन साधन कुन वम्मसिंतोर, तम्मा पैस हिव्के-हक्के कींतोर, अनि नकली सहकारी समितिंग बने कींतोर। ओरा लोप्पा इरवुर-मुवुर जमींदार, धनी किसान लोरा संगे सांठगांठ कीसी गलत काम वेने कींतोर। माटु नाहकुना कार्य लोप्पा मत्ता सब्बे कामरेड्स तम्मा-तम्मा इलाका लोप्पा परिस्थिति ना अनुकूल नीतिंग बने कियाला काजे विभिन्न श्रेणिंग ना रुझान कुन सतर्कता ते आंकलन कींतिर, विश्लेषण कींतिर इंजी आशा कींतोम। इद सामग्री लोप्पा आपसी सहयोग दल कुन नजरअंदाज कीसी सहकारी समितिंग पोरो ध्यान हियाना गलत रुझान ता बारे ते वेहताद मंता। चौतरफा प्लानिंग, चौतरफा मैनेजमेंट किताद कियमूडाता। “आपसी सहयोग, सहकारिता ता जाली वाटसियाना” उंदी बेसता विचार मंता, इद्रम कीसी सहकारी समितिंग ओसो आपसी सहयोग दल कुना पोरो ध्यान हियमूडांता अनि सहकारी समितिंग आपसी सहयोग दलकु, व्यक्तिगत काम कीयाना किसान लोरा मुन्ने मत्ता उत्पादन संबंधित समस्यांग कुन हल कियाला असल सहायता कींतांग। गरबी किसान निधि

रकम तुरंत नाहकुन सौंपे कीयाना। इंजे सहकारी सहकारी समितिंग लोप्पा शामिल आयवा गरीब किसान लोर किन ओरु शामिल आतास्के इद निधि दोरकियर इंजी वेहाना।

(“पूना परिस्थिति ओसो पूना समस्यांग” हेडिंग वाले लेख पोरो टिप्पणी)

16

इद सहकारी समिति लागू कित्ता नीति सही मत्ता। सब्बे सहकारी समितिंग इद्रमे कीयाना। प्रांतकु सहकारी बदलाव कुना सवाल संबंधित तम्मा प्रस्ताव लेवेक निर्देश हीसी विधवा (रांडी), पोर्टाल-पोर्टी अनि सहारा हिल्वा सदस्य लोर किन (सहकारी समितिंग लोप्पा शामिल कीयाना), श्रमशक्ति मत्तेकाई पिस्वल वेल्ले मुश्किल ते पिस्सनोर किन ओरा मुश्किल दूर कियला मदद कीयाना। इंजे वेल्ले सहकारी समितिंग लोप्पा जरूरमंद परिवार कुन मदद कीयाना समाजवादी विचार कमी मंता, इदिनकु मुन्ने हंजी गरीब किसान लोर किन बहिष्कृत वेने कींतोर; इद्रम कीयाना गलत मंता। सरकार इंजे गरीब किसान निधि ता स्थापन कित्ता, अदिना रकम संगे कोंदांग, कृषि-औजार कुना समस्या कियाला मदद किया परित्ता। मति उचुन किसान परिवार ता श्रमशक्ति ता कमी तुन इंजे हल किया परवोर। पाड़ना अनाज मारता पेरके पूना फसल ता अनाज दोरकना मुन्ने उचुक परिवार कुना मुन्ने मत्ता अनाज समस्या तुन वेने पूरा हल किया परवो। इव समस्यांग कुन सहकारी समितिंग ना जनता ना शक्ति पोरो आधार आसी हल कियमूडांता।

(“श्यांगथान काउंटी ता छिंगफंग श्यांग ता पार्टी-शाखा सहकारी समिति ना गैर-खुशहाल सदस्य लोरा मुश्किल हल कियाला ओरा सहायता कींतांग” हेडिंग वाले लेख पोरो टिप्पणी)

17

इद उंदी वेल्ले महत्वपूर्ण विवरण आंदू। पूना-पूना मत्ता समाजवाद ता पाड़ना व्यवस्था खिलाफ गंभीर संघर्ष संगे जन्म आंता। बदे उंदी कालम

ते समाज ता उचुन लोकुर घिसेपिटे हरीं पोयसी वेल्ले जिद् पोयो लागू कियानोर। मति पेरके ओरे रुझान बदले कीसी पूना वस्तु ता पक्ष एतितोर। वेल्ले खुशहाल मध्यम किसान 1955 ता पहली 6 महिनांग लोप्पा सहकारिता ता विरोध कींतोर मति दूसरा 6 महिनांग लोप्पा ओरा लोप्पाटल वेल्ले लोकुर तम्मा रुझान बदले कींतोर अनि सहकारी समितिंग लोप्पा शामिल आल्संतोर। असल इत्तेके वीरा लोप्पा उचुन मुल सहकारिता समितिंग ना नेतृत्व ओरा कैदे वायर इंजी इद्रम कित्तोर। दूसरा श्रेणी लोप्पा वेल्ले दुलमुल मत्तोर वांतोर; ओरु पोरो-पोरो शामिल आयना पोल्लोंग कींतोर। तीसरी श्रेणी लोप्पा जिद्दी लोकुर वांतोर ओरु अस्के वेने हरीं हूडसोर मंतोर। इदिना बारे ते नाहकुना लोप्पा पार्टी-संगठन कु वेल्ले सहनशीलता संगे काम कीयाना अनि ओरकिन टाईम हियाना। नेतृत्वकारी नियम कुना लोप्पा गरीब ओसो पूना निम्न-मध्यम किसान लोरा किन मुख्य पद पोरो तासलाकाजे उचुन खुशहाल मध्यम किसान लोरा सहकारी समितिंग लोप्पा उचुन लेट शामिल आयना ज्यादा बेस आयारा।

(“दृढता ते सहकारिता हरीं पोयतोरु” हेडिंग वाले लेख पोरो टिप्पणी)

18

राजनीतिक कार्य पूरा आर्थिक कार्य ता जीवा आंदू। इदु समाज ता आर्थिक व्यवस्था लोप्पा बुनियादी बदलाव आसोर मंदानास्के साबित आंता। कृषि-सहकारिता आंदोलन शुरू तले उंदी तीव्र विचारधारात्मक, राजनीतिक संघर्ष मंदिता। इद संघर्ष ताकाव बदे सहकारी समिति ता स्थापना आया परवो। पाड़ना समाज-व्यवस्था ता जागा ते उंदी पूना समाज-व्यवस्था ता निर्माण कीयाना मुन्ने निर्माण कीयाना जागा ता सफाई कीयाना जरूरी मंता। बारांकु इत्तेके पाड़ना व्यवस्था तुन पोयसी ताकना विचार कु लोकुरा दिमाग ते वेल्ले जोम मंदितांग। बदे वेने सहकारी समिति तुन स्थापना कित्ता पेरके ओसो सुदृढ आयना मुन्ने वेल्ले संघर्ष क्रिया लागिंता। सुदृढ आतेके वेने कोशिश कम आतेके अदु बस्केने वेने मुड्डा

परिंता। शानशी प्रांत ता श्येय्वी काउंटी ता सानल ओसे सहकारी समिति ता उदाहरण हूड़ा परिंतोमा। इदु सुदृढ आता पेरके वेने लगातार कोशिश जारी तासवा कारण ते भंग आसोर-आसोर पिस्ता। अद सहकारी समिति तन्ना संकट दूर कियाला, खुद किन विकसित कियाला काजे अदिना पार्टी-शाखांग तम्मा गलतिंग ना आलोचना कित्ता। अदु सहकारी समितिंग ना सदस्य लोर किन समाजवादी शिक्षा ओसो पूंजीवाद-विरोधी शिक्षा हियाना शुरू कित्ता अनि तन्ना राजनीतिक कार्य ओसो उंदी बेरा शुरु कित्ता। पूंजीवाद ता स्वतःस्फूर्त रुझान (स्वार्थ) विरोध कीयाना, समाजवादी विचार (सामूहिक हित कुन व्यक्तिगत हित संगे काल्पना उसूल तुन पूरा कीयाना ओसो वडकना ता परिक्षा मानेमांता) तुन प्रोत्साहन हियाना। इव रेंडासी बिगड़ेमासा लघु-किसान अर्थव्यवस्था तीरम-तीरम बेहरा स्तर ते सहकारी अर्थव्यवस्थांग बगिल संक्रमण काजे विचारधारात्मक, राजनीतिक गारंटिंग कींतांगा। इद काम पूरा कियाला काजे वेल्ले परिश्रम ता जरूरत मंता। इदिन पोरो-पोरो लेवेके बकवल लेक्का आयवा किसाना लोरा अनुभव कुना वेहच ते ठोस परिस्थिति तुन हूड़सोरे कीयाना। इदिन आर्थिक कार्य संगे-संगे कीयाना अलग आयो। इंजे माटु राष्ट्रीय स्तर ते इद्रम ता काम लोप्पा वेल्ले समृद्ध अनुभव दोरकी किताद मंता। इद पोल्लो इद पुस्तक ता हर लेख लोप्पाटल साबित आंता।
 (“उंदी गंभीर सबक” हेडिंग वाले लेख पोरो टिप्पणी)

19

इद लेख ता दृष्टिकोण बेस मंता। सहकारी समितिंग राजनीतिक कार्य बेस कीयाना पोरो जोर हियाना। राजनीतिक कार्य ता बुनियादी मांग किसान लोर किन लगातार समाजवादी विचारधारा सेंग लैस कीसोर दायना ओसो पूंजीवादी रुझान कुना आलोचना कीसोर दायना मंता।

(“चांगक्वोच्वांग सहकारी समिति लोप्पा राजनीतिक कार्य” हेडिंग वाले लेख पोरो टिप्पणी)

20

इद परिस्थिति ध्यान हियाना लेक्का मंता। खुशहाल किसान लोरा लोप्पा गंभीर पूंजीवादी रुझान मंता। माटु सिर्फ सहकारी बदलाव कीयानास्के ने आयवा पेरके उंदी वेल्ले जोम किसान लोरा लोप्पा राजनीतिक काम लोप्पा उचुन वेने ढील हीतेके इद रुझान उर्ना तेदता लेक्का आयारा।

(“पूंजीवादी रुझान कुना खिलाफ दृढ़ता ते संघर्ष कीमूट” हेडिंग वाले लेख पोरो टिप्पणी)

21

सहकारी समितिंंग कुन बद्रम सुदृढ़ कीयाना इंदानदिना बारे ते उंदी विवरण आंदू इदिना अध्ययन ता मांग कीयाना। उंदी पूना समाज-व्यवस्था ता जन्म अनिवार्य रूप ते वेल्ले गिर्दा ता कोल्हार संगे आंता। इतेके पूना व्यवस्था ता महानता ता प्रचार-प्रसार ओसो पाड़ना व्यवस्था ता आलोचना संगे आंता। 50 करोड़ तूक ज्यादा चीनी किसान लोर किन समाजावादी बदलाव ता हरीं ते ओयना भूमि तुन सांगि कीयाना लेक्कटा काम वेल्ले शांतिपूर्ण वातावरण ते आया परोव; इदिन काजे माटु कम्युनिस्ट लोर पाड़ना व्यवस्था ता बोजा संगे दबेमासी मत्ता किसान लोरा बेहरा संख्या नड़मा वेल्ले हिम्मत ते, वेल्ले जीवित ओसो वेल्ले स्पष्ट रूप ते प्रचार-प्रसार कीयाना अनि ओरकिन शिक्षित कीयाना। इंजे देश लोप्पा कौंटा-कौंटा ते इद्रमे आया मंता। नहाकुना काम लोप्पा लागता वेल्ले कामरेड्स बेसता प्रचारक साबित आतोर। इद लेख लोप्पा “नालुंग रकम ता तूलना ओसो हेय्युंग रकम ता गणना कीयाना”³ ता चर्चा किताद मंता अदु किसान लोर किन स्पष्ट रूप ते सही-गलत समझे कीयाना उंदी बेसता तरीका आंदू। इद तरीका समझे कियाला वेल्ले सफल आंता। इद तरीका प्रचार-प्रसार कीयाना काम लोप्पा निपुण हिल्ला ओसो तम्मा पोल्लो संगे बोनकिने प्रभावित किया परवा कामरेड्स ना तरीका तुकू अलग मंता: “मीटु कम्युनिस्ट पार्टी हर्दे ताकना लेवेके च्यांग काई-शेक ना हर्दे

ताकना” इंतोर अनि उंदी लेबल वाटसी धमकी हीसी तम्मा पक्ष ते कीयाना कोशिश कींतोरा। इद तरीका स्थानीय किसान लोरा खुद ता अनुभव कुन इस्तेमाल कीसोरे ओरा लोप्पा विस्तृत रूप ते विश्लेषण कीयाना तरीका आंदू। अदिन काजे इदिना संगे वेल्ले बेस समझे कियमूडांता।

(“उंदी सहकारी समिति तुन सुदृढ कीयानास्के दोरकता महान अनुभवकु” हेडिंग वाले लेख पोरो टिप्पणी)

22

प्रतिक्रांतिकारीर सहकारी आंदोलन लोप्पा तोडफोड कीयाना उंदी आम घटना आंदू ओसो इद सिर्फ क्वेइचओ प्रांत ता तूयुन काउंटी ता पांचवी जिला एवनले सीमित हिल्ले। मति दूसरा प्रांत कुना लोप्पा इद्रम ता घटनांग ना बारे ते वेल्ले कम रास्ताद मंता। सहकारी बदलाव ताकनास्के नाहकुना काम कीयाना सब्बे कामरेड्स प्रतिक्रांतिकारीरा तोडफोड कीयाना कार्रवाईंग खिलाफ कीयाना संघर्ष बगिल हालनाजोम ध्यान हियाना जरूरी मंता। तूयुन काउंटी ता इद जिला लेक्का सहकारी समितिंग लोप्पा वेने सुरक्षा संगठन कुना स्थापना कीयाना। ताना लोप्पा पार्टी, नौजवान संघ ता सदस्य लोर मोरकुल लेक्का काम कीयाना। जिला ता पार्टी कमेटींग काजे अवु काउंटी ना पार्टी-कमेटींग ना नेतृत्व, निरीक्षण लोप्पा परिस्थिति ता अध्ययन कीयाना, पार्टी लोप्पा ओसो बाहर ता लोकुर नडमा प्रचार-प्रसार कीयाना ओसो समझे कीयाना काम कीयाना, प्रतिक्रांतिकारीरा तोडफोड ता कार्रवाईंग पोरो जनता ना सतर्कता तुन बेरसी कीयाना, ताना पेरके मौका दोरकी कीसी सहकारी समितिंग ना नेतृत्वकारी शाखांग लोप्पा नेंगता प्रतिक्रांतिकारीर, गलत तत्व कुना जांच-पडताल कीयाना अविन बाहर तेंडसियाना ओरकिन सजा हियाना जरूरी मंता। मति तेंडसियाना लोकुर निज्जमे प्रतिक्रांतिकारी ओसो गलत तत्व मंदाना। बेसता लोकुरा लोपो लेवेके सिर्फ उचुन कमजोरिंग मंदानोरा पोरो गलत तत्व कुना लेबल वाटसी ओरकिन तेंडनायो। सजा सही मंदाना अनि काउंटी अर्थॉरिटी तय कीयाना जरूरी मंता।

“प्रतिक्रांतिकारीरा तोड़फोड़ खिलाफ दृढ़ता ते संघर्ष कीयाना”
हेडिंग वाले लेख पोरो टिप्पणी)

23

उंदी महान समाजवादी समाज ता निर्माण कियाला काजे उत्पादन गतिविधिं काजे महिला लोरा बेहरा संख्या तुन गोलबंद कीयाना वेल्ले महत्वपूर्ण मंता। उत्पादन-काम लोप्पा महिला ओसो पुरुष इरवुरासी समान काम काजे समान मजदूरी हियाना। पुरुष ओसो महिला लोरा असल समानता पूरा समाज ता समाजवादी बदलाव आयनास्के ने दोरकिंता।

(“महिला लोर इंजे श्रम ता मोर्चा ते एवतांग” हेडिंग वाले लेख पोरो टिप्पणी)

24

इद लेख सब्बे जागा ना काजे संदर्भ-सामग्री ता काम किया परिंता। नौजवान लोर समाज ता सबसे ज्यादा सक्रिय ओसो गतिशील ताकत मंदितोर। ओरा लोप्पा करियाना वेल्ले तीव्र विचार मंदिता। ओरा विचार सबसे कम रूढीवादी मंदिता, इद पोल्लो समाजवादी युग लोप्पा सही साबित आंता। माटु सब्बे जागा ना पार्टी-संगठन नौजवान संघ ता संगठन कुना संगे तालमेल कीसोर मना नौजवान लोरा ताक पूर्ण विकास बगिल ध्यान हियानूर अनि ओरा विशिष्टतांग कुन नजरअंदाज कीसी बाकी लोकुरा लेक्का गलत रुझान लागू कीवोर आयनूर इंजी आशा कीतोमा। नौजवान लोर मुयतोरिगल करियना अनि योग्य काम कीयानास्के परताचोन ओरा सहमति दोरकी कीयाना कोशिश कीयाना। मुयतोर रूढीवादी विचार कुना संगे ग्रस्त मंदितोर अनि नौजवान लोरकिन प्रगतिशील गतिविधिं लोप्पा हिस्सा एतला रोमी कींतोर। बस्के एवनल नौजवान सफलता दोरकी कीवोर अस्के एवनल ओरु ओरा पोल्लॉंग केंजोर आंतोर। इव सब्बे पोल्लॉंग इद लेख लोप्पा वेल्ले बेस रास्तद मंता। स्वाभाविक रूप ते रूढीवादी विचार कुना संगे इनपड़े समझौता

कीयानायो। मति माटु इद तरीका लागू कीसी कागरग साबित आतेके ओरु जरूरी सहमत आंतोर।

(“चुंगशान काउंटी ता शिनफिंग श्यांग ता नौवी कृषि-उत्पादक सहकारी समिति ता नौजवान अग्रिम दस्ता” हेडिंग वाले लेख पोरो टिप्पणी)

25

इद लेख लोप्पा सब्बे जागा ने संदर्भ-सामग्री ता काम किया परिंता। तीना लोप्पा सेकंडरी स्कूल ता विद्यार्थि ओसो प्राइमरी पास लोकरु किन सहकारी आंदोलन लोप्पा हिस्सा एतला काजे संगठित कीयाना बारे ते रास्ता मंता। इद पोल्लो वेल्ले ध्यान हियाना लेक्का मंता। नाहकुना लोप्पा हंजी काम किया परना सब्बे शिक्षित नौजवान खुशी ते अगा लोहना। नहाकुना इलाका वेल्ले बेहरा दुनिया मंता ताना लोप्पा वेल्ले काम कीयाना संभावना मंता।

(“उंदी श्यांग लोप्पा सहकारी बदलाव ता योजना बने कीयाना अनुभव” हेडिंग वाले लेख पोरो टिप्पणी)

26

छन श्वे-मंग ना उदाहरण उंदी दूसरा उदाहरण आंदू। चीन लोप्पा इद्रम ता वीर लोरा वेल्ले मंतोर, मति मावा लेखक लोर ओरा बारे जानकारी दोरकी किया परवो आंतोर। सहकारी आंदोलन किना मार्गदर्शन कियाला काजे नहाकुनोरा लोप्पा दांतोर ओरु वेल्ले इद्रम ता पोल्लोंग हूडिंतोर मति वेल्ले कम रासिंतोर।

(“सहकारी बदलाव ता गति-निर्धारक छन श्वे-मंग” हेडिंग वाले लेख पोरो टिप्पणी)

27

इद लेख वेल्ले बेस रासताद मंता। इदिन सब्बे काउंटिंग, जिलांग ना पार्टी, नौजवान संघ ता कमेटिंग ओसो सब्बे श्यांग कुना पार्टी, नौजवान

संघ ता शाखांग पड़ेमायाना। तीना लोप्पा रास्ता उदाहरणकुना पोरो सब्बे सहकारी समितिंग ताकना। लेखक पार्टी कार्यदिशा तुन समझेमातोर अनि सही पोल्लो रास्तोर। लेख ता भाषा बेस मंता पड़ेमायला हल्को मंता अनि घिसेपेट पार्टी-लेखन लेक्का हिल्ले। इगा माटु पड़ेमायनोरा ध्यान मना वेल्ले कामरेड्स ना घिसेपिटे पार्टी-लेखन ता आदत आता, ओरा लेख कुना लोप्पा सजीवपन हल्को भाषा मन्नो ओसो अविन पड़ेमायनास्के तल्ला नोयना सच्चाई बगिल आकर्षित कियाला आल्लिसंतोमा ओरु वाक्य-रचना ता नियम, शब्द-चुने कीयाना पोरो वेने ध्यान हीवोर, प्राचीन भाषा ओसो आधुनिक भाषा ता खिचड़ी बनेमाता शैली तुन विचार कीतोर। ताना लोप्पा बस्केने बेहरा-बेहरा शब्द, जोड़ेमायवा मंदना मंदिता अनि बस्केने जरूरी शब्द कुन तेंडसी अविना जागा ते पाड़ना शब्द कुना इस्तेमाल कीसी पड़ेमायनोर किन यातना हियाना किरिया कित्ता लेक्का कीतोर। इद पुस्तक काजे चुने कित्ता 170 तूकू ज्यादा लेख कुना लोप्पा वेल्ले घिसेपिटे-पार्टी लेखन वाले लेख मंतांग। अविन बार-बार सुधरे कित्ता पेरकेने पड़ेमायना लेक्का बने किताद मंता। अविना लोप्पटल इंजे वेने उचुन लेख स्पष्ट हिल्लेंगा। अविना विषय-वस्तु महत्वपूर्ण मंतांके इद पुस्तक लोप्पा शामिल किताद मंता। समाचार पत्र ओसो पत्रिकांग लोप्पा सम्पादक लेक्का काम कीयाना कामरेड्स इदिना पोरो ध्यान हियाना, तम्मा लेखक लोर कुन स्पष्ट ओसो पड़ेमायना लेक्का रासना इंजी अपील कीयाना, ओरा पांडुलिपिंग कुन सुधरे कीयाना काम खुद कियाला वेहाना इंजी मांग कीतोमा।

(“सहकारी समितिंग लोप्पा राजनीतिक काम” हेडिंग वाले लेख पोरो टिप्पणी)

28

इगा वांग क्वो-फान ना नेतृत्व ते ताकना “कंगाल लोरा सहकारी समिति” ता बारे ते वेहताद मंता। मावा सब्बे कृषि-उत्पादक सहकारी समितिंग नाए आयवा सब्बे आर्थिक कारोबार कुना संचालन कीयानास्के

मेहनत, बचत ता उसूल पोरो अमल कीयाना। कारखानांग, दुकान, सब्बे राष्ट्रीय, सहकारी, बाकी कारोबार कुन ताकी कीयानास्के मेहनत, बचत पोरो अमल कीयाना। इद उसूल तुन हर काम कीयानास्के अमल कीयाना। इद कमखर्ची ता उसूल, समाजवादी अर्थव्यवस्था ता उंदी बुनियादी उसूल आंदू। चीन उंदी बेहरा देश आंदू मति अदु इंजे वेल्ले गरीब मंता, चीन तुन समृद्ध बने कियाला बचोनो दशक लागिंय। अस्के वेने मेहनत, बचत ता उसूल तुन अमल कीयाना जरूरी आयर। मति वायना बचोनो दशक कुना लोप्पा बचोनो पंचवर्षीय योजनांग ताकानास्के मेहनत, बचत पोरो विशेष जोर हियाना जरूरी मंता। इंजे वेल्ले सहकारी समितिंग कमखर्ची बगिल ध्यान हीसोर हिल्लेंगा। इद उंदी गलत रुझान आंदू, इदिन तुरंत सुधरे कीयाना। मेहनत, बचत संगे ताकना सहकारी समितिंग हर प्रांत ओसो काउंटी लोप्पा परहकना अविना उदाहरण ता प्रचार-प्रसार कीसी लोक्कुर किन प्रोत्साहित कीयाना। मेहनत, बचत कीयाना, सबसे ज्यादा उत्पादन कीयाना काम बेस कीयाना सब्बे सहकारी समितिंग ना तारीफ कीयाना अनि अविन पुरस्कृत कीयाना; इदिना उत्पाट फिजूलखर्ची कीयाना, वेल्ले कम उत्पादन कीयाना, हर काम लोप्पा पेरेक मंदाना सहकारी समितिंग ना आलोचना कीयाना।

(“सहकारी समितिंग मेहनत, बचत संगे ताकी कीयाना” हेडिंग वाले लेख पोरो टिप्पणी)

29

इद श्यांग ता उंदी हजार तुकू ज्यादा परिवार वाले उंदी बेहरा सहकारी समिति (इदिन सामूहिक फार्म इंतोर) काजे बने कित्ता उंदी दीर्घकालीन सातवर्षीय योजना आंदू। इद योजना सब्बे जागा ने संदर्भ-सामग्री ता काम किया परिंता। इद सामग्री ता विषय-वस्तु तुन पढ़ेमाता पेरेके लोक्कुर इद्रम ता दीर्घकालीन योजना ता जरूरत तुन जरूर समझेमायनुर। मानव समाज ता विकास ता इतिहास लाखों साल पाड़ना मंता, मति इगा चीन लोप्पा मावा अर्थव्यवस्था ओसो संस्कृति योजनाबद्ध विकास काजे अनुकूल परिस्थिति सिर्फ नेंडे वात्ता। इद्रम ता परिस्थिति ते मावा देश ता स्वरूप हर

साल बदलेमासोर मंता। हर पाँच साल लोप्पा वेल्ले बदलाव आंता अनि बचोनो साल हत्ता पेरके ओसो बेहरा बदलाव आयार।

(“लाल सितारा सामूहिक फार्म ता दीर्घकालीन योजना” हेडिंग वाले लेख पोरो टिप्पणी)

30

इद लेख सब्बे तोर पढ़ेमायना लेक्का मंता, हर जागा ता सहकारी समितिंग तम्मा दीर्घकालीन योजना बने कीयानास्के इदिन उंदी संदर्भ-सामग्री लेक्का इस्तेमाल किया परिंतांग। लेखक “उत्पादन योजना बने कीयाना प्रक्रिया प्रगतिशील विचारकु ओसो रूढीवादी विचार कुना नड़मा ता संघर्ष आंदू” इत्तोर। रूढीवादी विचार लगभग सब्बे जागा गड़बड़ कींतांग। अविना पोरो काबू कियान ओसो उत्पादन ताकत, उत्पादन-कार्य लोप्पा उंदी बेहरा डाका वाटला काजे सब्बे जागा ओसो सहकारी समितिंग तम्मा-तम्मा दीर्घकालीन योजनांग बने कीयाना।

(“उंदी सहकारी समिति ता 3 वर्षीय उत्पादन योजना” हेडिंग वाले लेख पोरो टिप्पणी)

31

इद श्यांग सहकारी बदलाव, उत्पादन-वृद्धि, जल-संरक्षण, पार्टी, नौजवान संघ ता संगठन कुना सुदृढीकरण, सांस्कृतिक, शैक्षणिक कार्य लेक्कटविना काजे उंदी 2 वर्षीय योजना बने कित्ता। अनि चीन ता हर श्यांग वेने इद्रमे कीयाना। उचुन लोकुर योजना बने कीयाना उंदी कठिन काम आंदू इंतोर। 1956 ते मावा देश हर काउंटी, जिला ओसो श्यांग तुन उंदी चौतरफा योजना बने कीयाना, ताना लोप्पा इगा वेहता योजना तुकू ज्यादा विषय सहायक धंधा, व्यापार, वित्त, वृक्षारोपण, स्वास्थ्य-काम लेक्कटविन शामिल कीयाना। योजना बने कियवा मंजी तल्ला पोरो कैय तासिसी उदसी मंदाना जागा ते उंदी असल परिस्थिति संगे सौ प्रतिशत मेल तिनवा मंदाना योजना पंडना बेस आंता। बदे प्रांत ता उंदी-रेंडु काउंटिंग, जिलांग ओसो श्यांगकु बेसता योजनांग बने कीतेके अविना तुरंत प्रचार-प्रसार कीयाना अनि दूसरा काउंटिंग जिला ओसो श्यांग कुना

काजे उदाहरण लेक्का पेश कीयाना। योजना बने कीयाना कठिन मंता इंतोर मति इद काम अचोन कठिन हिल्ले इंजी तोहचियाना।

(“ईथाओ श्यांग ता चौतरफा योजना” हेडिंग वाले लेख पोरो टिप्पणी)

32

इद लेख वेल्ले महत्वपूर्ण ओसो सब्बे काउंटिंग काजे संदर्भ-सामग्री लेक्का काम वाया परिंता। हर काउंटी तन्ना चौतरफा योजना ते जल-संरक्षण योजना तुन शामिल कीयाना। कृषि-उत्पादन वृद्धि कीयाना गारंटी कियाला काजे इद योजना वेल्ले महत्वपूर्ण तरीका मंता। सुडला-सुडला जल-संरक्षण परियोजनांग ना निर्माण कीयाना क्षमता काउंटिंग, जिलांग, श्यांग ओसो सहकारी समितिं लोप्पा मंता। अदिन काजे योजनांग बने कीयाना, अविन उचुन साल लोप्पा पूरा कीयाना वेल्ले जरूरी मंता। इद्रम कीसी असाधारण, अनियंत्रित ऊसा ओसो फसल वेतना परिस्थिति तुन विडचसी, मुसुर वायवेके सिंचाई ओसो ऊसा वातेके ज्यादा आत्ता एर दायना ता गारंटी कियमूडांता। इदिना पोरो जरूर अमल कियमूडांता। सहकारी समितिं लोप्पा संगठित आता पेरके जनता ना ताकत वेल्ले बेरसियरा। साधारण ऊसा ओसो मुसुर वायवा समस्या तुन हत्ता हजारों साल तल हल किया परवा मत्तोर मति इंजे उचुने साल लोप्पा इदिन हल कियमूडायरा।

(“हर मानेय निगा उंदी मू जमीन मंदाना” हेडिंग वाले लेख पोरो टिप्पणी)

33

पद्दिंग पोसे कीयाना उंदी महत्वपूर्ण काम आंदू, इदिना खाद जमा कीयाना, हव्विंग सप्लाई कीयाना ओसो निर्यात संगे विदेशी मुद्रा कमई कीयाना काम पोरो सीधा प्रभाव अरिंता; अदिन काजे सब्बे सहकारी समितिं पद्दिंग पोसे कीयाना योजना शामिल कीयाना अनि प्राकृतिक रूप ते प्रांत, प्रिफेक्चर, काउंटिंग ओसो जिलांग ना वेने तम्मा-तम्मा योजनांग मंदाना। पद्दिंग काजे चारो हल्कोए दोरकिंता; उचुन रकम ता रोंडा ओसो

मर्राक ना आकिंग, कचनार माटी ओसो अदिना टोंडा लेक्कटविन पडिंंग तितांगा। अविन सिर्फ अनाज ता वेल्ले मात्रा तीहाना जरूरत हिल्ले। सहकारी समितिंंग सामूहिक रूप ते पडिंंग पोसे कीयानाए आयवा हर किसान परिवार ता वेने उंदी-रेंडु तुकू ज्यादा पडिंंग पोसे कीयाना सलाह हियाना अनि उचुन साल लोप्पा इद लक्ष्य तुन पूरा कीयाना। बदे डावुट हिल्ला पडिंंग पोसे कीयाना मना मत्ता अल्पसंख्यक राष्ट्रीयतांग ना लोकर, तम्मा धार्मिक कारण कुना कारण ते मना किया परितोरा। पडिंंग पोसे कियाला काजे प्रोत्साहित कीयाना उद्देश्य ते लगातार ठोस निर्णय एतना अनि चच्यांग प्रांत ता शांगह्ला सहकारी समिति ता अनुभव इदिना संबंध ते सब्बे जागा ने संदर्भ-सामग्री लेक्का काम वाया परितांगा।

(“बेहरा संख्या ते पडिंंग पोसे कीयाना जागा ने” हेडिंंग वाले लेख पोरो टिप्पणी)

34

कृषि ता सहकारी बदलाव तुकू मुन्ने देश ता वेल्ले जागा ने अतिरिक्त श्रमशक्ति उंदी समस्या लेक्का मत्ता। मति ताना पेरके वेल्ले सहकारी समितिंंग कुन श्रमशक्ति ता कमी आतांकु बेहरा संख्या ते महिला लोर किन खेती काम लोप्पा शामिल आयला गोलबंद कीयाना जरूरी आता। वेल्ले लोकर आल्सा परवा लेक्कटा उंदी महत्वपूर्ण पोल्लो मत्ता। लोकर सहकारिता लागू कित्ता पेरके श्रमशक्ति फालतू आयार इंजी आल्सतोरा। मति श्रमशक्ति मुन्नेटले फालतू मत्ता ओसो ज्यादा आतेके बाताल आयर? वेल्ले जागा ने सहकारिता पोरो अमल कीयानास्के इद्रम ता भ्रम पैदा आता बारांकु इत्तेके समस्या श्रमशक्ति ता फालतू आयानादिना आयवा कम आयनादिना वात्ता। उचुन जागा ने सहकारिता पोरो अमल कित्ता पेरके उचुन जोम एवनल श्रमशक्ति जरूर फालतू आता मति इदिना कारण ओरु इंजे एवनल उत्पादन स्तर तुन विस्तृत कित्ता हिल्ला मंदानदु मंता। चौतरफा आर्थिक उद्यम कुन शुरू कित्ताद हिल्ले ओसो तीव्र खेती शुरू कित्ता हिल्ले। वेल्ले जागा ने बद्रम-बद्रम उत्पादन बेरसोर दांता, उद्यम कुना संख्या वेने बेरसोर दांता, प्रकृति ता बदलाव कीयाना कोशिश लोप्पा

मुन्ने तूकू ज्यादा व्यापक ओसो गंभीरता वांता। काम बचोन तीव्र आंता अचोने श्रमशक्ति ता कमी ओसो ज्यादा स्पष्ट आंता। इद सिर्फ शुरूआत आंदू, पेरके-पेरके इद ओसो ज्यादा स्पष्ट आंता। कृषि ता मशीनीकरण आता पेरके वेने इद परिस्थिति इद्रमे मंदिता। वायना कालम ते रक-रकम ता कारोबार कुना उदय आयार (इविना बारे ते मुन्ने माटु पुन्वा मंदितोम), कृषि-उत्पादन तन्ना वर्तमान स्तर तल बचोनो गुना बेरसिसि मंदिता। उद्योग, संचार ओसो विनिमय ता पाड़ना रिवाज बचोनो विकसित आयारा। इदे परिस्थिति विज्ञान, संस्कृति, शिक्षा ओसो स्वास्थ्य लोप्पा वेने आयारा। चीन लोप्पा महिला श्रमशक्ति ता उंदी बेहरा सुरक्षित भंडार आंदुंगा। उंदी महान समाजवादी देश ता निर्माण कीयाना संघर्ष लोप्पा इद सुरक्षित भंडार तुन इस्तेमाल कीयाना। महिला लोर किन उत्पादल गतिविधिंंग लोप्पा शामिल आयला काजे प्रोत्साहित कीयाना उद्देश्य ते पुरुष ओसो महिला लोर किन समान काम काजे समान मजदूरी हियाना नियम लागू कीयाना। चच्यांग प्रांत ता च्येनते काउंटी ता अनुभव तल सब्बे सहकारी समितिंंग करिया परिंतांंग।

(“महिला लोर किन उत्पादन लोप्पा शामिल आयला काजे गोलबंद कीसी श्रमशक्ति ता कमी मंदाना समस्या तुन हल किताद मंता” हेडिंग वाले लेख पोरो टिप्पणी)

35

इद उंदी आम समस्या आंदू। इव रेंडासी सहकारी समितिंंग ना अनुभव लोप्पटल उत्पादन ता वर्तमान परिस्थिति ते श्रमशक्ति ना लगभग एक-तिहाई फालतू आता इंजी वेहिंता। बद काम क्रियाला 3 मानेय ना जरूरत मंदिता अदिन सहकारी बदलाव आता पेरके सिर्फ 2 मानेय क्रिया परिंतोर; इद महान समाजवाद निशानी आंदू। इद एक-तिहाई लेवेके अदिनकु ज्यादा अतिरिक्त श्रमशक्ति ता इस्तेमाल बेगाटल वाया परिंता? इदिना ज्यादातर हिस्सा ता इस्तेमाल इंजे वेने नाहकुना लोप्पाने आया मंता। समाजवादी सिर्फ मेहनतकश लोकुर किन ओसो उत्पादन साधन कुन पाड़ना समाज ता बंधन तल आजाद किताद हिल्ले अदु पाड़ना समाज

इस्तेमाल किया परवा प्रकृति ता असीमित संसाधन कुना भंडार तुन वेने तेरियसिता। जनता लोप्पा सृजनात्मक शक्ति मंदिता। अदु खुद किन संगठित कीसी सब्बे काम लोप्पा, शाखांग लोप्पा तम्मा ताकत ता पूर्ण विकास किया परिंता, उत्पादन काम ता गंभीर ओसो व्यापक रूप ते संचालना किया परिंता। तम्मा सुख-सुविधा काजे वेल्ले उद्यम कुन शुरू किया परिंता। इंजे एवनल माटु कृषि ता मशीनीकरण ता चर्चा किताद हिल्ले। मशीनीकरण संगे ओसो वेल्ले श्रमशक्ति पिस्सा परिंता। इदिन इस्तेमाल कीयाना तरिका परहकमूडांता या? इंगो, उचुन मशीनीकृत राष्ट्रीय फार्मकुना अनुभव कुना पोरो आधार आसी इद तरीका जरूर परहकमूडांता। बद्रम-बद्रम उत्पादन ता स्तर बेरसिंता, उद्यम कुना संख्या बेरसिंता, काम वेल्ले तीव्र आंता, अद्रम-अद्रम श्रमशक्ति ता इस्तेमाल बद्रम कीयाना इंजी परेशान आयना जरूरत मन्नो आंता।

(“अतिरिक्त श्रमशक्ति ता इस्तेमाल काजे हरीं परहकतद मंता” हेडिंग वाले लेख पोरो टिप्पणी)

36

इद काउंटी लोप्पा मत्ता परिस्थिति तल इंजे नाहकुना अतिरिक्त श्रमशक्ति ता इस्तेमाल काजे नाहकुना लोप्पाने हरीं परहकमूडांता इंजी साबित आता। बद्रम-बद्रम मैनेजमेंट व्यवस्था सुधरेमायार, उत्पादन स्तर विस्तृत आयार अद्रम-अद्रम श्रम कीयाना परना हर पुरुष-महिला साल लोप्पा ज्यादा श्रम-दिय्या काम कीयाना मौका दोरकियार। हर पुरुष सौ तुक ज्यादा श्रम-दिय्यांग काम कीयाना अनि हर महिला 20 तुकू ज्यादा दिय्यंग कीयाना जागा ते इद लेख लोप्पा वेहता लेक्का हर पुरुष साल ते 200 दिय्या तुकू वेने ज्यादा किया परिंतोर अनि हर महिला सौ श्रम-दिया लेवेके अदिनकु ज्यादा काम किया परिंता। देश ता बाकी जागा ने सहकारी समितिंग इद स्तर ते मुन्ने ने एवतांग। सहायक धंधा ना उत्पादन काजे उंदी हाटुम मंदाना जरूरी मंता। मति अदिन उंदी अंधाधुंद तरिका ते विकसित कीयानायो। पूरा देश लोप्पा हूडतेके नाहकुना सहायक धंधा ना उत्पादन ज्यादातर नहाकुना इलाकांग ना जरूरत कुने पूरा कींता, मति इदिना उंदी

बेसता हिस्सा वायना कालम ते विस्तार आयना, शहर कुना जरूरत, निर्यात कुना मांग तुन पूरा कीयाना जरूरी ओसो संभावना मंता। इदु राज्य ता एकीकृत योजना मंदाना जरूरी मंता। इदिन अंधाधुंध विकास कीयाना तल बचेमायना।

(“श्यांगइन काउंटी अतिरिक्त श्रमशक्ति ता इस्तेमाल काजे हर्ही परहकता” हेडिंग वाले लेख पोरो टिप्पणी)

37

इद लोप्पा उदाहरण कुन सब्बे जागा लागू कियमूड़ांता। “अकाउंटेंट हिल्लेर” इंदाना बहाना कीयाना लोकरु सहकारिता ता तीव्र विकास ता विरोध कींतोरा। पूरा देश लोप्पा कृषि सहकारिता काजे दसियों लाख अकाउंटेंट लोरा जरूरत मंता, वीरकिन बेगाटल दोरकी कीयाना? इद्रम ता जनशक्ति निज्जमे मंता, बारांकु इत्तेके प्राइमरी स्कूल, जूनियर सेकंडरी स्कूल तल पास आता विद्यार्थि कुन इद काम काजे बेहरा संख्या ते गोलबंद कीयाना। ओरकिन शिक्षित कीयाना, काम कीयानास्के ओरा सांस्कृतिक ओसो व्यवसायिक स्तर बेरसी कीयाना काम कीयाना। हर जिला लोप्पा कृषि-उत्पादन सहकारी समितिग, सप्लाई, अस्सना-वम्मना सहकारी समितिग, कर्ज हियाना सहकारी समितिग ना अकाउंटेंट लोर किन संगठित कीसी अकाउंटेंट लोरा आपसी सहयोग दल बने कीयाना। इदे ओरा सांस्कृतिक ओसो व्यावसायिक स्तर पोरो कीयाना बेसता तरीका मंता। चांगऊ काउंटी ता तीसरा जिला लोप्पा स्थापना कित्ता उंदी दल इव रेंडासी पहलुंग लोप्पा अकाउंटेंटे लोरा स्तर पोरो तेहला मदद कित्ता, इदे आयवा वेल्ले आर्थिक, राजनीतिक कार्य वेने कित्ता। काउंटी, जिल स्तर ता पार्टी-संगठनकु इगा वेहता काम पोर ध्यान हियाना ओसो अदिना मार्गदर्शन कीयाना जरूरी मंता।

(“कृषि-उत्पादन सहकारी समितिग, सप्लाई, क्रय-विक्रय सहकारी समितिग, कर्ज हियाना सहकारी समितिग ना अकाउंटेंट लोरा आपसी सहयोग दल स्थापना कीयाना अनुभव” हेडिंग वाले लेख पोरो टिप्पणी)

इगा बद अनुभव ता चर्चा किताद मंता अदिना प्रचार-प्रसार कीयाना। मति “उंदी अनपढ़ देश लोप्पा कम्युनिस्ट समाज ता निर्माण आया परवो”⁴ मावा देश लोप्पा नेंडु वेल्ले लोकुर अनपढ़ मंतोर मति समाजवादी निर्माण काजे अनपढ़ता दूर आयनल जोर हर्ही हूड़मूड़ायो। इद्रम कीतेके उंदी तीव्र अंतरविरोध पुट्टिता। नेंडु मावा देश लोपा सिर्फ स्कूल ते भर्ती आयना उम्र ता वेल्ले पिल्ला-पेकोरा काजे स्कूले आयवा ओरकिन बेहरा उमर ता लेय्योरा काजे वेने वेल्ले स्कूल हिल्लेंग इत्तेके सेडो मुयतोर बेगा मंदिता। इद गंभीर समस्या तुन कृषि सहकारिता ताकनास्के हल कियान, सिर्फ इद्रम कीयानास्के ने हल कियमूड़ांता। सहकारी समिति ना स्थापना कीतेके किसान लोरा लोप्पा आर्थिक जरूरत कुना कारण कुन पढ़ेमायना-रासना करियाना तीव्र विचार वांता। सहकारी समितिंग ना स्थापना कीतांकु किसान लोरगा सामूहिक ताकत वांता ओरा परिस्थिति पूरे बदलेमांता। ओरु खुद तम्मा साक्षरता क्लास ताकी किया परिंतोरा। पहली, श्रम-अंक ता हिसाब कियाला काजे ओरु तम्मा नाहकु लेवेके श्यांग ता लोकुर ओसो जागा ना पोरोल, कृषि-औजार कुना पोरोल, विभिन्न रकम ता कृषि-काम काजे इस्तेमाल आयना शब्द ओसो बाकी जरूरी शब्द (इविना कुल संख्या रेंडु-मूंड सौ मंता) रासला करिया लागिगर। ताना पेरके तम्मा शब्द-भंडार बेरसी किया लागिगर। इद्रम ओरा काजे रेंडु रकम ता पाठ्य-पुस्तक कुना जरूरत मंदिता। पहली रकम ता पाठ्य-पुस्तक बदे जागा ता विशेष सहकारी समितिंग ना जरूरत कुन सुरता तासिसी स्थानीय शिक्षित लोकुर सहकारिता कार्य ता मार्गदर्शन कीयाना कामरेड्स कुना सहायता ते तैयार कियाना। हर जागा तुन तम्मा अलग-अलग पाठ्य-पुस्तक तैयार कीयाना, सब्बे तोरा पाठ्य-पुस्तक उंदी लेक्का मंदानायो। इद्रम ता पाठ्य-पुस्तक तुन पोरो स्तर ता अर्थोरिटी ता मंजूरी एतना जरूरी मंदिता। दूसरा रकम ता पाठ्य-पुस्तक लोप्पा वेने उचुन सौ शब्द मंदाना अनि अदिन वेने इद्रमे तैयार कियाना। अदिन उंदी सीमित इलाका लोप्पा (उदाहरण तुकू उंदी काउंटी लेवेके प्रिफेक्चर) इस्तेमाल

आयना वस्तु, शब्द-समूह पोरो ओसो प्रांत (म्युनिसिपलटंग लेवेके स्वायत्त प्रदेश) ओसो पूरा देश लोप्पा इस्तेमाल आयाना वस्तुंग, शब्द-समूह पोरो आधार आसी तैयार किया। इद्रम ता पाठ्य-पुस्तक ता वेने सब्बे जागा ने उंदी लेक्का मंदाना जरूरी हिल्ले मति काउंटी, प्रिफेक्चर, प्रांत (म्युनिसिपलटिंग लेवेके स्वायत्त प्रदेश) कुना शैक्षणिक अथॉरिटी तुरंत जांच किया। इव रेंडासी निर्णय कुना पेरके तीसरा निर्णय एतना; इदिना लोप्पा हर प्रांत (म्युनिसिपलटी लेवेके स्वायत्त प्रदेश) ता विद्या विभाग कु आम प्रयोग काजे तीसरा रकम ता पाठ्य-पुस्तक तैयार कीयाना इंजी आशा कीतोमा। पेरके वेल्ले उन्नत स्तर ता पाठ्य-पुस्तक तैयार कीयाना जरूरी आंता। राष्ट्रीय स्तर ता सांस्कृतिक, विद्या विभाग कु इदिना लोप्पा पूर्ण ओसो सही मार्गदर्शन किया। शानतुंग प्रांत ता च्वीनान काउंटी ता काओच्याल्यूकओ नाटे ना नौजवान संघ ता शाखा उंदी सृजनात्मक काम कित्ता। अगा इद्रम ता काम हूइसी वेल्ले खुशी आता। इद शाखा तन्ना श्याग ता प्राइमरी पास लोकुरा लोप्पाटले अध्यापक परहकता। प्रगति ता रफ्तार तेज आताद मंता, सौ तुकू ज्यादा नौजवान लोर, बालिग लोर ढाई महीना लोप्पा लगभग दो सौ माने करियतोर। इंजे और तम्मा मजदूरी ता हिसाब खुद तासा परितोर अनि ओरा लोप्पटल उचुन मुल सहकारी समिति ना अकाउंटेंट बनेमातोर। “अकाउंटेंट बने मायना पाठ्यक्रम” इद उंदी सही पोरोल मंता। इद्रम ता पाठ्य-क्रम हर जागा तेरियाना। नौजवान संघ ता हर स्तर ता संगठन तुन इद काम ता मार्गदर्शन कीयाना अनि पार्टी, सरकार ता सब्बे संगठन कु इदिना समर्थन कीयाना।

(“च्वीनान कांटी ता काओच्याल्यूकओ नाटे ना नौजवान संघ ता शाखा अकाउंटेंट बनेमाया पाठ्यक्रम शुरू कियाला अनुभव दोरकी कित्ता” हेडिंग वाले लेख पोरो टिप्पणी)

39

इद लेख कृषि, जंगल, पशुपालन उत्पादक सहकारी समितिंग ना बारे ते मंता। इदिना नेतृत्व ली शु-ता कियानोर। तम्मा स्थापना पेरके मूंड

साल लोप्पा इद सहकारी समिति 283 परिवार वाले उंदी बेहरा सहकारी समिति बने माता। इद थाएहांग मेड्रा ता उंदी फडी इलाका ते मंता मति इव 3 साल लोप्पा सब्बे लोकुरा कठोर परिश्रम ते अदिना पूरा बदलाव आता। श्रमशक्ति ता इस्तेमाल दल इंजे जापानी-आक्रमण-विरोधी युद्ध तुकू मुन्ने व्यवक्तिगत खेती कीयाना तुकू 110.6 प्रतिशत बेरसता। सहकारी समिति ता स्थापना तुकू मुन्ने आपसी सहयोग दल कुना कालम तुकू 74 प्रतिशत बेरसता। सहकारी समिति ना जमा कित्ता निधि, अदिना स्थापन तुकू मुन्ने सिर्फ 120 य्वान मत्ता अनि इंजे 11,000 य्वान तुकू ज्यादा आता। 1955 ते हर सदस्य लोरा हिस्सा ते औसतन 884 चिन अनाज वात्ता, इदु जापानी-आक्रमण-विरोधी युद्ध तुकू मुन्ने तुकू 77 प्रतिशत बेरसता अनि आपसी सहयोग दल कुना कालम तुकू 25.1 प्रतिशत ज्यादा आता। इद सहकारी समिति उंदी पंचवर्षीय योजना कित्ता मति सिर्फ 3 साल पेरके ने सहकारी समिति ता कुल उत्पादन-मूल्य योजना ता लक्ष्य तुन 100.6 प्रतिशत पूरा कित्ता। इद सहकारी समिति ता अनुभव तुन हूडसी मावा दिमाग ते सवाल तेदिता: प्रतिकूल प्राकृतिक परिस्थिति वाले जागा ने उत्पादन लोप्पा वेने वेल्ले बढ़ोत्तरी आया परिंता या? अनुकूल परिस्थितिं ग वाले जागा ने उत्पादन इदिनकु वेने ज्यादा आया परिंता या? इंजी।

(“सहकारी समितिं ग कुन मेहनत, बचत संगे ताकी कीयाना, मेड्रा इलाका ना विकास कीयाना” हेडिंग वाले लेख पोरो टिप्पणी)

40

इद उंदी वेल्ले बेस ताकना सहकारी समिति आंदू। इदिना मूल्यवाद अनुभव कुनल करिया परिंतोम। छवीफू काउंटी कनफ्यूशियस ना पुटता भूमि आंदू। अगा वरोर मुयतोर मानेय बचोनो साल एवनल उंदी साड़ा ताकी कित्तोर अनि योग्य विद्यार्थिरा उंदी बेहरा संख्या तुन शिक्षित कित्तोर। इद सच्चाई तुन वेल्ले लोकर पुत्तोर। मति ओरु जनता ना पिस्वल ता आर्थिक पहलू बगिल ज्यादा ध्यान हीवोर। कनफ्यूशियत ना विद्यार्थी फान छि ओनकु खेती बद्रम कीयाना इंजी पूछेमातोर, अस्के ओरु इद सवाल

तुन नजरअंदाज कितोर अनि फान छिन मोरकुल पेरेके ओरु “सुडला-जाति”⁵ तोर मंतोर इंजी आरोप वाटतोर। इंजे ओना पुटता भूमि ता लोकरु समाजवादी सहकारी समितिंग स्थापित कीतरो। 3 साल लोप्पा सहकारी समिति तुन ताकी कित्ता पेरेके, रेंडु हजार साल तुकू ज्यादा साल तल ताकसोर मत्ता गरीबी, कंगाली संगे उत्पीड़ित जनता ना आर्थिक, सांस्कृतिक पिस्वल लोप्पा बदलाव वायना शुरू आता। इदिनगडल स्पष्ट रूप ते मना युग ता समाजवाद ता इतिहास लोप्पा निज्जमे बदे उदाहरण हिल्ले इंजी साबित आंता। कनफ्यूशियस ना “क्लासिकी ग्रन्थ” तुकू समाजवादे बेस मंता। कनफ्यूशियस ना मंदिर, समाधि ता दर्शन कियाला दायला आल्संतोर ओरकिन उंदी बेरा सहकारी समितु हूडला वेने दायना इंजी सलाह हियाकाना।

(“3 साल लोप्पा 67 प्रतिशत उत्पादन बेरसी कित्ता उंदी कृषि-उत्पादक सहकारी समिति” हेडिंग वाले लेख पोरो टिप्पणी)

41

इद लेख वेल्ले बेस ओसो पढ़े मायना लेक्का मंता। इंजे वेल्ले अर्ध-सामंती सहकारी समितिंग सुडला मंतांग अनि अविना लोप्पाटल हर सहकारी समितिंग लोप्पा लगभग 20-30 परिवार मंतांग, बारांकु इतेके इद्रम ता सहकारी समितिंग स्थापना कीयाना हल्को आंता। इविनगडल कार्यकर्ता लोर, सदस्य लोर किन तुरंत अनुभव दोरकी कीयाना मौका दोरकिंता। मति मना उचुन सदस्य लोर कम जमीन ओसो धन हिल्ला कारण ते सुडला सहकारी समिति वेल्ले गतिविधिं किया परवो आंता अनि मशीनरी ता इस्तेमाल किया परवो आंता। इचोन सुडला सहकारी समितिंग वेने उत्पादन ताकत कुना विकास लोप्पा बाधा बनेमांतांद; अविन वेल्ले जोम इद्रम मंदाला हियला लेवा अविन उंदी दूसरा संगे काल्पना। उचुन जागा ने उंदी सहकारी समिति लोप्पा उंदी पूरा श्यांग मंदा परिंता, उचुन जागा ने उंदी सहकारी समिति लोप्पा बचोनो श्यांग मंदा परिंतांग। मति वेल्ले बाकी जागा ने उंदे श्यांग लोप्पा बचोनो सहकारी समितिंग वेने मंदा

परिंतांग इंदान लोप्पा बदे डावुट हिल्ले। मैदानी इलाकांग लोप्पाने आयवा मेट्टा इलाकांग लोप्पा वेने सहकारी समितिंग बने कियमूडांता। आनह्वेइ प्रांत ता फोचलिंग कस्सा मंदाना श्यांग लोप्पा दर्जनो ली एवनल मेट्टा इलाका मंता। इदिना लोप्पा ने बेहरा सहकारी समिति ता स्थापन किताद मंता। ताना लोप्पा कृषि, जंगला ओसो पशुपालन काना संयुक्त रूप ते आया मंता। बदे डावुट हिल्ला सहकारी समिति ता संयुक्त काम सदस्य लोरा सहमति तेने ओसो हालनाचोन कार्यकर्ता लोर मत्तास्केने कीयाना।

(“बेहरा सहकारी समिति ना महत्व” हेडिंग वाले लेख पोरो टिप्पणी)

42

हाएनान द्वीप ता लाल झंडा सहकारी समिति ना अनुभव संगे ओसो उंदी बेरा बेहरा सहकारी समितिंग ओसो उन्नत स्तर ता सहकारी समितिंग स्थापित कीयाना वेल्ले फायदा आंता इंजी साबित आता। अविना स्थापना सिर्फ उंदी साल पेरके ने बेहरा सहकारी समिति उन्नत स्तर ते एव्वला काजे तैयार आंता। बदे डावुट हिल्ला सब्बे सहकारी समितिंग इद्रमे कीयाना, बारांकु इत्तेक विलय बस्के कीयाना ओसो उन्नत स्तर ते बस्के एव्वना इंदाना निर्णय कीयाना मुन्ने अविना परिस्थितिंग अनुकूल मंतांगे, हिल्लेंगे इंजी हूडना जरूरी मंता। मति 3 साल लगभग हालना लेक्काने मंता। महत्वपूर्ण पोल्लो किसान लोरा मुन्ने उदाहरण पेश कियानदु मंता। ओरु बेहरा सहकारी समितिंग ओसो उन्नत स्तर ता सहकारी समितिंग ना फायदा सुडला ओसो शुरुआती स्तर ता सहकारी समितिंग हिया परवोंग इंजी पुत्ता पेरके और तम्मा सहकारी समितिंग आपस ते काल्पना ओसो उन्नत स्तर ते ओयला आल्सनुर।

(“छुंगशान काउंटी ते मुन्ने जिला ता लाल झंडा कृषि-उत्पादक सहकारी समिति प्राकृतिक मुश्किलकु, पूंजीवादी विचारधारा खिलाफ संघर्ष संगे सुदृढ़ आंता” हेडिंग वाले लेख पोरो टिप्पणी)

परिस्थितिं अनुकूल मत्तास्के उत्पादन ताकत ओसो उत्पादन ता विकास कियाला काजे शुरूआती स्तर ता सहकारी समितिं कुन उन्नत सहकारी समितिं लेक्का बदले कीयाना। शुरूआती सहकारी समितिं लोप्पा अर्ध-निजी मालिकाला⁶ मंदिता अदिन काजे पेरके इदिना उत्पादन शक्ति ना विकास लोप्पा बाधा वायना शुरू आंता अनि लोकर मालिकाना व्यवस्था तुन बदले कीयाना मांग कींतोर अनि सहकारी समिति तुन उत्पादन साधन कुना मालिकाना पूर्ण रूप ते सामूहिक मत्ता सामूहिक मैनेजमेंट वाले आर्थिक इकाई बने कींतोर। बेगा उंदी बेरा उत्पादन ताकत तुक मुक्त कींतोर अगा अदिना वेल्ले विकास आंता। उचुन जागा ने इद बदलाव वेल्ले जल्दी आंता, उचुन जागा ने इदिना रफ्तार वेल्ले तीरम मंदिता। शुरूआती स्तर ता सहकारी समितिं कुन लगभग 3 साल एवनल ताकी कित्ता पेरके अविना लोप्पा परिस्थितिं बुनियादी रूप ते जरूर पैदा आयनुंगा। हर प्रांत, म्युनिसिपलटी ओसो स्वायत्त प्रदेश ता पार्टी-संगठन तन्ना इद समस्य पोरु आल्सना अनि तैयारी कीयाना, 1956, 1957 लोप्पा जनता ना सहमति ते बचोनो उन्नत स्तर ता सहकारी समितिं ना स्थापना कीयाना। इंजे सहकारी समितिं सुलांग मंतांग। अवु उन्नत स्तर ता सहकारी समितिं ना रूप एतिता पेरके जनता ना सहमति वेल्ले सुडल सहकारी समितिं कुन काल्पसी बेहरा सहकारी समितिं ना स्थापना कीयाना। 1956, 1957 ते हर जिला लोप्पा इद्रम ता उंदी लेवेके बचोनो सहकारी समितिं संगठित कीयाना अनि शुरूआती स्तर ता सहकारी समितिं ना तुलना ते अविना महत्व तुन जनता नडमा पेश कीतेके वायना उचुक साल कुना लोप्पा सहकारी समितिं काल्पला काजे ओसो उन्नत स्तर ते ओयला काजे अनुकूल परिस्थितिं पुट्टानुंगा। इद काम ता तालमेल उत्पादन विकास कीयाना चौतरफा योजना संगे स्थापना कीयाना जरूरी मंता। लोकर बेहरा सहकारी समितिं ओसो उन्नत स्तर ता सहकारी समितिं ना फायदा सुडला सहकारी समितिं ओसो शुरूआती स्तर ता सहकारी समितिं तुलना ते ज्यादा मंता इंजी हूडतास्के, लोकर

दीर्घकालीन योजना संगे भौतिक, सांस्कृतिक पिस्वल ता स्तर तुकू ज्यादा उन्नत कीतेके ओरु तम्मा सहकारी समितिंग काल्पला अविना स्तर बेरसी कीयाना बगिल दायला सहमत आयनुर। उन्नत स्तर ते एव्वना काम उपनगरीय इलाकांग लोप्पा ज्यादा जल्दी आंता। पेकिंग ता इद सहकारी समिति ता अनुभव इद्रमताए परिस्थितिंग वाले सहकारी समितिंग काजे संदर्भ-सामग्री ना काम कींता।

(“इद सहकारी समिति शुरुआती स्तर तल उन्नत स्तर ते एवता” हेडिंग वाले लेख पोरो टिप्पणी)

नोट

- 1) शुरु ते वांग क्वो-फान सहकारी समिति ने उत्पादन साधन कुना वेल्ले कमी मत्ता। मति अदु राष्ट्रीय ऋण हियवा लेवा तम्मा सदस्य लोर किन तीस ली जेक मेट्टा इलाका तल ईंधन काजे वर्किंग जमा कियाला ओसो अविन वम्मसी उत्पादन साधन अस्सता। अदिन काजे सहकारी समिति सदस्य लोर वेल्ले उत्पादन साधन कुन “मेट्टा तल दोहन कीसी ” दोरकी किताद मंता इंतोरा।
- 2) इगा “विपरीत प्रचार” इत्तरे सहकारी समितिंग ना फायदा ओसो अनुकूल परिस्थिति ना प्रचार-प्रसार लेवा जनता तुन सहकारी समितिंग स्थापन कीयानास्के सामना कीयाना कठिन, प्रतिकूल परिस्थितिंग ना बारे ते स्पष्ट वेहना। इद्रम जनता पूर्ण रूप ते जागृत आतास्के, लोकुर बेहरा संख्या ते सहकारी समितिंग ना सदस्यता काजे आवेदन कितास्के ने किया अनि ओरकिन इदिना लोप्पा आयना नुकसान-फायदा तुन स्पष्ट रूप ते समझे कीयाना।
- 3) नालुंग रकम ता तुलनांग लोप्पा दोड़ रास्ता पोल्लोंग लोप्पा बद बेस मत्ता इंजी हूडिंतोम: 1) सहकारी समिति, आपसी सहयोग दल, व्यक्तिगत रूप ते खेती कीयाना किसान; 2) समाजवाद ओसो पूंजीवाद; शोषण व्यवस्था ओसो शोषणहीन व्यवस्था; 4) व्यक्तिगत खुशहाली ओसो सामूहिक समृद्धि। इव 5 पोल्लोंग लोप्पा दोड़ रास्ता पोल्लोंग ना बारे ते सहकारी समिति ना महत्व ता गिनती आंता: 1) प्राकृतिक संकट ता मुकाबला कीयाना; 2) सहायक धंधा ता विकास कीसी आमदमी बेरसी कीयाना; 3) जोश सगे मेहनत कीसी श्रम-अंक बेरसी कीयाना; 4) गरीब ओसो मध्यम किसान लोर किन आपसी सहायता कीयाना सहकारिता ना कारण ते उत्पादन बेरसी कीयाना; 5) उत्पादन ओसो रहन-सहन लोप्पा वायना मुशिकल कुना पोरो काबू कीयाना।

- 4) वी.आई. लेनिन “नौजवान संघ ता कार्य”।
- 5) “कनफ्यूशियस ना सूक्ति-संग्रह” खंड 13, “च लू”।
- 6) शुरूआती स्तर ता सहकारी समितिग लोप्पा विशेष रूप ते जमीन ता शेयर लेक्का शामिल कीयाना आंता अनि एकीकृत मैनेजमेंट पोरो अमल आंता, अदिना स्वरूप अर्ध-समाजवादी मंता। अविना लोप्पा जमीन, टेडियाना-पूहना काम वायना जानवर ओसो बेहरा-बेहरा कृषि-औजार लेक्कटवा उत्पादन साधन कुना पोरो सहकारी समितिग सदस्य लोरा निजी मालिकाना मत्ता, सहकारी समिति कुन इविना इस्तेमाल काजे तम्मा सदस्य लोरकिन “हिस्सा” हियाना लागिता। अदिन काजे शुरूआती स्तर ता सहकारी समितिग ना बारे ते अविना लोप्पा अर्ध-निजी मालिकाना मंता इत्ताद मंता।

कृषि संबंधित 17 नियमकुना दस्तावेज पओरो राय हियाना अपील⁴³ 21 दिसम्बर 1955

कामरेड माओ त्सेतुंग हांगचओ ओसो थ्येनचिन ते 14 प्रांत ओसो अंदरूनी गोलिया स्वायत्त प्रदेश कुना पार्टी-कमेटिंग ना सचिव लोरा संगे सलाह-मशविरा कीसी इयेटा नवम्बर ते उंदी 17 नियमकुना दस्तावेज तैयार कित्तोर। केंद्रीय कमेटी ओरु केयना 10 जनवरी सम्मेलन लोप्पा (ताना लोप्पा प्रांत म्युनिसिपलटिंग ओसो स्वायत्त प्रदेश कुना सचिव लोर वेने शामिल आयनूर) इद दस्तावेज ता बारे ते वेहाना इंजी आल्सा मंता। ताना पेरके 1956 ता योजना ते सामिल कीयाना अनि वेल्ले गंभीरतापूर्क लागू कीयाना शुरू कीयाना। इद उद्देश्य ते संदेश दोरकतास्के तम्मा दोड़ मत्ता सब्बे प्रिफेक्चर पार्टी-कमेटिंग ना सचिव ओसो उचुन काउंटिंग पार्टी कमेटिंग ना सचिव लोर किन दोड़ रास्ता सवाल कुन विस्तार ते अध्ययन कियाला काजे केयना:

- 1) सब्बे नियमकु लेवेके सिर्फ उचुने नियमकु कियमूड़ांता या आयो ओसो हर नियम तुन लागू कियाला काजे परिस्थिति अनुकूल मंता या हिल्ले;

⁴³इद उंदी सरकुलर आंदू, इदिना मसौदा कामरेड माओ त्सेतुंग चीनी कम्युनिस्ट पार्टी ता केंद्रीय कमेटी काजे तैयार कित्तोर अनि पार्टी ता शांघाई ब्यूरो ओसो प्रांतीय, स्वायत्त प्रदेश पार्टी-कमेटिंग निगा लोहतोर।

- 2) इव 17 नियमकुना लोप्पा बदे नियम तुन जोड़े कीयाना जरूरत मंता या हिल्ले (अमल किया परना लेक्कटा धारांग कुन जोड़े कियमूड़ांता);
- 3) मीटु इव 17 नियम कुन तुरंत तम्मा 1956 ता योजना ते शामिल कीसी अमल कियाला काजे तैयार मंतिरे हिल्लिर। मीटु 3 जनवरी 1956 एवनल इव समस्यांग ना अध्ययन काम परा कीयाना अनि मीवा सुझाव तैयार कीयाना।

इव 17 नियमकु दोड़ रास्ता लेक्का मंतांग:

- 1) कृषि ता सहकारी बदलाव ता रफ्तार ता बारे ते हूड़तेके। शुरूआती स्तर ता सहकारी समितिं ग ना स्थापना ता काम 1956 ता आखिरी 6 महीना एवनल पूरा कीयाना, प्रांत, म्युनिसिपलटिंग ओसो स्वायत्त प्रदेश (सिनच्यांग तुन विड़चसी) 75 प्रतिशत किसान परिवार तुन सहकारी समितिं ग लोप्पा शामिल कीयाना लक्ष्य पोयना, दोड़ स्तर ता शाखांग कुन इदिनकु उचुन मुन्ने ओसी 80-85 प्रतिशत किसान परिवार तुन शामिल कीयाना लक्ष्य पूरा कीयाना बेस आयार।

उन्नत स्तर ता सहकारी समितिं ग ना स्थापना मीटु 1960 एवनल बुनियादी रूप ते पूरा कीयाना पूरा कोशिश कीयाना लेवेके उंदी साल तुकू मुन्ने इत्तेके 1959 एवनल अदिन बुनियादी रूप ते पूरा कीयाना। इद उद्देश्य तुन पूरा कियाला काजे काउंटिंग ओसो जिलांग काउंटी लेवेके हर जिला लोप्पा उंदी-रेंडु तुकू ज्यादा उन्नत स्तर ता बेहरा सहकारी समितिं ग (ताना लोप्पा हर सहकारी समिति लोप्पा 100 तुकू ज्यादा परिवार मंदाना) ना स्थापना कीयाना। इद काम 1956 ते कीयाना अनि ताना पेरके दूसरा 6 महिनांग ना समूह ता स्थापना 1957 ते कीयाना काम पोय्यना। इव रेंडासी समूह कुना लोप्पा लगभग 25 प्रतिशत किसान परिवार शामिल आयना अनि बाकी तोरा काजे आदर्श बने मायना। इद्रम कीयाना संभव मंता या? सुडला सहकारी समितिं ग कुन काल्पसी बेहरा सहकारी समितिं ग गठित कीतेके आकार बचोन बेहर मंदाना? उंदी श्यांग ते बचोनो सहाकारी

समितिग मंदाना उंदी श्यांग लोप्पा उंदी सहकारी समिति मंदाना लेवेके उंदे सहकारी समिति ता विस्तार बचोनो श्यांग लेक्का मंदाना। इव मूंड रूप कु अमल कीयाना लेक्का मंतांगे हिल्लेंग? देश ता कुल सहकारी समितिग काजे बद संख्या ज्यादा सही मंता- 3,00,000 लेवेके 4,00,000 लेवेके 5,00,000? सेवियत संघ लोप्पा इद संख्या 1,00,000 मंता; इद संख्या 3,00,000 तुकू ज्यादा लेवेके 4,00,000 ता संख्या मावा काजे ज्यादा आंता या? इदिन विड़चसी दूसरा बद तरिका बेस मंता- सहकारी समितिग कुन मुन्ने उंदी दूसरा संदे काल्पना अनि अविन दूसरा मंजिल ते एवसी कीयाना काम उंदे बेरा कीयाना लेवेके मुन्ने अविन पोरोटा मंजिल एवसी कीसी पेरके उंदी दूसरा संगे काल्पना? इद सवाल पोरो मीटु विचार कीमुटा।

2) जर्मीदार ओसो धनी किसान लोर सहकारी समितिग लोप्पा शामिल कीयाना सवाला। माटु 1956 ते आनह्वेइ, शानशी ओसो हेलुंगच्यांग प्रांत हीता सुझाव कुना पोरो अमल किया परिंतिर बहे; इत्तेके लोकुरा व्यवहार बेस मत्तेके ओरकिन शामिल आयना अनुमति हियाना, व्यवहार बेस इंदान लेक्का लेवेके गलत इंदान लेक्का हिल्वोर किन सहकारी समिति ता सदस्य बने कियवा लेवाए सहकारी समिति ता उत्पादन काम लोप्पा शामिल आयला हियाना। गलत व्यवहार मत्तोर किन सहकारी समिति ता निरीक्षण ते उत्पादन लोप्पा शामिल आयला काजे मजबूर कीयाना। इद तरीका वेल्ले कार्यकर्ता लोर मत्ता सब्बे पाइना सहकारी समितिग लागू किया परिंतांग। इदिना बचोनो फायदा मंता, मति इदिना उंदी कमजोरी वेने मंता इत्तेके इंजे सहकारी समिति लोप्पा शामिल आयला तैयार हिल्वा उच्च-मध्यम किसान लोर इद्रम कियाला जरूरी मजबूर आयनूर। इदे आयवा ओरु धनी किसान ओसो जर्मीदार लोरकिनकु मुन्ने सहकारी समितिग लोप्पा शामिल किया लागियर। इद्रम कीयाना सही मंता या? माटु पोरो वेहता तरिकांग पोरो अमल कीयाना उंदी साल काजे इत्तेके 1957 एवनल रोमी कीयाना या? बद तरीका बेस मंतिंता इंजी मीटु आल्सटू।

- 3) सहकारी समिति ना नेतृत्व ता संरचना ता सवाल हूडतेके अदिना दो-तिहाई सदस्य नेटा गरीब किसान ओसो सब्बे पूना निम्न मध्यम (मुन्ने गरीब मत्तोर) किसान लोरा लोप्पाटल पोयना अनि अदिना उंदी-तिहाई सदस्य पाड़ना निम्न-मध्यम किसान लोर ओसो पूना-पाड़ना उच्च-मध्यम किसान लोरागडल पोय्यना।
- 4) उत्पादन बेरसी कियाला काजे जरूरी शर्तकु: क) उचुन बुनियादी तरिकांगा लागू कीयाना (अविन विषय-वस्तु पोरो विचार-विमर्श कीतीद हिल्ले, अलग-अलग जागा ने अलग-अलग अनुमति हियमूडांता); ख) उन्नत अनुभव कुना प्रचार-प्रसार कीयाना (आदर्श सहकारी समितिंग संबंधित सामग्री हर साल जमा कीयाना अनि हर प्रांत पुस्तक ता रूप ते प्रकाशित कीयाना)।
- 5) 1956 ते हर प्रांत, प्रिफेक्चर, काउंटी, जिला ओसो श्यांग तुन उंदी दीर्घकालीन नालुंग बगिल ता योजना बने कीयाना। ताना लोप्पा सब्बे जरूरी मुद्दांग शामिल मंदाना, काउंटी, श्यांग ता योजनांग पोरो जो हियाना। साल लोप्पाटा 6 महिनांग लोप्पा इद योजना ता ड्राफ्ट तैयार कीयाना अनि दूसरा 6 महिनांग लोप्पा अदिन फाईनल कीयाना। ताना पेरके वेने अदिना लोप्पा जरूरी संशोधन कियमूडांता। योजना कम से कम 3 साल ता बने कीयाना, सात साल ता बने कीतेके ज्यादा बेस आयार अनि संभव आतेके 12 साल ता वेने बने कियमूडांता। इद काम लोप्पा उचुन वेने लेट आयनायो। मीटु इदिना पोरो बदे व्यवस्था कीतिरा? वेल्ले योजनांग अनुभव हिल्ला कारण ते वेल्ले कठिन मंदितांग मति मीटु उचुक काउंटिंग ओसो श्यांग कुन असल परिस्थिति संगे मेल तिंदाना योजनांग बने कीयाना पूरा कोशिश कीयाना।
- 6) टाली-कोंदांग, कोडांग, खच्चर, गधा, पद्दिंग, बेड़ांग, कोर्कु ओसो बदक कुना रक्षा कियाला ओसो अविना नस्ल बेरसी कियाला खासकर जानवर पीलांग ना रक्षा कियाला काजे चौतरफा योजना बने

कीयाना। नस्ल बेरसी कीयाना योजना पोरो विचार-विमर्श आया, अदिन काजे इदिना बारे ते मीटु मीवा सुझाव तैयार तासना।

- 7) डोड्डा-घाटी योजनांग संगे तालमेल कीसोरे सुडला एयर बचे कीसी बांध बने कीयाना परियोजनांग ना बेहरा स्तर ते निर्माण कीयाना। अनि साधारण ऊसा लेवेके मुसुर वायवा कालम पोरो सात साल लोप्पा बुनियादी रूप ते काबू कीयाना कोशिश कीयाना।
- 8) सात साल लोप्पा फसल कुना काजे नुकसानदायक उंदी दर्जन रकम ता पुडियकु ओसो वनस्पति-रोग कुन बुनियादी रूप ते खत्म कीयाना।
- 9) 12 साल लोप्पा ज्यादातर फडी जमीन ओसो मेड्वांग कुन उत्पादन कीयाना लेक्का बने कीयाना। संभव आताचोन वृक्षारोपण कीयाना, इत्तेके हर लोते, हर नाटे ना हैरे-गरे, सडक, एर ओदा, फडी जमीन ओसो मेड्वांग पोरो उरस्कना।
- 10) 12 साल लोप्पा वेल्ले इलाकांग लोप्पा स्थानीयि अथॉरिटी ओसो सहकारी समितिंग तम्मा जरूरी मत्ता 90 प्रतिशत खद ओसो उचुन इलाकांग लोप्पा 100 प्रतिशत खद सप्लाई कीता।
- 11) 12 साल लोप्पा पीली डोड्डा, छिनलिंग मेड्वांग ओसो पाएलुंग डोड्डा ता उत्तर ते मत्ता इलाकांग लोप्पा छिंगहाए प्रांत लोप्पा पीली डोड्डा ता उत्तर ते मत्ता इलाकांग लोप्पा अनाज ता प्रति मू औसत पैदावार नालुंग सौ चिन कीयाना। पीली डोड्डा ता दक्षिण ते ओसो ह्वाए डोड्डा ता उत्तर ते मत्ता इलाकांग लोप्पा 5 सौ चिन एवना, ह्वाए डोड्डा, छिनलिंग मेड्वांग ओसो पाएलुंग डोड्डा ता दक्षिण ते मत्ता इलाकांग लोप्पा 800 चिन एवना। कपास, निय पेडेक, सोयाबीन, रेशम, चाय, जूट, गन्ना, पंडिंग ओसो बाकी वस्तु ना उत्पादन-लक्ष्य ता बारे ते विचार-विमर्श कीयाना इंजी सुझाव हियाना।
- 12) सात साल लोप्पा मानेय ओसो जानवर कुन नुकसान कीयाना (सिस्टोसोमियासिस, फाइलेरिया, फोडामंदना प्लेग, दिमागी बुखार, एर्म-प्लेग ओसो पदी-हैजा) लेक्कटा बचोनो बीमारिंग कुन बुनियादी रूप ते खत्म कीयाना। मीवा प्रांत लेवेके प्रदेश लोप्पा बद स्थानीय

बीमारी मंता, बद बीमारी तुन सात साल लोप्पा बुनियादी रूप ते खत्म कीयाना परितोम, बद बीमारी तुन खत्म कियाला ज्यादा टाईम लागियर अनि बद बीमारी ता इंजे इलाज आयना संभव हिल्ले इंदाना विषय पोरो अध्ययन कीयाना।

13) नालुंग नुकसानदायक जंतु कुन खत्म कीयाना, इत्तेके सात साल लोप्पा हुपेंग (बाकी नुकसानदायक जंतुंग), गौरैया पिट्टे (फसल तुन कीयाना बाकी पिट्टेंग, करवल तुन हौकना सही मंता या हिल्ले इंजी इंजे खोज किताद हिल्ले) वीसिंग, नुस्मेंग' कुन बुनियादी रूप ते नष्ट कीयाना।

14) सात साल लोप्पा साक्षरता काम लोप्पा 1500 तल 2000 रेखाक्षर लिपी कुन करीयसी ज्ञान दोरकी कीयाना लक्ष्य पोयोसी बुनियादी रूप ते अनपढ़ता तुन खत्म कीयाना।

15) सात साल लोप्पा उंदी व्यवस्था अनुसार प्रांत, प्रिफेक्चर, काउंटिंग, जिलांग ओसो श्यांग काजे जरूरी विभिन्न रकम ता हरी (राजमार्ग, सड़क) निर्माण कीयाना।

16) सात साल लोप्पा टेलीग्राफ-केंद्र ता जाल वाटना अनि हर श्यांग ओसो सहकारी समितिंग लोप्पा टेलीग्राफ-प्रसारण केंजना।

17) सात साल लोप्पा सब्बे श्यांग ओसो बेगरा सहकारी समितिंग लोप्पा टेलीफोन व्यवस्था ता जाल वाटना काम पूरा कीयाना।

पोर वेहता मुद्दांग बारे ते बाकी कामरेड्स संगे विचार-विमर्श कीयाना अनि 3 जनवरी एवनल सब्बे तैयारिंग पूरा कीयाना। केंद्रीय कमेटी 4 जनवरी हेरे मुन्ने उचुन प्रांतीय पार्टी-कमेटींग ना सचिव लोरा उंदी मीटिंग केयंता, इविना लोप्पा उचुन दिय्यंग एवनल अध्ययन कीयाना अनि 10 जनवरी ते आयना सम्मेलन काजे सुझाव तैयार कीयाना।

नोट

- 1) स्वास्थ्य-कार्य संबंधित उंदी निर्देश लोप्पा (इदिना ड्राफ्ट कामरेड माओ त्सेतुंग चीनी कम्युनिस्ट पार्टी ता केंद्रीय कमेटी काजे मार्च 1960 ते तैयार कीसी मतोर)

“उंदी पोल्लो मंता, गौरैया पिट्टेंग हौकनायो; ताना जागा ते उडूम कुन खत्म
कीयाना नारा मंदाना, ‘हुप्पेंग, उडुम, वीसिंग सो नुस्मेंग कुन खत्म कीमूट’ इंजी
वेहताद मंता।”

दस्तकारी उद्योग ता समाजवादी बदलाव ता रफ्तार बेरसी कीमूट⁴⁴ 5 मार्च 1956

- 1) नावा हिसाब ते व्यक्तिगत दस्तकारी उद्योग ता समाजवादी बदलाव ता रफ्तार उचुन कम मंता। नन्ना इयेंड जनवरी ते प्रांतीय ओसो म्युनिसिपल पार्टी-कमेटिंग ना सचिव लोरा सम्मेलन ते इत्तान। 1955 ता आखरी ते सिर्फ 20 लाख दस्तकार लोरकिन संगठित किताद मंता। मति इयेंड सिर्फ शुरू ता रेंडु महिनांग लोप्पा ने 30 लाख ओसो दस्तकार लोर किन संगठित किताद मंता। अदिन काजे इद काम इयेंड मुख्य रूप ते पूरा कियमूड़ायारा। इद वेल्ले बेस मंता। मीटु 3 पंचवर्षीय योजनांग ताकनास्के दस्तकारी उद्योग ता कुल उत्पादन-मूल्य ता औसतन 10.9 प्रतिशत वार्षिक बढ़त्तरी कियाला आल्सा मंतरि। इद बढ़ोत्तरी कम मत्ता लेक्का मंता। माटु पहली पंचवर्षीय योजना ते मना लक्ष्य कम तासतोम अद्रमासी माकिन उचुन नुकसान आता। इंजे इद लक्ष्य लोप्पा बदलाव कीयाना जरूरत मंता, मति मीटु इदिना पोरो मीवा ठोस परिस्थिति तुन हूडसी निर्णय कीयाना।
- 2) दस्तकारी सहकारी समितिंग ना उंदी सहकारी समिति लोप्पा लगभग सौ लोकुर मंदाना बेस आयर, उचुन सहकारी समितिंग

⁴⁴ राज्य-परिषद दोड़ मंदाना विभाग दस्तकारी उद्योग कुना काम ता ब्यौरा हियानास्के हीता सुझाव कुना उंदी अंश।

लोप्या बचोनो सौ लोकरु अनि उचुक ना लोप्या सिर्फ उचुने दर्जन लोकरु वेने मंदाना परितोर।

- 3) नाटे ना लोपा फेरी वाटसी कृषि-औजार कुना रिपेयर कियानोर ओसो कृषि-उत्पादन ता सेवा कीयाना लोहार, बढ़इ लोर किन सहकारी समितिंग लोप्या संगठित कीयाना विचार वेल्ले बेस मंता; किसान लोर इदिना जरूरी स्वागत कियानूर। चीन ता दस्तकारी उद्योग लोप्या हजारों साल इद्रमे काम ताकता। सहकारी समितिंग लोप्या संगठित आतास्के दस्तकार तम्मा हस्तकला लोप्या सुधार किया परतोर अनि किसान लोरा वेल्ले बेस सेवाल किया परितोर।
- 4) दस्तकारी उद्योग ता बदलाव उभार ते मत्तास्के रिपेयर, सेवा संबंधित कारोबार लोप्या उत्पादन ता केंद्रीयकरण कीयाना कारण ओसो वेल्ले सेवा-केंद्र कुन बंद कीतांकु जनता नाराज आता। इद्रम कीयाना गलत मंता। इंजे बाता कीयाना? “इद भूमि पोरो सामान्य रुझान दीर्घकालीन विभाजन पेरके एकीकरण आयना जरूरी मंता अनि दीर्घकालीन एकीकरण पेरके विभाजन आयना अनिवार्य मंता।”
- 5) मशीनीकृत ओसो अर्ध-मशीनीकृत उत्पादन ता ज्यादातर श्रम-उत्पादकता दस्तकारी उत्पादन ता न्यूनतम श्रम-उत्पादकता ता तुलना ते 30 गुणा ज्यादा मंता। आधुनिकीकृत राष्ट्रीय उद्योग कुना पोरो हर मानेय वार्षिक उत्पादन—मूल्य औसनत 20,000 तकू तल 30,000 य्वान एवनल, मशीनीकृत, अर्ध-मशीनीकृत सहकारी समितिंग ना 5,000 य्वान, 100 तुकू ज्यादा दस्तकार वाले बेहरा सहकारी समितिंग ना 2,000 य्वान, सुडला सहकारी समितिंग ना 1500 य्वान ओसो व्यक्तिगत दस्तकार लोरा 800 तल 900 य्वान एवनल मंता। श्रम-उत्पादकता ता अंतर ता तुलना कीतेके दस्तकारी उद्योग ता अर्ध-मशीनीकरण ओसो

मशीनीकरण ता दिशा ते विकास कीयाना ओसो श्रम-उत्पादकता तुन बेरसी कीयाना जरूरत मंता।

- 6) दस्तकारी उद्योग संबंधित सब्बे कारोबार बेस योगदान कींतांग। अबु गाटो, गेतेंग ओसो दैनिक जरूरत ता वस्तुंग हींतांग। अबु कलात्मक वस्तुंग ओसो दस्तकारी-उत्पादन वेने तैयार कींतांग (मीनाकारी वाले वस्तु ओसो “छांग परिवार ता 5 मर्मि आयवा मंदानवु”¹ बने कित्ता कांच ता अंगूर) लेक्कटवु। इदे आयवा पेकिंग बदक बोड़सना तकनीक वेने निर्यात कीयाना लेक्का मंता। सेवा संबंधित उचुन कारोबार कुना लोकर “चाची वांग ना गंजिंग रिपेयर” पोरोल ता नाटक ता भूमिका लेक्का गली-गली, टोला-टोला अनि नाह कुना लोप्पा फेरी वाटसी सब्बे रकम ता वस्तुंग ना रिपेयर कींतोर- वीरू हर जागा वेलियसीस वेल्ले काम कींतोर। पेकिंग तुंगश्याओ हाटुम ते 6 हजार तुकू ज्यादा रकम ता वस्तुंग अस्सिंतोर।

मावा दस्तकारी उद्योग ता महत्व उत्पादन तुन विड़िसियाना हिल्ले इंजी सुरता तासना। चेचक ता दान वाले वांग ना ओसो चांग श्याओ-छवेन ना कत्री-कस्सेर तुन विड़िसयना आयो, बस्के आयो इत्तेके नेटल 10 हजार साल परेके वेने इद्रम कीयानायो। बेस मत्ता ओसो चीन ता विशेषतांग पोयसी मत्ता वस्तु तुन विड़िसनायो अनि पाड़ना वस्तु तुन मुन्ने तुकू ओसो ज्यादा बेस कीसी तासना।

- 7) कला, दस्तकारी कला ता गुण लोप्पा सुधार कीयाना अनि पाड़ना कुशल दस्तकारी लोरा जतुन कीयाना पोरो आल्लसना। इद काम इंजेटले शुरू कीयाना अनि इदिना रफतार बेरसी कीयाना। इदिना लोप्पा मीटु संगठन ता स्थापना कीयाना स्कूल खोले कीयाना अनि सभा केयना काम किया परिंतिरा। हथी पल्कुना कारिगर यांग श-ह्वेइ असल ते वेल्ले तप्पे माता कलाकार आंदुर। उंदी बेरा ओरु ओसो नन्ना उंदे मेज पोरो गाटो तित्तोमा नाकिन हूड़सी ओरु नावा

फोटो हाथी पल पोरो रेहतोरा नन्ना ओरकिन बचोनो दिव्यांग हूडसोर मत्तेके वेने ओना फोटो रेहा परवोन आयेन बहे।

- 8) राज्य सहकारी समिति तुन तूसना साजो-सामान ओसो कच्चा माल ता रेट सही तरिका ते तय कीयाना अनि अविन सामान्य आवंटन-मूल्य पोरो आधार आसी तय कीयानायो। सहकारी समितिंग राष्ट्रीय कारोबार कुना लेक्का मन्नोंग, समाजावादी सामूहिक सम्पत्ति ओसो पूरा जनता ना समाजवादी सम्पत्ति नडमा फर्क मंता। शुरू ते सहकारी समितिंग ना आर्थिक बुनियाद वेल्ले मजबूत मन्नो आंता। अविन राज्य ता सहायता ता जरूरत मंदिता। राज्य पाड़ना मशीन कुना जागा ते पूना मशीनकु वाटतादु बेसे, संगेने अव मशीन कुन ओसो कारखानांग ना निजी बिलिडंग कुन संयुक्त राष्ट्रीय-निजी मैनेजमेंट लोप्पा उंदी दूसरा संगे काल्पतांकु फालतू मंताग अविन कम रेट ते सहकारी समितिंग लोप्पा आवंटति कीयाना। “एतना मुन्ने हियाना जरूरी मंता।” सहकारी समितिंग ना बुनियाद मजबूत आथार अस्के राज्य टैक्स वसूल कियार अनि कच्चा माल ता रेट वेने बेरसी कियार। अस्के एवनल सहकारी समितिंग ना सम्पत्ति पोरो टल दोड़ सामूहिक आसोर दायार। राज्य अर्ध-मशीनीकरण ओसो मशीनीकरण लोप्पा सहकारी समितिंग ना मदद कीयाना अनि अवु खुद वेने इद लक्ष्य ते एवना कोशिश कीयाना। बचोन जल्दी मशीनीकरण आसोर दांता अचोने मीवा दस्तकारी सहकारी समितिंग ना पिस्वल कम आसोर दांता। बचोन ज्यादा मीवा “राज्य” कावसोर दायार, अचोने ज्यादा मावा काम विकसित आसोर दांता। मीटु मशीनीकरण कीयाना जल्दी कोशिश कियाला काजे राज्य तुन वेल्ले योगदान हियाना।
- 9) दस्तकारी उद्योग ता उत्पादन-मूल्य देश ता कुल औद्योगिक उत्पादन-मूल्य ता उंदी-चौथाई हिस्सा मत्तेके, दस्ताकारी उद्योग

काजे कच्चा माल ता सप्लाई तुन ओसो संगेने अदिना उत्पादन, विक्रय तुन राष्ट्रीय योजना ता अंग बने कीयाना। दस्तकारी उद्योग ता अंग वेल्ले बेहरा मंता अदिन राष्ट्रीय योजना लोप्पा जरूरी शामिल कीयाना।

- 10) उचुन जागा ने पार्टी-कमेटींग दूसरा काम लोप्पा वेल्ले लगेमासी मंतांग अनि अविन दस्तकारी उद्योग कुन तम्मा एजेंडा ते इनपडे तासोंग आंतांग; इद्रम कीयाना गलत मंता। उचुन कार्यकर्ता लोर इद काम तम्मा कैदे पोयला पेरके मुन्ने आंतोर। नन्ना इद कीयाना आल्संतान बारांकु इत्तेके इद वेल्ले महत्वपूर्ण काम आंदू।
- 11) मीटु 60 हजार तुकू ज्यादा दस्तकारी सहकारी समितिंग लोप्पाटल उचुन उदाहरण कुन चुने कीयाना अनि अविना विशिष्ट अनुभव संबंध्यत सामग्री ता संकलन कीयाना। हर इलाका ओसो कारोबार ता उदाहरण चुने कीयाना, अविना लोप्पा सही-गलत, सुडला-बेहरा ओसो केंद्रित-विकेंद्रित, संगेने अर्ध-मशीनीकृत ओसो मशीनीकृत सहकारी समितिंग ना उदाहरणकु शामिल कीयाना। अविन “चीन ता नाहकुना लोप्पा समाजवादी उभार” लेक्का उंदी पुस्तक ता रूप हीसी प्रकाशित कीयाना।

नोट

- 1) इगा पेकिंग ता कुशल दस्तकार छांग ना परिवार ता कांच ता अंगूर बने कियाला निपुण मत्ता 5 मर्मिग आयवा मंदानविना बारे ते वेहताद मंता।

दस मुख्य संबंध कुना बारे ते⁴⁵

25 अप्रैल 1956

इस्सल उचुक महीनांग लोप्पा केंद्रीय कमेटी ता राजनीतिक ब्यूरो केंद्रीय अथॉरिटी कुना दोड़ काम कीयाना 34 विभाग कुना काम ता बारे ते (ताना लोप्पा उद्योग, कृषि, परिवहन, वाणिज्य, वित्त ओसो उचुक विभाग कुन शामिल मंतांग) रिपोर्ट केंजता अनि इव रिपोर्ट कुना पोरो आधार आसी समाजवादी निर्माण ओसो समाजवादी बदलाव काम संबंधित बचोनी समस्यांग ना बारे ते पुत्ता। इव समस्यांग कुल मिलेकीसी 10 मुख्य समस्यांग लेक्का मुन्ने वांतांग।

समाजवाद बगिल दायला काजे इव 10 समस्यांग कुन उंदी बुनियादी नीति पोरो (अंदरूनी ओसो बाहरी सब्बे रकम ता सकारात्मक तत्व कुन गोलबंद कीयाना बुनियादी नीति) ध्यान केंद्रित कियाला काजे अमल किया मंतोमा। हत्ता कालम ते साम्राज्यवाद, सामंतवाद ओसो नौकरशाह-पूंजीवादी शासन तुन खत्म कियाला काजे ओसो जनता ना जनवादी क्रांति जीड़ला काजे माटु सब्बे सकारात्मक तत्व कुन गोलबंद कीयाना नीति तुन अमल कीतोमा। इंजे माटु समाजवादी क्रांति ताकला काजे, उंदी समाजवादी देश ता निर्माण कियाला काजे इंदे नीति ता अमल किया

⁴⁵ चीनी कम्युनिस्ट पार्टी ता केंद्रीय कमेटी ता राजनीति ब्यूरो ता विस्तृत अधिवेशन लोप्पा हीता भाषणा। सोवियत संघ ता अनुभव कुनल दोरकता सबक कुना पोरो ध्यान हीसोरे हीता भाषण लोप्पा कामरेड माओ त्सेतुंग चीन ता अनुभव कुना निचोड़ तेंडतोर। ताना लोप्पा समाजवादी क्रांति, समाजवादी निर्माण ता बारे ते 10 मुख्य संबंध कुना चर्चा कितोर अनि वेल्ले बेस, कम खर्च, वेल्ले काम कीसि समाजवादी निर्माण कियाना मना देश ता परिस्थिति ता अनुकूल मत्ता, बुनियादी विचार कुना संगे उंदी आम कार्यदिशा बनेकितोर।

मंतोमा मति मावा काम संबंधित उचुक समस्यांग ना बारे ते विचार-विमर्श कीयाना जरूरी मंता। मीटु वेने इविना पोरोने ताकला आल्सा मंतिरा? ओरो अनुभव कुनल सबक तसी माटु हत्ता काल त उचुन मुशिकल हरी नल बचेमातोमा अनि नेंडु इद्रम कीयाना मावा काजे वेल्ले जरूरी मंता।

अंदरूनी ओसो बाहरी सकारात्मक तत्व बव आंदुंग? अंदरूनी रूप ते मजदूर, किसान मावा बुनियादी ताकत आंदु। मध्यवर्ती ताकतकु मना पक्ष ते कीयाना लेक्कटा ताकतकु आंदुंग। प्रतिक्रियावादी ताकत कुना उंदी नकारात्मक तत्व आंदु मति माटु मना काम बेस कीयाना अनि परताचोन नाकारात्मक तत्व तुन उंदी सकारात्मक तत्व ते बदले कीयाना। एकता किया परना लेक्कटा सब्बे अंतराष्ट्रीय ताकत कुना संगे एकता कीयाना। उंदी बगिल हिल्ला ताकत कुन मना कोशिश संगे प्रतिक्रियावादि कुन वेने विभाजित कीसी ओरा इस्तेमाल किया परितोमा। संक्षिप्त ते, माटु सीधा ओसो पेरके मंजी सब्बे रकम ता ताकत कुन गोलबंद कीयाना अनि चीन तुन उंदी शक्तिशाली समाजवादी देश बने कीयाना कोशिश कीयाना।

इंजे नन्ना इव 10 समस्यांग ना बारे ते चर्चा कियाकाना।

1

उंदी पक्ष ते बेहरा उद्योग ओसो दूसरा पक्ष ते सुडला उद्योग, कृषि नडमा ता संबंध

मावा देश ता निर्माण लोप्पा बेहरा उद्योग कुना पोरो जोर हितोमा उत्पादन साधन कुना निर्माण काम तुन प्राथमिकता हियाना जरूरी मंता। मति इद्रम कीयानास्के पिस्वल पिस्सना साधन इत्तेके विशेष रूप ते अनाज उत्पादन तुन बिल्कुल नजरअंदाज कीयानायो। हालनाचोन खाद्य-पदार्थ ओसो रोज ता जरूरत ता बाकी सामान लेवा मजदूर लोरा पिस्सना मुशिकल मंता। इद्रम ता परिस्थिति ते बेहरा उद्योग कुना विकास ता पोल्लोंग कीयाना अंगडम आंता। अदिन काजे उंदी पक्ष ते बेहरा उद्योग, दूसरा पक्ष ते सुडला उद्योग ओसो कृषि नडमा ता संबंध कुना समस्या तुन सही तरीका ते हल कीयाना जरूरी मंता।

इद समस्या तुन हल कीयानास्के माटु उसूल संबंधित गलतिंग किताद हिल्ले। इदिना लोप्पा मावा काम सोवियत संघ ओसो पूर्वी योरोप ता बचोनो देश कुना तुलना ते बेसे मत्ता। अक्तूबर क्रांति तुकू मुन्ने अनाज-उत्पादन बेहरा स्तर ते एव्व परवा मंदाना सोवियत संघ ता दीर्घकालीन असलफता, पूर्वी योरोप ता उचुन देश कुना लोप्पा बेहरा उद्योग कुना विकास ओसो सुडला उद्योग कुना विकास नडमा वेल्ले गडबड आतांकु पुटता गंभीर समस्यांग मना देश ते मत्ता लेक्कटा समस्यांग आयोंगा। इव देशकुना लोप्पा कृषि ओसो सुडला उद्योग कुन नजरअंदाज कीसी बेहरा उद्योग पोरोने जोर हीतांकु हाटुम लोप्पा माल ता कमी मंदिता अनि अविना मुद्र अस्थिर आंता। दूसरा बगिल माटु कृषि ओसो सुडला उद्योग कुन तूलनात्मक रूप ते ज्यादा महत्व हीतोमा। माटु हमेशाए कृषि बगिल ध्यान हीसोरे अदिना विकास कीसोरे वातोमा। माटु औद्योगिक विकास काजे जरूरी अनाज, कच्चा माल ता सप्लाई ता वेल्ले गारंटी कीतोमा। मावा दैनिक जरूरत ता सामान वेल्ले मंता ओसो अव वस्तु ना दाम ओसो मुद्रा रेंडासी स्थिर मंतांग।

उंदी बगिल बेहरा उद्योग ओसो दूसरा बगिल कृषि, सुडला उद्योग लोप्पा कीयाना पूंजी-निवेश लोप्पा लगातार सही तालमेल कीसी कृषि ओसो सुडला उद्योग कुना मुन्ने तुकू ज्यादा विकास कीयाना। मति बेहरा उद्योग कुना प्राथमिकता इंजे समाप्त आताद हिल्ले, अदिना प्राथमिकता इंजे वेने मंताए, पूंजी-निवेश लोप्पा मावा जोर इंजे वेने बेहरा उद्योग कुना पोरोने मंदिता। मति इंजे कृषि, सुडला उद्योग कुना लोप्पा कीयाना पूंजी-निवेश लोप्पा उचुन वृद्धि कीयाना जरूरी आता।

इद वृद्धि आताके बाताल आथार? इदिना पहला कारण, जनता ना रोज जरूरत कुना मुन्ने तुकू ज्यादा सप्लाई आयरा। दूसरा पूंजी जमा ता रफ्तार बेरसियार अनि माटु मना बेहरा उद्योग कुना वेल्ले विकास आथारा। बेहरा उद्योग कुना संगे वेने पूंजी जमा कीयाना संभव मंता मति मावा वर्तमान आर्थिक परिस्थिति तुन हूडसोरे तूलनात्मक रूप ते तेज ओसो बेहरा मात्रा ता पूंजी जमा कीयानादु सुडल उद्योग, कृषि संगेने संभव मंता।

इंजे इगा उंदी सवाल वेने तेदिंता: बेहरा उद्योग कुना विकास कीयाना विचार निज्जम मंता या पोरो-पोरो, महत्वपूर्ण मंता या अंगडम मंता? मीवा विचार महत्वपूर्ण हिल्लेके मीटु कृषि, सुडला उद्योग कुन नुकसान कियाकिर अनि इविना लोप्पा कम पूंजी वारिंतिर। मीवा लोप्पा उंदी निज्जम ओसो महत्वपूर्ण विचार मत्तेके मीटु कृषि, सुडला उद्योग कुन वेल्ले महत्व हीसी मुन्ने तुकू ज्यादा अनाज ओसो सुडला उद्योग कुना काम वायना कच्चा माल दोरकी किया परिंतिर अनि मुन्ने तुकू ज्यादा पूंजी जमा किया परिंतर। इद्रम आतेके वायना कालम ते बेहरा उद्योग कुना काजे मुन्ने तुकू ज्यादा धनराशी जमा कीयाना परिंतिर।

इद्रम हूडतेके माटु बेहरा उद्योग कुना विकास बारे ते मावा मुन्ने रेंडु तरीकांग मंतांग: पहली तरीका, कृषि, सुडला उद्योग ता तूलनात्मक रूप ते कम विकास कीयाना अनि दूसरा तरीक अविना तूलनात्मक रूप ते ज्यादा विकास कीयाना मंता। दीर्घकालीन हूडतेके पहली तरीका पोयतेके मुन्ने बेहरा उद्योग कुना तूलनात्मक कम ओसो तीरम विकास आयार अनि अदिना बुनियाद अचोन मजबूत हिल्लांकु वायना उचुके दशक कुना पेरके इद तरीका अंगडम आयार। इदिना उल्टा दूसरा तरीका लागू कीतेके बेहरा उद्योग कुना तूलनात्मक ज्यादा विकास आयार अनि अदिना रफ्तार वेने तेज मंदियार, इद तरीका तल जनता ना पिस्वल ता जरूरत कुना गारंटी आंता अदिन काजे इदिना संगे बेहरा उद्योग कुना विकास ता बुनियाद वेल्ले मजबूद आयार।

2

समुद्र ओदा ता इलाकांग लोप्पा मत्ता उद्योग ओसो लोप्पटा

इलाकंग लोप्पा मत्ता उद्योग कुना नडमा ता संबंध

हत्ता कालम ते मावा उद्योग समुद्र ओदा ता इलाकांग लोप्पा मत्तांग। समुद्र ओदा ता इलाकांग इत्तेके ल्याओनिंग, हपे, पेकिंग, थ्येनचिन, पूर्वी हनान, शानतुंग, आनह्वेइ, च्यांगसू, शांघाई, चच्यांग, फूच्येन, क्वांगतुंग ओसो क्वांगशी ता इलाकांग। बेहरा उद्योग ओसो सुडला उद्योग संगे सब्बे उद्योग कुना लगभग 70 प्रतिशत हिस्सा समुद्र ओदा ता इलाकांग लोप्पा

मंत्ता, अनि सिर्फ 30 प्रतिशत हिस्साए लोप्टला इलाकांग लोप्पा मंत्ता। इद इतिहास ताए काम आंदू। समुद्र ओदा औद्योगिक केंद्र ता पूराए इस्तेमाल कीयाना, मति उद्योग कुना विकास कीयानास्के अविना वितरण कीयानास्के लोप्टा इलाकांग लोप्पा उद्योग कुना विकास तुन भरपूर बेरसी कीयाना पोरो जोर हियाना जरूरी मंत्ता। इव रेंडू रकम ता इलाकांग ना उद्योग कुना नड़मा ता संबंध कुन पोयसी माटु बदे बेहरा गलती किताद हिल्ले। मति इंजे उचुन क साल कुना लोप्पा माटु मना समुद्र इलाका ना उद्योग कुना महत्व तुन उचुन कम कीसी हूड़ताद मंत्ता अनि अविना विकास बगिल वेल्ल ध्यान हीताद हिल्ले। इद परिस्थिति तुन जरूर बदले कीयाना।

उचुन जोम मुन्ने एवनल कोरिया लोप्पा लड़ई ताकसोर मत्ता अनि अंतरराष्ट्रीय परिस्थिति वेल्ले प्रतिकूल मत्ता; इदिना प्रभाव समुद्र ओदा ता उद्योग कुना पोरो अरता। मति इंजे तुरंत चीन विरुद्ध बदे पूना आक्रमणकारी युद्ध लेवेके पूना विश्वयुद्ध आयना लेक्का हिल्ले। इदिना उल्टा उंदी दशक लेवेके इदिनकु उचुन ज्यादा टाईम काजे शांति मंदाना संभावना मंत्ता। अदिन काजे माटु इंजे वेने मना समुद्र ओदा ता उद्योग कुना क्षमता ओसो तकनीकी रूप ते पूरा इस्तेमाल कीवेके गलत आंता। 10 साल कु आयवा माटु सिर्फ 5 साल कु वेने दोरकतेके कठोर परिश्रम कीसोरे 4 साल एवनल समुद्र ओदा ता इलाकांग ना उद्योग कुना विकास कीयाना अनि 5वीं साल युद्ध शुरू आयन परिस्थिति ते लोकरु किन अगाटल गुच्चिह कीयाना। दोरकता जानकारी अनुसार सुडला उद्योग कुना उंदी इलाका लोप्पा उंदी कारखान ता निर्माण ओसो अदिना संगे पूंजी जमा कीयाना वेल्ले जल्दी आंता। पूरा कारखाना लोपा उत्पादन-प्रक्रिया शुरू आता पेरके 4 साल लोप्पा तन्ना पूंजीगत लागत पूरा कीयाना संगे-संगे 3 पूना कारखानांग लेवेके 1-2 लेवेके कम से कम आधा कारखाना ता निर्माण कीयानाचोन वेने कमई किया परिंता। इद्रम ता काम माटु बारांकु कीयानायो? परमाणु बम इंजे मावा तल्ला पोरो वेलिया मंत्ता अनि इंजेने मावा पोरो अरियर इंजी आल्ससोर मंदानादु असल परिस्थिति ते संगे मेल

तिनवा पोल्लो आंदू इद्रम ता अंदाजा पोरो आधार आसी समुद्र ओदा ता उद्योग कुना पोरो उंदी नकारात्मक रुझना पोय्यना गलत मंता।

मति सब्बे पूना कारखानांग समुद्र ओदा ता इलाकांग लोप्पाने बने कीयाना इंजी आयो। बदे डावुट हिल्वा ज्यादा तर पूना उद्योग कुन लोप्पटा इलाकांग लोप्पाने स्थापना कीयाना अनि उद्योग कुना वितरण लोप्पा तीरम-तीरम सुधार कीयाना। इदे आयवा युद्ध खिलाफ मावा तैयारिंग जोरशोर ते कियाला सहायक आंतांग। मति बचोनो पूना कारखानांग, खान कुना लोप्पा बेहरा कारखानांग, खदानकु शामिल मंतांग, इविन समुद्र ओदा ता इलाकांग लोप्पा स्थापना कियामूडंता। समुद्र ओदा ता इलाकांग लोप्पा मुन्नेटले स्थापना आसी मत्ता सुडला ओसो बेहरा उद्योग कुना विस्तार ओसो पुनर्निर्माण कीयाना काम माटु मुन्ने ने वेल्ले कीसी मंदितोम अनि पेरके ओसो ज्यादा कीसोर मंदितोम।

समुद्र ओदा ता इलाकांग लोप्पा मत्ता पाडना उद्योग, उत्पादन-क्षमता ता सही इस्तेमाल, विकास कीसी माटू लोप्पटा इलाकांग ना उद्योग कुन बेरसी कीयाना अनि सहायता कियाला मुन्ने तुकू बचोनो ज्यादा मजबूत परिस्थिति ते वांतोम। इदिना बारे ते नाकारात्मक रुझान पोयतेके लोप्पटा इलाकांग लोप्पा उद्योग कुना तीव्र विकास लोप्पा बाधा वायार। अदिन काजे इद सवाल वेने लोप्पटा इलाकांग लोप्पा उद्योग कुना विकास कीयाना मना सपना असली मंता या डुबली इंजी मंता। इद असली मत्तेके माटु समुद्र ओदा ता इलाकांग ना उद्योग कुन खासकर सुजला उद्योग किन ज्यादा सक्रियता ते इस्तेमाल कीसोरे बेरसी कीयाना।

3

आर्थिक निर्माण ओसो प्रतिरक्षा संबंधित निर्माण नडमा ता संबंध

राष्ट्रीय प्रतिरक्षा काम उंदी वेल्ले अनिवार्य काम आंदू मावा प्रतिरक्षा-क्षमता इंजे उंदी स्तर ते एवता। अमेरिका आक्रमण ता प्रतिरोध कीयाना ओसो कोरिया ता सहायता कीयाना युद्ध कारण ते ओसो बचोनो साल कुना प्रशिक्षण ओसो सुदृढीकरण कारण ते मावा सशस्त्र सेनांग मुन्ने

तुकू ज्यादा शक्तिशाली आतांगा इंजे एवनल दूसरी विश्वयुद्ध तुकू मुन्ने ने सोवियत लाल सेना तुकू वेने ज्यादा शक्तिशाली मंतांगः इदिना संगे-संगे मावा अस्र-शस्त्र लोप्पा वेने सुधार आता, मावा प्रतिरक्षा उद्योग कुना निर्माण आया मंता। बस्केटल फान कू भूमि ओसो मोय्योल तुन उंदी दूसरा तल अलग कितोर, माटु विमान ओसो मोटर-गाडिंग ना उत्पादन कीयाना परिस्थिति बस्केने एवतद हिल्ले मति इंजे माटु अविना उत्पादन शुरू कीतोमा।

परमाणु बम इंजे वेने मावगा हिल्ले। मति हत्ता कालम ते मावगा हवाई जहाज, तोपकु वेने तो हिल्ला मंतांगा मति सिर्फ कोदो ओसो बंदूक कुना पोरो आधार आसीए माटु जापानी साम्राज्यावादी ओसो च्यांग काई-शेक किन हारे कीतोमा। इंजे माटु मुन्ने तुकू ज्यादा शक्तिशाली मंतांग अनि वायना कालम ते ओसो ज्यादा शक्तिशाली आसोर दांतोमा। मावगा सिर्फ ज्यादा संख्या ते हवाई जहाज, तोपके आयवा परमाणु बम वेने मंदितांगा। नेटा दुनिया ते माटु मावा पोरो बोनाए दबाव मंदानायो इंजी आल्सतेके परमाणु बम लेवा कामे ताका परवो। इदिना पोरो माटु बाता कीयाना? उंदी विश्वासनीय तरीका, सैनिक ओसो प्रशासनिक खर्च लोप्पा कटौती कीसी आर्थिक निर्माण पोरो आयना व्यय लोप्पा वृद्धि कीयाना। आर्थिक निर्माण ता विकास ता रफ्तार तुन ते कीसा प्रतिरक्षा संबंधित निर्माण लोप्पा मुन्ने तुकू ज्यादा वृद्धि कियमूडांता।

माटु मना पार्टी ता सातवी केंद्री कमेटी ता 1950 ते आता तीसरी पूर्ण अधिवेशन ते राज्य ता ढांचा तुन दुरुस्त बने कीयाना ओसो सैनिक, प्रशासनिक खर्च लोप्पा कटौती कीयाना सवाल कुन तेहतोम अनि मना वित्तीय, आर्थिक परिस्थिति तुन बनियादी रूप ते विकसित कीयाना जरूरी मूंड शर्त कुना लोप्पाटल उंदी मंता इंजी राय बने कीतोमा। पहली पंचवर्षीय योजना लोप्पा सैनिक ओसो प्रशासनिक मुद्दांग पोरो आयना लागत मावा राष्ट्रीय बजट ता कुल लागत ता 30 प्रतिशत मत्ता। इदु लागत वेल्ले मंता। दूसरा पंचवर्षीय योजना लोप्पा माटु इद लागत तुन घटे कीसी 20 प्रतिशत हेरे कीयाना अनि वेल्ले कारखानांग निर्माण ओसो वेल्ले मशील कुना

उत्पादन काजे मुन्ने तुकू ज्यादा धनराशी जमा कीयाना। उचुन जोम पेरके मावगा सिर्फ हालनाचोम हवाई जहाज, तोपके आयवा मना खुद ता परमाण बम वेने मंदितांग।

ओसो उंदी बेरा इगा वेने अदे सवाल तेदिता: परमाणु बम बने कीयाना मीवा सपना निज्जम ओसो वेल्ले महत्वपूर्ण मंता या? लेवेके मीटु पोरो-पोरोने इद्रम कियला आल्सा मंतिर? मीटु निज्जमे इद सपना हूडा मंतिर इत्तेके मीटु सैनिक ओसो प्रशासनिक खर्च लोप्पा कमी कीतिर अनि आर्थिक निर्माण पोरो आयाना व्यय लोप्पा वृद्धि कियाकिर। मति मीवा सपना निज्जम हिल्लेके मीटु पाडना हर्देने तार्कितिर। इद उंदी रणनीतिक उसूल आंदू, फौजी कमीशन इदिना पोरो विचार कीयाना इंजी नन्ना आशा कीताना।

इंजे माटु मना सब्बे फौज कुन भंग कीयाना सही मंता या? हिल्ले, इद्रम कीयाना बेस आयो आयार। बारांकु इत्तेके दुश्मन इंजे वेने मंतोर, अनि मावा पोरो दबाव वाटा मंतोर माकिन घेराव कीसी मंतोर। माटु मना राष्ट्रीय प्रतिरक्षा तुन मजबूत किया लागियर। इद उद्देश्य ते माटु सबसे मुन्ने आर्थिक निर्माण कार्य तुन सुदृढ़ कीयाना।

4

राज्य, उत्पादन शाखांग ओसो उत्पादन नडमा ता संबंध

उंदी पक्ष ते राज्य ओसो दूसरा पक्ष ते कारखानांग, कृषि सहकारी समितिंग नडमा ता संबंध। उंदी पक्ष ते कारखानांग, कृषि सहकारी समितिंग ओसो दूसरा पक्ष ते उत्पादन नडमा ता संबंधकु। इव रेंडासी रकम ता संबंध कुन सही तरीका ते हल कियाला काजे माटु सिर्फ उंदी पक्ष तुने आयवा मूंडासी पक्ष कुन इत्तेके राज्य, गोहड़ी ओसो मानेय पोरो ध्यान हियाना। लेवेके माटु “सेना ओसो जनता पोरो ध्यान हियाना”, “सार्वजनिक हित ओसो व्यक्तिगत हित कुना पोरोने ध्यान हियाना इंतोमा” सोवियत संघ ता अनुभव ओसो खुद मावा अनुभव कुन हूइतेके इंजेटले माटु इद समस्या तुन बेस हल कीयाना पोरो ध्यान हियाना जरूरी मंता।

उदाहरण तुकू मजदूर लोर किने हूडाटू। बद्रम-बद्रम ओरा श्रम-उत्पादकता बेरसिंता, अद्रम-अद्रम ओरा काम ता परिस्थितिं ओसो सामूहिक कल्याण लोप्पा वेने सूधार आयना। माटु हमेशाए सादा पिस्वल ओसो कठोर परिश्रम ता पक्ष एतितोम अनि व्यक्तिगत सुख-सुविधांग तुन सामूहिकता तुकू पोरो तासना ता विरोध कीतोम। संगेने माटु हमेशा जनता ना पिस्वल ता सुरता तासितोम अनि नौकरशाही ता विरोध कीतोम। बारांकु इत्तेके इदु जनता ना कल्याण पोरो विचार हिल्ला लेक्का काम कीता। मावा राष्ट्रीय अर्थव्यवस्था ता पूरा विकास संगे-संगे, वेतन व्यवस्था वेने बेस कियाना। इस्सले माटु मुख्य रूप ते दोड़ स्तर ते काम कीयाना मजदूर लोरा वेतन उचुन बेरसी कीयाना निर्णय कीतोम अनि पोरो स्तर ता कर्मचारिना नड़मा ता अंतर तुन कम कीतोम। साधारण रूप ते इंजे वने मावगा वेतन अचोन बेरसताद हिल्ले मति हत्ता काल तुकू मना मजदूर लोरा पिस्वल वेल्ले सुधरे माता, बारांकु इत्तेके बाकी पोल्लोंगे आयावा इंजे मुन्ने तुकू ज्यादा लोकुर रोजगार किया मंतोर अनि रेट कम ओसो स्थिर मंता। सर्वहारा वर्ग ता शासन लोप्पा, मावा मजदूर लोर हमेशाए पोरो स्तर ता राजनीतिक चेतना ता ओसो श्रम पोरो वेल्ले जोश तोहतोर। हत्ता साल ता आखरी ते केंद्रीय कमेटी दक्षिणपंथी रूढीवाद विरुद्ध संघर्ष ता आह्वाना कितास्के मजदूर लोर वेल्ले जोश संगे अदिना अमल कितोर अनि इयेटा पहली तिमाही योजना तुन सफल कीसी मुन्ने बस्केने आयवा लेक्कटा महत्वपूर्ण काम कितोर। कठोर परिश्रम कीयाना इद जोश तुन माटु बेरसी कीयाना अनि ओरा काम ओसो रोज ता पिस्वल संबंदिर वेल्ले जरूरी समस्यांग कुन हल कीयाना बगिल मुन्ने तुकू ज्यादा ध्यान हियाना।

इगा नन्ना एकीकृत नेतृत्व ते कारखानांग ना स्वतंत्रता ता सवाल पोरो वेने उचुन वड़ककाना नावा हिसाब ते कारखानांग संबंधित हर समस्या ता निर्णय केंद्रीय अर्थोरिटी, लेवेके प्रांतीय ओसो म्युनिसिपल अर्थोरिटी कीयाना ओसो कारखानांग लोप्पा तम्मा बदे अधिकार हिल्ला मंदाना, ओरु स्वतंत्र रूप ते काम किया परवा लेक्का मंदाना, ओरकिन बदे फायदा हिल्ला मंदानाद सही हिल्ले। माकिन केंद्रीय अर्थोरिटी, प्रांतीय,

म्युनिसिपल अथॉरिटी, कारखाना नडमा अधिकार, फायदा तासही बंटावार कीयाना बारे ते ज्यादा अनुभव हिल्ले। इदिना बारे ते ओसो अध्ययन कीयाना। केंद्रीकरण ओसो स्वतंत्रता रेंडासी विरोधी पहलू ना एकता निर्देशक आंदुंग, केंद्रीकरण ओसो स्वतंत्रता रेंडासी मंदाना जरूरी मंता। उदाहारण तुकु माटु इंजे उंदी मीटिंग कियामंतोम इद केंद्रीकरण ता पहलू आंदू; मीटिंग पेरके मावा लोप्पटल उचुन मुल वेलियला दायनूर, उचुन मुल पुस्तक पढेमायनूर अनि उचुन मुल गाटो तिंदला दायनूर, इद स्वतंत्र पहलू आंदू। माटु मीटिंग तुन रोमी कियवा, सब्बे तोर किन उचुन स्वतंत्रता हियवा लेवा मीटिंग लगातार जारी तासतेके माट सब्बे तोर डोलता लेक्का आयो या? इद पोल्लो बद्रम मानेय ना पोरो सही मंता अद्रमे कारखाना ओसो उत्पादन ता बाकी शाखांग पोरो वेने सही मंता। उत्पादन ता हर शाखा तुन ओसो ज्यादा सही तरीका ते विकास कीयाना अतेतेके अदिन केंद्रीकरण संगे-संगे स्वतंत्रता ता वेने इस्तेमाल कीयाना।

इंजे किसान लोर किन हूडकाल। किसान लोरा संगे मावा संबंध हमेशा बेस मंदिता मति अनाज ता सवाल तुन पोयसी माटु उंदी गलती कीतोम। 1954 ते ऊसा वातांकु मावा देश ता उचुन इलाकांग लोप्पा उत्पादन कम आता मति अदे साल माटु 700 करोड़ चिन अनाज अस्तोम। उत्पादन कम आयना अनि अस्सनादु बेरसतांकु हत्ता वसंत ते वेल्ले जागा ने अनाज हर मानेय ना तोड्डी ते मत्ता अनि लगभग हर परिवार अनाज अस्सला काजे राष्ट्रीय एकाधिकार संगे वडकता। किसान लोरा नाराज आतोर अनि पार्टी लोप्पा ओसो बाहर वेल्ले शिकायत कुन वातांग। बचोनो लोकुर पुंजी-पुंजी बेरसी कीसी इव समस्यांग कुन पेश कितोर अनि मावा पोरो हमला कियाला काजे मौका ता फायद एतितोर, मति मना कोम लोप्पा बदे कमी हिल्ले इंदा परवोम। हालनाचोन जांचपडताल ता कमी ओसो परिस्थिति सही आंकलन कियवा कारण ते 700 करोड़ चिन अनाज ज्यादा अस्तोम- इद उंदी गलती मत्ता। इद गलती समझेमाता पेरके माटु 1955 ते 700 करोड़ चिन अनाज कम अस्तोम अनि अनाज ता उत्पादन ओसो अनाज ता अस्सना-वम्मना कोटा तय कीतोम¹, तीना संगेने अद

साल ते फसल वेल्ले बेस आता। अनाज अस्सना कमी ओसो उत्पादन ज्यादा आतांकु किसान लोरा कैदे मुन्ने तुकू 2,000 करोड़ चिन ज्यादा अनाज वात्ता। इद्रम हत्ता कालम ते शिकायत कीयाना किसान वेने “कम्युनिस्ट पार्टी निज्जमे वेल्ले बेस मंता” इत्तोर, इद पोल्लो पूरा कम्युनिस्ट पार्टी सुरता तासना।

सोवियत संघ किसान लोर किन वेल्ले कमजोर कीयाना लेक्कटा निर्णय कित्ता। अनिवार्य बिक्री व्यवस्था² ओसो बाकी तरीकांग संगे अगाटा किसान लोर वेल्ले कम कीमत ते वेल्ले उत्पादन क्रिया लागिंता। पूंजी जमा कीयाना तरीका ता कारण ते उत्पादन पोरो अगाटा किसान लोरा जोश वेल्ले कम आता। मीटु चारो लेवा उंदी कोर्रें मॅज ज्यादा हियाना लेवेके कोडा स्पीड वित्ततेके वेने अदिन रोंडा मेय्यला हियवा मंदा परिंतिरा बचोन लब्बड़ पोल्लो मंता।

किसान लोरा पोरो मावा नीति सोवियत संघ ता नीति तुकु अलग मंता। ताना लोप्पा राज्य ओसो किसान लोरा हितकुन सुरता तासताद मंता। मावगा कृषि-टैक्स ता रेट हमेशाए कम मत्ता। औद्योगिक उत्पादन ओसो कृषि-उत्पादन कुना विनिमय लोप्पा माटु समान मूल्य लेवेके लगभग समान मूल्य ता विनिमय कीयाना नीति लागू कीतोमा। किसान लोर किन बदे नुकसान आयनायो इंजी राज्य कृषि-उत्पादन बिक्री प्रतिमानित कीमत कुना संगे आंता। इदे आयवा मावगा बिक्री रेट वेने बेरससोर दाया मंता। किसान लोरा तैयार औद्योगिक माल सप्लाई क्रियाला उचुन मुनाफा कमई कीसी ज्यादा बिक्री बेरसी कीयाना नीति ओसो कीमत स्थिर तासना लेवेके सही कटौती कीयाना नीति तुन लागू कीयाना; अनाज कमी वाले इलाकांग लोप्पा किसान लोर किन अनाज सप्लाई कीयानास्के माटु सरकारी बगिल तल उचुन घाटा पूरा कीसी कम कीमत ते अनाज बिक्री व्यवस्था कीतोमा। इव सब्बे ताकतेकाई माटु सतर्क हिल्लेके गलती आया परिंता। इद सवाल पोरो सोवियत संघ लोप्पा कित्ता गंभीर गलतिंग कुन सरता तासिसी माटु ओसो ज्यादा सतर्क मंदांना अनि राज्य ओसो किसान लोरा नड़मा ता संबंध कुन सुधरे कीयाना।

अद्रमे सहकारी समितिं ओसो किसान लोरा नडमा ता संबंध कुना लोप्पा वेने इद्रमे कीयाना। बदे सहकारी समिति ता आमदनी ता बचोन हिस्सा राज्य तुकू, सहकारी समिति तुकू ओसो किसान लोरकिन हियाना ओसी वीर सब्बे तोर किन बद्रम हियाना इंजी सही निर्णय कीयाना। सहकारी समितिं तुन दोरकना हिस्सा सीधा किसान लोरा सेवा ते ने वाटमूडांता। उत्पादन संबंधित खर्च ता बारे ते बदे वेने रकम ता स्पष्टीकरणे आयवा मैनेजमेंट संबंधित खर्च, जमा-पूंजी पुनरुत्पादन ता विस्तार काजे वाटना अनि सार्वजनिक कल्याण कोष किसान लोरा कल्याण काजे वाटना जरूरी मंता। मति माटु इविन अलग-अलग मुद्दांग काजे कीयाना खर्च तुन किसान लोरा संगे काल्पना इंजी तय कीयाना। माटु उत्पादन ओसो मैनेजमेंट संबंधित खर्च लोप्पा सख्त बचत कीयाना। जमा-पूंजी ओसो सार्वजनिक कल्याण पूंजी तुन उंदी हंदी ते तासना अनि सब्बे बेसता पोल्लोंग उंदी साल लोप्पा पूरा आंतांग इंजी आशा कीयानायो।

प्राकृतिक मुश्किल कुन विडचसी माटु कृषि-उत्पादन लोप्पा वृद्धि संगे-संगे हल साल सहकारी समिति ता 90 प्रतिशत सदस्य लोरा आमदनी ते उचुन वृद्धि जरूरी मंता अनि पिस्ता 10 प्रतिशत सदस्य लोरा आमदनी लोप्पा वेने कमी वायवा लेक्का हूडना। 10 प्रतिशत सदस्य लोरा आमदनी ते बदे कमी वातेके टाईम मत्तास्केने इद समस्या तुन हल कीयाना तरिका परहकना जरूरी मंता।

संक्षिप्त ते राज्य ओसो कारखाना नडमा, राज्य ओसो मजदूरी नडमा, कारखाना ओसो मजदूरी नडमा राज्य सो सहकारी समिति नडमा, राज्य ओसो किसान लोरा नडमा, सहकारी समिति ओसो किसान लोरा नडमा ता संबिध ते रेंडासी पक्ष कुन सुरता तासना जरूरी मंता। सिर्फ बदे उंदी पक्ष तुन सुरता तास्तेके समाजवाद काजे ओसो सर्वहारा तानाशाही काजे नुकसानदायक साबित आंता। इद 60 करोड़ लोकुरा संबंधित उंदी बेहरा सवाल आंदू अदिन काजे इदिना संबंध ते पूरा पार्टी ओसो पूरा राष्ट्र लोप्पटा लोकुर किन बार-बार शिक्षित कीयाना जरूरी मंता।

केंद्रीय अर्थोरिटी ओसो स्थानीय अर्थोरिटी नडमा ता संबंध

केंद्रीय अर्थोरिटी ओसो स्थानीय अर्थोरिटी कुना नडमा ता संबंध ता उंदी दूसर अंतरविरोध आंदू। इद अंतरविरोध तुन हल कियाला काजे माटु मावा ध्यान इंजे स्थानीय अर्थोरिटी ता अधिकार कुना लोप्पा उंदी हंदी एवनल वृद्धि बद्रम कीयाना, अविन ओसो ज्यादा स्वतंत्रता बद्रम हियाना, अविन वेल्ले काम कीयाना मौका बद्रम हियाना इंदाना बगिल ध्यान केंद्रित कीयाना। इव सब्बे माटु केंद्रीय अर्थोरिटी कना एकीकृत नेतृत्व मजबूत कीयाना पोरो आधार आसी कीयाना। इद्रम कीयाना उंदी शक्तिशाली समाजवादी देश ता निर्माण कीयाना काम लोप्पा फायदा आंता। मावा प्रादेशिक भूमि वेल्ले बेहरा मंता अनि मना जनसंख्या वेल्ले मंता। मनगाडा परिस्थिति वेल्ले कठिन मंता। अदिनके सिर्फ बदे उंदी पक्ष पहलकदमी ता इस्तेमाल कीयाना जागा ते केंद्रीय ओसो स्थानीय रेंडासी स्तर ता अर्थोरिटीकु तम्मा पहलकदमी इस्तेमाल कीयाना वेल्ले बेस आयारा। माटु सोवियत संघ ता नकल कीसी बदे वेने चीज तुन केंद्रीय अर्थोरिटी कैदे हियानायो, स्थानीय अर्थोरिटी तुन बचोनो रकम ता बंधन ते दोहची तासनायो, अविन स्वतंत्र रूप ते काम कीयाना अधिकार हियाना।

केंद्रीय अर्थोरिटी उद्योग ता विकास कीयाना ओसो स्थानीय अर्थोरिटी वेने इद्रमे कियाला आल्सिंतांग। सीधा केंद्रीय अर्थोरिटी दोड़ मंदाना उद्योग कुना लोप्पा वेने स्थानीय अर्थोरिटी तल मदद एता लागिंता। कृषि ओसो वाणिज्य बारे ते इद पोल्लो ओसोए निज्जम मंता। संक्षिप्त ते माटु समाजवादी निर्माण तुन मुन्ने ओयना इत्तेके माटु स्थानीय अर्थोरिटी ता पहलकदमी ता विकास कीयाना जरूरी मंता। माटु केंद्रीय अर्थोरिटी तुन मजबूत कीयाना इत्तेके स्थानीय अर्थोरिटी हितकुना बगिल ध्यान हियाना जरूरी मंता।

इंजे परिस्थिति ते स्थानीय अर्थोरिटी लोप्पा नालुंग बगिल तल हस्तक्षेप आसोर मत्तांकु अविना मुश्किलकु बेरसिंतांग। बदे मंत्रालय बने

कित्ता तुरंत अदु क्रांति कियाला आल्सिंता अनि आदेश जारी कींता। विभिन्न मंत्रालयकु प्रांतीय स्तर ता पार्टी-कमेटींग लेवेके जन-परिषद कुन हियानादु सही मानेमायोंग अदिन काजे अवु प्रांत कु, म्युनिसिपलिटिंग संबंधित विभाग कु लेवेके ब्यूरोंग संगे सीधा सम्पर्क कींतांग अनि हर दिया अविन आदेश हीसोर मंतांग। इव सब्बे आदेश कुन केंद्रीय अर्थोरिटी लोहता लेक्का आल्समूडांता मति असल इत्तेके पार्टी ता केंद्रीय कमेटी लेवेके राज्य-परिषद तुन अविना बारे ते जानकारी वेने मन्नो आंता। इव आदेश कुना कारण स्थानीय प्राशासन कुना बोजा वेल्ले बेरसिंता। आंकड़ांग जमा कियाला काजे बने कित्ता अलग-अलग रकम ता फार्म कुना संख्या वेल्ले आता। इदिन बदले कीयाना जरूरी मंता।

माटु उंदी कार्यशैली पोरो जोर हियाना अनि अदिना अनुसार माटु कैदे पोयता मुद्दांग ना बारे ते स्थानीय अर्थोरिटी संगे सलाह-मशविरा जारी मंदाना जरूरी मंता। स्थानीय अर्थोरिटी संगे सलाह-मशविरा कीयाना पार्टी ता केंद्रीय कमेटी ता व्यवहार आंदू; अदु मुन्ने विचार-विमर्श कियवा लेवा जल्दबाजी ते बदे आदेश जारी कीवो आंता। माटु केंद्रीय अर्थोरिटी लोप्पा काम कीयाना विभिन्न मंत्रालय ओसो विभाग इदिना बगिल बेस ध्यान हियानुंग अनि इदिना संबंधित समस्यांग ना बारे ते मुन्ने स्थानीय अर्थोरिटी संगे पूर्ण रूप ते सलाह-मशविरा कीसीए बदे वेने आदेश जारी कियानुंग इंजी आशा कींतोम।

केंद्रीय विभाग ता रेंडु श्रेणिंग मंतांग। पहली श्रेणी लोप्पा दोड़ स्तर ता कारोबार एवनल नेतृत्व कीयाना अधिकार मंदाना विभाग वांतांग, मति इविना स्थानीय प्रशासनिक कार्यालय, कारोबार कुना पोरो स्थानीय अर्थोरिटी ना देखरेख वेने मंदिता। दूसरा श्रेणी लोप्पा मार्गदर्शन बने कीयाना, योजनांग बने कीयाना विभाग कुन वांतांग, अविन लागू कीयाना जिम्मेदारी स्थानीय अर्थोरिटींगे एतिंतांग।

मावा लेक्कटा बेहरा देश काजे ओसो मावा लेक्कटा बेहरा पार्टी काजे केंद्रीय ओसो स्थानीय अर्थोरिटी नडमा ता संबंधित समस्यांग कुन हल कीयाना वेल्ले महत्वपूर्ण मंता। उचुन पूंजीवादी देश कुना लोप्पा वेने

इदिना पोरो वेल्ले ध्यान हींतोरा। अविना सामाजिक व्यवस्था मावा सामाजित व्यवस्था तुकू बुनियादी रूप ते अलग मंता मति अविन विकसित कीयानास्के ओरकिन दोरकता अनुभवकु मावा काजे अध्ययन कीयाना लेक्का मंता। माटु खुद मावाए अनुभव कुन हूडा परिंतोमा मना लोक गणराज्य ता स्थापना ता शुरुआत ते बेहरा प्रशासनिक एरिया बने कीयाना व्यवस्था वेल्ले जरूरी मत्ता, अदिना लोप्पा उचन कमजोरिंग मत्तांग। इविन पेरके काओ कांग, राओ शू-श ना पार्टी-विरोधी गठजोड फायदा वेने एतित। पेरके बेहरा प्रशासनिक इलाकांग कुन भंग कीयाना ओसो विभिन्न प्रांत कुन सीधा केंद्रीय अर्थोरिटी लोप्पा तासना निर्णय किताद मंता; इद उंदी सही निर्णय मत्ता। मति समस्या बेरसतांकु स्थानीय अर्थोरिटींग कुन जरूरी स्वतंत्रता दोरकवा लेक्का आता अद्रमासी वेल्ले गडबड आता। मना संविधान अनुसार, कानून बने कीयाना अधिकार केंद्रीय अर्थोरिटी तुकू मंता। मति स्थानीय अर्थोरिटी तन्ना ठोस परिस्थिति सो काम ता विशेष जरूरत कुन सुरता तासिसी तन्ना काजे नियम-विनियम खुद बने किया परिंतांग अनि ठोस निर्णय एता परिंतांग। इद्रम कीयानास्के केंद्रीय अर्थोरिटी तय किता उसूल कुना उल्लंघन आयवा लेक्का हूडना; इद्रम कीयाना संवैधानिक रूप अनुमति हिल्ले। माटु एकता ओसो विशिष्टता मंदाना इंजी आलिसंतोमा। उंदी शक्तिशाली समाजवादी देश ता निर्माण कियाला काजे उंदी मजबूत, एकीकृत केंद्रीय नेतृत्व मंदाना ओसो पूरा देश लोप्पा एकीकृत नियोजन, अनुशासन मंदाना वेल्ले जरूरी मंता; इद अनिवार्य एकता तुन भंग कीयाना अनुमति इनपडे हिल्ले। संगेने स्थानीय अर्थोरिटी ता पहलकदमी ता पूरा विकास कीयाना, हर स्थानीय अर्थोरिटी तुन स्थानीय परिस्थिति ता अनुकूल तम्मा विशिष्टतांग तासला हियाना जरूरी मंता। इद विशिष्टता काओ कांग ना विशिष्टता लेक्का आयवा उंदी सम्पूर्ण हित ते ओसो राष्ट्रीय एकता तुन सुदृढ बने कियाला जरूरी मत्ता विशिष्टता आंदू।

विभिन्न स्थानीय अर्थोरिटींग नडमा ता संबंध कुना समस्या वेने मावा मुन्ने मंता अनि इगा मुख्य रूप ते पोरोटा स्तर ता स्थानीय अर्थोरिटी

ओसो दोड़ स्तर ता स्थानीय अर्थोरिटी नडमा ता संबंध ता बारे ते रासकाना केंद्रीय विभाग कुना बारे ते प्रांत ओसो म्युनिसिपलटिंग ना शिकायतकु वांतांग अस्के प्रांतकु ओस म्युनिसिपलटिंग ना बारे ते प्रिफेक्चर, काउंटिंग, जिलांग लेवेके श्यांग कुना बदे वेने शिकायत मननो या? केंद्रीय अर्थोरिटी प्रांत ओसो म्युनिसिपलटिंग कुन तम्मा पहलकदमी ता विकास कीयाना मौका हियाना ओसो इद्रमे प्रांत ओसो म्युनिसिपलटिंग कुन वेने प्रिफेक्चर, काउंटिंग, जिलांग ओसो श्यांग कुना संगे वेने कीयाना इंजी सुरता तासना; रेंडासी परिस्थिति ने दोड़ स्तर ता अर्थोरिटिंग खुद किन बंधन ते वाटना लेक्का कीयानायो। बदे डायुट हिल्ला दोड़ स्तर ते कमारेड्स किन केंद्रीकरण ता उसूल लागू कीयाना जरूरत मत्ता बद-बद समस्यांग इंजी जरूरी जानकारी हियाना ओरु तम्मा विचार वात्ता लेक्का काम कीयानायो। संक्षिप्त ते केंद्रीकरण ता उसूल तुन संभव आतगा ओसो जरूरी मत्तास्केने लागू कीयाना लेवेके इनपडे लागू कीयानायो। प्रांत, म्युनिसिपलटिंग, प्रिफेक्चर, काउंटिंग, जिलांग ओसो श्यांग सब्बे तविन तम्मा स्वतंत्रता ओसो अधिकार ता इस्तेमाल कीयाना अनि अविना काजे संघर्ष कीयाना। पूरा राष्ट्र ता हित ते बदे उंदी स्थानीय विभाग ता हित ते हिल्ले। इव अधिकार कुना काजे संघर्ष कीयाना तुन स्थानीयतावाद ता पोरोल हियमूडायो अनि अविन स्वतंत्रता ता गलत मांग वेने इनमूडायो।

विभिन्न प्रांत ओसो म्युनिसिपलटिंग नडमा ता संबंध वेने विभिन्न स्थानीय अर्थोरिटिंग नडमा ता संबधि कुनाए दूसरा रूप आंदु, इव संबंध कुना समस्यां तुन वेने सही तरीका ते हल कीयाना। सामान्य हितकुन सुरता तासना, उंदी दूसरा ता सहायता कीयाना ओसो उंदी दूसरा ता सुविधा तुन सुरता तासिसी काम कीयाना नीति ता पक्ष एतना उसूल तुन माटु अटल पालन कीतोमा।

केंद्रीय ओसो स्थानीय अर्थोरिटी नडमा ता संबंध ओसो विभिन्न स्थानीय अर्थोरिटी नडमा ता संबंध कुना सवाल हल कीयाना बारे ते मावा अनुभव इंजे वेने हालनाचो हिल्ले। मीटु इद समस्या पोरो वेल्ले ध्यान हीसी विचार-विमर्श कियाकिर, टाईम-टाईम ते मीवा अनुभव कुना निचोड़

तेंडसी मावा सफलतांग कुन समृद्ध कीसी कमजोरिंग कुन दूर कियाकिर इंजी आशा कीतोमा

6

हान राष्ट्रीयता ओसो अल्पसंख्यक राष्ट्रीयता ना नड़मा ता संबंध

तूलनात्मक रूप ते हान राष्ट्रीयता ओसो अल्पसंख्यक राष्ट्रीयता ना नड़मा ता संबंध ता बारे ते मावा नीति सही मंता। अदिन अल्पसंख्यक राष्ट्रीयता ना समर्थन मंता। माटु हान शोविनिज्म ता विरोध कीयाना पोरो जोर हीतोमा। स्थानीय-राष्ट्रीयता शोविनिज्म ता विरोध कीयाना वेने जरूरी मंता। मति इदिना पोरो माटु वेल्ले जोर हीवोम आंतोमा।

मना देश ता अल्पसंख्यक राष्ट्रीयता ना आबादी कम मंता मति अल्पसंख्यक राष्ट्रीयतांग मंदाना इलाका वेल्ले बेहरा मंता। देश ता कुल आबादी ता 94 प्रतिशत लोकुर हान राष्ट्रीयता तोर मंतोरा। इद वेल्ले बेहरा संख्या मंता। ओरु हान शोविनिज्म पोरो अमल कीतेके अल्पसंख्यक राष्ट्रीयतांग ना लोकुरा विरुद्ध भेदभाव कीतेके वेल्ले गलत आयारा। जमीन बोनगा ज्यादा मंता? आल्पसंख्यक लोरगा इत्तेके 50-60 प्रतिशत एवनल जमीन मंता। मावा हिसाब ते इद इलाका बेहरा मंता, साधन-स्त्रोत कुना संगे निंडसी मंता अनि बेहरा आबादी वाले देश आंदू; असल इत्तेके आबादी हान राष्ट्रीयता ताए ज्यादा मंता अनि इलाका अल्पसंख्यक लोरा बेहरा मंता, ओरगाने सम्पन्न साधन-स्त्रोत वेने मंता इदे आयवा भूमि दोड़ मंदाना साधन-स्त्रोत वेने लगभग ओरगाने ज्यादा मंता।

चीन ता इतिहास ता निर्माण लोप्पा देश ता सब्बे अल्पसंख्यक राष्ट्रीयतांग योगदान हीतांग। हान राष्ट्रीयता ता बेहरा आबादी उंदी वेल्ले जोम बचोनो राष्ट्रीयतांग आपसते कलियतांकु मंता। हत्ता कालम ते प्रतिक्रियावादी शासक लोर (मुख्य रूप ते हान राष्ट्रीयता तोरे मत्तोर) मावा विभिन्न राष्ट्रीयता ना नड़मा ता मतभेद पैदा कित्तोर अनि अल्पसंख्यक राष्ट्रीयतांग ना लोकुरा पोरो अत्याचार कित्तोर। ओरा प्रभाव तुन उचुन जोम काजे मेहनतकश लोकुरा लोप्पटल दूर कीयाना हल्को काम हिल्ला मंता। अदिन काजे राष्ट्रीयता संबंधित मना सर्वहारा नीति ता बारे ते माटु

मना कार्यकर्ता लोर ओसो जनता तुन व्यापक रूप ते लगातार शिक्षित कीसोर मंदाना, हान राष्ट्रीयता ओसो अल्पसंख्यक राष्ट्रीयतांग नड़मा ता संबंध कुन बारबार समीक्षा कीसोर मंदाना पोरो ध्यान हियाना जरूरी मंता। इद्रमे उंदी समीक्षा 2 साल मुन्ने किताद मंता अनि इंजेटा समीक्षा कीयाना टाईम वेने वात्ता। अविना नड़मा ता संबंध सामान्य हिल्वेके माटु इद समस्या तुन वेल्ले गंभीरता ते हल कीयाना, अंगड़मे पोंगड़िंग कीसोर मंदानायो।

माटु अल्पसंख्यक राष्ट्रीयता ना इलाकांग लोप्पा लागू कीयाना लेक्कटा आर्थिक मैनेजमेंट, वित्त संबंधित प्रणाली ना बेस अध्ययन कीयाना।

मावा काजे माटु अल्पसंख्यक राष्ट्रीयता ना जीवा कीसी ओसो सक्रिय रूप ते मदद कीतेके ओरु तम्मा अर्थव्यवस्था, संस्कृति ता विकास कींतोर। सोवियत संघ लोप्पा रूसी राष्ट्रीयता ओसो अगाटा अल्पसंख्यक राष्ट्रीयता नड़मा ता संबंध वेल्ले असामान्य मंता; इदिनगडल माटु सबक एतना। वातावरण लोप्पा मत्ता वड़िय, भूमि पोरो नितसी मत्ता गेड़ा, भूमि दोड़ मत्ता सम्पदा सब्बे समाजवाद निर्माण काजे जरूरी मत्ता महत्वपूर्ण तत्व आदुंग मति इविना लोप्पाटल बदे वेने भौतिक तत्व ता दोहन ओसो इस्तेमाल कियाला मानेय हिल्वा आया परवो। मावा काजे माटु हान राष्ट्रीयता ओसो अल्पसंख्यक राष्ट्रीयता नड़मा बेस संबंध विकास कीयाना ओसो सब्बे राष्ट्रीयता ना नड़मा ता एकता तुन सुदृढ़ कीसी मना महान समाजवादी मातृभूमि ता निर्माण कियाला कलियसी कोशिश कीयाना जरूरी मंता।

7

पार्टी ओसो गैर-पार्टी तत्व नड़मा ता संबंध

मावगा सिर्फ उंदी पार्टी मत्तेकाई लेवेके बचोनो पार्टिंग मत्तेकाई रेंडासी ना लोप्पा बदिना परिस्थिति बेस मंदिता? इंजेटा परिस्थिति अनुसार बचोनो पार्टिंग मंदाना सही मंता बहे। इद पोल्लो हत्ता कालम ते वेने

निज्जमे मत्ता अनि वायना कालम ते वेने निज्जमे मंदियर; इत्तेके दीर्घकालीन सुविधा ओसो समीक्षा इद्रमे मंदियर।

मना देश लोप्पा बचोनो जनवादी पार्टिंग (मुख्य रूप ते राष्ट्रीय पूंजीपति वर्ग ओसो अदिना बुद्धिजीविरा पार्टिंग आंदुंग) जापानी आक्रमण विरोधी युद्ध ओसो च्यांग काई-शोक विरोधी संघर्ष ताकनास्के पुटतांग अनि नेंड वेने मंतांगे। अद्रमासी चीन ता परिस्थिति सोवियत संघ तुकू अलग मंता। माटु विचार-विमर्श कीसी जनवादी पार्टिंग कुन जिंदा तास्तोम अविना विचार कुना बारे ते प्रचार ता मौका हीतोम अनि अविना पोरो एकता ओसो संघर्ष ता नीति लागू कीतोम। माटु मावा सही उद्देश्य संगे आलोचना कीयाना सब्बे जनवादी पार्टिंग ना लोकुरा संगे एकता कीयाना पक्ष एतितोम। क्वोमिंगतांग सेना ओसो सरकार तल वात्ता वेई ली-ह्वान्ग ओसो वंग वन-हाओ लेक्कटा देशभक्त लोकुरा जोश बेरसी कियाला काजे माटु लगातार कोशिश कीसोर मंदाना। माटु लुंग युन, ल्यांह शू-मिंग ओसो फंग ई-हू ना लेक्का रांगसोर मंदाना लोकुर किन वेने पिस्वल पिस्सला खर्चा हियाना अनि ओरा अंगडमता पोंगडिंग ना खंडन कीसोरे ओरु कीयाना खंडन तले ध्यान हियाना पोल्लो तुन ग्रहण कीयाना अनि ओरकिन मावा निंदा कीयाना अनुमति हियाना। इद्रम कियानदु पार्टी, जनता ओसो समाजवाद काजे फायदा आंता।

चीन लोप्पा वर्ग ओसो वर्ग-संघर्ष अस्तित्व मत्तांकु बद्रमासी विरोधी पक्ष ता अस्तित्व मंदाना जरूरी मंता। सब्बे जनवादी पार्टिंग ओसो निर्दलीय जनवादी लोकुर चीनी कम्युनिस्ट पार्टी ता नेतृत्व तुन स्वीकार कीयाना ऐलान कितोर मति असल ते ओरा लोप्पटल बचोनो लोकुर कम, ज्यादा मात्रा ते मावा विरोध ते नितसी मंतोर। “क्रांति तुन आखरी एवनल ताकी कीयाना”, अमेरिका आक्रमण ता प्रतिरोध कीयाना, कोरिया ता सहायता कीयाना आंदोलन ओसो भूमि-सुधार लेक्कटा समस्यांग लोप्पा मावा विरोधिर ओसो समर्थक लोर वेने मत्तोर। प्रतिक्रांतिकारीरा दमन कीयाना पोरो ओरा विचार ते इंजे वेने डावुट मंता। ओरु मावगा उंदी समाजवादी तरीका ता संविधान मंदाना इंजी आल्सोर बारांकु इत्तेके ओरा

हिसाब ते विस्तृत प्रोग्राम बेसे मंता मति संविधान ता ड्राफ्ट तैयार आतास्के ओरु सब्बे तोरु अदिना समर्थन ते कै पोरो तेहतोर। वस्तु हमेशा तन्ना विरोधी तत्व लेक्का बदलेमातांग, इद पोल्लो बचोनो सवाल कुना पोरो जनवादी पार्टिंग लागू कित्ता पूना रुझान ता बारे ते वेने निज्जम मंता। इव पार्टिंग उंदी बगिल मावा खिलाफ मंतांग अनि सरा बगिल मावा समर्थन वेने कींतांग। हमेशा अवु मावा विरोध कीयाना शुरू कीसी मावा समर्थन कीयाना परिस्थिति ते एविंतांग।

कम्युनिस्ट पार्टी ओसो जनवादी पार्टिंग सब्बे इतिहास लोप्पा ने पुट्टतांग। इतिहास लोप्पा पुटता चीज इतिहास लोप्पा ने माईता। अदिन काजे उंदी दिया कम्युनिस्ट पार्टी वेने जरूरी मायार अनि जनवादी पार्टिंग वेने जरूर मायनुंग। इद्रम आयना उंदी लब्बड़ घटना आंता या? नावा हिसाब ते इदु उंदी वेल्ले बेसता घटना आयार। माटु उंदी दिया कम्युनिस्ट पार्टी ओसो सर्वहारा तानाशाही तुन विडसा परितोम इंजी नन्ना बेसे समझेमांतान। मावा काम अविना मायना प्रक्रिया तुन तेज कीयानाद मंता। इद मुद्दा पोरो माटु मुन्ने वेने बचोनो बेरा विचार कित्ताद मंता।

मति वर्तमान कालम ते सर्वहारा पार्टी ओसो सर्वहारा तानाशाही लेवा मावा काम ताका परवो; इदे आयवा अविन ओसो ज्यादा शक्तिशाली बने कीयाना वेने वेल्ले जरूरी मंता। लेवेके माटु प्रतिक्रांतिकारीरा दमन कीयाना, साम्राज्यवादीरा प्रतिरोध कीयाना ओसो समाजवादी निर्माण कीयाना, समाजवाद निर्माण पेरके अदिन सुदृढ़ क्रिया परवोम आयकोम। सर्वहारा पार्टी ओसो सर्वहारा तानाशाही बारे ते लेनिन ना सिद्धांत “पाड़ना आता” इंदाना पोल्लो गलत मंता। सर्वहारा तानाशाही उंदी वेल्ले दमनकारी वस्तुए आंदू। मति नौकरशाही लेक्का उंदी शक्तिशाली ढांचा ता विरोध कीयाना वेने जरूरी मंता। पार्टी ओसो सरकार ता अंग कुन बेस दुरुस्त कीयाना अनि अविना लोप्पा दो-तिहाई कटौती कीयाना इंजी नावा प्रस्ताव मंता। इद्रम कीयानास्के बोरें डोलनायो अनि काम रोमवा लेक्का हूडना।

मति पार्टी ओसो सरकार ता अंग कुन दुरस्त कीयाना इत्तेके जनवादी पार्टींग कुन तोका विड़सी कीयाना इंजी आयो। नावा हिसाब ते ओरा संगे मना संबंध तुन ओसो बेस बने कीयाना उद्देश्य ते मीटु मावा संयुक्त मोर्चा ता काम बगिल ध्यान हियाना अनि समाजवाद काजे ओरा जोश बेरसी कीयाना पूरा कोशिश कीयाना।

8

क्रांति ओसो प्रतिक्रांति नड़मा ता संबंध

प्रतिक्रांतिकारिरा गिनती बद रकम ता तत्व कुना लोप्पा कीयाना? ओरा गिनती नकारात्मक तत्व लोप्पा, विध्वंसकारी तत्व कुना लोप्पा कीयाना; ओरु सकारात्मक तत्व कुना विरोध कीयाना ताकत आंदु; प्रतिक्रांतिकारिरा काजे बदलेमायना संभव मंता या? बदे डावुट हिल्ला कट्टरपंथिर बस्केने बदलेमायोर। मति मावा देश ता परिस्थिति ते वेल्ले प्रतिक्रांतिकारीर कम-ज्यादा मात्रा ते जरूरी बदलेमांतोर। मनम लागू कित्ता सही नीति ता कारण ते वेल्ले प्रतिक्रांतिकारिर बदलेमातोर अनि इंजे क्रांति ता विरोध कीयाना रोमी कित्तोर, ओरा लोप्पाटल उचुन मुल इत्तेके उचुन बेसता काम वेने कित्तोर।

इगा दोड़ रास्ता मुद्दांग पोरु वड़कना जरूरी मंता:

पहली, 1951-52 ते प्रतिक्रांतिकारिरा दमन कीयाना जरूरी मत्ता इंजी वेहाना जरूरी मंता। इद आंदोलन ताकी कीयाना जरूर हिल्ले इंदाना दृष्टिकोण वेने मंता, मति इद दृष्टिकोण गलत मंता।

प्रतिक्रांतिकारिरा दमन कियाला इव तरिकांग लागू कियमूडांता: हौकना, कारावास ते वाटना, ओरा पोरु कोंडा तासना अनि ओरकिन खुला विड़सना। हौकना इत्तेके सब्बे तोर पुत्तोर। कारावास इत्तेके मावा हिसाब ते प्रतिक्रांतिकारिर किन जेल ते वाटसी श्रम संगे ओरा पूना-बदलाव कीयाना। कोंडा तासना इत्तेके मावा हिसाब ते ओरकिन समाज नड़मा मंदाला हियाना अनि जनता ना देखरेख ते ओरा पूना-बदलाव कीयाना। माटु ओरकिन खुला विड़सना इत्तेके गिरफ्तार कीयाना केस

अनुसार आखरी नंबर ते मत्ता लोकरु किन गिरफ्तार कीयानायो, गिरफ्तार कीतोरा लोप्पा बेसता व्यवहार मत्तोर किन रिहा कीयाना। विभिन्न रकम ता प्रतिक्रांतिकारिरा दमन कीयानास्के हर केस ता ठोस परिस्थिति पोरो ध्यान हीसोरे अलग-अलग तरीकांग लोगू कीयाना।

वाटु, इंजे माटु विशेष रूप ते हौकना बारे ते आल्सकाला प्रतिक्रांतिकारिरा दमन कीयाना आंदोलन ताकनास्के माटु उचुन मुल किन हौकतद मंता इंदानदु निज्जमे। मति वीर लोकरु बद्रमतोर मत्तोर? वीर लोकरु जनता ना नेत्तुर उंडनोर अनि जनता ना होंग मत्ता प्रतिक्रांतिकारिर आंदुर। 60 करोड़ जनता ना महान क्रांति लोप्पा माटु “पूर्व ता क्रूर तानाशाह” ओसो “पश्चिम ता क्रूर तानाशाह” लेक्कटा स्थानीय निरंकुश तत्व कुन हौकवेके जनता पोरो तेदा परवो आंता। माटु दमन आंदोलन ताकी कियवेके इदिना लोप्पा लागू कित्ता मना नीति जनता स्वीकार कीवो आसी मनवड़। इंजे उचुन मुल स्तालिन बचोनो लोकरु किन गलत तरीका ते हौकतोर इंजी केंजतोर अदिन काजे ओरु तुरंत माटु प्रतिक्रांतिकारिर किन हौकसी गलती कीतोम इंजी निष्कर्ष तेंडा मंतोर। इद पोल्लो सही हिल्ले। वीर प्रतिक्रांतिकारिर किन हौकना सबसे सही निर्णय मत्ता अनि बारे ते इगा वेहना वेल्ले जरूरी मंता।

दूसरा, प्रतिक्रांतिकारिर इंजे वेने मंतोर, मति मुन्ने तुकू वेल्ले कम मंतोर इंजी वेहाना जरूरी मंता। हू फांग ना पोल्लो मुन्ने वात्ता पेरेके प्रतिक्रांतिकारिर किन परहकना जरूरी आता। प्रतिक्रांतिकारिर इंजे एवनल मकसी मंतोर, ओरकिन परहकसी हौकना कोशिश जारी तासना। प्रतिक्रांतिकारी विध्वंसकारी कार्रवाईंग कीसोर मंदाना उचुन प्रतिक्रांतिकारिर इंजे वेने मंतोर इंजी वेहाना जरूरी मंता। उदाहारण तुकू ओरु एर्मिंग हौकसितोर, अनाज पोत्ती कींतोर, कारखानांग ध्वस्त कींतोर, गोपनीय जानकारी चोरी कींतोर अनि प्रतिक्रियावादी पोस्टर वाटितोर। अदिन काजे प्रतिक्रांतिकारिर पूराए खत्म आतोर इंजी माटु आराम ते हुंजा परवोम। चीन लोप्पा ओसो दुनिया ते बस्के एवनल वर्ग-संघर्ष मंता अस्के

एवनल माटु सतर्कता ते मंदाना। मति प्रतिक्रांतिकारिर इंजे वेने बेहरा संख्या ते मंतोर इंजी जोर हियाना वेने गलत आंता।

तीसरा, समाज लोप्पा मत्ता प्रतिक्रांतिकारिरा दमन कीयानास्के, इंजेटल माटु परताचोन कम संख्या ते गिरफ्तारिंग कीयाना अनि कम संख्या ते लोकरु किन हौकना पोरो ध्यान हियाना। जनता ना दुश्मन मत्ता ओसो जनता ना होंग मत्तोर लोप्पटल उचुन मुल किन हौकना वेने जरूरी मंता। मति लोप्पाटल ज्यादातर लोकरु किन कृषि सहकारी समितिं ग कैदे सौंपे कीयाना अनि अगा ओरा पोरो कोंडा तासिसी ओरकिन खेतीबाड़ी काम ते वाटना, अनि श्रम संगे ओरा पूना-बदलाव कीयाना। इद्रम कीतेके वेने माटु इंजे बोनकिने हौकमूडायो, माटु इंजे हौकना सजा तुन समाप्त कीतोम इंजी ऐलान किया परवोम।

चौथा, पार्टी ओसो सरकार ता अंग, विद्यालय, ओसो फौजी यूनिट कुनल प्रतिक्रांतिकारिर किन परहकनास्के येनान ते कित्ता लेक्का वरोर किन वेने हौकवा लेवा, कम लोकरु किन गिरफ्तार कीयाना नीति तुन पालन कीयाना जरूरी मंता। साबित आता प्रतिक्रांतिकारिरा बारे ते संगठन कुन जांच कीयाना अनि सार्वजनिक सुरक्षा ब्यूरोंग बोनकिने वेने गिरफ्तार कीयानायो, प्रोक््यूरेटरी अंग कु बोनाए खिलाफ कानूनी कार्यवाही कीयाना अनि न्यायिक अदालत कु बोनाए खिलाफ मुकदमा ताकी कीयानायो। हर सौ प्रतिक्रांतिकारिरा लोप्पाटल 90 तकू ज्यादा लोकरु लोप्प इद्रमे कीयाना। कम से कम लोकरु किन गिरफ्तार कीयाना इत्तेके इदे आंदौ हौकना इत्तेके बोनकिन हौकवा लेक्का हूडना।

माटु बोनकिन हौकोम आंतोम? माटु हू फंग, फान हान-न्येन, राओ शू-श लेक्कटोर लेवेके सम्राट फू ई ओसो खांग त्से लेक्कटा बंदी बने कित्ता युद्ध अपराधिर किन हौकोम आंतोम। ओरकिन हौकना तुकू बदे फायदा हिल्ले अदिनके माटु ओरकिन हौकोम आंतोम, ओरा अपराधकु हौकना सजा हियाना लेक्का हिल्लेंग इंजी आयो। इद्रम ता बोरे अपराधी किन होकेतेके वरोन पेरेके वरोर इद्रम ता अपराधिर पेसिस वायनूर अनि वीना अपराध ता तूलना मुन्नेटा अपराधी ना संगे आयर अनि इद्रम ता बचोनो

तल्लांग भूमि पोरो अर्रनुंगा। दूसरा बचोनो लोकुर किन गलत तरीका ते हौकमूडायर। इतिहास लोप्पा बोरे वेने मानेय ना तल्ला मेंदुल तल अलग कित्ता पेरके जोड़े किया परमूडायो ओसो उंदी बेरा कोयता पेरके चाइव पोरका लेक्का कोइसा वेने परवो आंता। माटु चुकसी बोनाए तल्ला कोयतेके, बचोन कीतेके वेने अद गलती सुधरे किया परवोम आंतोमा तीसरा पोल्लो, इद्रम कीसी मीटु सबूत जमा कीयाना उंदी खोत नष्ट कीतिरा प्रतिक्रांतिकारिरा दमन कियाला काजे मीकिन सबूत ता जरूरत मंदिता। वरोर प्रतिक्रांतिकारी मानेय दूसरा प्रतिक्रांतिकारी मानेय ना खिलाफ उंदी जिंदा सबूत ता भूमिका निभे किया परितोर अनि मीकिन ओरा संगे वार्ता किया लागना लेक्कटा केस वेने मंदा परिंतांग। मीटु ओनकिन हौकतेके मीकिन बदे सबूत दोरको आंता। इद्रम कीतेके प्रतिक्रांति तुकू फायदा आंता, क्रांति तुकू आयो। चौथी पोल्लो, इद्रम ता प्रतिक्रांतिकारिरा जीवा एतितेके 1) उत्पादन वृद्धि आयो, 2) विज्ञान लोप्पा देश स्तर बेरसो, 3) नालुंग रकम ता नुकसादायक जंतु तुन हौकला मदद आया परवो, 4) राष्ट्रीय प्रतिरक्षा सुदृढ़ आया परवो ओसो 5) शाइवान तुन वापिस पोयला वेने मदद आयो। इद्रम कीतेके सिर्फ बंदी लोर किन हौकना गुनाह मीवा कैदे अरियर अनि बंदी लोर किन हौकना लोकुर हमेशा बदनामे आंतोरा ओसो उंदी पोल्लो, पार्टी ओसो सरकार ता अंग कुना लोप्पा मत्ता प्रतिक्रांतिकारी लोकुर समाज लोपा मत्ता प्रतिक्रांतिकारिर किनकु अलग मंतोरा। समाज लोप्पा मत्ता प्रतिक्रांतिकारी लोकुर जनता ना पोरो तेरगसी मंतोर अनि पार्टी ओसो सरकार ता अंग कुना लोप्पा मत्ता प्रतिक्रांतिकारिर जनता तुकू उचुन अलग-थलग मंदिंतोरा। मति बोरे वरोर मानेय किन दुश्मन बने कीयाना प्रतिक्रांतिकारिर वेल्ले कम मंतोरा। इद्रम बोनाए जीवा एतवा लेवा मत्तेके बाताल आंता? बीमार आतांकु शारीरिक श्रम किया परवा लेक्का मंदानोर किन श्रम संगे पूना-बदलाव कीयाना अनि इद्रम कीयाना लेक्का हिल्वोर किन पिस्सला काजे सुविधा हियाना। प्रतिक्रांतिकारिर वेल्ले कोइही मंदिंतोर, ओरु उंदी नुकसानदायक किटाणु लेक्का मंदिंतोर मति उंदी बार कब्जा ते वात्तास्के ओरकिन जनता ना सेवा ते वाटना।

पार्टी ओसो सरकार ता अंग कुना लोप्पा मत्ता बोरे वेने प्रतिक्रांतिकारी मानेय किन हौकनायो इंजी कानून बने कीयाना जरूरत हिल्ले या? इद मावा अंदरूनी नीति आंदू, अदिना सार्वजनिक रूप ते ऐलान कीयाना जरूरत हिल्ले; माटु इद नीति तुन परताचोन लागू कीयाना कोशिश कीयाना जरूरत मंता। इंजे हूडाटू, बोरे मानेय बिल्डिंग पोरो बम वाटितोर अनि अगा मत्ता सब्बे लोकुर लेवेके आधा लेवेके उंदी-तिहाई लोकुर डोलिंतोर अस्के मीटु बाता कियाकिर, ओर मानेय किन हौकिंतिरा लेवेके हौकविरे? मीटु जरूर ओनकिन हौकिंतोर

पार्टी ओसो सरकार ता अंग कुनल प्रतिक्रांतिकारि किन खत्म कीयानास्के बोरे वेने मानेय किन हौकनायो इंदाना नीति तुन लागू कीयाना इत्तेके ओरा संगे सख्त व्यवहार कीयाना वेने मना मंता इंजी आयो। मति माटु इद्रम कीतेके पेरके सुधरे किया परवा लेक्कटा गलतिंग कीयाना रोमी कियाला मदद दोरकिंता अनि बदे गलती आतेके अदिन सुधरे कीयाना मौका दोरकिंता। इद्रम वेल्ले लोकुर जीवा ते जीवा मत्ता लेक्का नेंस्किंतोर अनि पार्टी लोप्पा कामरेड्स नड़मा ता विश्वास मजबूत आंता। प्रतिक्रांतिकारी किन हौकवेके ओरकिन गाटो तीहलाए लागियर। सब्बे प्रतिक्रांतिकारि किन रोजी हियाना अनि ओरकिन तम्मा पूना-बदलाव कीसी पूना पिस्वल शुरू कियाला मौक हियाना। इद जनता ना काम हित ते मंदिता अनि विदेश कुना पोरो इदिन बेसता प्रभाव अरियर।

प्रतिक्रांतिकारिरा दमन कीयाना लोप्पा माटु इंजे वेने वेल्ले मेहनत ते काम कीसोर मंदाना। इदिना बगिल उचुन वेने ढील वायला हियानायो। वायना कालम ते माटु सिर्फ समाज ते मत्ता प्रतिक्रांतिकारिराए दमन कीसोर मंदानाए आयवा पार्टी, सरकार ता अंग, विद्यालय ओसो फौजी यूनिट कुना लोप्पा मत्ता सब्बे प्रतिक्रांतिकारि किन वेने परहकना जारी तासना। मावा काजे माटु मना ओसो दुश्मन नड़मा ता उंदी स्पष्ट विभाजन-रेखा पिङ्गना वेल्ले जरूरी मंता। दुश्मन तुन मना कैडर कुना लोप्पा ओसो मना नेतृत्वकारी अंग कुना लोप्पाप नेंगना मौका दोरकेतेके समाजावादी काम

काजे ओसो सर्वहारा तानाशाही काजे बचोन गंभीर खतरा पैदा आयार
इंदानदु माटु वेल्ले बेस पुतोमा।

9

सही ओस गलत नडमा ता संबंध

पार्टी लोप्पा आई बाहर आई सही ओसो गलत नडमा ता उंदी स्पष्ट
विभाजन-रेखा पिडंगना जरूरी मंता। गलतिंग कित्ता लोकुरा समस्या बद्रम
हल कीयाना इंदानदु महत्वपूर्ण सवाल मंता। ओरा पोरो सही रुझान पोयना
इत्तेके “पेरके आयना गलतिंग नल बचेमायला काजे मुन्ने आता गलतिंग
नल सबक एतना ओसो बीमार आतोर किन बचे कियाला काजे बीमारी
ता इलाज कीयाना” नीति लागू कीयाना। ओरा गलतिंग सुधरे कियाला
मदद कीसी ओरकिन क्रांति लोप्पा शामिल आसोर मंदाना अनुमति
हियाना। मना पार्टी ते नेतृत्व वांग मिंग कीसोर मत्तास्के कठमुल्लावादिरा
कैदे मत्तास्के मना पार्टी इद सवाल ता बारे ते गलती कित्ता अनि स्टालिन
ना कार्यशैली ता गलत रुझान कुन लागू कित्ता। ओरु समाज लोप्पा मत्ता
मध्यवर्ती ताकत कुना बहिष्कार कींतोर अनि पार्टी लोप्पटा लोकुर कुन
तम्मा गलतिंग सुधरे कीयाना अनुति हीवोर; ओरु इव रेंडासी रकम ता
लोकुर किन क्रांति तल बहिष्कृत कींतोर।

“आ क्यू ना असली कहानी” उंदी महान कहानी आंदू। नन्ना इद
कहानी मुन्ने बस्केने पढेमाता कामरेड्स कुन ओसो उंदी बेरा पढेमायना
इंजी वेहितान अनि बस्केने पढेमायवा कामरेड्स इदिन वेल्ले ध्यान हीसी
पढेमायना इंजी वेहितान। इद कहानी लोप्पा लू शुन मुख्य रूप ते वरोर
किसान ना बारे ते वेहतोर, ओरु वरोर पेरके अरता, राजनीतिक रूप ते
जागृत हिल्वा किसान मंतोर। ओरु “क्रांति तल बहिष्कृत” पोरोल ता उंदी
पूरा अध्याय लोप्पा वरोर नकली विदेशी क्रूर मानेय बद्रम आ क्यू किन
क्रांति लोप्पा शामिल आयला रोमी कींतोर इंजी वेहतोर। असल इत्तेके आ
क्यू क्रांति इत्तेके सिर्फ उचुन लोकुर लेक्का ओरु वेने तन्ना काजे उचुन
वस्तुंग जमा कीयाना इंजी आल्संतोर। मति नकली विदेशी राक्षस

ओनकिन इद्रम ता क्रांति तले जेक तासिंतोर। इद्रम इत्तेके उचुन वीरे नकली विदेशी राक्षस ना लेक्का मंतोर। ओरु गलतिंग कीयाना ओसो प्रतिक्रांति कीयाना नडमा बदे फर्क कियावा लेवा गलतिंग कित्ता बचोनो लोकर किन क्रांति तल बहिष्कृत कित्तोर अनि गलतिंग कीयाना दोषी मत्ता बचोनो किन लोकर किन हौकतोर। माटु इद सबक वेल्ले सुरता तासना। पार्टी तुकू बाहर ता लोकर किन क्रांति ता कैडर तल बहिष्कृत कीयाना लेवेके पार्टी लोप्पा गलतिंग कीयाना कामरेड्स किन तम्मा गलतिंग सुधरे कीयाना मौका हियवा मंदाना रेंडासी पोल्लोंग गलत मंतांग।

गलतिंग कित्ता कामरेड्स ना बारे ते उचुन मुल ओरा पर्यवेक्षण कीसोर मंदाना अनि ओरु गलतिंग सुधरे कीतोरे कीवोर इंजी हूडना इंतोर। मति नावा हिसाब ते सिर्फ पर्यवेक्षणे आयवा माटु ओरा गलतिंग सुधरे कियाला ओरा मदद वेने किया लागिगर। इत्तेके माटु ओरा पर्यवेक्षण कीयाना अनि ओरा मदद वेने कीसोर मंदाना। हर मानेय किन मदद ता जरूरत मंदिता; गलतिंग कियवा मंदानोर किन वेने मदद ता जरूरत मंदिता अनि गलतिंग कित्तोर किन इत्तेके ओसो ज्यादा मदद ता जरूरत मंदिता। गलतिंग कियवा मंदाना मानेय बोरे हिल्लेर, सिर्फ गलतिंग कम-ज्यादा मंदितांग अनि गलती कित्ता पेरके सब्बे तोर किन मदद ता जरूरत मंदिता। सिर्फ पर्यवेक्षण कीसोर मत्तेके निष्क्रिय मंदाना आंता; गलतिंग कियानोरा काजे तम्मा गलतिंग सुधरे कियाला मदद आयना लेक्कटा परिस्थितिंग पुट्टी कीयाना। सही ओसो गलत नडमा स्पष्ट विभाजन-रेखा पिडंगना जरूरी मंता, बारांकु इत्तेके उसूल पोरो पार्टी लोप्पा ताकना वाद-विवाद असल ते समाज लोप्पा ताकना वर्ग-संघर्ष तुने तोहिंता। इदिना लोप्पा बदे वेने रकम ता डावुट मंदानायो। हर समस्या पोरो ध्यान हीसी गलतिंग कित्ता कामरेड्स ना आलोचना कीयाना अनि ओरा खिलाफ संघर्ष जरूर ताकी कीयाना; इद्रम गलतिंग सुधरे कियाला मदद कीयाना उद्देश्य ते कीयाना। ओरा मदद कीवेके ओरा गलतिंग पोरो पास्कना लेक्का आंता।

वेल्ले लोकरा पक्ष मंदाना क्रांति काजे हमेशा सही मंदिता। गलतिंग पोयसी तासना उचुन मुल किन विडचसी ओसो बार-बार गलतिंग तोहतेके

वेने गलतिंग सुधरे कियवा लेवा मंदिंतोर अनि गलतिंग कीयाना लोरा लोप्पा ज्यादातर लोकुर तम्मा गलतिंग सुधरे किया परितोर। मुन्ने बस्केने बोनकिने टाइफायड आसी मत्तेके ओरकिन पेरके अद बीमारी आयो आंता; अद्रमे गलतिंग कित्ता पेरके कम गलतिंग कियानोर, तम्मा गलतिंग नल सबक एतला निपुण आंतोर। दूसरा बगिल बस्केने गलतिंग कियवा लोकुरा विचार ते घमंड वेने हल्कोए पैदा आंता अदिन काजे ओरु गलतिंग कीयाना संभावना बेरसिंता। माटु सतर्क मंदाना बारांकु इत्तेके लोकुर हमेशा गलतिंग कियानोरा खिलाफ ज्यादा संघर्ष कींतोर अनि खुद संघर्ष ता निशाना ते वांतोर। काओ कांग उंदी गोटी पेहकसी दूसरोना पोरो एस्सला आल्सतोर मति पेरके अद बंडा ओनाए पोरो अरता। गलतिंग कीयाना लोकुरा संगे विनम्र व्यवहार कीतेके लोकुरा समर्थन दोरकियार अनि लोकुर लोप्पा एकता बेरसियार। गलतिंग कीयाना कामरेड्स ना पोरो सहायता ता रुझान लागू कीयाना लेवेके दुश्मनी ता रुझान लागू कीयाना इंदानदु मीवा व्यवहार बद्रम मंता इंजी तय कींता।

“पेरके आयना गलतिंग नल बचेमायला काजे मुन्नेटा गलतिंग नल सबक एतना अनि बीमार किन बचे कियाला काजे ओना बीमारी ता इलाज कीयाना” नीति पूरा पार्टी तुन एकताबद्ध कींता। इद नीति पोरो डटेमासी मंदाना जरूरी मंता।

10

चीन ओसो बाकी देश कुना नड़मा ता संबंध

माटु बाकी देश कुनल करियाना नारा वार्डितोम। नावा हिसाब ते माटु सही कीतोम। नेंडु उचुक देश कुना नेताल लोर इद नारा केयला पेरके-मुन्ने आंतोर, वेरियंतोर। इद नारा तुन पेश कियाला काजे उचुन साहस कीयाना जरूरत मंता; दूसरा माटा ने इद्रम कियाला काजे घमंड विडिला लागिंता।

हर राष्ट्र ता खुद ता क्षमता मंता इंजी स्वीकार कीयाना। इद्रम कियवेके मना अस्तित्व मंदा परवो? विकसित बद्रम आंतोम? दूसरा बगिल, हर राष्ट्र ता कमजोरिंग वेने मंदिंतांग। उचुन मुल समाजवाद उंदी

बेसता चीज आंदू, तीना लोप्पा बदे कमी हिल्ले इंजी विश्वास कींतोर। मति इद बद्रम सही मंता? हमेशा हर चीज ता रेंडु पहलू मंता इंजी मानेमायना जरूरी मंता। तोना लोप्पा सही ओसो गलत वेने मंता। मावा पार्टी-शाखा ता सचिव, मावा सेना ता कम्पनी कमांडर ओस प्लाटून लीडर, वीर सब्बे तोर काम ता अनुभव कुना निचोड तेंडनास्के रेंडासी पहलुंग किन इत्तेके सही ओसो गलत तुन नोटबुक ते रासना बारे ते वेल्ले करियताद मंता। ओरु सब्बे तोर हर वस्तु ता रेंडु पहलू मंता इंजी पुत्तोर। अस्के माटु सिर्फ बदे उंदी पहलु ता बारे ते बारांकु रासना? हमेशा रेंडु पहलुंग मंदितांग, अवु इंजेटल दस हजार साल पेरके वेने इद्रमे मंदिता। हर कालम इत्तेके अदु वायना कालम आई लेवेके वर्तमान अविना रेंडु पहलुंग मंदितांग, हर मानेय ना वेने रेंडु पहलु मंदितांग। सक्षिप्त ते हर वस्तु ता हमेशा रेंडु पहलुंगे मंदितांग, सिर्फ उंदी आयो। सिर्फ उंदी पहलु मंदिता अनि उंदे पहलु ता बारे ते पुंजी दूसरा पहलु ता बारे ते पुंदाना जरूरत हिल्ले इंदाना गलत आयारा।

मावा नीति सब्बे राष्ट्र ओसो सब्बे देश कुना सकारात्मक पोल्लोंग करियाना नीति आंदू। राजनीतिक, आर्थिक, वैज्ञानिक ओसो प्रौद्योगिक रूप ते कला-साहित्य लोप्पा मत्ता बेसता पोल्लोंग सब्बे तोर करियाना नीति आंदू। मति करियानास्के उंदी विश्लेषणात्मक, आलोचनात्मक दृष्टिकोण लागू कीयाना अनि अन्धाधुंध करियानायो, जांच-पड़ताल कियवा लेवा बदिनाए नकल कीयानायो अनि यांत्रिक तरीका ते बदे वेने चीज तुन लागू कीयानायो। माटु ओरा कमजोरिंग ओसो सकारात्मक पोल्लोंग लागू कीयानायो।

माटु सोवियत संघ, बाकी समाजवादी देश कुना अनुभव कुनल करियानास्के वेने इद्रमे कीयाना। मुन्ने इदिना बारे ते मना उचुन लोकुरा दिमाग ते स्पष्ट हिल्ला मत्ता अद्रमासी ओरु इव देशकुना कमजोरिंग कुन वेने लागू कित्तोर। मति ओरु इव देशकुनल पोल्लोंग पोयसी वेल्ले खुश मत्तोर अस्केने अव देश कुना लोप्पा अव सब्बे पोल्लो विरोध आयना शुरू आता; अदिना कारण ते वीर सब्बे तोर किन सुन ऊ-खुंग ना लेक्का धोखा तिंदा लागता। उदाहरण तुकू माटु टेलीविजन मंत्रालय ओसो

संस्कृति ब्यूरो ता स्थापना कियवा लेवा (सोवियत संघ ते कित्ता लेक्का) संस्कृति मंत्रालय ओसो चलचित्र ब्यूरो ता स्थापना कीतेके उचुन मुल माकिन नियम उल्लंघन कीयाना आरोप वाटतोर। अस्के ओरकिन उचुन जोम पेरकेने सोवियत संघ लोप्पा परिस्थिति बदलेमायार अनि अगा वेने मावा लेक्काने संस्कृति मंत्रालय ता स्थापना आयार इंजी उचुन वेने पुनवा मत्तोर। उचुन लोकर विश्लेषण कीयाना हिम्मत कीवोर आंतोर सिर्फ “वडिय” वात्ता लेक्का काम कींतोर। नेंडु उत्तरी वडिय ताका मंता इत्तेके ओरु “उत्तरी वडिय” बगिले दायनूर, नाड़ी पश्चिमी वडिय ताकते ओरु “पश्चिमी वडिय” बगिले दायनूर; ताना पेरके उत्तरी वडिय बेगाने ताकतेके ओरु ओसो उंदी बेरा “उत्तरी वडिय” बगिले मलसी दायनूर। वीरा बदे स्वतंत्र राय बस्केने मन्नो, ओरु हमेशा उंदी कोंटा तल दूसरा कोंटा ते एविंतोर।

सोवियत संघ लोप्पा स्टालिन किन तारीफ कियानोरे नेंडु ओनकिन नरक ते वाटतोर। मावगा चीन लोप्पा वेने उचुन मुल ओराए हर्नी पोयसी ताकिंतोर। केंद्रीय कमेटी स्टालिन ना गलतिंग सिर्फ 30 प्रतिशत मंतांग अनि सकारात्मक पहलू 70 प्रतिशत मंतांग, इव सब्बे पोल्लोंग कुन हूडता पेरके स्टालिन किन वरोर महान मार्क्सवादीए इनमूडायर इंता। इदे मूल्यांकन पोरो आधार आसी माटु मना लेख “सर्वहारा तानाशाही ता ऐतिहासिक अनुभव कुना बारे ते” रास्तोमा। 30 प्रतिशत गलतिंग ओसो 70 प्रतिशत सफलतांग मानमायनोरा इद मूल्यांक सही मंता। चीन ता बारे ते स्टालिन बचोनो गलतिंग कित्तोर। दूसरा क्रांतिकारी गृहयुद्ध कालम तुकू मुन्ने वांग मिंग ना “वामपंथी”दुस्साहसवाद ओसो जापानी आक्रमण विरोधी युद्ध ता शुरूआत ते ओना दक्षिणपंथी अवसरवाद लेक्काटवु स्टालिन ना गलतिंग लोप्पा दिसिंतांग। मुक्ति-युद्ध कालमे ते स्टालिन गृहयुद्ध आतेके चीनी राष्ट्र मुन्ने खुद विनाश आयना लेक्का खतरा वायर इंतोर। मुन्ने माटु क्रांति तुन मुन्ने ओयला इनकार कीतोम अनि पेरके लड़ाई निज्जमे शुरू आतास्के ओरु मावा पोरो उंदी ठोस रुझान लागू कित्तोर ताना लोप्पा उचुन विश्वास ओसो उचुन डावुट मत्ता। माटु युद्ध लोप्पा जीत

दोरकी कित्ता पेरके स्टालिन किन मना जीत लोप्पा वेने टीटो ना लेक्काने जीत आता इंजी डावटु आता। 1949 ओसो 1950 ता ओ दबाव निज्जमे वेल्ले बेहरा मत्ता। इव सब्बे पोल्लोंग मत्तेकाई माटु ओना 30 प्रतिशत गलतिंग ओसो 70 प्रतिशत सकारात्मक पोल्लो ना मूल्यांकन कुने सही मानेमांतोमा। इद्रम कीयानाए ओना पोरो न्याय कीयाना आंता।

स्टालिन सामाजिक-विज्ञान ओसो मार्क्सवाद-लेनिनवाद लोप्पा बेगाने सही पोल्लो वेहतोर अदिन माटु वेल्ले ध्यान हीसी अध्ययन कीतोमा। सार्वभौमिक निज्जम मत्ता सब्बे पोल्लोंग ना अध्ययन कीयाना अनि इदिना चीन ता असल परिस्थिति संगे जुड़ेमासी मंता या हिल्ले इंदाना वेने सुरता तासना। माटु हर वाक्य बद्रम मत्ता अद्रमे लागू कीतेके (अद वाक्य मार्क्स ना मत्तेकाई) हर चीज गड़बड़-घोटाला आंता। मना सिद्धांत मार्क्सवाद-लेनिनवाद ता सार्वभौमिक सच्चाई तुन चीनी क्रांति ता ठोस व्यवहार संगे काल्पनदू मंता। उंदी बेरा मना पार्टी ता उचुन मुल कठमुल्लावाद ता पक्ष एतानोर मति माटु इदिना विरोध कीतोमा। मति कठमुल्लावाद नेंडु वेने मावा नड़मा मंता। विद्या अध्ययन लोप्पा ओसो आर्थिक व्यवस्था लोप्पा वेने मंता।

प्राकृतिक विज्ञान लोप्पा माटु तूलनात्मक रूप ते पेरके अरसी मंतोम अनि इदिना लोप्पा विदेश तल करियालाकाजे माटु विशेष कोशिश कीयाना। मति माटु आलोचनात्मक दृष्टिकोण पोयसोरे करियाना, अविना पोरो कोंडा पिहची ताकनायो। प्रौद्योगिक रूप ते माटु शुरू-शुरू ते ओरा ज्यादातर पोल्लोंग पोयसी ताका लागियर, बारांकु इत्तेके मावगा प्रौद्योगिकी कमी मंता अनि अदिना बारे ते मना जानकारी वेल्ले कम मंता। पूरा जानकारी हिल्ला विदेशी पोल्लोंग कुन लागू कीयाना जरूरी हिल्ले।

माटु विदेश ता सब्बे कड़ियता-पुड़ियता पूंजीवादी व्यवस्थांग, विचारधारांग ओसो पिस्वल-पिस्सना तरिका तुन दृढ़ता ते ठुकरे कीयाना ओसो अविना आलोचना कीयाना जरूरी मंता। मति पूंजीवादी देश कुना उन्नत विज्ञान, अविना उन्नत प्रौद्योगिकी तुन करियाना लोप्पा, अविना कारोबार ता मैनेजमेंट लोप्पा मत्ता सब्बे वैज्ञानिक पोल्लोंग करियाना

लोप्पा पेरके-मुन्ने आयनायो। उद्योग कुना दृष्टि ते विकसित देश कुना कारोबार लोप्पा लोकर कम मंतोर, उत्पादकता वेल्ले मंता, ओरु व्यपार बद्रम कीयाना इंजी बेसे पुत्तोर। माटु इव सब्बे पोल्लोंग कुन नियमानुसार करियाना अनि मना काम सुधरे कीयाना। इस्सल अध्ययन कीयाना लोकर अंग्रेजी विषय चुने कींतोर, ओरु इदिना अध्ययन लोप्पा मेहनत कीवोर अद्रमासी विदेशीरा संगे आदान-प्रदान कियाला काजे मना अनुसंधान-निबंध कुना इंजे अंग्रेजी, फ्रांसीसी, जर्मन लेवेके जापानी भाषा ते अनुवाद वेने आयो। इद वेने उंदी रकम ता विवेकशून्य पूर्वाग्रह आंदु। हर विदेशी चीज तुन (अदु विज्ञान, प्रौद्योगिकी संबंधित आई लेवेके संस्कृति) अंधाधुंध तरीका ते ठुकरे कीयाना लेवेके हर विदेशी चीज तुन कोंडा विहची लागू कीयाना लेक्कटा रुझान कु मार्क्सवादी दृष्टिकोण संगे उचुन वेने मेल तिन्नोंग अनि मना काम तुकू वेने फायदा कीयाना लेक्का हिल्लेंग।

नावा हिसाब ते चीन लोप्पा रेंडु कमजोरिंग मंतांग अनि रेंडु सकारात्मक पोल्लोंग वेने मंतांग।

पहली, हत्ता कालम ते चीन उंदी औपनिवेशिक, अर्ध-औपनिवेशिक देशकु मत्ता, उंदी साम्राज्यवादी ताकत मत्ता अनि दूसरा देश कुना हमेशा दबाव सहेमासोरा मत्ता। अदिना उद्योग, कृषि विकसित आयो, अदिना विज्ञान, प्रौद्योगिकी स्तर दोड़ मंता; तन्ना बेहरा इलाका, साधन-स्रोत संगे सम्पन्न ओसो वेल्ले बेहरा जन संख्या, बेहरा इतिहास ओसो साहित्य लोप्पा “लाल भवन ता सपना” लेक्कटा लेख कुन विड़चसी चीन बचोनो रकम तुकू पेरके अरसी मंता, ताना लोप्पा घमंड कीयाना लेक्का बदे पोल्लो हिल्ले। मति उचुन मुल वेल्ले जोम एवनल गुलाम मत्तांकु हर पोल्लो ते खुद किन सुडला मत्ता लेक्का आल्संतोर अनि विदेशीरा मुन्ने हिम्मत ते नित्ता परवोर आंतोर। ओरु “फामन मंदिर” ऑपेरा ता के च्या क्वेइ³ पोरोल ता भूमिका लेक्का मंता, इदु उदला वेहतेके वेने इनकार कींता अनि अदिन सेवा काजे नितसी मंदाना आदत आता इंजी बाहाना कींता। इगा माटु मना राष्ट्रीय आत्मविश्वास तुन बेरसी कीयाना अनि “अमेरिका साम्राज्यवाद तुन कमजोर समझेमायना” विचार तुन प्रोत्साहित कीयाना

जरूरत मंता। इदिन अमेरिका आक्रमण ता प्रतिरोध कीयाना ओसो कोरिया ता सहायता कीयाना आंदोलन ताकनास्के जागृत किताद मंता।

दूसरा मनगा क्रांति लेट आता। 1911 ता क्रांति लोप्पा छिंग सम्राट ना तख्ता पलट किता, इदु रूसी क्रांति तुकू मुन्ने आता। मति अस्के कम्युनिस्ट पार्टी हिल्ला मत्ता अदिन काजे इद क्रांति असफल आता। जन क्रांति ता जीत अक्तूबर क्रांति लगभग 30 साल पेरके 1949 ते आता। अद्रमासी माटु मना बारे ते बदे रकम ता घमंड कीयाना लेक्का हिल्लेमा सोवियत संघ ता परिस्थिति मना देश ता परिस्थिति तुकू अलग मंता। पहली, जारशाही रूस उंदी साम्राज्यवादी ताकत मत्ता अनि दूसरा, अगा अक्तूबर क्रांति आता। अद्रमासी सोवियत संघ लोप्पा वेल्ले लोकुर घमंडी बनेमातोर अनि वेल्ले लोकुर पोंगडिंग किया मंतोर।

मावगा रेंडु कमजोरिंग अनि रेंडु सकारात्मक पोल्लोंग मंतांग। पहली पोल्लो माटु “गरीब” मंतोम अनि दूसरा माटु “कोरा” मंतोमा “गरीब” मंतोम इत्तेके मनगा उद्योग ज्यादा हिल्लेंग अनि मनगा कृषि वेने विकसित हिल्ले इंजी आयो। “कोरा” मंदाणा इत्तेके माटु कागज ता उंदी कोरा पन्ना लेक्का मंतोर मावा सांस्कृतिक, वैज्ञानिक स्तर बेहरा हिल्ले। विकास ता रूप ते इद्रम मंदाणा गलत हिल्ले। गरीब लोकुरे क्रांति कियाला आल्संतोर अनि अमीर लोरा लोप्पा क्रांति ता विचार वायना वेने मुशिकल मंता। विज्ञान, प्रौद्योगिकी स्तर बेरसिस मत्ता देश कुना लोप्पा वेल्ले घमंड मंता। माटु उंदी कोरा कागज लेक्का मंतोम अद्रमासी मावा पोरो वेल्ले सोबाता अक्षर कुने रासमूडांता।

अदिन काजे “गरीब” ओसो “कोरा” मंदाणा सबसे बेसता पोल्लो मंता। वायना कालम ते बस्केने मावा देश ताकतवर ओसो समृद्ध आतेके वने मना काजे माटु मना क्रांतिकारी रुझान पोरो नितसी मंदाणा जरूरी मंता। विनम्र ओसो विवेकशील मंदाणा, दूसरा देश कुनल करियाना ओसो घमंड कियवा मंता। माटु सिर्फ मना पहली पंचवर्षीय योजना ताकनास्के दूसरा देश कुनल करियानाए आयवा दसियों पंचवर्षीय योजनांग पूरा आतास्के

वेने करियसोर मंदाना। इंजेटल दस हजार साल पेरेके वेने माटु करियला काजे तैयार मंदाना। इद्रम कीयाना लोप्पा बदे गलत पोल्लो हिल्ले।

नन्न कुलमिले कीसी दस समस्यांग पोयिंताना। इव सब्बे दस संबंध दस अंतरविरोध कु आंदुंगा। दुनिया लोप्पा अन्तरविरोधे अंतरविरोध कुन मंतांग। अंतरविरोध कु हिल्लेके दुनिया ता अस्तित्वए मन्नो आंता। मावा काम इव अंतरविरोध कुन सही तरिका ते हल कीयाना मंता। व्यवहार ते इव अंतरविरोध कुन बेस हल कियमूडांता या आयो इंदाना बारे ते माटु परताचोन तैयार मंदाना; इदे आयवा इव अंतरविरोध कुन हल कीयानास्के मना मुन्ने पूना अंतरविरोध, पूना समस्यांग पुट्टना संभावना मंता। मति माटु हमेशा मन्ना हरीं विंको-वंको मंता मति मावा वायना कालम वेहच ते मंता इंतोमा। माटु पार्टी लोप्पा ओसो बाहर, देश लोप्पा ओसो विदेश ते, वेहच ते मत्ता ओसो मकसी मत्ता सब्बे रकम ता सकारात्मक तत्व कुन गोलबंद कीयाना पूरा कोशिश कीयाना अनि चीन तुन उंदी शक्तिशाली समाजवादी देश कीयाना जरूरी मंता।

नोट

- 1) अनाज उत्पादन ओसो अस्सना-वम्मना कोटा तय कीयाना व्यवस्था 1955 ता वसंत ते लागू कित्ताद मंता। अदे साल अनाज-उत्पादन काजे तय कित्ता कोटा सामान्य साल ता हर मू अनाज-उत्पादन पोरो आधार आसी मत्ता अनि उत्पादन बेरसतेके वेने 3 साल एवनल अतिरिक्त अनाज राज्य तुकु वम्मनायो इंजी व्यवस्था कित्ताद मत्ता। अस्सना कोट तय कीयाना इत्तेके राज्य अतिरिक्त अनाज वाले किसान परिवार तल ओरा अतिरिक्त अनाज लोप्पाटल तय कित्ताचोने अनाज अस्सा परिंता। वम्मना कोट तय कीयाना इत्तेके राज्य कमी अनाज वाले किसान परिवार काजे अनाज-सप्लाई ता कटा कीयाना लेक्का आंता। इद व्यवस्था उत्पादन-वृद्धि काजे किसान लोरा उत्साह बेरसी कियाला कित्ताद मंता।
- 2) अनिवार्य वम्मना व्यवस्था 1933 तल 1957 एवनल सोवियत संघ लोप्पा राज्य कृषि-उत्पादन अस्सला काजे लागू कित्ता मुख्य व्यवस्था मत्ता इदिना लोप्पा सामूहिक फार्म ओसो व्यक्तिगत किसान-परिवार तुन हर साल राज्य तय कित्ता मूल्य ओसो मात्र ते कृषि-उत्पादन राज्य तूक सप्लाई किया लागनदू।

- 3) “फामन मंदिर” पोरोल ता पेकिंग ऑपेरा ता उंदी भूमिका च्या क्वेइ (मिंग वंश ता खोजा ल्यू चिन ना वरोर विश्वासनीय दास मतोर)।

अमेरा साम्राज्यवाद कागज ता डुव्वल आंदू⁴⁶

14 जुलाई 1956

अमेरिका दूसरा देश कुना खिलाफ आक्रमणकारी कार्वाइंग कीयाना उद्देश्य ते हर जागा कम्युनिस्ट विरोधी झंडा तेहिंता।

अमेरिका तुन हर जागा कर्जा निहहा लागिंता। अदु सिर्फ लेटिन अमेरिका, एशिया ओसो अफ्रीका देश कुनाए आयवा योरोप ओसो ओशोनिया देश कुना कर्जा वेने निहहा लागिंता। ब्रिटेन तुन पोयसी पूरा दुनिया अमेरिका तुन विचार कीवो। व्यापक जनता अदिन विचार कीवो। जापान अमेरिका तुन बारांकु विचार कीवो, बारांकु इत्तेके अदु सब्बे ताविना उत्पीड़न कीयानादु। पूर्व ता बदे वेने देश अमेरिका आक्रमण तल मुक्त हिल्वा मत्ता। अमेरिका मना थाइवान प्रांत पोरो आक्रमण कित्ता। जापान, कोरिया, फिलिपीन, वियतनाम ओसो पाकिस्तान लेक्कटा सब्बे देश कु अमेरिका आक्रमण तल पीड़ित मंता मति अविना लोप्पा उचुक देशकु अमेरिका संगे एकता वेने किताद मंता। जनता ओसो उचुक देश कुना शासक लोर वेने ताना होंग कीतोमा सब्बे उत्पीड़ित राष्ट्र स्वाधीनता दोरकी कियाला आल्संतोर।

सब्बे वस्तुंग बदलेमासोर मंदितांग। मायसोर मत्ता ताकत कुना जागा ते सुडला पुना ताकतकु एतितांग। सुडला ताकत कु बेहरा ताकत कुना लेक्का बनेमायनुंग बारांकु इत्तेके बहुसंख्यक जनता इद बदलाव ता मांग

⁴⁶ लेटिन अमेरिका ता इरवुर गणमान्य लोकुरा संगे कित्ता वार्ता ता उंदी अंश।

कींता। अमेरिका साम्राज्यवादी ताकतकु बेहरा तल सुडला आसोर दांतांग, बारांकु इत्तेके अमेरिका जनता वेने तन्ना सरकार तुकू नारा आसी मंता।

नन्ना मना पिस्वल लोप्पा इद्रम ता बदलावकु हूडताना। इगा मत्ता मावा लोप्पटल उचुन मुल छिंग राजवंश ता कालम ते पुट्टोर मंतोर अनि उचुन बाकी लोकर 1911 ता क्रांति पेरके पुट्टोर।

छिंग राजवंश ता तख्ता वेल्ले मुन्ने पलटेमासी मत्ता। अदिन सुन यात-सेन ना नेतृत्व ते काम कीयाना पार्टी ओसो जनता कलियसी पलटे कित्ता। सुन यात-सेन ना ताकत वेल्ले सुडला मत्तांकु छिंग अफसर लोर अदिन कमजोर समझेमायनोर। ओरु वेल्ले विद्रोह ता नेतृत्व कित्तोर अनि हर बेरा असफल आता। मति आखरी ते सुन यात-सेन छिंग राजवंश ना तख्ता पलट कित्तोर। बेहरा ताकत वेरियाना लेक्कटा ताकत आयो। बेहरा ताकत ता तख्ता सुडला ताकतकु कींतांग। सुडला ताकतकु बेहरा ताकतकु बनेमायनुंग। छिंग राजवंश ता तख्ता पलट कित्ता पेरके सुन यात-सेन किन हारेमाया लागता। बारांकु इत्तेके ओरु जनता ना मांग तुन पूरा कियाला विफल आतोर (जमीन ता मांग ओसो साम्राज्यवाद ता विरोध कीयाना मांग लेक्कटवु)। अस्के ओरु आजादी तुकू हिके-हके वेलियसोर मत्तोर, प्रतिक्रांतिकारीरा दमन कीयाना जरूरत तुन समझेमायोर आतोर। पेरके ओरकिन उत्तरी युद्ध-सरदार ना नेतालल ख्वान श-खाए हारे कित्तोर। ख्वान श-खाए ना ताकत सुन यात-सेन ना ताकत तुकू बेहरा मत्ता। इगा वेने अदे नियम लागू आंता: जनता नासंगे संबंध जोड़े कीयाना सुडला ताकतकु मजबूत आंतांग अनि जनता ना विरोध कीयाना बेहरा ताकतकु कमजोर आसोर दांतांग। पेरके सुन यात-सेन ना पूंजीवादी-जनवादी क्रांतिकारिर माट कम्युनिस्ट लोरा संगे एकता कित्तोर अनि माटु कलियसी मंजी ख्वान श-खाए विडसता युद्ध-सरदार लोरा व्यवस्था तुन तहस-नहस कित्तोर।

चीन लोप्पा च्यांग काई-शेक ना शासन तुन सब्बे देश कुना सरकार तले समर्थन दोरकता अनि 22 साल एवनल ताकता, अदिना ताकत वेल्ले बेहरा मत्ता। मावा ताकत वेल्ले सुडला मत्ता (अस्के मनगा 50,000 पार्टी सदस्य लोर मत्तोर) मति प्रतिक्रांतिकारी दमन पेरके उचुने हजार पिस्तोर।

दुश्मन हर जागा गड़बड़ आता। इगा ओसो उंदी बेरा अदे नियम लागू आंता: बेहरा ओसो मजबूत ताकतकु पेरके जनता तल अलग-थलग आतांकु हारेमातांग अनि जनता ना संगे संबंध जोड़े कीसी अविना हित ते काम कीतांकु सुडला, कमजोर ताकतकु जीड़तांग।

जापानी आक्रमण विरोधी युद्ध ताकनास्के जापान वेल्ले शक्तिशाली मत्ता, क्वोमिंगतांग सेनांग किन जेक ता इलाकांग लोप्पा पूंडसिता अनि कम्युनिस्ट पार्टी ता नेतृत्व ते काम कीयाना सशस्त्र सेनांग वेने सिर्फ दुश्मन इलाका ते मत्ता नहाकुना इलाकांग लोप्पाने छापामार युद्ध ताकी किया परिता। जापान पेकिंग, थ्येनचिन, शांघाई, नानकिंग, ऊहान ओसो क्वांगचओ लेक्कटा बेहरा-बेहरा चीनी शहर कुना पोरो कब्जा कीसी मत्तांग। मति जापानी सेनांग ओसो हिटलर कुन वेने अदे नियम अनुसार उचुन साल लोप्पा खत्म आया लागता।

माटु गिनती हिल्वा मुशिकल कुना सामना किया लगता ओसो दक्षिण तल उत्तर बगिल पूंडमूडाता अनि मना सेनांग बचोनो लाख तल घटेमासी दसियों हजार पिस्ता। 25,000 ली लम्बा अभियान ता आखरी ते मावगा सिर्फ 25,000 मानेय पिस्तोर।

मावा पार्टी ता इतिहास लोप्पा बचोनो गलत “वामपंथी” ओसो दक्षिणपंथी कार्य-दिशांग लागू किताद मंता। इविना लोप्पा सबसे ज्यादा गंभीर छन तू-श्यू ना दक्षिणपंथी भटकाव वाले कार्यदिशा ओसो वांग मिंग ना “वामपंथी” भटकाव वाले कार्यदिशा मत्ता। इवे आयवा चांग क्वो-थाओ, काओ कांग ओसो बाकी लोकुर वेने दक्षिणपंथी भटकाव वाले गलतिंग कित्तोर।

गलतिंग ना उंदी बेसता पहलू लेक्का मंदितांग बारांकु इत्तेके अवु जनता ओसो पार्टी तुन करहिंतांग। मावगा नकारात्मक उदाहरण तल करहाना वेल्ले शिक्षक लोर मंतोर (जापान, अमेरिका, च्यांग काई-शेक, छन तू-श्यू ली ली-सान, वांग मिंग, चांग क्वो-थाओ ओसो काओ कांग ना लेक्का)। नकारात्मक उदाहरण तल शिक्षा हियाना इद्रम ता शिक्षक लोरगडल करियाला काजे वमाटु वेल्ले बेहरा कुरबानी हीतोम। हत्ता

कालम ते ब्रिटिश तो मावा खिलाफ बचोनो बेरा युद्ध कित्तोर। ब्रिटिश, अमेरिका, जापान, फ्रांस, जर्मनी, इटली, जारशाही रूप ओसो हालैंड, इव सब्बे मावा भूमि पोरो कोंडा तासिसी मंतोर। इव सब्बे नकारात्मक उदाहरण तले शिक्षा हियाना मना शिक्षक मत्तोर अनि माटु ओरा विद्यार्थिऱ।

प्रतिरोध युद्ध ताकनास्के जापान खिलाफ लडेमासोरे मना सैनिक लोरा संख्या बेरससोरे हत्ता अनि 9 लाख एवता। ताना पेरके मुक्ति-युद्ध शुरू आता। मना हथियार क्वोमिंगतांग ता हथियार लेक्का मजबूत आयवा वेल्ले कमजोर मत्तांग। अस्के क्वोमिंगतांग ता सेनांग 40 लाख मत्तांग अनि 3 साल लड़ईंग ताकनास्के माटु कुल मिलेकीसी अदिना 89 लाख सेना तुन खत्म कीतोम। अमेरिका साम्राज्यवाद ता सहायता मत्तेकाई क्वोमिंगतांग माकिन हारे किया परवो। बेहरा ओसो मजबूत ताकत जीड़ा परवोंग हमेशा सुडला ओसो कमजोर ताकतके जीड़ितांग।

इद्रम अमेरिका साम्राज्यवाद वेल्ले शक्तिशाली मंता मति असल ते अद वेल्ले कमजोर मंता। अदु राजनीतिक रूप ते वेल्ले कमजोर मंता बारांकु इत्तेके अदु व्यापक जनता तल अलग-थलग मंता, अदिन अमेरिका जनताए आयवा बोरे वेने विचार कीवोर। ओरु वेल्ले शक्तिशाली दिसतेकाई असल ते अदु उंदी कागजी डुव्वल आंदू बदे वेरीं वेस्सना लेक्कटा जानवर आयो। नन्ना अमेरिका सिर्फ उंदी कागजी डुव्वल आंदू इंजी आल्सिंतान।

पूरा इतिहास, वर्ग-समाज ता हजारों साल ता इतिहास तल साबित आता: मजबूत ताकत कुना जागा अनिवार्य रूप ते कमजोर ताकतु एतित्तांग। इद पोल्लो रेंडासी अमेरिका महाद्वीप कुना बारे ते वेने सही मंता।

साम्राज्यवाद तुन खत्म कित्तास्केने शांति स्थापना आया पारिंता। बस्केनाई एवनल कागजी डुव्वल जरूरी खत्म आयार। मति अवु तम्मा-तम्माए खत्म आया परवोंग, अविना पोरो उर्ता वडिय वात्ता लेक्का बेहरा-बेहरा आदुरक अरता लेक्का देब्बा वाटना जरूरी मंता।

माटु अमेरिका साम्राज्यवाद उंदी कागजी डुव्वल इंतोम इद्रम माटु रणनीतिक रूप ते इंतोम। सम्पूर्ण रूप ते माटु अदिन कमजोर

समझेमायनायो। मति अलग-अलग तरिका ते अदिना पोरो कोंडा तासना। अदिना पंजांग ओसो पलकू मंतांग। माटु अदिन टुकड़ा-टुकड़ा कीसी नष्ट कीयाना। उदाहारण तुकू अदिना दस पलकु मत्तेके अदिना उंदी पल उर्हाना; पेरके पिस्ता 9 पलकुनल उंदी पल उर्हाना इद्रम उंदी-उंदी कीसी सब्बे पलकु उर्हाना। ताना पेरके पंजांग पिसिंतांग पेरके माटु अविन वेने खत्म कियाला सफल आंतोम।

रणनीतिक रूप ते माटु अमेरिका साम्राज्यवाद तुन कमजोर समझेमायना अनि कार्यनीतिक रूप ते अदिना पोरो पूरा कोंडा तासना। अदिना खिलाफ संघर्ष कीयानास्के माटु हर लड़ाई, हर मुठभेड़ कुना पोरो कोंडा तासना। इंजे अमेरिका शक्तिशाली मंता मति अदु व्यापक रूप ते सम्पूर्ण रूप ते ओसो दीर्घकालीन रूप ते हूडतेके अदिन जनता ना समर्थन हिल्ले, अदिना नीतिंग कुन जनता विचार कीवो बारांकु इत्तेके जनता ना उत्पीड़न ओसो शोषण कींता। अद्रमासी इद कागज ता डुव्वल ता सर्वनाश आंता। मति अमेरिका नेंडु वेने शक्तिशाली मंता अदु हर साल 10 करोड़ टन तुकू ज्यादा इस्पात तैयार कींता अनि हर जागा हमला कीसोर दांता। अद्रमासी माटु अदिना खिलाफ मना संघर्ष जारी तासना अनि पूरा ताकत वाटसी लड़ेमायना उंदी पेरके उंदी मोर्चा तेहचोर दायना। इद्रम कियाला टाईम लागियर।

रेंडासी अमेरिका महाद्वीप ओसो एशिया अफ्रीका देश कु आखरी एवनल कागजी डुव्वल पोरो उर्रा वात्ता लेक्का आदुरक अरता लेक्का देब्बा वाटवेके अद नष्ट आयो आसी मनवड़ अनि संयुक्त राज्य अमेरिका खिलाफ लड़ाईंग जारी तासा लागियर।

अमेरिका साम्राज्यवाद ता विरोध कियाला काजे लेटिन अमेरिका देश कुना लोप्पा योरपीय लोकुर कुन देश ता रेड-इंडियन मूल निवासिरा संगे एकता कीयाना। योरोप तल वासी अगा डेरा वाटना श्वेत लोकुर किन रेंडु श्रेणी ने तूसमूडांता, पहली श्रेणी ते शासक ओसो दूसरा श्रेणी ते शासक लोर मंतोर। अद्रमासी उत्पीड़ित श्वेत जनता काजे स्थानीय जनता ना संगे

गटिंग संबंध स्थापित कीयाना हल्को आंता, बारांकु इत्तेके अविना परिस्थिति वेने स्थानीय जनता लेक्काने मंदिता।

लेटिन अमेरिका, एशिया ओसो अफ्रीका ता मना दोस्त वेने मना लेक्काने मंतोर अनि मना लेक्का ने काम कींतोर, साम्राज्यवादी उत्पीड़न कम कीयाना उद्देश्य ते जनता काजे उचुन काम किया मंतोर। मति माटु बेस काम कीतेके साम्राज्यवादी उत्पीड़न तुन मोदोल तिंचे खत्म कीयाना। इदिना बारे ते सब्बे वरोर-दूसरो ना मदद कीयाना।

साम्राज्यवादी उत्पीड़न ता विरोध कियाला मना स्वरूप वेने मीवा लेक्काने मंता, सिर्फ भौगोलिक परिस्थिति, राष्ट्रीयता ओसो भाषा अलग मंता। मति साम्राज्यवाद तल मावा स्वरूप इनपडे अलग मंता अदिन हूडसी माटु पेरके-मुन्ने आंतोम।

साम्राज्यवाद ता चीनी जनता ओसो दुनिया ता जनता तुकू बदे जरूरत हिल्ले। साम्राज्यवाद ता अस्तित्व ते मंदाना बदे कारण हिल्ले।

पार्टी एकता तुन बेरसी कीयाना अनि पार्टी परम्परांग कुन जारी तासना⁴⁷

30 अगस्त 1956

माटु नेंडु पार्टी ता 8वी राष्ट्रीय कांग्रेस काजे तैयारी मीटिंग शुरू किया मंतोमा। इद मीटिंग 10-15 दिव्यंग एवनल ताकियर ओसो इदिना मुख्य काम इद्रम मंतांगः 1) पार्टी कांग्रेस काजे दस्तावेज कुना ड्राफ्ट तैयार कियाना; 2) केंद्रीय कमेटी ता शुरुआती चुनाव सम्पन्न कीयाना; अनि 3) पार्टी कांग्रेस काजे भाषण तैयार कीयाना।।

इंजे नन्ना उचुक मुद्दांग पोरो नावा राय हियाला अनुमति हिमुटा।

पहली, पार्टी कांग्रेस ता उद्देश्य ओसो प्रयोजन ता बारे ते। इद कांग्रेस लोप्पा बद-बद सवाल तुन हल कीयाना ओसो इदिना उद्देश्य बाताल? संक्षिप्त ते इदिन पार्टी ता 7वी कांग्रेस पेरके दोरकता अनुभव कुना निचोड़ तेंडना, पूरा पार्टी तुन एकताबद्ध कीयाना अनि देश-विदेश ते एकता कीयाना लेक्कटा सब्बे ताकत कुना संगे एकता कीसी उंदी महान समाजवादी चीन ता निर्माण कियाला काडे संघर्ष कीयाना।

अनुभव कुना निचोड़ तेंडना बारे ते मनगा मत्ता अनुभव कु वेल्ले समृद्ध मंता, मति माटु तथ्य कुना डग्गी कियवा लेवा मुख्य विषय तुन पोयसी असल परिस्थिति संगे जोड़े कीसी मार्क्सवादी दृष्टिकोण ता अनुभव कुना निचोड़ तेंडना। इद्रम अनुभव कुना निचोड़ तेंडसी मावा पूरा पार्टी तुन प्रोत्साहन दोरकियर अनि माटु मना काम मुन्ने तुकू ज्यादा बेस किया परितोमा।

⁴⁷ सीपीसी ता 8वीं राष्ट्रीय कांग्रेस ता तैयारी मीटिंग तुकू मुन्ने अधिवेशन लोप्पा भाषण।

मना पार्टी उंदी महान, गौरवशाली ओसो सही पार्टी आंदू, इदु पूरा दुनिया मानेमायना लेक्कटा सच्चाई आंदू। मुन्ने उचुन विदेशी कामरेड्स किन माटु असल ते बाता किया मंतोमो इंजी डावुट वात्ता। वेल्ले लोकुर राष्ट्रीय पूंजीपति वर्ग पोरो मना नीति तुन ओसो मना शुद्धीकरण आंदोलन तुन स्पष्ट समझेमायोर आंतोरा। नेंडु नन्ना ओरकिन मुन्ने तुकू ज्यादा लोकुर समझेमाया मंतोर इंदा परिताना। बदे डावुट हिल्ला इंजे वेने उचुन मुल ओरकिन समझेमाया परवोरा। देश लोप्पा, पार्टी लोप्पा वेने उचुन मुल ओरकिन समझेमायवा लेवा पार्टी ता 7वी राष्ट्रीय कांग्रेस तल इंजे एवनल अमल कीसोर मत्ता कार्यदिशा अचोन बेस हिल्ला लेक्का मंता। मति सच्चाई मना सब्बे तोरा मुन्ने मंता; माटु रेंडु क्रांतिंग कीतोम- राजसत्ता तत्ताला काजे पूंजीवादी-जनवादी क्रांति ओसो समाजवादी बदलाव कियाला ओसो उंदी समाजवादी देश ता निर्माण काजे सर्वहारा समाजावदादी क्रांति। पार्टी ता 7वी कांग्रेस तल इंजे एवनल 11 साल कुना लोप्पा माटु महान सफलतांग दोरकी किताद मंता। इविन पूरा राष्ट्र, पूरा दुनिया संगे विदेशी पूंजीपति वर्ग तुन वेने मानेमाया लागता।

अक्तूबर क्रांति पूंजीपति वर्ग ता तख्ता पलट किता। इदु दुनिया ता इतिहास लोप्पा मुन्ने बस्केने आयवा घटना मत्ता। सब्बे देश कुना पूंजीपति वर्ग इदु क्रांति ता हमेशा निंदा किता। रूस लोप्पा पूंजीपति वर्ग उंदी प्रतिक्रांतिकारी वर्ग अस्के राष्ट्रीय पूंजीवाद तुन ठुकरे किता, काम लोप्पा ढील तोहला ओसो तोडफोड कीयाना कार्रवाईंग कुन संगठित किता अनि बंदूक ता सहारा वेने एतितता। रूसी सर्वहारा वर्ग काजे अदिन खत्म कीयाना विडचसी दूसरा बदे हरीं हिल्ला मत्ता। इद्रम कीतांकु बाकी देश कुना पूंजीपति वर्ग ता होंग बेरसा। इगा चीन लोप्पा माटु राष्ट्रीय पूंजीपति वर्ग संगे तूलनात्मक नरम व्यवहार कीतांकु उचुन शांत आता। मना नीति लोप्पा उचुन बेसता पोल्लोंग वेने मंतांग। अमेरिका संवाददाता लोरकिन चीन लोप्पा वायला रोमी कीतांकु आइजनहावर ओसो डलेस किन इंजे मावा नीति लोप्पा उचुन बेसा पोल्लोंग मंतांग इंजी स्वीकार किया लागता। माटु इगाटा परिस्थिति पूर्ण रूप ते सही मत्तेके संवाददाता लोर किन जरूर

वायला हीसी मन्नेरोम, बारांकु इत्तेके ओरु संवाददाता लोर मनगा वासी मना बारे ते गलत प्रचारे कियानूर। ओरु तम्मा लेख कुना लोप्पा सिर्फ गलत प्रचार कीयाना जागा ते बेगाने सही रासना गलती कीयाना तुकू वेरियंतोर।

चीन तुन मुन्ने हमेशा “कड़ियता पुड़ियता साम्राज्य” ओसो “पूर्वी एशिया ता बीमार मानेय” इंजी केयानोर। चीन लोप्पा वेने पेरके अरता आर्थिक, सांस्कृतिक व्यवस्था मंता, लोकुर किन सफाई, स्वास्थ्य-रक्षा ता ज्ञान हिल्ले, गेंद खेल ओसो नाड़ियाना स्तर दोड़ मंता, महिलांग ना कालकु दोहची सुडला बने कींतोर, मानेय ना तल्ला पोरो चुट्टी मंदिता, घूमंतु लोकुर वेने मंतोर अनि चीन उंदी वेहच हिल्ला लेंज मत्ता देश बनेमायार। ताना लोप्पा विदेश ते माँजना लेंज लेक्का लेंज हिल्ले। संक्षिप्त ते वेहाना इत्तेके चीन लोप्पा वेल्ले गलत पोल्लोंग मंतांग। मति 6 साल ता बदलाव पेरके माटु चीन ता परिस्थिति बदले कीतोमा मना सफलतांग नल बोरे इनकार किया परवोर।

मना पार्टी मना क्रांतिकारी काम ता नेतृत्व केंद्र मत्ता। अनुभव कुना निचोड़ तेंडनास्के इद पार्टी कांग्रेस ता सबसे पहली ओसो सबसे महत्वपूर्ण उद्देश्य पूरा पार्टी तुन ओसो मजबूत डोरी ते दोहतनादु मत्ता। इयेंड जून एवनल मना पार्टी-सदस्य लोरा संख्या 1,07,30,000 आता। 1 करोड़ तुकू ज्यादा वीर पार्टी सदस्य लोर किन शिक्षित कीयाना, जादरूक ओसो एकता कियाला काजे वेल्ले काम किया लागियर। इद्रम कीसी ओरकिन जनता लोप्पा केंद्र ता भूमिका सही तरिका ते निभे किया परंतोर। सिर्फ पार्टी मंदानाए हालो आंता; पार्टी सिर्फ उंदी केंद्र आंदू, अदिना नालुंग बगिल जनता मंदाना जरूरी मंता। उद्योग, कृषि, वाणिज्य, संस्कृति ओसो शिक्षा लोप्पा 90 प्रतिशत काम पार्टी-सदस्य लोरए आयवा गैर-पार्टी लोकुर वेने किया परंतोर। अद्रमासी माटु जनता ना संगे एकता कीयाना अनि सब्बे लोकुरा संगे एकता कीयाना, कलियसी काम कीयाना पूरा कोशिश कीयाना कींता। पूरा पार्टी तुन एकताबद्ध कीयाना ओसो पार्टी तुकू बाहर ता लोकुरा संगे एकता कीयाना मना कोशिश कुना लोप्पा हत्ता

कालम ते वेल्ले कमजोरिंग मत्तांगा। इद कांग्रेस लोप्पा ओसो ताना पेरके माटु प्रचार, शिक्षा ता काम कीयाना अनि तीना लोप्पा मना काम वेल्ले विकसित कीयाना।

अंतरराष्ट्रीय रूप ते माटु दुनिया लोप्पा एकता किया परना लेक्कटा सब्बे ताकत कुना संगे एकता कीयाना। सबसे मुन्ने सोवियत संघ, भाईचारा पार्टींग, भाईचारा देशकु, अगाटा जनता ओसो सब्बे शांतिप्रय देशकु अगाटाना जनता ना संगे एकता कीयाना अनि सब्बे बेसता ताकत कुना समर्थन दोरकी कीयाना। इंजे 50 हजार तुकू ज्यादा देश कुना कम्युनिस्ट पार्टींग ना प्रतिनिधिर मना कांग्रेस ते मंदितोर, इदु बेसताए पोल्लो मंता। मुन्ने माटु राजसत्ता दोरकताद हिल्ले, रेंडु क्रांतिंग सफल आताद हिल्ला मत्ता अनि निर्माण-कार्य वेने सफल आताद हिल्ला मत्ता; इंजेटा परिस्थिति इनपडे अलग मंता। मना विदेशी कामरेड्स मना वेल्ले सम्मान कींतोर।

पार्टी लोप्पा ओसो बाहर, देश-विदेश ता एकता किया परना लेक्कटा सब्बे ताकत कुना संगे एकता कीयाना उद्देश्य बारांकु मंता? अदु उंदी महान समाजवादी देश ता निर्माण कीयाना, मना लेक्कटा देश तुन “महान” इंदा परमूडांता ओसो इंदाना वेने। मना पार्टी उंदी महान पार्टी आंदू, मना जनता उंदी महान जनता आंदू मना क्रांति उंदी महान क्रांति आंदू, मना निर्माण-कार्य वेने उंदी महान निर्माण-कार्य आंदू। 60 करोड़ आबादी वाले देश भूमि पोरो सिर्फ उंदे मंता अदु चीन आंदू उचुन माकिन माकिन वेल्ले कमजोर समझेमायनोर। बारांकु इत्तेके मावा योगदान वेल्ले मत्ता, मना इस्पाद-उत्पादन हर साल सिर्फ उचुने लाख टन मत्ता अनि अद वेने जापानी लोरा कैदे मत्ता। च्यांग काई-शेक ना क्वोमिंगतांग तानाशाही शासन लोप्पा (22 साल ताकता) इस्पात ता वार्षिक उत्पादन सिर्फ दसियों हजार टन मत्ता। मनगा इंजे वेने ज्यादा इस्पाद हिल्ले, मति उंदी आशाजनक शुरुआत आता। इयेंड 40 लाख टन तुकू ज्यादा इस्पाद तैयार आयार, वायना साल 50 साल टन ता लक्ष्य पार कियमूडायर अनि दूसरा पंचवर्षीय योजना पेरके 1 करोड़ टन तुकू ज्यादा ओसो तीसरी पंचवर्षीय योजना पेरके 2 करोड़ टन तुकू ज्यादा इस्पात बनेमायना शुरू आयार। इद लक्ष्य

तुन पूरा कियाला माटु पूरा कोशिश कीयाना। इद दुनिया लोप्पा कुल सौ तुकू ज्यादा देश कुना लोप्पाने 2 करोड़ तुकू ज्यादा वार्षिक इस्पात-उत्पादन आंता। अदिन काजे चीन तुन उंदी समाजवादी देश लेक्का निर्माण कियमूड़ायार अनि उंदी शताब्दी तल ताकसोर मत्ता व्यवस्था बदलेमायार। इदे आयवा दुनिया ता सबसे शक्तिशाली पूंजीवादी देश अमेरिका ता बराबर वेने एवियर। अमेरिका ता आबादी सिर्फ 17 करोड़ मंता। मना आबादी अदिनकु बचोनो गुना ज्यादा मंता मना संसाधन वेने अदिना लेक्का समृद्ध मंता अनि मना जलवायु वेने अदिना संगे कलियंता। अदिन काजे अमेरिका ता बराबर एव्वा परितोम। माटु अदिना बराबर एव्वनायो या? जरूर एव्वना। मीवा 60 करोड़ जनता बाता किया मंता? अदु हुस्कड ते मंता या? हुंजना सही मंता या काम कीयाना? काम कीयाना सही मत्तेके मीवा 60 करोड़ जनता 20-30 करोड़ टन इस्पात बारांकु तैयार किया परवो या? अमेरिका ता 17 करोड़ आबादी इत्तेके दस करोड़ टन इस्पात तैयार किया परिता। अदिना बराबर एवतेके माटु इचोन गौरवशाली ओसो महान मन्नोम आयकोम। अमेरिका ता इतिहास सिर्फ उंदी सौ अस्सी साल पाड़ना मंता अनि साठ साल मुन्ने अदिना इस्पात-उत्पादन वेने सिर्फ 40 लाख टन मत्ता। अदिन काजे अदिनकु साठ साल पेरके मंता। 50-60 साल ता टाईम दोरकतेके माटु जरूर अमेरिका तुन पेरके अरहितोम। इद मना अनिवार्य कर्तव्य आंदू। मीवा बादी वेल्ले मंता, बेहरा भूमि, वेल्ले समृद्ध संसाधन ओसो मीटु समाजवाद निर्माण वने किया मंतिर इदिन उंदी महान व्यवस्था समझेमायमूड़ांता; 50-60 साल कोशिश कित्ता पेरके वेने मीटु अमेरिका तुन पेरके अरहतेके मीवा परिस्थिति बचोन बेस आयार! इद्रम ता परिस्थिति मीवा अस्तित्वए खत्म आयार! अदिन काजे अमेरिका तुन पेरके अरहना संभावनाए आयवा वेल्ले जरूरी ओसो मना अनिवार्य कर्तव्य वेने मंता। माटु अदिन पेरके अरिहतिके मना चीनी राष्ट्र मनाकिन दुनिया ता बाकी राष्ट्र आल्सना लेक्का किया परवो आयार अनि मानव जाति काजे बदे बेहरा योगदान किया परवो आयार।

दूसरा, पार्टी ता परम्पर तुन जारी तासना बारे ते मंता। इद कांग्रेस तुन विचारधारा ओसो कार्यशैली ता बारे ते पार्टी ता महान परम्परांग कुन लगातार मुन्ने ओयना अनि मनोगतवाद, संकीर्णतावाद ता कारगर रूप ते विरोध कीयाना, संगे ने नौकरशाही ता वेने विरोध कीयाना। नेंडु नन्ना नौकरशाही ता चर्चा कीवोन, सिर्फ मनोगतवाद, संकीर्णतावाद ता बारे तेने वड़ककाना मनोगतवाद, संकीर्णतावाद काबू कित्ता पेरके वेने तल्ला तेहिंता अनि इविना पोरो हर बेरा काबू कीयाना जरूरत मंता।

गलतिंग कीयाना इत्तेके मनोगतवादी गलतिंग कीयाना, गलत तरीका ते आलसना। स्टालिन ना गलतिंग ना आलोचना कीयाना वेल्ले लेख माटु पढ़ेमातोम अविना लोप्पा इदिना बारे ते वेल्ले कम रास्ताद मंता लेवेके इनपड़े वेहताद हिल्ले। स्टालिन इद्रम ता गलतिंग बारांकु कित्तोर? बारांकु इत्तेके बचोनो समस्यांग पोरो ओना मनोगत विचारकु असल परिस्थितिंग संगे कलियोंग। मावा काम लोप्पा नेंडु वेने हमेशा इद्रमताए पोल्लोंग आंतांग। मनोगतवाद इत्तेके असल परिस्थिति संगे काल्पसोरे ताकवा लेवा विचार वात्ता लेक्का ताकना। मना इद कांग्रेस ता दस्तावेज कुना लोप्पा हल कीयाना समस्यांग ओसो रासना पोल्लोंग चीन ता असल परिस्थिति अनुकूल मंदाना लेवेके कम से कम अविना गरे एव्वना। संगेने मना अनुभव कुना वेहच ते माटु असल परिस्थिति ना विपरित दृष्टिकोण ता वेने आलोचना कीयाना। मनोगतवाद ता आलोचना कीयाना अदिना खिलाफ संघर्ष कीयाना। मना काजे इद काम वेल्ले साल मुन्ने तय कीतोम। इंजे माटु समाजावादी क्रांति ओसो समाजवादी निर्माण लोप्पा दिस्सना मनोगतवाद ता विरोध किया मंतोम। जनवादी क्रांति ताकनास्के वेल्ले जोम मना किन मनोगतवाद ता कारण ते वेल्ले मुश्किल कुना सामना कीतोम अनि वेल्ले कुर्बानिंग हिया लागता। माटु लगभग सब्बे आधार-इलाकांग लोप्पा 90 प्रतिशत तुकू ज्यादा क्रांतिकारी ताकत कुन पोहिंतोम अस्केने माकिन सबक वांता। इद समस्या तुन माटु बेस समझेमाताद हिल्ले अस्के एवनल येनान लोप्पा शुद्धीकरण आंदोलन (तीना लोप्पा जांच पड़ताल, अध्ययन पोरो जोर हीताद मत्ता अनि असल परिस्थिति संगे

ताकना रुझान पोयताद मत्ता) ताकी किताद हिल्ले। मार्क्सवाद ता सार्वभौमिक सत्य तुन चीनी क्रांति ता ठोस परिस्थिति संगे काल्पना जरूरी मंता। लेवेके माटु बाताए किया परवोम आंतोमा। दूसरा माटा ने सिद्धांत तुन व्यवहार ते काल्पना इंतोमा। सिद्धांत तुन व्यवहार संगे काल्पना मार्क्सवाद ता उंदी बुनियादी उसूल आंदू। द्वन्द्वात्मक भौतिकवाद अनुसार, विचार तुन असल परिस्थिति तुन तोहना अनि अदिन असल व्यवहार संगे जांच कीयाना ओसो सही साबित आता। पेरके मानेमायमूड्जांता लेवेके मानेमायमूड्जायो। हत्ता उचुन साल कुना लोप्पा माटु मना काम लोप्पा सफलतांग दोरकी कीतोम मति मनोगतवाद हर जागा दिसिंता। मनोगतवाद सिर्फ नेंडे आयवा वायना कालम ते वेने दिसियर अनि हमेशा दिससोर मंदिता अनि दस हजार साल पेरके लेवेके दस करोड़ साल पेरके वेने दिसियर इदे आयवा मानव जाति मंदाणा जोम समाप्त आयो। बेगा मनोगतवाद मंदिता अगा गलतिंग वेने जरूर मंदितांग।

दूसरा संकीर्णतावाद, हर जागा ता तन्ना सब्बे रकम ता हित मंता, हर राष्ट्र ता ओसो पूरा भूमि ता वेने तम्मा-तम्मा हित मंता। इंजे नन्ना भूमि तुकू बाहर ता पोल्लोंग कियाकान, बारांकु इत्तेके भूमि तल बाकी ग्रह कुना लोप्पा दायना हरीं इंजे खुलेमाताद हिल्ले। बस्केने मंगल लेवेके शुक्र ग्रह पोरो मानव जाति मंदाणा जानकारी दोरकियर अस्के माटु ओरा संगे एकता ओसो संयुक्त मोर्चा कीयाना बारे ते आल्सा लागियर। इंजे तुकू माटु मना चर्चा ता विषय सिर्फ पार्टी, देश ओसो इद दुनिया लोप्पटा एकता ता सवाल एवनले सीमित तासकाल। मावा उसूल विश्वशांति ओसो मानव-प्रगति काम काजे उचुन वेने जरूरी मत्तोर संगे (ओरु विदेशी कम्युनिस्ट आई लेवेके विदेशी गैर-पार्टी लोकुर) एकता कीयाना मंता। सबसे मुन्ने माटु बीसियों कम्युनिस्ट पार्टींग ओसो सोवियत संघ संगे एकता कीयाना। सोवियत संघ लोप्पा उचुन गलतिंग आतांग, अवु वेल्ले गंभीर मत्ता लेक्का अविना वेल्ले चर्चा आया मंता। इद दृष्टिकोण पोयना गलत मंता। बदे वेने राष्ट्र गलतिंग कियवा मन्नो आंता। सोवियत संघ दुनिया ता पहली समाजवादी देश आंदू वेल्लो जोम तल ताका मंता अदिन काजे गलतिंग

कियवा मंदाना संभव हिल्ले। अस्के माटु सोवियत संघ ता गलतिंग कुन स्टालिन ना गलतिंग संगे बद्रम तूलना कीयाना? अविना स्वरूप आंशिक ओसो अस्थाई मंता। बीस साल तल उचुक पोल्लोंग ताकसोर मंतांग मति आंशिक ओसो अस्थाई मंतांग अनि अविन सुधरे कियमूडांता। सोवियत संघ लोप्पा मुख्य धारा, मुख्य पहलू, मुख्य अंश सही मंता। रूस लोप्पा लेनिनवाद ता जन्म आता अनि अक्तुबर क्रांति संगे पहली समाजवादी देश बनेमाता। अदु समाजवाद निर्माण कित्ता फासीवाद तुन हारे कित्ता अनि उंदी शक्तिशाली औद्योगिक देश लेक्का बने माता। सोवियत संघ लोप्पा वेल्ले पोल्लो माटु करियाना लेक्का मंतांग। माटु लगातार पेश कीसोर मत्ता नारा सोवियत संघ तले उन्नत अनुभव कुन करियाना नारा आंदू उचुन मुल वेल्ले विवेकहीन मंतोर ओरकिन रूस तल दोयंगता वेडिय वांता। इद वेने मनोगतवाद आंदू रूसी लोकर किन वेने इद्रमे कींतोर। अदिन काजे माटु विश्लेषणात्मक रुझान पोय्यना। माटु स्टालिन ता मूल्यांकन कीयानास्के ओरा सफलतांग कुन 70 प्रतिशत ओसो गलतिंग 30 प्रतिशत मानेमायना इंजी मुन्ने वेहतोम। सोवियत संघ लोप्पा मुख्य रूप ते ज्यादातर सही ओसो गलत वेल्ले कम आतांग। मना वेने उचुन पोल्लोंग गलत मंतांग; खुद माटु वेने अविन विडसियाना, दूसरा देश कुन लागू कियाला हियानायो। गलत पोल्लोंग वेने उंदी रकम ता अनुभवके आंदुंग अविन वेने इस्तेमाल आया पर्रिता। मनगा छन तू-श्यू, ली ली-सान, वांग मिंग, चांग क्वो-थाओ, काओ कांग ओसो राओ शू-श लेक्काटोर लोर किन मना शिक्षक लोरा लेक्का इस्तेमाल कित्ता लेक्का। इदे आयवा मना उचुन दूसरा शिक्षक लोर वेने मंतोर। देश लोप्पा सबसे बेसता शिक्षक च्यांग काई-शेक मंतोर। माटु प्रभावित किया परवोम ओरकिन च्यांग काई-शेक शिक्षित कीसी तुरंत प्रभावित कित्तोर। च्यांग काई-शेक ओरकिन बद्रम शिक्षित कित्तोर? ओरु मशीनगन, तोप ओसो विमान संगे शिक्षित कित्तोर। साम्राज्यवाद उंदी दूसरा शिक्षक आंदू, इदु मना 60 करोड़ जनता तुन शिक्षित कित्ता। हत्ता सौ साल तुकू ज्यादा टाईम ते उचुन साम्राज्यवादी

ताकतकु मना उत्पीड़न कीसी माकिन शिक्षित कित्ता। इद्रम गलत पोल्लोंग वेने शिक्षा हिया पर्रिंतांग अनि मना कोंडा तेरिया पर्रिंतांग।

संकीर्णतावाद ता विरोध कीयाना बारे ते मीवा खिलाफ संघर्ष शुरू कित्ता लोकरा संगे एकता कीयाना जरूरी मंता इंजी वेहचियाना जरूरी मंता। ओरु मीवा संगे लड़ेमातोर, मीकिन खत्म कित्तोर, मीकिन तिप्पल कित्तोर, मीवा सम्मान तुन नोमुर् कित्ता, अनि वेल्ले गलत मत्तेकाई मीकिन अवसरवादी “पदवी” संगे सम्मानित कित्तोर। ओरा हमला सही मत्तेके जरूर कीयाना। मीटु अवसरवादी मत्तेके मीकिन हमला ता निशाना बारांकु बने कीयानायो? नन्ना इगा गलत तरिका ते हमलांग ओसो गलत तरिका ता संघर्ष कुना बारे ते चर्चा कियाकाना। लोकर मीवा पोरो हमला कीतेके, ओरु तम्मा रुझान बदले कीतेके ओसो ओरु मीवा विरोध कीसी गलती कित्तोर इंजी मानेमातेके, मीकिन अवसरवाद राज्य ता “राजा” घोषित कीयाना सही हिल्ले इत्तेके इद समस्या तुन अगाने मारी कीयाना। उचुन मुल तम्मा गलती मानेमायवेके मीटु हरीं हूड़सोर मंदानायो या? नावा हिसाब ते मीटु इद्रम किया पर्रितिर। एकता कीयाना इत्तेके मीवा संगे मतभेद मत्तोर, मीकिन कमजोर समझेमायनोर लेवेके मीवा अपमान कियानोर, मीवा खिलाफ संघर्ष कियानोर, मीकिन तिप्पल कित्ता लोकरा संगे एकता कीयाना। मीवा विचार कलियानोरा संगे मीटु मुन्नेने एकताबद्ध मंतिर अदिन काजे ओरा संगे एकता कीयाना सवाले वायो आंता। इगा इंजे एवनल एकता कियाला पिस्ता लोकरा बारे ते मंता। इत्तेके मीवा संगे मतभेद कियानोर, वेल्ले गंभीर कमजोरिंग मत्तोर संगे। उदाहरण तुकू मना पार्टी लोप्पा इंजे वेल्ले लोकर विचारधारात्मक रूप ते आयवा सिर्फ संगठनात्मक रूप ते शामिल आता लोकर मंतोर। ओरु मीवा संगे टक्कर एतवेकाई ओरु विचाराधारात्मक रूप ते पार्टी लोप्पा शामिल आयवांकु ओरु कीयाना काम लोप्पा कमजोरिंग मंदितांग, बस्के-बस्के ओरु वेल्ले गलत काम वेने किया पर्रितोर। इद्रम तोरा संगे एकता कीयाना ओरकिन शिक्षित कीयाना ओरकिन सहायता कीयाना। कमजोरिंग, गलतिंग कियानोर तम्मा गलतिंग सुधरे कीयानाए आयवा ओरा गलतिंग,

कमजोरिंग दूर कियाला सहायता वेने कीयाना। दूसरा माटा ने वेहना इत्तेके माटु मुन्ने ओरा जांच कीयाना अनि पेरके ओरा सहायता कीयाना। सिर्फ जांच कीयाना इत्तेके उंदी बगिल नितसी ओरु बाता कींतोर इंजी हूडसोर मंदाना आंता। ओरु बेस व्यवहार कीतेके बेसे मति ओरु बेस व्यवहार कियवेके ओरकिन मुश्किल कुना सामना किया लागिगर। इद उंदी निष्क्रिय रुझान आंदू, सक्रिय आयो। मार्क्सवादिर सक्रिय रुझान पोय्यना इत्तेके सिर्फ जांच आयवा सहायता वेने कीयाना।

तीसरा, केंद्रीय कमेटी चुनाव बारे ते। कामरेड तंग श्याओ-फिंग इंजे 8वी केंद्रीय कमेटी सदस्य लोरा संख्या 150 तले 170 एवनल मंदियार इंजी वेहतोरा। इद संख्या 7वी केंद्रीय कमेटी ता 77 सदस्य लोरा तूलना ते दो गुना तुकू ज्यादा मंता। वायना उचुन सालकु एवनल लेवेके वायना 5 साल एवनल केंद्रीय कमेटी सदस्य लोरा संख्या लोप्पा बढोत्तरी कीवेके बेस आयारा। नेंडु वेल्ले योग्य मानेय वेल्ले जरूरी काम किया मंतोर ओरकिन जापानी आक्रमण विरोधी युद्ध ताकनास्के प्रशिक्षित कीतद मंता अनि ओरकिन “सन 38 लेक्कटा” कार्यकर्ता लोर इंतोर। ओरु नेंडु मना काम ता मुख्य सिम्बल आंदुर ओरु हिल्वेके मावा काम ताका परवो। मति इद्रम ता कार्यकर्ता लोरा संख्या वेल्ले बेहरा मंता। और सब्बे तोरा काजे व्यवस्था कीतेके केंद्रीय कमेटी ता सदस्य लोरा संख्या सैकड़ों आयारा। अदिन काजे नेता बेरा इद्रम कीवोम। माटु इगा वात्ता कामरेड्स ना संगे केंद्रीय कमेटी पेश कित्ता 150-170 एवनल संख्या सही मंता या हिल्ले चर्चा कियाला अपील कींतोम, इद सही हिल्वेके बचोन तासना बेस आयारा।

इदिना बारे ते वर्तमान केंद्रीय कमेटी सदस्य लोर बेस काम कित्तोर ओसो 7वी कांग्रेस ता विश्वास मत्ता लेक्का साबित आतोर। हत्ता 11 साल लोप्पा ओरु बदे बेहरा गलती कियवा लेवा चीन ता जनवादी क्रांति, समाजवादी क्रांति ओसो समाजवादी निर्माण ता सही नेतृत्व कित्ता, सब्बे रकम ता अवसरवाद खिलाफ संघर्ष कित्ता अनि गलत पोल्लो ना खिलाफ संघर्ष कीसी इद्रम ता क्रांति ओसो निर्माण काजे प्रतिकूल सब्बे तत्व कुन

हारे कित्ता। ओरु सफलतांग दोरकी कित्तोर अनि इव सफलतांग दोरकी कीयानास्के गलतिंग कित्ता कामरेड्स वेने शामिल मत्तोर। इगा नन्ना केंद्रीय कमेटी ता बारे ते पूर्ण रूप ते वेहा मंताना वरोर-इरवुरा बारे ते इद्रम मूल्यांकन कीयाना सही हिल्ले, खासकर वांग मिंग ना बारे ते। 7वी कांग्रेस ते तन्ना बचाव कीसोरे उंदी लिखित बयान पेश कित्तोर, ताना लोप्पा ओरु केंद्रीय कमेटी ता कार्यदिशा सही मंता इंजी स्वीकार कीसोरे ओरु 7वी राष्ट्रीय कांग्रेस ता राजनीतिक रिपोर्ट तुन स्वीकार कीसी इदिना निर्णय कुन पालन कियाला तैयार मंतोर इंजी स्वीकार कित्तोर। मति उचुन जोम पेरके नन्ना ओना संगे वड़कतास्के ओरु तन्ना रुझान बदले कीसीतोर ओरु तन्ना लिखित स्टेटमेंट तुन वेने मरंगतोर। उचुन आल्सता पेरके दूसरा दिव्या ओरु उचुन पोल्लोंग रास्तोर ताना लोप्पा ओरु तन्ना गलतिंग मानेमातोर। नन्ना ओनकिन तन्ना गलतिंग मानेमायला तैयार हिल्लेके तन्ना लिखित स्टेटमेंट वापिस पोयना इंजी इत्ताना मति ओरु तन्ना स्टेटमेंट वापिस पोय्योर। पेरके दूसरा पूर्ण अधिवेशन लोप्पा माटु तन्ना गलती ना बारे ते वड़कना इंजी आशा कीतोम मति ओरु दूसरा वेल्ले पोल्लोंग वड़तोर अनि तन्ना गलती ना बारे ते बाताले वड़कोर। माटु इव सब्बे पोल्लोंग बेहाना जरूरत हिल्ले, मीटु सिर्फ वांग मिंग बाता गलतिंग कित्तोर इंजी वेहाना इतोम मति ओरु माकिन केंजोर। ओरु अधिवेशन पेरके आत्मालोचना रासकान इतोर मति पेरके ओरु बीमार आसी मत्तोर, मानसिक काम किया परवोर, रासना शुरु कीतेके ने बीमारी ओसो बेरसिंता इतोर। ओरु पुंजी-पुंजी बीमार आयना नाटक किया मंतोर इंजी वेहाना कठिन मंता। ओरु इंजे वेने बीमारे मंतोर इद कांग्रेस लोप्पा शामिल आया परवोर। माटु ओनकि चुने कीतोमा? माटु कामरेड ली ली-सान किन वेने चुने कीतोमा? ली ली-सान किन माफ कियाला तैयार मत्ता कामरेड्स ना संख्या वेल्ले मंता अनि वांग मिंग किन माफ कियाला तैयार मत्ता कामरेड्स वेल्ले कम मंतोर। कामरेड तंग श्याओ-फिंग वेहता लेक्का माटु ओरकिन चुने कीतेके ओरकिन 7वी कांग्रेस ते चुने कीयाना लेक्का आयर। 7वी कांग्रेस ताकनास्के वेल्ले डेलीगेट्स ओरकिन (सिर्फ वांग मिंग किने आयवा बाकी बचोनो

कामरेड्स किन) चुने कियाला तैयार हिल्वा मत्तोर। अस्के माटु इद्रम ता नीति लागू कीतेके गलत कीतोम इत्तोम। गलतिंग कियानोर किन चुने कीयाना गलती बारांकु कीयाना? बारांकु इत्तेके माटु वेने ओराए हरदे ताका मंतोम। ओरा तरिका उंदी बेरा बोनकिने अवसरवादी घोषित कींतोर इत्तेके ओनकिन इनपड़े वाटसिता लेक्का कीसिंतोर (ओरु निज्जमे गलती कीतेकाई कीवेकाई)। माटु इद तरीका लागू कीतेके माटु वेने ओराए कार्यदिशा तुन वांग मिंग नाए कार्यदिशा लेवेके ली ली-सान नाए कार्यदिशा लेक्का लागू कीतोम। माटु वांग मिंग लेवेके ली ली-सान ना कार्यदिशा ता बदे वेने परिस्थिति ते लागू कीवोम। ओरा प्रभाव ते वासी पार्टी लोप्पाटा अंदरूनी संबंधकु, गलतिंग कित्ता लेवेके ओरा खिलाफ संघर्ष कित्ता ओसो ओरकिन अवसरवादी घोषित कित्ता सब्बे कामरेड्स किन पेरके मुन्ने आयवा बहिष्कृत कित्तोर। ओरु तम्मा किन 100 प्रतिशत बोलशेविक वेहाना कोशिश कित्तोर मति पेरके सौ प्रतिशत अवसरवादी साबित आतोर। मावा लेक्कटोर “अवसरवादी” घोषित कित्ता लेक्का उचुन मार्क्सवाद तुन लागू कित्तोर।

इगास समस्या ता सारतत्व वरोर-इरवुर आयवा निम्न-पूजीपति वर्ग ता उंदी बेहरा हिस्सा ता प्रतिनिधित्व कीता। चीन लोप्पा निम्न-पूजीपति वर्ग ता बेहरा गोहड़ी मंता। निम्न-पूजीपति वर्ग ता बेहरा हिस्सा वेल्ले डुलमुल आसोर मंदिता। उदाहरण तुकू सब्बे तोरु स्पष्ट रूप ते खुशहाल मध्यम किसान हर क्रांति लोप्पा हमेशा डुलमुल मंदिता, बस्के ने मजबूती ते टिकेमासी मन्नो, खुशी ते बेय्यल आंतोर अनि निराश आंतोर इंजी समझेमांतोर। हमेशा ओरा कोंडा ते तम्मा मुट्टामेंड सम्पत्ति दिसिंता ताना लोप्पा उंदी-रेंडु पूहना-टेडियाना जानवरकु, उंदी गाडा ओसो उंदी दर्जन भू जमीन विड़चसी बाताले हिल्ले। ओरु नुकसान-फायदा ता बारे ते वेल्ले आल्सिंतोर अनि तम्मा सम्पत्ति पोहहना तुकू वेरियंतोर। ओरु गरीब किसान लोरकिनकु अलग मंतोर। गरीब किसान लोरा संख्या उत्तर चीन ता नाहकुना कुना आबादी ता 50 प्रतिशत ओसो दक्षिण चीन ता नाहकुना कुना आबादी ते 70 प्रतिशत मत्ता। वर्ग-सरंचना हिसाब ते हूडतेके मना

पार्टी मुख्य रूप ते मजदूर ओसो गरीब किसान, इत्तेके सर्वहारा ओसो अर्ध-सर्वहारा वर्ग तो लोकुरा संगे बनेमाता। अर्ध-सर्वहारा वर्ग ता लोकुर वेने निम्न-पूँजीपति वर्ग लोप्पाने वांतोर, मति ओरु मध्यम किसान लोरकिनकु बचोनो ज्यादा अडिग मंदितोर। मना पार्टी ता कैडर ते बुद्धिजीविरा वेने उंदी हिस्सा वेने शामिल किताद मंता, उंदी करोड़ तुकू ज्यादा पार्टी सदस्य लोरा लोप्पा उच्च, मध्यम ओसो निम्न श्रेणी ता बुद्धिजीविरा संख्या लगभग दस लाख मंता। दस लाख बुद्धिजीविर साम्राज्यवाद लेवेके जमींदार वर्ग, नौकरशाही पूँजीपति वर्ग, राष्ट्रीय पूँजीपति वर्ग ता प्रतिनिधित्व कींतोर इंदाना सही मंदिता; ओरकिन निम्न-पूँजीपति वर्ग लोप्पा तासनाए बेस मंता बहे। ओरु मुख्य रूप ते निम्न-पूँजीपति वर्ग ता बद हिस्सा ता प्रतिनिधित्व कींतोर? ओरु शहरी ओसो नाहकुना निम्न-पूँजीपति वर्ग ता उत्पादन साधन ज्यादा मत्ता हिस्सा इत्तेके खुशहाल मध्यम किसान लोरा प्रतिनिधित्व कींतोर। मना पार्टी ता इद्रम ता बुद्धिजीवी सदस्य “मुन्ने नायुम पेरके डुव्वल तले वेरियंतोर”, ओरु हमेशा डुलमुल आसोर मंदितोर, ओरा लोप्पा मनोगतवाद वेल्ले निंडसी मंदिता अनि संकीर्णतावाद वेने वेल्ले मंदिता। वांग मिंग ना कार्यदिशा ओसो ली ली-सान ना कार्यदिशा ता प्रतिनिधित्व कियानोर किन माटु चुने कीयाना बद पोल्लो तुन तोहिंता? इद्रम कीयानादु माटु विचारधारात्मक गलतिंग कियानोरा संगे ओसो प्रतिक्रांतिकारी, फूटपरस्त लोकुरा (छन तू-श्यू चांग क्वो-थाओ, काओ कांग ओसो राओ शू-श लेक्कटा लोकुर) संगे अलग-अलग व्यवहारा कींतोर। वांग मिंग ओसो ली ली-सान स्पष्ट रूप ते तन्ना मनोगतवाद ओसो संकीर्णतावाद ता कोल्हार कितोर अनि राजनीतिक प्रोग्राम संगे दूसरोरा पोरो दबाव वाटना कोशिश कींतोर। वांग मिंग खुद तन्ना राजनीतिक प्रोग्राम पेश कितोर अनि ली ली-सान वेने इद्रमे कितोरा बदे डावुट हिल्ला, छन तू-श्यू ना वेने तन्ना अलग राजनीतिक प्रोग्राम मत्ता मति अद त्रात्स्की ना हरीं पोयता, फूटपरस्ती पोरो अमल कींता अनि बाहर तल पार्टी-विरोधी कार्रवाईंग किता। चांग क्वो-थाओ षडयंत्रकारी ओसो फूटपरस्ती किया मंतोर अनि पेरके क्वोमिंगतांग संगे कलियतोर; इद्रम ता

पोल्लो ने समाजिक कारण मंदितांग। मना पार्टी लोप्पा इव सामाजिक कारण कुना उंदी रूप कमजोर परिस्थिति वात्तास्के पार्टी-सदस्य लोरा उंदी बेहरा संख्या डुलमुल आयानदू मंता। इत्तेके इद्रमतोर बदे काम सिर्फ बदे फायदा मत्तास्केने कींतोर अनि बदे काम तल ओरकिन फायदा आयवेके बदे दूसरा काम शुरू कींतोर। ओरा बदे निश्चित सिद्धांत मन्नो आंता, बदे निश्चित नियम, निश्चित दिशान मन्नो आंता; नेंडु वांग मिंग इद्रमे किया मंतोर। मुन्ने ओरु वरोर हंदी वेंडसी मत्ता “वामपंथी” मत्तोर अनि पेरके वरोर हंदी वेंडसी मत्ता “दक्षिणपंथी” बने मातोर।

7वी कांग्रेस ते माटु वेल्ले कामरेड्स किन समझे कीसी वांग मिंग ओसो ली ली-सान किन निर्वाचित किताद मत्ता। अस्केटल इंजे एवनल 11 साल कुना लोप्पा ओरा कारण ते माकिन बदे नुकसान आताद हिल्ले अनि वांग मिंग ओसो ली ली-सान किन चुने कीतांकु मावा क्रांति हारेमातद हिल्ले ओसो जीड़ला काजे लेट वेने आताद हिल्ले।

वीर किन चुनेमातांकु गलतिंग कियानोर किन प्रोत्साहन दोरकता या? “गलतिंग कीतोरु इंजे केंद्रीय कमेटी ते एवतोर अदिनके माटु वेने केंद्रीय कमेटी ते एव्वला काजे गलतिंग कियाना!” इद्रम आंता या? हिल्ले, इद्रम आयो। हूड़ाटू मना केंद्रीय कमेटी ता 70 तुकू ज्यादा सदस्य लोरा लोप्पा वरोर वेने सिर्फ केंद्रीय कमेटी ते चुनेमायला काजे पुंजी-पुंजी गलतिंग किताद हिल्ले। केंद्रीय कमेटी ता सदस्य हिल्वोर (ओरु 1938 तुकू मुन्ने, लेवेके 1938 ता पेरके क्रांति लोप्पा शामिल आतोर आई) सिर्फ केंद्रीय कमेटी ते चुनेमायना लेक्का बनेमायला काजे वांग मिंग ओसो ली ली-सान ना हरदे ताकसोरे रेंडु कार्यदिशांग ओसो पेश कियानूर इद्रम अविना कुल संख्या 4 कींतोर? हिल्ले, ओरु इद्रम कीवोर बोरे वेने इद्रम कीवोर इदिना उल्टा, ओरा गलतिंग नल करियसी मना कामरेड्स मुन्ने तुकू ज्यादा सतर्क आयनूर।

इगा ओसो उंदी पोल्लो वेहतेके बेस आयार। हत्ता कालम ते माटु इद्रम ता वेल्ले पोल्लोंग केंजतोम: “क्रांति लोप्पा मुन्ने शामिल आयना जागा ते पेरके शामिल आयना ज्यादा बेस मंता, सबसे बेस माटु क्रांति

लोप्पा शामिल मंदानादु मंता!” इंजे वांग मिंग ओसो ली ली-सान किन चुने कीतेके पार्टी लोप्पा सही मंदाना जागा ते गलत मंदाना बेस मत्ता लेक्का आंता अनि सुडला गलती ना जागा ते बेहरा गलतिंग कीयाना बेस मत्ता लेक्का आंता। वांग मिंग ओसो ली ली-सान किन (पार्टी कार्यदिशा संबंधित गलतिंग कितोर) केंद्रीय कमेटी ते चुने कीयाना इत्तेके ओरा काजे रेंडु सीट खाली तासला काजे इरवुर सही साबित आतोर लेवेके सुडला गलतिंग कित्ता कामरेड्स किन गुचला लागियरा। इद्रम कीयाना वेल्ले अन्यायपूर्ण आयारा। बारांकु इत्तेके साबित आतोर लेवेके सिर्फ सुडला गलतिंग कितोर किन बेहरा गलतिंग कियानोरा काजे तम्मा जागा खाली किया लागिंता। स्पष्ट रूप ते हूडतेके इदु वेल्ले अन्यायपूर्ण मंता। इद्रम तूलना कीतेके सही मंदाना तुकू गलत मंदाना बेस ओसो सुडला गलतिंग कीयाना तुकू बेहरा गलतिंग कीयाना बेस इंदाना लेक्का मंता। मति दूसरा रूप ते हूडतेके इदु इदिना उल्टा मंता। पार्टी ता कार्यदिशा संबंधित ओरा गलतिंग पूरा देश लोप्पा ओसो पूरा दुनिया लोप्पा फैलेमातांग। ओरा पोरोल नालुंग बगिल फैलेमातांके ओरा चुनाव आया मंता। इदिना बारे ते मीटु बाता किया परिंतिर? ओरा पोरोल नालुंग बगिल फैलेमाता; मति गलतिंग कियवा मंदाना या सिर्फ सुडला गलतिंग कीतेके मीवा पोरोल ओरा लेक्का नालुंग बगिल फैलेमाताद हिल्ले। मना लेक्का देश लोप्पा इत्तेके निम्न-पूजीपति वर्ग बेहरा संख्या ते मंदाना जागा ते वीरु इरवुर मानेय झंडांग लेक्का मंतोर। माटु ओरकिन चुने कीतेके वेल्ले लोकुर “कम्युनिस्ट पार्टी ओरा पोरो गंभीरता ते काम कियाला तैयार मंतोर, ओरा काजे रेंडु सीट खाली तासला काजे वेने सहमत मंतोर, इद्रम कीसी ओरु तम्मा गलतिंग सुधरे किया परिंतोर” इंतोर। ओरु तम्मा गलतिंग सुधरे किया परिंतोरा, परबोर इंदाना पोल्लो महत्वपूर्ण हिल्ले। असल इत्तेके मावा देश लोप्पा वेल्ले संख्या ते निम्न-पूजीपति वर्ग ता लोकुर मंतोर। मना पार्टी लोप्पा वेल्ले बेहरा संख्या ते निम्न-पूजीपति वर्ग तल वात्ता डुलमुल तत्व मंता अनि बुद्धीजीविरा नडमा वेल्ले बेहरा संख्या ते इद्रम ता डुलमुल तत्व मंतांग; ओरु सब्बे तोर माटु इद्रम समस्या तुन बद्रम हल कीतोम इंजी

इविन नमूना लेक्का हूडला आलिसंतोर। ओरु इव रेंडासी झंडांग इंजे वेने मंतांग इंजी हूडतेके ओरकिन वेल्ले आराम दोरकियार। मीटु इव रेंडासी झंडांग कुन तेहकतेके ओरु वेरियाना संभावना मंता। अदिन काजे वांग मिंग ओसो ली ली-सान तन्ना गलतिंग सुधरे कींतोरे कीवोर इंदानादु वेल्ले महत्वपूर्ण हिल्ले। मना पार्टी लोप्पा निम्न-पूंजीपति वर्ग तल वात्ता दसियों लाख सदस्य लोर हल्कोए डुलमुल आया परितोर अनि खासकर वांग मिंग ओसो ली ली-सान पोरो बद्रम ता रुझान लागू कींतोम इंजी बुद्धिजीविर हूडा मंतोर। इद भूमि-सुदार कीयानास्के मनम धनी किसान लोरा संगे कित्ता व्यवहार लेक्काने मंता; माटु धनी किसान लोरा किन विडसतेके मध्यम किसान लोर चिंतामुक्त आयनूर। माटु 8वी कांग्रेस ते वेने वीर इरवुरा पोरो 7वी कांग्रेस ते लागू कित्ता लेक्कटा रुझान लागू कींतोम अस्के मना पार्टी तुन उचुन फायदा आयर इत्तेके देश ता निम्न-पूंजीपति वर्ग ता व्यापक नव-रूपांतर कीयाना काम ज्यादा हल्को आंता। इदिना प्रभाव दुनिया लोप्पा वेने आंता। गलतिंग कीयाना लोकुरा पोरो मना लेक्का रुझान लागू कीयाना देश वेल्ले कम मंतांग, लेवेके उंदी वेल्ले हिल्ले।

नेटल लेकतेके पार्टी ता राष्ट्रीय कांग्रेस ता तैयारी मीटिंग काजे 10-15 दिव्यांगे ताकियर, मति मैनेजमेंट बेस कीतेके तैयारी काम बेस पूरा कीयाना संभव आंता। माटु इद कांग्रेस सफल आयार अनि इदिना डेलीगेट्स तम्मा राजनीतिक स्तर संगे इदिना सफलता ता गारंटी कियानूर इंजा विश्वास कींतोम। मति माटु सब्बे तोर वेल्ले बेस ओसो पूरा ताकत संगे काम कीयाना जरूरी मंता।

मना पार्टी ता इतिहास ता उचुन अनुभवकु⁴⁸

25 सितम्बर 1956

अमेरिका साम्राज्यवाद मीवा दुश्मन आंदू, संगेने अदु मना ओसो पूरा दुनिया ता जनता ना दुश्मन वेने आंदू। अमेरिका साम्राज्यवाद काजे मना समस्यांग लोप्पा दखल हियाना मीवा समस्यांग लोप्पा दखल हियाना तुकू उचुन कठिन मंता। बारांकु इत्तेके अमेरिका माकिनकु वेल्ले जेक मंता। मति अमेरिका साम्राज्यवाद ता पंजा वेल्ले जेक एविंतांग, मना थाइवान, जापान, दक्षिण कोरिया, दक्षिण वियतनाम, फिलिपीन लेक्काविनगा एवतांग। अमेरिका ब्रिटिश, फ्रांस, इटली, आइसलैंड ओसो पश्चिम जर्मनी ते तन्ना फौज तैनात कित्ता अनि उत्तरी अफ्रीका ओसो ताना हेरे-हेरे तन्ना फौजी अड्डांग बने कित्ता। अदु भूमि पोरो कोंटा-कोंटा ते तन्ना पंजा फैले कित्ता। अदु उंदी विश्वव्यापी साम्राज्यवादी आंदू। अदु सब्बे देश कुना जनता तुन नकारात्मक उदाहरण संगे शिक्षित कीयाना उंदी शिक्षक आंदू। पूरा दुनिया ता जनता एकताबद्ध आयना अनि अमेरिका साम्राज्यवाद तन्ना पंजा बेगाने फैले कीतेकाई अविन वरोर दूसरोना सहायता ते उरहमूडांता। माटु अदिना उंदी पंजा उरहितोम अस्के माकिन मुन्ने तुकू उचुन ज्यादा आराम वात्ता लेक्का आंता।

हत्ता कालम ते चीन वेने साम्राज्यवाद ओसो सामंतवाद उत्पीड़न कित्ता देश मत्ता अदिन काजे मना परिस्थिति वेल्ले कलियंता। नहाकुना बेहरा आबादी ओसो सामंती ताकत कुना बदे वेने देश काजे उंदी पाप लेक्का मंता मति सर्वहारा वर्ग नेतृत्व ते ताकना क्रांति काजे उंदी वरदान लेक्का मंता बारांकु इत्तेके इदिनगडल किसान लोरा रूप ते माकिन उंदी

⁴⁸ लेटिन अमेरिका ता उचुन कम्युनिस्ट पार्टींग ना प्रतिनिधिरा संगे वार्तालाप ता उंदी अंश।

व्यापक एकता कीयाना लेक्कटा वर्ग दोरकिंता। रूस लोप्पा अक्तूबर क्रांति तुकू मुन्ने सामंतवाद वेल्ले मजबूत मत्ता अनि किसान जनता ना सहयोग तेने बोलशेविक पार्टी क्रांति जीड़ता। चीन लोप्पा इद पोल्लो ओसो उंदी बेरा साबित आंता। मावा देश उंदी कृषि प्रधान देश आंदू, मना 50 करोड़ तुकू ज्यादा लोकुर नहाकुने मंतोरा। हत्ता कालम ते माटु युद्ध लोप्पा मुख्य रूप ते किसान लोरा पोरो आधार आसी मत्तोमा। इंजे वेने किसान लोरे संगठित मंतोर अनि कृषि ता सहकारी बदलाव आताद मंता अदिनके मना शहरी पूंजीपति वर्ग जल्दि ए समाजवादी बदलाव तुन स्वीकार कित्ता। अनि किसान लोरा नड़मा पार्टी काम वेल्ले महत्वपूर्ण मंता।

नावा हिसाब ते सामंतवाद मजबूत मत्ता देश कुना लोप्पा सर्वहारा वर्ग ता राजनीतिक पार्टी तुन नहाकुने दायना अनि किसान लोर किन परहकना। बुद्धिजीविर किसान लोर किन परहकला नहाकुना लोप्पा दांतोर अस्के ओरु बस्के एवनल ओरा पोरो सही रुझान लागू कीवोर अस्के एवनल ओरा विश्वास जीड़ा परवोर। शहरी बुद्धिजीविर नहाकुनोरा बारे ते ओसो किसान लोरा विचार ता बारे ते वेल्ले कम जानकारी मंदिता अनि किसान लोरा समस्या तुन हमेशा सही तरिका ते हल किया परवोर आंतोरा। मावा अनुभव सिर्फ वेल्ले जोम पेरके किसान लोरा संगे एकता आयना ओसो ओरा विश्वास जीड़ता पेरके ओरा हित कुना काजे लड़ेमाया मंतोम इत्तेके माकिन जीत दोरका परंता इंजी मंता। किसान लोर मावा पोरो तुरंत विश्वास कियानूर इंजी आल्सनायो। माटु ओरा सहायता कीतेके तुरंत ओरु वेने मावा पोरो विश्वास कियानूर इंजी आल्सनायो।

किसान सर्वहारा वर्ग ता मुख्य एकताकारी दोस्त मंता। शुरू ते मना पार्टी वेने किसान लोरा नड़मा काम कीयाना महत्व तुन समझेमायवा मत्ता अनि शहर ते मुन्ने काम कीयाना अनि पेरके नहाकुना लोप्पा काम कीयाना इंजी आल्सता। भारत ओसो इंडोनेशिया लेक्कटा उचुक एशियन देशकुना पार्टींग नहाकुना इलाका लोपा वेल्ले बेस काम कित्ता लेक्का हिल्लेंगा।

शुरू ते मना पार्टी किसान लोरा नड़मा काम कियाला विफल आता। बुद्धिजीविरा लोप्पा उंदी रकम ता गब्बू मंदिता, बुद्धिजीवि मंदाना गब्बू।

अदिन काजे ओरु नाहकुना लोप्पा हनवा लेवा नहाकुनोर कुन सुडला हूडानोर। किसान लोर वेने बुद्धिजीविर कुन हूडसी पेरके-मुन्ने आंतोर। इदे आयवा अस्के मना पार्टी नाहकुन समझेमायना हरीं परहकतद हिल्ले। मति पेरके माटु ओसो उंदी बेरा अगा दांतोम अस्के माटु हरीं परहकतोम, नहाकुना इलाकांग ना विभिन्न वर्ग कुना विश्लेषण कीतोम अनि किसान लोरा क्रांतिकारी मांग कुन समझेमातोम।

पहली बेरा माटु नहाकुनोरा बारे ते स्पष्ट जानकारी हिल्ला मत्ता। छन तू-श्यू ना दक्षिणपंथी अवसरवादी कार्यदिशा लोप्पा किसान लोरा (मना मुख्य ताकत मंता) विडसिस मत्ता। मना वेल्ले कामरेड्स नहाकुना इलाक ता उंदी बेहरा आकृति समझेमायना जागा उंदी समतल आकृति समझेमायनोर इतेके ओरु नाहकुन वर्ग-दृष्टिकोण ते बद्रम समझेमायना इंजू पुनवा मत्तोर। ओरु मार्क्सवाद तुन लागू कितोर अस्केने ओरु नाहकुन समझेमायला काजे वर्ग-दृष्टिकोण लागू कीयाना शुरू कितोर। नाहकुना संरचना समतल हिल्ला अगा धनी, गरीब ओसो वेल्ले गरीब लोकर वेने मंतोर, खेतिहर मजदूर, गरीब किसान, मध्यम किसान, धनी किसान ओसो जमींदार वर्ग मंतांगा इंजे नन्ना नाहकुना अध्ययन कितान अनि किसान आंदोलन कुना स्थापना कीसी अविना लोप्पा बचोना अध्ययन स्कूल ताकी कीतोम। नाकिन मार्क्सवाद ता उचुन ज्ञान मत्ता मति नाहकुना बारे ते नावा समझदारी वेल्ले गंभीर हिल्ला मत्ता।

दूसरा साल ते मनम मना वरोर बेसता शिक्षक च्यांग काई-शेक ना धन्यवाद कीयाना। ओरु माकिन नाहकुने दोब्बसितोर। इदु वेल्ले बेहरा टाईम मत्ता, गृहयुद्ध ता दस साल ता कालम मत्ता, अदु ताकनास्के माटु ओरा खिलाफ लडेमासोर मंदितोम, इद्रम माटु नाहकुना अध्ययन कियाला काजे मजबूर कित्ता। मुन्ने उचुन साल लोप्पा, नाहकुना बारेते मना समझदारी अचोन गंभीर हिल्ला मत्ता मति पेरके मुन्ने तुकू बेस ओसो मुन्ने तुकू ज्यादा गंभीर आसोर हत्ता। इंजे मुव्वुर “वामपंथी” अवसरवादी कार्यदिशांग (इविना प्रतिनिधित्व वरोन पेरके वरोर छवी छ्यू-पाए, ली ली-सान ओसो वांग मिंग कित्तोर) मना पार्टी तुन वेल्ले नुकसान कीतांगा।

खासकर वांग मिंग ना “वामपंथी” अवसरवादी कार्यदिशा मना पार्टी ता ज्यादातर नाहकुना आधार-इलाकांग कुन तहस-नहस कित्ता।

ताना पेरके तीसरा कालम इत्तेके जापानी आक्रमण विरोधी युद्ध कालम वात्ता। जापानी साम्राज्यवाद चीन पोरो आक्रमण कित्तास्के माटु क्वोमिंगतांग खिलाफ लड़ेमायना बंद कित्तोम अनि अदिना जागा ते जापानी साम्राज्यवाद संगे लड़ेमायना शुरू कित्तोम। अस्के मनम क्वोमिंगतांग इलाका ना शहर कुना लोप्पा खुल्लमखुल्ला दाया परतोम। वांग मिंग, मुन्ने “वामपंथी” अवसरवादी कार्यदिशा पोय्यना गलती कित्तोर अनि पेरके दक्षिणपंथी अवसरवादी कार्यदिशा लागू कीयाना गलती कित्तोर। ओरु मुन्ने कम्युनिस्ट इंटरनेशनल अति-वामपंथी नीति पोरो अमल कित्तोर अनि पेरके अति-दक्षिणपंथी नीति पोरो अमल कित्तोर। ओरु वेने नकारात्मक उदाहरण संगे शिक्षित कीयाना वरोर बेसता शिक्षक मत्तोर अनि ओरु वेने मना पार्टी तुन शिक्षित कित्तोर। तम्मा नाकारात्मक उदाहारण तले माकिन शिक्षित कीयाना शिक्षक ना जागा ली ली-सान एतितोर। अस्के ओरा मुख्य गलती कठमुल्लावाद पोरो अमल कीयाना, विदेशी अनुभव तुन यांत्रिक तरिका ते लागू कीयानादु मत्ता। मना पार्टी ओरा गलत कार्यदिशा तुन समाप्त कित्तोर अनि मार्क्सवाद-लेनिनवाद ता सार्वभौमिक सच्चाई तुन चीन ता ठोस परिस्थिति संगे जोड़े कीयाना असल हरीं परहकतोर। अद्रमासी चौथा कालम ते च्यांग काई-शेक मावा पोरो आक्रमण कित्तोर अस्के मना काजे अदिना तख्ता पलट कीयाना ओसो चीन लोक गणराज्य ता स्थापना कीयाना संभव आता।

चीन ता क्रांति ता अनुभव, इत्तेके नाहकुना इलाका लोप्पा आधार-इलाकांग ना निर्माण कीयाना, नाहकुना इलाका तल शहर तुन घेराव कीयाना ओसो आखरी ते शहर कुना पोरो कब्जा कीयाना। इद वेल्ले देश कुना लोप्पा पूरा लागू आया परवो मति अवु संदर्भ-सामग्री ता रूप ते मीवा काम वाया परियर। नन्ना मीकिन विनम्रतापूर्वक चीन ता अनुभव कुन यांत्रिक रूप ते लागू कीयानायो इंजी वेहिंताना। बदे वेने दूसरा देश ता अनुभव सिर्फ संदर्भ-सामग्री लेक्का काम वांतांग, अविन कठमुल्ला सूत्र

समझेमायनायो। मार्क्सवादी-लेनिलवाद ता सार्वभौमिक सच्चाई ओसो मीवा देश ता ठोस परिस्थितिग उंदी दूसरा संगे काल्पना जरूरी मंता।

मितू किसान लोर किन मीवा पक्ष ते कीयाना ओसो ओरा पोरो आधार आसी मंदाना इत्तेके मीकिन नहाकुना इलाकांग लोप्पा जांच-पड़ताल किया लागियर। उंदी लेवेके उंदी तुकू ज्यादा नाहकुना लोप्पा हंजी जांच-पड़ताल कीयाना अनि नाहकुनोरा वर्ग-शक्ति, आर्थिक परिस्थिति, रहन-सहन ता परिस्थिति ना स्पष्ट जानकारी दोरकी कियाला काजे उचुन हसांग अगा मंदाना। मुख्य नेताल लोर (पार्टी महासचिव लोर) इद काम खुद कीयाना अनि उंदी लेवेके रेंडु नाहकुना जानकारी दोरकी कीयाना; ओरु इद काम काजे टाईम तेंडना बारांकु इत्तेके इद्रम कीयाना फायदा आयार। वेल्ले पिट्टेंग पोयसी चीरफाड़ कीयाना जरूरी हिल्ले; सिर्फ उंदी लेवेके रेंडु पिट्टेंग पोयसी चीरफाड़ कीयाना हालिंता। पार्टी ता महासचिव उंदी लेवेके रेंडु नाहकुना जांच-पड़ताल कीतेके अगाटा परिसिथिति बद्रम मंता इंजी पुत्तेके नाहकुना जानकारी दोरकी कियाला ओसो अगाटा ठोस परिस्थिति ना स्पष्ट ज्ञान दोरकी कियाला मना कामरेड्स ना मदद किया परितोर। वेल्ले देश कुना पार्टीग ना महासचिव उंदी लेवेके रेंडु “पिट्टेंग” ना चीरफाड़ कीयाना काम तुन महत्व हीवोर आंतोर; ओरु नाहकुना बारे ते उचुन पुंजी मंतोर, मती ओरा जानकारी वेल्ले गंभीर मन्नो आंता, अदिन काजे ओरु जारी कित्ता निर्देशकु नाहकुना परिस्थिति संगे ज्यादा मिले माया परवो आंता। इद्रमे केंद्रीय, प्रांतीय ओसो काउंटी स्तर ते वेने पार्टी ता नेतृत्वकारी शाखांग ना इंचारज लोर खुद उंदी लेवेके रेंडु नाहकुना जांच-पड़ताल कीयाना अनि उंदी लेवेके रेंडु “पिट्टेंग” ना चीरफाड़ कीयाना। इदिन “आपरेशन-विज्ञान” इंतोर।

जांच-पड़ताल कीयाना रेंडु तरिकांग मंतांग: उंदी तरिका कोडा पोरो उदसी पुंगार हूडसोर मंदाना ओसो दूसरा तरिका कोडा पोरोटल रेयसी पुंगार हूडना। मीटु कोडा पोरो उदसी पुंगार हूडतेके मीवा पोरो सिर्फ पोरो-पोरो प्रभाव अरियर, बारांकु इत्तेके पुंगार ता संख्या वेल्ले मंता। लेटिन अमेरिका तल एशिया वासी लोकुर कोडा पोरो उदसी पुंगार हूडतोर। मीवा देश लोप्पा

वेल्ले पुंगाहर मंतांग अविन सिर्फ उंदी कोंडा हूडसी मुन्ने दायनाए हालो आंता; अदिन काजे दूसरा तरिका लागू कीयाना जरूरी मंता इत्तेके कोडा तल रेयसी पुंगाह कुन हूडना अविन गर्रे तल जांच कीयाना अनि बदे उंदी “पुंगार” ता विश्लेषण कीयाना इत्तेके बदे उंदी “पिट्टे” ता चीरफाड़ कीयाना।

साम्राज्यवादी उत्पीड़न ता शिकार देश लोप्पा पूंजीपति वर्ग रेंडु रकम ता मंदिता: राष्ट्रीय पूंजीपति वर्ग ओसो दलाल पूंजीपति वर्ग। मीवा देश लोप्पा वेने पूंजीपति वर्ग रेंडु रकम ता मंता या? मंता बहे।

दलाल-पूंजीपति वर्ग हमेशा साम्राज्यवाद ता पालतू नै मंदिता अनि क्रांति निशाना मंदिता। दलाल-पूंजीपति वर्ग ता विभिन्न ग्रुप कुना संबंध अमेरिका, ब्रिटिश ओसो फ्रांस लेक्कटा विभिन्न साम्राज्यवादी देश कुना इजारेदारी पूंजीपति ग्रुप संगे मंदिता। विभिन्न दलाल ग्रुप कुना खिलाफ संघर्ष कीयानास्के साम्राज्यवादी देश कुना नडमा ता अंतरविरोध कुना फायदा एतना जरूरी मंता। मुनिने अविना लोप्पा उंदी तुन हल कीयाना अनि सिर्फ तात्कालिक मुख्य दुश्मन पोरो हमला कीयाना। उदाहारण तुकू हत्ता कालम ते चीन ता दलाल-पूंजीपति वर्ग लोप्पा ब्रिटिश-परस्त, अमेरिका-परस्त ओसो जापान-परस्त ग्रुप शामिल मंतांग। जापानी आक्रमण विरोधी युद्ध ताकनास्के माटु उंदी पक्ष ते ब्रिटिश, अमेरिका ओसो दूसरा पक्ष ते जापान नडमा ता अन्तरविरोध ता फायदा एतिता, मुन्ने जापानी आक्रमणकारि किन ओसो ओरा आधार आसी मत्ता दलाल ग्रुप तुन खत्म कित्ता। ताना पेरेकेने माटु अमेरिका, ब्रिटिश ता आक्रमणकारी ताकत कुना पारो हमला कीयाना ओसो अमेरिका-परस्त, ब्रिटिश-परस्त दलाल ग्रुप तुन खत्म कीयाना काम क्रिया मंतांग। जमींदार वर्ग लोप्पा वेने बचोनो ग्रुपकु मंदितांग। वेल्ले प्रतिक्रियावादी जमींदार लोरा संख्या कम मंदिता अनि माटु हमला कीतेके साम्राज्यवाद खिलाफ लडेमायना पक्ष एतना देशभक्त जमींदार लोर किन वेल्ले प्रतिक्रियावादी जमींदार लोरा मुन्ने तासना। इदे आयवा, बेहरा ओसो सुडला जमींदार लोरा नडमा वेने जरूर अंतर कीयाना। उंदे बेरा वेल्ले दुश्मन पोरो हमला कीयानाओ, बेहरा जमींदार लोरा लोप्पटल वेने सिर्फ मुट्टामेंड वेल्ले प्रतिक्रियावादी जमींदार

पोरो ने हमला कीयाना। हर जमींदार पोरो हमला कीयाना वेल्ले क्रांतिकरी दिसिंता, मति असल इत्तेके इद्रम कीतेके वेल्ले नुकसान आंता।

राष्ट्रीय पूंजीपति वर्ग मना विरोधी मंदिता। चीन लोप्पा उंदी लोकप्रिय पीटो मंता “हर पिट्टे हमेशा आपस ते कलियसोर मंदितांग”। चीनी क्रांति ता उंदी अनुभव राष्ट्रीय पूंजीपति वर्ग संगे समस्या हल कीयानास्के सतर्क मंदाना जरूरत मंता इंजी मंता। अदु उंदी बगिल मजदूर वर्ग ता विरोध कीता अनि दूसरा बगिल साम्राज्यवाद ता वेने विरोध कीता। इदिन सुरता तासिसी मना मुख्य काम साम्राज्यवाद ओसो सामंतवाद खिलाफ संघर्ष कीयाना मंता अनि बस्के एवनल इव रेंडासी दुश्मन ता तख्ता पलट कीवोम अस्के एवनल जनता ना मुक्ति आया परवो अद्रमासी बद्रमाई माटु राष्ट्रीय पूंजीपति वर्ग तुन साम्राज्यवाद-विरोधी संघर्ष ता पक्ष ते कीयाना। राष्ट्रीय पूंजीपति वर्ग तुन सामंतवाद-विरोधी संघर्ष कियाला बस्केने आल्सो बारांकु इत्तेके जमींदार वर्ग संगे घनिष्ठ संबंध मंता। इदे आयवा मजदूर लोरा उत्पीड़न, शोषण वेने कीता। अदिन काजे माटु इदिना खिलाफ संघर्ष कीयाना, मति साम्राज्यवाद-विरोधी संघर्ष लोप्पा अदिन मना पक्ष ते कियाला काजे माटु संघर्ष ताकनास्के बस्के रोमना बेस आयार इंजी पुंजी मंदाना, इत्तेके संघर्ष तुन सही तरिका ते मना फायदा काजे वेल्ले बेस ताकी कीयाना। दूसरा माटा ने मना संघर्ष ता उंदी सही आधार मंदाना, ताना लोप्पा जीत दोरकी कीयाना पक्का विश्वास मंदाना ओसो पूरा जीत दोरकी कीयाना लेक्का काम कीयाना। रेंडासी पक्ष इत्तेके मजदूर ओसो पूंजीपतिरा परिस्थिति ना जांच-पड़ताल कीयाना जरूरी मंता। माटु सिर्फ मजदूर लोरा बारे ते पुत्तोम अनि पूंजीपतिरा बारे ते पुन्वा मत्तेके पूंजीपतिरा संगे वार्ता किया परवोम आंतोम। इदिना बारे ते विशिष्ट नमूना चुने कीसी अविना जांच-पड़ताल कीयाना उंदी लेवेके रेंडु “पिट्टेंग” चीरफाड़ कीयाना वेने जरूरी मंता; अद्रमे कोडा पोरो उदसी पुंगार हूडना ओसो रेयसी पुंगार हूडना तरिका तुन वेने इस्तेमाल कीयाना।

साम्राज्यवाद ओसो सामंतवाद खिलाफ संघर्ष ता पूरा ऐतिहासिक कालम ते, माटु राष्ट्रीय पूंजीपति वर्ग तन्ना पक्ष ते कीयाना ओसो अदिना

संगे एकता कीसी साम्राज्यवाद ता विरोध कियाला जनता ना मदद कीयाना। साम्राज्यवाद ओसो सामंतवाद ता विरोध कीयाना काम मुख्य रूप ते पूरा आता पेरके वेने माटु राष्ट्रीय पूंजीपति वर्ग संगे उचुन जोम काजे एकता कीयाना। इद साम्राज्यवादी आक्रमण ताकानास्के, उत्पादन ता विकास कीयाना ओसो हाटुम ते स्थिरता कीयाना अनि पूंजीवादी बुद्धिजीविर किन मना पक्ष ते कीयाना ओसो अविना पूना-बदलाव कीयाना लोप्पा फायदा आयारा।

मीटु इंजे राजसत्ता वातद हिल्ले अदिन दोरकी कियाला काजे तैयारी किया मंतोम। राष्ट्रीय पूंजीपति वर्ग पोरो “एकता ओसो संघर्ष अमल कीयाना” नीति लागू कीयाना। साम्राज्यवाद-विरोधी संघर्ष लोप्पा ओरा संगे एकता कीयाना अनि ओरा सब्बे साम्राज्यवादी-विरोधी पोल्लोंग ओसो कार्रवाईंग ना समर्थन कीयाना अनि अदिना प्रतिक्रियावादी, मजदूर वर्ग-विरोधी ओसो कम्युनिस्ट-विरोधी पोल्लोंग, कार्रवाईंग खिलाफ पूर्ण रूप ते संघर्ष कीयाना। एकांगीपन गलत मंता; एकता लेवा संघर्ष कीयाना “वामपंथी” भटकाव आंता अनि संघर्ष लेवा एकता कीयाना दक्षिणपंथी भटकाव ता गलती आंदू मना पार्टी लोप्पा इव रेंडासी रकम ता गलतिंग आतांग अनि माटु इविनगडल सबक एतितोम। पेरके माटु इव रेंडासी रकम ता अनुभव कुना निचोड़ तेंडसी “एकता ओसो संघर्ष पोरो अमल कीयाना” इत्तेके जरूरी आतास्के संघर्ष कीयाना अनि संभव आतास्के एकता कीयाना नीति लागू कीयाना। संघर्ष ता उद्देश्य राष्ट्रीय पूंजीपति वर्ग संगे एकता कीयाना अनि साम्राज्यवाद-विरोधी संघर्ष लोप्पा जीत दोरकी कीयाना मंता। साम्राज्यवाद ओसो सामंती उत्पीड़न ता शिकार देश लोप्पा, सर्वहारा वर्ग ता राजनीतिक पार्टी राष्ट्रीय झंडा तुन पोरो तेहना अनि राष्ट्रीय एकता ता उंदी प्रोग्राम तुन अमल कीयाना अनि इदिना संगे सिर्फ साम्राज्यवाद ता पालतू नैकुन विड़चसी सब्बे ताकत कुना संगे एकता कीयाना अनि एकता कीयाना। पूरा राष्ट्र कम्युनिस्ट पार्टी बचोन देशभक्त मंता, बचोन शांतिप्रिय मंता, राष्ट्रीय एकता काजे बचोन तैयार मंता इंजी समझेमांता। इद्रम आतेके साम्राज्यवाद ओसो पालतू नैकु संगे बेहरा

जर्मीदार वर्ग ओसो बेहरा पूंजीपति वर्ग तुन अलगाव ता परिस्थिति ते वाटला मदद आंता।

कम्युनिस्ट लोर गलतिंग कीयाना तुकू वेरियनायो। गलतिंग ना दोहरा चरित्र मंदिता। उंदी बगिल अवु पार्टी ओसो जनता तुन नुकसान कींतांग अनि दूसरा बगिल शिक्षक लेक्का काम कीसोरे पार्टी ओसो जनता तुन बेस शिक्षित कींतांग। इदु क्रांति काजे वेने फायदा आंता। असफलता सफलता तुन जन्म हींता। असफलता लोप्पा बदे बेसता पोल्लो हिल्लेके अदु सफलता तुन बद्रम पुट्टी किया परिंता? वेल्ले गलतिंग आतेके बदलाव आयना अनिवार्य मंता। इदु मार्क्सवाद आंदू। “बदे वस्तु तन्ना चरम सीमा ते एविंता अस्के अदु तन्ना विपरीत तत्व ते बदलेमांता” ; गलतिंग ना डग्गी आतास्के कोंडा मुन्ने वेहच वेल्ले जेक मन्नो आंता।

डा. सुन यात-सेन ना सुरता ते⁴⁹

12 नम्बर 1956

वाटु, माटु मना महान नेताल क्रांतिकारी डा. सुन यात-सेन किन श्रद्धांजलि हियाकाल!

चीनी क्रांतिकारी जनवादी रुझान लागू कीसोरे मना जनवादी क्रांति ता तैयारी कालम ते चीन ता सुधारवादिरा खिलाफ ताकी कित्ता तीव्र संघर्ष काजे ओनकिन माटू श्रद्धांजली अर्पित कीतोम। इद संघर्ष ताकनास्के ओरु चीन ता क्रांतिकारी जनवादीरा नेतालल मत्तोर।

1911 ता क्रांति ताकनास्के जनता ना नेतृत्व कीसी राजतंत्र ता तख्ता पलट कियाला ओसो गणराज्य ता स्थापना कीयाना काम लोप्पा कित्ता महान योगदान काजे माटू ओनकिन श्रद्धांजली हीतोम।

क्वोमिंगतांग ओसो कम्युनिस्ट पार्टी नडमा एकता तुकू मुन्ने पाडना मूंड जन-सिद्धांत कुन पूना मूंड जन-सिद्धांत कुना लेक्का विकसित कीयाना लोप्पा कित्ता महान योगदान काजे माटू ओनकिन श्रद्धांजली अर्पित कीतोम।

ओरु मना काजे राजनीतिक विचारधारा लोप्पा काम वायना लेक्कटा वेल्ले विरासत विडसतोर।

सिर्फ मुट्टामेंड प्रतिक्रियावादिर किन विडचसी, वर्तमान चीन ता पूरा जनता डा. सुन यात-सेन जीवा मंदना जोम कित्ता क्रांतिकारी काम ता उत्तराधिकारी आंदू।

माटु डा. सुन यात-सेन विडसता अधुरा जनवादी क्रांति तुन पूरा कीतोम। अदिन समाजवादी क्रांति लेक्का विकसित कीतोम। इस्सल माटु इद क्रांति तुन पूरा कीयाना काम किया मंतोम।

⁴⁹ डा. सुन यात-सेन ना 90वीं जन्म-जयंती ता मौका ते रास्ता लेख।

पदार्थ हमेशा प्रगति कीसोर मंदिता। 1911 ता क्रांति तुन इंजे सिर्फ 45 साल आता मति चीन ता स्वरूप इनपड़े बदलेमासी मंता। वायना 45 साल लोप्पा इत्तेके इक्कीसवीं शताब्दी ता शुरू ते 2001 ईसवी एवनल चीन लोप्पा इदिनकु वेने ज्यादा बेहार बदलाव आसी मंदियर। अस्के चीन उंदी शक्तिशाली समाजवादी औद्योगिक देश बनेमासी मंदियर। चीन उंदी देश आंदू, इदिना क्षेत्रफल 96 लाख वर्ग किलोमीटर मंता, इदिन जनसंख्या 60 करोड़ मंता, इद मानव जाति काजे परताचोन योगदान कीयाना। मति हत्ता कालम ते उंदी वेल्ले जोम एवनल ओरा योगदान वेल्ले कम मत्ता। इदिना बारे ते माकिन दुक्कम मंता।

मति माटु विनम्र मंदाना, सिर्फ नेंडु विनम्र मंदानाए आयवा 45 साल पेरेके वेने हमेशा विनम्र मंदाना। अंतरराष्ट्रीय संबंध कुना लोप्पा चीन ता लोकुर बेहरा राष्ट्र ता शोविनिज्म तल दृढ़ता, समग्र ओसो सम्पूर्ण रूप ते जेक आयना।

डा. सुन वरोर विनम्र मानेय मत्तोर। नन्ना ओना भाषण बचोनो बेरा केंजसी मत्तान अनि नन्ना ओना चरित्र ता दृढ़ता तुकू वेल्ले प्रभावित आतान। ओरु चीन ता हत्ता कालम ओसो वर्तमान कालम ता, बाकी देश कुना (सोवियत संघ शामिल मंता) वेल्ले डटेमासी कित्ता अध्ययन तुन हूडसी ओरु वरोर वेल्ले मेधावी मानेय मत्तोर इंजी समझेमाता।

ओरु चीन ता बदलाव काजे हामुर-नोमुर उंदी कीसी काम कीसोरे पूरा पिस्वल समर्पित कित्तोर; ओरा बारे ते ओरु तन्ना जीवा मंदाना जोम सम्पूर्ण योग्यता, तन्ना सम्पूर्ण क्षमता संगे काम कीसोर मत्तोर इंदाना बेस आयर।

ऐतिहासिक घटनाक्रम ता विकास किन मार्गदर्शन क्रियाला सबसे मुन्ने मंदाना बचोनो महान लोकुरा लेक्का डा. सुन लोप्पा वेने वेल्ले कमजोरिंग मत्तांग। इव कमजोरिंग ना बारे ते ऐतिहासिक परिस्थितिंग ना वेहच ते वेहाना अनि जनता तुन समझे कीयाना; मना नेताल लोरा पोरो माटु वेल्ले आलोचनात्मक रुझान लागू कीयानायो।

चीनी कम्युनिस्ट पार्टी ता आठवी केंद्रीय कमेटी ता दूसरा प्लेनरी अधिवेशन लोप्पा हीता भाषण

15 नवम्बर 1956

नन्ना नालुंग समस्यांग ना चर्चा कियाकानः अर्थव्यवस्था, अंतरराष्ट्रीय परिस्थिति, चीन ओसो सोवियत संघ ता संबंध ओसो पूर्ण जनवाद, अल्प जनवाद ता समस्या।

1

माटु हर समस्या ता पूर्ण विश्लेषण कीयाना, सिर्फ अस्केने माटु अदिना सही समाधान किया परितोमा मुन्ने दायना लेवेके पेरके गुचना, कोडा पोरो तरगना लेवेके दोड़ रैय्यना क्रिया द्वन्द्ववाद ता अनुसार आयना जरूरी मंता। दुनिया लोप्पा कोडा पोरो तरगना अनि अगाटल रैय्यना, मुन्ने दायना लेवेके पेरके गुचना घटनांग हमेशा आसोरे मंदितांग। पोड़दमेंड कोडा पोरोटल रैय्यवा लेवा ताना पोरोने उदसी मंदाना बद्रम संभव आंता? माटु ताकसोर मत्तास्के मना रेंडासी कालकुन उंदे बेरा मुन्ने ओयवा लेवा उंदी काल हमेशा दूसरा काल पेरके मंदिता। माटु उंदी डाका मुन्ने वाटितोम अस्के मना उंदी काल मुन्ने दांता अनि दूसरा काल पेरके मंदिता। माटु दूसरा काल मुन्ने वाटितोम अस्के पेरके मत्ता काल मुन्ने दांता। माटु सिनेमा पर्दा पोरो लगातार चलेमासोरे मंदना फोटो हूडितोम मति फिल्म-स्ट्रीप तुन हूडसोर मत्तेके अदिना हर चित्र गतिहीन मंदिता। ‘च्यांग च ते मोय्योल दोड़’ हेडिंग वाले लेख ते वेहताद मत्ता: “परियसोर मत्ता पिट्टे ता जंगो गतिमान मन्नो आंता”। सब्बे वस्तु गतिमान मंदाना संगे-संगे गतिहीन वेने मंदिता, अदु मना दुनिया ता द्वन्द्ववाद आंदू। विशुद्ध गतिहीनता लेवेके

विशुद्ध गति ता अस्तित्व मन्ना। गति परिस्थिति निरपेक्ष मंदिता अनि स्थिरता अस्थाई ओसो परिस्थिति सापेक्ष मंदिता।

मना योजनाबद्ध अर्थव्यवस्था संतुलित मंदाना संगे-संगे असंतुलित वेने मंदिता। संतुलत अस्थाई ओसो परिस्थिति सापेक्ष मंदिता। संतुलन अस्थाई रूप ते नित्तता पेरके असंतुलन लोप्पा बदेमांता; पहली 6 महिनांग ना संतुलन दूसरा 6 महिनांग ना असंतुलन लोप्पा बदलेमांता, शुरू ता साल संतुलन वायना साल ता असंतुलन लोप्पा बदलेमांता। बदलेमायवा लेवा संतुलन तासना संभव हिल्ले माटु मार्क्सवादिरा अनुसार असंतुलन, अंतरविरोध, संघर्ष ओसो विकास निरपेक्ष मंदिता, अनि संतुलन ओसो स्थिरता सापेक्ष मंदिता। सापेक्ष मंदाना इत्तेके अस्थाई ओसो परिस्थिति सापेक्ष मंदाना आंता। इद्रम हूडतेके मना अर्थव्यवस्था मुन्ने दाया मंता या पेरके गुच्चा मंता? माटु कार्यकर्ता लोरकिन ओसो समुद्र लेक्का मत्ता जनता तुन मुन्ने दायना संगे-संगे पेरके गुच्चा मंता, मति मुख्य रूप ते मुन्ने दाया मंता, उंदी सीधा लाईन ते आयवा लहर कुना लेक्का मुन्ने दाया मंता इंजी वेहचियाना। माटु कोडा पोरोटल रैय्यना परिस्थिति वेने वांता मति साधारण रूप ते ज्यादातर माटु कोडा पोरो तरगना परिस्थिति ते मंतोमा मना सब्बे स्तर ता पार्टी कमेटींग, विभिन्न केंद्रीय विभाग ओसो सब्बे स्तर ता सरकारकु प्रगति तुन प्रोत्साहन किया मंतांगे लेवेके प्रतिगमन तुन? बुनियादी रूप ते वेहाना इत्तेके अवु प्रगति तुन प्रोत्साहन हिया मंतांग। समाज लगातार मुन्ने दाया मंता, प्रगति ओसो विकास आम रुझान मंता।

पहली पंचवर्षीय योजना सही मंता या? नावा हिसाब ते अदु बुनियादी रूप ते सही मंता, अदिन लागू कीयाना पहली 4 साल कुना लोप्पा स्पष्ट आता। उचुक गलतिंग वेने आतांग मति अविनगडल बचेमायना मुशिकल मत्ता बारांकु इत्तेके मनगना अनुभव कुना कमी मत्ता। माटु वायना कालम ते माकिन बचोनो पंचवर्षीय योजनांग ना अनुभव दोरकतास्के वेने गलतिंग कीसोर मंदितोमा? इंगो, माटु अस्के वेने गलतिंग कीसोर मंदितोमा दोरकता अनुभव बस्केने हालोंग आंतांग। दस हजार साल पेरके वेने योजना बने कीयाना लोप्पा गलतिंग आयना संभव मंता?

दस हजार साल पेरकेटा समस्यांग ना संबंध मना संगे हिल्ले मति अस्के वेने जरूरी गलतिंग आया परिंतांग। नौजवान लोर गलतिंग कीतेके मुयतोर गलतिंग किया परवोरा? कनफ्यूशियस वेहता लेक्का 70 साल उमर ते ओरु बाता कीतोरो अदु असल परिस्थिति अनुसार मत्ता¹, मति नाकिन ओना इद पोल्लो पोरो विश्वास हिल्ले, ओरु सिर्फ पोंगडिंग कीसोर मत्तोरा तन्ना पहली पंचवर्षीय योजना काजे माटु तय कित्ता उचुक निर्माण-योजनांग सोवियत संघ ता सहायता ते डिजाइन कित्ताद मत्ता मति ज्यादातर निर्माण-योजनांग खुद तैयार कित्ताद मत्ता। मीटु चीन लोकुर इद्रम किया परवोर इंजी आल्सितिरा? माटु वेने इद्रम किया परिंतोम। मति संगेने माटु वेल्ले इद्रम किया परवोम इंजी वेने मानेमायना जरूरी मंता, बारांकु इतेके इंजे वेने उचुक निर्माण योजनांग ना डिजाइन माटु खुद किया परवोम। हत्ता उचुन साल कुना लोप्पा मना निर्माण-कार्य लोप्पा उंदी समस्या मत्ता। उचुन कामरेडस वेहता लेक्का सिर्फ “पेडकांग” पोरोने ध्यान हीताद मंता, “हव्वी” पोरो वेल्ले कम ध्यान हीताद मंता। कारखाना ता बिल्डिंग निल्पी कित्ताद मंता अनि मशीनरी, बाकी साजो-सामान वाटताद मंता, मति इविना संगे-संगे म्युनिसिपल निर्माण-कार्य ओसो सेवा व्यवस्था कित्ताद हिल्ले अनि वायना कालम ते उंदी बेहरा समस्या बनेमायर। नावा हिसाब ते इदिना असर पहली पंचवर्षीय योजना ताकनास्के आयवा दूसरा लेवेके तीसरा पंचवर्षीय योजना ताकनास्के आयना संभावना मंता। पहली पंचवर्षीय योजना सही मंता या हिल्ले, इदिना बारे ते माटु उंदी आंशिक निष्कर्ष इंजे तेंडा परिंतोम अनि दूसरा वायना साल ते मति पूर्ण निष्कर्ष तेंडनादु दूसरा पंचवर्षीय योजना ता आखरी तेने आया परिंता। योजना बने कीयाना लोप्पा मनोगतवाद तले सौ प्रतिशत बचेमायना संभव हिल्ले। उचुन-उचुन गलतिंग कीयाना अचोन गलत हिल्ले। सफलतांग ना दोहरा रूप मंदिता अद्रमे गलतिंग ना वेने दोहरा रूप मंदिता। सफलतांग मानेय किन प्रोत्साहित कींतांग मति संगेने ओरकिन घमंडी वेने बने किया परिंतांग; गलतिंग मानेय किन निराश कींतांग अदिन काजे मना दुश्मन मंदितांग मति संगेने अवु मना वेल्ले बेसता शिक्षक वेने मंदितांग। कुल

मिले कीसी पहली पंचवर्षीय योजना लोप्पा इंजे एवनल बदे गंभीर, बुनियादी गलती दिसताद हिल्ले।

माटु कार्यकर्ता लोर, जनता ना जोश ता रक्षा कीयाना, अदिना पोरो दडंगता एर दोस्सनायो। उंदी बेरा उचुन मुल कृषि ता समाजवादी बदलाव काम पोरो दडंगता एर दोस्सिस मत्तोर, अस्के “प्रतिगमन तुन प्रोत्साहन हियाना कमेटी” मत्ता। पेरके माटु दडंगता एर दोस्सना बेस आयो इंजी वेहतोम अदिन काजे प्रगति तुन प्रोत्साहन हियाना कमेटी बने कीतोम। मूल योजना अनुसार मालिकाना ता समाजवादी बदलाव ता काम बुनियादी रूप ते 18 साल लोप्पा पूरा कीयाना मत्ता मति प्रोत्साहन हीतांकु अदिन वेल्ले जल्दी पूरा किताद मंता। कृषि-विकास प्रोग्राम ता ड्राफ्ट लोप्पा उच्चा स्तर ता कृषि सहकारिता तुन 1958 ते पूरा कीयाना इंजी मंता। मति इंजे माटु इयेटा इरगंम लेवेके वायना साल ता वसंत तेने पूरा कीयाना लेक्का मंता। इद प्रक्रिया ते बचोनो कमजोरिंग वेने मंतांग, मति अद प्रतिगमन तुन प्रोत्साहन हियाना कमेटी तुकू बेस मंता; किसान लोर खुश आतोर अनि कृषि-उत्पादन बेरसता। सहकारी बदलाव लेवा इयेटा इचोम गंभीर प्राकृतिक संकट मत्ता परस्थिति ते अनाज ता पैदावार 20 अरब चिन तुकू ज्यादा आया परवो आसी मनवड। संकट मत्ता इलाकांग लोप्पा सहकारी समितिंंग मत्तांकु उत्पादन संगे राहत-कार्य कियाला सहायता दोरकता। कार्यकर्ता लोर, जनता ना कमजोरिंग ओसो संगेने मना खुद ता कमजोरिंग ना आलोचना कीयानास्के कार्यकर्ता लोर, जनता ना पहलकदमी सुरक्षित मंदाना अनि ओरा लोप्पा हालनाचोन जोश वायना लेक्का हूडना। जनता इंजे असंभव मत्ता काम कियाला आल्सतेके अदिन स्पष्ट रूप ते इद्रम किया परमूडायो इंजी समझे कीयाना।

वार्षिक राजकीय बजट तय कीयाना मुन्ने अदिना पोरो मूंड बेरा विचार-विमर्श कीयाना। इत्तेके मना केंद्रीय कमेटी कामरेड्स ओसो बाकी संबंधित कामरेड्स अदिना पोरो विचार-विमर्श कीसी तय कियाला काजे मीटिंग कीयाना। इद्रम माटु सब्बे तोर बजट ता बारे ते समझेमायना। लेवेके हमेशा लेक्का सिर्फ इनचार्ज कामरेड्से अदिना पोरो बेसता समझदारी

दोरकी कींतोर अनि माटु सिर्फ इंगो-इंगो इंजोर मंदितोम। अदिना बारे ते नावा हिसाब ते माटु उचुन-उचुने पुत्तोम, वेल्ले जानकारी माकिन हिल्ले। मूंड बेरा विचार-विमर्श कीसी तय कीयाना तरिका लागू कित्ता पेरके माटु अदिन बेस समझेमाया परताद मंता या? हिल्ले बहे, मति अस्के वेने मना ओसो इनचार्ज कामरेड्स ना नडमा फर्क मंदिता। ओरू रंगमंच ते काम कीयाना ऑपेरा-अभिनेताल लोरा लेक्का मंतोर, ओरू पाटा पारला पुंजी मंदितोर; माटु दर्शक लोरा लेक्का मंदितोम, माकिन पाटा पारला वायो। मति माटु रोज ऑपेरा हूडला दांतोम अनि बोर अभिनेतालल ज्यादा बेस मंतोर अनि बद काम बेस मंता इंजी सही चीनेमाया परितोम। असल इत्तेके अभिनेताल लोरा कला ता मूल्यांकन दर्शक लोरे कींतोर। इदिना लोप्पाए महानता मंता। जनता बारबार बदे ऑपेरा तुन हूडला विचार कींता इत्तेके अदिन लगातार तोहा परमूडांता। जनता बद ऑपेरा तुन विचार कीवो अदिन बदले किसियाना। अदिनके मना केंद्रीय कमेटी लोप्पा विशेषज्ञ ओसो गैर-विशेषज्ञ लोरा नडमा ता अंतरविरोध मंता। विशेषज्ञ लोरा तम्मा विशिष्टतांग मंतांग अनि गैर-विशेषज्ञ लोरा ता तम्मा विशेषतांग मंतांग। गैर-विशेषज्ञ लोर सही ओसो गलत बाताल मंता इंजी वेहा परितोर।

1956 ता राजकीय बजट रिपोर्ट लोप्पा “अर्ध विश्वासनीय” वाक्य ता इस्तेमाल कित्ताद मंता अनि इंजेटल इदिन “पूर्ण विश्वासनीय” लेक्का बदले कीयाना इंजी सुझाव हींताना। इयेंड जनवरी ते बुद्धिजीविरा समस्या ता बारे ते आता मीटिंग ते नन्ना “पूर्ण विश्वासनीय” वाक्य ता इस्तेमाल कित्ताद मत्ता। “अर्ध विश्वासनीय” वाक्य लोप्पा दुहराव दोष मंता। “विश्वासनीय” ता विशेषता वेहाला काजे “विश्वास कियाला काजे” ता इस्तेमाल कीतेके बदे वस्तु बेरसो ओसो सीमित वेने आयो। विशेषण पद उंदी बगिल बदे वस्तु ता विशेषता बेहिंता अनि दूसरा बगिल अदिना अर्थ सीमित कीसिंता। बदे वस्तु तुन “पूर्ण रूप ते विश्वासनीय” वेहची विश्वासनीयता ता दर्जा ता बारे ते वेहमूडांता इत्तेके अदु साधारण रूप ते विश्वासनीय आयवा पूर्ण रूप ते विश्वासनीय मंता इंतोर। बदे वस्तु तुन पूर्ण रूप विश्वासनीय बने कीयाना हल्को हिल्ले। इयेटा जून ते आता राष्ट्रीय

जन-प्रतिनिधि सभा ते बजट तुन स्वीकार कीतेके सब्बे तोर अद्दु विश्वासनीय मंता इंतोर। इंजे इद बजट ता दस प्रतिशत तुकू कम हिस्सा अविश्वासनीय मत्ता लेक्का मंता बारांकु इत्तेके उचुन वस्तु कुन सही प्राथमिकता हीताद हिल्ले अनि उचुन वस्तु ना रकम खर्च कीयाना व्यवस्था किताद मंता। अदिन काजे वायना कालम ते माटु बजट ता उचुन वस्तु कुन प्राथमिकता हियाना पोरो ध्यान हियाना जरूरी मंता। इद प्राथमिकता सही मंता या हिल्ले इदिना पोरो विशेषज्ञ लोर ध्यान हियाना मंति संगे ने माटु वेने ध्यान हियाना अनि प्रांतीय स्तर ता कामरेड्स ध्यान हियाना। बदे डावुट हिल्ला, इदिना पोरो हर मानेय ध्यान हियाना।

माटु ओसो प्रांत, म्युनिसिपलटिंग, स्वायत्त प्रदेश कुना पार्टी कमेटिंग ना सचिव लोर वित्त, योजना संबंधित कार्य कुना पोरो पकड़ तासना। उचुन कामरेड्स मुन्ने इविना पोरो गंभीरतापूर्वक ध्यान हीताद हिल्ले। कामरेड्स, कृपा कीसी मीटु अनाज, पद्दी हव्विंग, मेस्कु ओसो कुसिर-कायांग संबंधित सवाल कुना पोरो ध्यान हीमूट, बारांकु इत्तेके इव वेल्ले समस्यांग निल्पी कीतांग। हत्ता साल हिरंगम कालम तल पूरा ताकत अनाज पोरो वाटसी सहायक धंधा, औद्योगिक फसल कुन नजरअंदाज कीतोम। पेरके इद गलती तुन सुधरे कीतोम अनि इदिना बगिल ध्यान हीतोम; खासकर अनाज ओसो कपास, तिंदाना निय्य, पद्दी, बुसाक (पोग्गा) लेक्कटा 20-30 बाकी चीज कुना नडमा ता रेट तय किताद मंता अस्केटले किसान लोर अनाज ता नजरअंदाज कीसी सहायक धंधा, औद्योगिक फसल कुना पोरो वेल्ले ध्यान हिया मंतोर। मुन्ने सिर्फ कागज पोरो जोर हियानोर अनि पेरके सिर्फ सहायक धंधा ओसो औद्योगिक फसल कुना पोरो। अनाज ता रेट सस्ता आतांकु किसान लोर किन नुकसान आंता; तम्मा अनाज ता रेट वेल्ले कम तास्तांकु किसान लोर अनाज पंडिह कीयाना बंद कीतोम। इद समस्या पोरो वेल्ले ध्यान हियाना जरूरत मंता।

माटु मेहनत, बचत संगे मना देश ता निर्माण कीयाना, शाहीखर्च, फिजूलखर्च ता विरोध कीयाना अनि मेहनत ते काम कीयाना, सादा पिस्वल पिस्सना ओसो जनता ना सुख-दुःख ते शामिल आयना विचार

तुन प्रोत्साहित कीयाना जरूरी मंता। उचुन कामरेड्स कारखाना ना निर्देशक ओसो स्कूल-कालेज कुना प्रधान लोरा लोप्पा मंदाना इंजी सुझाव हितोर मति नावा हिसाब ते विशेष रूप ते मुश्किल परिस्थिति ते इद उंदी बेसता तरीका आंदू। दीर्घकालीन अभियान ताकनास्के माटु दलदल मत्ता मैदान तुन वेंडसोर मत्तोम अस्के अगा लोहकुना निशान वेने हिल्ला मत्ता, माटु संभव आता जागा ते हुंजानोरोम अनि कमांडर-इन-चीफ चू तेह वेने 40 दिव्यंग एवनल दलदली मैदान वेंडनास्के इद्रमे कित्तोर। इद कठिन परीक्षा तल माटु वेंडसी मत्तोमा मना फौज तिगा इंजे तिंदला अनाज हिल्ला मत्ता अनि ओरु मर्रा तोलांग-आकिंग तिंजी पिस्सा मंतोर। जनता ना सुख-दुःख ते हिस्सा एतना- हत्ता कालम ते माटु इद्रम कीतोम इत्तेके इंजे बारांकु किया परवोम? माटु इद्रमे कीसोर मत्तेके जनता तल अलग-थलग आयोम आंतोमा।

माटु अखबार ताकी कीयाना काम पोरो पकड़ मजबूत कीयाना। बेगा वेने अखबार प्रकाशित आंता अगा केंद्रीय कमेटी ओसो सब्बे स्तर ता पार्टी कमेटींग अव अखबार कुन ताकी कीयाना काम तुन वेल्ले महत्व ता काम समझेमायना। इयेटा शुरू ते ने समाचार-पत्र जनता ना रहन-सहन ते सुधरे कीयाना बारे ते उंदी बगिल ओसो अव्यावहारिक प्रचार किताद मंता अनि मेहनत, बचत ते संगे देश ता निर्माण कीयाना, शाहखर्ची, फिजूलखर्ची ता विरोध कीयाना, मेहनत ते काम कीयाना, सादा पिस्वल पिस्सना जनता ना सुख-दुःख ते शामिल आयना विचार तुन वेल्ले कम प्रचार किताद मंता। इंजेटल समाचार-पत्र लोप्पा मना प्रचार-काम ता केंद्र-बिंदू बनेमायाना। उचुन रेडियो-स्टेशन कुना संगे प्रसार आयनावु वेने अखबार कुनिगडले वात्ता लेक्का मंता। अदिन काजे संवाददाता लोर, अखबार लोप्पा काम कीयाना लोकर ओसो रेडियो-कर्मचारिना मीटिंग केयसी ओरा संगे विचार-विमर्श कीयाना अनि प्रचार-काम ता बारे ते मना निर्देशक नियम कुना जनकारी हियाना।

इगा ओसो उंदी समस्या ता बारे ते प्रतिक्रांतिकारीरा दमन ता समस्या तुन वेने चर्चा कियाकान। वेल्ले गंभीर अपराध कित्ता स्थानीय निरंकुश

तत्व, बुरे शरीफजादा, निरंकुश शासक, प्रतिक्रांतिकारि किन खत्म कीयाना या? इंगो, इद्रमे कीयाना। उचुन सम्माननीय जनवादी लोकुर ओरकिन हौकना गलत आंता इंतोर मति माटु इद्रम कीयाना सही मंता इंतोम, लेवेके माटु अलग-अलग लेंग ते पाटा पारा मंतोम इंजी वेने इनमूडांता। इदिना बारे ते माटु सम्माननीय जनवादी लोकुरा संगे बस्केने मना लेंग काल्पा परवोम। माटु हौकता लोकुर “सुडला च्यांग काई-शेक” मत्तोर। सम्राट फू ई, वांग याओ-ऊ ओसो तू थ्वी-मिंग लेक्कटा “बेहरा च्यांग काई-शेक” लोर किन माटु हौकोम आंतोम। मति “सुडला च्यांग काई-शेक” लोर किन हौकवेके मना काल दोड़ रोज “भूकंप” वासोर मंदियर अनि उत्पादक शक्ति, मेहनतकश जनता तुन मुक्त किया परमूडायो। उत्पादक शक्ति ना लोप्पा रेंडु तत्व मंदितांग, श्रमिक ओसो उत्पादन साधन। माटु प्रतिक्रांतिकारीरा दमन कीवेके मेहनतकश जनता खुश आयो आयवर। कोंदांग ओसो कुदाड़ वेने खुश आयो आयवर अनि जमीन किन वेने आराम दोरकी आसी मनवड़, बारांकु इत्तेके किसान लोर इस्तेमाल कीयाना कोंदांग, कुदाड़ ओसो जमीन खुश मन्नो आयवड़। अदिन काजे उचुन प्रतिक्रांतिकारि किन जरूर हौकना, पिस्ता प्रतिक्रांतिकारि लोप्पटल उचुन मुल कुन गिरफ्तार कीयाना अनि उचुन कुन जनता ना नियंत्रण ते तासना।

2

कुल मिले कीसी हूड़तेके अंतरराष्ट्रीय परिस्थिति बेस मंता। उचुन समाजवादी ताकत जरूर मंता, मति इद्रम मत्तांकु बाताल आया मंता? दर्जनों साम्राज्यवादी ताकतकु मत्तेके वेरियाना जरूरत हिल्ले।

इजे रेंडु इलाकांग लोप्पा, पूर्वी योरोप ओसो मध्य-पूर्व ते, गड़बड़ आता। पोलैंड ओसो हंगरी ते उपद्रव आतांग², अनि ब्रिटिश, फ्रांस. तुर्की पोरो सशस्त्र आक्रमण कीतांग। नावा हिसाब ते इव रेंडासी पोल्लोंग गलत मंदांना संगे-संगे सही वेने मंतांग। मार्क्सवादिरा दृष्टिकोण ते गलत पोल्लो

ता दोहरा रूप मंदिता; उंदी बगिल अदु गलत मंता अनि दूसरा बगिल अदु सही मंदिता। “पोल्लो” शब्द ता मुन्ने “गलत” शब्द हूइसी ज्यादातर लोकुर सिर्फ गलत मंता इंजी आलिसंतोरा। मति माटु अदिना उंदी दूसरा पहलू वेने मंता इंतोम, इत्तेके उंदी गलत पोल्लो गलत मंदाणा संगे-संगे सही मंदिता। “असफलता सफलता तुन जनम हींता” इत्तेके इदे आंदू। हर असफलता, हर हार लेवेके हर गलती ता रिजल्ट उंदी खास परिस्थिति ते सही वेने मंदा परिंता। अदु पोलैंड आई लेवेके हंगरी आई अविना लोप्पा किस्स रगरग आया मंता अदिनके अवु बस्केने वेने तेदा परिंतांग। अद किस्स तुन पोत्ता हियाणा बेस मंता या हिल्ले? किस्स तुन कागज ते मूटा किया परमूडायो। अदु पोत्तिता इत्तेके बेसे आता। इद्रम हंगरी ते वेल्ले प्रतिक्रांतिकारी खुद एक्सपोज आतोरा। हंगरी ता घटना हंगरी ता जनता तुन शिक्षित कित्ता अनि संगेने सोवियत संघ ता उचुन कामरेड्स ओसो मना चीनी कामरेड्स किन वेने शिक्षित कित्ता। बेरिया ता पर्दाफाश आतास्के अश्चर्य आता। उंदी समाजवादी देश लोप्पा बेरिया ना जन्म बद्रम आया परता? काओ कांग ना पर्दाफाश आतास्के ओसो उंदी बेरा वेल्ले आश्चर्य आता। माटु इद्रमताए घटनांग लोप्पटल करियंतोम। इद्रता घटनांग हमेशा आसोरे मंतांग।

वायना कालम ते पूरा दुनिया लोप्पा सब्बे साम्राज्यवादिरा तख्ता पलट आतास्के ओसो वर्ग खत्म आतास्के वेने क्रांतिंग ना अस्तित्व मंदिता या? इदिना पोरो मीवा बाता विचार मंता? नावा हिसाब ते अस्के वेने क्रांति ना जरूरत मंदिता, अस्के वेने सामाजिक व्यवस्था ता बदलाव ता जरूरत मंदिता अनि “क्रांति” शब्द ता इस्तेमाल आसोर मंदिता। बदे डावुट हिल्ला अस्के क्रांति ता स्वरूप वर्ग-संघर्ष कालम ता क्रांति तुकू अलग मंदिता। मति अस्के वेने उत्पादन-संबंध ओसो उत्पादन शक्ति नडुमा ओसो पोरोटा ढांचा, आर्थिक आधार नडुमा ता अंतरविरोध अस्तित्व ते मंदिता। उत्पादन-संबंध अनुकूल हिल्लास्के अविन खत्म कीयाना अनिवार्य आंता। पोरोटा ढांचा (इदिना लोप्पा विचारधारा ओसो लोकमत शामिल मंता) जनता विचार कियवा उत्पादन-संबंध कुना रक्षा कीतेके

अविन बदले कीसीयाना। पोरोटा ढांचा खुद वेने उंदी रकम ता सामाजिक संबंध आंदू। अदु आर्थिक आधार पोरो नितसी मंदिता। आर्थिक आधार इत्तेके उत्पादन-संबंध, मालिकाना। उत्पादक शक्ति सबसे ज्यादा क्रांतिकारी तत्व मंदितांग। उत्पादन शक्ति विकसित आतास्के क्रांति जरूर आंता। उत्पादक शक्ति ना लोप्पा रेंडु तत्व मंदिता: मानव ओसो औजार। औजार मानेय बने कींतोरा। औजार क्रांति ता मांग कींतांग अस्के अवु पाड़ना उत्पादन-संबंध ओसो पाड़ना सामाजिक संबंध कुन तहस-नहस कीयाना मानेय लेवेके मजदूर लोरा संगे मांग कींतांग। “ईमानदार मानेय पोल्लो ना इस्तेमाल कींतोरा, मुक्का ना आयो” अनि समझे कीयाना सबसे बेसता तरीका आंदू। मति समझे कीतेके वेने समझेमायवेके हथियार संगे वड़का लागिंता। हथियार हिल्वेके बाता कीयाना? श्रमिक लोरा कैदे औजारकु मंतांग, औजार वेने हिल्वेके बंडांग ना इस्तेमाल कीयाना अनि बंडांग वेने हिल्वेके हर मानेय ना रेंडु मुड्वांग तो मंतांगे।

मना राजकीय अंग सर्वहारा तानाशाही ता अंग आंदू। उदाहरण तूका अदालत कुने हूडाटू। अविना काम प्रतिक्रांतिकारिना दमन कीयाना मंता मति ओरा सिर्फ इदे काम आयो ओरु जनता नडमा ता वेल्ले समस्यांग वेने हल कायना काम वेने किया लागिंता। वायना दस हजार साल एवनल वेने अदालत कुना जरूरत मंदिता। बारांकु इत्तेके वर्ग खत्म आता पेरके वेने विकसित आता लोकर ओसो पेरके अरता लोकरा नडमा अंतरविरोध मंदिता, लोकरा नडमा संघर्ष ओसो धक्का-मुक्की ना घटनांग वेने आसोर मंदितांग, रक-रकम ता गडबड आसोर मंदांना संभावना मंदिता। अदालत हिल्वेके वेल्ले गडबड पैदा आसोर मंदितांग! मति अस्के संघर्ष ता स्वरूप बदलेमांता, अदु वर्ग संघर्ष तुकू अलग मंदिता। अदालत कुना स्वरूप वेने बदलेमांता। अस्के वेने पोरोटा ढांचा लोप्पा गडबड पैदा आयना संभावना मंदिता। उदाहरण तुकू मावा लेक्कटा लोकर गलतिंग वेने कियानूर, संघर्ष तले हारेमायनूर, पद तल तेंडमूडायर, इद्रम बोरे गोमुल्का सत्ता कब्जा कियानूर लेवेके बोरे राओ शू-श किन तेहमूडायर। इद्रम ता पोल्लोंग आया

परवोंगा? नावा हिसाब ते इद्रम ता पोल्लॉग आसोर मंदिता उंदी हजार लेवेके दस हजार साल परेके वेने आसोर मंदितांग।

3

दुनिया लोप्पा सब्बे वस्तु लोप्पा विपरीत तत्व ता एकता आसोर मंदिता। विपरीत तत्व कुना एकता इत्तेके अलग स्वरूप वाले वस्तु ना संगे एकता। उदाहरण तुकू एर तुन हूडाटू, अदु हाइड्रोजन, आक्सीजन पोरोल ता रेंडु मूलतत्व ना एकता संगे बनेमांता। आक्सीजन लेवा सिर्फ हाइड्रोजन संगे एर बनेमाया परवो। इंजे एवनल दस लाख रकम ता मिक्सचर कुना पोरोल तासताद मंता, पोरोल हिल्ला मिक्सचर कुना इत्तेके बचोनो रकम मंदानुंग। सब्बे मिक्सचर अलग स्वरूप वाले ओसो विपरीत तत्व कुना एकता संगे बनेमांता। समाज लोप्पा मत्ता वस्तु वेने इद्रमे मंदिता। केंद्रीय अर्थोरिटी ओसो स्थानीय अर्थोरिटी नडमा ता संबंध कुना लोप्पा विपरीत तत्व कुना एकता मंदिता। अद्रमे बदे उंदी विभाग ओसो दूसरा विभाग नडमा ता संबंध लोप्पा वेने विपरीत तत्व कुना एकता मंदिता।

रेंडु देश कुना नडमा ता संबंध लोप्पा वेने विपरीत तत्वकु मंदिता। चीन ओसो सोवियत संघ रेंडासी समाजवादी देशकु आंदुंग। इव रेंडासी ना लोप्पा बदे अंतर हिल्ले या? इविना लोप्पा अंतर मंता। राष्ट्रियता ता दृष्टिकोण ते इव रेंडासी अलग मंदितांग। अगा 39 साल मुन्ने अक्तूबर क्रांति आता अनि मनम पूरा देश ता राजसत्ता ता जिम्मेदारी एतसी इंजी सिर्फ 7 सालके आतांग। रेंडासी देश कु कित्ता काम उंदी, दूसरा तुकू वेल्ले अलग मंता। उदाहरण तुकू मना कृषि ता सामूहिकीकरण बचोनो रकम ते कियमूडाता, इदु ओरकिनकु अलग मत्ता; अद्रमे पूंजीपतिरा पोरो मना नीति वेने ओरकिनकु अलग मंदाना संगेने हाटुम रेट संबंधित मना नीति वेने ओरकिनकु अलग मंता अनि उंदी पक्ष ते कृषि, सुडला उद्योग ओसो दूसरा पक्ष ते बेहरा उद्योग कुना संबंध कुन हल कीयाना मना तरीका वेने ओरकिनकु अलग मंता; अद्रमे मना सेना ता व्यवस्था ओसो पार्टी

व्यवस्था वेने अलग मंता। माटु ओरकिन ओरा उचुन काम तुकू सहमत हिल्लेम ओसो समस्या हल कीयाना मीवा तरिकांग कुन वेने अनुमोदन कीवोम इंजी वेहचितोम।

उचुन कामरेड्स द्वन्द्ववाद पोरो ध्यान हीवोर अनि वस्तु ना विश्लेषण कीवोर आंतोर। ओरु सोवियत संघ ता सब्बे वस्तु किन बेस वेहितोर अनि अविना यांत्रिक तरिका ते प्रतिरोपण कींतोर। असल इत्तेके सब्बे वस्तुना इत्तेके अदु चीनी आई लेवेके विदेशी आई विश्लेषण कीयाना आंता। उचुन वस्तुंग बेस मंदिता अनि उचुन गलत मंतांग। हर प्रांत ता काम वेने इद्रमे मंदिता, अदिना लोप्पा सफलतांग ओसो विफलतांग रेंडासी मंदितांग। इदे मावा लोप्पाटल हर मानेयना बारे ते वेने सच्चाई आंदू; माटु सब्बे तोरा सिर्फ उंदी आयवा रेंडु पहलू मंदिता, बेसता ओसो लब्बड़ तावु। हर चीज ता सिर्फ उंदे पहलू मंता, प्राचीन कालम तल वात्ता इंदाना सिद्धांत ओसो हर चीज ता रेंडु पहलू मंदितांग, प्राचीन कालम तल वातांग इंदाना सिद्धांत वेने मंता। इविन तीरम-तीरम अधिभौतिकवाद ओसो द्वन्द्ववाद इंतोम। चीन ता वरोर पाडना मानेय “पांडरी ओसो कारियल हर चीज लोप्पा मंदिता”³ पांडरी लेवा कारियल ता अस्तित्व मंदाना संभव मंता ओसो कारियल लेवा पांडरी ता अस्तित्व मंदाना संभव मंदिता इंजी वेहतोर। इद उंदी प्राचीन सिद्धांत आंदू, इदि रेंडासी पहलुंग कुन मानेमांता। अधिभौतिकवाद सिर्फ उंदी पहलु ता अस्तित्व तुन मानेमांता। इद इंजे वेने वेल्ले कामरेड्स ना लोप्पा मंता। ओरु वस्तु तुन उंदी बगिल तल हूडिंतोर अनि सोवियत संघ ता हर वस्तु सही मंदिता इंजी आल्सिंतोर अनि अदिना अंधाधुंद लागू कीयाना शुरू कींतोर। इदिना उल्टा माटु लागू कियवा लेक्कटा वेल्ले वस्तुंग तेंडसी तत्तोम। इद भूमि संगे मेल तिनवावु ओसो चुकसी लागू किताविन बदले कीसीतोम।

इगा नन्ना “विदेशीरा संगे गैर कानूनी संबंध तासना” सवाल बारे ते वेहाकाना। मना देश लोप्पा केंद्रीय कमेटी ता मोरकुल पेरके विदेशिर किन सूचना हियाना लोकर वेने मंतोरा? नावा हिसाब ते इद्रम ता लोकर जरूर

मंतोरा। काओ कांग इदिना सही उदाहरण मंता। इदिना बारे ते वेल्ले तथ्य संगे साबित आता।

24 दिसम्बर 1953 ते काओ कांग ना पर्दाफाश कियाला काजे आता केंद्रीय कमेटी ता राजनीतिक ब्यूरो ता विस्तृत अधिवेशन लोप्पा नन्ना पेकिंग शहर लोप्पा रेंडु डेरंग मत्तांग, उंदी माटु सब्बे तोरा डेरा ओसो ताना लोप्पा किरंगता वेडिय वांता अनि किस्स वेने पोत्तिंता इंजी घोषणा कितान; इदिना उल्टा, दूसरा डेरा उंदी गुप्त डेरा मंदिता अनि अदु वेने उंदी रकम ता वडिय हींता अनि उंदी रकम ता किस्स वेने पोत्ती किंता। चीन ता उंदी क्लासिकी उपन्यास ता महिला ना भूमिका लिन ते-य्वी वेहता लेक्का “पूर्वी ता वडिय, पश्चिम ता वडिय तुन जीडिंता लेवेके पश्चिम वडिय, पूर्वी ता वडिय तुन जीडिंता”। वर्तमान कालम ते बेसता वडिय ओसो बेसता किस्स लब्बड़ ता वडिय ओसो लब्बड़ ता किस्स तुन दबे कींता लेवेके लब्बड़ ता वडिय लब्बड़ ता किस्स बेसता वडिय ओसो बेसता किस्स तुन दब्बे कींता। लब्बड़ ता वडिय हियाना ओसो लब्बड़ ता किस्स पोत्ती कीयाना दूसरा डेरा ता उद्देश्य बेसता वडिय तुन हारे कीयाना अनि बेसता किस्स तुन पिहहतना, इत्तेके उंदी बेहरा संख्या ते लोकरु किन खत्म कीयाना मंता।

उच्च पद ओसो मध्यम पद कुने काम कीयाना मना कार्यकर्ता लोरा लोप्पा इंजे वेने उचुन संख्या ते विदेशीरा संगे गैर कानूनी संबंध तासनोर मंतोरा। इद बेसता पोल्लो हिल्ले। मीटु सब्बे तोर पार्टी नेतृत्वकारी ग्रुप, केंद्रीय विभाग कुना पार्टी कमेटिंग ओसो संगेने प्रांत, म्युनिसिपलटी, स्वायत्त प्रदेश कुना स्तर ता पार्टी कमेटिंग लोप्पा सब्बे तोर किन स्पष्ट रूप ते ओरु इद्रम कीयाना जरूर बंद कीयाना इंजी वेहचियाना। माटु सोवियत संघ लोप्पा कीयाना उचुन काम कुना समर्थन कीवोम अनि इद पोल्लो केंद्रीय कमेटी सोवियत नेताल लोर बचोनो बेरा वेहचिता; उचुक सवाल कुन (अविना बारे ते माटु वेहताद हिल्ले) पेरके तेहतोम। अव सवाल कुन केंद्रीय कमेटीए तेहना। ओरकिन सूचना हियाना कोशिश कीयानायो। इद्रम ता सूचना वेल्ले अंगडम मंदितांग, अवु सिर्फ नुकसान कींतांग। इद्रम ता

सूचनांग रेंडासी पार्टिंग ओसो रेंडासी देश कुना नडमा ता संबंध कुन मोदोल तिंची कोयसिंतांगा। इद्रम कीसोर मत्ता लोकर खुद वेने वेल्ले मुशिकल परिस्थिति ते अरिंतोर। ओरु इद्रम ता काम पार्टी तुकू मकसी किंतोर, अदिनके ओरा मन हमेशा अपराधिरा विचार लेक्कानिडसी मंदिंतांगा। सूचना हीता लोकर तन्ना गलती मानेमायना अनि समस्या ता हल कीयाना लेवेके जांचपडताल संगे अपराध साबित आतेके ओरकिन पूरा सजा हियमूडायरा।

नन्ना सोवियत संघ ता कम्युनिस्ट पार्टी ता बीसवी कांग्रेस ता बारे ते उचुन पोल्लोंग कियाकाना। नावा हिसाब ते अगा रेंडु “तलवार” मंतांगः वरोर लेनिन ओसो दूसरा स्टालिन। स्टालिन रूप ता तलवार तुन इंजे रूसी लोकर वाटसितोर। मति गोमुल्काल हंगरी ते ओसो उचुन लोकर सोवियत संघ ता हत्या कियाला ओसो स्टालिनवाद ता विरोध कियाला काजे तेहतोर। योरोप ता वेल्ले देश कुना कम्युनिस्ट पार्टिंग वेने सोवियत संघ ता आलोचना किया मंतांग अनि अविना नेतालल तोगलियाती आंदुर। साम्राज्यवादीर वेने जनता तुन हौकला काजे इद तलवार ता इस्तेमाल कींतोर, उचुन जोम काजे डलेस इंदिन मेसियता लेक्का। इद तलवार उधार हीताद हिल्ले अदिन अलग वाटसिताद मंता। माटु चीनी लोर इदिन अलग वाटसिताद हिल्ले। पहली पोल्लो माटु स्टानिल ना रक्षा कींतोम, दूसरा पोल्लो माटु अदिना गलतिंग ना आलोचना वेने कींतोम, माटु “सर्वहारा तानाशाही ता ऐतिहासिक अनुभव ता बारे ते” हेडिंग वाले लेख वेने रास्तोम। लोकर स्टालिन किन बदनाम कीयाना ओसो नष्ट कीयाना अंगडम कोशिश किंतोर, ओरा खिलाफ माटु असल परिस्थिति अनुसार काम किया मंतोम।

लेनिन रूप ते तलवार तुन वेने उचुन सोवियत नेताल लोर उचुन वेने अलग वाटताद हिल्ले या? नावा हिसाब ते अदिन वेने उचुन अलग वाटसिताद मंता। अक्तूबर क्रांति इंजे वेने क्रांति इंजे वेने बेसे मंता? अदु इंजे वेने सब्बे देश कुना काजे आदर्श बनेमाया परिंता? सोवियत संघ ता कम्युनिस्ट पार्टी ता बीसवी कांग्रेस लोप्पा पेश किता खुश्चोव ना रिपोर्ट

लोप्पा संसदी हरीं ते राजसत्ता तत्ताना, इत्तेके इंजे सब्बे देश कुना अत्तूबर क्रांति तल करियाना जरूरत हिल्ले। बेगा उंदी बेरा हरीं तेरियंता अगा लेनिनवाद तुन बुनियादी रूप ते विड़समूड़ांता।

लेनिनवाद ता सिद्धांत मार्क्सवाद ता विकास कित्ता। अदु इदिना विकास बद-बद इलाका लोप्पा कित्ताद मंता? पहली, विश्व-दृष्टिकोण, इत्तेके भौतिकवाद ओसो द्वन्द्ववाद लोप्पा; दूसरा, क्रांतिकारी सिद्धांत, कार्यनीति लोप्पा, विशेष रूप ते वर्ग-संघर्ष, सर्वहारा तानाशाही ओसो सर्वहारा वर्ग ता राजनीतिक पार्टी लेक्कटा समस्यांग लोप्पा। इदे आयवा समाजवादी निर्माण ता बारे ते वेने लेनिन ना शिक्षा मंता। निर्माण-कार्य 1917 ता अत्तूबर क्रांति तल शुरू आता पेरके क्रांति ताकनास्के लगातार ताकसोर मत्ता अनि इद्रम लेनिन किन निर्माण-कार्य लोप्पा 7 साल ता व्यवहारिक अनुभव दोरकता इदु मार्क्स किन दोरका परवो आता। मार्क्सवाद-लेनिनवाद ता इदे बुनियादी उसूल तुन माटु करियतोम।

जनवादी क्रांति ओसो समाजवादी क्रांति इव रेंडासी क्रांति लोप्पा माटु वर्ग-संघर्ष ताकी कियाला काजे जनता तुन उंदिकट कीतोम अनि अस्केने जनता किन शिक्षित कीतोम। वर्ग-संघर्ष ताकी कियाना माटु अत्तूबर क्रांति तल करियतोम। अत्तूबर क्रांति ताकनास्के (शहर आई, नाहकुना आई) जनता तुन वर्ग संघर्ष ताकी कियाला काजे पूर्ण रूप ते गोलबंद कित्ताद मंता। सोवियत संघ नेंडु विशेषज्ञ लेक्का विभिन्न देश कुना लोप्पा लोहता लोकर अत्तूबर क्रांति ताकनास्के सिर्फ पेकोरे मत्तोर ओरा लोप्पटल वेल्ले लोकर इद व्यवहार तुन मरंगतोर। उचुन देश कुना कामरेड्स चीन ता जन दिशा सही हिल्ले। ओरु पितृसत्तावादी रुझान पोय्यला विचार कींतोर। ओरु इद्रम कियाला आल्सतेके ओरकिन रोमी किया परमूडायो; माटु शांतिपूर्ण पिस्वल ता 5 सिद्धांत कुना पालन कीतोम, उंदी दूसरा ता अंदरूनी समस्या लोप्पा दखल हीवोम अनि वरोर दूसरो ना पोरो आक्रमण कीवोम। मना देश आयवा इत्तेके चीन लोक गणराज्य आयवा बदे दूसरा देश ता नेतृत्व कियाना मना बदे उद्देश्य हिल्ले।

पूर्वी योरोप ता उचुन देश कुना बुनियादी समस्या अवु वर्ग-संघर्ष ताकी कीयाना काम बेस किताद हिल्ले अनि वेल्ले प्रतिक्रांतिकारीर किन खुला विडसतोर; ओरु सर्वहारा वर्ग तुन वर्ग-संघर्ष ते प्रशिक्षित कीवोर अनि जनता ओसो दुश्मन नडमा सही ओसो गलत नडमा, आदर्शवाद ओसो भौतिकवाद नडमा स्पष्ट विभाजन-रेखा बद्रम पिडंगना इंजी करियला मदद किता। ओरु बद्रम ता विज्जा वीतितोर अद्रम ताए पंडिहतोर, ओरु वाटता किस्स ओरकिने पोत्ती किया मंता।

मीवगा बचोन पूंजी मंता? सिर्फ लेनिन ओसो स्टालिने मंतोर। इंजे मीटु स्टालिन किन त्याग कीतिर असल ते लेनिन किन वेने लगभग पूराए विडसतिर; इंजे लेनिन ना काल हिल्ले, ओना तल्ला पिस्ताए लेवेके ओना कैकु कोयसिताद मंता। माटु मार्क्सवाद-लेनिनवाद ता अध्ययन कीयाना ओसो अक्तूबर क्रांति तल करियाना हरीं पोरो नितसी मंतोम। मार्क्स मावा काजे वेल्ले लेख रास्तोर अनि लेनिन वेने रास्तोर। जनता पोरो आधार आसी मंदाना, जन दिशा पालन कीयाना - सब्बे माटु अविनगडले करियतोम। वर्ग-संघर्ष ताकी कीयाना लोप्पा जनता पोरो आधार आसी मनवेके जनता ओसो दुश्मन नडमा उंदी स्पष्ट विभाजन-रेखा पिडंगना वेल्ले खतरनाक मंदिता।

4

विभाग प्रधान लेवेके ब्यूरो प्रधान ना स्तर ते उचुन बुद्धिजीवी कार्यकर्ता वेल्ले जनवाद ता पक्ष एतितोर; ओरु अल्प जनवाद संगे ज्यादा खुश मंदितोर। ओरा “बेहरा जनवाद” इत्तेके पश्चिम ता पूंजीवादी संसदीय प्रणाली तुन लागू कीयाना अनि “संसदीय जनवाद”, “प्रेस ता आजादी” ओसो “वडकना आजादी” लेक्कटा पश्चिम ता वियार ता नकल कीयाना। ओरा इद विचार गलत मंता, बारांकु इत्तेके अदिना लोप्पा मार्क्सवादी दृष्टिकोण ओसो वर्ग-दृष्टिकोण ता कमी मंता। मति बेहरा जनवाद ओसो

अल्प जनवाद वेल्ले सजीवता तोहना शब्द आंदू अदिन काजे माटु अविन किन पोयताद मंता।

जनवादी उंदी तरीका आंदू, इदिना निर्णय बदिना पोरो ओसो बद उद्देश्य ते लागू आंता इंदाना पोरो आधार आसी आंता। माटु बेहरा जनवाद ता पक्ष एतितोमा। माटु सर्वहारा वर्ग ता नेतृत्व ते लागू कीयाना जनवाद ता पक्ष एतितोमा। माटु जनता तुन गोलबंद कीसी च्यांग काई-शोक संगे टक्कर एतितोम अनि 20 साल तुकू ज्यादा संघर्ष कित्ता पेरके ओनकिन खत्म कीतोमा। भूमि-सुधार आंदोलन लोप्पा किसान जनता जमींदार वर्ग खिलाफ तेदता अनि 3 साल संघर्ष कित्ता पेरके जमीन दोरकी कित्ता। इव सब्बे बेहरा जनवाद ता उदाहारण आंदू। “मूंड गलतिंग” विरोधी आंदोलन पूंजीपति वर्ग ता भ्रष्ट-व्यवहार कीयाना कर्मचारिा खिलाफ ताकी कित्ता संघर्ष मत्ता। “हेय्युंग गलतिंग” विरोधी आंदोलन पूंजीपति वर्ग खिलाफ ताकी कित्ता उंदी संघर्ष मत्ता। इव रेंडासी आंदोलन कुना लोप्पा निर्ममता ते ताकी कित्ता संघर्ष मत्ता। इव सब्बे जोरदार ताकी कित्ता जन-आंदोलन मत्तांग अनि बेहरा जनवाद ता उदाहरण मत्तांग। उचुन दिव्या मुन्ने, आंग्ल-फ्रांसीसी आक्रमण खिलाफ मिस्र ता प्रतिरोध ता समर्थन कियाला काजे जनता चीन ते मत्ता ब्रिटिश कार्यदूत ता कार्यालय कुना मुन्ने प्रदर्शन कीतांग अनि बचोनो लाख लोकुर पेकिंग ता थ्येनआनमन मैदान ते उंदी रैली तेंडतांग। इद वेने बेहरा जनवाद ताए उंदी उदाहरण मत्ता, इदिना हमला ता निशाना साम्राज्यवाद मत्ता। इद्रम बेहरा जनवाद तुन माटु बारांकु विचार कीयानायो? माटु अदिन निज्जमे विचार कीतोमा। इद जनवादी हमला ता निशाना बोरु? इदिना हमला ता निशाना साम्राज्यवाद, सामंतवाद ओसो नौकरशाही पूंजीवाद ओसो पूंजीवाद मंता। निजी समाजवादी बदलाव ता उद्देश्य वेने सुडला उत्पादक लोरा निजी मालिकाना तुन समाप्त कीयाना मत्ता, स्वरूप ता दृष्टि ते पूंजीवाद-विरोधी मत्ता। माटु जन आंदोलन ता तरीका पोयसी कृषि ता समाजवादी बदलाव कीतोम, किसान लोर किन मुख्य रूप ते मुन्ने गरीब, निम्न-मध्यम किसान लोर किन खुद संगठित आयला काजे उंदिकट कित्ता अद्रमासी उच्च-मध्यम किसान लोरा मुन्ने

वेने सहमत आयना विड़चसी दूसरा बदे हरीं हिल्ला मत्ता। पूंजीपतिरा बारे ते हूइतेके ओरु ढोल-नंगाड़ा नेकी कीसोरे समाजवादी बदलाव ता स्वागत कींतोर बारांकु इत्तेके नाहकुना लोप्पा समाजवादी ज्वार तेदिंता अनि तन्ना दोड़ मत्ता मजदूर लोरा दबाव मत्तांकु पूंजीपतिरा मुन्ने इद्रम कीयाना विड़चसी दूसरा बदे हरीं हिल्ला मत्ता।

इंजे बेहरा जनवाद ओसो उंदी बेरा अमल कीतेके नन्ना अदिना समर्थन कींताना। मीटु जनता ना हरदे ताकला वेरियंतिर मति नन्ना वेरियोन, बचोनो लाख लोकर इद्रम कीतेके वेने वेरियोना “हजारो नोमुर्क आता पेरके वेने हामुर तुकु वेरिया मंतोर ओरे शंहशाह किन कोडा तल दोड़ रेहना हिम्मत किया परिंतोरा” इद पोल्लो चीन ता क्लासिकी उपन्यास ता महिला भूमिका वांग शी-फंग इत्ता, अदिन फंग हेलो इंजी वेने इंदानोरा सर्वहारा वर्ग कीयाना बेहरा जनवादी हमला ता निशाना वर्ग-दुश्मन आंदू राष्ट्र ता दुश्मन (साम्राज्यवाद ओसो विदेशी इजारेदार पूंजीपतिर किन विड़चसी दूसरा बोरे आयोर) वेने वर्ग-दुश्मने आंदुरा बेहरा जनवादी हमला निशाना नौकरशाह लोर किन वेने बने कियमूड़ांता। इंजे-इंजे नन्ना इत्ता लेक्का नेटल दस हजार साल पेरके वेने क्रांति मंदिंता अनि अस्के वेने बेहरा जनवाद ता अमल जरूरी मंदिंता। उचुन मुल पिस्वल तल हारेमासी नौकरशाह बनेमातेके, ओरु जनता संगे कलियतास्के बदे जीवा ता पोल्लो वड़कवा लेवा सिर्फ रांगसोरे मत्तेके, ओरु जनता ना बदे वेने समस्या तुन हल कियवेके ओरकिन जरूर खत्म कीसीयाना। इंजे वेल्ले खतरा मंता। मीटु जनता तल अलग-थलग आतेके ओसो ओरा समस्या तुन हल कियवेके किसान लोर तम्मा बहंगी ना संगे हमला कियानूर, मजदूर सड़क ते वासी प्रदर्शन कियानूर अनि विद्यार्थी उपद्रव निल्पी कियानूर। बेगा इद्रम ता घटनांग आंतांग अगा मुन्ने बेसता पोल्लोंग समझेमायना जरूरी मंता।

इद उचुन साल मुन्ने, हनान प्रांति ता बदे जागा ते उंदी हवाई अड्डा बने कीयाना मत्ता। मति अगा मंदाना किसान लोर किन अद जागा तल गुच्चला काजे मजबूर किताद मत्ता अनि इदिनकु मुन्ने ओरा काजे बदे दूसरा बेसता जागा ता बंदोबस्त कीयाना लेवेके ओरकिन स्पष्ट रूप ते

समझे कीयाना किताद हिल्ले। अद नाटे ना किसान लोर मीटू मर्रा पोरो बने माता पिट्टे गूडा तुन लाटी संगे अरिहतेके पिट्टे वेने उंदी-रेंडु बेरा कोल्हार जरूर पोयंता इतोर। मीवा वेने उंदी गूडा मंता तंग श्याओ-फिंग साहब, ओसो माटु वेने अदिन तहस-नहस कीतेके मीटु रेंडु-मूंड बेरा कोल्हार कियवीर आंतिरा? अदिन काजे अगाटा जनता मूंड रक्षा-फार्मेशन निल्पी कीता: पहली, पिल्ला-पेकोरा मत्ता, दूसरा महिला लोरा ओसो तीसरा लैय्या-लेयोरा। अगा सर्वेक्षण कियाला हतोर सब्बे तोर किन पूंडसी किसान तम्मा सफलता दोरकी कितोर। ताना पेरके किसान लोर गिरदा ते समझे कीसी ओरा काजे दूसरा जागा ता बंदोबस्त कीतेके ओरु अद जागा तल गुच्चला तैयार आतोर अनि हवाई अड्डा ता निर्माण कियमूडाता। इद्रम ता उदाहरण कम मंतांग। इंजे उचुन मुल राजसत्ता दोरकी कितोर वेने मंतोर अदिन काजे ओरु वेल्ले आराम ते हुंजा परितोर विचार वात्ता लेक्का मंदा परितोर। जनता इद्रम तोरा विरोध कीता, ओरा पोरो बंडांग वाटिता अनि कुदाइ संगे हमला कीता अनि नावा हिसाब ते इद्रम कीयाना बेस आयार नाकिन वेल्ले खुशी आयार। इदे आयवा बस्के-बस्के समस्या ता समाधान सिर्फ लडेमासीए तेंडमूडांता। कम्युनिस्ट पार्टी तुन सबक एतना जरूरत मंता। बस्के विद्यार्थीर ओसो मजदूर सडक ते पेस्तेके मीटु सब्बे तोर अदिन बेस समझेमायना। छंगतू ता उंदी सौ विद्यार्थीर तम्मा याचिका पेश कियाला काजे पेकिंग वायला आल्सतोर, मति उंदी रेलगाडी ते दायना-वायना विद्यार्थीर किन सछवान प्रांत ता क्वांगय्वान स्टेशन ते रोमी कियमूडाता अनि दूसरा रेलगाडी तल दायना-वायना विद्यार्थीर सिर्फ लोयांग एवनल एव्वा परतोर मति पेकिंग एव्वा परवोर आतोर। नावा ओसो प्रधानमंत्री चओ ना विचार वीर विद्यार्थीर किन पेकिंग वायना ओसो संबंधित विभाग कुना अधिकारिरा संगे मुलाकात कीयाना अनुमति हियाना इंजी मंता। मजदूर लोर हड़ताल कीयाना ओसो जनता तुन प्रदर्शन कीयाना अनुमति हियाना जुलूस तेंडना अनि प्रदर्शन कीयाना मना संविधान लोप्पा अधिकार मंता। नावा हिसाब ते वायना कालम ते बस्केनाई संविधान लोप्पा संशोधन कीतेके ताना लोप्पा मजदूर लोरा काजे

हड़ताल कीयाना आजादी वेने जोड़े कीयाना। इद्रम उंदी पक्ष ते राज्य, कारखान ता निर्देशक, दूसरा पक्ष ते जनता नड़मा ता अंतरविरोध तुन हल कियाला मदद आंता। असल इत्तेके अवु अंतरविरोध के आंदुंगा। दुनिया अंतरविरोध संगे निंडसी मंता। जनवादी क्रांति साम्राज्यवाद, सामंतवाद ओसो नौकरशाही-पूंजीवाद संगे मना अंतरविरोध ता उंदी समूह तुन हल कित्ता। नेंडु मालिकाना बारे ते मना ओसो राष्ट्रीय पूंजीवाद नड़मा ओसो मना अनि सुडला स्तर ता उत्पादन कुना नड़मा ता अंतरविरोध कुन बुनियादी रूप ते हल कित्ताद मंता बाकी पूना अंतरविरोधकु पोरोर तेदसी वातांगा। काउंटी ता पार्टी कमेटींग ओसो अदिना पोरो स्तर ता कार्यकर्ता लोरा संख्या बचोनो लाख मंता। इदिना जिम्मेदारी ओराए कैदे मंता। ओरु बेस काम कीतेके, जनता तल अलग-थलग आयनूर अनि सादा पिस्वल पिस्सनूर कठोर परिश्रम कियवेके मजदूर, किसान ओसो विद्यार्थिरंगा ओरकिन अस्वीकार कीयाना पूरा कारण मंदिता। माटु नौकरशाहाना कार्यशैली, जनता तल अलग-थलग आयवा मंदाना इंजी सतर्क मंदाना। बोर नौकरशाही पोरो अमल कींतोर जनता ना समस्या तुन हल कीवोर, लोकुर किन रांगसोर मंतोर, ओरा पोरो अत्याचार कींतोर, खुद किन सुधरे कीयाना कोशिश कीवोर ओरकिन तम्मा पद तल गुच्चिह कियमूडांता। नावा हिसाब ते इद्रम तोर किन गुच्चिह कीयाना वेल्ले बेस मंदिता।

इंजे जनवादी पार्टींग ओसो पूंजीपति वर्ग सर्वहारा वर्ग ता बेहरा जनवाद ता विरोध कींतोर। माटु ओसो उंदी बेरा “हेय्युंग गलतिंग” विरोधी आंदोलन ताकी कीतेके ओरकिन विचार वायो। ओरु बेहरा जनवाद तुन लागू कीतेके जनवादी पार्टींग ना बहिष्कार कीसी अविन दीर्घकालीन ताकी कीयाना मौका दोरकियार इंजी वेरियंतोर। प्रोफेसर लोर बेहरा जनवाद तुन विचार कींतोर? कीवोर इंदाना मुश्किल मंता। मति नावा हिसाब ते ओरु इदिनगडल सतर्क मंतोर ओरु वेने सर्वहारा वर्ग ता बेहरा जनवाद तल वेरियंतोर। ओरु पूंजीपति वर्ग ता बेहरा जनवाद तुन लागू कीतेके नन्ना शुद्धीकरण इत्तेके विचाराधारात्मक पूना-बदलाव ता प्रस्ताव तासकाना। अविना आलोचना कियाला काजे सब्बे विद्यार्थिर किन

गोलबंद आचार, हर कालेज उंदी जांच-चौकी बने कियमूड़ायर सिर्फ अस्केने ओरा समस्या तुन खत्म कियमूड़ायर। अदिन काजे प्रोफेसर लोर वेने सर्वहारा वर्ग ता जनवाद तल वेरियंतोर।

इगा नन्ना ओसो उंदी विषय ता, इत्तेके दलाई ता समस्या ता बारे ते वेहाकाना महात्मा बुद्ध ना निर्वाण तुन ढाई हजार साल आता, इंजे दलाई लामा, ओरा संगे तोर किन श्रद्धांजलि अर्पित कियाला भारत देश दायला आल्संतोर। माटु ओरकिन दायला हियाना या आयो? केंद्रीय कमेटी ता अनुसार दायला हियानाए बेस आचार। उचुन दिव्यांग पेरके दायनू। माटु ओरकिन हवाई जहाज ते दायना सलाह हीतोम मति ओरु इनकार कितोर अनि कार तेने कालिपोंग¹ तले दायला आल्सतोर अगा विभिन्न देश कुना गुप्तचर ओसो क्वोमिंगतांग ता जासूस लोर मंतोर। मुन्ने ने दलाई वापिस वायोर बहे इंजी अंदाजा वाटना जरूरी मंता इदे आयवा ओरु लगातार मावा पोरो “कम्युनिस्ट लोर तिब्बत पोरो आक्रमण कितोर” आरोप वाटसोर मंदानूर अनि भारत लोप्पा “तिब्बत ता स्वतंत्रता” ता घोषणा वेने कीयाना लेक्का मंतोर। तिब्बत ता बेहरा समूह प्रतिक्रियावादी तत्व कुन बेहरा स्तर ते गड़बड़ कियाला भड़के कीयाना संभव मंता अदिनके मुन्ने इदा बारे ते अंदाजा वाटना जरूरी मंता। माकिन अगाटल पंडसी खुद माटु अगा हिलवा मंदाना ता बहाना पंडसी जिम्मेदारी तल बचेमायना कोशिश कींतोर। ज्यादा से ज्यादा लब्बड़ परिस्थिति वातेके वेने नन्ना खुश आयकाना तिब्बत ते मत्ता मना कार्य-कमेटी ओसो फौजी सेक्शनकु तैयार मंदाना, किलेबंदिंग ना निर्माण कीयाना, हालनाचोन अनाज, एर जमा कीयाना जरूरी मंता। अगा मना सिर्फ उचुने सैनिक लोर मंतोर; बद्रमाई हर पक्ष तन्ना विचार वात्ता लेक्का कार्यवाही कीयाना आजादी मंता। माटू लड़ेमायला आल्सतेके माटु बचाव कियाला तैयार मंदितोम; मीटु आक्रमण कीतेके माटु आत्मरक्षा कियाकोम। माटु बस्केने मुन्ने आक्रमण कीयानायो ओरकिन आक्रमण कियाला हियाना अनि पेरके ओरा पोरो भीषण हमला संगे आक्रमणकारिरा पल्कू होव्वियी कीयाना। वरोर दलाई वित्तितेके नाकिन दुक्कम आंता या? नौ दलाई ओसो वेने शामिल आतेके

कुल दस दलाई वित्तितेके वेने नाकिन दुक्कम आयो आयारा। माकिन चांग क्वो-थाओ वित्तितास्के वेने बाताले आयवा अनुभव मंता। मीटु वरोर कोयतोर अनि उंदी आंचड तुन काल्पसी दोहची मुत्ते-मुज्जल बने किया परविर। ओनकिन वरोर वेने जीवा कीवोर इंदानास्के ओनकिन अगाटल दायला हियाना। ओरु हत्तेके माकिन बाताले नुकसान आंता या? बाताले आयो। ओरु मना खिलाफ रांगाड़ पाटा पारना विड़चसी दूसरा बाताले किया परवो। मना कम्युनिस्ट पार्टी खिलाफ 35 साल एवनल मुंगताद मंता। इद रांगाड़ पाटा लोप्पा वेने इद्रमताए इत्तेके कम्युनिस्ट पार्टी “वेल्ले खतरनाक” मंता, अदु “सम्पत्ति ओसो महिला लोरा किन सब्बेतोरा संपत्ति बने कींता”, “वेल्ले पाश्चिक ओसो अमानवीय मंता” इंदान लेक्कटा पाड़ना ओसो अंगडम पोल्लोंग मंता। रांगानोरा लोप्पा वरोर दलाई लेवेके बोरे दूसरा मानेय शामिल आतेके बोनाए कोडेंग करवोंग आंतांग। रांगाड़ पाटा 35 साल एवनल जारी मत्तेके कुल मिले कीसी सिर्फ 70 सालके आयनुंगा। नावा हिसाब ते रांगना तुकू वेरियतेके बेस आयो। उचुन मुल गुप्त सूचना ता एक्सपोज आयना तुकू वेरियंतोरा। च्यांग क्वो-थाओ किन वेने वेल्ले गुप्त सूचना ना जानकारी मत्ता या? मति च्यांग क्वो-थाओ गुप्त सूचना ना एक्सपोज आतांकु मना बदे काम गड़बड़ आता पोल्लो बस्केने केंजा वात्ताद हिल्ले।

मना पार्टी लोप्पा दसियों लाख अनुभवी कार्यकर्ता मंतोरा। ओरा लोप्पा ज्यादातर कार्यकर्ता लोर बेस मंतोरा ओरा जन्म ओसो पालन-पोषण मना मातृभूमि ता कोरा ते आता अनि ओरु जनता संगे घनिष्ठ सम्पर्क तासिंतोर अनि दीर्घकालीन संघर्ष कुना लोप्पा सही साबित आतोरा। मनगा पार्टी स्थापना कालम ते उत्तरी अभियान कालम ओसो भूमि-क्रांति युद्ध, जापानी आक्रमण विरोधी युद्ध, मुक्ति-युद्ध कालम ते, मुख्यभूमि ता मुक्ति पेरके क्रांति लोप्पा शामिल आता कार्यकर्ता लोरा उंदी पूरा सेना मंता। वोरु सब्बे तोर मना देश ता मूल्यवान निधि आंदू। पूर्वी योरोप ता उचुन देश कुना परिस्थिति लोप्पा ज्यादा स्थायित्व हिल्ला मंदाना उंदी मुख्य कारण ओरगा इद्रम ता कार्यकर्ता लोरा उंदी पूरा सेना हिल्ला मंदाना वेने मंता।

मनगा क्रांति ता विभिन्न कालम ते सही साबित आता कार्यकर्ता लोरु उंदी पूरी सेना मंता, अदिन काजे माटु “वायना वडिय ओसो तेदना लहर कुना लोप्पा वेने नाडिया-नाव पोरो होलेमायवा लेवा उदला” तैयार मंदिंतोमा माटु वेल्ले आत्मविश्वास संगे जरूर मंदाना। माटु साम्रज्यावाद तुकू वेने वेरियोम इंदानास्के बेहरा जनवाद तले बारांकु वेरियंतोम? विद्यार्थिर सडक ते पेसला बारांकु वेरियाना? इद्रम मत्तेकाई मना पार्टी-सदस्य लोरा लोप्पा उचुन मुल बेहरा जनवाद तल वेरियंतोर अनि इद पोल्लो बेस आयो। बेहरा जनवाद तल वेरियानोर नौकरशाह काजे ओरु मार्क्सवाद ता बेस अध्ययन कीयाना अनि तम्मा व्यवहार का लोप्पा सुधार कीयाना।

माटु वायना साल उंदी शुद्धीकरण आंदोलन ताकी कीतोमा मूंड गलत कार्यशैली ना सुधार किया लागियर: 1) मनोगतवाद, 2) संकीर्णतावाद ओसो 3) नौकरशाही। केंद्रीय कमेटी ता निर्णय कुना पेरके मुन्ने उंदी सरकुलर जारी कियमूडायर, ताना लोप्पा विभिन्न पॉइंट कुना उंदी सूचना बने कियमूडायर। उदाहारण तुकू नौकरशाही लोप्पा बचोनो मुद्दांग शामिल मंतांग, कार्यकर्ता लोर ओसो जनता ना संगे सम्पर्क कियवा मंदाना, परिस्थिति ता जानकारी एतला काजे दोड़ता शाखांग लोप्पा हनवा मंदाना अनि जनता ना सुख-दुःख ते हिस्सा एतवा मंदाना ओसो भ्रष्टाचार ओसो फिजूलखर्ची लेक्कटविना पोरो अमल कीयाना लेक्कटवु शामिल मंतांग। वायना साल ता पहली 6 महिनांग लोप्पा इद सरकुलर जारी कीतेके दूसरा 6 महिनांग लोप्पा शुद्धीकरण आंदोलन शुरू कियमूडंता अनि इदे नडमा बचोनो साल कुना टाईम दोरकिंता। बोरो सार्वजनिक धन ता गबन कित्तोर ओरु तन्ना गलती मानेमायना अनि इद्रम कीयानास्के अदिन वापिस कीयाना, लेवेके पेरके किस्त संगे निहहतना, इद्रम किया परवेके ओसो बदे तरिका हिल्लेके ओरकिन माफ वेने कीयाना आंता; इव मूंड तरिकांग बेस मंतांग। मति बद्रमाई कीसी ओरु तन्ना गलती मानेमायना ओसो गबन ता विवरण खुद हियाना जरूरी मंता। इद ओना काजे उंदी रकम ता हाजा लेक्का मंदिता इदिना संगे ओरु तीरम-तीरम दोड़ रैय्या परिंतोर। दूसरा गलती ना बारे ते वेने इदे तरिका पोयना। “चेतावनी हियवा

लेवा सज़ा हियाना” मुन्ने सूचना हियाना अनि उंदी सही टाईम ते शुद्धिकरण आंदोलन ताकि कीयाना- इदु अल्प जनवाद पोरो अमल कीयाना उंदी तरिका मंदिता। उचुन मुल उद तरिका लागू कीतेके वायना साल ता दूसरा 6 महिनांग लोप्पा शुद्धिकरण काजे वेल्ले काम पिस्सो आयारा। माटु इदे उद्देश्य पूरा कियाला आल्संतोमा। माटु शुद्धिकरण आंदोलन व्यवहारिक रूप ते शुरू आयना जोम मनोगतवाद, संकीर्णतावाद ओसो नौकरशाही वेल्ले कम आयर इंजी आशा कींतोमा। मना इतिहास लोप्पा शुद्धिकरण आंदोलन उंदी कारगर तरिका साबित आता। इंजेटल जनता नडमा लेवेके पार्टी लोप्पा सब्बे समस्यांग ना शुद्धिकरण संगे, आलोचना, आत्मालोचना संगे हल कीयाना, बल-प्रयोग संगे आयो। माटु “मिंगता-मिंगता वडिय ओसो एर ता हल्को सड़ा” ता तरिका ता पक्ष ते मंतोम, उचुन समस्यांग लोप्पा उचुन ज्यादा उग्रता ता परिस्थिति तल बचेमायना उचुन मुश्किल मंता मति कुल मिलकीसी माटु बीमार मानेय किन बचे कियाला काजे ओना बीमारी ता इलाज कीयाना अनि सिर्फ पोंगडिंग कियावा लेवा निज्जमे इद उद्देश्य तुन पूरा किया। पहली उसूल मानेय ना रक्षा कीयाना अनि दूसरा उसूल ओरा आलोचना कीयाना मंता। मुन्ने ओरा रक्षा कायना बारांकु इत्तेके ओरु प्रतिक्रांतिकारीर आयोर। इत्तेके एकता कीयाना विचार संगे प्रेरित आयना अनि आलोचना, आत्मालोचना संगे उंदी पूना आधार ते उंदी पूना एकता कीयाना जनता ना पांत कुना लोप्पा माटु गलतिंग कीयाना सब्बे तोरा रक्षा कीयाना अनि संगेने आलोचना कीयाना तरिका पोयतेके माटु जनता ना विश्वास जीड़ा परितोम पूरा जनता तुन एकताबद्ध किया परितोम, समाजवाद ता निर्माण कियाला काजे मना साठ करोड़ जनता लोप्पा मत्ता सब्बे सक्रिय तत्व कुन गोलबंद किया परितोम।

नन्ना शांतिकालम ते फौजी कार्यकर्ता ओसो गैर-फौजी कार्यकर्ता लोरा नडमा वेतन ते अंतर तुन तीरम-तीरम कम कीयाना मति पूर्ण समानतावाद पोरो अमल कीयानायो इंदाना विचार ता समर्थन कींताना नन्ना हमेशा सेना तुन ज्यादा पिस्वल पिस्सना अनि कठोर परिश्रम कीयाना

अनि दूसरोरा मुन्ने उंदी आदर्श निल्पी कीयाना विचार ता समर्थन कीताना। 1949 ते इगा आता उंदी मीटिंग लोप्पा मना बोरे जनरल सेना लोप्पा वेतन बेरसी कीयाना इंजी प्रस्ताव पेश कितोर, वेल्ले कामरेड्स ओना इद प्रस्ताव ता समर्थन कितोर मति नन्ना ओना विरोध किताना। बारांकु इत्तेके ओरु वरोर पूंजीपति ना उंदी बेरा 5 रकम ता तिंदना-उंडाना मंदिता अनि जन-मुक्ति सेना ता सैनिक लोरगा तिंदना-उंडना पोरोल ते सिर्फ होवोर एर अनि उचुन पत्ता गोभी ता अचार विडचसी दूसरा बाताले हिल्ले, इद्रम ता परिस्थिति मंदाना बेस हिल्ले इंजी उंदी उदाहरण पेश कितोर। इदिना उल्टा नन्ना इद वेल्ले बेसता पोल्लो इंजी इत्ताना ओरु उंदी बेरा ते 5 रकम ता तिंदना-उंडना कीतोर, माटु सिर्फ अचार संगे तितोमा इद अचार लोप्पा राजनीति मंता, ताना लोप्पटल आदर्श पैदा कीयाना लोकुर पुट्टितोर। इद अचार ता कारण तेने जन मुक्ति सेना जनता ना विश्वास जीडता; बदे डावुट हिल्ला इदिना दूसरा कारण वेने मंता। इंजेटल सेना ता तिंदना-उंडना लोप्पा सुधार आता अनि सिर्फ अचार संगे तिंदना-उंडना परिस्थिति बदलेमाता। मति सबसे बुनियादी पोल्लो माटु सादा पिस्वल पिस्सना अनि कठोर परिश्रम कीयाना ता पक्ष एतना, इदे मना राजनीतिक गुण आंदू। चिनचओ इलाका ते सेब पुट्टी कीतोर। ल्याओशी अभियान ताकनास्के शरद ऋतु मत्ता, नाटे नोरा लोहकुने वेल्ले सेब कु मत्तांग। मति मना योद्धा लोर जागरूकता ते सेब तिंदनादु वेल्ले नीचतापूर्ण व्यवहार आंदू इंजी आल्सिंतोर, बारांकु इत्तेके अव सेबकु जनता सेबकु आंदुंगा। मना अनुशासन इद्रम ताए चेतना पोरो आधार आसी मंता। इद मना पार्टी ता नेतृत्व ओसो अदिना शिक्षा ता फल आंदू। मानेय ना लोप्पा उचुन चेतना मंदाना, अनि सर्वहारा वर्ग ता क्रांतिकारी विचार इद्रम ताए चेतना तल पुट्टिता। बोराई सेब तिनवा कारण ते करविने डोलतोर। हिल्ले, बारांकु इत्तेके कोद्दा ओसो अचार मनगा मंताए। जरूरत आतास्के इगा मत्ता सब्बे कामरेड्स किन सायबान लोप्पा वेने मंदा लागिता। माटु दलदली मैदान वेंडसोर मत्तास्के बदे सायबान लेवा वेने हुंजा परितोमा। नेंडु मनगा सायबान मंता, माटु ताना लोप्पा बारांकु दाया परबोम? हत्ता उचुन दिव्यंग लोप्पा

फौज ता लोकुरा उंदी सम्मेलन आता ओरु वेल्ले जोश ते आत्म-नियंत्र ओसो बचत पोरो अमल कियानूर इंजी आल्सतोर। अनि सेना वेने इद्रमे किया मंता, दूसरा लोकुरा काजे सादा पिस्वल पिस्सना, कठोर परिश्रम कीयाना ओसो ज्यादा कारणकु मंतांग। लेवेके ओरकिन फौज ता लोकुर चुनौती हियानूर। इगा गैर-सैनिक ओसो सैनिक लोर मंतोर, माटु सैनिक लोर गैर-सैनिक लोर किन चुनौती हींतोमा जन मुक्ती सेना उंदी महान सेना आंदू, नन्ना वेल्ले जीवा कींतान।

राजनीति काम तुन सुदृढ कीयाना जरूरी मंता। हर विभाग लोप्पा इत्तेके अदु गैर-सैनिक नडमा आई लेवेके सैनिक लोरा नडमा, कारखाना लोप्पा आई लेवेके नाहकुना, दुकान, विद्यालय कुना लोप्पा आई, फौजी यूनिट कुना लोप्पा, पार्टी, सरकारी शाखांग लोप्पा आई लेवेके जन संगठन कुना लोप्पा अविन वेल्ले सुदृढ कीयाना अनि कार्यकर्ता, जना ना राजनीतिक स्तर तुन पोरो तेहना।

नोट

1. इगा कनफ्यूशियस “सत्तर साल उमर ते नावा लोप्पा सत्य ता उल्लंघन कियवा लेवा नन्ना विचार वात्ता लेक्का व्यवहार किया परितान” इंजी रास्तोर। “कनफ्यूशियस ना सूक्ति-संग्रह, खंड 2, (वेइ चंग)”।
2. इगा जून 1956 ते पोलैंड ता पोजनान शहर लोप्पा आता दंगा ओसो अदिन साल अक्तूबर ते हंगरी ते आता प्रतिक्रांतिकारी उपद्रव ता बारे ते वेहताद मंता।
3. “परिवर्तन संहिता”, “शी छ”, भाग 1।
4. कालिमपोंग भारत ता उत्तरी-पूर्वी अंचल ता उंदी सीमावर्ती नार आंदू, इदु चीन चा तिब्बत प्रदेश ता यातुंग हैरे मंता।

प्रांतीय, म्युनिसिपल ओसो स्वायत्त प्रदेशीय पार्टी-कमेटींग ना सचिव लोरा सम्मेलन लोप्पा

भाषण

जनवरी 1957

1

18 जनवरी ता भाषण

इद सम्मेलन लोप्पा मुख्य रूप ते मूंड सवाल कुना पोरो विचार-विमर्श कियमूडायरः विचारधारात्मक रुझान, नाहकुना ओसो आर्थिक सवालकु। नेंडु नन्ना विचाराधारात्मक रुझान कुना सवाल कुना बारे ते वेहाकान।

माटु विचारधारात्मक रुझान कुना पोरो ध्यान हियाना, अदिन मुन्ने इगा सवाल लेक्का चर्चा कियाकान। इस्सल पार्टी लोप्पा ओसो समाज लोप्पा विचारधारात्मक रुझान संबंधित उचुन समस्यांग निल्पी किताद मंता अविना पोरो विशेष ध्यान हियाना जरूरत मंता।

इद्रम ता समस्यांग खुद मनाए कैडर कुना लोप्पा पुट्टिंतांगा उदाहरण तुकू, उचुन कार्यकर्ता लोरा लोप्पा इंजे इज्जत कमई कीयाना अनि खुशी दोरकी कियाला काजे ऊंदना-पिडंगना आया मंता, ओरु सिर्फ व्यक्तिगत हित कुना पेरके वित्ता मंतोरा। कार्यकर्ता लोरा दर्जाबंदी कियाला काजे विचार-विमर्श कीयानास्के उचुन कार्यकर्ता लोर किन पहली दर्जा दोरकतेक वेने खुश आयवा मंदाना, दूसरा दर्जा दोरकतास्के कटुल पोरो गूडसी कन्निर पोहितोर सिर्फ तीसरा दर्जा दोरकता पेरके ने कटुल विडसवा लेक्का मंदाना परिस्थिति वात्ता। ओरा कोल्हार संगे सवाल हल कियाला

कार्यकर्ता लोरा दर्जाबंदीरा काम बंद कीतद मंता! वेतन बराबर तासना सिर्फ इगा-अगा उचुन फर्क मंडाला हियाना। पाड़ना कालम ते उत्तरी युद्ध-सरदार लोरा सरकार लोप्पा थांग शाओ-ई पोरोल ता वरोर प्रधानंत्री मत्तोर। पेरके ओरकिन क्वांगतुंग प्रांत ता चुंगशान काउंटी ता मजिस्ट्रेट नियुक्त कित्तोम। पाड़ना समाज लोप्पा वरोर प्रधानमंत्री काउटी मजिस्ट्रेट बनेमातोर, इत्तेके मना सरकार ता मंत्रि लोर इद्रम बारांकु किया परवोर? नावा हिसाब ते इद्रम तम्मा दर्जा काजे कोल्हार कीयाना लोक्ुरा सिर्फ पदोन्नति आंता, पदावनति (पद तल गुचना) आयो, ओरु पाड़ना नौकरशाह तुकू वेने वेंडसी मंतोरा। ओरु आपस ते सादा पिस्वल पिस्सना, कठोर परिश्रम कीयाना, कम सुख-सुविधांग दोरकी कीयानाए आयवा ऐशो-आराम, दर्जा ओसो इज्जत ता होड़ वारिटोरा। इद्रम ता विचार इंजे पार्टी लोप्पा वेल्ले बेरसता अनि इदिना पोरो ध्यान हियाना वेल्ले जरूरी मंता।

कृषि सहकारिता ता वायना कालम वेहच ते मंता या हिल्ले? बद चीज सहकारी समिति लेवेके व्यक्तिगत अर्थव्यवस्था? इद सवाल ओसो उंदी बेरा तेदता। हत्ता साल फसल बेस आता जागा ने लेवेके बेहरा प्राकृतिक मुश्किल कुना सामना किया लागता इलाका ने इद सवाल तेदताद हिल्ले। इव सवाल कु सिर्फ सुडला प्राकृतिक मुश्किल कुना सामना कित्ता जागा ने ओसो फसल बेस हिल्ला मत्ता इलाकाने तेदतांग। अव सहकारी समितिंग लोप्पा श्रम अंक कुना नकद मूल्य तय कित्ता मूल्य तुकू कम मत्ता अद्रमासी समिति सदस्य लोरा आमदनी घटेमाता। अद्रमासी “सहकारी समितिंग इंजे वेने बेस ओसो निल्पी कीसी तासना लेक्का इंजी समझेमायना या?” इदरम पोल्लोंग केंजा वातांग अनि इवे पोल्लोंग मना पार्टी कार्यकर्तालोरा लोप्पा वेने दिस्सना शुरू आतांग। उचुन कार्यकर्ता लोर सहकारी समितिंग बदे वेने रकम ते हूड़तेके बेस हिल्लेंग इंजी इंतोरा सरकारी मंत्री लोरो उचुन जोम काजे नाहकुना दौरा कित्तोर अनि पेकिंग मलसी वासी किसान लोरा दिमाग ते डावुट पुट्टी कीसी ओरकिन निराश कित्तोर, ओरा खेतीबाड़ी ता जोश कमजोर आता अनि सहकारी समितिंग

इंजे खत्म आयना गरें एवतांग इंजी आल्सना शुरू कितोरा। उचुन सहकारी समितिंग ना निर्देशक लोर तम्मा तल्ला पोरो तेहा परवोर, बारांकु इत्तेके ओरा पोरो हिक्के-हक्केटल आरोपकु वासोरे मंदितांग, पोरोटा शाखांग ओसो अखबारकु ओरा आलोचना कसोरे मंदितांग। पार्टी-कमेटींग ना प्रचार-विभाग कुना उचुन प्रधान लोर सहकारी समितिंग ना प्रचार कियाला परेके-मुन्ने आंतोरा। कृषि मंत्रि ल्याओ लू-येन, पार्टी ता केंद्रीय कमेटी नाहकुना कार्य विभाग ता उपनिदेशक ओना जोश कम आता इंतोर अनि ओना दोड़ काम कीयाना जिम्मेदार कार्यकर्ता लोरा जोश वेने कम आता इंतोरा। इदे आयवा सहकारी समितिंग बदे वेने परिस्थिति ते ताका परवोंग अनि कृषि विकास ता 40 नियम कार्यक्रम वेने इंजे अंगडम आता इंतोरा। बोरे वेने मानेय ना जोश खत्म आता इंदानास्के माटु बाता कीयाना? असल इत्तेके इद काम वेल्ले हल्को मंता। बोनाई जोश कम आताके माटु ओरकिन उचुन प्रोत्साहित कीयाना। इंजे अखबार तम्मा प्रचार-काम ता तरिका बदले कीसीतांग। अवु वेल्ले जोर-शोर ते सहकारी समिति ना प्रचार किया मंतांग, सिर्फ अविना बेसता प्रचार किया मंतांग अनि गलती ना बारे ते उचुन वेने वेहोंग। उचुन प्रोत्साहन हियाला काजे उचुन महीनांग इद्रमे कीयाना बेस मंदिता।

हत्ता साल तुकू मुन्नेटा दक्षिणपंथी भटकाव खिलाफ संघर्ष किताद मत्ता अनि हत्ता साल “दुस्साहस संगे मुन्ने दायना” रुझान खिलाफ संघर्ष किताद मंता, ताना कारण ते उंदी दूसरा दक्षिणपंथी भटकाव ता सामना किया लागता। इगा नन्ना समाजवादी क्रांति ता सवाल ओसो मुख्य रूप ते नाहकुना साम्राज्यवादी बदलाव सवाल संबंधित दक्षिणपंथी भटकाव ता बारे ते वेहिंताना। खासकर मना कार्यकर्ता लोरा नड्मा उंदी उर्ता वडिय लेक्का ताकत वात्तादु ध्यान हियाना लेक्का मंता। मना मंत्रि, उपमंत्रि, विभाग प्रधान, ब्यूरो प्रधान, प्रांतीय स्तर ता कार्यकर्ता लोरा लोप्पा बेहरा संख्या जमींदार, धनी किसान लेवेके खुशहाल मध्यम किसान लोरा परिवार तल वातोरा अनि उचुन मुल ता तप्पेर जमींदार मंतोरा ओरकिन इंजे एवनल चुनाव अधिकार हीताद हिल्ले। इद्रम ता कार्यकर्ता लोरा परिवार

संगे कलियाला ओरा लोहकुने दांतोम अस्के माटु ओरा तोड्डी तल सिर्फ
 “इव सहकारी समितिंग बेस हिल्लेंग, वेल्ले दिव्या टिकेमाया परवोंग”
 इंदान लेक्कटा पोल्लोंगे केंजितोमा खुशहाल मध्यम किसान लोर उंदी
 डुलमुल समाजिक श्रेणी ते वांतोरा ओरा लोप्पा व्यक्तिगत खेतीबाडी
 कीयाना रुझान पैदा आंता अनि उचुन मुल सहकारी समितिंग नल अलग
 आयला आलिसंतोरा मना कार्यकर्ता लोरा नड्मा वायना समस्या इवे वर्ग
 कुना ओसो श्रेणिंग ना विचार कुन तोहिंता।

कृषि-सहकारिता जरूर सफल आया, मति इद उंदी-रेंडु साल
 लोप्पा पूरा विफल आया परवो। इद पोल्लो पार्टी, सरकार, सेना ओसो
 विभिन्न जन संगठन कुना कार्यकर्ता लोरा किन स्पष्ट किसियाना। सहकारी
 समितिंग ना इतिहास इंजे वेल्ले सुडला मंता, ज्यादातर सहकारी समितिंग
 ना स्थापना तुन इंजे सिर्फ उंदी लेवेके डेढ साल आता अनि ताना कैदे
 अनुभव कुना कमी मंता। तम्मा पिस्वल ता ज्यादातर कालम ते क्रांतिकारी
 काम कितोर ओरु वेने गलतिंग कितोर अदिन काजे मीटु सिर्फ उंदे साल
 तल काम कीसोर मत्ता लोकुर गलतिंग कियानूरे इंजी आल्ला परिंतरा
 सुडला-सुडला मुशिकल कुना सामना किया लागतांकु सहकारी समितिंग
 ताका परवोंग इंदाना वेने बेहरा गलती आंदू। असल इत्तेके इद ज्यादातर
 सहकारी समितिंग बेस लेवेके कम से कम बेस ताका मंतांग। मीटु बदे उंदी
 वेल्ले बेस ताकी कीयाना सहकारी समिति ता उदाहरण हीतेके सहकारिता
 ना विरोध कीयाना सब्बे अंगडम ता पोल्लोंग कुना खंडन किया परिंतोमा
 इद सहकारी समिति तुन बेस ताकी कीतेके, दूसरा सहकारी समितिंग कुन
 बेस बारांकु ताकी कियमूडायो? मीटु बेगा हत्तेके अगा इद सहकारी समिति
 ता अनुभव कुना प्रचार-प्रसार कीसोर मंदाना। हर प्रांत लोप्पा कम से कम
 इद्रम ता उंदी सहकारी उदाहरण परहकना। वेल्ले खराब परिस्थिति मत्ता,
 खराब जमीन मंदाना, मुन्ने तुकू कम पैदावार आयना ओसो वेल्ले गरीबी
 मंदाना सहकारी समिति परहकना। मुन्नेटल बेसता परिस्थिति मंदाना जागा
 ता सहकारी समिति तुन चुने कीयानायो। बदे डावुट हिल्ला मीवगा बचोने
 दर्जन उदाहरणकु मत्तेके बेसे, मति मीटु उंदी वेने सहकारी समिति तुन बेस

ताकी कीसी अदिन उदाहरण लेक्का पेश कीतेके मीटु सफल आंतिर इंजी साबित आंता।

स्कूल-कालेज ते वेने गड़बड़ आंता ओसो उचुन जागा ना विद्धार्थिंर विद्रोह कितोर। शच्याच्वांग ता उंदी विद्यालय लोप्पा आखरी साल ता परीक्षा पास कीयाना विद्धार्थिंरा काजे अस्थाई रूप ते रोजगार हिया परताद हिल्ले अद्रमासी विद्यालय कुना लोप्पाने उंदी साल ओसो पढ़ेमायला लागता। अद्रमासी ओरकिन होंग वात्ता। मुट्टामेंड प्रतिक्रांतिकारिंर इद मौका ता फायदा एतसी भड़के कितोर, जुलूस संगठित कितोर अनि शच्याच्वांग रेडियो-स्टेशन पोरो कब्जा कीयाना ओसो “हंगरी” बने कीयाना धमकी हितोर। ओरु वेल्ले पोस्टरकु वाटतोर, अविना लोप्पा मत्ता मूंड नारांग सबसे ज्यादा ध्यान हियाना लेक्का मत्तांग: “फासीवाद तुन नाश कीयाना!” “माटु शांति आयवा युद्ध कियतोम!” ओसो “समाजवाद महान हिल्ले!” अविना अनुसार कम्युनिस्ट पार्टी फासीवादी आंदू, मना लेक्काटोर किन खत्म कीयाना। ओरु पेश कित्ता नारांग वेल्ले प्रतिक्रियावादी मत्तांग अद्रमासी मजदूर, किसान ओसो सब्बे रकम ता जनता लोप्पा ओरा पोरो वेल्ले होंग बेरसी कित्ता। पेकिंग ता छिंग्हा विश्वविद्यालय लोप्पा वरोर विद्धार्थिं खुल्लम-खुल्ला ऐलान कीतोर: “उंदी दिव्या नन्ना हजारो लोकुर किन हौकसियाकान!” सौ पुंगार पूयला हियाना अनि सौ विचारशाखांग लोप्पा होड़ वाटना नीति पेश कीतांकु इद “विचारशाखा” वेने वेहच ते वात्ता। कामरेड तंग श्याओ-फिंग इद विद्यालय लोप्पा हत्तोर अनि उंदी भाषण हितोर। ओरु इत्तोर, मीटु हजारों लोकुर किन हौकतेके, माकिन मीवा विरोध किया लागिंय।

पेकिंग ते कित्ता सर्वेक्षण अनुसार मना कालेज-विद्धार्थिंरा लोप्पा ज्यादातर लोकुर जमींदार, धनी किसान, पूंजीपतिर ओसो खुशहाल मध्यम किसान लोरा पेकोर आंदुर। मजदूर वर्ग ओसो गरीब, निम्न-मध्यम किसान लोरा परिवार तल वायना विद्धार्थिंरा संख्या 20 प्रतिशत तुकू वेने कम मंता। देश ता बाकी जागा ने वेने इद्रमे मत्ता लेक्का मंता। इद परिस्थिति तुन बदले कीयाना बेस आयार मति इद्रम कियाला वेल्ले टाईम लागिंय। मना

उचुन कालेज-विद्यार्थिरा लोप्पा गोमुल्का किन लोकरु वेल्ले जीवा कींतोर, टीटो अनि कार्डेल किन लोकरु वेल्ले जीवा कींतोर। दूसरा बगिल, पौलैंड ओसो हंगरी ते दंगा आतास्के नाहकुना लोप्पा वेल्ले जर्मीदार ओसो धनी किसान लोर शहर ते वेल्ले पूंजीपतिर ओसो जनवादी पार्टिंग ना सदस्य लोर बेसे व्यवहार कितोर, गड़बड़ कीयाना कोशिश कीवोर अनि हजारों लोकरु किन हौकना धमकी वेने हीवोर। मति ओरा इद व्यवहार ता वेने विश्लेषण कीयाना। बारांकु इत्तेके ओरगा इंजे राजनीतिक पूंजी मारता अनि मजदूर ओसो गरीब, निम्न-मध्यम किसान लोरा पोल्लोंग केंजोर ओरा काजे काल्कु तासला जागा हिल्ले। परमाणु बम संगे पेकिंग ओसो शांघाई तुन विस्फोट कीयाना लेक्कटा घटनांग आतेके वेने इद्रमतोर बदलेमायोरा? मीटु पक्का ओरु बदलेमाया परवोर इंदा परविर। इद्रम ता परिस्थिति ते जर्मीदार, धनी किसान, पूंजीपतिर ओसो जनवादी पार्टिंग ना सदस्य लोरा पूना संयुक्त मोर्चा बनेमायना शुरू आंता। ओरु दुनियादारी पुन्नोर, ओरा लोप्पाटल बचोनो लोकरु इंजे वेने वेरियसी मकसी मंतोरा ओरा पेकोर-पिल्लांग स्कूल-कालेज ते पढ़ेमायनोर आंदुर ओरकिन अनुभव हिल्ले, इद्रम तोरे “नन्ना हजारो लोकरु किन होकसियाकान” अनि “समाजवाद महान हिल्ले” इंदाना लेक्कटा पोल्लोंग कीसी तम्मा असल मुक्कम तोहितोर।

उचुन प्रोफेसर वेने बैय्यल लेक्कटा पोल्लोंग कींतोर, कम्युनिस्ट पार्टी ता जरूरत हिल्ले, कम्युनिस्ट पार्टी ओरा नेतृत्व किया परवो, समाजवाद बेस हिल्ले इंदान लेक्कटा पोल्लोंग कींतोर। मुन्ने ओरु तम्मा इव विचार कुन पोयसी तासिंतोर, सौ विचारशाखांग लोप्पा होड़ वाटना नीति ओरकिन वड़कना मौका हीवेके इव सब्बे पोल्लोंग तुरंत बाहर वांतांगा। मीटु “ऊ श्युन ना पिस्वल” पोरोल ता फिल्म हूड़तिरा? ताना लोप्पा दर्जनों फुट लम्बा उंदी कूची (ब्रस) तोहताद मंता, अदु “महान लोकरा” निशानी आंदू। इद कूची संगे बदिने वेने मिसमूड़ांता। इंजे ओरु माकिन हौकना उदेश्य ते बाहर पेस्ता लेक्का मंतोरा। ओरु निज्जमे पाड़ना व्यवस्था ता पुनस्थापना कीयाना कोशिश किया मंतोरा?

हत्ता साल दुनिया ते बचोनो उर्ता वडिय तेदता। सोवियत संघ ता कम्युनिस्ट पार्टी ता बीसवी कांग्रेस ते स्टालिन ना वेल्ले जोर-शोर ते विरोध किताद मत्ता। ताना पेरके साम्राज्यवादिर कम्युनिज्म खिलाफ रेंडु उर्ता वडिय तेदता अनि अंतरराष्ट्रीय कम्युनिस्ट आंदोलन लोप्पा वेने रेंडु उर्ता वडिय लेक्कटा युद्ध आता। इव उर्ता वडियकुना लोप्पा योरोप ओसो रेंडासी अमेरिका महाद्वीप कुना उचुन कम्युनिस्ट पार्टींग कुन वेल्ले नुकसान तेहा लागता मति पूर्व ता विभिन्न देश कुना पार्टींग ना कम से कम नुकसान तेहा लागता। सोवियत संघ ता कम्युनिस्ट पार्टी ना बीसवी कांग्रेस केयतांकु मुन्नेटले स्टालिन ना वेल्ले जोश ते समर्थन कितोर, ओरु वेल्ले तीव्र रूप ते विरोध कीयाना शुरू कितोर। नावा हिसाब ते इद्रम तोर मार्क्सवाद-लेनिनवाद पोरो नितसी मन्नोर, ओरु समस्या ना विश्लेषणात्मक रुझान लागू कीवोर अनि ओरा लोप्पा क्रांतिकारी नैतिकता ता वेने कमी मंदिता। मार्क्सवाद-लेनिनवाद लोप्पा सर्वहारा वर्ग ता क्रांतिकारी नैतिकता वेने शामिल मंता। मुन्ने मीटु स्टालिन ना पूरा समर्थन कीतिर अदिन काजे इंजे अचानक मीवा रुझान बदले कीयाना कारण तो कम से कम वेह्हाए लागियर। मति मीटु मीवा रुझान अचानक बदले कीयाना बदे कारण वेहविर। मीटु मीवा पिस्वल ते स्टालिन ना समर्थन बस्के ने कीवा लेक्का किया मंतिर मति असल इत्तेके मीटु मुन्ने स्टालिन ना समर्थन कियानोरिटा। स्टालिन ना सवाल पूरा अंतरराष्ट्रीय कम्युनिस्ट आंदोलन तल ओसो सब्बे देश कुना कम्युनिस्ट पार्टींग संबंधित मंता।

मना पार्टी ना ज्यादातर कार्यकर्ता लोर सोवियत संघ ता कम्युनिस्ट पार्टी ना बीसवी कांग्रेस तुकू खुश हिल्ले अनि ओरा लोप्पा स्टालिन पोरो वेल्ले हमला कींतोर। इद उंदी आम विचार अनि आम प्रतिक्रिया आंदू। मति उचुन मुल डुलमुल आयनोर वेने मंतोर। उर्ता वडिय वात्तास्के मुसुर वायना मुन्ने पेतेंग तम्मा बूका तल बाहर पेसितांग अविना मोसोर वेल्ले संवेदनशील मंदिता अनि अवु मौसम-विज्ञान वेने पुंजी मंदितांग। सोवियत संघ ता कम्युनिस्ट पार्टी ना बीसवी कांग्रेस ता उर्ता वडिय वात्ता इत्तेकेने चीन लोप्पा उचुन पेतेंग तम्मा बूकानल बाहर पेसतांग। इव पेतेंग पार्टी

लोप्पा मंदाना डुलमुल तत्व आंदुंगा। अवु स्टालिन पूरा विरोध आता इंजी केंजतास्के तुरंत दूसरा बगिल हंजी जिंदाबाद ता नारा केयना शुरू कितोर अनि खुशेव सब्बे रकम ते सही मंतोर ओना राय मुन्नेटले इद्रमे मत्ता इंतोरा। पेरके साम्राज्यवाद उचुन हमलांग कित्ता अनि अंतरराष्ट्रीय कम्युनिस्ट आंदोलन लोप्पा वेने उचुन हमलांग आतास्के खुद खुशेव किन वेने तम्मा हिसाब ते उचुन बदले माया लागता, अदिन काजे ओरु ओसो उंदी बेरा डुलमुल आसी इदे बगिल मलसी वातोर। उंदी अविराम रुझान ता सामना आतास्के ओरगा डुलमुल आसी मलसी वायना विडचसी दूसरा बदे हर्ी मन्नो आंता। गूडी पोरो मोडियना रोंडा ता उंदी गट्टा वडिय ते हिकके-हक्के होलेमासोर मंदिता। डुलमुल लोकुरा उद्देश्य होलेमासी मना बगिल वायवा लेवा दूसरा बगिल दायना मंता। पार्टी लोप्पा ओसो बाहर उचुन लोकुर पोलैंड ओसो हंगरी ता घटनांग ना तारीफ कीयाना उंदी बेसता पोल्लो मंता। ओरु सिर्फ पोजनान ओसो हंगरी ता चर्चा कियवा मंदा परवोर। इद्रम कीसी ओरु तम्मा असली मुक्कम तोहतोर। पेतेंग तम्मा बूकानल बाहर वांतांग, हेमुल ओसो भूमि ता सब्बे पुडियकु-जुल्लेंग तम्मा-तम्मा मक्कना जागा तल बाहर पेसिंतांग। अवु गोमुल्का ना इशारा ते एदिंतांग। गोमुल्का जनवाद ता चर्चा कितोर मति ओरु वेने ओरु ओना संगे इंगो-इंगो इत्तोर। इंजे परिस्थिति बदलेमाता अनि ओरु तन्ना तोड्डी बंद तासतोर। मति ओरु लोकुर असल इत्तेके कमेक मंदाना आयवा निज्जमे वडकना इंजी आल्सिंतोर।

उर्रा वडिय वात्तास्के डुलमुल तत्व अविन मुकाबला क्रिया परवो अनि डुलमुल आंतांग। इद उंदी नियम आंदू। नन्ना मीवा ध्यान इदिना बगिल पिडंगला आल्सा मंताना। उचुन मुल बचोनो बेरा डुलमुल आता पेरके अनुभव दोरकी कींतोर अनि डुलमुल आयवा मंदितोर। मति वरोर उंदी रकम ता लोकुर हमेशा डुलमुल आसोर मंदितोर। ओरु वंजी मोदोल लेक्का वडिय वात्तास्के होलेमासोर मंदिता बारांकु इत्तेके अविना मोदोल कमजोर मंदिता। बाजरा ओसो जोन्ना ना मोदोल उचुन मजबूत मंदितांग। सिर्फ बेहरा-बेहरा मर्राके होले मायवा नितसी मंदितांग। उर्रा वडिय हर साल

वांता। अद्रमे देश-विदेश ते विचारधारात्मक, राजनीतिक उर्जा वडि़य वेने हर साल वांता। इद समाज ता उंदी स्वाभाविक घटना आंदू। राजनीतिक पार्टी ता उंदी रकम ता समाज आंदू, उंदी रकम ता राजनीतिक समाज आंदू। इद राजनीतिक समाज ता मुख्य श्रेणी ते राजनीतिक पार्टींग ओसो राजनीतिक ग्रुप वातांग। हर साल राजनीतिक पार्टी उंदी वर्ग-संगठन आंदू। मना चीनी कम्युनिस्ट पार्टी सर्वहारा वर्ग ता राजनीतिक पार्टी आंदु ताना लोप्पा मुख्य रूप ते मजदूर वर्ग ओसो अर्ध-सर्वहारा गरीब किसान परिवार तल वातोर शामिल मंतोर। मति वेल्ले पार्टी-सदस्य लोर वेने मंतोर ओरु जर्मीदार, धनी किसान ओसो पूंजीपति परिवार तल वातोर लेवेके खुशहाल मध्यम किसान परिवार लेवेके शहरी निम्न-पूंजीपति परिवार ते पुटतोर। ओरा लोप्पा वेल्ले जोम तल संघर्ष लोप्पा अनुभव गडस्ता संख्या वेल्ले मंता मति ओरु मार्क्सवाद तुन वेल्ले लागू किया परवोर अदिन काजे विचारधारात्मक ओसो मानसिक रूप ते ओरु वंजी मोदोल लेक्का वडि़या वात्तास्के हिक्के-हक्के होले मांता।

मुन्ने वेल्ले परीक्षांग पास कित्ता उचुन पार्टी सदस्य लोर किन इंजे समाजवादी परीक्षा पास कीयाना मुशिकल आया मंता। श्वे श्युन इदिना उंदी पूना उदाहरण मंता। मुन्ने अदु हपे प्रांत ता पार्टी कमेटी ता उपसचिव ओसो प्रांत ता उपराज्यपाल मत्ता। अदु बस्के डुलमुल आता? अनाज अस्सना-वम्मना पोरो सरकारी मालिकना लागू कित्तास्केटला। इद समाजवाद तुन लागू कीयाना उंदी महत्वपूर्ण निर्णय मत्ता। मति अदु इदिना खिलाफ मत्ता अनि इदिना विरोध कित्ता। दूसरा उदाहरण मंगयुंग-छयेन मंतोर, वीरु अखिल चीन सप्लाई, क्रय-विक्रय सहकारी समिति महासंघ ता उपनिर्देशक मत्तोर। ओरु वेने इद याचिका लोप्पा इद सरकारी मालिकाना ता दृढ़ता ते विरोध कित्तोर। कृषि-सहकारिता तुन लागू कीयानास्के ओसो उंदी बेरा पार्टी लोप्पा उचुन मुल इदिना विरोध कित्तोर। संक्षेप ते पोरोटा पद ते काम कीयाना पार्टी कार्यर्ता लोर वेने डुलमुल आतोर अनि समाजवाद ता परीक्षा पास किया परवोर। इद परिस्थिति खत्म आता या? आयो, इंजे खत्म आताद हिल्ले। इंजेटल दस साल पेरके वीरु गटिक मंदा

परितोर अनि समाजवाद लोप्पा निज्जमे विश्वा, तासिंतोरा? पक्का वेहा परवोमा 10 साल पेरके बदे समस्या वातेके ओरु जरूर वेल्ले मुन्ने पुंजी मत्तोर इंतोरा।

इगा उचुन सामग्री कामरेड्स ना लोप्पा तूसमूडायर, ताना लोप्पा सेना ता उचुन कार्यकर्ता लोरा विचारधारात्मक रुझान कुना पोरो कोंडा वाटताद मंता। वीरु पेश कित्ता राय कुना लोप्पा उचुन विचारशील पोल्लोंग वेने मंतांग उदाहरण तुकू ओरा अनुसार उचुन कार्यकर्ता लोरा वेतन वेल्ले मंता अनि किसान लोर किन इद पोल्लो विचार वायो। बारांकु इत्तेके ओरु लागू कीयाना बुनियादी कार्यदिशा गलत मंता। ओरु मना पार्टी ता नीतिंग ना आलोचना कीसोरे नाहकुना बारे ते मना नीति “वामपंथी” मंता अनि शहर कुना बारे दक्षिणपंथी इंतोरा। 96 लाख वर्ग-किलोमीटर भूमि ते चीन सिर्फ रेंडु रकम ते बनेमासी मंता उंदी शहर अनि दूसरा शहर। ओरा हिसाब ते रेंडासी रकम कुना बारे ते मना नीति गलत मंता।

ओरु नाहकुना बारे ते मना नीति पोरो “वामपंथी” भटकाव मंता इत्तेके किसान लोरा आमदनी मजदूर लोर किनकु कम मंता। इगा माटु सिर्फ आमदनी पोरो आधार आसी निर्णय कीयानायो इंजी विश्लेषण कींतोरा। मजदूर लोरा आमदनी किसान लोरकिन ज्यादा मंता इंदानदु निज्जमे मति ओरा उत्पादन ता मूल्य वेने ज्यादा मंता, इदे आयवा ओरकिन रोज ता जरूरत कुना काजे वेने ज्यादा खर्च किया लागिंता। किसान लोरा रहन-सहन ते सुधार आयना मुख्य रूप ते उत्पादन बेरसी कीयाना ओरा कोशिश पोरो आधार आसी मंता। सरकार वेने ओरा भरपूर मदद कींता, जल-संरक्षण परियोजनांग ना निर्माण कीयाना ओरकिन कृषि-ऋण हियाना लेक्कटवु। मना कृषि-उत्पादन कुना पोरो वाटना टैक्स, इदिना लोप्पा सहायक धंधा ता उत्पादन पोरो वाटता टैक्स शामिल मंता, किसान लोरा कुल उत्पादन-मूल्य ता लगभग 8 प्रतिशत मंता अनि वेल्ले सहायक धंधा ना उत्पादन पोरो बदे टैक्स वसूल आयो आंता। सरकार तय कित्ता दाम संगे अनाज अस्सिंता। औद्योगिक उत्पादन ओसो किसान लोरा कृषि-उत्पादन ता विनिमय लोप्पा राज्य तुकू वेल्ले कम मुनाफा दोरकिंता। माटु

सोवियत संघ लेक्का अनिवार्य बिक्री व्यवस्था लागू किताद हिल्ले। कृषि-उत्पादन संगे औद्योगिक उत्पादन तुन विनिमय कीयानास्के माटु मूल्य ता बित्तामेंड अंतर तुन कम कीयाना कोशिश कीतोम, सोवियत संघ लेक्का अदिन बेरसी कीवोम। मना नीति ओसो सोवियत संघ ता नीति लोप्पा वेल्ले अंतर मंता अदिन काजे नाहकुना बारे ते मना नीति लोप्पा “वामपंथी” भटकाव मंता इनमूडायो।

मना सेना लोप्पा पोरो कमेटींग लोप्पा काम कीयाना कार्यकर्ता लोरा लोप्पटल उचुन मुल खुशहाल मध्यम किसान, धनी किसान लेवेके जर्मीदार लोरा पोल्लो ने प्रभावित आसी (ओरु तम्मा जन्म-भूमि ता यात्रा कीयानास्के लेवेके तम्मगा वायना सगानोरिगडल केंजता लेक्का मंता) किसान लोरा बगिल तल शिकायत पेश कींतोर। 1955 ता पहली 6 महिनांग लोप्पा वेल्ले पार्टी-सदस्य लोर ल्यांग शू-मिंग लेक्कटा लोकरु लेंग संगे लेंग काल्पसोरे किसान लोरा बगिल तल शिकायत पेश कित्तोर। सिर्फ रेंडु रकम ता किसान लोरा प्रतिनिधित्व कीसोर मत्ता लेक्का, सिर्फ ओरे किसान लोरा दुःख समझेमासोर मत्ता लेक्का। ओरा कोंडा ते किसान लोरा प्रतिनिधित्व मना केंद्रीय कमेटी लेवेके प्रांतीय पार्टी-कमेटी ओसो वेल्ले पार्टी सदस्यलोर कीवोर। च्यांगसू प्रांत ता उंदी सर्वे तले उचुन इलाकांग लोप्पा काउंटी, जिला ओसो श्यांग स्तर ता 30 प्रतिशत कार्यकर्ता लोर किसान लोरा बगिल तल शिकायत पेश कित्तोर। पेरके जांच-पडताल कितास्के इविना लोप्पाटल ज्यादातर लोकरु खुशहाल परिवार तल मंतोर, ओरगा वम्मला काजे अतिरिक्त अनाज वेने मंता। बदिन ओरु दुःख इंतोर अदु असल इत्तेके अतिरिक्त अनाजे आंदू। ओरु “किसान लोरा मदद कीमुट” अनि “किसान लोरा ध्यान तासनटु” इंतोर अस्के सरकार तुन अतिरिक्त अनाज वम्मनायो। शिकायत पेश कीयाना लोकरु असल ते बोना प्रतिनिधित्व कींतोर? वीरु व्यापक किसान जनता ना प्रतिनिधित्व कियवा लेवा वेल्ले कम संख्या मत्ता खुशहाल किसान लोरा प्रतिनिधित्व कींतोर।

शहर कुना बारे ते मना नीति दक्षिणपंथी भटकाव मंता इंदाना आरोप उचुन सही मंता, बारांकु इत्तेके माटु पूंजीपतिरा पिस्वल ता बंदोबस्त कीतोम, ओरकिन सात साल एवनल उंदी निश्चित दर ते ब्याज' वेने हिया मंतोम। सात साल पेरेके बाता कीयाना? इदिना निर्णय अस्केटा परिस्थिति अनुसार कियमूड़ायर। इदिन बंद कीयानाए लेवेके ओरकिन निश्चित ब्याज ता अनुसार उचुन दाम हियाना जरूरी मंता। इद उचुन पैसा खर्च कीसी माटु इद वर्ग तुन अस्सा मंतोम। केद्रीय कमेटी इद नीति पोरो वेल्ले सतर्कता ते आल्सता। साधारण रूप ते पूंजीपतिर ओसो ओरा संबंधित जनवादी लोकुर, बुद्धिजीविरा सांस्कृतिक, तकनीकी जानकारी ता स्तर उचुन पोरो मंता। इद वर्ग तुन अस्सिसी माटु ओरकिन राजनीतिक पूंजी तल जेक कीतोम अनि ओरा तोड्डी मुच्चिंतोम। ओरकिन इदिनगडल जेक कीयाना तरीका ओरकिन अस्सना ओसो सही काम हियाना बंदोबस्त कीयाना मंता। इद्रम कीतेके राजनीतिक पूंजी ओरा कैदे आयवा मना कैदे वांता। माटु ओरकिन मना राजनीतिक पूंजी संगे पूर्ण रूप ते जेक कीयाना अनि इदु बस्के एवनल जारी मंता अस्के एवनल ओरगना इद पूंजी ता उचुन वेने मन्नो आंता। अदिन काजे शहर ता बारे ते मना नीति लोप्पा दक्षिणपंथी भटकाव मंता इंदा परमूड़ायो।

नाहकुना कुना बारे ते मना नीति सही मंता अनि अद्रमे शहर कुना बारे ते वेने मना नीति सही मंता। अद्रमासी मनगा हंगरी ता घटना लेक्का देशव्यापी विद्रोह आया परवो। ज्यादा से ज्यादा उचुन मुल हिव्के-हिव्के गडबड कींतोर, जनवाद काजे कोल्हार कीयाना संभावना मंता। जनवाद अचोन खतरनाक मन्नो। इद सवाल ता बारे ते नावा दृष्टिकोण मीवा नड्मा मत्ता उचुन मुल तुकू अलग मंता (वीरु इदिनकु वेल्ले वेरियंतोर)। नावा हिसाब ते जनवाद वातेकाई मीटु मुन्ने अदिनकु वेरियवा लेवा दूसरा पक्ष ता कीयाना ओसो वडकना ता विश्लेषण कीयाना। जनवाद तुन अमल कीयानास्के बुरे तत्व गलत काम जरूर कियानुंग अनि अवु खुद एकसपोज आसी अलगाव ते वांतांग। “हजारो लोकुर किन हौकना” तरीका संगे जनता ना नड्मा अंतरविरोध कुन हल किया परमूडांता या? इदिना संगे

व्यापक जनता ना समर्थन दोरका परिंता या? “फासीवादी ता नाश आयना”, “समाजवाद महान हिल्ले” इंदाना पोल्लो संविधान ता खुल्लमखल्ला उल्लंघन कीवो या? कम्युनिस्ट पार्टी ओसो अदिना नेतृत्व ते ताकना राजसत्ता क्रांतिकारी मंता अनि समाजवाद महान मंता; इद संविधान लोप्पा रास्ताद मंता अनि पूरा देश ता जनता इदिन मानेमांता। “माकिन युद्ध आयवा शांति पाहिजे” इंतोम अस्के मीटु युद्ध ता आह्वान कींतिरा मति मीटु सिर्फ उंदी सुडला दलम तुने पोयंतोर, मीवा सैनिक लोरा संख्या हालनाचोन हिल्ले अनि अफसर लोर वेने प्रशिक्षित हिल्ले। इदु पाल उंडाना पिल्ला लेक्का मंता! शच्याच्वांग ता विद्यालय लोप्पा लोप्पा पोरो वेहता 3 ना बारे ते वाद-विवाद किताद मंता अनि 70 प्रतिनिधिर कुना लोप्पटल सिर्फ उंदी दर्जन लोकुरा समर्थन दोरकता बाकी 50 तुकू ज्यादा लोकुर इदिना विरोध कित्तोर। पेरके इव नारांग लोप्पा 4 हजार विद्यार्थिर वाद-विवाद कित्तोर अनि सब्बे तोर इदिना विरोध कित्तोर। अस्के उंदी दर्जन लोकुर अलगाव ते अरतोर। इव नारांग पेश कीयाना इविना पोरो डटेमासी मंदाना क्रूर प्रतिक्रियावादी लोकुर सिर्फ मुट्टामेंड मंतोर। ओरु हर जागा जनवाद ता कोल्हार किवेके, इद्रम ता पोस्टरकु वाटवेके ओरु बाता कियाला आल्सा मंतोर इंजी माटु बद्रम पुंतोमा। उंदी बेरा ओरु जनवाद ता डोल नेकिह कीयाना शुरू कीतेके ओरा तोकार पोयमूडाता। हंगरी ता घटना तल चीन लोप्पा इव पेतेंग कुन लालच हीसी बूका तले पेसिह कियमूडाताद बेसे।

हंगरी ते जनवाद लागू कित्ता तुरंग पार्टी, सरकार ओसो सेना तुन एकदम छिन्न-भिन्न कीतद मंता। चीन लोप्पा इद्रम ता परिस्थिति वायो आयार। मुट्टामेंड पाल उंडाना विद्यार्थिरा ताकत संगे मना पार्टी, सरकार ओसो सेना तुन छिन्न-भिन्न किया परतेके माटु सब्बे तोर जरूर वेल्ले बकवल लोर आंदोमा। अदिन काजे जनवाद तुकू इनपडे वेरियानायो। गडबड आतेके कूतिता बोड्डा तुन ओरहला मदद दोरकियार, इद्रम आतेके बेसे आंता। माटु साम्राज्यवाद तुकू बस्केने वेरियताद हिल्ले। च्यांग काई-शोक किन वेने बस्के ने वेरियताद हिल्ले। माटु इंजे जनवाद तुकू वेरियाना

या? नावा हिसाब ते वेरियानायो। बोराई इद जनवाद ता कवर पोयसी समजावादी व्यवस्था ता विरोध कींतोर अनि कम्युनिस्ट पार्टी ता नेतृत्व तुन खत्म कीयाना कोशिश कीतेके माटु ओरा खिलाफ सर्वहारा तानाशाही लागू कींतोमा। बुद्धिजीविरा सवाल ता बारे ते इस्सल ओरा पूना बदलाव पोरो ध्यान हीसी ओरा काजे रक-रकम ता बंदोबस्त कीयाना पोरो जोर हियाना रुझान मंता; ओरा काजे रक-रकम ता बंदोबस्त कीयाना पोरो ध्यान हीसी ओरा पूना बदलाव पोरो वेल्ले कम ध्यान हियमूडंता। सौ पुंगार पूयला हियाना अनि सौ विचारशाखांग लोप्पा होइ वाटला हियाना नीति लागू कित्ता पेरकेटल बुद्धिजीविरा पूना बदलाव कीयाना लोप्पा बेस काम कीसोर हिल्लेमा। माटु पूंजीपतिरा पूना बदलाव कीयाना लोप्पा इद्रम कमजोरी तोहताद हिल्ले, इंदानास्के माटु बुद्धिजीविर ओसो जनवादी लोकुरा पूना बदलाव कीयाना लोप्पा बारांकु इद्रम ता कमजोरी तोहना?

सौ पुंगार पूयला हीमुट - इद नीति तुन नावा हिसाब ते माटु जारी तासना। उचुन कामरेड्स सिर्फ बेसता गब्बू मत्ता पुंगार तुने पूयला हियाना अनि बाकी अंगडम ता रोंडा तुन मोडियला हियानायो इंतोर। अद्रमासी ओरु सौ पुंगार पूयला हियाना अनि सौ विचारशाखांग लोप्पा होइ वाटना नीति तुन बेस समझेमांतोर इंजी दिसिंता। साधारण रूप ते प्रतिक्रांतिकारी पोल्लो ना निषेध कीयाना स्वाभाविक मंता। मति अविन प्रतिक्रांतिकारी पोल्लो ना लेक्का आयवा क्रांतिकारी पोल्लो ना लेक्का पेश कीतेके मीकिन अविन पेश कियाला अनुमति हिया लागियार। अद्रमासी माकिन इव पोल्लोंग कुन जांच कीयाना ओसो अविना खिलाफ संघर्ष लोप्पा मदद दोरकियर। भूमि पोरो रेंडु रकम ता पोरकांग मोडियंतांग उंदी अनाज ओसो दूसरा रोंडा। रोंडा तुन जमीन तल हर साल तेहकसियाना, साल ते बचोनो बेरा तेहकसी वाटना। मीट सिर्फ बेसता गब्बू वाले पुंगार पूयला हीतेके ओसो रोंडा तुन मोडियला हीवेके मीटु सिर्फ मीवा भूमि पोरो अनाज ता मोदोल तुने मोडियला हियाकिर अनि रोंडा ता उंदी वेने मोदोल मोडियला हीवीर। मीटु बाताल इतेकाई कड़ा तिके हंजी भूमि पोरोटा रोंडा तेहकसी वाटवेके अगा रोंडाए रोंडा आयार। उंदी रकम ता रोंडा ता वेने इस्तेमाल

आंता। अदिन तेहकसी भूमि दोड़ मिस्सतेके अदिना खतु बनेमांता। मीटु इदिना जरूरत हिल्ले इतिर। उंदी जरूरत हिल्ला वस्तु तुन बद्रम इस्तेमाल कियमूड़ांता। किसान लोरा किन हर साल भूमि पोरोटल रोंडा खिलाफ संघर्ष कीयाना अनि इद्रमे मना पार्टी लोप्पटा लेखक, कलाकार, समालोचक, प्रोफेसर लोर वेने हर साल विचारधारा लोप्पा रोंडा खिलाफ संघर्ष कीयाना। माटु बदे वस्तु तपेमासी फौलाद बनेमाता इंतोम अस्के अद वस्तु तुन संघर्ष ताकनास्के जांच किताद मंदिंता। रोंडा मोड़ियतास्के माटु अदिन तेहकसी वाटितोमा अन्तरविरोध कुना इद विपरीत पक्ष लगातार दिसिंता। रोंडा इंजे टल दस हजार साल पेरके वेने मोड़ियसोरे मंदिंता अदिन काजे माटु वेल्ले जोम एवनल संघर्ष कियाला काजे तैयार मंदाना।

सारांश ते 1956 साल मना काजे उंदी घटना-प्रधान साल मत्ता। अंतरराष्ट्रीय रूप ते खुश्वेव, गोमुल्का उर्ग वड़िय तेहता ओसो देश लोप्पा उंदी बेहरा ओसो जबरदस्त समाजवादी बदलाव किता साल मत्ता। इंजे वेन घटना-प्रधान कालम ताका मंता, विभिन्न रकम ता विचार वासोर मंदिंतांग। नन्ना इगा मत्ता सब्बे कामरेड्स इदिना पोरो ध्यान हींतिर इंजी आशा कींतान।

2

27 जनवरी ता भाषण

इंजे नाकिन ओसो उचुक पोल्लोंग कीयाना अनुमति हीमुटा।

पहली, माटु मना सफलतांग ना सही मूल्यांकन कीयाना। मना क्रांति लोप्पा ओसो मना निर्माण-कार्य लोप्पा सफलतांग मुख्य मंदिंतांग, कमजोरिंग ओसो गलतिंग वेने मंतांग। मना सफलतांग बचोन मत्तेकाई अविना पोरो घमंड कीयानायो। मति अविना मूल्य कम कीसी हूड़तेके गलती आंता, वेल्ले बेहरा गलती आयना लेक्का मंता। इद सवाल तुन आठवी केंद्रीय कमेटी ता दूसरा पूर्ण अधिवेशन लोप्पा हल किताद मंता। मति इद सम्मेलन लोप्पा इदिना बारबार चर्चा कीतेके उचुन कामरेड्स ना दिमाग ते इंजे वेने इद सवाल हल आतद हिल्ले इंजी साबित आंता।

खासकर जनवादी लोकुरा लोप्पा इद्रम ता पोल्लोग ताकसोरे मंदितांगः “मीटु हमेशा सफलतांग बुनियादी मंदितांग इतिरा। अद्रमासी बदे वेने समस्या तुन हल कियमूडायो। सफलतांग बुनियादी मंतांग इंजी सब्बे तोर पुत्तोर मति गलतिंग बारे ते बाता इंदानार? इतिरा।” मति असल इत्तेके सफलतांगे बुनियादी मंदितांग, इद पोल्लो ता बारे ते वडकवेके लोकुरा जोश कम आंता। सहकारी बदलाव कुना पोरो हारेमाता लेक्का आयनोर हिल्लेरा?

दूसरा, विस्तृत योजना ओसो नालुंग बगिल बंदोबस्त कीयाना जरूरी मंता हर मानेय काजे सही प्रबंध कीयाना। येनान लोप्पा वेने मना इदे नीति लागू आता। अगस्त 1944 ते “ता कुंग पाओ” पोरोल ता अखबार उंदी सम्पादकीय ते वेहताद मत्ता: “मीवा खिचड़ी अलग अट्टमाटू”। छुंग किंग समझौता-वार्ता ताकनास्के नन्ना “ता कुंग पाओ” ता इंचार्ज ओरा पोल्लो संगे पूर्ण सहमत मंतांग इत्तोर मति संगेन जनरलिज्मो च्यांग काई-शेक मावा तिंदना-उंडाना ता व्यवस्था कीतेके बेस लेवेके मावगा अलग खिचड़ी अट्टना विडचसी दूसरा हरीं हिल्ले। अस्के माटु च्यांग काई-शेक मुकाबला कियाला काजे हर मानेय काजे सही प्रबंध कीयाना इंजी नारा केयतोमा माटु मना देश ता संचालन किया मंतोमा। मना नीति इंजे वेने विस्तृत योजना ओसो नालुंग बगिल तल बंदोबस्त ताए मंता अनि हर मानेय काजे सही प्रबंध कीयाना। इदिना लोप्पा क्वोमिंगतांग विडसता सब्बे फौदी, सरकारी कर्मचारिरा काजे सही प्रबंध कीयाना वेने शामिल मंता। इदे आयवा थाइवान वित्तिता लोकुर वेने वापिस वाया परितोर। हौकवा मत्ता प्रतिक्रांतिकारिरा पूना बदलाव कीयाना अनि ओरा पिस्वल पिस्सना प्रबंध कीयाना आंता। जनवादी पार्टिंग कुन तासना अनि अविना सदस्य लोरा पिस्वल पिस्सना जिम्मेदारी एतना। सक्षिप्त ते माटु पूरा देश लोप्पाटा 60 करोड़ जनता ना जिम्मेदारी एतना। उदाहारण तुकू अनजा अस्सना-वम्मना कीयाना लोप्पा सरकारी इजारेदारी संगे माटु सब्बे शहरी आबादी ओसो अनाज ता कमी वाले नाहकुना परिवार कुना जिम्मेदारी एतितोमा। दूसरा उदाहारण शहरी नौजवान लोरा मंता। ओरा काजे बद्रमाई बदे रकम ता

प्रबंध कियालाए लागियर। ओरु स्कूल ते भर्ती आया परितोर, ग्रमीण इलाकांग लोप्पा कारखाना लेवेके सीमान्त इलाका ने काम किया परितोर। परिवार कुना लोप्पा बोरे वेने सदस्य लोरगा रोजगार हिल्ले, ओरकिन आर्थिक सहायता हियमूड़ायर, माटु बोनकिने करविने हायला हियवा लेक्कटा नीति लागू कीतोमा इव सब्बे विस्तृत योजना ओसो नालुंग बगिल बंदोबस्त लोप्पा वांतांगा। असल इत्तेर इद बद्रम ता नीति आंदू? इद समाजवाद ता निर्माण कियाला काजे सब्बे सकारात्मक ताकत कुन उंदी कीयाना नीति आंदू। इद उंदी रणनीतिक नीति आंदू। इद नीति तुन लागू कीतेके कम गड़बड़ आया परिता। विस्तृति योजना ओसो नालुंग बगिल ता बंदोबस्त ता पोल्लो सब्बे लोकरु किन स्पष्ट कीसीयाना।

कामरेड ख छिंग-शी वेहता लेक्का माटु सब्बे संभव आता तरीकांग परहकना। ओरु वेल्ले बेसे वेहतोर बारांकु इत्तेके माटु सब्बे संभव तरीकांग कुन परहकसी मुशिकल कुन दूर कीयाना। इद नारा ता प्रचार कीयाना। मना मुन्ने वेल्ले बेहरा मुशिकल कु हिल्लेके, वेरियाना जरूरी हिल्ले! इंजेटा परिस्थिति दीर्घकालीन अभियान तुकू बेस हिल्ले या? बारांकु इत्तेके अस्के माकिन बर्फ ता मेट्टांग ओसो दलदल मत्ता मैदान कुन वेंडा लागता। दीर्घकालीन अभियान ताकनास्के तातू डोड्डा वेंडता पेरके मना मुन्ने बद हरीं पोयसी दायना इंजी सवाल तेदिता अनि जवाब ते मोय्योल पोरो एव्वसोर मत्ता मेट्टांग विडचसी दूसरा बाताले हिल्ला मत्ता अनि अगा आबादी वेने वेल्ले उचुन मत्ता। अस्के माटु हजारो तरीकांग ओसो सौ तरीकांग संगे मुशिकल कुना पोरो काबू कीयाना इंजी आह्वान कीतोमा हजार तरीकांग ओसो सौ तरिकांग इत्तेके बातांग? हजार तरिकांग इत्तेके 999 तरीकांग लोप्पा ओसो उंदी तरिका जोड़े कीयाना अनि सौ तरीकांग इत्तेके 99 तरीकांग लोप्पा ओसो उंदी तरिका जोड़े कीयाना। मीटु इंजे एवनल वेल्ले कम तरीकांग ना सुझाव हीताद मत्ता। विभिन्न प्रांत ओसो केंद्रीय विभाग कुनगा बचोनो तरीकांग ओसो मंतांग। हर संभव तरीका परहकतेके जरूर मुशिकल कुन दूर कियमूड़ायार।

तीसरा, अंतरराष्ट्रीय परिस्थिति। मध्य-पूर्व ते स्वेज नहर घटना आता। नासिर पोरोल ता मानेय नहर ता राष्ट्रीयकरण कित्तोर, एडन पोरोल ता मानेय आक्रमणकारी सेना लोहतोर अनि आइजनहावर पोरोल ता तीसरा मानेय ओरा पेरके-पेरके अगा हंजी ब्रिटिश लोकरु किन हौकतोर अनि अद जागा तुन सिर्फ तम्मा कब्जा ते तासला आल्सतोर। ब्रिटिश पूंजीपति वर्ग(साजिश कीयाना, डांवपेज बने कीयाना) बस्के समझौता कीयाना इंजी बेस पुत्ता। मति इंजे अदु गलती कित्ता अनि मध्य-पूर्व तुन अमेरिका कैदे दायला हीता। इद वेल्ले बेहरा गलती मत्ता! इचोन बेहरा गलती ब्रिटिश पूंजीपति वर्ग ता इतिहास ते बचोन बेरा आता? इंजे ताना तल्ला बंडा ते कोहकतोर अनि वेल्ले बेहरा गलती कीयाना बाता कारण मत्ता? बारांकु इत्तेके अमेरिका ता दबाव वेल्ले मत्ता अनि ब्रिटिश पूंजीपति वर्ग मध्य-पूर्व पोरो ओसो उंदी कब्जा कीयाना ओसो अमेरिका तुन रोमी कियाला काजे वेल्ले जल्दबाजी कीतांकु गलती कित्ता। ब्रिटिश तोर तम्मा हमला ता मुख्य निशाना मिस्त्र देश तुन बने कित्ता या? हिल्ले, अदु ब्रिटिश ता चाल अमेरिका खिलाफ मत्ता अनि अमेरिका ता चाल ब्रिटिश खिलाफ मत्ता।

इद घटना तल माटु नेंड दुनिया ता संघर्ष ता गुरुत्व-केंद्र तुन हूडा परिंतोमा। साम्राज्यवादी देश ओसो समाजवादी देश कुना नडमा ता अंतरविरोध वेल्ले तीव्र अंतरविरोध आंदू। मति साम्राज्यवादी देश इंजे कम्युनिज्म-विरोधी पोरोल ते विभिन्न इलाकांग पोरो कब्जा कियाला काजे आपस ते होड किया मंतोर। ओरु बद-बद इलाका काजे ऊंदना-पिडंगना किया मंतोर? एशिया ओसो अफ्रीका ता सौ करोड आबादी मंदाना इलाकांग कुना काजे आया मंता। इस्साल ओरा ऊंदना-पिडंगना बेहरा रणनीतिक महत्व वाले मध्य-पूर्व ते ओसो खासकर मिस्त्र ता स्वेज नहर इलाका पोरो केंद्रित मंता। मध्य-केंद्र ते रेंडु रकम ता अंतरविरोध इद्रम मंतांगः पहली, विभिन्न साम्राज्यवादी ताकत नडमा अंतरविरोध कु ओसो मूंड रकम ता ताकत कुना नडमा टकराव आया मंता। इव रेंडु रकम ता अंतरविरोध इत्तेके अमेरिका ओसो ब्रिटिश, अमेरिका ओसो फ्रांस नडमा

ता अंतरविरोध; दूसरा, साम्राज्यवादी ताकत ओसो उत्पीड़ित राष्ट्र नइमा ता अंतरविरोध। इव मूंड रकम ता ताकतकु इद्रम मंतांग: पहली, अमेरिका इदु सबसे बेहरा साम्राज्यवादी ताकत आंदू; दूसरा, ब्रिटिश ओसो फ्रांस इव दूसरा नंबर ता साम्राज्यवादी ताकतकु आंदुंग; तीसरा, उत्पीड़ित राष्ट्र। एशिया ओसो अफ्रीका नेंडु साम्राज्यवादिरा ऊंदना-पिड़ंगना मुख्य इलाकांग आंदुंग। इव इलाकांग लोप्पा राष्ट्रीय स्वाधीनता आंदोलन ता उदय आता। इविना पोरो अमेरिका बस्केने हिंसात्मक तरीका लागू कींता अनि बस्केने अहिंसात्मक, मध्य-पूर्व ते इद्रम ता चाल ताकसोर मंता।

अविना आपसी अंतरविरोध तले मावा हित साबित आंता। माटु समाजवादी देश कु खुद किने सुदृढ़ कीयाना ओसो तम्मा उंदी बित्तामेंड भूमि वेने कैदल दायला हियवा लेक्का नीति अमल कीयाना। बोरे वेने भूमि पोरो कब्जा कियाला कोशिश कीतेके ओरा खिलाफ जरूर संघर्ष कीयाना। इद मना लक्ष्मण-रेखा आंदू, इदिनकु हब्बार ओरकिन आपस ते झगड़ा कीयाना अनुमति मंदिता। अस्के माटु वड़किंतोमा, वड़कोम? इंगो, माटु वड़किंतोमा। माटु एशिया, अफ्रीका ओसो लेटिन अमेरिका ता जनता ना साम्राज्यवादी-विरोधी संघर्ष, विभिन्न देश कुना जनता ना क्रांतिकारी संघर्ष ता जरूर समर्थन कींता।

साम्राज्यवादी देशकु ओसो मना नइमा ता संबंध कुना बारे ते हूड़तेके अवु “अवु मावा नइमा मंतांग अनि माटु अविना नइमा”। माटु अव देश कुना जन-क्रांतिंग ना समर्थन कींतोम अनि अवु मनगा उन्मूलनकारी कार्रवाईंग कींतोम। अविना नइमा मना लोकर मंतोर, ओरु अव देश कुना कम्युनिस्ट, क्रांतिकारी मजदूर, किसान, बुद्धिजीविर ओसो प्रगतिशील लोकर आंदुर। मना नइमा वेने ओरु मंतोर। चीन ताए उदाहरण हूड़ाटू, मनगा ओरा मानेय मंतोर ओरु पूंजीपति वर्ग, जनवादी पार्टिंग ना वेल्ले लोकर ओसो जर्मीदार वर्ग। इंजे वीरु बेसता व्यवहार कीयाना लेक्का बदे गड़बड़ कियवा लेक्का दिसंतोर। मति पेकिंग पोरो उंदी परमाणु बम वाटतेके ओरु बाता कियनूर? ओरु क्रांति कींतोरा? इद वेल्ले डावुट मत्ता लेक्का पोल्लो मंता। श्रम संगे सुधरे कीयाना आपराधिरा सवाल,

शच्याच्चांग ना विद्यालय लोप्पा गडबड कियानोरा बारे ते ओसो पेकिंग ता हजारो लोकरु किन फैरिंग कीसी हौकना इंजी सवाल तेहता कालेज विद्यार्थीरा पोरो वेने इदे पोल्लो लागू आंता। माटु ओरकिन मना लोप्पा शामिल कीयाना अनि जमींदार ओसो पूंजीपतिर किन श्रमिक लेक्का बदले कीयाना। इद वेने उंदी रणनीतिक उसूल आंदू वर्ग खत्म कियाला काजे उंदी वेल्ले बेहरा टाईम ता जरूरत मंता।

संक्षेप ते अंतरराष्ट्रीय परिस्थित ता बारे ते मना मूल्यांकन इंजे वेने उपनिवेश काजे ऊंदना-पिडंगना कीयाना साम्राज्यावादी देश कुना वहहचाड उंदी बेहरा अंतरविरोध आंदू तम्मा ओसो मना नडमा ता अंतरविरोध ता कवर ते ओरु तम्मा नडमा ता अंतरविरोध तुन मुच्चना कोशिश किया मंतोरा। माटु ओरा अंतरविरोध ता फायदा एता परितोमा इदु मना विदेशी नीति काजे उंदी महत्वपूर्ण पोल्लो मंता।

इंजे चीन-अमेरिका संबंध कुना बारे ते उचुन पोल्लोंग कियाकाना। माटु च्यांग कार्ड-शेक ना पोरोल ते आइजनहावर ना चिट्टी ता कापी तैयार कीसी मीवा नडमा तूसतोमा। नावा हिसाब ते इद चिट्टी मुख्य रूप ते च्यांग कार्ड-शेक ना पोरो दडिंगता एर दोस्सना अनि पेरके ओना लोप्पा उचुन हिम्मत निहहचियाना काम कींता। चिट्टी लोप्पा दिमाग शांत तासना अनि भावनात्मक रूप ते कमजोर आयवा मंदाना जरूरी मंता, इत्तेके युद्ध या सहारा एतवा लेवा संयुक्त राष्ट्र संघ पोरो आधार आसी मंदाना। इद च्यांग कार्ड-शेक ना पोरो दडिंगता एर दोस्ससियाना बारांकि इत्तेके च्यांग कार्ड-शेक असल इत्तेके उचुन भावनात्मक रूप ते कमजोर आतोरा। च्यांग कार्ड-शेक ना लोप्पा हिम्मत निहहतला काजे आइजनहावर ओरु कम्युनिस्ट पार्टी पोरो लगातार कडी नीति लागू कीसोर मंदाना अनि तम्मा आशा मना नडमा आसोर मत्ता गडबड कुना पोरो केंद्रित कीयाना इंतोरा। आइजनहावर ना हिसाब ते गडबड पैदा आता, अदिन रोमी कियाला कम्युनिस्ट पार्टी तिगा बदे तरीका हिल्ले। बाताल आतेकाई इद परिस्थिति तुन हूडना हर मानेय ना दृष्टिकोण अलग-अलग मंदिता।

नन्ना इंजे वेने अमेरिका संगे राजनीतिक संबंध तासना काम तुन वेल्ले जोम रोमी कीसी तासना बेस आयार इंताना। इद मना हित कुना वेल्ले अनुकूल मंदिता। सोवियत संघ अक्तूबर क्रांति ता 17 साल पेरके ने अमेरिका संगे राजनीतिक संबंध तासताद मंता। 1929 ते उंदी विश्वव्यापी आर्थिक संकट वात्ता, अदु 1933 एवनल जारी मत्ता। 1933 ते जर्मनी ते हिटलर सत्तारूढ आतोर अनि अमेरिका ते रूजवेल्ट वातोर। सिर्फ अस्केने सोवियत संघ ओसो अमेरिका नडुमा राजनीतिक संबंध स्थापित किया परिंतोम। माटु संयुक्त राष्ट्र संघ लोप्पा मना जागा दोरकी कियाला काजे वेने अचोन जल्दी कीसोर हिल्लेम, अमेरिका संगे राजनीतिक संबंध स्थापित कियाला जल्दी कियवा लेक्का। इद नीति पोयसी माटु अमेरिका तुन परताचोन राजनीतिक पूंजी तल जेक कींतोम अनि अदिन विफल कीसी अलगाव ते वाटसिंतोम। मीटु माकिन संयुक्त राष्ट्र संघ लोप्पा नेंगला रोमी कींतिर अनि मना संगे राजनीतिक संबंध तासविर आंतिर; मीटु बचोन जोम बचोन बाधा वाटसोर मंतिर अचोने मीवा कर्जा तरगसोर दांता। मीटु बचोन बाधा वाटिंतिर, अचोन देश ओसो विदेशी लोकमत मुन्ने अचोने ज्यादा गलत साबिद आंतिर अनि अलगाव ते अरिंतिर। उंदी बेरा नन्ना येनान लोप्पा वरोर अमेरिका मानेय किन अमेरिका सौ साल एवनल मना सरकार तुन मान्यता हियाला इनकार किया परिंता, मति नाकिन 101वी साल ते वेने इद्रम कीयाना सफल आयार इंजी इताना। बस्केनाई अमेरिका तुन मना संगे राजनीतिक संबंध स्थापित किया लागियारे। अस्के अमेरिका लोकुर चीन वांतोर अनि नालुंग बगिल हूडिंतोर अस्के पछतेमायनूरा बारांकु इतेके अस्के चीन ता इद भूमि पूराए बदलेमासी मंदियर, लोता पूरा सफाई आसी मंदियर “नालुंग नुकसानदायक जंतु” ना नाश आसी मंदियर; ओरकिन वेल्ले दोस्त लोर दोरकोर आयनूर अनि ओरु उचुन किटाणु फैले कीतेके वेने ज्यादा नुकसान आयो आंता।

दूसरा विश्वयुद्ध पेरके पूंजीवादी देश कुन वेल्ले उथल-पुथल कुना सामना कीयाना लाग्गा मंता, ओरा जनता लोप्पा वेल्ले वेरीं पुटता। सब्बे देश कुना लोप्पा मुश्किल कु पुटतांग, ताना लोप्पा चीन वेने शामिल मंता।

मति बाकी देश कुना लोप्पा चीन तुकू कम मंता। मीटु इद समस्यांग पोरो ध्यान हीमुट अनि बोर वेरियंतोर, बोर वेरियोर इंजी हूडाटू। समाजवादी देश साम्राज्यावादी देश कुनल मुख्य रूप ते अमेरिका तल वेरियानाए लेवेके अदिना उल्टा कीयाना। नन्ना रेंडासी पक्ष कुने वेरीं मंता इंताना। बद पक्ष दूसरा पक्ष तुकू ज्यादा वेरियंता? नावा हिसाब ते साम्राज्यवादी देश माकिनकु ज्यादा वेरियंता। इद मूल्यांकन कीयाना उचुन खतरा मंता बारांकु इत्तेके इद्रम कीसी माटु सब्बे तोरु डोलता लेक्का हुंजितोम अनि मूंड दिव्यंग लगातार हुंजसोरे मंदिंतोम। अदिन काजे माटु रेंडासी संभावनांग कुन सुरता तासना। अनुकूल संभावनाए आयवा प्रतिकूल संभावना वेने मंदिंता, अदु साम्राज्यवाद अचानक बेय्यल आया वेने परिंता। लेवेके अदु हमेशा गडबड कीयाना कोशिश कीसोर मंदिंता। नेंडु ओरु काजे ओसो उंदी विश्वयुद्ध शुरू कीयाना अचोन हल्को हिल्ले, बारांकु इत्तेके इदिना कारण ते आयना नुकसान-फायदा ना बारे ते ओरकिन आल्सा लागिंता।

इंजे नन्ना चीन-सोवियत संबंध कुना बारे ते वेहाकाना। नावा हिसाब ते आपसी अंतरविरोध मंदाना जरूरी मंता। कम्युनिस्ट पार्टिंग नडमा वेने अंतरविरोध मंदा परिंतांग। मना दुनिया लोप्पा अंतरविरोध हिल्लेके ताका परवो। खुद मार्क्सवाद वेने उंदी अंतरविरोध संगे संबंध तासिंता, अदु अंतरविरोध ओसो संघर्ष कुना संगे संबंध तासिंता। अंतरविरोध हमेशा मंदिंतांग अनि बेगा अंतरविरोध मंदितांग अगा संघर्ष वेने मंदितांग। इंजे चीन ओसो सोवियत संघ नडमा वेने उचुन अंतरविरोध मंतांग। ओरु आल्सना ओसो काम कीयाना तरिका अनि ओरा पाडना आदतकु अलग मंतांग। अदिन काजे माटु ओरा नडमा समझे कीयाना काम कीयाना जरूरी मंता। नन्ना हमेशा मना कामरेड्स नडमा समझे कीयाना काम कीयाना इंताना। उचुन मुस ओरु कम्युनिस्ट आंदोम इंतोर अदिन काजे ओरुकिन वेने मनाए लेक्का मंदाना। अद्रम इत्तेके ओरकिन समझे कीयाना काम कीयाना जरूरत हिल्ले या? लोकुरा नडमा समझे कीयाना काम कीयाना इत्तेके संयुक्त मोर्चा ता काम कीयाना, जनवादी लोकुरा नडमा समझे कीयाना काम कीयाना। मति कम्युनिस्ट लोरा नडमा समझे कीयाना काम

बारांकु कीयाना? इद उंदी गलत दृष्टिकोण आंदू। कम्युनिस्ट पार्टी लोप्पा वेने अलग-अलग रायक मंतांग। उचुन मुल संगठनात्मक रूप ते पार्टी लोप्पा शामिल आंतोर, मति विचारधारात्मक रूप ते इंजे खुद किन तैयार किया परताद हिल्ले अनि पाइना कार्यकर्ता लोरा लोप्पा वेने उचुन मुल मना लेक्कटा भाषा ता इस्तेमाल कींतोर। अदिन काजे लोकुर विचारधारात्मक रूप ते खुद किन तैयार कियाला काजे हमेशा स्पष्ट रूप ते वडकना, व्यक्तिगत लेवेके सामूहिक रूप ते विचार-विमर्श कीयाना अनि बचोनो मीटिंग केयना।

नावा हिसाब ते परिस्थितिंग उचुन मुल किनकु इत्तेके बेहरा-बेहरा अफसर लोर किनक वेने ज्यादा शक्तिशाली मंदितांग। सोवियत संघ ता कट्टरपंथी तत्व बेहरा राष्ट्र ना शोविनिज्म पोरु अमल कीयाना जारी तासतेके ओरु परिस्थिति तल मजबूर आसी बाताले किया परवोर आंतोर। मना वर्तमान नीति इंजे वेने ओरा संगे प्रत्यक्ष वडकला मदद कीयाना। इंजे मना प्रतिनिधिंडल सोवियत संघ हत्तास्के माटु उचुन सवाल कुना पोरु प्रत्यक्ष चर्चा कीतोम। नन्ना फोन कीसी कामरेड चओ ऐन-लाइ किन वीरु तम्मा भौतिक सफलतांग दोरकतांकु माटु कोंडांग मुच्चिंतोम अनि इद समस्या तुन दूर कीयाना सबसे बेसता तरीका ओरकिन रांगनदु मंता। ओरु इव भौतिक सफलतांग बद्रम तावु मंदितांग? इव असल इत्तेके 5 करोड़ टन इस्पात, 40 करोड़ टन कोयला ओसो 8 करोड़ टन पेट्रोलियन विडचसी दूसरा बाताले हिल्ले। इद बदे मुशिकल पोल्लो हिल्ला। सिर्फ इवे वस्तु हूडसी तल्ला पोरो तरगिंतोर। वीरु बद्रम ता कम्युनिस्ट लोर आंदुर? वीरु बद्रम ता मार्क्सवादि आंदुर? नन्ना इद दस गुना आतेकाई सौ गुना आतेकाई इदिना बदे महत्व मन्नो आंता इंताना। मीटु भूमि तल वस्तु तेंडसी इस्पात बने कीतिर अनि पेरके कार, हवाई जहाज अनि इद्रम ता बचोनो वस्तुंग बने कीयाना विडचसी दूसरा बाताले कीविर। मति मीटु सब्बे तोर वेल्ले बेहरा बोजा कांजितिर अनि सब्बे क्रांतिकारी उसूल कुन विडसितिर। इद भौतिक सफलतांग दोरकतांकु घमंड कीयाना ए आंदू। वरोर मानेय पोरु पद ते एविंतोर अस्के वेने ओरु भौतिक सफलतांग नल घमंडी आया

परितोरा पहली सचिव बनेमायना वेने उंदी रकम ता भौतिक सफलता आंदू, अद्रमासी मानेय ना लोप्पा घमंड वाया परिता। बोराई मानेय घमंडी आतेके माटु ओना सख्त आलोचना किया लागिता। इंजे मास्को ते कामरेड चओ ऐन-लाई वेने ओरा आलोचना कितोर; अद्रमासी ओरु वेने वेल्ले कोल्हार कितोर। इव सब्बे पोल्लोल आमने-सामने आतांग। ओरु माकिन प्रभावित कीयाना कोशिश कितोर अनि माटु ओरकिन। मति माटु सब्बे सवाल कुना चर्चा कियवा लेवा उचुन पोल्लोंग गुप्त तास्तोमा अंतरविरोध हमेशा मंदितांग। बस्के एवनल परिस्थिति अनुकूल मंदिता अस्के एवनल माटु समान आधार परहकसी मतभेद कुन अलग तासा परितोम अनि पेरके अविन हल किया परितोम। ओरु जिद्द कीसी इदे हर्ी पोयसी ताकतेके उंदी दिव्या माकिन इव समस्यांग संगे खुल्ला लड़ाई लड़ेमाया लागियर।

माटु मना विदेशी प्रचार वेल्ले बेस कीयानायो। माटु नम्रता, बुद्धि-विवेक संगे काम कीयाना लेवेके नै दा लेक्का रेंडु कालकु नड़मा तन्ना तोका मकिह कीयाना। माटु सोवियत संघ तले करियाना जारी तासना। मति माटु सिर्फ उचुने पोल्लोंग करियाना सिर्फ विकसित पोल्लोंगे करियाना पेरका अरता पोल्लोंग आयो। पेरके अरता पोल्लोंग इनपड़े करियानायो। माटु अव गलती ना बारे ते पुंजी मत्तेके, अविना बारे ते अनुभव मत्तेके अविन दुहरे कीयाना तुके बचेमायना। मना काजे जरूरी मत्ता पोल्लोंग जरूर करियाना। माटु दुनिया ता सब्बे देश कुना सब्बे जरूरी पोल्लोंग करियाना। हर जागा हंजी ज्ञान ता खोज कीयाना। सिर्फ उंदी जागा ते हंजी खोज कीयाना अचोन बेस मन्नो आंता।

चौथा, सौ पुंगार पूयला हीमुट ओसो सौ विचारशाखांग लोप्पा होड़ आयला हीमुट। इद नीति हू फांग प्रतिक्रांतिकारी गुट ता खंडन कित्ता पेरके पेश कित्ताद मत्ता अनि नावा हिसाब ते इद बेसे बारांकु इत्तेके इद द्वन्द्ववाद अनुसार मंता।

द्वन्द्ववाद ता बारे लेनिन “संक्षेप्त ते, द्वन्द्ववाद तुन विपरीत तत्व कुना एकता ता सिद्धांत आंदू। इद्रम इत्तेके अदिना सारतत्व कैदे वांता मति

स्पष्टीकरण कीयाना ओसो अदिन पूर्ण बने कीयाना जरूरत मंदिता इंतोर।”² इद सिद्धांत ता बारे ते वेहाना ओसो अदिन विकसित कीयाना मावा काम आंदू। अदिना बारे ते वेहाना जरूरी मंता अनि माटु इंजे एवनल इद दिशा ते वेल्ले कम काम किताद मंता। अदिन विकसित कीयाना जरूरत मंता; क्रांति लोप्पा दोरकी कित्ता अनुभव कुना पोरो आधार आसी माटु इद सिद्धांत तुन विकसित कीयाना। लेनिन “विपरीत तत्व कुना एकता (अचानक, एक रूपता, समान कार्यवाही) परिस्थितिबद्ध, क्षणिक, अस्थाई ओसो सापेक्ष मंदिता। इद उंदी दूसरा बहिष्कृत कीयाना विपरीत तत्व ता संघर्ष विकास ओसो गति लेक्काने निरपेक्ष मंदिता।”³ इद विचार ता विकसित कीसेरे माटु सौ पुंगार पूयला हीमुट अनि सौ विचारशाखांग लोप्पा होड़ वाटना नीति पेश कितोर।

सही ता पिस्वल गलत तुकू बेहरा मंदिता अनि अदु गलत खिलाफ संघर्ष ताकनास्के विकसित आंता। बेसता ता पिस्वल लब्बड़ ता तुकू बेहरा मंदिता अनि लब्बड़ ता खिलाफ संघर्ष कीयानास्के विकसित आंता। लोकुर किन गलत, लब्बड़ तावु, दुश्मनी तत्व, आदर्शवाद ओसो अतिभौतिकवाद ता सम्पर्क ते ओसो कनफ्यूशियस, लाओ च ओसो च्यांग काई-शेक ना अंगडम ता पोल्लो ना संपर्क ते वायला हियवा मंदाना नीति उंदी खतरनाक नीति आंदू। अदु लोकुर किन मानसिक रूप ते उंदी बगिल आल्सना लेक्का कींता अद्रमासी ओरु दुनिया ता मुकाबला कीयाना ओसो चुनौतिंग ना सामनका कियाला काजे तैयार आया परवोर आयनूर।

दर्शनशास्त्र लोप्पा भौतिकवाद ओसो आदर्शवाद विपरीत तत्व कुना एकता ता उदाहरण आंदू, इवु उंदी दूसरा खिलाफ संघर्ष कींतांग। विपरीत तत्व कुना उंदी दूसरा जोड़ी आंदू (द्वन्द्ववाद ओसो अतिभौतिकवाद) पोरो वेने इदे लागू आंता। बस्के लोकुर दर्शनशास्त्र ता चर्चा कींतोर अस्के ओरु विपरीत तत्व वाले रेंडु रुझान कुना पोरोल जरूर एतितोर। इंजे सोवियत संघ लोप्पा इद्रम “जोड़ी” ना पोरोल एतना विड़सताद मंता अनि सिर्फ “एकल” कुना पोरो जोर हितोर। ओरु इगा सिर्फ बेसता गब्बू मत्ता पुंगार

पूयिंता अनि रोंडा ता निशान वेने मायिंता इंतोर। ओरु समाजवादी देश कुना लोप्पा आदर्शवाद ओसो अतिभौतिकवाद ता पिस्वल वेने मंदिंता इंजी मानेमायोर। असल ते आदर्शवाद, अतिभौतिकवाद ओसो रोंडा हर देश ते मंता। सोवियत संघ ते वेल्ले लब्बड़ ता रोंडा बेसता गब्बू वाले पुंगार ता रूप एतिता अनि वेल्ले अंगड़म ता पोल्लोंग किन भौतिकवाद लेवेके समाजवादी यथार्थवाद ता पोरोल हींतोर। माटु खुल्लम खुल्ला भौतिकवाद ओसो आदर्शवाद नड़मा, द्वन्द्ववाद ओसो अतिभौतिकवाद नड़मा अनि बेसता पुंगार ओसो रोंडा नड़मा संघर्ष आसोर मंदिंता। इद संघर्ष हमेशा ताकसोरे मंदिंता, हर मंजिल ते उंदी डाका मुन्ने हंजोर दांता।

इगा मंदाना सब्बे कामरेड्स भौतिकवाद ओसो द्वन्द्ववाद ता जानकारी तासिंतोर, नन्ना मीकिन पूरा जानकारी दोरकी कियाला काजे इविना विपरीत तत्व कुना इत्तेके आदर्शवाद ओसो अतिभौतिकवाद ता वेने उचुन अध्ययन कीयाना सुझाव हींताना। माटु कांट ओसो हेगेल, कनफ्यूशियस ओसो च्यांग काई-शेक ना लेख (सब्बे नकारात्मक वस्तु आंदू) पढ़ेमायना। मीटु आदर्शवाद ओसो अतिभौतिकवाद ता बारे ते पुनवा मत्तेके, अविना खिलाफ संघर्ष बस्के ने संघर्ष कियवा मत्तेके मीवा भौतिकवाद ओसो द्वन्द्ववाद मजबूत आया आंता। मना उचुन पार्टी सदस्य लोर ओसो पार्टी- बुद्धीजीविरा लोप्पा ओरु नकारात्मक वस्तुंग कुन पुनवा मंदानाए बेहरा कमी मंता। मार्क्स ना उंदी-रेंडु पुस्तक पढ़ेमाता पेरके ओरु सिर्फ इव पुस्तकिंग लोप्पा रास्ता पोल्लोंग कुने दुहरे कींतोर मति ओरा इव पोल्लोंग केंजनास्के हुस्कड़ वायना लेक्का मंदिंतांग। ओरा भाषणकु ओसो लेख कुना लोप्पा दूसरोर किन प्रभावित कीयाना क्षमता मन्नो आंता। मीटु नकारात्मक वस्तुंग ना अध्ययन कीवेके अविना खंडन बद्रम किया परिंतिर। मार्क्स-एंगेल्स लेवेके लेनिन इद्रम किताद हिल्ले, ओरु सब्बे समकालीन ओसो पूर्वकालीन वस्तु ना पोरो ज्ञान दोरकी कीयाना अनि अविना अध्ययन कीयाना वेल्ले कोशिश किंतोर, बाकी लोकर किन वेने इद्रमे कीयाना शिक्षा हित्तोर। मार्क्सवाद मूंड संघटक अंग कुना उत्पत्ति जर्मन क्लासिकी दर्शनशास्त्र, ब्रिटिश क्लासिकी राजनीतिक अर्थशास्त्र

ओसो फ्रांसीसी काल्पनिक समाजवाद लेक्कटा पूंजीवादी वस्तुंग ना अध्ययन कीयाना ओसो अविना खिलाफ संघर्ष कीयाना कोशिश नडुमा तले आता। इदिना लोप्पा स्टालिन अचोन सफलता दोरकी किताद हिल्ले। उदाहरण तुकू ओना कालम ते जर्मन क्लासिकी आदर्शवादी दर्शन तुन फ्रांसीसी क्रांति ता बारे ते जर्मन अमीर वर्ग ता उंदी प्रतिक्रिया वेहताद मत्ता। इद निष्कर्ष जर्मन क्लासिकी आदर्शवादी दर्शन ता पूर्ण निशेध कित्ता। स्टालिन जर्मन सेन्य-विज्ञान ता निशेध कित्तोर अनि जर्मन तुन हारे किताद मंता अदिन काजे अदिना सेन्य-विज्ञान अंगडम मंता अनि कलाउसेवित्ज' ना पुस्तकिंग इंजे पढेमायना लेक्का हिल्लेंग इतोर।

स्टालिन ना लोप्पा वेल्ले अतिभौतिकवाद मत्ता, ओरु वेल्ले लेकुर किन अतिभौतिकवाद पोयसी ताकला करिहतोर। “सोवियत संघ ता कम्युनिस्ट पार्टी (बोलशेविक) ता इतिहास, सक्षिप्त कोर्स” लोप्पा स्टालिन मार्क्सवादी द्वन्द्ववाद ता नालुंग प्रधान विशेषतांग मंदितांग इतोर। पहली विशेषता लेक्का ओरु वस्तु ना अंतरसंबंध कुना (अवु सब्बे वस्तुंग बदे कारण हिल्लाए अंतरसंबंधित मत्ता लेक्का) चर्चा कित्तोर। असल इतेके इद बद्रम ता अंतरसंबंधकु मंदितांग? इवु बदे वस्तु ता रेंडु विपरीत पहलू मंदितांग। हर वस्तु ता रेंजु विपरीत पहलू मंदितांग। चौथी विशेषता लेक्का ओरु सब्बे वस्तु ना लोप्पा अंतरविरोध कुना बारे ते चर्चा कित्तोर, मति ओरु सिर्फ विपरीत तत्व कुना संघर्ष ताए चर्चा कित्तोर अविना एकता ता बारे ते वेहताद हिल्ले। द्वन्द्ववाद ता बुनियादी नियम, इतेके विपरीत तत्व कुना एकता ता नियम अनुसार विपरीत तत्व कुना नडुमा संघर्ष वेने मंता अनि एकता वेने अवु उंदी दूसरा तुन बहिष्कृत वेने कींतांग अनि अंतरसंबंधित वेने मंदितांग। अद्रमासी अवु विशेष परिस्थिति ते उंदी दूसरा लेक्का बदलेमांतांग।

सोवियत संघ लोप्पा संकलित “दर्शनशास्त्र ता संक्षिप्त कोश” तो चौथा संस्करण लोप्पा कित्ता “एकरूपता” ता चर्चा लोप्पा स्टालिन ना दृष्टिकोण दिसंता। ताना लोप्पा “युद्ध ओसो शांति, पूंजीपति वर्ग ओसो सर्वहारा वर्ग, पिस्वल ओसो हामुर लेक्काने बाकी घटनांग लोप्पा

एकरूपता मंदा परवो, बारांकु इत्तेके अवु मूल रूप ते उंदी दूसरा ता विरोध ओसो उंदी दूसरा तुन बहिष्कृत कीतांग” इंजी वेहताद मंता। दूसरा माटा ने मूल रूप ते उंदी दूसरा ता विरोध कीयाना इग घटनांग नड़मा मार्क्सवादी एकरूपता मन्नो आंता; इव सिर्फ उंदी दूसरा तुन बहिष्कृत कीतांग, अंतरसंबंधित हिल्ले अनि विशेष परिस्थिति ते उंदी दूसरा लोप्पा बदलेमायोंग आंतांग इंदाना पोल्लो इनपड़े गलत मंता।

ओरा हिसाब ते युद्ध सिर्फ युद्ध आंदू ओसो शांति सिर्फ शांति आंदू, इव रेंडासी सिर्फ उंदू दूसरा तुन बहिष्कृत कीतांग अनि इविना नड़मा बदे रकम ता बदे संबंधि हिल्ले, युद्ध शांति लेक्का बदलेमाया परवो ओसो शांति युद्ध लेक्का बदलेमायो। लेनिन क्लाउसेवित्ज ना “युद्ध बाकी साधन कुना संगे राजनीति ताए जारी रूप आंदू”⁵ इंदाना पोल्लो ता बारे ते वेहतोरा शांति कालम ता संघर्ष राजनीतिए आंदू, युद्ध वेने राजनीतिए आंदू, ताना लोप्पा उचुन विशेष साधन कुना इस्तेमाल आंता। युद्ध ओसो शांति उंदी दूसरा तु बहिष्कृत वेने कीतांग अनि अंतरसंबंधित वेने मंदितांग, विशेष परिस्थिति लोप्पा उंदी दूसरा लेक्का बदलेमाया वेने परितांग। शांति कालम ते युद्ध बगिल दायना तत्व पुटसोर हिल्वेके युद्ध अचानक बद्रम आया परिता? युद्ध कालम ते शांति बगिल दायना तत्व पुटवेके अचानक शांति बद्रम पुट्टा परिता?

पिस्वल ओसो हामुर उंदी दूसरा लेक्का बदलेमाया परतेके मीटु इव जीव-जंतु बेगाडल वातांगो वेहा परितिरा? भूमि पोरो मुन्ने बदे जीव-जंतु हिल्ला मत्ता इत्तेके जीव-जंतु निर्जीव पदार्थ तल बदलेमायना मुन्ने हिल्ला मत्ता। सब्बे चेतन पदार्थ इत्तेके चयापचय-क्रिया मंदिता, अवु बेरसिंतांग, पुट्टी कीतांग अनि डोल्लिंतांग। पिस्वल मत्तास्के पिस्वल ओसो हामुर नड़मा हमेशा संघर्ष मंदिता अनि अवु हमेशा उंदी दूसरा ते बदलेमासोर मंदितांग।

पूंजीपति वर्ग ओसो सर्वहाराव वर्ग उंदी दूसरा लोप्पा बदलेमाया परतेके क्रांति संगे सर्वहारा वर्ग शासक बद्रम बनेमाया परिता, पूंजीपति वर्ग शासित बद्रम बनेमाया परिता? उदाहरण तुकू माटु ओसो च्यांग काई-शेक

ना क्वोमिंगतांग उंदी दूसरा तुकू विपरी मंता। रेंडु विपरीत पहलुंग आपस ते संघर्ष कीयाना ओसो उंदी दूसरा तु बहिष्कृत कीतांकु मना ओसो क्वोमिंगतांग ता स्तर बदलेमाता इत्तेके ओरु शासक तल शासित बनेमातोर, अनि माटु शासित तल शासक बनेमातोमा क्वोमिंगतांग ता (थाइवान तल वित्तिता 10 प्रतिशत लोकुर) बाकी 90 प्रतिशत लोकुर मुख्य भूमि ते मत्तोर। माटु इव 90 प्रतिशत लोकुरा पूना बदलाव किया मंतोम; इद पूना परिस्थिति ते विपरीत तत्व ता एकता आंदू। थाइवान वित्तिता 10 प्रतिशत लोकुरा संगे वेने मना संबंध विपरीत तत्व कुना एकताए इंतोम अनि अविन वेने संघर्ष संगे बदलाव कियमूडांता।

स्टालिन विपरीत तत्व कुना संघर्ष ओसो अविना एकता नडमा ता संबंध कुन हूडा परवो आतोर। सोवियत संघ ते उचुन मुल ता आल्सना तरीका अतिभौतिकवादी ओसो गैर-लचीला मंता, अद्रमासी ओरु बदे वेने वस्तु तुन उंदे लेक्का हूडंतोर अदिन दूसरा रकम ते हूडला कोशिश कीवोर विपरीत तत्व कुना एकता तुन समझेमायोर। अदिनके अगा राजनीतिक गलतिंग आंतांग। माटु विपरीत तत्व कुना एकता पोरो डटेमासी मंतोम अनि सौ पुंगार पूयला हियाना ओसो सौ विचारशाखांग लोप्पा होइ वाटना नीति लागू कींतोर। बेसता गब्बू वाले पुंगार पूयसोर मंदानास्के लब्बइ ता गब्बू मत्ता रोंडा अनिवार्य रूप ते मोडियंता। इदिना लोप्पा वेरियाना लेक्का बदे पोल्लो हिल्ले, विशेष परिस्थिति ते अदिन उंदी इस्तेमाल कीयाना लेक्कटा वस्तु लेक्का बदले किया परिंतोर।

उचुन घटनांग उंदी विशेष कालम ते अनिवार्य रूप ते आंतांग अनि प्रकट आता पेरके अविन हल कीयाना तरिका परहकमूडांता। उदाहारण तुकू, मुन्ने, नाट्य-भंडार पोरो कड़ा नियंत्रण तासानोर अनि बस्के ने इद नाटक पोरो प्रतिबंध वाटनोर अनि बस्केन अद नाटक पोरो प्रतिबंध वाटानोर। प्रतिबंध गुचिह किता तुरंत दैत्य ओसो दानव कुना बारे ते “प्रेत कुना कारियल बेसिन ना कहानी” ओसो “वज्रदेव ना बदला” लेक्कटा नाटक-ऑपेरा रंगमंच ते वायना शुरू आतांग। इद घटना ता बारे ते मीटु बाता आल्संतरि? नावा हिसाब ते इविना रंगमंच पोरो वायना उंदी बेसताए

पोल्लो आंदू वेल्ले लोकरु दैत्य ओसो दानव लोर किन रंगमंच पोरो बस्के ने हूड़ताद हिल्ले अनि ओरु इद बेकार ता भूमिका ता चित्र हूड़तेके वस्तु रंगमंच ते पेश कीसोर मत्तेके इदिन रोमी कीयाना। अस्के इद्रम ता नाटक-ऑपेरांग ना खंडन कियमूडायर अनि अविना लोप्पा बदलाव कियमूडायर लेवेके अविना पोरो प्रतिबंध वाटमूडायर। उचुन मुल उचुक स्थानीय ऑपेरा वेल्ले खराब मत्तांकु स्थानीय लोकरु वेने अविना विरोध कींतोर। नावा हिसाब ते ओरा लोप्पा उचुन लेख पेश कीतेके बसे। व्यवहार संगे इद निर्णय आयला हीतेके इव लेख टिकेमाया परिंता या हिल्ले बचोन दर्शक लोर किन आकर्षित किया परिंतांग; जल्दबाजी ते अविना पोरो प्रतिबंध वायनायो।

इंजे माटु “संदर्भ समाचार” ता वितरण 2 हजार कापी तल बेरसी कीसी 4 लाख कापी कीयाना अनि पार्टी लोप्पा ओसो बाहर ता लोकरु किन पढेमायना लेक्का कीयाना इंजी निर्णय कीतोम। इदिन कम्युनिस्ट पार्टी साम्राज्यवाद बगिल तल प्रकाशित कीयाना अखबार मानेमायमूडंता, बारांकु इतेके इदिना लोप्पा मावा पोरो चिकला वाटना प्रतिक्रियावादी बयान वेने प्रकाशित कींतोर। माटु इद्रम बारांकु कींतोम? इदिना उद्देश्य लब्बड़ ता रोंडा तुन ओसो गैर-मार्क्सवाद लेवेके मार्क्सवाद-विरोधी वस्तुंग कुन मना कामरेड्स, जन समुदाय ओसो जनवादी लोकरु मुन्ने पेश कीसी ओरकिन फौलाद बने कीयाना। इव वस्तुंग कुन कूजी वाटनायो इद्रम कीयाना वेल्ले खतरनाक साबित आंता। इदिना बारे ते मना तरीका सोवियत संघ ता तरीका तुकू अलग मंता। चेचक ता टीका वाटना बारांकु जरूरी मंता? उंदी विषाणु कुन पूर्ण रूप ते मानव शरीर ते नेंगी कीसी अविना खिलाफ “क्रिटाणु युद्ध” शुरू कीसी शरीर लोप्पा रोग-अवरोधकता पुट्टिकियमूडंता। “संदर्भ समाचार” ओसो बाकी नकारात्मक अध्ययन-सामग्री प्रकाशित कीयाना कार्यकर्ता लोर ओसो जनता ना राजनीतिक रोग-अवरोधकता तुन बेरसी कियाला काजे “चेचक ता टीका वाटना” लेक्का मंता।

नुकसानदायक पोल्लो ना टाईम मत्तास्केने खंडन कीयाना, उदाहरण तुकू “पीपुल्स डेली” लोप्पा प्रकाशित आता “अनिवार्यता ता बारेते” हेडिंग ता लेख लोप्पा मना काम लोप्पा गलतिंग मंदाना जरूर हिल्ले, “अनिवार्य” शब्द तुन माटु मना निर्दोष साबित कियाला काजे इस्तेमाल कीतोमा इद उंदी नुकसानदायक पोल्लो आंदू इद लेख तुन प्रकाशित कीवेके बेस आंता। इदिन प्रकाशित कीतेके चुनौती ता मुकाबला कियाला काजे टाईम मत्तास्केने इदिना खंडन कीयाना तैयारी वेने कीयाना। हत्ता कालम ता अनुभव कुनल साबित आता, मना क्रांति ओसो निर्माण काम लोप्पा उचुन गलतिंग आयना बद्रमाई अनिवार्य मंदिता। “सर्वहारा तानाशाही ता ऐतिहासिक अनुभव कुना पुनर्विवेचना” हेडिंग ता लेख लोप्पा अनिवार्यता ताए उंदी मुख्य समस्या पोरो विचार किताद मंता मना कामरेड्स लोप्पा इद्रम ता गलतिंग कियाला बोर आल्सिंतोर? गलतिंग आता पेरके अविना जांच कीयाना आंता अनि शुरू ते सब्बे तोर किन सौ प्रतिशत मार्क्सवादी समझेमांतोरा। बदे डावुट हिल्ला माटु गलतिंग आयना जरूरी मंता, अदिन काजे माटु उचुन गलतिंग कीतेके बाताले आयो। काम कीयानास्के बदे गलती आयवा मंदाना संभवे हिल्ले। गलतिंग कम से कम ओसो सुडला मंदाना लेक्का सुरता तासना।

समाज लोप्पा गलत रुझान कुना पोरो जरूर काबू कीयाना। गलत रुझान कुना पोरो इत्तेके उचुने लोकुरा गलतिंग आयवा रुझान कुना लेक्का अवु पार्टी लोप्पा आयवा जनवादी लोकुर लेवेके विद्यार्थीरा लोप्पा नेंगसी मंदितांग अदिन काजे अविना पोरो जरूर काबू कीयाना। इदिना काजे तर्क संगे समझे कीयाना तरीका पोयना। समझे कियाला काजे हीता दलील प्रभावित कीयाना लेक्का मत्तेके गलत रुझान कुना पोरो काबू कियमूडांता। अवु प्रभावित कीयाना लेक्का हिल्लेके सिर्फ विरोध कीयाना लेक्कटा उंदी-रेंडु पोल्लोंग कीतेके गलत रुझानकु गंभीर रूप एतिंतांग। बेगा महत्वपूर्ण मुद्दा मिंदिता, अगा पूरा तैयारी कीयाना अनि सफलता ता गारंटी आतास्के खंडन कियाला काजे पूरा प्रभावित कीयाना लेख प्रकाशित

कीयाना। पार्टी-सचिव लोर खुद अखबार कुन देखरेक कीयाना अनि लेख रासना।

एकता संगे संघर्ष कीयाना रेंडु विपरीत तत्व कुना लोप्पटल उंदी तत्व जरूर प्रधान मंदिता अनि दूसरा मन्नो आंता। बदे डावुट हिल्वा, सर्वहारा तानाशाही वाले मना राज्य लोप्पा लब्बड़ ता रोंडा तुन बेहिसाब मोड़ियला हियानायो। पार्टी लोप्पा लेवेके विचारा धारा ओसो कला-साहित्य लोप्पा, माटु बेसता गब्बू वाले पुंगार ओसो मार्क्सवाद मुख्य ओसो प्रभुत्वकारी परिस्थिति ता गारंटी कीयाना कोशिश कीयाना। लब्बड़ ता रोंडा ओसो गौर-मार्क्सवादी, मार्क्सवादी-विरोधी वस्तु कुन काबू ते तासना। उंदी हिसाब ते इव रेंडासी ना नडमा ता संबंध कुना तूलना परमाणु ता केंद्रबिंदु ओसो इलेक्ट्रान नडमा ता संबंध कुना संगे कियमूडांता। परमाउ ता रेंडु हिस्सा मंदिता, केंद्रबिंदू ओसो इलेक्ट्रॉन। केंद्रबिंदू वेल्ले सुडला मंता मति वेल्ले मजबूत बोजा ता मंदिता। इलेक्ट्रॉन वेल्ले हल्को मंदिता, उंदी इलेक्ट्रॉन ता वजन असल इत्तेके सबसे हल्को केंद्रबिंदू तुकू लगभग 1800वां हिस्सा मंदिता। परमाणु ता केंद्रबिंदू तुन खंडित वेने कियमूडांता सिर्फ अदिना जुडेमायना शक्ति ज्यादा मंदिता। इलेक्ट्रॉन उचुन “उदारतावाद” तो दोषी मंदिता अविना लोप्पा बस्केने उचुन दांतांग अनि उचुन वांतांग। परमाणु ता केंद्रबिंदू ओसो इलेक्ट्रॉन नडमा ता संबंध वेने विपरीत तत्व कुना एकता ता सूचक आंदू। अविना लोप्पा उंदी प्रधान ओसो दूसरा मन्नो आंता। इद दृष्टिकोण ते सौ पुंगार पूयला हियाना अनि सौ विचाराशाखांग लोप्पा होड़ वाटना नीति ता फायदा मंता।

पांचवी, विद्रोह ता सवाला। समाजवादी समाज लोप्पा उचुन मुल विद्रोह कीयाना उंदी पूना समस्या आंदू, इदिना पोरो विचार कीयाना वेल्ले जरूरी मंता।

समाज लोप्पा हर वस्तु ते विपरीत तत्व ता एकता मंता। समाजवादी समाज लोप्पा वेने विपरीत तत्व कुना एकता मंता, विपरीत तत्व कुना इद एकता जनता ना पांत कुना लोप्पा ओसो मना ओसो दुश्मन नडमा वेने मंता। मना देश लोप्पा उचुन मुल विद्रोह बारांकु कींतोर? इदिना बुनियादी

कारण समाज लोप्पा सब्बे रकम ता सकारात्मक ओसो नकारात्मक विपरीत पहलु इंजे वेने मंता, विरोधी वर्ग, विरोधी लोकुर ओसो विपरीत राय इंजे वेने मंतांग।

माटु उत्पादन साधन कुना मालिकाना अधिकार समाजवादी बदलाव ता काम बुनियादी रूप ते पूरा किताद मंता, मति पूंजीपति वर्ग इंजे वेने मंता। संगेने जमींदार, धनी किसान, स्थानीय निरंकुश तत्व ओसो प्रतिक्रांतिकारी इंजे वेने मंतोर। माटु इद वर्ग ता सत्ता-सम्पत्ति ऊंदितोम अनि इदिना दमन कीतोम। ओरा लोप्पा होंग निंडसी मंता ओरा लोप्पा वेल्ले लोकुर मौका दोरकी कीसी बदला एतना कोशिश कींतोर। हंगरी ता घटना तास्के हंगरी ते गड़बड़ आतेके चीन लोप्पा वेने गड़बड़ आंता इदु बेसे। इद ओरा वर्ग ता आम रुझान आंदू।

उचुन जनवादी लोकुर ओसो प्रोफेसर लोर वेहता नाटकीय पोल्लोंग वेने मना विचार कुना विपरीत मंता। ओरु आदर्शवाद प्रचार कींतोर माटु भौतिकवाद ता पक्ष ते मंतोम। ओरु कम्युनिस्ट पार्टी विज्ञान ता निर्देशन किया परवोर, समाजवाद महान हिल्ले, सहकारी बदलाव गलत आंदू इंतोर, अनि माटु कम्युनिस्ट पार्टी विज्ञान ता निर्देशन किया परिंतोम, समाजवाद महान मंता ओसो सहकारी बदलाव वेल्ले बेसता बदलाव आंदू इंतोम।

विद्यार्थिरा लोप्पा वेने मना विरोध कीयाना लोकुर वेल्ले मंतोर। नेंडु वेल्ले कालेज-विद्यार्थी शोषक वर्ग कुना परिवार तल वातोर अदिन काजे इदिना लोप्पा बदे आश्चर्य आयना लेक्का हिल्ले, ओरा लोप्पटल उचुन मुल मना विरोध कींतोर। इद्रम तोर पेकिंग, शच्याच्यांग ओसो बाकी जागा ने वेने कलिया परिंतोर।

समाज लोप्पा उचुन मुल मना प्रांतीय कमेटिंग कुन “वत्तिता लाशकु” इंजी आरोप वाटितोर। नावा हिसाब ते ओरु डोलतादे हिल्ले अदिन काजे वत्तिता लाश कु बद्रम बनेमाया परिंतांग? वीरु मना प्रांतीय कमेटिंग कुन “वत्तिता लाशकु” इंजी आरोप वाटितोर अनि माटु अव

बस्केने डोलताद हिल्ले इंतोम; इव रेंडासी रायकु उंदी दूसरा ता विपरीत मंता।

मना पार्टी लोप्पा वेने रक-रकम ता विपरीत रायकु मंतांग। उदाहारण तुकू, सोवियत संघ ता कम्युनिस्ट पार्टी ता बीसवीं कांग्रेस उंदीए बेरा हमला कीसी स्टालिन किन खत्म कीयाना बारे ते रेंडु विपरीत रायकु मंतांग, उंदी राय इदिना विरोध कींता अनि दूसरा इदिना समर्थन कींता। पार्टी लोप्पा मतभेद हमेशा पुटसोर मंदितांग उंदी राय वायना उंदी-रेंडु महीना तेने पूना मतभेद पुटिंतांग।

लोकुर आल्सना तरीकांग कुन हूडतेके, तथ्य कुना संगे सत्य ता तलाश कीयाना, मनोगतवाद, इव रेंडासी उंदी दूसरा ता विपरीत मंतांग। नावा हिसाब ते मनोगतवाद हमेशा मंदिता। नेंडु 10 हजार साल पेरके मनोगतवाद ता निशान वेने मन्नो आंता इंजी आल्सनायो।

विपरीत पहलु हर कारखाना, हर कृषि सहकारी समिति, हर विद्यालय, हर संगठन लेवेके परिवार लोप्पा संक्षेप ते हर जागा ओसो हर बेरा मंदिंता। अदिन काजे समाज लोप्पा उचुन लोकुर कीयाना विद्रोह हर साल आसोर मंता।

माटु विद्रोह तुकू वेरियना या वेरियानायो? माटु कम्युनिस्ट लोकुर साम्राज्यवाद, च्यांग काई-शेक ना क्वोमिंगतांग, जर्मीदार वर्ग ओसो पूंजीपति वर्ग तुकू वेने बस्केने वेरियताद हिल्ले, ओसो इंजे माटु विद्यार्थि कीयाना विद्रोह ओसो किसान लोर सहकारी समितिंतिंग लोप्पा कित्ता कोल्हार तुकू वेरियतेके वेल्ले आश्चर्य ता पोल्लो मंदिंता। सिर्फ त्वान छी-रुइ ओसो च्यांग काई-शेक वेने इद्रमे मतोर वीरु वेने जनता ना विद्रोह तुन वेरियंतोर। हंगरी ओसो सोवियत संघ लोप्पा वेने लोकुर इद्रमे कींतोर वीरु विद्रोह तुकू वेरियंतोर। उचुन मुल कीयाना विद्रोह तुकु मना उंदी सकारात्मक रुझान पोयना नकारात्मक आयो रुझान आयो; इत्तेके माटु इविनगडल वेरियवा लेवा अविन हल कियाला तैयार मंदाना। वेरियतेके समस्या ता समाधान आयो। मीटु बचोन वेरियंतिर अचोने मीकिन वेरीं वेसिंता। मीटु विद्रोह तुकू वेरियवा लेवा अविन हल कियाला मानसिक रूप

ते तैयार हिल्वेके मीटु पहलकदमी किया परविर आंतरि। नावा हिसाब ते माटु बेहरा-बेहरा घटनांग काजे तैयार मंदाना। मीटु इद्रम तैयार मत्तेके इद्रम ता घटनांग आयोंग आयनुंग, मति मीटु अविना काजे तैयार हिल्वेके विद्रोह आया परिंता। बदे वस्तु ता विकास ता प्रक्रिया सिर्फ रेंडु संभावनांग मंदितांग, उंदी बेसता ओसो दूसरा लब्बड़ तादा अंतरराष्ट्रीय ओसो स्थानीय समस्यांग हल कियाला रेंडासी संभावनांग कुन सुरता तासना। मीटु इयेंड उंदी शांतिपूर्ण साल मंदिता ओसो इद्रम आया वेने परिंता। मति मना काम तुन अंदाज पोरो आधार आसी कीयाना बेस आयो, इदिना विपरीत मीटु मीवा काम तुन बस्केने वेने मुश्किल तुकू मुश्किल परिस्थिति वेने वाया परिंता इंदाना अंदाज पोरो आधार आसी कीयाना। अंतरराष्ट्रीय मुश्किल परिस्थिति लेक्का विश्वयुद्ध शुरू आया अनि परमाणु बन वाटमूडायर। देश लोप्पा मुश्किल परिस्थिति लेक्का देशव्यापी विद्रोह आयनुंग अनि उंदी “हंगरी ता घटना” आया, दसियों लाख लोकुर मना खिलाफ तेदानूर, बचोनो सौ काउंटिंग पोरो कब्जा कियानूर अनि पेकिंग पोरो हमला कियानूर। माकिन ओसो उंदी बेरा येनान दाया लागियर। माकिन पेकिंग लोप्पा इंजे 7 साल आतांग, 8वी साल माकिन येनान दायला वेहतेके माटु माता कीयाना? माटु मना नुकसाल कियाला काजे कोल्हार कीयाना लेवेके कन्नेर डोड्डा पोंगी कीयाना? बदे डावुट हिल्वा, इंजे माटु येनान लोहला काजे “नकली आक्रमण कीयाना अनि कोडा ता वेसूड पिङ्गसी पेरके गुच्चला” तैयार हिल्लेरा। पार्टी ता सातवीं कांग्रेस लोप्पा नन्ना मना 17 मुश्किल कुना मुन्ने ने अंदाजा वाटना इंजी वेहताना ताना लोप्पा उंदी हजार ली एवनल फैले माता वेत्तिता भूमि, गंभीर प्राकृतिक संकट ओसो अकाल मत्ता सब्बे काउंटी-केंद्र कुन पोहहतानवु शामिल मत्तांग। माटु इव सब्बे पोल्लोंग सुरता तासताद मत्ता, अदिन काजे पहल हमेशा मना कैदे मत्ता। इंजे माटु राजसत्ता दोरकी किताद मंता, मति माकिन वेल्ले मुश्किल संभावनांग ना मुन्ने ने अंदाजा वाटना।

उचुकु पोल्लो ना पोरो उचुन मुल नेतृत्व ते नौकरशाही, मनोगतवाद मत्तांकु मना राजनीतिक, आर्थिक नीतिंग लोप्पा गलतिंग मत्तांकु विद्रोह

कित्तोर। बाकी पोल्लो ने इदिना कारण मना कमजोर नीतिंग आयवा मना कार्यशैली ता कमजोरी मत्ता इदु वेल्ले गैर-लचीला मत्ता। उंदी दूसरा कारण प्रतिक्रांतिकारी ओसो गलत तत्व मत्तादु वेने मंता। उचुन मुल कीयाना विद्रोह तुन पूरा रोमी कीयाना असंभव मंता। इद अनिवार्यता ता दूसरा उदाहरण आंदू। मति बस्के एवनल माटु राजनीतिक कार्यदिशा ते बेहरा गलतिंग कीवोम अस्के एवनल देशव्यापी विद्रो मन्नोंग आतांग। इद्रम ता गलतिंग ना कारण ते देशव्यापी विद्रोह आतेकाई नावा हिसाब ते ओरु जल्दिए शांत आतांग अनि देश तुन पतन कीवोंग आतांग। बदे डावुट हिल्ला माटु मना काम बेस कीवेके इंजे वेने इतिहास चक्र पेरके तिरियर अनि उचुन जोम एवनल पेरके दायना संभव मंता। 1911 ता क्रांति तुन हारे माया लागियर; अदु वरोर सम्राट किन गद्दी तल रेयतेके दूसरा सम्राट ओसो पेरके युद्ध-सरदार सत्ता कब्जा कींतोर। समस्यांग क्रांति तुन जन्म हींतांग अनि क्रांति आता पेरके दूसरा समस्यांग पुट्टिंतांग। नाकिन उंदी देशव्यापी विद्रोह आतेके जनता ओसो जनता ना नेताल लोर, माटु खुद लेवेके बाकी लोकर मुन्ने वासी जरूरी परिस्थिति तुन अनुकूल कियानूर विश्वास मंता। इद्रम उंदी बेहरा विद्रोह संगे गज्जी ओरता लेक्का आतेके मना देश ओसो ज्यादा मजबूत आयार। बाताल आतेकाई चीन जरूर मुन्ने दांता।

उचुन मुल कीयाना विद्रोह कुन माटु प्रोत्साहित कीवोम, दूसरा उचुन विद्रोह कीसोर मतेके माटु ओरकिन इद्रम कीयाना हींतोम। मना संविधान लोप्पा हीता अधिकार कुना अनुसार जुलूस तेंडना अनि प्रदर्शन कीयाना आजादी मंता मति हड़ताल कीयाना आजादी हिल्ले, अदिना पोरु प्रतिबंध वेने वाटताद हिल्ले; अदिन काजे हड़ताल कीयाना संविधान ता उल्लंघन कीयाना आयो। उचुन मुल हड़ताल कियाला आल्सतेके याचिका पेश कियाला आल्संतोर अनि मीटु जबरन ओरकिन रोमी कीयाना कोशिश कीतेके बेस आयो आयर। नावा हिसाब ते बोराई गड़बड़ कीतेके गड़बड़ कियाला हियाना, बस्के एवनल ओरु इद्रम कियाला आल्संतोर अस्के एवनल ओरकिन इद्रम कियाला हियाना। मीटु जल्दबाजी ते अदिन खत्म कीतेके बस्केनाई ओसो उंदी बेरा गड़बड़

कींतोर। गड़बड़ कित्ता विद्यार्थीरा लोप्पा छुट्टी वायला हियमाटू अनि संघर्ष संगे समस्या तुन हल कीयाना, प्राचीन कालम ते मकसी मत्ता युद्ध लोप्प कित्ता लेक्का। इदिना बाता फायदा? इद समस्या तुन पूराए वेहच ते तत्ताना अनि सही-गलत नड़मा स्पष्ट विभाजन-रेखा पिड़ंगना लोप्पा मदद दोरकिता, अनि इद्रम सब्बे तोर तपेमासी फौलाद बनेमाया परितोर अनि विवेकपूर्ण ओसो गलत लोकर हारेमांतोर।

मीटु नेतृत्व कीयाना इद कला करियाना। हमेशा हर चीज तुन मुच्चना कोशिश कीयानायो। बस्के लोकर पोल्लोंग कीयाना शुरू कींतोर, हड़ताल कीयाना, याचिका पेश कीयाना कोशिश कींतोर अस्के उंदी रकम ता हमला तल परेके गुचना कोशिश कींतोर अनि हमेशा इद्रम आयनायो इंजी आल्लिंतोर। ओरु इद्रम बारांकु कींतोर? इदिनगडल ओरा अनिवार्य साबित आंता। मीटु हड़ताल कीयाना, याचिका पेश कीयाना अनि प्रतिकूल पोल्लोंग कियाला अनुमति हियानायो, हर पोल्लो ते दमन ता सहारा एतितोर, इद्रम कीसोरे उंदी दिया राक्षस बनेमांतोर। इद पोल्लो पार्टी लोप्पा निज्जम मंता अनि बाहार वेने। अंगड़म पोल्लोंग कीयाना, विचित्र घटनांग ओसो अंतरविरोध कुना संबंध कुन वेहच ते वायला हीतेके बेसा अंतरविरोध कुन वेहच ते वायला हीतेके अविन हल कीयाना जरूरी मंता।

विद्रोह कुन बचोनो हिस्सा ने तूसना अनि हल कीयाना। उंदी हिस्सा ते न्यायसंगत विद्रोह मंदितांग। इद्रम ता परिस्थिति ते माटु मना गलतिंग माने मायना अनि अविन सुधरे कीयाना। दूसरा हिस्सा ते अन्यायसंगत विद्रोह वांतांग, इद्रम ता विद्रोह कुना खंडन कीयाना। न्यायसंगत विद्रोह आयना अनि अन्यायसंगत विद्रोह बेगाने सफल आयनायो। तीसरा हिस्सा ते उचुन न्यायसंगत मत्ता अनि उचुन न्यायसंगत हिल्ला मत्ता विद्रोह वांता; माटु अविना न्यायसंगत पोल्लोंग करियाना अनि अन्यायसंगत पोल्लो ना आलोचना कीयाना; इगा माटु नियम कुना उल्लंघन कीसी परेके गुच्चना, हर मांग पूरा कीयाना किरिया कीयानायो। सिर्फ बेहरा स्तर ते असली प्रतिक्रांतिकारी विद्रोह ते विड़चसी, इदिना सशस्त्र दमन कीयाना जरूरी मंता, लोकरा पोरो बल प्रयोग कीयाना ओसो फायरिंग कीयाना लोप्पा

जल्दबाजी कीयानायो। 18 मार्च ता हत्याकांड⁶ त्वान छी-रुई ना नेतृत्व ते फायरिंग किताद मत्ता। अद्रमासी खुद त्वान छी-रुई खत्म आतोर। माटु ओना पोरो अमल कीयानायो।

विद्रोह कीसोर मत्ता लोकरु किन अलग-थलग कियाला ओसो अल्पसंख्यक पोल्लोंग कुन बहुसंख्याक तल अलग कियाला काजे माटु ओरा नड़मा बेस काम कीयाना। ओरा बहुसंख्या ता वेल्ले बेस मार्गदर्शन कीयाना अनि ओरकिन पूर्ण शिक्षा हियाना, इद्रम कीसी ओरु तीरम-तीरम बदलेमायनूर; और किन नुकसान कीयानायो। नन्ना इद पोल्लो हर जागा ते निज्जम साबित आंता, रेंडासी कोंटा ने कम लोकरु मंतोर अनि नड़मा ज्यादा। मध्यपंथी लोकरु कुन तीरम-तीरम तम्मा पक्ष ते कीयाना इद्रम कीतेके मना प्रभाव ज्यादा आंता। माटु विद्रोह कुना नेताल लोरा विश्लेषण कीयाना। लोकरु विद्रोह ता नेतृत्व कियानोरा लोप्पा उचुन मुल किन शिक्षित किता पेरके योग्य मानेय वेने बने कियमूड़ांता। मुट्टामेंड गलत लोकरु इतेक सिर्फ वेल्ले गंभीर अपराध कीयाना लोकरु किन विड़चसी बाकी तोर किन गिरफ्तार कीयाना, जेल ते वाटना लेवेके बरखास्त कीयाना जरूरत हिल्ले। ओरकिन तम्मा पाड़ना इकाई तेने मंदाला हियाना मति पूर्ण राजनीतिक पूंजी तल जेक कीयाना, अलगाव ता परिस्थिति ते वाटना अनि नकारात्मक उदाहरण संगे शिक्षित कीयाना शिक्षक लेक्का इस्तेमाल कीयाना। कामरेड तंग श्याओ-फिंग छिंगह्वा विश्वविद्यालय लोप्पा भाषण हियाला हत्तास्के हजारो लोकरु किन हौकना धमकी हीता विद्यार्थी किन शिक्षक बनेमायला वेहतोर। ओनगा बदे हथियार हिल्ले, मीटु बारांकु वेरियंतिर? मीटु ओनकिन अचानक तेंडसितेके मीवगा सफाई आयार मति मीकिन व्यापाक लोकरु समर्थन दोरका परवो आयार। मीटु अदिन मीवगडल तेंडसितेके दूसरा जागा ते रोजगार परहका लागिंता। अदिन काजे ओना लेक्कटा लोकरु किन जल्दबाजी ते तेंडसियाना उंदी सही तरीका हिल्ले। इद्रम तोर प्रतिक्रियावादी वर्ग कुना प्रतिनिधित्व कींतोर अनि इद सिर्फ उचुने मुल ता सवाल आयो। ओरा समस्या तुन जल्दबाजी ते हल कीतेके हल किता लेक्का आयर मति नकारात्मक उदाहरण लेक्का ओरा

भूमिका ता पूरा फायदा एतमूडायो आंता। सोवियत संघ लोप्पा कालेज-विद्यार्थी गडबड आतेके ओरा लोप्पा उचुन नेतृत्वकारीर किन तेंडमूडांता अनि गलत पोल्लोंग वेने शिक्षण-सामग्री लेक्का मावा सेवा कींतांग इंजी पुन्नोमा बदे डावुट हिल्ला हंगरी ता घटना लेक्का प्रतिक्रांतिकारी विद्रोह कीयाना उचुन मुल पोरो तानाशाही लागू कीयाना जरूरी मंता।

माटु जनवादी लोकुर किन ओरु तम्मा विपरीत राय कुना संगे माटु चुनौती हियाना ओसो पेरके-मुन्ने आयवा लेवा मना आलोचना कीयाना अनुमति हियाना। लेवेके माटु क्वोमिंगतांग लेक्काने मंदिंतोमा क्वोमिंगतांग आलोचना तले वेल्ले वेरियंता अनि राजनीतिक परिषद ता अधिवेशन आतास्के अदु सांगिंता। जनवादी लोकुर कीयाना आलोचनांग सिर्फ रेंडु रकम तांग मंदा परिंतांग, गलत ओसो सही रकम तावु। सही रकम ता आलोचनांग मना कमजोरिंग दूर कियाला मदद कींतांग अनि गलत रकम ता आलोचनांग ना खंडन कीयाना जरूरी मंता। ल्यांग शू-मिंग, फंग ई-हू ओसो चांग नाए-छी लेक्काटा लोकुरु इद्रम कियाला आल्सेते इद्रम कियाला हियाना। इदु मना काजे फायदा मंदिंता बारांकु इत्तेके इद्रम कीतेके सब्बे तोर ओरु सही कींतोरे लेवेके गलत कींतोर इंजी जांच किया परिंतोर। इद्रम वाद-विवाद संगे बहुसंख्या तुन मना पक्ष ते कियमूडांता अनि इद्रम ता लोकुर किन अलगाव ते वाटमूडांता। ओरु गडबड कियाला आल्सतेके ओरकिन कियाला हीमुटा। वेल्ले अन्याय कियानोर किन जरूरी खत्म कीयाना। ओना पोल्लोंग बचोन झूठ मंदिंतांग, बचोन बेहरा गलतिंग आयनुंग, अचोने बेस आयर बारांकि इत्तेके ओरु ओसो ज्यादा अलगाव ते अरिंतोर अनि तम्मा नाकारात्मक उदाहारण संग जनता तुन ओसो ज्यादा शिक्षित कियमूडांता। माटु जनवी लोकुरा संगे एकत् वेने कीयाना अनि ओरा खिलाफ संघर्ष वेने कीयाना, परिस्थिति अनुसार उचुन पोल्लो ने पहलकदमी संगे ओरा नडमा काम कीयाना अनि उचुक पोल्लो ना खिलाफ कार्यवाही कीयाना मुन्ने ओरकिन तम्मा मुक्कम तोहला हियाना मुन्ने ओरा पोरो हमला कीयानायो।

पूँजीवादी विचाराधार खिलाफ, गलता लोकरा खिलाफ ओसो गलत पोल्लो ना खिलाफ आयना संघर्ष उंदी दीर्घकालीन संघर्ष आंदू, इदु बचोनो दशाब्दिंग एवनल, बचोनो शताब्दिंग एवनल ताकिंता। इद संघर्ष ताकनास्के, मजदूर वर्ग, मेहनतकश जनता नडमा ता हिस्से ओसो क्रांतिकारी बुद्धिजीवी अनुभव दोरकी कीतेके तपेमासी फौलाद बनेमांतोर अनि इद वेल्ले फायदा आंता।

हर गलत वस्तु ता दोहरा रूप मंदिंता अदु गलत अनि सही वेने मंदिंता। इद मुद्दा ता बारे ते इंजे एवनल वेल्ले कामरेड्स ना विचार स्पष्ट आताद हिल्ले। उंदी गलत वस्तु लोप्पा वेने सही वस्तु मंदिंता। गलत लोकर ओसो गलत वस्तु किन सिर्फ गलते समझेमायना समस्यांग कुन उंदी बगिल ओसो अतिभौतिकवादी दृष्टिकोण ते हूडना, द्रनद्ववादी लेवेके मार्क्सवादी दृष्टिकोण ते आयो, गलत लोकर ओसो गलत वस्तु ना उंदी बगिल खराब मंदिंतांग अनि दूसरा बगिल भूमिका वेने निभे कींतांग। उदाहारण तुकू वांग मिंग ओसो गलत मानेय नकारात्मक उदाहारण संगे शिक्षित कीयाना शिक्षक ना लेक्का उंदी बेसता भूमिका निभे कित्तोर। अद्रमे उंदी बेसता वस्तु लोप्पा गलत तत्व वेने मंदिंता। उदाहारण तुकू मुक्ति पेरके 7 साल कुना लोप्पा दोरकता सफलतांग, खासकर हत्ता साल दोरकता बेहरा सफलतांग नल उचुन कामरेड्स ना दिमाग ते नेंगतांग अनि ओरु घमंडी बनेमातोर। उचुन मुल अचानक विद्रोह कीतेके इद्रमता कामरेड्स किन इव सब्बे अंदाजा तुकू बाहार मत्ता लेक्का आंता।

उंदी बगिल विद्रोह तल वेरियंतोर अनि दूसरा बगिल इद्रम ता पोल्लो तुरंत हल कीयाना मूल कारण समाजवादी समाज विपरीत तत्व कुना एकता मत्ता समाज आंदू इंजी मानेमायना तुकू इनकार कीयाना, ताना लोप्पा अंतरविरोध, वर्ग ओसो वर्ग-संघर्ष कुना पिस्वल मंदिंता।

वेल्ले जोम स्टालिन समाजवादी व्यवस्था लोप्पा उत्पादन संबंधन ओसो उत्पादक शक्तिंग नडमा, पोरो वेहता ढांचा ओसो आर्थिक आधार नडमा अंतरविरोध मंदिंता इंजी मानेमायला इनकार कित्तोर। तम्मा नाहकुना कुना उंदी साल मुन्ने ओरु “सोवियत संघ लोप्पा समाजवाद ता

आर्थिक समस्यांग” पोरोल ता पुस्तक रास्तास्के ओरु पेरके मुन्ने आसोरे समाजावादी व्यवस्था लोप्पा उत्पादन संबंध ओसो उत्पादक ताकत कुना नड़मा अंतरविरोध ता बारे ते वेहतोर अनि नीतिंग सही हिल्लेके बेसता योजनांग पंडवेके समस्या पुष्टिता। ओरु समाजवादी व्यवस्था लोप्पा उत्पादन संबंध ओसो उत्पादक शक्तिंग नड़मा अंतरविरोध, पोरोटा ढांचा ओसो आर्थिक आधार नड़मा ता अंतरविरोध कुना पक्काए महत्व ता सवाल लेक्का पेश कितोर अनि अंतरविरोध समाजवादी समाज तुन मुन्ने ओयना बुनियादी अंतरविरोध आंदू इंजी समझेमायोर आतोर। ओरु तन्ना शासन लोप्पा सब्बे सुरक्षित मंता इंजी आल्सानोर। माटु मना शासन लोप्पा सब्बे सुरक्षित मंता इंजी आल्सनायो; बारांकु इत्तेके सब्बे सुरक्षित मंता ओसो हिल्ले वेने।

द्वन्द्ववाद इसाब ते, मानेय उंदी दिया जरूर डोलिंतोर अद्रमे समाजवादी व्यवस्था वेने उंदी इतिहास लोप्पा मायना घटना लेक्का जरूर बनेमांता अनि कम्युनिस्ट व्यवस्था अदिन जरूर मिंजिह कींता। समाजवादी व्यवस्था, अदिना उत्पादन संबंध ओसो पोरो टा ढांचा ता अंत आया परवो इत्तेके इद बद्रम ता मार्क्सवाद आंदू? इद उंदी धर्मसूत्र लेवेके पेन बस्केने डोलो आंतोर इंजी प्रचार कीयाना धर्मशास्त्र लेक्का मंता या?

समाजवादी समाज लोप्पा जनता ओसो दुश्मन नड़मा ता अंतरविरोध, जनता नड़मा ता अंतरविरोध कुन बद्रम हल कीयाना, इद विज्ञान ता वेल्ले ध्यान हीसी अध्ययन कीयाना लेक्कटा शाखा आंदू। मना देश ता परिस्थिति ते, वर्तमान वर्ग-संघर्ष लोप्पा जनता ओसो दुश्मन नड़मा ता अंतरविरोध आंशिक रूप ते मंता। अवु जनता नड़मा ता अंतरविरोध लेक्का वेल्ले स्तर ते दिसिंता। इस्सल उचुन मुल विद्रोह किया मंतोर ओरु इदे परिस्थिति तुन तोहिंतोर। भूमि इंजे 10 हजार साल पेरके नष्ट आयाना मत्तेके कम से कम इव 10 हजार लोप्पा विद्रोह तो आसोरे मंदिंता। मति वायाना कालम ते 10 हजार साल पेरके आयना घटनांग पोरो काम कीयाना मावा जिम्मेदारी आयो। मना काम सिर्फ ओरा पंचवर्षीय योजनांग

ताकनास्के इद समस्या तुन हल कीयाना अनुभव दोरकी कीयाना पूरा कोशिश कीयाना मंता।

मावा काम तुन सुदृढ़ बने कीयाना अनि मना गलतिंग, कमजोरिंग कुन सुधरे कीयाना। असल ते बद्रम ता काम तुन सुदृढ़ कीयाना? उद्योग, कृषि, वाणिज्य ओसो संस्कृति, शिक्षा लोप्पा, सेना, सरकार ओसो पार्टी लोप्पा राजनीतिक, विचारधारात्मक काम तुन सुदृढ़ बने कीयाना। मीटु सब्बे तोर तम्मा-तम्मा काम संबंधित काम कियाला आर्थिक, सांस्कृतिक, शैक्षणिक, राष्ट्रीय प्रतिरक्षा, पार्टी पोल्लोंग संबंधित तम्मा रोज ता काम कियाला लगेमांतोर, मति मीटु राजनीतिक, विचारधारात्मक काम पोरो ध्यान हियवेके वेल्ले खतरनाक साबित आंता। इंजे मना पार्टी ता महासचिव कामरेड तंग श्याओ-फिंग खुद छिंगह्वा विश्वविद्यालय ते हंजी भाषण हितोर, मीटु वेने खुद मैदान ते रेयंतरि इंजी आशा कींताना। केंद्रीय कमेटी ओसो प्रांतीय, म्युनिसिपल, स्वायत्त प्रदेशीय पार्टी कमेटिंग ना नेतृत्वकारी कामरेड्स वेने खुद राजनीतिक, विचाराधारात्मक काम पोय्यना। दूसरा विश्वयुद्ध पेरके सोवियत कम्युनिस्ट पार्टी ओसो पूर्वी योरोप ता उचुन पार्टींग मार्क्सवाद ता बुनियादी उसूल कुन अचोन विचार कीवोंग। अवु वर्ग-संघर्ष, सर्वहारा तानाशाही, पार्टी-नेतृत्व, जनवादी केंद्रीयता, पार्टी ओसो जनता नड़मा ता संबंध कुना पोरो ध्यान हियाना विडस्तोर, अगा राजनीतिक वातावरण लोप्पा कमी वात्ता। अद्रमासी हंगरी ता घटना आता। माटु मार्क्सवाद ता बुनियादी उसूल कुना पोरो नितसी मंदाना। हर प्रांत ओसो हर म्युनिसिपलटी, स्वायत्त प्रदेश कु सैद्धांतिक काम कीयाना, मार्क्सवादी सिद्धांतकार ओसो टिप्पणीकार लोर किन योजनापूर्वक प्रशिक्षित कीयाना।

मना संगठन कुन दुरुस्त कीयाना। राज्य वर्ग-संघर्ष कुनाए उंदी साधन मंदिता। बदे उंदी वर्ग तुन राज्य मुन्ने तासमूड़ांता, इदिना संगठन प्रभुत्वकारी परिस्थिति वाले वर्ग ता लोकर किन उंदी तय कित्ता संख्या (कम संख्या) संगे कीयाना। ऑफिस ता काम काजे उचुन मुल ता जरूरत मंदिता मति, ओरु बचोन मत्तेके अचोने बेसा। इंजे राज्य-मशीनरी वेल्ले बेहरांग मंतांग,

अदिना लोप्पा वेल्ले विभागकु बेरसतांग अनि वेल्ले लोक्कुर ऑफिस लोप्पा उदसी-उदसी वीसिंग हौकसोर मंदितोमा इद समस्या तुन हल कीयाना। मुन्ने, कर्मचारिरा संख्या कम कीयाना; दूसरा, आचना कर्मचारिरा काजे सही व्यवस्था कीयाना अनि सब्बे तोर किन सही जागा ते लोहना। इद पोल्लो पार्टी, सरकार ओसो सेना पोरो लागू आंता।

बुनियादी इकाइंग ने हंजी समस्यांग ना अध्ययन कीयाना। केंद्रीय कमेटी कामरेड्स प्रांतकु, म्युनिसिपलटिंग, स्वायत्त प्रदेश, विभिन्न केंद्रीय विभाग कुना सब्बे नेतृत्वकारी कामरेड्स इद्रमे कींतोर इंजी आशा कींताना। इंजे नन्ना वेल्ले नेतृत्वकारी कामरेड्स इद्रम कीयाना विडसतोर इंजी केंजतान इद बेसे। केंद्रीय संगठन वेल्ले मुश्किल जागा मत्ता, अगा मीकिन बदे जानकारी दोरका परवो। मीटु ऑफिस ते उदसी-उदसी जानकारी दोरकी कियाला आल्सतेके मीवा कैदे बातलाई जरूर दोरकियर। असली जानकारी ता खोत कारखानांग, सहकारी समितिंग ओसो दुकानकु आंदुंगा। ऑफिस ते उदसी मीकिन स्पष्ट रूप ते कारखानांग, सहकारी समितिंग ओसो दुकान कुन बद्रम ताकि कीयाना इंजी पुंदा परविर। बचोन बेहरा ऑफिस मंदिता अचोने कम जानकारी मंदिता। समस्यांग हल कियाला काजे मीट खुद दोड़ दायना लेवेके दोड़ ता लोक्कुर किन पोरो कीयाना। मीटु खुद दोड़ हनवेके, दोड़ ता लोक्कुर किन केयवेके मीवा समस्या हल आया परवो आंता। नावा हिसाब ते प्रांतीय, म्युनिसिपल ओसो स्वायत्त प्रदेशीय पार्टी-कमेटिंग ना सचिव पदाधिकारीरा लेक्का उंदी काउंटी लेवेके कारखाना, विद्यालय ता पार्टी-कमेटिंग ना सचिव लोरा काम वेने कीयाना। प्रिफेक्चर लेवेके काउंटी पार्टी कमेटिंग ना सचिव पदाधिकारीरा लेक्का उंदी दोड़ ता इकाई ना पार्टी-कमेटी ना सचिव ना काम वेने कीयाना। इद्रम ओरु नालिंग बगिल मार्गदर्शन कियाला अनुभव दोरकी कींतोर।

जनता संगे घनिष्ठ संबंध तासना। जनता तल अलग-थलग मंदांना ओसो नौकरशाही पोरो अमल कीयाना कारण ते मीकिन जरूर देब्बा तिंदा लागिंता। हंगरी ता नेताल लोर जांच-पड़ताल, अध्ययन ता कमी मत्तांकु जनता ना परिस्थिति तुन पुनवा मंदितोर, बेहरा स्तर ते विद्रोह शुरू आता,

अस्के ओरकिन इदिना कारण समझेमायो आता। हत्ता दिव्याने मना उचुन केंद्रीय विभाग, प्रांतकु, म्यूनिसिपलटिंग ओसो स्वायत्त प्रदेश कुना पार्टी कमेटींग ना नेतृत्वकारी कामरेड्स जनता ना विचारधारात्मक रुझान कुना जानकारी दोरकी कितोर अनि उचुन मुल विद्रोह कीयाना तुकू ओसो दंगा कीयाना तैयारी किया मंतोर इंजी पुन्नोर अद्रमासी बाताले आतेके ओरा कै-कालकु तेदवा लेक्का आंतांग। माटु इद्रम ता परिस्थिति तल सबक एतना। केंद्रीय कमेटी कामरेड्स, विभिन्न प्रांत, म्यूनिसिपलटिंग, स्वायत्त प्रदेश ओसो केंद्रीय विभाग कुना इनचार्ज नेतृत्वकारी कामरेड्स हर साल उचुन टाईम टेंडसी कारखानांग, सहकारी समितिंग, दुकान ओसो विद्यालय लेक्कटा बुनियादी इकाइंग लोप्पा हंजी जांच-पड़ताल, अध्ययन कीयाना। जनता ना राजनीतिक परिस्थिति बद्रम मंता, बेरसता लेवेके मध्यम स्तर ता लेवेके पेरके अरता लोकर बचोन मंतोर ओसो मना जनकार्य बेस ताका मंताए हिल्ले इंजी इद्रम ता परिस्थिति ता स्पष्ट जानकारी दोरकी कीयाना। मजदूर वर्ग पोरो, गरीब, निम्म-मध्यम किसान लोरा पोरो ओसो विकसित तत्व कुना पोरो आधार आसी मंदाना बारांकु इत्तेके बोनाई पोरो आधार आसी मंदाना जरूरी मंता। सिर्फ इद्रम हंगरी लेक्कटा घटनांग नल बचे कियमूडांता।

छठवी, विधि-व्यवस्था ता सवाला। नन्ना इदिना बारे ते मूंड पोल्लोंग वेहाकानः कानून ता जरूर पालव कीयाना, प्रतिक्रांतिकारी किन जरूर खत्म कीयाना अनि प्रतिक्रांतिकारि किन खत्म कियाला दोरकी कित्ता मना सफलतांग ना बारे ते जरूर वेहचियाना।

कानून ता पालन जरूर कीयाना अनि क्रांतिकारी विधि-व्यवस्था ता उल्लंघन कीयानायो। विभिन्न कानून पोरोटा ढांचा ताये उंदी हिस्सा आंदुंगा। मना कानून मेहनतकश जनता खुद बने कित्ता। अबु क्रांतिकारी व्यवस्था तुन बेस ताकि कींतांग, मेहनतकश जनता ना हित कु, समाजवादी आर्थिक आधार ओसो उत्पादन ताकत कुना राका कींतोम। माटु सिर्फ जनवादी लोकर किने आयवा सब्बे तोर किन ओरु क्रांतिकारी विधि-व्यवस्था ता पालन कीयाना इंजी मांग कींतोम।

प्रतिक्रांतिकारीर किन जरूर खत्म कीयाना। इद काम इंजे योजना अनुसार पूरा कीतद हिल्ले अगा इयेंड पूरा कीयाना, इयेंड आखरी एवनल कियवेके वायना साल जरूर पूरा कीयाना। उचुन इकाइंग लोप्पा प्रतिक्रांतिकारीर किन खत्म कीयाना आंदोलन ताकी किताद मत्ता, मति ओरकिन पूरा खत्म कीतद हिल्ले, संघर्ष ताकनास्के सब्बे तोर किन खत्म कीयाना जरूरी मंता। प्रतिक्रांतिकारीरा संख्या वेल्ले हिल्ले इंजी मानेमायना। बेगा विद्रोह आंता अगा जनता प्रतिक्रांतिकारीरा प्रभाव ते वायो आंता, ओरा प्रभाव ते वात्ता लोकर वेल्ले कम मंतोर ओरु इंजे सिर्फ उचुने जोम ओरा प्रभाव ते मंदितोर। दूसरा बगिल, प्रतिक्रांतिकारिर इंजे वेने मंतोर ओरकिन खत्म कीयाना काम इंजे पूरा आताद हिल्ले इंजी मानेयमायना वेने जरूरी मंता।

प्रतिक्रांतिकारिर किन खत्म कियाला दोरकता सफलतांग ना बारे ते जरूर वेहाना। इव महान सफलतांग आंदुंगा। गलतिंग वेने आंतांग अविन बदे डवुट हिल्ला सुधरे कीयाना। माटु प्रतिक्रांतिकारिर किन खत्म कीयाना कार्यकर्ता लोरा पक्ष एतना अनि ओरकिन रांगना जनवादी लोकुरा कारण ते मना रुझान तुन नरमी वायला हियानायो। ओरु रोज रांगसोर मत्तेके पोड्रामेंड तित्ता पेरके ओरु रांगना विड़चसी दूसरा बदे काम किया परवोर; ओरकिन रांगला हीमुटा नावा हिसाब ते ओरु बचोन रांगितोर अचोन बेसा नावा वेहता मूंड पोल्लोंग ना खंडन वीर लोकुरा रांगइ संगे कियमूडायो।

कम्युनिस्ट पार्टी खिलाफ बचोन रांगताद मंता बोरे पुन्नोरा क्वोमिंगतांग माकिन “कम्युनिस्ट डाकू” इंजी आरोप वार्तिता। बोरे मावा संगे उचुन वेने सम्पर्क कीतेके ओरा पोरो “डाकू लोरा संगे सम्पर्क कीयाना” आरोप वार्तितोर। आखरी ते “डाकू” लोरे “गैर-डाकू” लोरकिनकु बेस मंतोर इंजी साबित आता। प्राचीन कालम तले बदे वेने प्रगतिशील वस्तु शुरू तले स्वागत कीयाना लेक्का आताद हिल्ले अनि हर प्रगतिशील वस्तु तुन अनिवार्य रूप ते रांगइ ता सामना किया लागता। मार्क्सवाद ओसो कम्युनिस्ट पार्टी तुन शुरू तले रांगइ ता सामना किया

लागता। नेंडु 10 हजार साल पेरके वेने प्रगतिशील वस्तु ना उदय आतेके शुरू ते ओरकिन रांगाड़ ता सामना कीयाना जरूरी मंता।

प्रतिक्रांतिकारी किन खत्म कीयाना जारी तासना, बेगा प्रतिक्रांतिकारीर मंतोर अगा ओरकिन खत्म कीयाना। विधि-व्यवस्था ता पालन कीयाना। कानून अनुसार काम कीयाना इतेके मना कै-कालकु दोहची तासना आंदू। प्रतिक्रांतिकारि किन परहकना पोरो वेने मना कै-कालकु दोहची तासना ओसो ओरकिन खत्म कियवा मंदाना गलत मंता। कानून अनुसार ओसो आजाद कै-कालकु ना संगे कार्यवाही कीयाना जरूरी मंता।

सातवी, कृषि ता सवाला। माटु इयेंड जबरदस्त फसल दोरकी कीयाना कोशिश कीयाना। इयेंड शानदार फसल दोरकी कीतेके लोकुरा विचार ते डावुट मन्नो आंता, सहकारी समितिं ग वेल्ले सुदृढ़ आंतांग। सोवियत संघ लोप्पा ओसो पूर्वी योरोप ता उचुन देश कुना लोप्पा सामूहिकीकरण ता कारण बचोनो साल एवनल अनाज ता उत्पादन अनिवार्य रूप ते कम आसोर हत्ता। माटु उचुन साल कु एवनल कृषि-सहकारिता पोरो अमल कीतेके ओसो हत्ता साल जोर-शोर ते अमल कित्ता मति मना अनाज-उत्पादन लोप्पा कमी वायना जागा ते बढ़ोत्तरी आसोर हत्ता। इयेंड फसल बेस आतेके इदिन कृषि-सहकारिता ता इतिहास लोप्पा ओसो अंतरराष्ट्रीय कम्युनिस्ट आंदोलन ता इतिहास लोप्पा मुन्ने बस्केने आयवा लेक्कटा घटना समझेमायमूड़ायर।

पूरा पार्टी कृषि तुन वेल्ले महत्व हियाना जरूरत मंता। कृषि ता राष्ट्रीय अर्थव्यवस्था ओसो जनता ना रहन-सहन संगे गहरा संबंध मंता। इदिना पोरो ध्यान हियाना बारांकु इतेके अनाज-उत्पादन तुन कैदे तासवा मंदाना वेल्ले खतरनाक मंदिता। इदिना पोरो ध्यान हियवेके उंदी दिव्या खतरनाक परिस्थिति पुट्टिता।

- 1) कृषि नाहकुना कुना 50 करोड़ आबादी तुन अनाज, हव्वी, तिंदना निय ओसो रोज ता काम वायना बाकी गैर-बिक्री कृषि-उत्पादन कुना सप्लाई काजे वेल्ले महत्वपूर्ण मंता। कृषि-

उत्पादन ता किसान लोर खुद इस्तेमाल कीयाना हिस्सा वेल्ले बेहरा मंता। उदाहारण तुकू हत्ता साल पुट्टी कित्ता 36,000 करोड़ चिन अनाज लोप्पटल वम्मना अनाज सरकार तल कृषि-कर लेक्का हियाना अनाज वेने शामिल मंता। लगभग 8000 करोड़ चिन मत्ता इदु कुल उत्पादन ता एक-चौथाई हिस्सा वेने हिल्ले, अनि तीन-चौथाई तुकू ज्यादा अनाज किसान लोरगा हत्ता। कृषि ता व्यवस्था बेस कीतेके किसान लोर आत्म-निर्भर आंतोर अनि 50 करोड़ जनता चिंता मुक्त आंतोर।

- 2) कृषि शहर ओसो औद्योगिक, खान कुना निवासि लोर किन खाद्य-पदार्थ सप्लाई कियाला वेने वेल्ले महत्वपूर्ण मंता। वम्मला काजे हाटुम ते कीयाना कृषि-उत्पादन बेरसिंता, सिर्फ अस्केने औद्योगिक आबादी ता मांग पूरा किया परमूडांता। कृषि-उत्पादन विकास संगे-संगे हाटुम काजे कीयाना कृषि-उत्पादन ओसो खासकर वम्मना अनाज बेरसी कीसोर दायना। हर मानेय किन गाटो दोरकतेके माकिन मुट्टामेंड लोकरा विद्यालय, कारखानांग लोप्पा गड़बड़ कियानोरा बारे ते आल्सना जरूरत मन्नो आंता।
- 3) कृषि ता हल्को उद्योग कुना काजे कच्चा माल ता मुख्य स्रोत आंदू अनि नहाकुना इलाकांग हल्को उद्योग कुना उंदी महत्वपूर्ण हाटुम आंदू। कृषि ता विकास आतास्केने हल्को उद्योग कुना काजे हालनाचो कच्चा माल दोरका परिंता अनि अदिना तैयार माल काजे व्यापक हाटुम दोरका परिंता।
- 4) नहाकुना इलाकांग बेहरा उद्योग कुना वेने उंदी महत्वपूर्ण हाटुम मंता। उदाहारण तुकू रासायनिक खाद, रक-रकम ते कृषि-मशीन ओसो विद्युत-शक्ति, कोयला, पेट्रोलियम ता उंदी अंश तुन नाहकुना ते सप्लाई कियमूडांता। रेल लाईन, राजमार्ग ओसो बेहरा-बेहरा जल-संरक्षण परियोजनांग, इव सब्बे वेने

कृषि ता सेवा कीतांग। नेंडु माटु समाजवादी कृषि-अर्थव्यवस्था ता निर्माण कित्ता मति नहाकुना इलाकांग मना विकासशील बेहरा उद्योग ओसो हल्को उद्योग कुना तैयार माल ता उंदी वेल्ले बेहरा संख्या हाटुम बनेमासोर दांता।

- 5) इंजे मना निर्यात-माल लोप्पा मुख्य रूप ते कृषि-उत्पादन शामिल मंता। अद्रमासी माटु विदेशी मुद्रा कमई कीतोम, अदिना संगे रक-रकम ता औद्योगिक साज-सामान अस्समूडांता।
- 6) कृषि पूंजी-संचय ता उंदी महत्वपूर्ण स्रोत मंता। इदिना विकास कीसी औद्योगिक विकास काजे ओसो ज्यादा पूंजी जमा कियमूडांता।

अदिन काजे माटु उंदी हिसाब ते कृषि खुद वेने उंदी उद्योग आंदू इंतोम। माटु औद्योगिक विभाग कुन नाहकुना बगिल ध्यान हियाना अनि कृषि ता समर्थन कीयाना इंजी समझे कीयाना। औद्योगिकरण तुन साकार कियाला काजे इद्रम कीयाना वेल्ले जरूरी मंता।

सहकारी समितिंंग ना कमाई लोप्पा कृषि काजे तय कित्ता बजट ओसो राज्य कृषि तल दोरकना कमाई बारांकु सही मंदांना? मीटु इदिना पोरो विचार-विनिमय कीयाना अनि इदिना पूरा हिसाब कीयाना। इदिना उद्देश्य कृषि तुन पुनरुत्पादन ता विस्तार कीयाना, उद्योग काजे ओसो ज्यादा बेहरा हाटुम हियाना, पूंजी-संचय ता ओसो ज्यादा बेहरा स्रोत बने कियाला तैयार कीयाना आंदू। मुन्ने कृषि तुन मना काजे ओसो ज्यादा पूंजी-संचय कीयाना, अस्केने अदु उद्योग कुना काजे ज्यादा से ज्यादा पूंजी-संचय किया परिंता। कृषि सिर्फ उद्योग कुना काजे ने पूंजी संचय कीतेके तन्ना काजे वेल्ले कम कींता या कीवो, इतेके “सब्बे मीनकु पोयला काजे तालाब ता पूरा एर लोस्कना” लेक्का आंता अनि उद्योग ता विकास काजे नुकसानदायक साबित आंता।

सहकारी समिति ना संचित-कोष ओसो अदिना सदस्य लोरा आमदनी पोरो वेने ध्यान हियाना। संचित-कोष तुन बेरसी कियाला काजे

सहकारी समितिं कुन मूल्य ता नियम ता इस्तेमाल कीसोरे आर्थिक लेखा तैयार कीयाना, मेहनत, बचत संगे काम कीयाना। इयेंड फसल बेस आतेके पूंजी-जमा हता साल तुकू उचुन ज्यादा आयना मति वेल्ले ज्यादा हिल्ले, बारांकु इत्तेके मुन्ने किसान लोरिन वेल्ले खाद्य-पदार्थ दोरकला हियाना जरूरत मंता। फसल बेस आता साल ते ज्यादा पूंजी-जमा कीयाना अनि गंभीर लेवेके कम गंभीर प्राकृतिक संकट वाले साल ते पूंजी-जमा कीयाना या कीयानायो। दूसरा माटा ने पूंजी-जमा कीयाना लहर कुना लेक्का वेंको-वंको हरीं ते मुन्ने दांता। दुनिया लोप्पा हर वस्तु खुद वेने उंदी अंतरविरोध मंदिता, विपरीत तत्व कुना एकता मंता अदिन काजे अदिना गति ओसो अदिना विकास हमेशा लहर कुना लेक्का मंदिता। सूर्य ता वेहच तुन वेहच-लहर इंतोरा रेडियो-स्टेशन तल प्रसारित लहर तुन रेडियो-तरंग इंतोरा, ध्वनि ता प्रसार ध्वनि-तरंग संगे आंता। एर जल-तरंग लेक्का पोंगिंता ओसो एद्दी एद्दी लेक्का। ताकना क्रिया वेने उंदी रकम ता लहर लेक्काने मंदिता, तीरम-तीरम ताकना लहर कुनाए उंदी रूप आंदू। ऑपेरा-गायन वेने लहर कुना लेक्का ने मंदिता, बारांकु इत्तेके गायक उंदी पद पारता पेरके दूसरा पद पारितोर, 7-8 पद उंदे बेरा पारोरा। रासना वेने लहर लेक्का मंता, बारांकु इत्तेके लोकुर सब्द कुन उंदी-उदी कीसी रासितोर, कलम पोयसी उंदे बेरा सैकड़ों शब्द रासा परवोरा। इद्रमे सब्बे वस्तु लोप्पा विपरीत तत्व कुना गति ता स्वरूप लहर लेक्का मंदिता।

संक्षेप ते माटु द्वन्द्ववाद इसाब ते व्यवहार कीयाना। कामरेड तंग श्याओ-फिंग इद्रमे इंतोरा। नावा हिसाब ते पूरा पार्टी द्वन्द्ववाद ता अध्ययन कीयाना अनि द्वन्द्ववाद इसाब ते व्यवहार कीयाना। पूरा पार्टी विचारधारात्मक, सैद्धांतिक काम पोरो ध्यान हियाना, मार्क्सवादी सैद्धांतिक कार्यकर्ता लोरा दस्ता तैयार कीयाना अनि मार्क्सवादी सिद्धांत कुना अध्ययन, प्रचार-प्रसार कीयाना वेल्ले कोशिश कीयाना। समाजवादी समाज लोप्पा वर्ग अंतरविरोध ओसो वर्ग-संघर्ष संबंधित पूना-पूना समस्यांग, अंतरराष्ट्रीय संघर्ष संबंधित पूना-पूना समस्यांग ना जांच

कीयाना ओसो अविना समाधान कियाला काजे विपरीत तत्व कुना एकता वाले मार्क्सवादी सिद्धांत कुन लागू कीयाना जरूरी मंता।

नोट

- 1) उंदी सही दर ते ब्याज हियाना तरीका चीन लोप्पा समाजवादी बदलाव कीयानास्के सरकार राष्ट्रीय पूंजीपति वर्ग ता उत्पादन साधन कुना अधिग्रहण मुआवजा हीसी कीयाना नीति तुन लागू कीयानास्के लागू कित्ता। 1956 ते पूंजीवादी उद्योग-वाणिज्य ता सब्बे कारोबार कुन संयुक्त राष्ट्रीय निजी कारोबार कुना लेक्का बदले कित्ता पेरके उंदी तय कित्ता टाईम एवनल सरकार हर साल राष्ट्रीय पूंजीपति वर्ग तुन अदिना पूंजी ता मूल्य अनुसरा उंदी तय दर ते ब्याज हींता। इद ब्याज ता स्वरूप वेने शोषण लेक्काने मंता।
- 2) वी.आई. लेनिन, “हेगेल ना लेख ‘तर्क-विज्ञान’ ता रूपरेखा”।
- 3) वी.आई. लेनिन “द्वन्द्ववाद ता सवाल ता बारे ते”।
- 4) कार्ल वोन क्लाउसेवित्ज (1780-1831), वरोर प्रसिद्ध जर्मन पूंजीवादी सैन्य-वैज्ञानिक मत्तोर। “युद्ध ता बारे ते” ओना उंदी प्रमुख लेख मत्ता। क्लाउसेवित्ज ना बारे ते स्टालिन ना टिप्पणी काजे स्टालिन ना लेख “कामरेड राजिन ना चिट्ठी ता जवाब” हूडाटू।
- 5) वी. आई. लेनिन “युद्ध ओसो क्रांति”।
- 6) मार्च 1926 ते फंग च्वी-श्यांग ना राष्ट्रीय सेना ओसो उत्तर-पूर्व ता युद्ध-सरदार चांग च्वो-लिन नडमा युद्ध आया मंता अनि चांग ना सेना ताकू बंदरगाह पोरो तैनात फंग ना सेना पोरो आक्रमण कियाला दाया मंता अस्के जापानी साम्राज्यावादीर चांग ना सेना तुन कवर हियाला काजे वेल्ले लेज्जा हिल्ला लेक्का तम्मा एरू लडाकू जहाज लोहतोर। हारेमाता पेरके जापानी आक्रमणकारि बाकी 7 देश कुना संगे सांठगांठ कीसी (इदिना लोप्पा ब्रिटिश ओसो अमेरिका वेने शामिल मंता) चीन सरकार तुन उंदी अल्टीमेटम हितोर ताना लोप्पा ताकू बंदरगाह ता प्रतिरक्षात्मक मोर्चाबंदी तोडफोड कीयाना लेक्कटा मांग पेश कित्ताद मंता। 18 मार्च ते इदिना विरोध कियाला काजे पेकिंग ता हजारो मजदूर, विद्यार्थि ओसो जनता थ्येनआनमन मुन्ने उंदी जन सभा केयसी प्रदर्शन शुरू कित्तोर। प्रदर्शनकारीर सरकार ता प्रधान कार्यलय हेरे एवतास्के 8 ताकत कुना अल्टीमेटम तुन स्वीकार कीयाना मांग कित्तास्के उत्तरी युद्ध सरदार लोरा सरकार ता नेतालल त्वान छी-रुई तन्ना रक्षक लोर किन फैरिंग कीयाना आदेश हितोर अनि प्रदर्शनकारि किन वेल्ले निर्मम तरीका ते हौकतोर।

जनता नड़मा ता अंतरविरोध कुन सही तरीका ते हल कीयाना ता बारे ते⁵⁰

27 फरवरी 1957

जनता नड़मा ता अंतरविरोध तुन सही तरीका ते हल बद्रम कीयाना इंदानदु मनम चर्चा कीयाना विषय आंदू सुविधा काजे माटु इदिना बारे ते 12 पॉइंट कुना लेक्का चर्चा कियाकाला। इगा दुश्मन ओसो मना नड़मा ता अंतरविरोध कुना बारेते वेने वेहमूड़ायर मति मुख्य रूप ते जनता नड़मा ता अंतरविरोध कुना चर्चा आयार।

1

भिन्न स्वरूप वाले रेंडु रकम ता अंतरविरोध

मना देश मुन्ने बस्के ने नेंडु मत्ताचोन एकताबद्ध हिल्वा मत्ता। पूंजीवादी-जनवादी क्रांति ओसो समाजवादी क्रांति ता जीत ओसो समाजवादी निर्माण ता सफलतांग वेल्ले जल्दी पाड़ना चीन लेक्का बदले कीतांग। इंजे माटु मना मुन्ने मत्ता तल्लोरभूमि ता ओसो वेने बेसता कालम वायना लेक्का दिस्सा मंता। राष्ट्रीय फूट ओसो गड़बड़ ता दिव्यंग कुन जनता विचार कीवोर। मना 60 करोड़ जनता, मजदूर वर्ग ओसो कम्युनिस्ट पार्टी ता नेतृत्व ते उंदी जीवा आसी समाजवादी निर्माण ता महान कार्य किया

⁵⁰ सर्वोच्च राज्य सम्मेलन ता ग्यारहवी अधिवेशन (विस्तृत) लोप्पा हीता भाषण (19 जून 1957 ते “जन दैनिक” लोप्पा प्रकाशित कीताद मत्ता। प्रकाशन तुकू मुन्ने कामरेड माओ त्सेतुंग इदिना शब्दशः रिकार्ड कुन जांच किता परेके ताना लोप्पा उचुन सामग्री जोड़े कितोर।

मंतोर। देश ता एकीकरण, जनता ना एकता ओसो मना विभिन्न राष्ट्रीयतांग ना एकता लेक्कटवु मना जीत ता बुनियादी गारंटी आंदू मति इंजे माटु समाज लोप्पा बदे अंतरविरोध हिल्ले इनमूडायो। इंजे बदे अंतरविरोध हिल्ले इंजी आल्सनाद बकवल लेक्का आंता; इदु सच्चाई आयो। मना मुन्ने रेंडु रकम ता सामाजिक अंतरविरोध मंतांग, मना ओसो दुश्मन नडमा अंतरविरोध, जनता नडमा ता अंतरविरोध। इव रेंडासी अंतरविरोध कुना स्वरूप अलग-अलग मंता।

इव रेंडासी अलग रकम अंतरविरोध कुन सही तरीका ते समझेमायला काजे सबसे मुन्ने माटु स्पष्ट रूप ते “जनता” ना अर्थ बाताल अनि “दुश्मन” ता अर्थ बाताल इंजी समझेमाया लागियर। अलग-अलग देश कुना लोप्पा ओसो हर देश लोप्पटा अलग-अलग ऐतिहासिक कालम कुना लोप्पा “जनता” शब्द ता अर्थ, विषय ता दृष्टि ते अलग-अलग मंता। उदाहरण तुकू मना देश तुने हूडाटू। जापानी आक्रमण विरोधी युद्ध कालम ते जापानी आक्रमण ता विरोध कीयाना सब्बे वर्ग, समूह, सामाजिक ग्रुप किन जनता इंजी इनमुड आत्ता, अनि जापानी साम्राज्यवादी, चीनी गद्दार, जापान-परस्त तत्व कुन जनता ना दुश्मन श्रेणी ते तासमुड आत्ता। मुक्ति युद्ध कालम ते अमेरिका साम्राज्यवाद ओसो ओरा तोका नौकरशाह-पूंजीपति वर्ग, जमींदार वर्ग ओसो इव रेंडासी वर्ग कुना प्रतिनिधित्व कीयाना क्वोमिंगतांग प्रतिक्रियावाद जनता ना दुश्मन मत्ता। इव दुश्मन कुना विरोध कीयाना सब्बे वर्ग, समूह, सामाजिक ग्रुप जनता ना श्रेणी ते मत्तोर। वर्तमान कालम इतेके समाजवादी निर्माण कालम लोप्पा समाजवादी निर्माण कार्य ता अनुमोदन, समर्थन कीयाना अदिना काजे काम कीयाना सब्बे वर्गकु, समूह ओसो सामाजिक ग्रुपकु जनता ना श्रेणी ते वांतांग, समाजवादी क्रांति ता विरोध कीयाना, समाजवादी निर्माण तुकू दुश्मनी तासना ओसो ताना लोप्पा तोड़फोड़ कीयाना पूरा सामाजिक शक्तिंग, ग्रुप जनता ना दुश्मन मंदिंतोर।

मना ओसो दुश्मन नडमा ता अंतरविरोध शत्रुतापूर्ण अंतरविरोधकु मंदिंतांग। जनता कुना लोप्पा, मेहनतकश जनता नडमा ता अंतरविरोध गैर

शत्रुतापूर्ण मंदिता, अनि शोषित ओसो शोषक वर्ग कुना नड़मा ता अंतरविरोध कुना उंदी पहलु शत्रुतापूर्ण मंदिता, अगा दूसरा पहलु दोस्ती वेने मंदिता। जनता ना नड़मा अंतरविरोध हमेशा मंदिता। मति क्रांति ता हर कालम ते ओसो समाजवादी निर्माण कालम ते इव अलग-अलग मंदिता। चीन ता वर्तमान परिस्थिति लोप्पा जनता नड़मा ता अंतरविरोध लोप्पा मजदूर वर्ग लोप्पाटा अंतरविरोध, किसान वर्ग लोप्पा टा अंतरविरोध, बुद्धिजीविरा लोप्पा मंदाना अंतरविरोध, मजदूर वर्ग ओसो किसान वर्ग नड़मा ता अंतरविरोध, उंदी पक्ष ते मजदूर, किसान ओसो दूसरा पक्ष ते बुद्धिजीविरा नड़मा ता अंतरविरोध, उंदी पक्ष ते मजदूर किसान ओसो दूसरा पक्ष ते बुद्धिजीविरा नड़मा ता अंतरविरोध, उंदी पक्ष ते मजदूर वर्ग, मेहनतकश जनता ना बाकी हिस्सांग ओसो दूसरा पक्ष ते राष्ट्रीय पूंजीपति वर्ग नड़मा ता अंतरविरोध, अनि राष्ट्रीय पूंजीपति वर्ग लोप्पा अंतरविरोध गैर शत्रुतापूर्ण लेक्का मंतांग। मना जनताना सरकार जनता ना हित कुना प्रतिनिधित्व कीयाना, जनता ना सेवा कीयाना सरकार आंदू मति इद सरकार ओसो जनता नड़मा उचुक अंतरविरोध कुन इंजे वेने मंतांग। ताना लोप्पा इव अंतरविरोधकु मंतांग: उंदी पक्ष ते राज्य ता हितकु, सामूहिक हितकु ओसो दूसरा पक्ष ते व्यक्तिगत हित कुना नड़मा ता अंतरविरोध, जनवाद ओसो केंद्रीयता नड़मा ता अंतरविरोध, नेतृत्व कीयाना ओसो ओरा दोड़ काम कियानोरा नड़मा अंतरविरोध, उचुन सरकारी कार्यकर्ता लोरा जनता संगे मंदाना अंतरविरोधकु। इव सब्बे अंतरविरोधकु जनता ना नड़मा ता अंतरविरोध आंदुंग, जनता नड़मा ता अंतरविरोध जनता ना हित कुना बुनियादी एकरूपता पोरो आधार आसी मंदितांग।

मना देश लोप्पा मजदूर वर्ग ओसो राष्ट्रीय पूंजीपति वर्ग नड़मा ता अंतरविरोध जनता नड़मा ता अंतरविरोध कुना श्रेणी ते वांतांग। इव रेंडासी ना नड़मा ताकना वर्ग-संघर्ष खासकर जनता ना पांत लोप्पा टा वर्ग-संघर्ष आंदू, बारांकु इत्तेके चीन ता राष्ट्रीय पूंजीपति वर्ग ता मुक्कम रेंडु रंगिना मंता। पूंजीवादी जनवादी क्रांति कालम ते अदिन स्वरूप उंदी पहलु क्रांतिकारी मत्ता अनि दूसरा पहलु सुलह-समझौतावादी मत्ता। समाजवादी

क्रांति कालम ते मुनाफा कमई कियाला काजे मजदूर वर्ग ता शोषण कीयाना पहलु मत्ता, अनि संविधान ता समर्थन कीयाना ओसो समाजवादी बदलाव तुन स्वीकार कीयाना दूसरा पहलु मत्ता। राष्ट्रीय पूंजीपति वर्ग साम्राज्यवादीर, जमींदार वर्ग, नौकरशाह-पूंजीपति वर्ग तुकू अलग मंता। राष्ट्रीय पूंजीपति वर्ग ओसो मजदूर वर्ग नडमा ता अंतरविरोध शोषक ओसो शोषित लोरा नडमा ता अंतरविरोध मत्ता, इदु तन्ना स्वभाव तुकू उंदी शत्रुतापूर्ण अंतरविरोध मत्ता। मति चीन ता ठोस परिस्थिति लोप्पा इद शत्रुतापूर्ण वर्ग-अंतरविरोध तुन सही तरीका ते हल कीतेके इदिन दोस्तीपूर्ण अंतरविरोध लेक्का बदले कियमूडांता अनि शांतिपूर्ण तरीका ते हल कियमूडांता। मति माटु अदिन सही तरीका ते हल कियवेके राष्ट्रीय पूंजीपति वर्ग संगे एकता कीयाना, अदिना आलोचना कीयाना अनि शिक्षित कीयाना नीति पोरो अमल कियवेके ओसो राष्ट्रीय पूंजीपति वर्ग मना इद नीति तुन स्वीकार कीवेके मजदूर वर्ग ओसो राष्ट्रीय पूंजीपति वर्ग नडमा ता अंतरविरोध मना ओसो दुश्मन नडमा ता अंतरविरोध लेक्का बदले कीयाना।

मना ओसो दुश्मन नडमा ता अंतरविरोध, जनता नडमा ता अंतरविरोध ता स्वरूप उंदी दूसरा तुकू अलग मंदितांग अदिन काजे अविन अलग-अलग तरीका ने हल कीयाना। संक्षिप्त ते वेहाना इतेके पहली रकम ता अंतरविरोध मना ओसो दुश्मन नडमा उंदी स्पष्ट विभाजन रेखा पिडंगिता, अनि दूसरा रकम ता अंतरविरोध सही ओसो गलत नडमा उंदी स्पष्ट विभाजन रेखा पिडंगिता। मना ओसो दुश्मन नडमा अंतर कीयाना वेने सही ओसो गलत नडमा अंतर कीयाना लेक्काने मंता। उदाहारण तुकू मावा लोप्पा ओसो स्थानीय विदेशी प्रतिक्रियावादिर (साम्राज्यवादिर, सामंतवादिर, नौकरशाह-पूंजीपतिर) लोप्पा बोर सही ओसो बोर गलत, सही ओसो गलत नडमा ता अंतर कीयाना लेक्का ने मंता मति इदिना स्वरूप जनता नडमा सही ओसो गलत ता सवाल तुकू अलग उंदी दूसरा श्रेणी ता स्वरूप आंदू।

मना राज्य जनता ना जनवादी तानाशाह मत्ता राज्य आंदू, इदिना नेतृत्व मजदूर वर्ग कींता, इदु मजदूर-किसान एकता पोरो आधार मंता। इद तानाशाही ता उद्देश्य बाताल? इदिना पहली काम मना देश लोप्पा प्रतिक्रियावादी वर्ग कुना दमन कीयाना अनि समाजवादी क्रांति ता प्रतिरोध कीयाना शोषक वर्ग ता दमन कीयाना, समाजवादी निर्माण तुन नष्ट कीयाना कोशिश कीयाना लोकर दमन कीयाना मंता। इत्तेके दूसरा माटा ने मना ओसो स्थानीय दुश्मन नडमा ता अंतरविरोध कुन हल कीयाना मंदिता। उदाहरण तुकू उचुन प्रतिक्रांतिकारीर किन गिरफ्तार कीयाना, ओरा पोरो मुकदमा ताकी कीयाना ओरकिन सजा हियाना, उंदी तय टाईम काजे जर्मीदार, नौकरशाह-पूंजीपतिर किन वोट हियाना अधिकार ओसो भाषण हियाना आजादी ऊंदना मना तानाशाही लोप्पा वांता। सार्वजनिक व्यवस्था सही तासला काजे ओसो जनता ना हित कुना रक्ष कियाला काजे चोर-डाकु, धोखेबाज, हत्या, किस्स वाटनोर, गुंडा लोर अनि लब्बड़ तत्व कुना खिलाफ (सार्वजनिक व्यवस्था तुन गंभीर रूप ते नष्ट कींतांग) तानाशाही ता इस्तेमाल कीयाना जरूरी मंता। इद तानाशाही ता दूसरा काम बाहरी दुश्मन कीयाना उन्मूलनकारी कार्रवाईंग ओसो अनि आक्रमण कुना खतरा नगडल मना देश ता रक्षा कीयाना। अद्रम इत्तेके इद तानाशाही ता कर्तव्य मना देश ओसो बाहरी दुश्मन नडमा ता अंतरविरोध कुन हल कीयाना मंता। शांतिपूर्वक श्रम लोप्पा शामिल आयला, चीन तुन उंदी आधुनिक उद्योग, आधुनिक कृषि ओसो आधुनिक विज्ञान, संस्कृति लैस समाजवादी देश बने कीयाना काजे इद तानाशाही ता उद्देश्य मना पूरा जनता ना रक्षा कीयानाद मंता। इद तानाशाही तुन बोर लागू कींतोर? मजदूर वर्ग ओसो अदिन नेतृत्व ते ताकना पूरा जनताए लागू कींता। तानाशाही तुन जनता ना पांत लोप्पा लागू कीयाना। जनता खुद तना पोरो तानाशाही लागू किया परवो, अदिना उंदी हिस्सा तुन दूसरा हिस्सा ता दमन वेने किया लागिंता। जनता नडमा कानून उल्लंघन कीयाना तत्व तुन कानून अनुसार सजा हियमूडायर, मति इद जनता ना दुश्मन तुन दबे कियाला काजे तानाशाही ता इस्तेमाल कीयाना नियम अनुसार अलग मंता। जनता

नड़मा जनवादी केंद्रीयता लागू आंता। मना संविधान लोप्पा चीन लोक गणराज्य ता नागरिक लोरा भाषण, प्रेस, सभा, संगठन, जुलूस, प्रदर्शन, धार्मिक विश्वास लेक्कटविना आजादी आंदू इंजी वेहताद मंता। मना संविधान लोप्पा राष्ट्रीय अंग कुन जनवादी केंद्रीयता पोरो अमल कीयाना अनि आम जनता पोरो आधार आसी मंदाना, ओरा कर्मचारि र किन जनता ना सेवा कीयाना इंजी वेले रास्ताद मंता। मना समाजवादी जनवाद सबसे व्यापक जनवाद आंदू, इद्रम ता जनवाद बदे वेने पूंजीवादी राज्य लोप्पा मंदाना संभावनाए मन्नो आंता। मना तानाशाही जनता ना जनवादी तानाशाही आंदू, इदिना नेतृत्व मजदूर वर्ग कींता अनि इदु मजदूर-किसान एकता पोरो आधार आसी मंता। इत्तेके जनवाद जनता ना पांत लोप्पा लागू आंता अनि मजदूर वर्ग नागरिक अधिकार दोरकसी मत्ता सब्बे लोकुरा संगे, सबसे मुन्ने किसान लोरा संगे एकता कीसी प्रतिक्रियावादी वर्ग ओसो समाजवादी बदलाव ता प्रतिरोध कीयाना, समाजवादी निर्माण ता विरोध कीयाना सब्बे लोकुर पोरो तानाशाही लागू आंता। राजनीतिक रूप ते नागरिक अधिकार इत्तेके आजादी ओसो जनवाद ता अधिकार कुना बारे ते।

मति इद आजादी नेतृत्व दोड़ मंदिता अनि इद जनवाद केंद्रीयता मार्गदर्शन लोप्पा मंदिता; इद अराजकता आयो। अराजकता जनता ना हित लेवेके अदिना आकाक्षंग संगे मिले मायो आंता।

हंगरी ता घटना आतास्के मना देश लोप्पा उचुन मुल वेल्ले खुश आतोरा। ओरु चीन लोप्पा वेने इद्रमताए उंदी घटना आयर इंजी आल्सतोरा। हजारो-लाखों लोकुर जनताना सरकार खिलाफ सड़क पोरो पेसिसी प्रदर्शन क्रियानूर इंजी आल्सतोरा। ओरा इद्रम आल्सना जनता ना हित कुना खिलाफ मत्ता अदिन काजे ओरकिन जनता समर्थन दोरकना संभावना हिल्ला मत्ता। हंगरी लोप्पा, स्थानीय ओसो विदेशी प्रतिक्रांतिकारीरा धोखा ते वासी जनता ना उंदी हिस्सा जनताना सरकार खिलाफ हिंसात्मक कार्रवाईंग कीयाना गलती कित्ता अद्रमासी राज्य ओसो जनता रेंडासी कुन नुकसान एता लागता। उचुने हसांग ना तोड़फोड़-दंगा संगे देश ता

अर्थव्यवस्था तुन आता नुकसान ता भरपाई कियाला टाईम लागियर। मना देश लोप्पा उचुन बाकी लोकुर हंगरी ता घटना पोरो दुलमुल रुझान पोयतोर बारांकु इत्तेके ओरु दुनिया ता वास्तविक परिस्थिति तुन पुनवा मत्तोर। ओरु मना जनता ना लोकशाही लोप्पा वेल्ले कम आजादी मंता अनि पश्चिम ता संसदीय लोकशाही लोप्पा वेल्ले आजादी मंता इंजी समझेमांतोर। ओरु पश्चिम ता रेंड-पार्टी व्यवस्था पोयना इंजी मांग कींता, ताना लोप्पा उंदी पार्टी सत्तारूढ मंदिता अनि दूसरा पार्टी सत्ता-विहीन मंदिता। मति इव रेंडु-पार्टी व्यवस्था पूंजीपति वर्ग ता तानाशाही तुन निल्पी कीसी तासना विडचसी दूसरा बदे हरीं हिल्ले; इद मेहनतकश जनता ना आजादी ता अधिकार ता गारंटी आया परवो। असल इत्तेके आजादी ओसो जनवाद बदे आकार हिल्ला वस्तु आयवा ठोस वस्तु आंदू। इद समाज लोप्पा वर्ग-संघर्ष ताका मंता, इगा शोषक वर्ग तुन मेहनतकश जनता ना शोषण कीयाना आजादी मंता, अगा मेहनतकश जनता तुन शोषण तुकू बचेमायना बदे आजादी हिल्ले; पूंजीपति वर्ग काजे जनवाद मंदाना जागा ते सर्वहारा वर्ग ओसो बाकी मेहनतकश लोकुरा काजे बदे जनवाद मन्नो। उचुन पूंजीवादी देश कुना लोप्पा कम्युनिस्ट पार्टी तुन कानूनी रूप ते तम्मा अस्तित्व बचे कीसी तासला हियाना, मति अदिना पिस्वल सिर्फ पूंजीपति वर्ग ता बुनियादी हित कुन नुकसान कियवा मंदाना जोमे कानूनी मंदिता; इदिनकु मुन्ने हत्तेके अदिन कानूनी रूप ते हूडमूडायो। आकार हिल्ला आजादी ओसो जनवाद ता मांग कियानोर जनवाद तुन साधन लेक्का मानेमायोर, ओरु साध्य मानेमांतोर। बस्के-बस्के जनवाद साध्य (व्यवहारिक) वेने दिसिंता। मति असल इत्तेके इद सिर्फ साधने आंदू। मार्क्सवाद माकिन जनवाद पोटा ढांचा ता उंदी अंग आंदू अनि इद राजनीतिक श्रेणी ते वांता इंजी करिहंता। इत्तेक इद आर्थिक आधार ताए सेवा कींता। इदे आजादी काजे वेने निज्जम आंदू। जनवाद ओसो आजादी रेंडासी सापेक्ष वस्तु आंदुंग, निरपेक्ष आयोंग इव रेंडासी अलग-अलग ऐतिहासिक परिस्थिति ने पैदा आंतांग अनि विकसित आंतांग। जनता ना पांत लोप्पा जनवाद केंद्रीयता संगे जुडेमासी मंता अनि आजादी

अनुशासन संगे। इव रेंडासी उंदी वस्तु ता रेंडु विपरीत पहलु आंदुंग (इव आपस ते विरोधी ओसो एकताबद्ध वेने मंदितां) अनि माकिन इविना लोप्पाटल उंदी पोरो एकतरफा जोर हीसी दूसरा तुन ठुकरे कीयानायो। जनता ना पांत लोप्पा आजादी ओसो अनुशासन लेवा मावा काम ताको। मना जनवादी केंद्रीयता जनवाद ओसो केंद्रीयता एकता ओसो आजादी ओसो अनुशासन ता एकता संगेने बनेमांता। इद व्यवस्था लोप्पा जनता व्यापक जनवाद ओस आजादी ता इस्तेमाल कीता, मति संगेने अदिन समाजवादी अनुशासन ता हंदी ते वेने मंदाना लागिंता। व्यापक जनता इव सब्बे पोल्लोंग कुन बेसे समझेमांता।

माटु नेतृत्व दोड़ आजादी ओसो केंद्रीयता ता मार्गदर्शन ते जनवाद ता पक्ष एतितोम अस्के बद्रमाई जनता नड़मा ता विचाराधारात्मक सवाल कुन, सही ओसो गलत नड़मा अंतर कीयाना बारे ते सवाल कुन हल कियाला काजे जबरदस्ती ता तरीकांग लागू कीयाना इंजी आयो। बद्रमाई विचारधारात्मक सवा लेवेके सही, गलत नड़मा ता सवाल कुन हल कियाला काजे प्रशासनिक आदेश, जबरदस्ती ता तरीका इस्तेमाल कीयाना कोशिश सिर्फ अंगड़मे आयवा लेवा नुकसानदायक वेने मंदिता। माटु प्रशासनिक आदेश कुना संगे धर्म तुन खत्म किया परवोम अनि लोकुर किन धर्म पोरो विश्वास कीयानायो इंजी जबरदस्ती वेने किया परवोम। माटु लोकुर किन आदर्शवाद ता त्याग कियाला काजे मजबूर किया परवोम, अद्रमे ओरकिन मार्क्सवाद पोरो विश्वास कीयाना इंजी वेने जबरदस्ती किया परवोम। विचारधारात्मक सवाल कुन लेवेके जनता ना नड़मा ता विवादस्पद सवाल कुन हल कीयाना इत्तेके माटु सिर्फ जनवादी तरीका, वाद-विवाद, आलोचना, समझे कीयाना, शिक्षित कीयाना तरीकाए इस्तेमाल कीयाना, जबरदस्ती कीयाना लेवेके दमन कीयाना तरीका इस्तेमाल कीयानायो। मन उत्पादन कार्य ओसो अध्ययन कार्य तुन कारगर तरिका ते ताकि कियाला काजे अनि बेसता पिस्वल काजे, जनता तम्मा सरकार ओसो उत्पादन कार्य ता, सांस्कृतिक, शैक्षणिक संगठन कुना जिम्मेदार माने सब्बे तोर पालन कीयाना अनिवार्य मंदान लेक्का सही

प्रशासनिक आदेश जारी कीयाना इंजी आशा कींता। इद्रम ता प्रशासनिक आदेशकु हिल्लेके सार्वजनिक व्यवस्था तुन बेस ताकी कीयाना संभव मन्नो आंता। इव प्रशासनिक आदेश ओसो समझे कीयाना, शिक्षित कीयाना तरीका जनता नड़मा ता अंतरविरोध कुन हल कियाला काजे उंदी दूसरा तुकू मदद कींतांग। सार्वजनिक व्यवस्था तुन बेस ताकि कियाला काजे प्रशासनिक आदेश जारी तासना संगे-संगे समझे कीयाना, शिक्षित कीयाना काम वेने कीयाना, बारांकु इत्के वेल्ले पोल्लोंग लोप्पा सिर्फ प्रशासनिक आदेश कुना संगे ने काम ताका परवो।

जनता नड़मा ता अंतरविरोध कुन हल कीयाना इद जनवादी तरीका ता सारांश 1942 ते माटु “एकता-आलोचना-एकता” लेक्का पेश कीसी मत्तोमा उचुन विस्तार ते वेहाना इत्के एकता आकांक्षा ते मुन्ने दायना, आलोचना लेवेके संघर्ष संगे अंतरविरोध कुन हल कीयाना अनि इद्रम उंदी पूना आधार पोरो उंदी पूना एकता निलपी कीयाना। मना अनुभव जनता नड़मा ता अंतरविरोध कुन हल कीयाना सही तरीका इदे इंजी वेहिंता। 1942 ते माटु कम्युनिस्ट पार्टी लोप्पटा अंतरविरोध, इत्के कठमुल्लावादिर ओसो अधिसंख्या आम सदस्य लोरा नड़मा ता अंतरविरोध ओसो कठमुल्लावाद अनि मार्क्सवाद नड़मा ता अंतरविरोध कुन हल कीयाना लोप्पा इदे तरीका ते लागू किताद मंता। पार्टी ता अंदरूनी संघर्ष ताकनास्के उंदी बेरा “वामपंथी” कठमुल्लावादिर “निर्मम संघर्ष ओसो क्रूर हमला” ता तरीका पोयतद मत्ता, इद तरीका गलत मत्ता। “वामपंथी” कठमुल्लावादिरा आलोचना कीसोरे माटु इद पाड़ना तरीका पोयवा लेवा उंदी पूना तरीका पोयताद मंता: इत्के एकता कीसी मुन्ने दायना अनि आलोचना लेवेके संघर्ष संगे सही ओसो गलत नड़मा अंतर तुन स्पष्ट कीयाना अनि उंदी पूना आधार पोरो उंदी पूना एकता कीयाना। 1942ता शुद्धिकरण आंदोलन लोप्पा इदे तरीका लागू किताद मंता। इदिना उचुन साल पेरेके 1945 ते चीनी कम्युनिस्ट पार्टी ता सातवी राष्ट्रीय कांग्रेस आतास्के पूरा पार्टी लोप्पा एकता किताद मंता अनि इदिना कारण ते जन क्रांति ता महान जीत दोरकता। इगा मुख्य रूप ते एकता ता विचार संगे

मुन्ने हत्ता मंता। एकता ता विचार लेवाए संघर्ष शुरू कीतेके गड़बड़ आयर अनि परिस्थिति बेकाबू आयार। इद्रम आतेके अदु “निर्मम संघर्ष ओसो क्रूर हमला” लेक्कटा रूप एतिंता या? इद्रम आतेके पार्टी एकता पोरोल ते बातले हिल्ले आंता या? इदे अनुभव पोरो आधार आसी माटु इद तरीका तेंडताद मंता: “एकता-आलोचना-एकता”। लेवेके दूसरा माटा ने वेहाना इत्तेके “वायना कालम ते गलतिंग कीयाना तुकू बचेमायला काजे पाड़ना गलतिंग नल करियाना अनि बीमार मानेय किन बचे कियाला काजे ओना बीमारी ता इलाज कीयाना।” माटु इद तरीका तुन पार्टी तुकू बाहर वेने लागू कीयाना। जापान विरोधी आधार इलाकांग लोप्पा नेतृत्व ओसो जनता नड़मा ता संबंध, सेना ओसो जनता नड़मा ता संबंध, अफसर ओसो सैनिक लोरा नड़मा ता संबंध, विभिन्न फौजी यूनिट कुना नड़मा ता संबंध, कार्यकर्ता लोरा विभिन्न ग्रुप कुना नड़मा ता संबंध कुना लोप्पा मत्ता अंतरविरोध कुन हल कियाला इदिना सफलतापूर्वक इस्तेमाल किताद मंता। माटु पार्टी ता इतिहास पोरो कोंडा वाटतेके माटु इद तरीका ता इस्तेमाल इदिनकु मुन्ने कितादु मंता इंजी दिसिंता। 1927 ते माटु दक्षिण ते मना क्रांतिकारी सशस्त्र सेनांग ओसो आधार इलाकांग ना स्थापना शुरू किताद मत्तास्केटले माटु पार्टी ओसो जनता, सेना ओसो जनता, अफसर ओसो सैनिक लोरा नड़मा ता संबंध ओसो जनता नड़मा ता बाकी समस्यांग कुन हल कियाला इद तरीका ता इस्तेमाल किताद मंता। सिर्फ जापानी आक्रमण विरोधी युद्ध ताकानस्के इद तरीका ता इस्तेमाल ओसो ज्यादा जागृत आसी किताद मंता। पूरा देश ता मुक्त पेरके माटु इदे “एकता-आलोचना-एकता” ता तरीका तुन मना ओसो जनवादी पार्टिंग नड़मा ता संबंध, मना ओसो उद्योग-वाणिज्य लोप्पटा अंतरविरोध कुन हल कियाला काजे वेने लागू किताद मंता। इंजे मना काम जनता ना सब्बे पांत कुना लोप्पा इद तरीका ता विस्तार कीयाना अनि इदिन बेस लागू कीयाना। माटु मना सब्बे कारखाना, सहकारी समितिंग, दुकान, स्कूल, सहकारी ऑफिस, जन-संगठन, संक्षिप्त ते मना पूरा 60 करोड़ जनता नड़मा ता अंतरविरोध कुन हल कियाला इदे तरीका ता इस्तेमाल किताद मंता।

साधारण परिस्थिति ते जनता नडमा ता अंतरविरोध शत्रुतापूर्ण हिल्ले। मति अविन सही तरीका ते हल कियवेके माटु मना सतर्कता ओसो चौकसी लोप्पा कमी वायला हीतेके दुश्मनी पैदा आया परिंता। बदे समाजवादी देश लोप्पा इद्रम ता परिस्थिति-विकास हमेशा स्थानीय ओसो अस्थाई मंदिता। अद्रमासी अगा मानेय मानेय ना शोषण ता व्यवस्था खत्म आता अनि जनता ना हित बुनियादी रूप ते समान मंता। हंगरी ता घटना लोप्पा आता शत्रुतापूर्ण कार्रवाईंग वेल्ले व्यापक रूप ते किताद मत्ता अविना कारण स्थानीय ओसो विदेशी प्रतिक्रांतिकारी तत्व कुना कार्रवाईंग आंदुंगा। इद उंदी विशेष रकम ता घटना मत्ता, संगेने उंदे अस्थानीय घटना वेने मत्ता। इद घटना लोप्पा उंदी समाजवादी देश लोप्पा मत्ता प्रतिक्रियावादिर, साम्राज्यवादिर संगे सांठगांठ कीसी जनता नडमा अंतरविरोध कुना फायदा एतसी फूट वाटना अनि गडबड कीयाना कोशिश कित्तोर। इद्रम कीसी तम्मा साजिशपूर्ण उद्देश्य कुन पूरा कीयाना कोशिश कित्तोर। हंगरी घटना तल दोरकता सबक ध्यान हियाना लेक्का मंता।

वेल्ले लोकुर जनता नडमा ता अंतरविरोध कुन हल कियाला काजे जनवादी तरीकांग ना इस्तेमाल कीयाना सवाल उंदी पूना सवाल मंता इंजी आल्सिंतोर। मति असल इत्तेके इद्रम हिल्ले। मार्क्सवादिर हमेशा सर्वहारा वर्ग ता काम सिर्फ विशाल जनता पोरो आधार आसी पूरा कियमूडांता इंजी आल्सिंतोर; मेहनतकश जनता नडमा काम कीयानास्के कम्युनिस्ट लोर समझे कीयाना ओसो शिक्षित कीयाना तरीका जनवादी तरीका ता इस्तेमाल कीयाना, फरमानशाही लेवेके जबरदस्ती ता तरीका इस्तेमाल कीयानायो। चीनी कम्युनिस्ट पार्टी इद मार्क्सवादी-लेनिनवादी उसूल पोरो वेल्ले इमानदारी ते अमल कींता। माटु हमेशा जनता ना जनवादी तानाशाही लोप्पा रेंडु अलग-अलग स्वरूप वाले अंतरविरोध (मना ओसो दुश्मन नडमा ता अंतरविरोध ओसो जनता नडमा ता अंतरविरोध) कुन हल कीयानास्के रेंडु रकम ता तरीकांग (तानाशाही तरीका ओसो जनवादी तरीका) तुन इस्तेमाल कीयाना। इद विचार तुन मना काजे पार्टी-दस्तावेज ओसो वेल्ले जिम्मेदार पार्टी नेताल लोरा भाषण लोप्पा बार-बार स्पष्ट

किताद मंता। 1949 ते नन्ना “जनता ना जनवादी तानाशाही ता बारे ते” हेडिंग ता लेख रास्तान: “इवरेंडासी पोल्लोंग ना मेल (इत्तेके जनता काजे जनवाद अनि प्रतिक्रियावादिरा काजे तानाशाही) जनता ना जनवादी तानाशाही मंता।” नन्ना जनता ना पांत लोप्पा समस्यांग कुन हल कियाला काजे “माटु इस्तेमाल कित्ता तरीकांग जनवादी इत्तेके जबरदस्ती आयवा समझे कीयाना तरीका ता इस्तेमाल कीतोम इंजी वेहता।” जून 1950 लोप्पा राजनीतिक सलाहकार सम्मेलन ता पहली राष्ट्रीय कमेटी ता दूसरा अधिवेशन लोप्पा नावा भाषण लोप्पा इद्रम वेने इत्तान:

जनता ना जनवादी तानाशाही रेंडु तरीकांग इस्तेमाल कीता। दुश्मन पोरो तानाशाही ता तरीका इस्तेमाल कीता, इत्तेके परताचोन जोम ओरकिन राजनीतिक कार्रवाईंग लोप्पा शामिल आयला हीवो अनि जनताना सरकार कानून कुना पालन कीयाना ओसो श्रम संगे पूना मानेय लेक्का तन्ना पूना बदलाव कीयाना उद्देश्य ते मेहनत लोप्पा शामिल आयला काजे मजबूर कीता। इदिना उल्टा जनता ना पोरो जबरदस्ती ता तरीका आयवा जनवाद ता तरीका इस्तेमाल कीता इत्तेके अदिन अनिवार्य रूप ते राजनीतिक कार्रवाईंग लोप्पा शामिल आयला हीता अनि बदे वेने काम कियाला जबरदस्ती कियवा लेवा अदिन शिक्षित कीयाना अनि समझे कीयाना जनवादी तरीका ता इस्तेमाल कीता। इद्रम ता शिक्षा जनता काजे उंदी रकम ता आत्म-शिक्षा आंदू, आलोचना, आत्माचोलना इदिना बुनियादी तरीका आंदू।

इद्रम जनता नडमा ता अंतरविरोध कुन हल कियाला काजे जनवादी तरीका लागू कीयाना सवाल ता माटु बचोनो बेरा चर्चा किताद मंता अनि मना काम ताकनास्के इद तरीका तुन अमल वेने किताद मंता अनि वेल्ले कार्यकर्ता लोर, वेल्ले बाकी लोकुर असल ते अमल कीयानास्के ने इदिना बारे ते पुत्तोर। मति उचुन मुल इद पूना पोल्लो आंदू इंजी बारांकु आल्संतोर? बारांकु इत्तेके हत्ता कालम ते देश लोप्पा ओसो बाहर रेंडासी जागा ने मना ओसो दुश्मन नडमा वेल्ले तीव्र संघर्ष ताका मंता अनि जनता

नड़मा ता अंतरविरोध नेटाचोन मावा ध्यान तन्ना बगिल आकर्षित कीवो आता।

वेल्ले लोकुर मना ओसो दुश्मन नड़मा ता अंतरविरोध, जनता नड़मा ता अंतरविरोधकु, इव रेंडु अलग स्वरूप वाले अंतरविरोध कुना नड़मा स्पष्ट अंतर कियाला विफल आंतोर अनि रेंडासी कुन उंदी दूसरा संगे लेसी कींतोर। बस्के-बस्के रेंडासी उंदी दूसरा संगे हल्कोए लेस्कित इंजी स्वीकार किया लागियर। मना हत्ता काम लोप्पा इदिना उदाहरण दोरकिंता। प्रतिक्रांतिकारिर किन खत्म कीयाना काम लोप्पा बस्के-बस्के उचुन बेसता लोकुर वेने गलत समझेमायना गलती कींतोर। इद्रम ता पोल्लोंग मुन्ने वेने आतांग अनि नेंडु वेने आया मंतांग। माटु मना गलतिंग कुन सीमित तासला विफल आंतोम, बारांकु इत्तेके मना नीति मना ओसो दुश्मन नड़मा स्पष्ट विभाजन-रेखा पिडंगना अनि गलती आता इंजी समझेमातास्के सुधरे कीयाना नीतिए मत्ता।

मार्क्सवादी दर्शन विपरीत तत्व कुना एकता ता नियम ब्रह्मांड ता बुनियादी नियम आंदू इंता। इद नियम हर जागा लागू आंता (अदु प्रकृति आई लेवेक मानव समाज लेवेके मानेय ना विचारधारा आई)। बदे अंतरविरोध लोप्पा विपरीत तत्व कुना एकता ओसो संघर्ष वेने आसोर मंदिता, इदिनगडल प्रेरित आसी वस्तु गतिमान आंता अनि अविना लोप्पा परिवर्तन आंता। अंतरविरोध हर जागा मंदिता मति अव अलग-अलग वस्तु ना अलग-अलग प्रकृति अनुसार अलग-अलग स्वरूप वाले मंदिता। बदे वस्तु विशेष लोप्पा विपरीत तत्व कुना एकता परिस्थिति संगे दोहची, अस्थाई, संक्रमणशील मंदिता अदिन काजे सापेक्ष मंदिता, अनि विपरीत तत्व कुना संघर्ष उंदी निरपेक्ष वस्तु मंदिता। कामरेड लेनिन इद नियम ता बारे ते स्पष्ट वेहतोर। मना देश लोप्पा वेल्ले लोकुर इद नियम तुन समझेमाया मंतोर। मति वेल्ले लोकुरा काजे इद पोल्लो तुन स्वीकार कीयाना उंदी पोल्लो मंता अनि समस्यांग ना जांच-पड़ताल कीयाना अनि अविन हल कीयाना पोरु अदिन लागू कीयाना दूसरा पोल्लो। वेल्ले लोकुर नेंडु वेने जनता नड़मा ता अंतरविरोध मंतांग अनि इवे अंतरविरोध कुन

मना समाज तुन मुन्ने ओयना प्रेरक शक्ति आंदुंग इंजी खुल्ला स्वीकार कीयाना हिम्मत कीवोर आंतोर। वेल्ले लोकुर समाजवादी समाज लोप्पा वेने अंतरविरोध मंदितांग इंजी मानेमायला इनकार कींतोर, अद्रमासी ओरकिन सामाजिक अंतरविरोध कुना सामना किया लागतेके ओरु दुलमुल आंतोर अनि निष्क्रिय आंतोर। ओरु अंतरविरोध कुन लगातार सही तरीका ते हल किसोर मत्तेके ने समाजवादी समाज ओसो ज्यादा एकताबद्ध अनि मजबूत आंता इंजी समझेमायोर आंतोर। अद्रमासी माटु मना जनता तुन, सबसे मुन्ने मना कार्यकर्ता लोर किन, ओरु समाजवादी समाज ता अंतरविरोध कुन समझेमायना ओसो अविन हल कीयाना सही तरीका करियाला मदद आयना इंजी इव सब्बे पोल्लोंग वेहचियाना जरूरी मंता।

समाजवादी समाज ता अंतरविरोध पाड़ना समाज ता, पूंजीवादी समाज लेक्कटा अंतरविरोध तल बुनियादी रूप ते अलग मंता। पूंजीवादी समाज लोप्पा अंतरविरोध तीव्र शत्रुता अनि मुठभेड़ कुना रूप ते तीव्र वर्ग-संघर्ष लेक्का तेंदितांग; अविन पूंजीवादी व्यवस्था खुद हल किया परवो अनि सिर्फ समाजवादी क्रांति हल किया परिंता। मति इदिना विपरीत, समाजवादी समाज ता अंतरविरोध शत्रुतापूर्ण मन्नोंग अनि अविन खुद समाजवादी व्यवस्थाए उंदी पेरके दी हल किया परिंता।

समाजवादी समाज लोप्पा वेने बुनियादी अंतरविरोध उत्पादन-संबंध ओसो उत्पादन शक्ति नड़मा अनि पोरो ढांचा अनि आर्थिक आधार नड़मा अंतरविरोधके मंदितांग। मति इव अंतरविरोध कुना स्वरूप पाड़ना समाज ता उत्पादन-संबंध ओसो उत्पादन शक्ति ना नड़मा अनि पोरो ढांचा ओसो आर्थिक आधार नड़मा ता अंतरविरोध तुकू बुनियादी रूप ते अलग मंदिता अनि इविना तम्मा अलग विशेषतांग मंदितांग। मना देश ता वर्तमान समाज-व्यवस्था हत्ता कालम ता समाज-व्यवस्था तुकू बचोनो बेस मंता। इद्रम हिल्वेके पाड़ना व्यवस्था तुन तेहकसी वाटमूडासी मनवड़ अनि पूना व्यवस्था ता स्थापना कियमूडासी मनवड़। माटु समाजवादी उत्पादन-संबंध पाड़ना उत्पादन-संबंध कुना तुलना ते उत्पादक शक्ति ना स्वरूप ता

वेल्ले अनुकूल मंता इत्तेके माटु समाजवादी उत्पादन-संबंध कुना संगे नेंडु उत्पादक शक्ति ना विकास बचोन तेज आया मंता अचोनो तेज पाडना समाज ते आया परवो; अद्रमासी उत्पादन लगातार बेरससोर दांता अनि लोकरा लगातार बेरससोर मत्ता जरूरत कुन पूरा कीसोर दांता। पाडना चीन लोप्पा साम्राज्यवाद, सामंतवाद ओसो नौकशाह-पूंजीवादी शासन लोप्पा उत्पादक शक्ति ना विकास वेल्ले तीरम आता। मुक्ति तुकू मुन्ने 50 तुकू ज्यादा साल एवनल चीन लोप्पा हर साल मुश्किल तुकू दस हजार टन इस्पात तैयार आता। ताना लोप्पा उत्तर-पूर्व ता प्रांत कुना उत्पादन शामिल हिल्ले। इव प्रांत कुना उत्पादन तुन वेने काल्पतेके मना देश लोप्पा इस्पात ता सबसे ज्यादा वार्षिक उत्पादन 9 लाख टन तुकू ज्यादा आता। 1949 ते देश लोप्पा इस्पात ता उत्पादन ता मात्रा सिर्फ 1 लाख टन तुकू ज्यादा मत्ता। नेंडु देश मुक्त आसी सिर्फ 7 साल पेरके ने मना इस्पात-उत्पादन 40 लाख टन तुकू वेने ज्यादा आता। पाडना चीन लोप्पा मोटर उद्योग ओसो विमान उद्योग इत्तेके वेल्ले जेक ता पोल्लो मंता, मशीन-निर्माण उद्योग वेने हिल्ला लेक्का ने मत्ता; इंजे इव सब्बे उद्योग कु मनगा मंतांग। जनता साम्राज्यवाद, सामंतवाद ओसो नौकरशाही-पूंजीवादी शासन तुन तेहकसी वाटतास्के वेल्ले लोकरा चीन बद दिशा ते दायना इंजी स्पष्ट समझेमाया परवो आयानोर (पूंजीवाद बगिले लेवेके समाजवाद बगल)। नेंडु तथ्य इदिना जवाब हीसितांग: सिर्फ समाजवादे चीन ता उद्धार क्रिया परिंता। समाजवादी व्यवस्था मना देश ता उत्पादक शक्ति ना तीव्र विकास तुन मुन्ने ओता। इद सच्चाई तुन विदेश ओसो मना दुश्मन लोर किन वेने मंजूर कीयाना लागिंता।

मति मना समाजवादी व्यवस्था इंजेने निल्पी किताद मंता; इदु इंजे पूरा स्थापित लेवेके पूरा मजबूत आताद हिल्ले। संयुक्त राष्ट्रीय-निजी औद्योगिक-वाणिज्यिक कारोबार लोप्पा पूंजीपतिर किन इंजे वेने ओरा पूंजी काजे उंदी सही दर संगे सूद दोरकिंता, इत्तेके शोषण इंजे वेने मंता। इव कारोबार कु इंजे एवनल पूर्ण समाजवादी स्वरूप वाले कारोबारकु हिल्लेंगा। मना उचुन कृषि ओसो दस्तकारी उत्पादक सहकारी-समितिग इंजे वेने

अर्ध-समाजवादी स्वरूप वालेगे मंतांग; संगेने पूर्ण समाजवादी सहकारी समितिग लोप्पा वेने मालिकाना संबंघित उचुक सवालकु कुन हल किताद हिल्ले। मना अर्थव्यवस्था ता विभिन्न विभाग लोप्पा, उत्पादन ओसो विनिमय नड्मा ता संबंघ कुना स्थापना इंजे तीरम-तीरम समाजवादी उसूल कुना अनुसार आया मंता अनि वेल्ले सही तरीकांग ना खोज आया मंता। पूरा जनता ना मालिकाना वाले इलाका लोप्पा ओसो सामूहिक मालिकाना वाले इलाकांग लोप्पा, समाजवादी अर्थव्यवस्था ना रेंडु इलाकांग नड्मा संचय ओसो इस्तेमाल ता सही दर तय कीयाना उंदी जटिल समस्या मंता। इद समस्या ता उंदे बेरा सही हल परहकना हल्को हिल्ले। संक्षिप्त ते समाजवादी उत्पादन-संबंघ स्थापित आतेके अवु उत्पादन शक्ति ना अनुसारे आंतांग मति अवु इंजे वेने पूर्ण रूप तुकू जेक मंता अनि अदिन अपूर्ण पहलू उत्पादन शक्ति ना विकास ता हरीं ते अंतरविरोध लेक्का नितसी मंतांग। उत्पादन-संबंघ ओसो उत्पादक शक्ति ना विकास नड्मा समानता संगे-संगे अंतरविरोध मंदानाए आयवा पोरोटा ढांचा ओसो आर्थिक आधार नड्मा वेने समानता संगे-संगे अंतरविरोध मंता। पोरोटा ढांचा इतेके जनता ना जनवादी तानाशाही ता राज्य-व्यवस्था, अदिना कानून ओसो मार्क्सवाद-लेनिनवादी मार्गदर्शन लोप्पा समाजावादी विचारधारा समाजवादी बदलाव लोप्पा सफलता दोरकी कीयाना ओसो समाजवादी श्रम-संगठन बने कियाला सकारात्मक भूमिका निभे किता; इद समाजवादी आर्थिक आधार, इतेके समाजवादी उत्पादन-संबंघि ता अनुसार मंता। मति पूंजीवादी विचारधारा मंदाना, राष्ट्रीय अंग कुना लोप्पा काम कीयाना नौकरशाही तरीका ओसो राज्य-व्यवस्था ता उचुन कडिंग ना कमी, इव सब्बे समाजवादी आर्थिक आधार खिलाफ अंतरविरोध लेक्का नितसी मंदितांग। माटु ठोस परिस्थितिग कुन सुरता तासिसी इव अंतरविरोध कुन लगातार हल कीसोर मंदाना। इव अंतरविरोध कु हल आतास्के पूना-पूना समस्यांग ओसो वेने तेंदितांग। अस्के पूना-पूना अंतरविरोध कुन हल कीयाना ओसो ज्यादा जरूरी आंता। उदाहरण तुकू समाज ता उत्पादन ओसो समाज ता जरूरत कुना नड्मा वेल्ले जोम उंदी

वस्तुगत तथ्य लेक्का मंदाना अंतरविरोध कुन हल कियाला काजे राष्ट्रीय योजना संगे लगातार काम कीयाना जरूरत मंदिता। हर साल देश संचय ओसो उपभोग नड़मा उंदी सही दर तय कियाला काजे उंदी आर्थिक योजना बने कीता अनि उत्पादन ओसो जरूरत कुन नड़मा संतुलन बने कीता। संतुलन सिर्फ विपरीत तत्व कुना अस्थाई, सापेक्ष एकताए आंदू। हर साल ता आखरी ते पूरा हूइतेके विपरीत तत्व कुना नड़मा ता संघर्ष ता कारण ते इद संतुलन बिगड़ेमांता, एकता लेक्का बदलेमांता, संतुलन असंतुलन लेक्का बदलेमांता, एकता अनेकता लेक्का बदलेमांता अनि वायना साल काजे ओसो उंदी बेरा संतुलन ओसो एकता स्थापित कीयाना जरूरी आंता। इदे मावा योजनाबद्ध अर्थव्यवस्था ता महानता आंदू। असल इत्तेके इद संतुलन ओसो एकता आंशिक रूप ते हर महीना ओसो हर 3 महिनांग लोप्पा बिगड़ेमासोर मंता अनि अविन आंशिक रूप ते संतुलित कीसोर मंदाना लागिंता। बस्के-बस्के मना मनोगत व्यवस्था वस्तुगत परिस्थिति संगे मेल तिन्नो आंता अदिनके अंतरविरोध पैदा आंतांग अनि संतुलन बिगड़े मांतांग; इदिन किने माटु गलती कीयाना इंतोमा अंतरविरोध लगातार पैदा आसोर मंदाना अनि लगातार हल कीसोर मंदाना वस्तु विकास ता द्वन्द्ववादी नियम आंदू।

नेटा परिस्थिति इद्रम मंता: जनता बेहरा स्तर ते तूफानी वर्ग-संघर्ष (मुन्नेटा क्रांतिकारी कालम कुना विशेषता मत्ता) इंजे समाप्त आताद मंता, मति वर्ग-संघर्ष इंजे पूर्ण रूप ते समाप्त आताद हिल्ले। व्यापक जनता पूना व्यवस्था ता स्वागत कीता मति संगे ने इंजे एवनल पूर्ण रूप ते स्वीकार किताद हिल्ले। सरकारी कर्मचारीर परताचोन अनुभवी हिल्लेर अनि ओरु ठोश नीतिंग संबंधित समस्या ना अध्ययन कीयाना अनि अविना खोजबीन कीयाना जारी तासना। दूसरा माटा ने मना समाजवादी व्यवस्था तुन स्थापित ओसो सुदृढ़ कीयाना लोप्पा जनता इदु पूना व्यवस्था ता पूर्ण आदत आयना लोप्पा ओसो सरकारी कर्मचारिर किन अध्ययन कीयाना ओसो अनुभव दोरकी कियाला इंजे टाईम लागियर। इंजे माटु मना ओसो दुश्मन नड़मा ता अंतरविरोध, जनता नड़मा ता अंतरविरोध कुना लोप्पा

अंतर कीयाना, संगेने जनता ना अंतरविरोध कुन सही तरीका ते हल कीयाना बारे ते चर्चा कीयाना वेल्ले जरूरी आता। इद्रम कीसी माटु मना देश ता सब्बे राष्ट्रीयतांग ना जनता तुन उंदी पूना संघर्ष काजे (प्रकृति विरुद्ध कीयाना संघर्ष काजे) गोलबंद किया परिंतोम, मना अर्थ व्यवस्था, संस्कृति ता विकास किया परिंतोम, मना पूरा जनता तुन इद संक्रमण कालम ते कम मुश्किल कुना सामना कियाला मदद किया परिंतोम, मना पूना व्यवस्था तुन सुदृढ़ बने किया परिंतोम अनि मना पूना राज्य निर्माण किया परिंतोम।

2

प्रतिक्रांतिकारीर किन खत्म कीयाना सवाल

प्रतिक्रांतिकारीर किन खत्म कीयाना सवाल मना ओसो दुश्मन नड़मा ता संघर्ष ता रेंडु विपरीत तत्व कुना नड़मा ता संघर्ष ता सवाल आंदू। जनता ना नड़मा, उचुन मुल इद सवाल ता बारे ते उचुन अलग दृष्टिकोण तासिंतोरा। इद्रम तोरा दृष्टिकोण मनाकिनकु अलग मंता, अबु रेंडु रकम तावु मंतांगा। दक्षिणपंथी विचार वाले लोकुर मना ओसो दुश्मन नड़मा बदे अंतर हिल्ले अनि दुश्मन कुन मना लोकुरा लेक्का आल्संतोम। ओरु व्यापक जनता तम्मा दुश्मन समझेमायना लोकुर किने दोस्त मानेमांतोम। “वामपंथी” विचार वाले लोकुर मना ओसो दुश्मन नड़मा ता अंतविरोध कुन वेल्ले बेरसी कींतोर अनि जनता नड़मा ता उचुन अंतरविरोध कुन वेने मना ओसो दुश्मन नड़मा ता अंतरविरोध समझेमांतोर, असल प्रतिक्रांतिकारी हिल्लोर किन वेने प्रतिक्रांतिकारी मानेमांतोम। इव रेंडासी दृष्टिकोण गलत मंतांगा। इव रेंडासी ना लोप्पा उंदी वेने दृष्टिकोण प्रतिक्रांतिकारीर किन खत्म कीयाना सवाल तुन सही तरीका ते हल कीयाना लेवेके इद काम तुन बेस मूल्यांकन कीयाना लेक्का हिल्ले।

प्रतिक्रांतिकारि किन खत्म कीयाना काम ता सही मूल्यांक कियाला काजे माटु हंगरी ता घटना मना देश लोप्पा बाता प्रभाव वाटता इंदानदु हूडना। इद घटना मना उचुन बुद्धिजीविर उचुन-उचुन संतुलन जरूर बिगडेमांता, मति अविना नडमा बदे विद्रोह आताद हिल्ले। बारांकु? बारांकु इत्तेके माटु प्रतिक्रांतिकारि किन लगभग पूराए खत्म कियाला सफल आसी मत्तोमा।

बदे डावुट हिल्ला, मना राज्य ता सुदृढ आयना मुख्य कारण प्रतिक्रांतिकारि किन खत्म कित्ता हिल्ला मंदानाद मंता। इदिना मुख्य कारण मनगा कम्युनिस्ट पार्टी ओसो मुक्ति सेना मंता अदु बचोनो दशाब्दिंग ना क्रांतिकारी संघर्ष लोप्पा तपेमासी फौलाद बनेमाताद मंता, अद्रमे क्रांतिकारी संघर्ष लोप्पा तपमासी फौलाद बनेमाता मेहनतकश जनता मंता। मना पार्टी ओसो मना सेनांग ना मोदोल जनता नडमा मंता; अवु दीर्घकालीन क्रांति ता ज्वाला लोप्पा तपेमाता; अदिना लोप्पा लडेमायना शक्ति मंता। मना लोक गणराज्य उंदी दिव्या बनेमायो, अदु क्रांतिकारी आधार इलाकांग तल विकसित आता। उचुन जनवादी लोकुर वेने उचुन जोम इद संघर्ष ता अग्नि परीक्षा पास कित्तोर अनि ओरु वेने मना संगे मशिकल कुना सामना कित्तोर। साम्राज्यवाद विरोधी, प्रतिक्रियावाद विरोधी संघर्ष ता किस्स ते उचुन बुद्धिजीविर वेने तपेमातो; मुक्ति पेरके ओरा लोप्पटल वेल्ले लोकुर विचाधारात्मक पूना बदलाव ता प्रक्रिया तल वेने वेंडतोर, इदिना उद्देश्य मना ओसो दुश्मन नडमा स्पष्ट अंतर कीयाना मंता। इदिन विडचसी मना राज्य मनम लागू कित्ता आर्थिक नीतिंग बुनियादी रूप ते सही मत्तांग अनि जनता ना पिस्वल सुरक्षित मंता, ताना लोप्पा लगातार सुधार आसोर दाया मंता अनि राष्ट्रीय पूंजीपति वर्ग ओसो बाकी वर्ग कुना पोरो मना नीतिंग सही मत्तांकु सुदृढ आता। मति प्रतिक्रांतिकारी किन खत्म कीयाना लोप्पा दोरकता सफलता बदे डावुट हिल्ला मना राज्य ता सुदृढ आयना ता उंदी महत्वपूर्ण कारण मंता। इव सब्बे पोल्लो ना कारण तल मना वेल्ले कालेज-विद्यार्थि मेहनतकश परिवार तल हिल्लेर मति उचुन मुल किन विडचसी सब्बे तम्मा देश पोरो

जीवा कींतोर अनि समाजवाद ता समर्थन कींतोर; हंगरी ता घटना आयनास्के तम्मा संतुलन बिगड़े कीवोर आतोर। राष्ट्रीय पूंजीपति वर्ग ता संबंध ते वेने इदे पोलो लागू आंता; बुनियादी जनता (मजदूर ओसो किसान) ना बारे ते वेहाना जरूरत हिल्ले।

मुक्ति पेरके माटु बचोनो प्रतिक्रांतिकारि किन खत्म कीतोम। उचुन मुल किन सजा हीतोम बारांकु इत्तेके ओरु गंभीर अपराध कीसी मतोर। इद्रम कीयाना जरूरी मत्ता अनि इद व्यापक जनता ना मांग मत्ता, इद जनता तुन प्रतिक्रांतिकारि ओसो रक-रकम ता स्थानीय निरंकुश तत्व कुना दीर्घकालीन दमन संगे मुक्त कियाला काजे किताद मत्ता; दूसरा माटा ने इद उत्पादन शक्ति तुन मुक्त कियाला काजे किताद मत्ता। माटु इद्रम कीवेके जनता तन्ना तल्ला पोरो तेहा परवो आसी मनवड़। 1956 तल परिस्थिति ते लोप्पा बुनियादी बदलाव आता। पूरा देश लोप्पा प्रतिक्रांति ता मुख्य शक्ति तुन खत्म किताद मत्ता। मना बुनियादी काम इंजे उत्पादक शक्तिंग कुन मुक्त कीयाना जागा ते पूना उत्पादन-संबंध कुना पृष्ठभूमि ते उत्पादक शक्तिंग कुन सुरक्षित ओसो विकसित कीयाना आता। उचुन मुल मना वर्तमान नीति वर्तमान परिस्थिति ता अनुकूल मंता अनि मना मुन्नेटा नीति मुन्नेटा परिस्थिति ता अनुकूल मत्ता। ओरु पाड़ना निर्णय कुना बदलाव काजे वर्तमान नीति ता इस्तेमाल कियाला आल्संतोर अनि प्रतिक्रांतिकारि किन खत्म कियाला मनम दोरकी कित्ता महान सफलतांग कुन इनकार कियाला आल्संतोर। इद वेल्ले गलत मंता, जनता इद्रम कीयाना अनुमति हीवो।

प्रतिक्रांतिकारि किन खत्म कीयाना काम लोप्पा माटु मुख्य रूप ते सफलतांगे दोरकी कीतोम, मति इद काम कीयानास्के गलतिंग वेने आतांग। उचुन काम लोप्पा अन्याय वेने आंता अनि उचुन काम लोप्पा उचुन प्रतिक्रांतिकारि मावा कैदल पेस्तोर। मना नीति “बस्केनाई प्रतिक्रांतिकारि बारे ते जानकारी दोरकता इत्तेके ओरकिन खत्म कीयाना अनि गलतिंग आतेके अविन सुधरे कीयाना” इंजी मंता। माटु प्रतिक्रांतिकारि किन खत्म कीयाना काम लोप्पा लागू कित्ता कार्यदिशा

जनदिशा मत्ता। बदे डायुट हिल्ला जनदिशा लागू कित्ता पेरके वेने मना काम लोप्पा गलतिंग आंतांग, मति अस्के अवु उचुन सुडला गलतिंग मंदितांग अविन सुधरे कीयाना हल्को आंता। संघर्ष तल जनता तुन अनुभव दोरकिंता। काम सही तरीका ते कीतेके जनता तुन काम बद्रम बेस कीयाना इंजी वेने अनुभव दोरकिंता। काम लोप्पा गलतिंग आतेके जनता तुन गलतिंग बारांकु आंतांग इंजी अनुभव दोरकिंता।

प्रतिक्रांतिकारि किन खत्म कीयाना काम लोप्पा बेगा वेने गलतिंग आतेके अविन सुधरे कियाला काजे निर्णय एतिताद मंता लेवेके एता मंतोरा समझेमाता गलतिंग कुन सुधरे कित्ताद मंता। दोषमुक्त कीयाना ओसो दुबारा स्थापित कीयाना निर्णय कुना वेने मूल गलत निर्णय कुनाए लेक्का व्यापक रूप ते ऐलान कीयाना। नावा हिसाब ते प्रतिक्रांतिकारि किन खत्म कीयाना काम इयेंड लेवेके वायना साल नालुंग बगिल जांच-पड़ताल कीयाना अनि अनुभव कुना निचोड़ तेंडना, न्याय संगे मुन्ने दायना, गलत रुझान कुना पोरो हमला कीयाना। राष्ट्रीय स्तर ते इद काम राष्ट्रीय जन प्रतिनिधि सभा ता स्थाई समिति ओसो राजनीतिक सलाहकार सम्मेलन ता राष्ट्रीय कमेटी ना स्थाई समिति ता संचालन ते कीयाना अनि स्थानीय स्तर ते इद काम प्रांत ओसो म्युनिसिपलटिंग ना जन परिषद, राजनीतिक सलाहकार सम्मेलन ता कमेटींग ना संचालन ते कीयाना। इद जांच-पड़ताल लोप्पा माटु इद काम लोप्पा हिस्सा एतिता व्यापक कार्यकर्ता लोर ओसो सक्रिय तत्व कुना सहायता कीयाना। ओरा जोश पोरो दड़ंगता एर दोस्सनायो। ओरा जोश पोरो दड़ंगता एर दोस्सना बेस आयो। मति गलतिंग समझेमाता पेरके अविन सुधरे कीयाना। सब्बे सार्वजनिक सुरक्षा संगठन, प्रोक््यूरेटर-कार्यालय ओसो न्याय विभाग, जेलकु लेवेके मेहनत संगे अपराधिर किन सुधरे कीयाना जिम्मेदारी एतिस मत्ता एंजेन्सिंग इदे रुझान पोयना। माटु संभव आता जागा ते राष्ट्रीय जन प्रतिनिधि सभा ना स्थाई समिति ना सदस्य, राजनीतिक सलाहकार सम्मेलन ता राष्ट्रीय कमेटी सदस्य ओसो जन प्रतिनिधि इद जांच-पड़ताल लोप्पा शामिल आंतोर इंजी आशा कीतोमा मना न्याय-व्यवस्था तुन विस्तृत

कीयाना अनि प्रतिक्रांतिकारि, बाकी अपराधिरा समस्या सही तरीका ते हल कीयाना मदद दोरकियर।

प्रतिक्रांतिकारिरा बारे ते वर्तमान परिस्थिति ता बारे ते इद्रम वेहमूङांता: नेंडु वेने प्रतिक्रांतिकारी मंतोर, मति ओरा संख्या वेल्ले हिल्ले। पहली पोल्लो, नेंडु वेने प्रतिक्रांतिकारिर मंतोर। उचुन मुल प्रतिक्रांतिकारिर इंजे हिल्लेर, इंजे नालुंग बगिल शांति मंता अदिन के माटु आराम से हुंजा परिंतोम इंतोर। मति असल परिस्थिति इद्रम हिल्ले। असल इत्तेके प्रतिक्रांतिकारिर इंजे वेने मंतोर (बदे डावुट हिल्ला ओरु मीकिन हर जागा ओसो हर इकाई लोप्पा दोरका परिंतोर), माटु ओरा खिलाफ संघर्ष जारी तासा लागियर। मकसी मत्ता प्रतिक्रांतिकारिर केमेक उदसी मनवा लेवा गड़बड़ कियाला काजे हर मौका ता फायदा एतानूर इंजी आल्सना। अमेरिका साम्राज्यवादिर ओसो च्यांग काई-शेक गुट तोड़फोड़ कियाला काजे तन्ना गुप्त एजेंट लोरकिन लोहचोर मंदिता। सब्बे वर्तमान प्रतिक्रांतिकारिर किन खत्म कितास्के वेने पूना प्रतिक्रांतिकारिर पुड्सोर मंदाना संभावना मंदिता। माटु सतर्क मनवेके माटु लेक्के धोखा तिंतोम अनि बेहरा नुकसान तेंहिंतो। प्रतिक्रांतिकारिर बेगा वेने गड़बड़ कींतोर अगा ओरकिन दृढ़ता ते खत्म कीयाना। मति पूरा देश तुन हूडतेके निज्जमे प्रतिक्रांतिकारिरा संख्या वेल्ले हिल्ले। चीन लोप्पा इंजे वेने प्रतिक्रांतिकारिरा संख्या वेल्ले मंता इंदाना गलत आयार। इद दृष्टिकोण पोयतेके पेरेके वेल्ले गड़बड़ आयार।

3.

कृषि ता सहकारी बदलाव ता सवाल

मनगा 50 करोड़ तुकू ज्यादा नाहकुना जन संख्या मंता अदिन काजे मना अर्थव्यवस्था ता विकास ओसो राजसत्ता ता सुदृढीकरण पोरो मना किसान लोरा परिस्थिति ता वेल्ले महत्वपूर्ण प्रभाव अरिंता। नावा हिसाब ते परिस्थिति बुनियादी रूप ते बेस मंता। कृषि ता सहकारी बदलाव

सफलतापूर्वक पूरा आता अनि मना देश ता उंदी बहरा अंतरविरोध तुन (समाजवादी औद्योगिकरण ओसो किसान लोरा व्यक्तिगत खेतीबाड़ी नडमा ता अंतरविरोध तुन) हल कित्ता। कृषि ता सहकारी बदलाव ता काम वेल्ले जल्दी पूरा आता अदिन काजे उचुन मुल बेगाने गडबड आंता बहे इंजी परेशान आतोर। उचुन कमजोरिंग जरूर मत्तांग मति अबु वेल्ले गंभीर हिल्ला मत्ता अनि कुल मिले कीसी इद आंदोलन सफल आता। किसान लोर वेल्ले जोश संगे काम किया मंतोर, हत्ता साल मुन्ने उचुन साल कुना सबसे ज्यादा बाढ़, दुष्कड़ ओसो तूफान वातेकाई पूरा देश लोप्पा अनाज ता पैदावार बेरसता। इंजे उचुन मुल उंदी सुडला तूफान निलपी किया मंतोर; ओरु सहकारिता बेस हिल्ले, अदु बद्रमाई महान हिल्ले इंजी शिकायत किया मंतोर। सहकारिता उंदी महान वस्तु मंता या हिल्ले? नेटा मीटिंग लोप्पा तूसता दस्तावेज कुना लोप्पा हपे प्रांत ता चुनह्वा काउंटी ता वांग क्वो-फान सहकारी समिति संबंधित उंदी दस्तावेज वेने मंता, अदिन नावा हिसाब ते मीटु पढेमातेक बेस आयार। इद सहकारी समिति दी मेट्टा इलाका ते मंता, इदु मुन्ने गरीब इलाका मत्ता अनि बचोनो साल तल जनताना सरकार सहायता पोरोल ते लोहता अनाज पोरो आधार आसी मत्ता। 1953 ते सहकारी समिति निलपी कितास्के लोकुर इदिन “कंगाल लोरा सहकारी समिति” इंदानोर। मति इद सहकारी समिति ता परिस्थिति हर साल सुधरेमासोर हत्ता, 4 साल ता कठोर संघर्ष पेरके इंजे अदिना ज्यादातर परिवार तिगा अतिरिक्त अनाज वेने आया मंता। इद सहकारी समिति कीयाना परता इत्तेके बाकी सहकारी समितिंग वेने किया परितांगे। इद्रम कियाला उचुन वेल्ले टाईम पोय्याना संभावना मंदिता। इद्रम कृषि-सहकारिता लोप्पा बदे गडबड आता इंदाना स्पष्ट रूप ते अंगडम मंदिता।

सहकारी समितिंग ना निर्माण कियाला काजे कठोर संघर्ष ता जरूरत मंदिता इंदानद वेने स्पष्टे मंता। पूना वस्तु विकसित आयनास्के हमेशा मुश्किल ओसो असफलतांग ना सामना किया लागिता। समाजवाद ता पूरा काम वेल्ले हल्को मंता, इदम काम लोप्पा हल्कोए सफल आया परितोम, इदिना लोप्पा मुस्किल ओसो असफलतांग ना सामना किया

लागो आयार लेवेके तीना लोप्पा वेल्ले कोशिश कीयाना जरूरत हिल्ले इंजी आल्सना बेस हिल्ले।

सहकारी समितिंंग ना सक्रिय समर्थक बोरु आंदुर? ओरु बेहरा संख्या ते मत्ता गरीब किसान ओसो मध्यम किसान लोर आंदुर। ओरा संख्या कुल नाहकुना आबादी ता 70 प्रतिशत तुकू ज्यादा मंता। बाकी लोकुरा लोप्पा वेने वेल्ले लोकुर सहकारी समितिंंग पोरो आशा कीसोर मंदानोर मंतोर। सिर्फ वेल्ले कम लोकुर खुश हिल्ले। वेल्ले लोकुर इद परिस्थिति ता विश्लेषण कीवोर अनि सहकारी समितिंंग ना सफलतांग, कमजोरिंग ना कारण ते नालुंग बगिल छानबीन कीवेके ओरु सिर्फ उंदी अंश लेवेके उंदी पहलू तुने उंदी सम्पूर्ण वस्तु मानेमायनू। इद्रम उचुन मुल लोप्पा सुडला वडिय वांता अनि सहकारी समितिंंग महान हिल्लेंग इंजी वेहिंता।

सहकारी समितिंंग कुन सदृढ कीयाना लोप्पा ओसो अविना बारे ते अव महान हिल्लेंग इंजी आल्सना विचार खत्म आयला बचोन टाईम लागियर? बचोन सहकारी समितिंंग ना विकास ता असल अनुभव कुन हूडसोरे इविना लोप्पा 5 साल लेवेके अदिनकु ज्यादा टाईम लगे मायना संभावना मंता। मना ज्यादातर सहकारी समितिंंग उंदी साल तुकू ज्यादा पाड़ना मंतांग, अदिन काजे अविनगडल अचोन जल्दी वेल्ले आशा कीयाना बेस आयो आयार। नावा हिसाब ते माटु पहली पंचवर्षीय योजना कालम ते सहकारी समितिंंग ना स्थापना कित्ता पेरके दूसरा पंचवर्षीय योजना कालम ते अविन सुदृढ कियाला सफल आतेके वेल्ले बेस आयार।

इंजे मना सहकारी समितिंंग तीरम-तीरम सुदृढ बने माया मंतांग। उचुन अंतरविरोध कुन हल कीयाना इंजे वेने पिस्ताए अनि राज्य ओसो सहकारी समितिंंग नडमा ता अंतरविरोध, सहकारी समितिंंग लोप्पा अनि विभिन्न सहकारी समितिंंग नडमा ता अंतरविरोधकु।

पोरो वेहता अंतरविरोध कुन हल कीयानास्के माटु उत्पादन ओसो वितरण ता समस्या तुन सही ध्यान तासना। उत्पादन ता सवाल तुने हूडाटू उंदी बगिल सहकारी समिति अर्थव्यवस्था तुन राज्य ता एकीकृत आर्थिक

योजना अनुसार मंदाना मति संगेने अदिन उंदी लचीपलापन, स्वतंत्रता ता अनुमति हियाना, इद राज्य ता एकीकृत योजना ओसो राज्य ता नीतिंग, कानून, नियम कुना खिलाफ मंदानायो। दूसरा सहकारी समिति ना हर परिवार, व्यक्तिगत इस्तेमाल काजे सुरक्षित जमीन ओसो व्यक्तिगत रूप ते ताकी कीयाना उचुन उद्यम कुन विड़चसी (इदिना काजे अद योजना सही साबित आया परिंता) मना सहकारी समिति लेवेके उत्पादक-दल ता आम योजना पोरो अमल कीयाना। आमदनी ता विवरण ता सवाल ता बारे ते माटु राज्य, समुदाय ओसो व्यक्ति ना हित कुना सुरता तासना। राज्य ता कृषि-टैक्स, सहकारी समितिंग ना जमा कित्ता पूंजी, किसान लोरा व्यक्तिगत आमदनी नइमा ता मूवूरा संबंध पोरो माटु सही तरिका पोयसी माटु अविन सुधरे कीयाना बगिल लगातार ध्यान हियाना अनि अंतरविरोध पैदा आतास्के तुरंत अविन हल कीयाना। राज्य ओसो सहकारी समितिंग रेंडासी ना काजे जमा पूंजी जरूरी मंता मति इव रेंडासी वेल्ले जमा पूंजी कीयानायो। उत्पादन-वृद्धि पोरो आधार आसी माटु सामान्य साल कुने हर साल व्यक्तिगत आमदनी बेरसी कीयाना लोप्पा किसान लोर किन सहायता हियाला पूरा कोशिश कीयाना।

वेल्ले लोकर किसान लोर वेल्ले कठिन पिस्वल पिस्सा मंतोर इंतोरा इदु निज्जमा? उंदी हिसाब ते इदु निज्जमे। इतेके साम्राज्यावादिर ओसो ओरा दलाल लोर उंदी शताब्दी तुकू ज्यादा एवनले मना देश ता उत्पीड़न, शोषण कितोर अदिनके मना देश गरीब आता; सिर्फ मना देश ता किसान लोरे आयवा मना मजदूरी ओसो बुद्धिजीविरा पिस्वल स्तर वेने दोड़े मंता। पूरा जनता ना पिस्वल स्तर तीरम-तीरम पोरो तेहला काजे माटु बचोनो दशाब्दिंग एवनल पूरा कोशिश किया लागियर। अद्रमासी उंदी हिसाब ते “कठिन” शब्द ता इस्तेमाल बेसे मंता। मति दूसरा हिसाब ते इदिन “कठिन” इंदाना सही हिल्ले। माटु इगा मुक्ति पेरकेटा 7 साल कुना लोप्पा सिर्फ मजदूर लोराए पिस्वल सुधरे कित्ताद मंता, किसाना लोरा आयो इंजी वाटना आरोप ता बारे ते वेहा मंतोमा असल इतेके वेल्ले कम लोकर किन विड़चसी मजदूर ओसो किसान लोरा पिस्वल मुन्ने तुकू उचुन सुधरे माताद

मंता। मुक्ति पेरके किसान लोर जमींदार लोरा शोषण तल मुक्त आतोर अनि ओरा उत्पादन हर साल बेरससोर दाया मंता। अनाज ता पैदावार तुने हूडाटू। 1949 ते देश लोप्पा अनाज ता पैदावार सिर्फ 21,000 करोड़ चिन तूकू ज्यादा मत्ता। 1956 एवनल 36,000 करोड़ चिन तूकू ज्यादा आता इत्तेके ताना लोप्पा लगभग 15,000 करोड़ चिन बेरसता। राष्ट्रीय कृषि-टैक्स वेल्ले हिल्ले, हर साल सिर्फ 3000 करोड़ चिन तूकू ज्यादा मंदिता। हर साल सामान्य कीमत तेने किसान लोरा फसल अस्सताद मंता, कुल अनाज सिर्फ 5,000 करोड़ चिन तूकू ज्यादा आंता। इव रेंडासी नग कुना जोड़ 8,000 करोड़ चिन तूकू उचुन ज्यादा आंता। ताना लोप्पा आधा तूकू ज्यादा अनाज नाहकुना लेवेके नाहकुना गरे ता उचुन शहर लेक्का मत्ता नाहकुने वम्मसियानोर। अनि किसान लोरा पिस्वल लोप्पा सुधार आताद हिल्ले इंजी बोर इंदा परवोर। माटु वायना बचोनो साल एवनल हर साल कृषि-कर ओसो सरकार अस्सना अनाज तुन लगभग 8,000 करोड़ चिन तासला तैयार मंतोम, इद्रम कीसी कृषि ता विकास कीयाना अनि सहकारी समितिंग कुन मजबूत कियाला सहायता दोरकिंता। इद्रम नाहकुना लोप्पा अनाज कमी मत्ता परिवार कुना मुन्ने अनाज ता कमीन मन्नो आयार अनि औद्योगिक फसल पंडिह कीयाना उचुन परिवार कुन विड़चसी सब्बे किसान परिवार कुनगा अतिरिक्त अनाज वायार अनि कम से कम अवु आत्मनिर्भर जरूर बनेमांतांग; अगा बदे गरीब किसान परिवार मन्नो आयार, सब्बे किसान लोरा पिस्वल स्तर मध्यम किसान लोरा स्तर ते एविथर तानकु वेने मुन्ने दायार। किसान ओसो मजदूर लोरा औसत सालाना आय ता तूलना सुडला स्तर तल कीयाना अनि वरोना आय दोड़ मंता अनि दूसरोना पोरो मंता इंजी विश्लेषण कीयाना। मजदूर लोरा उत्पादन किसान लोरा मुकाबला ते वेल्ले पोरो मंता, किसान लोरा पिस्वल ता खर्चा शहर लोप्पा मजदूर लोरा पिस्वल ता खर्चा तूकू कम मंता अदिन काजे मजदूर लोर किन राज्य बगिल तल विशेष सुविधांग हीताद मंता इनमूडायो। उचुन मुजदीर लोर, उचुन सहकारी कर्मचारिरा वेतन उचुन पोरो

मंता, इद्रमे किसान लोर नाराज आयाना कारण बनेमातांकु ठोस परिस्थिति तुन हूइसोरे पूर्ण रूप ते सुधार कीयाना जरूरी मंता।

4

उद्योगपतिर ओसो व्यापारिरा सवाल

मना समाज-व्यवस्था ता बदलाव कीयानास्के 1956 लोप्पा कृषि ओसो दस्तकारीरा सहकारी बदलाव संगे-संगे, निजी औद्योगिक ओसो वाणिज्यिक कारोबार कुन वेने संयुक्त राष्ट्रीय-निजी कारोबार कुना लेक्का बदले किताद मंता। तेज ओसो सही तरीका ते काम किताद मंता इतेके माटु मजदूर वर्ग ओसो राष्ट्रीय पूंजीपति वर्ग नइमा ता अंतरविरोध तुन जनता नइमा ता अंतरविरोध मानेमासी ताकना संगे घनिष्ठ संबंध मत्ता। इदु वर्ग अंतरविरोध पूराए हल आताद मंता या? हिल्ले, इदु इंजे पूराए हल आताद हिल्ले। तीना लोप्पा इंजे ओसो वेल्ले टाईम लागियर। मति उचुन मुल पूंजीपतिरा विचाराधारात्मक पूना बदलाव वेल्ले आता, इंजे ओरा ओसो मजदूर लोरा लोप्पा बदे अंतर हिल्ले, ओरा ओसो ज्यादा पूना बदलाव कीयाना जरूरत हिल्ले इंतोर। उचुन मुल पूंजीपति मजदूर लोरकिनकु बेस मंतोर इंतोर। उचुन बाकी मुल पूना बदलाव जरूरी मत्तेके मजदूर वर्ग ता पूना बदलाव बारांकु कीयानायो? इद विचार सही मंता या? बदे डायुट हिल्ला इदु सही हिल्ले?

समाजवादी समाज ता निर्माण आयानास्के सब्बे तोर किन तम्मा पूना बदलाव कीयाना जरूरत मंदिता (शोषक लोर किन ओसो मेहनतकश जनता तुन वेने)। मजदूर वर्ग तुन बदलाव ता जरूरत हिल्ले इंजी बोर इंतोर? इंगो, शोषक लोरा पूना बदलाव ओसो मेहनतकश जनता ना पूना बदलाव रेंडु अलग-अलग दृष्टिकोण ते आंता। इविन उंदी दूसरा संगे काल्पनायो। वर्ग-संघर्ष लोप्पा ओसो प्रकृति विरुद्ध संघर्ष लोप्पा, मजदूर वर्ग पूरा समाज ता पूना बदलाव कींता, अनि संगेने तन्ना खुद ता वेने पूना बदलाव कींता। तन्ना काम ताकनास्के लगातार करियसोर मंदांना अनि तीरम-तीरम

तम्मा कमजोरिंग कुन सुधरे कीसोर मंदाना, इद्रम कीयाना बस्केने रोमी कीयानायो। इगा मत्ता माट सब्बेतोरा उदाहरणे हूडाटू। मावा लोप्पाटल वेल्लेतोर हर साल उन्नति कीतोम; इत्तेके मना हर साल उचुन पूना बदलाव आंता। नावाए उदाहरण हूडाटू। मुन्ने खुद नावा लोप्पा वेने वेल्ले गैर-माक्सवादी विचारकु मत्तांग अनि माक्सवाद तुन नन्ना पेरकेने स्वीकार कितान। नन्ना पुस्तक तले उचुन माक्सवाद करियतान अनि नावा विचार कुना शुरुआती पूना बदलाव कितान, मति मुख्य रूप ते बचोनो साल एवनल वर्ग-संघर्ष लोप्पा शामिल आतांके नावा पूना बदलाव आया परता। नन्ना मुन्ने विकसित आयाना इत्तेके करियाना जारी तासा लागियर लेवेके नन्ना पेरके अरिंतान। पूंजीपतिर तम्मा वेल्ले पूना बदलाव कीयाना जरूरत हिल्लाचोन बेस मंतोरा?

उचुन मुल इंजे चीनी पूंजीपति वर्ग चरित्र ता रेंडु पहलु आयवा सिर्फ उंदे पहलू पिस्ता इंतोरा। इदु निज्जमा? हिल्ले। उंदी बगिल पूंजीपति वर्ग संयुक्त राष्ट्रीय-निजी कारोबार कुना प्रशासनिक कर्माचारी बनेमातोर, ओरकिन शोषक तल बदलेमासी खुद तम्मा मेहनत ते कमई कीयाना मेहनतकश लेक्का बदले कीयाना काम ताका मंता। दूसरा बगिल संयुक्त कारोबार ते वाटता ओरा पूंजी पोरो ओरकिन इंजे वेने सही दर ते ब्याज दोरकिंता इत्तेके ओरु इंजे एवनल शोषण-व्यवस्था तल तम्मा संबंध देहताद हिल्ले। इंजे वेने विचारधारा, मनोभाव ओसो आदत लोप्पा ओरा ओसो मजदूर वर्ग नडमा वेल्ले अंतर मंता। इंजे ओरा चरित्र रेंडु रकम ता हिल्ले इंजी बद्रम इंदा परितोर? ओरु सही दर ते ब्याज ता रकम दोरकना बंद कीतेके ओरा “पूंजीपति” लेबल रेहची वाटतास्के वेने वेल्ले जोम ओरा विचारधारात्मक पूना बदलाव ता जरूरत मंदिता। इंजे पूंजीपति वर्ग ता चरित्र रेंडु रकम ता हिल्लेके पूंजीपतिरा काजे अध्ययन कीयाना अनि तम्मा पूना बदलाव कीयाना काम हिल्ले इंजी मानेमायना।

इद्रम ता दृष्टिकोण मना उद्योगपतिर ओसो व्यापारिरा असल परिस्थिति संगे ओसो ओरा लोप्पटल वेल्ले लोकुरा विचार संगे वेने मिले मायो। हत्ता उचुक साल कुना लोप्पा ओरा लोप्पटल वेल्ले लोकुरा लोप्पा

अध्ययन कीयाना विचार मत्ता अनि ओरु महत्वपूर्ण प्रगति कित्तोर। मना उद्योगपतिर ओसो व्यापारिरा पूर्ण पूना बदलाव सिर्फ काम कीयानास्के ने आया परिंता। कारोबार कुना लोप्पा अविन कर्मचारिर ओसो मजदूर लोरा संगे कलियसी श्रम कीयाना अनि इव कारोबार कुने उंदी पूना बदलाव कीयाना मुख्य जागा बने कीयाना। ओरा काजे ओरु अध्याय संगे तम्मा उचुन पाड़ना दृष्टिकोण कुन बदले कीयाना वेने महत्वपूर्ण मंता। इद अध्ययन खुद ता विचार कुना पोरो आधार आसी कीयाना। उचुक हत्तांग एवनल अध्ययन-कैप लोप्पा शामिल आता पेरके कारोबार लोप्पा वापिस वात्तास्के वेल्ले उद्योगपतिर ओसो व्यापारिर किन मजदूर लोरा संगे ओसो राष्ट्रीय शेयर कुना प्रतिनिधिरा संगे मुन्ने तुकू हल्कोए समझे मायना लेक्कटा भाषा ते वड़का परिंतोम, अदि काजे ओरा संगे काम कीयाना बेसता परिस्थितिंग पुट्टांग इंजी अनुभव दोरकता। ओरु तम्मा व्यक्तिगत अनुभव कुनल अध्ययन जारी तासना अनि तम्मा पूना बदलाव कीसोरे मत्तेके फायदा आंता इंजी समझेमातोर। अध्ययन ओसो पूना बदलाव तुन जरूरी हिल्वा लेक्का समझेमायना विचार (इदिना चर्चा इंजे-इंजे किताद मंता) वेल्ले उद्योगपतिर ओसो व्यापारिरा आयवा उचुने लोकरा प्रतिनिधित्व कींतोर।

5

बुद्धिजीविरा सवाल

मना देश लोप्पा जनता ना पांत लोप्पटा अंतरविरोध, बुद्धिजीविरा नड़मा वेने दिसिंता। मुन्ने पाड़ना समाज काजे काम कीयाना दसियों लाख बुद्धिजीविर, नेंडु पूना समाज ता सेवा किया मंतोर। इंजे पूना समाज ता जरूरत कुन अनुकूल बद्रम बने किया परिंतोम, इद्रम कियाला काजे माटु बद्रम ता सहायता किया परिंतोम। इद वेने जनता नड़मा ता उंदी अंतरविरोध आंदू।

हत्ता 7 साल कुना लोप्पा मना वेल्ले बुद्धिजीविर महत्वपूर्ण उन्नति कित्तोर। ओरु समाजवादी व्यवस्था ता पक्ष एतितोर इंजी साबित आता। ओरा लोप्पा वेल्लेतोर मेहनत ते मार्क्सवाद ता अध्ययन किया मंतोर अनि उचुन मुल कम्युनिस्ट वेने बनेमांतोर। इद्रम तोरा संख्या इंजे वेल्ले कम मंता मति अदु बराबर बेरससोर दाया मंता। बदे डावुट हिल्ला इंजे वेने उचुन बुद्धिजीविर समाजवाद पोरो डावुट कींतोर लेवेके अदना अनुमोदन कींतोर मति ओरु वेल्ले कम मंतोर।

समाजवादी निर्माण ता बेहरा काम तुन पूरा कियाला काजे चीन ते वेल्ले बुद्धिजीविरा सेवा ता जरूरत मंता। निज्जमे समाजवादी काम कियाला तैयार मत्ता बुद्धिजीविरा पोरो माटु विश्वास कीयाना अनि संगे ने मना संबंध कुना लोप्पा आमूल सुधार कीयाना। तम्मा योग्यता ता सक्रिय रूप ते इस्तेमाल कीयाना लेक्का हल कीयाना जरूरी मत्ता समस्यांग कुन हल कियाला ओरा मदद कीयाना। मना वेल्ले कामरेड्स बुद्धिजीविरा संगे एकता कियाला तैयार मन्नोर आंतोर। ओरु ओरा संगे सख्त व्यवहार कींतोर अनि गलत तरीका ते हस्तक्षेप कींतोर। इद्रम ता गलतिंग कुन सुधरे कीयाना।

मना बुद्धिजीविरा व्यापक संख्या उचुन विकसित आता मति इदिनकु अवु घमंडी आयनायो। अवु तम्मा पूना बदलाव जारी तासना अनि तम्मा पूंजीवादी विश्व-दृष्टिकोण ता त्याग कीसी सर्वहारा, कम्युनिस्ट विश्व-दृष्टिकोण पोयना अनि खुद किन समग्र रूप ते पूना समाज ता जरूरत कुना अनुकूल बने कीयाना, मजदूर, किसान लोरा संगे घनिष्ठ एकता आयाना। विश्व-दृष्टिकोण ते इद बदलाव उंदी बुनियादी बदलाव आंदू, इंजे ज्यादातर बुद्धिजीविर तम्मा विश्व-दृष्टिकोण ते पूर्ण बदलाव किताद मंता इनमूडायो। ओरु इद्रम कीयाना जारी तास्तेके मना काम, अध्ययन ताकनास्के कम्युनिस्ट विश्व-दृष्टिकोण पोयसोर दायनूर, मार्क्सवाद-लेनिनवाद तुन लागू कीसोर दायनूर, मजदूर, किसान लोरा संगे उंदी आसोर दायनूर इंजी आशा कीतोमा। माटु ओरु नडुम हरीं ते रोमवा लेवा, पेरके मलसी हूडवा लेवा (पेरके मलतेके ओरा पिस्वल मन्नो आंता) मुन्ने दांतोर इंजी आशा

कीतोमा मना देश ता समाज-व्यवस्था बदले माता अनि पूंजीवादी विचारधारा ता आर्थिक आधार तुन मुख्य रूप ते नष्ट किताद मंता अदिन काजे मना बुद्धिजीविरा बेहरा संख्या काजे तम्मा विश्व-दृष्टिकोण बदले कीयाना जरूरी मंता। मति विश्व-दृष्टिकोण पूराए बदले कियाला वेल्ले टाईम लागिअर अदिनके इदिना बारे ते माटु हिम्मत संगे काम कीयाना, जल्दबाजी कीयानायो। असल ते उचुन मुल विचारधारा ता दृष्टि ते हमेशा मार्क्सवाद-लेनिनवाद ओसो कम्युनिज्म तुन स्वीकार कियाला तैयार हिल्ला लोकुर वेने जरूर मंदानूरो। माटु ओरु इदिना समर्थन कीयाना इंजी ओरा संगे सख्त व्यवहार कीयानायो; बस्के एवनल वेरु राज्य ता जरूरत कुना अनुसार काम कीतोरो, कानूनी काम कीतोरो अस्के एवनल ओरा काजे बेस काम कीयाना लेक्का हूडना। बुद्धिजीविर ओसो नौजवान विद्यार्थिंरा नडमा विचारधारात्मक ओसो राजनीति काम लोप्पा हत्ता दिय्यंग उचुन कमी वात्ता अनि उचुन गलत रुझानकु वेने दिसतांग। उचुन मुल इंजे राजनीति पोरो तम्मा तल्लोरभूमि ता वायना कालम ता पिस्वल ओसो मानव जाति ता आदर्श कुना पोरो ध्यान हियाना जरूरत हिल्ले इंजी आल्सिंतोर। मुन्ने मार्क्सवाद ता बारे ते वेल्ले वडकानोर अगा इंजे अदिना फैशन मारता लेक्का मंता। इव रुझान कुना मुकाबला कियाला काजे माटु मना विचारधारात्मक ओसो राजनीतिक काम तुन सुदृढ़ कीयाना। बुद्धिजीविर ओसो नौजवान विद्यार्थिंर इरवुरासी मेहनत ते अध्ययन कीयाना। मना विशिष्ट विषय के आयवा विचारधारात्मक ओसो राजनीतिक रेंडासी दृष्टिकोण ते प्रगति कीयाना इत्तेके ओरु मार्क्सवाद, करंट अफेअर ओसो राजनीतिक समस्यांग ना वेने अध्ययन कीयाना। सही राजनीतिक दृष्टिकोण हिल्ला मंदाना इत्तेके शरीर ते जीवा हिल्ला लेक्का आंता। हत्ता कालम ते विचारधारात्मक पूना बदलाव जरूरी मत्ता अनि अदिना सकारात्मक रिजल्ट वेने वातांग। मति इद काम उचुन सख्त ओसो गलत तरीका ते कींताकु उचुन मुल नाराज आतोर। इद्रम कीयाना बेस मन्ने आंता। वायना कालम ते माटु इव गलतिंग कीयाना तुकू बचेमायना। विचारधारात्मक ओसो राजनीतिक काम पोरो सब्बे संबंधित विभाग

ओसो संगठन कुन तम्मा जिम्मेदारी बेस निभे कीयाना। इद पोल्लो कम्युनिस्ट पार्टी, नौजवान संघ, इद काम काजे जिम्मेदार सरकारी विभाग कुना पोरो ओसो विशेष रूप ते शिक्षा विभाग कुना प्रधान ओसो शिक्षक लोरा पोरो लागू आंता। मना शिक्षा नीति शिक्षा दोरकी कीयाना हर मानेय किन नैतिक, बौद्धिक ओसो शारीरिक रूप ते विकास कीयाना मौका दोरकना अनि समाजवादी चेतना, संस्कृति संगे लैस श्रमिक बनेमायना लेक्का मंदाना। माटु मेहनत ओसो बचत संगे देश ता निर्माण कीयाना विचार ता प्रचार कीयाना। माटु मना सब्बे नौजवान लोरा मदद कीयाना मना देश इंजे वेने वेल्ले गरीब मंता, इद परिस्थिति तुन माटु उचुने टाईम ते बुनियादी रूप ते बदले किया परवोम, मना नौजवान पीड़ी, पूरा जनता ना संयुक्त कोशिश कुना संगे ओसो खुद काम कीसीए उचुन दशाब्दिंग लोप्पा मना देश तुन शक्तिशाली ओसो समृद्ध बने किया परितोम इंजी समझेमायला मदद कीयाना। समाजवादी व्यवस्था निल्पी कीयाना तल वायना कालम ता उंदी आदर्श समाज एवनल एव्वना हरीं अरता, मति इद आदर्श तुन असल रूप हियाला काजे माकिन कठोर श्रम किया लागिगर। उचुन नौजवान लोर उंदी बेरा समाजवादी समाज वातेके हर वस्तु पूरा आंता, ताना पेरके ओरकिन बातले कियवा लेवा ओरु उंदी खुशहाल पिस्वल पिस्सना इंजी आल्सिंतोर। मति इदु सिर्फ आल्साडे आंदू।

6

अल्पसंख्यक राष्ट्रीयतांग ना सवाल

मना देश लोप्पा अल्पसंख्यक राष्ट्रीयतांग ना जनसंख्या 3 करोड़ तुक्क ज्यादा मंता। इद आबादी चीन ता कुल आबादी लोप्पा सिर्फ 6 प्रतिशते मंता, मति इद संख्या देश ता बेहसा इलाकांग लोप्पा मंतोर इदिना क्षेत्रफल चीन ता कुल क्षेत्रफल ता 50 तल 60 प्रतिशत एवनल मंता। अदिन काजे इदु वेल्ले हाम राष्ट्रीयता ओसो अल्पसंख्यक राष्ट्रीयतांग नडमा बेसता संबंध विकसित कीयाना वेल्ले जरूरी मंता। इद सवाल तुन हल कीयाना

कूजी हान शोविनिज्म तुन कीयाना आंदू संगेने बेगा अल्पसंख्यक राष्ट्रीयतांग लोप्पा स्थानीय राष्ट्रीय शोविनिज्म मंता अंगा अदिन खत्म कीयाना कोशिश वेने कीयाना। विभिन्न राष्ट्रीयतांग ना एकता काजे हान शोविनिज्म ओसो स्थानीय राष्ट्रीयता शोविनिज्म रेंडासी नुकसानदायक मंतांग। इदु जनता नडमा ता अंतरविरोध आंदू, इदिन हल कीयाना। इदिना लोप्पा माटु उचुन काम वेने किताद मंता। अल्पसंख्यक राष्ट्रीयतांग मंदाना वेल्ले इलाकांग लोप्पा विभिन्न राष्ट्रीयतांग ना आपस ते संबंध वेल्ले सुधरेमाता। मति उचुन समस्यांग इंजे वेने हल कीयाना पिस्तांग। उचुन जागा ने हान शोविनिज्म ओसो स्थानीय राष्ट्रीयता शोविनिज्म इंजे वेने गंभीर रूप ते मंता, माटु इविना पोरो परताचोन ध्यान हियाना। हत्ता साल सब्बे राष्ट्रीयतांग ना जनता ना कोशिश कुना कारण ते अल्पसंख्यक राष्ट्रीयतांग ना वेल्ले इलाकांग लोप्पा जनवादी सुधार अनि समाजवादी बदलाव काम बुनियादी रूप ते पूरा किताद मंता। तिब्बत लोप्पा परिस्थिति अनुकूल आताद हिल्ले अदिनेके अगा इंजे एवनल जनवादी सुधार आलागी किताद हिल्ले। केंद्रीय जनताना सरकार ओसो तिब्बत ता स्थानीय सरकार नडमा 17 सूत्री समझौता आता अदिना अनुसार समाज-व्यवस्था लोप्पा सुधार कीयाना जरूरी मंता। मति इद्रम बस्के कीयाना, इदिना निर्णय सिर्फ तिब्बत जनता ना बेहर संख्या ओसो अदिना नेतृत्व कीयाना स्थानीय सार्वजनिक नेताल लोर अदिन व्यवहारिक समझेमायनूर अस्केने आया परिंता, इदिना बारे ते बोरे वेने पेरके गुचनायो। इंजे दूसरा पंचवर्षीय योजना ताकनास्के तिब्बत लोप्पा जनवादी सुधार कीयाना या कीयानायो इंजी निर्णय किताद मंता। अविन तीसरा पंचवर्षीय योजना ताकनास्के कीयाना या कीयानायो इंदाना निर्णय माटु अस्केटा परिस्थिति अनुसार कीतोम।

विस्तृत योजना ओसो सही बंदोबस्त

विस्तृत योजना इत्तेके मना देश लोप्पा 60 करोड़ आबादी ता हित कुन सुरता तासिसी मत्ता योजना। योजना बने कीयानास्के बदे वेने समस्या तुन हल कियानास्के लेवेके समस्या पोरो विचार कीयानास्के माटु सबसे मुन्ने चीन लोप्पा 60 करोड़ आबादी मंता इंजी सुरता तासना, माटु इदिन बस्केने मरंगनायो। इदिना पोरो माटु बारांकु जोर हींतोम? उचुन मुल इंजे वेने मनगा 60 करोड़ आबादी मंता इंजी पुन्नोरा? बदे डारुट हिल्व सब्बे तोर इद पोल्लो तुन पुंजी मंतोरा। मति अमल कीयानास्के उचुन मुल इदिन मरंगितोर अनि बचोन कम मत्तेके, बचोन सुडला इलाका मंदिता अचोने बेस इंदान लेक्का आंतोरा। सुडला “इलाका” मंदाना इंजी आलसानोर समाजवादी समाज ता निर्माण कीयाना महान काम ता सेवा कीयाना उद्देश्य ते सकारात्मक सब्बे तत्व कुन गोलबंद कीयाना विचार ता विरोध कींतोरा। एकता किया परना लेक्कटा सब्बे लोकुरा संगे एकता कीयाना, नकारात्मक तत्व कुन सकारात्मक तत्व लेक्का बदले कियाला परताचोर तरीकांग परहकसोर मंदाना। इद्रम तोर व्यापक दृष्टिकोण पोयंतोर अनि मनगा 60 करोड़ आबादी मंता, इद उंदी वस्तुगत तथ्य आंदु अनि इदे मावा सम्पत्ति आंदू इंजी स्वीकार कींतोरा। मना आबादी वेल्ले मंदानादु बेसे, मति बदे डारुट हिलवा इदिना कारण ते उचुन मुश्किल कु वेने वांतांगा। सब्बो मोर्चा ने निर्माण काम जोरशोर ते ओसो सफलतापूर्वक ताका मंता मति जबरदस्त सामाजिक बदलाव ता वर्तमान कालम ते माटु इंजे वेने बचोनो मुश्किल समस्यांग कुना सामना किया लागा मंता। प्रगति संगे-संगे मुश्किलकु (इद उंदी अंतरविरोध आंदू) वेने मंतांगा। मति सब्बे अंतरविरोध कुन सिर्फ हल कीयानाए आयवा अविन पक्का हल कीयाना। मना मार्गदर्शनक उसूल विस्तृत योजना अनि सही बंदोबस्त मंता। अदु अनाज ता समस्या आई लेवेके प्राकृतिक आपदांग, रोजगार, शिक्षा, बुद्धिजीविर, सब्बे देशभक्तीपूर्ण ताकत कुना संयुक्त मोर्चा ओसो अल्पसंख्यक राष्ट्रीयतांग संबंधित समस्यांग आई लेवेके बदे वेने समस्या आई माटु

हमेशा पूरा जनता काजे विस्तृत योजना दृष्टिकोण पोयसी ताकना अनि टाईम ओसो जागा ता विशेष संभावना अनुसार ओसो सब्बे संबंधित लोकुरा राय एतिता पेरके ने पूरा सही बंदोबस्त कीयाना। बद्रमाई माटु लोकुर वेल्ले मंतोर, पेरके अरसी मंतोर अनि समस्यांग वेल्ले मुश्किल मंतांग अविन हल कीयाना मुश्किल मंता इंजी शिकायत कीसोर तिरियानायो, इद्रम ता समस्यांग कुन लेट कियवा लेवा हल कीयाना। नावा हिसाब ते हर मानेय ओसो हर समस्या ता परवाह सिर्फ सरकारे कीयाना इंजी आयो। बचोनो परिस्थिति ने अविन सामाजिक संगठन ओसो सीधा जनता ना जिम्मेदारी ते विड़समूडांता, इव रेंडासी ना लोप्पा समस्या तुन हल कियाला काजे बेसता तरीकांग परहकना क्षमता मंता। इद वेने विस्तृत योजना अनि सही बंदोबस्त ता उसूल लोप्पा वांता। इदिना बारे ते माटु सामाजिक संगठन ओसो विभिन्न जागा ना जनता ना मार्गदर्शन कीयाना।

8

“सौ पुंगार पूयला हीमुट अनि सौ विचारशाखांग लोप्पा होड़ आयला हीमुट” ओसो “दीर्घकालीन संगे मंदाना अनि आपसी निरीक्षण” ता बारे ते

“सौ पुंगार पूयला हीमुट अनि सौ विचारशाखांग लोप्पा होड़ आयला हीमुट” ओसो “दीर्घकालीन रूप ते संगे मंदाना अनि आपसी निरीक्षण” इव रेंडासी नारांग बद्रम पेश किताद मंता? इव नारांग चीन लोप्पा मत्ता अलग-अलग परिस्थितिंग कुन सुरता तासिसी, समाजवादी समाज लोप्पा इंजे वेने विभिन्न रकम ता अंतरविरोधकु मंतांग अद देश ता आर्थिक, सांस्कृतिक विकास ता रफ्तार ते कीयाना फौरी जरूरत तुन मानेमासी कीसोरे पेश किताद मंता। “सौ पुंगार पूयला हीमुट अनि सौ विचारशाखांग लोप्पा होड़ आयला हीमुट” इंदाना नीति कला, विज्ञान ता प्रगति तुन प्रोत्साहन हियाना, मना देश लोप्पा उंदी समृद्ध समाजवादी संस्कृति ता विकास कीयाना नीति आंदू कला लोप्पा विभिन्न रूप ते ओसो शैलिंग

ना स्वतंत्र रूप ते विकास आयना अनि विज्ञान लोप्पा विभिन्न विचारशाखांग लोप्पा स्वतंत्र रूप ते वाद-विवाद आयाना। माटु बदे उंदी शैली लेवेके विचारशाखा तुन कांजना अनि दूसरा बदे शैली लेवेके विचारशाखांग पोरो पांबदी वाटला काजे प्रशासनिक कार्यावाहिंग कीतेके अद कला ओसो विज्ञान ता विकास काजे नुकसानदायक साबित आंता। कला ओसो विज्ञान लोप्पा सही ओसो गलत ता सवाल तुन कला ओसो विज्ञान लोप्पा स्वतंत्र वाद-विवाद संगे इविना लोप्पा व्यवहारिक काम संगे हल कीयाना। अविन जल्दबाजी ते हल कीयानायो। बदे वेने सही लेवेके गलत तय कियाला काजे उंदी जांच-पड़ताल कीयाना जरूरी मंदिता। पूरा इतिहास लोप्पा पूना ओसो सही वस्तु शुरू ते वेल्ले लोकुरा मान्यता दोरकी कीयाना विफल आंतांग अनि अविन बचोनो विंको-वंको हरीं ते संघर्ष कीसोरे मुन्ने दाया लागिंता। हमेशा सही ओसो बेसता वस्तु तुन शुरू ते बेसता गब्बू मत्ता पुंगार लेक्का आयवा उंदी रोंडा लेक्का मानेमायमूडांता। सूर्यमंडल ता बारे ते कोपरनिकस ना सिद्धांत¹ ओसो डार्विन ना विकासवाद ता सिद्धांत² तुन गलत मानेमासी ठुकेर किताद मत्ता, अविन कड़ा विरोध ता सामना कीसी जीत दोरकी किया लागसी मत्ता। चीन ता इतिहास लोप्पा वेने इद्रम ता बचोनो उदाहरणकु मंतांग। समाजवादी समाज लोप्पा पाड़ना समाज तुकू पूना समाज ता विकास काजे बुनियादी रूप ते अलग ओसो बचोनो बेसता परिस्थितिंग मंदितांग। मति हमेशा पूना पुटना ताकतकु मुन्नेटल मत्ता ताकत कुन दबे किसिंतांग। पूना वस्तु ना विकास लोप्पा पुंजी-पुंजी दबाव वायवा लेवा सिर्फ चर्चा ता कमी कारण ते वेने बाधा आंता। अदिन काजे कला ओसो विज्ञान लोप्पा सही ओसो गलत ता सवाल पोरो सतर्क मंदाना, स्वतंत्र वाद-विवाद तुन प्रोत्साहन हियाना अनि जल्दीबाजी ते रिजल्ट तेंडना तुकू बचेमायला काजे जरूरी मंता। मना हिसाब ते इद रुझान संगे कला ओसो विज्ञान ता उचुन बेस विकास आयला मदद दोरकिंता।

माक्सवाद ता वेने संघर्ष संगे ने विकास आता। शुरू ते माक्सवाद पोरो वेने हर रकम ता हमला आता अनि अदिन उंदी अंगडम ता रोंडा

समझेमायनोरा। दुनिया ता बचोनो हिस्सा ने नेंडु वेने इद्रमे किया मंतोरा। इदिना उलटा समाजवादी देश कुना लोप्पा मार्क्सवाद ता परिस्थिति अलग मंता। मति इव देश कुना लोप्पा गैर-मार्क्सवादी ओसो मार्क्सवादी-विरोधी विचारधारांग मंतांग। चीन लोप्पा मालिकाना ता व्यवस्था ता समाजवादी बदलाव मुख्य रूप ते पूरा आताद मंता अनि जनता ना बेहरा स्तर ता वर्ग-संघर्ष (मुन्ने क्रांतिकारी कालम कुना विशेषता मत्ता) मुख्य रूप ते खत्म आता मति सत्ता ते मत्ता जमींदार वर्ग ओसो दलाल पूंजीपति वर्ग ता अवशेष कु इंजे वेने मंता, पूंजीपति वर्ग इंजे वेने मंता, निम्न पूंजीपति वर्ग ता पूना बदलाव कीयाना इंजेने शुरू आता। वर्ग संघर्ष इंजे माराताद हिल्ले। सर्वहारा वर्ग ओसो पूंजीपति वर्ग नडमा ता वर्ग संघर्ष विभिन्न राजनीतिक ताकत कुना नडमा ता वर्ग संघर्ष ओसो विचारधारा लोप्पा सर्वहारा वर्ग ओसो पूंजीपति वर्ग नडमा ता वर्ग संघर्ष इंजे वेने उंदी दीर्घकालीन ओसो वंको-वंको संघर्षे मंदिता अनि बस्केने अदु वेल्ले तीव्र वेने आया परिंता। सर्वहारा वर्ग तन्ना विश्व दृष्टिकोण अनुसार दुनिया तुन बदले कियाला आल्सिंता, पूंजी पति वर्ग तन्ना विश्व दृष्टिकोण अनुसार दुनिया तुन बदले कियाला आल्सिंता इदिना बारे ते आखरी ते समाजवाद जीडिंताए लेवेके पूंजीवाद जीडिंता इंदानादु इंजे फैसला आताद हिल्ले। मार्क्सवादिर इंजे वेने पूरा आबादी लोप्पा, बुद्धिजीविरा लोप्पा वेल्ले मंतोरा। इदिन काजे मार्क्सवाद ता इंजे वेने सिर्फ संघर्ष संगेने विकास आयारा।

मार्क्सवादी सिर्फ संघर्ष संगे ने विकसित आया परिंता। इद पोल्लो सिर्फ हत्ता कालम ते ओसो वर्तमान कालम ते ने आयवा वायना कालम ते वेने अनिवार्य रूप ते सही साबित आयरा। सही चीज हमेशा गलत खिलाफ संघर्ष कीसी विकसित आंता। सही ओसो सुंदर हमेशा गलत ओसो लब्बड़ तुन दबे कींतांग अनि इविनाए खिलाफ संघर्ष संगे विकसित आंतांग। मानव जाति बदे गलत पोल्लो तुन ठुकरे कींता अनि बदे सही वस्तु तुन पोयसी ताकिंता अस्के पूना सच्चाई ओसो पूना गलतिंग संगे संघर्ष शुरू कींतांग। इद्रम ता संघर्षकु बस्के मारोंग आंतांग। इद सही ता

विकास ता नियम आंदू अनि प्राकृतिक रूप ते मार्क्सवादी नियम वेने इदे आंदू

मना देश लोप्पा समाजवाद ओसो पूंजीवाद नडमा विचारधारात्मक संघर्ष लोप्पा बद जीडिंता इंजी निर्णय कियाला वेल्ले टाईम लागिगर। बारांकु इत्तेके पूंजीपति वर्ग ओसो पाडना समाज तल वात्ता बुद्धिजीविरा प्रभाव ता पिस्वल, ओरा वर्ग विचाधारा ता पिस्वल, मना देश लोप्पा मुन्ने वेने वेल्ले दिव्यंग एवनल मंदिंताए। इद संघर्ष लोप्पा गलत तरीका ते जोर-जबरदस्ती कीयाना तरीका आयवा सिर्फ समझे कीयाना तरीका पोयसीए ताकना। विचारधारात्मक संघर्ष लोप्पा नेंडु समाजवाद काजे अनुकूल परिस्थिति मंता। राज्य ता मुख्य सत्ता सर्वहारा वर्ग ता नेतृत्व ते ताकना मेहनतकश जनता ना कैदे मंता। कम्युनिस्ट पार्टी शक्तिशाली मंता अनि अदिना वेल्ले सम्मान आंता। मना काम लोप्पा गलतिंग ओसो कमजोरिंग मत्तेकाई न्याय संगे ताकना हर मानेय माटु जनता संगे ईमानदार मंतोम अनि जनता संगे हट्टा ते हट्टा काल्पसी मना मातृभूमि ता निर्माण कियाला काजे संकल्पबद्ध ओसो तैयार मंतोर इंजी हूडा परितोर। माटु महान सफलतांग दोरकी कीतोम, वायना कालम ते माटु ओसो वेने बेहरा सफलतांग दोरकी कीतोम। पूंजीपतिर ओसो पाडना समाज तल वात्ता बुद्धिजीविरा लोप्पा उंदी बेहरा संख्या देशभक्त लोरा मंता; ओरु पूयसोर मत्ता समाजवादी मातृभूमि ता सेवा कियाला तैयार मंतोर अनि ओरु समाजवादी काम ओसो कम्युनिस्ट पार्टी ता नेतृत्व ते ताकना मेहनतकश जनता तल जेक आतेके ओरा पिस्वल मुश्किल ते वायारा।

लोकुर पूछेमायना संभावना मंता: मना देश ता बेहरा संख्या ते जनता मार्क्सवाद तुन मार्गदर्शक विचाराधारा लेक्का स्वीकार कित्ता। इत्तेके मार्क्सवाद ता आलोचना किया परिता या? इंगो अदिना आलोचना जरूर किया परिता। मार्क्सवाद उंदी वैज्ञानिक सत्य आंदू अनि अदु बदे वेने आलोचना तुकू वेरियो। अदु आलोचना तुकू वेरियतेके वैचारिक रूप ते पेरके अरिंता अनि अदु अंगडम साबित आंता। असल ते आदर्शवादी लोकुर हर दिव्या हर तरीका ते इदिना आलोचना कींतोरा? पूंजीवादी

ओसो निम्न-पूँजीवादी विचार कुना संगे तुंडसी मत्ता लोकर ओसो खुद किन बदले कीयाना तैयार हिल्लेरे, ओरु वेने हर रकम ते मार्क्सवाद ता आलोचना कीवोरा? मार्क्सवादिर किन बदे आलोचना तुकू वेरियानायो। इदिन उल्टा ओरु आलोचना ओसो संघर्ष ता उर्ग वेडिय लोप्पा तन्ना किन फौलाद बने कीयाना अनि विकसित कीयाना, पूना-पूना मोर्चा ते जीत दोरकी कीसोर दायना जरूरत मंता। गलत विचार कुना खिलाफ संघर्ष कीयाना रोग ता इलाज काजे टीका वाटना लेक्का मंता। टीका ता असर पेरके मानेय ना लोप्पा रोग संगे लडेमायना शक्ति बेरसिंता। ग्रीनहाउस कुना लोप्पा मोडिड़ी कित्ता पोदलांग लोप्पा वेल्ले पिस्वल शक्ति मन्नो आंता। “सौ पुंगार पूयला हीमुट अनि सौ विचारशाखांग लोप्पा होड आयला हीमुट” ता नीति पोयसी ताकतेके विचारधारा लोप्पा मार्क्सवाद ता नेतृत्व लोप्पा कमजोर आयवा मजबूत आसोर दांता।

गैर-मार्क्सवादी विचार कुना पोरो मना नीति बाता मंदाना? साबित आता प्रतिक्रांतिकारि ओसो समाजवादी निर्माण लोप्पा तोडफोड कीयाना लोकरा समस्या हल्को मंता: ओरा भाषण ता स्वतंत्रता ऊंदितेके वेने काम ताकिंता। मति जनता नडमा फैलेमासी मत्ता गलत विचार कुना सामना आतेके अदु अलगे मंदिता। अस्के इद्रम ता विचार कुना पोरो पांबदी वाटना अनि अविन वेहाना मौका हियवेके काम ताका परिंता या? हिल्ले। जनता नडमा तेदना विचारधारात्मक सवाल कुन, मानेय ना मानसिक दुनिया संबंधित सवाल कुन जल्दबाजी ते हल कीयाना तरीका इस्तेमाल कीयाना सिर्फ अंगडमे आयवा वेल्ले नुकसानदायक वेने साबित आंता। मीटु गलत विचार कुन फैलेमायला रोमी कीतेकाई गलत विचार कु मंदिंतांगे। दूसरा बगिल सही विचार कुन ग्रीनहाउस तेने बंद कीसी पोसे कीतेके उर्ग वडिय ता संपर्क ते वायला हीवेके ओरा अविना लोप्पा रोग संगे लडेमायना ताकत पैदा आयवेके गलत विचार कुना सामना आतेके जीडा परवोंग आतांग। अदिना कारण बहस, आलोचना ओसो तर्क-वितर्क ता तरीका इस्तेमाल कीसीए माटु असल ते सही विचार कुन वेहा

परितोम, गलत विचार कुन दूर किया परितोम, समस्यांग कुना असल ते हल किया परितोम।

इद पूंजीपति वर्ग ओसो निम्न-पूंजीपति वर्ग ता लोकर तम्मा विचारधारा प्रकट कीयाना अनिवार्य मंता। ओरु राजनीतिक ओसो विचारधारात्मक सवाल कुना बारे ते हर संभव तरीका ते वेल्ले जिद् संगे मना उद्देश्य प्रकट कीयाना वेने अनिवार्य मंता। माटु ओरु इद्रम कीयाना इंजी आशा कीतोम। ओरकिन तम्मा उद्देश्य रोमी कियाला काजे ओरा खिलाफ दमन ता तरीका इस्तेमाल कियवा लेवा ओरकिन तम्मा उद्देश्य प्रकट कीयाना मौका हियाना अनि संगेने ओरा संगे वाद-विवाद कीयाना, ओरा पूर्ण आलोचना कीयाना। बदे डावुट हिल्ला माकिन हर रकम ता गलत विचार कुना आलोचना कियाना। गलत विचार कुना आलोचना कीयाना। गलत विचार कुना आलोचना कियवा मंदाना गलत विचार कुना बेरोक-टोक फैलेमासोर मत्तादु हूड्डी वेने केमेक मंदाना ओसो अविन मजबूत आयला हियाना बद्रमाई सही हिल्ले। गलतिंग ना आलोचना कीयाना, लब्बड़ ता रोंडा मोडियनायो इंजी अदिना खिलाफ संघर्ष ताकी कीयाना। मति इद्रम ता आलोचना कठमुल्लावादी मंदानायो, माटु अधिभौतिकवादी तरीका तुने आयवा द्वन्द्ववात्मक तरीका तुन इस्तेमाल कीयाना कोशिश कीयाना। वैज्ञानिक विश्लेषण ता ओसो अकाट्य तर्क ता जरूरत मंता। कठमुल्लावादी आलोचना संगे बदे समस्या हल आयो। माटु हर रकम ता लब्बड़ ता रोंडा खिलाफ मंतोम, मति इदिना अंतर तुन इत्तेके बद असली ओसो बद नकली इंजी सतर्कता ते समझेमायना। इविना नड्मा सतर्कता ते बद्रम अंतर कीयाना, माटु जनता लंगे कलियसी करियाना, अनि इदिना संगे कलियसी लब्बड़ ता रोंडा खिलाफ संघर्ष कियाला काजे सही तरीका पोयसी ताकना।

कठमुल्लावाद ता आलोचना कीयाना संगे-संगे माटु संशोधनवाद ता आलोचना कीयाना बगिल वेने ध्यान हियाना। संशोधनवाद लेवेके दक्षिणपंथी अवसरवाद उंदी पूना पूंजीवादी विचारधारात्मक रुझान आंदू इदु कठमुल्लावाद तुकू वेने ज्यादा खतरनाक मंतांग। संशोधनवादी लेवेके

दक्षिणपंथी अवसरवादी, मार्क्सवाद पोरो सिर्फ पोंगडिंग कींतोर; ओरु वेने “कठमुल्लावाद” हमला कींतोर। मति बद वस्तु पोरो असल हमला कींतोर अदु मार्क्सवाद ता मूल वस्तु आंदू ओरु भौतिकवाद ओसो द्रन्द्रवाद ता विरोध कींतोर लेवेके अविन तोड़-मरोड़ कीसी पेश कींतोर, जनता ना जनवादी तानाशाही ओसो कम्युनिस्ट पार्टी ता नेतृत्वकारी भूमिका ता विरोध कींतोर लेवेके अविन कमजोर कीयाना कोशिश कींतोर। समाजवादी बदलाव ओसो समाजवादी निर्माण ता विरोध कींतोर लेवेके अविन कमजोर बने कीयाना कोशिश कींतोर। मना समाजवादी क्रांति ता बुनियादी रूप ते जीत आता पेरके वेने मना समाज लोप्पा उचुन मुल पूंजीवादी व्यवस्था कुन पुनर्स्थापित कीयाना सपना हूड़ना, हर मोर्चा लोप्पा विचारधारात्मक मोर्चा वेने शामिल मंता, मजदूर वर्ग खिलाफ संघर्ष कीयाना लोकर मंदितोर। इद संघर्ष लोप्पा संशोधनवादी लोकर तम्मा डावड़ कै दा भूमिका निभे कींतोर।

शाब्दिक रूप ते इव रेंडासी नारांग (सौ पुंगार पूयला हिमुट ओसो सौ विचारशांखांग लोप्पा होड़ आयला हीमुट) ता बद वर्ग चरित्र मननो; इविन इस्तेमाल सर्वहारा वर्ग किया परिंता अगा पूंजीपति वर्ग ओसो बाकी लोकर वेने किया परिंतोर। विभिन्न वर्ग, श्रेणिंग ओसो सामाजिक ग्रुप लोप्पा हर मानेय ना बद पुंगार बेस मंता अनि बद लब्बड़ ता मंता इंदाना बारे ते तम्मा अलग-अलग विचारकु मंदितांग। नेंडु व्यापक जनता ना दृष्टिकोण ते बेसता गब्बू मत्ता पुंगार ओसो लब्बड़ ता रोंडा नड़मा अंतर कीयाना परीक्षा बाता मंदाना? मना जनता ना राजनीतिक पिस्वल ते बोनाए वड़कना ओसो कीयाना लोप्पा बाता सही ओसो बाता गलत मंता इंजी बद्रम तय कीयाना? मना संविधान ता उसूल, मना जनता ना बेहरा संख्या ता संकल्प ओसो मना देश ता विभिन्न राजनीतिक पार्टिंग, ग्रुप कु बचोनो बेरा पेश कित्ता राजनीतिक विचार कुना पोरो आधार आसी माटु दोड़ रास्ता परिक्षांग आयना इंजी आल्संतोम:

- 1) ओरा कीयाना ओसो वड़कना मना देश ता विभिन्न राष्ट्रीयतांग ना जनता तुन एकताबद्ध कियाला सहायक आयना, अदिना पांत लोप्पा फूट वाटनायो;
- 2) अदु समाजवादी बदलाव ओसो समाजवादी निर्माण काजे फायदा आयना, नुकसानदायक आयो;
- 3) अदु जनता ना जनवादी तानाशाही तुन सुदृढ़ कियाला सहायक आयना, अदिना मोदोल कोय्यना लेवेके अदिन कमजोर कीयानायो;
- 4) अदु जनवादी केंद्रीयता तुन सुदृढ़ कियाला सहायक आयना, अदिना मोदोल कीयाना लेवेके कमजोर बनेमायनायो;
- 5) अदु कम्युनिस्ट पार्टी ता नेतृत्व तुन मजबूत कियाला सहायक आयना, अदिन जेक आयना लेवेके कमजोर कीयानायो;
- 6) अदु अंतरराष्ट्रीय समाजवादी एकता ओसो दुनिया ता शांतिप्रिय जनता ना एकता काजे फायदा साबित आयना, नुकसान कीयानायो।

इव 6 परीक्षांग लोप्पा सबसे ज्यादा महत्वपूर्ण रेंडु परीक्षांग समाजवादी हरी ओसो पार्टी ता नेतृत्व ता बारे ते मंतांग। इव परीक्षांग विभिन्न सवाल कुना पोरो जनता ना नड़मा स्वतंत्र बहस तुन प्रोत्साहन दोरकना इंजी बने किताद मंता। इव परीक्षांग ना समर्थन कीवोर ओरु इंजे वेने तम्मा विचार प्रकट किया परितोर अनि तम्मा पक्ष ते तर्क पेश किया परितोर। मति जनता ना उंदी बेहरा संख्या तुन इव परीक्षांग स्पष्ट आतेके, आलोचना ओसो आत्मालोचना तुन सही दिशा ते ओयमूड़ायर, लोकुरा कीयाना ओसो वड़कना तुन सही लेवेके गलत इंजी तय कियाला काजे इव परीक्षांग कुन लागू कियमूडांता। इव परीक्षांग राजनीतिक परीक्षांग आंदुंगा। वैज्ञानिक सिद्धांत कुना सच्चाई ता निर्णय कियाला काजे लेवेके चित्रकारी ता सोबात्मक मूल्यांकन कियाला काजे बाकी विषय कुना अनुकूल परीक्षांग ना जरूरत मंदिता, मति इव 6 राजनीतिक परीक्षांग कला लेवेके विज्ञान ता सब्बे कार्रवाईंग पोरो वेने लागू आंतांग। मना लेक्कटा

समाजवादी देश कुना लोप्पा बदे वैज्ञानिक लेवेके कलात्मक कार्वाइंग आया परिंतांग अवु इव राजनीतिक परीक्षांग ना अनुकूल मंदांना।

पोरो वेहता परीक्षांग मना देश ता विशिष्ट ऐतिहासिक परिस्थितिंग पोरो आधार आसी मंता। विभिन्न समाजवादी देश कुना लोप्पा ओसो ओसो विभिन्न कम्युनिस्ट पार्टींग मुन्ने अलग-अलग परिस्थितिंग मंतांग अदिन काजे माटु अविन चीन ता लेक्का तरीकांग लागू कीयाना लेवेके अविना काजे इव तरीकांग लागू कीयाना जरूरी समझेमायोमा।

“दीर्घकालीन संगे मंदांना अनि आपसी निरीक्षण” ता नारा वेने मना देश ता विशिष्ट ऐतिहासिक परिस्थितिंग ना उपज आंदू। इदिन अचानक पेश किताद हिल्ले असल इत्तेक इदु बचोनो साल तल आकार एतसोर मत्ता। दीर्घकालीन संगे मंदांना विचार उंदी दीर्घकालीन ताकसोर वात्ता विचार आंदू मति हत्ता साल समाजवादी व्यवस्था बुनियादी रूप ते निल्पी कीतेके इद नारा स्पष्ट रूप ते पेश कीयाना। पूंजीपति ओसो निम्न-पूंजीपति वर्ग कुना जनवादी पार्टींग कुन मजदूर वर्ग ता राजनीतिक पार्टी ना संगे-संगे दीर्घकालीन बारांकु मंदा हियाना? बारांकु इत्तेके मना मुन्ने माटु समाजवादी काम काजे जनता तुन एकताबद्ध कीयाना काम ईमानदारी ते कीसोर मंदांना सब्बे जनवादी पार्टींग (इविन जनता ना विश्वास दोरकसी मंता) दीर्घकालीन संगे मंदांना नीति लागू कियवा मंदांना बदे कारण हिल्ले। नन्ना वेल्ले मुन्ने जून 1950 तेने राजनीतिक सलाहकार सम्मेलन ता पहली राष्ट्रीय कमेटी ता दूसरा अधिवेशन लोप्पा इदिन दोड़ रास्ता लेक्का पेश किताद मत्ता:

बोराई निज्जमे जनता ना सेवा कियाला आल्सतेके मुश्किल वात्तास्के जनता ना निज्जने सहायता कीतेके, बेस काम कीसी मत्तेके अनि लगातार काम कीसोर मत्तेके जनता ओसो जनताना सरकार ओरकिन ठुकरे कीयाना लेवेके ओरकिन रोजी कीयाना ओसो तम्मा सेवा देश तुन हियाना मौका हियवा मंदांना बदे कारण हिल्ले।

नन्ना इगा विभिन्न पार्टींग ना दीर्घकालीन संगे मंदांना राजनतीक आधार मंता इंजी वेहताना। कम्युनिस्ट पार्टी ना विचार ओसो नीति उंदी

दीर्घकालीन रूप ते जनवादी पार्टींग संगे मंदानादु मंता। इव जनवादी पार्टींग ना पिस्वल दीर्घकालीन मंदा परिंतांगे परवोंग, इद सिर्फ कम्युनिस्ट पार्टी ना विचारे आयवा इव जनवादी पार्टींग खुद बद्रम व्यवहार कींतांग अनि इविना पोरो जनता ना विश्वास मंता या हिल्ले इंदाना पोरो आधार आसी मंता। विभिन्न पार्टींग ना आपसी निरीक्षण वेने वेल्ले जोम तल ताकना तथ्य आंदू, इत्तेके अवु उंदी दूसरा तुन सलाह हीसोर मंतांग अनि उंदी दूसरा ता आलोचना कीसोर मंतांग। आपसी निरीक्षण उंदी बगिल ता समस्या आयो, इत्तेके कम्युनिस्ट पार्टी जनवादी पार्टींग ना निरीक्षण किया परिंतांग अनि जनवादी पार्टींग कम्युनिस्ट पार्टी ना निरीक्षण कीयाना परिंतांग। जनवादी पार्टींग कम्युनिस्ट पार्टी ना निरीक्षण कीयाना अनुमति बारांकु हियाना? बारांकु इत्तेके वरोर मानेय ना लेक्का ने उंदी पार्टी काजे वेने अदु तन्ना अलग राय केंजना वेल्ले जरूरी मंता। माटु सब्बे तोर कम्युनिस्ट पार्टींग पोरो मुख्य रूप ते मेहनतकश जनता ओसो पार्टी सदस्य लोरा निरीक्षण मंदिंता। मति जनवादी पार्टींग कीयाना निरीक्षण मना काजे वेल्ले फायदा आंता। बदे डावुट हिल्वा कम्युनिस्ट पार्टी ओसो जनवादी पार्टींग नडमा आपसी सलाह-मशविरा ओसो आपसी आलोचना कीयाना अविना आपसी निरीक्षण कीयानास्के सिर्फ अदु पोरो वेहता 6 राजनीतिक परीक्षांग अनुसार कीतेके ने सकारात्मक भूमिका निभे किया परिंतांग। अदिन काजे माटु सब्बे जनवादी पार्टींग सकारात्मक विचाधारात्मक पूना बदलाव बगिल ध्यान हींतांग ओसो कम्युनिस्ट पार्टी संगे दीर्घकालीन संगे मंदाना ओसो आपसी निरीक्षण कीयाना कोशिश कीसोर मंदिंतांग अनि अवु तम्मा किन पूना समाज ता जरूरत कुना अनुकूल बने कींतांग इंजी आशा कींतोमा।

9

उचुने मुल कीयाना विद्रोह कुना सवाल कुना बारे ते

1956 ते उचुन मजदूर ओसो विद्यार्थि उंदी-रेंडु जागा ने हड़ताल कित्तोर। इव विद्रोह कुना फौरी कारण भौतिक फायदा संबंधित ओरा उचुक

मांग कुन पूरा कीसोर हिल्ला मंदानादु मत्ता। अविना लोप्पा उचुन मांग कुन पूरा कीयाना जरूरत मत्ता अनि पूना किया परमूडांता वेने अनि उचुक मांग कुना जरूरत हिल्ला मत्ता अदिनके अविन पूरा कीयाना जरूरत हिल्ले। मति इदिनकु वेने ज्यादा नेतृत्व नौकरशाही पोरो अमल कीयाना महत्वपूर्ण कारण मत्ता। उचुन पोल्लोंग लोप्पा इद्रम ता नौकरशाही गलतिंग काजे पोरोटा अधिकारि किन जिम्मेदार मानेमायना अनि दोड़ ता अधिकारि किन इव सब्बे ना दोष हियानायो। इव विद्रोह कुना ओसो उंदी कारण मंता अदु मजदूर ओसो विद्यार्थिरा नड़मा विचारधारात्मक ओसो राजनीतिक शिक्षा ता कमी। अदे साल कृषि सहकारी समितिंग ना उचुन सदस्य लोरा वेने विद्रोह कितोर, इदिना मुख्य कारण वेने नेतृत्व नौकरशाही पोर अमल कीयाना ओसो जनता लोप्पा शिक्षा ता कमी मंदानाए मत्ता।

जनता नड़मा उचुन मुल ता ध्यान फौरी, आंशिक ओसो व्यक्तिगत हित कुना पोरो मंता अनि अवु दीर्घकालीन, राष्ट्रीयवापी ओसो सामूहिक हित कुना पोल्लोंग समझेमाया परवोर लेवेके हालनाचोन समझेमाया परवोर इंजी मानेमाया लागिंता। राजनीतिक अनुभव ओसो सामाजिक पिस्वल ता अनुभव ता कमी ता कारण ते नौजवान लोप्पा वेल्ले बेहरा संख्या पाड़ना ओसो पूना चीन ता तूलना किया परवो; ओरा काजे साम्राज्यवादिर ओसो क्वोमिंगतांग प्रतिक्रियावादिरा उत्पीड़न तल मुक्ति दोरकी कियाला संघर्ष लोप्पा मावा देश ता जनता बचोन मुशिकल कुना सामना किया लागता लेवेके खुशहाल समजावादी समाज ता स्थापना कीयाना मुन्ने वेल्ले जोम कठोर परिश्रम कायना जरूरत मंता इंजी पूरा समझेमाया परवोर आंतोर। माटु जनता नड़मा राजनीतिक शिक्षा ता काम वेल्ले सजीव ओसो प्रभावी तरीका ते जारी तासना अनि वायना मुशिकल कुना बारे ते जनता तुन हमेशा सतर्क कीसोर मंदाना, इव मुशिकल कुन दूर कीयाना तरीका ना बारे ते जनता संगे विचार-विमर्श कीसोर मंदाना।

विद्रोह ता माटु समर्थन कीवोम, बारांकु इत्तेके जनता ना नड़मा ता अंतरवोरिध तुन “एकता-आलोचना-एकता” ता तरीका अनुसार हल कीयाना, अनि विद्रोह तल अनिवार्य रूप ते उचुन नुकसान आंता अनि

समाजवादी काम लोप्पा बाधा वांता। माटु व्यापक जनता समाजवाद ता पक्ष एतिंता, जागरूक आसी अनुशासन ता पालन कींता अनि तर्कसंगत पोल्लोंग ना अनुमोदन कींता, अदु अंगडम विद्रोह कीवो इंजी विश्वास कींता। मति इद्रम इत्तेके मना देश लोप्पा आम लोकरा विद्रोह कीयाना संभावना मन्नो इंजी आयो। इद सवाल ता बारे ते माटु इव पोल्लो ना बगिल ध्यान हियाना: 1) विद्रोह ता कारण कुन मोदोल तिंची खत्म कियाला काजे माटु नौकरशाही तुन दृढता ते दूर कीयाना, विचाराधारात्मक ओसो राजनीतिक शिक्षा पोरो वेल्ले जोर हियाना अनि सब्बे अंतरविरोध कुन सही तरीका ते हल कीयाना। इद्रम कीतेके साधारण रूप ते बदे विद्रोह आयो आयार। 2) विद्रोह मना कमजोर काम ता कारण ते आतेके माटु इद्रम ता विद्रोह कुना लोप्पा शामिल आयना लोकर किन सही हरीं ते तत्ताला काजे ओरा प्रदर्शन कीयाना, इव विद्रोह कुन तम्मा काम लोप्पा सुधार कियाला काजे ओसो तम्मा कार्यकर्ता लोर ओसो जनता तुन शिक्षित कियाला काजे विशेष साधन लेक्का इस्तेमाल कीयाना अनि हत्ता कालम ते हल किया परवा समस्यांग कुन हल कीयाना। बदे वेने विद्रोह समस्या तुन हल कीयानास्के माटु सतर्क मंदाणा, बकवल लेक्का काम कीयानायो, जल्दबाजी ते वेने समस्या हल आता इंजी वेने घोषणा कीयानायो। विद्रोह ता नेतृत्व कीयानारो किन जल्दबाजी ते काम तल तेंडनायो (नियम कुना उल्लंघन किंतोर कुन लेवेके सक्रिय प्रतिक्रांतिकारी मत्तोर ओसो कानून अनुसार हल कीयाना जरूरी मत्तोर किन विडचसी) मना लेक्कटा बेहरा देश लोप्पा अचुन मुल विद्रोह कीतेकाई वेरियाना जरूरत हिल्ले अनि उल्टा इद्रम ता विद्रोह तल नौकरशाही तुन दूर कियाला मदद आंता।

मना समाज लोप्पा उचुन मुल सार्वजनिक हित कुना बारे ते आल्सवा मंदाणोर वेने मंतोर, मनमानी तरीका ते कानून ता उल्लंघन कींतोर अनि अपराध कींतोर। इद्रम तोर मना नीतिंग ना फायदा एता परितोर, अविन तोड़-मरोड़ किया परितोर, जनता तुन भड्के कियाला काजे पुंजी-पुंजी अंगडम ता मांग पेश किया परितोर अनि समाज ता सामान्य व्यवस्था तुन

छिन्न-भिन्न कियाला काजे पुंजी-पुंजी अफवाह फैले किया परितोर अनि गड़बड़ किया परितोर। माटु इद्रम तोर किन खुला छूट हियाना पक्ष ते हिल्लेमा। इदिना उल्टा अविना खिलाफ जरूरी कानूनी कार्यवाही कीयाना। व्यापक जनता ना मांग इद्रम तोर किन सजा हियाना इंजी मता। इद्रम कीयाना जनता ना विचार ता प्रतिकूल व्यवहार कीयाना आंता।

10

गलत तुन सही ते बदले कियमूड़ांता या?

नन्ना मुन्ने वेहता लेक्का मना समाज लोप्पा लोकर विद्रोह कीयाना गलत मंता माटु अदिना समर्थन कीवोमा विद्रोह कीतेके माटु सबक एतना नौकरशाही तुन जेक कीयाना अनि कार्यकर्ता, जनता तुन शिक्षित कियाला काजे मजबूर कींतोर। इतेके गलत तुन सही ते बदले कियमूड़ांता। इद्रम हर विद्रोह ता रेंडु पहलू मंता। सब्बे रकम ता विद्रोह तुन इद्रमे हूडमूड़ांता।

सब्बे तोर किन हंगरी ता घटना सही हिल्ले इंजी स्पष्ट आता। मति अदिन वेने रेंडु पहलू मत्ता। मना हंगेरियन कामरेड्स इद घटना आयनास्के बेसता कार्रवाईंग कितोर अदिन काजे गलत तुन सही संगे बदले कित्ता। हंगरी इंजे मुन्ने तुकू बचोनो ज्यादा मजबूत आता अनि समाजवादी ग्रुप ता बाकी देश कु वेने अदिनगडल सबक एतितता।

अद्रमे 1956 ता दूसरी 6 महीनांग लोप्पा विश्वव्यापी कम्युनिस्ट विरोधी ओसो जन विरोधी अभियान वेने उंदी गलती मत्ता। मति अदु सब्बे देश कुना कम्युनिस्ट पार्टिंग, मजदूर वर्ग तुन शिक्षित कित्ता अनि फौलाद बने कित्ता उंदी बेसता वस्तु बने कित्ता। इद अभियान लोप्पा बचोनो देश कुना लोप्पा कम्युनिस्ट पार्टिंग ना वेल्ले सदस्य लोर अलग आतोर। ओरा पार्टी तल अलग आतांकु पार्टी-सदस्य लोरा संख्या कम आता। इद्रम आयनादु गलत मत्ता। मति इदिना उंदी बेसता पहलू वेने मत्ता। इद्रम दुलमुल

तत्व बाहर हत्तांकु पार्टी ता अडिग सदस्य लोरा बेहरा संख्या संघर्ष काजे ओसो वेल्ले एकताबद्ध आतांगा। इद उंदी बेसता वस्तु मत्ता।

सक्षिप्त ते, माटु समस्यांग कुना सब्बे पहलुंग पोरो ध्यान हियाला करियाना, अविना बेसता पहलू पोरो ने आयवा गलत पहलू पोरो वेने ध्यान हियाना। बदे विशेष परिस्थिति लोप्पा उंदी गलत पोल्लो वेने बेसता रिजाल्ट हियाना परिता अनि इंजी बेसता वस्तु वेने गलत रिजाल्ट हिया परिता। रेंडु हजार साल तुकु मुन्ने लाओ च “दुर्भाग्य लोप्पा सौभाग्य आधार आसी मंदिता अनि सौभाग्य लोप्पा दुर्भाग्य”³ इत्तोर। जापानी चीन लोप्पा नेंगतास्के इदिन ओरु तम्मा जीत इंजी वेहतोर। ओरु चीन ता बेहरा इलाकांग पोरो अधिकार कित्तोर अनि चीनी लोकुर इदिन हार इत्तोर। मति चीन ता हार लोप्पा जापान ता जीत विज्जा मत्ता अनि जापान ता जीत लोप्पा चीन ता हार ता विज्जा मत्ता। इतिहास इदिन साबित कित्ता या कीवो?

नेंडु पूरा दुनिया ता लोकुर तीसरी विश्व युद्ध आयरे आयो इंजी बहस किया मंतोर। इद सवाल ता बारे वेने माटु मना किन मानसिक रूप ते तैयार तासना अनि संगे ने उचुन विश्लेषण वेने कीयाना। माटु दृढ़ता ते शांति ता पक्ष कीतोम अनि युद्ध ता विरोध कीतोर। मति साम्राज्यवादी ओसो उंदी युद्ध कीतेके वेने माटु वेरियानायो। इद सवाल ता बारे ते वेने माटु विद्रोही लोरा बारे ते कित्ता लेक्का रुझान लागू कियाना: पहली, माटु इदिना खिलाफ मंतोर; दूसरा, माटु इदिनकु वेरियोम। पहली विश्व युद्ध पेरके 20 करोड़ आबादी वाले सोवियत संघ ता जन्म आता। दूसरा विश्वयुद्ध पेरके समाजवादी ग्रुप ता जन्म आता इदिना कुल आबादी 90 करोड़ मंता। साम्राज्यवादी तीसरा विश्वयुद्ध शुरू कीतेके जरूर दसियों करोड़ बाकी लोकुर समाजवाद बगिल वायनूर, अस्के साम्राज्यवाद काजे दुनिया लोप्पा वेल्ले जागा मन्नो आंता; साम्राज्यवाद ता पूरा ढांचा पूराए पोच्चांग पोय्यना संभावना वेने मंता।

विशेष परिस्थिति ने हर अंतरविरोध ता रेंजु विरोधी पहलू आपसी संघर्ष ता कारण ते अनिवार्य रूप ते उंदी दूसरा ते बदलेमांतांगा। इदिना

लोप्पा परिस्थिति ता वेल्ले बेहरा महत्व मंता। विशेष परिस्थिति लेवा इव रेंडासी विरोधी पहलू उंदू दूसरा लेक्का बदलेमायोंग। दुनिया ता सब्बे वर्ग कुना लोप्पा सर्वहारा वर्ग तन्ना परिस्थिति बदले कियाला काजे सबसे ज्यादा तैयार मंदिता, ताना पेरके अर्ध-सर्वहारा वर्ग वांता, बारांकु इत्तेके सर्वहारा वर्ग कैदे बाताले मन्नो आंता अनि अर्ध-सर्वहारा वर्ग ता परिस्थिति वेने बेस मन्नो आंता। वर्तमान परिस्थिति ते अमेरिका संयुक्त राष्ट्र संघ लोप्पा बहुमत तुन नियंत्रण कीसी मंता, दुनिया ता बाचोनो हिस्सा ने कब्जा कीसी मंता। इद परिस्थिति उंदी दिया जरूर बदलेमांता। उंदी गरीब देश लेक्का चीन ता परिस्थिति वेने (इदिन अंतरराष्ट्रीय अधिकार खत्म किताद मत्ता) बदलेमायर (उंदी गरीब देश उंदी समृद्ध देश लेक्का बदलेमायर, उंदी अधिकार हिल्वा राष्ट्र उंदी अधिकार सम्पन्न राष्ट्र बनेमायर) इत्तेके वस्तु तन्ना विपरीत तत्व कुना रूप एतिंतांग। इगा निर्णयात्मक परिस्थितिं ग मंतांग ताना लोप्पा समाजवादी व्यवस्था ओसो एकताबद्ध जनता कोशिश मंता।

11

बचत तुन अमल कीयाना बारे ते

इगा नन्ना बचत पोरो अमल कीयाना बारे ते संक्षिप्त ते वेहाकाना। माटु बेहरा स्तर ते निर्माण कार्य कीयाना इंजी आल्संतोम, मति मना देश इंजे वेने वेल्ले गरीब मंता- इद उंदी अंतरविरोध आंदू। इद अंतरविरोध तुन हल कीयाना उंदी हरीं हर इलाका लोप्पा सख्ती ते बचत पोरो अमल कियाला काजे लगातार कोशिश कीयाना मंता।

1952 ते “मूंड गलतिंग” विरोधी आंदोलन ताकनास्के माटु भ्रष्टाचार, फिजूलखर्ची ओसो नौकरशाही ता विरोध कीतोम अनि भ्रष्टाचार ता विरोध कीयाना पोरो जोर हींतोम। 1955 ते माटु बचत पोरो अमल कीयाना ता पक्ष कीतोम ताना लोप्पा माटु वेल्ले सफलता दोरकी कीतोम;

अस्के माटु पूंजीगत निर्माण लोप्पा गैर-उत्पादनशील परियोजनांग काजे जरूरत तुकू ज्यादा काम कीयानायो अनि औद्योगिक उत्पादन लोप्पा कच्चा माल ता इस्तेमाल लोप्पा बचत संगे काम कीयाना। मति अस्के बचत तुन मार्गदर्शक उसूल मानेमासी राष्ट्रीय अर्थव्यवस्था ता सब्बे शाखांग लेवेके आम सरकारी ऑफिस, फौजी यूनिटकु, विद्यालय ओसो जन-संगठन कुना लोप्पा बेस अमल कीतद हिल्ले। इयेंड माटु देशमेंड हर इलाका लोप्पा बचत कीयाना अनि फिजूलखर्ची दूर कीयाना आह्वान किया मंतोमा। निर्माण कार्य ता बारे ते इंजे वेने मना लोप्पा अनुभव ता कमी मंता। हत्ता उचुन साल कुना लोप्पा बेहरा-बेहरा सफलतांग दोरकी किताद मत्ता, मति संगे ने फिजूलखर्ची वेने आता। माटु मना उद्योग कुना मुख्य आधार लेक्का तीरम-तीरम बेहरा आकार ता बचोनो आधुनिक कारोबारकु बने कीयाना; इद मुख्य आधार लेवेके माटु मना देश तुन उचुने दशाब्दिंग लोप्पा उंदी शक्तिशाली आधुनिक औद्योगिक देश बने किया परवोमा। मना ज्यादातर कारोबार कुना आधार वेल्ले बेहरा मंदानायो; माटु सुडला ओसो मध्यम कारोबार कुना स्थापना ज्यादा संख्या ते कीयाना अनि पाइना समाज तल ताकसोर वात्ता उद्योग कुना पूर्ण इस्तेमाल कीयाना, अनि ज्यादा से ज्यादा बचत कीयाना, उचुन धन संगे वेल्ले काम कीयाना। नवम्बर 1956 ते चीनी कम्युनिस्ट पार्टी ना केंद्रीय कमेटी ता दूसरा पूर्ण अधिवेशन लोप्पा बचत पोगे सख्ती ते अमल कीयाना अनि फिजूलखर्ची ता विरोध कीयाना उसूल पोगे ओसो जोर हीता पेरके उचुने महीनांग लोप्पा बेसता सफलतांग दोरकतांग। इंजेटा बचत आंदोलन तुन नालुंग बगिल लगातार जारी तासना। कमजोरी ओसो गलतिंग ना आलोचना लेक्काने फिजूलखर्ची ता विरोध कीयाना वेने असल ते परकाल कीसी टोड्डी नोर्ना लेक्का मंता। लोकुर हर दिव्या परकाल कीवोरा? चीनी कम्युनिस्ट पार्टी, जनवादी पार्टिंग, गैर-पार्टी जनवादी लोकुर, बुद्धिजीविर, उद्योगपतिर, व्यापारिर, मजदूर, किसान, दस्तकारीर (मना देश ता 60 करोड़ लोकुर) उत्पादन बेरसी कीयाना अनि बचत कीयाना, शाहखर्ची, फिजूलखर्ची ता विरोध कीयाना कोशिश कीयाना।

सिर्फ आर्थिक रूप तेने आयवा राजनीतिक रूप ते वेने वेल्ले महत्व मंता। मना बचोनो कार्यकर्ता लोरा लोप्पा इगा उंदी खतरनाक रुझान दिस्सा मंता- आम जनता ना सुख-दुःख ते संगे मंदाना ता बारे ते निराश मंदाना, व्यक्तिगत मशहूरी ओसो व्यक्तिगत फायदा ता बारे ते आल्सना। इद गलत मंता। इद रुझान तुन दूर कीयाना उंदी तरीका माटु उत्पादन बेरसी कीयाना अनि बचत कीयाना आंदोलन ताकानास्के मना संगठन कुन मजबूत कीयाना अनि कार्यकर्ता लोर किन दोड़ ता संगठन कुना लोप्पा लोहना, अनि ओरा वेल्ले संख्या ते उत्पादन-कार्य ते मलसी दायना। माटु मना सब्बे कार्यकर्ता ओसो मना पूरा जनता तुन लगातार मना देश ता उंदी बेहरा समाजवादी देश मंदाना संगे-संगे आर्थिक रूप ते पेरके अरसी मंता अनि गरीब वेने मंता, इद उंदी वेल्ले बेहरा अंतरविरोध मंता इंजी सुरता तासना। चीन तुन समृद्ध ओसो शक्तिशाली बने कियाला काजे माटु बचोनो दशाब्दिंग एवनल कठोर संघर्ष किया लागियर, ताना लोप्पा बाकी पोल्लोंगे आयवा माटु सख्त बचत कीयाना ओसो फिजूलखर्ती संगे लड़ेमायना इत्तेके परिश्रम ओसो बचत संगे मना देश ता निर्माण कीयाना नीति लागू कीयाना मंता।

12

चीन ता औद्योगिकरण ता हरीं

औद्योगिकरण हरीं ता चर्चा कीयानास्के, माटु इगा मुख्य रूप ते बेहरा उद्योग, सुडला उद्योग ओसो कृषि विकास नडमा संबंध कुना बारे ते वेहाना। बेहरा उद्योग चीन ता आर्थिक निर्माण ता केंद्रबिंदू ता बारे ते वेने वेहाना। मति संगेने कृषि ओसो सुडला उद्योग विकास बगिल वेने हालनाचोन ध्यान हियाना।

चीन उंदी 80 प्रतिशत तुकू ज्यादा आबादी नाहकुने मंदाना बेहरा कृषि-प्रधान देश आंदू, अदिन काजे अदिना उद्योग ओसो कृषि ता संगेने विकास कीयाना जरूरी मंता। सिर्फ अस्केने मना उद्योग काजे कच्चा माल

ओसो हाटुम दोरका परिंता अनि उंदी शक्तिशाली बेहरा उद्योग कुना निर्माण कियाला काजे ओसो ज्यादा धन जमा कीयाना संभव आंता। सब्बे लोकर सुडला उद्योग कुन कृषि तल वेल्ले घनिष्ट संबंध मंता इंजी पुत्तोर। कृषि लेवा बदे वेने सुडला उद्योग ताका परवो। मति कृषि बेहरा उद्योग कुना काजे उंदी महत्वपूर्ण हाटुम हींता इंजी अचोन स्पष्ट रूप ते समझेमाताद हिल्ले। मति कृषि ता तीरम-तीरम तकनीकी बदलाव ओसो आधुनिकीकरण आंता, कृषि काजे मशीन, रासायनिक खाद, एरू काजे बांध बने कीयाना परियोजनांग, बिजली परियोजनांग ओसो दायना-वायना सुविधांग ना मांग ओसो संगे ने नाहकुना इस्तेमाल काजे ईंधन, बिल्डिंग सामग्री ता मांग वेल्ले बेरसिंता, अद्रम-अद्रम लोकर इद पोल्लो तुन हल्कोए समझेमायनूर। माटु दूसरा ओसो तीसरा पंचवर्षीय योजना ताकनास्के कृषि ता ओसो ज्यादा विकास किया परिंतोम ओसो अद्रमासी सुडला उद्योग कुना लोप्पा वेने वेल्ले प्रगति कींतोम, अस्के मना पूरा राष्ट्रीय अर्थव्यवस्था तुन फायदा आंता। कृषि ओसो सुडला उद्योग ता विकास तले बेहरा उद्योग काजे हाटुम ओसो धन दोरकना गारंटी आंता, अदु ओसो तेज रफ्तार संगे मुन्ने दांता। इद्रम औद्योगिकरण ता गति तीरम दिसिंता मति असल तीरम मन्नो आंता, असल इत्तेके अदिन गति वेल्ले तेज वेने आया परिंता। मूंड पंचवर्षीय योजनांग पेरके लेवेके अदिनकु वेने ज्यादा टाईम ते चीन ता वार्षिक इस्पात उत्पादन, मुक्ति तुकू मुन्नेटा सर्वाधिक उत्पादन वाले साल इत्तेके 1943 ता उत्पादन ता तुलना ते लगभग 9,00,000 टन तल 2,00,00,000 टन लेवेके इदिनकु वेने ज्यादा आंता। इदिनकु शहर ओसो नाहकुना रेंडासी जागा ना लोकर खुश मंदितोर।

आर्थिक सवाल कुना बारे ते नेंडु नन्ना वेल्ले वडकोनु। सिर्फ 7 साल एवनल आर्थिक निर्माण कार्य कींताकु मनगा इंजे वेने अनुभव ता कमी मंता, वेल्ले अनुभव जमा कीयाना जरूरत मंता। क्रांति शुरू कीयानास्के वेने माटु बदे अनुभव हिल्ला मत्ता अनि बचोनो कोदोर हिया लागिंता अनि सबक एतिता पेरके ने माटु राष्ट्रव्यापी जीत दोरकी कीतोम। नेंडु मावा मांग

बचोन जोम माटु क्रांति ता अनुभव दोरकी कीतोम, आर्थिक निर्माण ता अनुभव दोरकी कीयाना अदिनकु कम टाईम एतना अनि अदिन दोरकी कियाला काजे अचोन ज्यादा कीमत वेने हिया लागनायो इंजी मंता। माकिन कीमत हिया लागियरे, मति इद क्रांतिकारी कालम ते हीता अचोन बेहरा मन्नो इंजी आशा कीतामा। माटु इदिना लोप्पा उंदी अंतरविरोध (समाजवादी समाज ता अर्थव्यवस्था ता विकास ता वस्तुगत नियम, अविना बारे ते मना मनोगत समझदारी नड़मा ता अंतरविरोध) मंता, इदिन अमल कीयानास्के हल किया लागियर इंजी समझेमायना। इद अंतरविरोध वेने अलग-लग लोकुर नड़मा ता अंतरविरोध लेक्का, इत्तेके वस्तुगत नियम कुना तूलना ते सही समझेमायनोर अनि तूलनात्मक गलत समझेमायनोरा नड़मा ता अंतरविरोध लेक्का मंता, अदिन काजे इद अंतरविरोध वेने जनता नड़मा ताए अंतरविरोध आंदू। हर अंतरविरोध उंदी वस्तुगत यथार्थ मंदिता ओसो माटु इदिन परताचोन सही तरीका ते समझेमायना अनि हल कीयाना।

मना देश तुन उंदी औद्योगिक देश लोप्पा बदले कियाला काजे माटु सोवियत संघ ता उन्नत अनुभव कुन बेस करियाना। सोवियत संघ हत्ता 40 साल तल समाजवाद ता निर्माण किया मंता अनि अदिना अनुभव मना काजे वेल्ले मूल्यवान मंतांग। उचुन आल्साटु, मना काजे इचोन महत्वपूर्ण कारखानांग ना डिजाइन बोर बने कित्तोर, अविन साजो-सामान बोरो हित्तोर? अदु अमेरिका लेवेके ब्रिटिश? हिल्ले, इविना लोप्पा बदे वेने आयो। सिर्फ सोवियत संघे इद्रम कियाला तैयार आता बारांकि इत्तेके अदु उंदी समाजवादी देश मत्ता अनि मना एकताकारी देश वेने। सोवियत संघे आयवा पूर्वी योरोप ता भाईचारा देश कुन वेने माकिन उचुन सहायता कीतांग। सब्बे देश कुना इत्तेके अवु समाजवादी आई लेवेक पूंजीवादी देश कुना अनुभव कुनल करियाना बारे ते वाद-विवाद कीयाना जरूरत हिल्ले। मति माटु सोवियत संघ तले करियाना मुख्य मंता। दूसरोरगडल करियाना बारेते रेंडु अलग-अलग रुझानकु मंतांग। उंदी कठमुल्लावादी रुझान, इत्तेके हर वस्तु अदु मना देश ता परिस्थिति अनुसार मत्तेकाई लेवेकाई मत्ता

लेक्का ने लागू कीयाना। इद सही हिल्ले। दूसरा रुझान माटु मना दिमाग ता इस्तेमाल कीयाना अनि सिर्फ मना देश ता परिस्थिति अनुकूल मत्तेकेने इत्तेके मना काजे काम वायना लेक्का मत्तेके लागू कीयाना। माटु इद्रम ताए रुझान कुन लागू कीयाना।

सोवियत संघ संगे मना एकता तुन मजबूत कीयाना सब्बे समाजवादी देश कुना संगे मना एकता तुन मजबूत कीयाना। इद मना बुनियादी नीति आंदू, इदे मना बुनियादी हित पोरो आधार आसी मंता। इदे आयवा एशिया ओसो अफ्रीका देश भी मंतांग अनि सब्बे शांतिप्रेमी देश ओसो जनता वेने मंता - माकिन ओरा संगे मना तुन मजबूत कीयाना अनि अदिना विकास कीयाना। इव रेंडासी ताकत कुना संगे एकता कित्ता पेरके माटु अलग-थलग मन्नोम आंतोम। साम्राज्यवाद देश कुना जनता संगे वेने एकता कीयाना अनि अव देश कुना संगे शांतिपूर्ण अमल कीयाना, ओरा संगे व्यापार कीयाना कोशिश कीयाना, आयना युद्ध कुन रोमी कीयाना कोशिश कीयाना, मति बदे वेने परिस्थिति ते माटु इव देश कुना बारे ते बदे वेने वास्तविकता पोरो आधार आसी हिल्ला बदे धारणा तासनायो।

नोट

- 1) कोपरनिकस (1473-1543) पोलैंड ता नक्षत्र-वैज्ञानिक मत्तोर, वीरु “द रिवोल्यूशयोनीबस” पोरोल ता तन्ना लेख लोप्पा धरती तन्ना धुरी तेने तिरियंता अनि बाकी ग्रह कुना संगे पोड़द ता नालुंग बगिल तिरियंता इंजी रासतोर। ओरू भूमि उंदी जागा मंदिता इंदाना सालो तल ताकसोर मत्ता धारणा तुन खंडन कित्तोर।
- 2) डार्विन (1809-82) ब्रिटिश ता बेहरा जीव-वैज्ञानिक मत्तोर, “जीव-जातिंग ना उत्पत्ति” (ओरिजिन ऑफ स्पीशिज) ओसो बाकी लेख कुना लोप्पा विकासवाद ता सिद्धांत ता स्थापना कित्तोर, जीव-जन्तु ना जन्म, बदलाव, विकास ता नियम ता खोज कीसी मत्तोर।
- 3) “ल्याओ त” अध्याय 58 हूडाटू।

चीनी कम्युनिस्ट पार्टी ता प्रचार-कार्य संबधित राष्ट्रीय सम्मेलन लोप्पा भाषण

12 मार्च 1957

कामरेड्स! मना इद सम्मेलन वेल्ले बेस ताका मंता। सम्मेलन ताकनास्के वेल्ले सवालकु तेहताद मत्ता अनि माटु वेल्ले पोल्लोंग ना जानकारी दोरकी किताद मंता। इंजे नन्ना मना कामरेड्स विचार-विमर्श कीसोर मत्ता सवाला कुना बारे ते उचुन वेहाकान।

माटु बेहरा सामाजिक बदलाव आसोर मत्ता युग ते मंतोम। चीनी समाज वेल्ले जोम बेहरा बदलाव तले दाया मंता। बेहरा बदलाव कुना उंदी कालम जापानी आक्रमण विरोधी युद्ध कालम मत्ता अनि दूसरा मुक्ति युद्ध ता कालम। मति वर्तमान बदलाव ता स्वरूप मुन्नेटा बदलाव किनकु ज्यादा गंभीर मंतांग। इंजे माटु समाजवाद ता निर्माण किया मंतोम। दसियों करोड़ जनता समाजवादी बदलाव ता आंदोलन लोप्पा शामिल आया मंतांग। देशमेंड विभिन्न वर्ग कुना आपसी संबंध कुना लोप्पा बदलाव वाया मंता। कृषि, दस्तकारी लोप्पा निम्न-पूंजीपति वर्ग लोप्पा ओसो उद्योग, वाणिज्य लोप्पा पूंजीपति वर्ग लोप्पा बदलाव वात्ता। सामाजिक, आर्थिक व्यवस्था बदलेमाता; व्यक्तिगत अर्थव्यवस्था ता सामूहिक अर्थव्यवस्था लेक्का बदलेमाता, पूंजीवादी निजी मालिकाना ता समाजवादी सार्वजनिक मालिकाना लेक्का बदलेमाता। इद बेहरा बदलाव बदे डावुट हिल्वा लोकुरा दिमाग ते वेने दिसिंता। मानेय ना सामाजिक पिस्वल ओरा चेतना ता निर्णय कींता। मना समाज-व्यवस्था ता इव बेहरा बदलाव कु विभिन्न वर्ग, श्रेणिंग ओसो सामाजिक ग्रुप कुना लोकुरा दिमाग

ते अलग-अलग दिसिंतांग। व्यापक जनता ओरा हार्दिक समर्थन कींता, बारांकु इत्तेके अदु चीन काजे समाजवादी हरींए सही हरीं इंजी साबित कित्ता। पाड़ना समाज व्यवस्था तुन तेहकसी वाटना अनि उंदी पूना समाज व्यवस्था तुन समाजवादी व्यवस्था तुन निलपी कीयाना महान संघर्ष आंदू, समाज व्यवस्था लोप्पा ओसो मानेय ना आपसी संबंध कुना लोप्पा उंदी महान बदलाव मंता। परिस्थिति बुनियादी रूप ते बेस मंता इनमूड़ांता। मति पूना समाज व्यवस्था ता इंजे सिर्फ स्थापनाए आता अनि अदिन सुदृढ़ कियाला इंजे टाईम लागियर। पूना समाज व्यवस्था ता स्थापना आतास्के अदु पूर्ण रूप ते सुदृढ़ बनेमायना इंजी समझेमायनायो; इद संभव हिल्ले। अदिन तीरम-तीरमे सुदृढ़ किया लागियर। अदिन अंतिम रूप ते सुदृढ़ कियाला काजे सिर्फ देश ता समाजवादी औद्योगिकरण पूरा कीयाना अनि आर्थिक मोर्चा ते समाजवादी क्रांति तुन ताकी कीयाना जरूरीए आयवा राजनीतिक ओसो विचारधारात्मक मोर्चा ते वेने लगातार कठोर समाजवादी क्रांतिकारी संघर्ष ओसो समाजवादी शिक्षा ता काम कीसोर मंदाना जरूरी मंता। इदे आयवा सहायक भूमिका निभे कीयाना बचोनो अंतरराष्ट्रीय परिस्थितिंग मंदाना वेने जरूरी मंता। चीन लोप्पा समाजवादी व्यवस्था तुन सुदृढ़ कियाला काजे आखरी जीत समाजवाद ता आंता या पूंजीवाद ता इंजी निर्णय कियाला काजे इंजे वेने वेल्ले ऐतिहासिक काल एवनल संघर्ष किया लागियर। मति माटु सब्बे तोर इद पूना समाजवादी व्यवस्था तुन जरूर सुदृढ़ कीयाना इंजी समझेमायना। आधुनिक उद्योग, आधुनिक कृषि आधुनिक विज्ञान, संस्कृति वाले उंदी समाजवादी राज्य ता निर्माण माटु जरूर किया परितोम। इदु नन्ना वेहाना पहली पोल्लो।

दूसरा पोल्लो मना देश ता बुद्धिजीविरा परिस्थिति ता बारे ते मंता। चीन लोप्पा बुद्धिजीविरा संख्या बचोन मंता इदिना बारे ते सही-सही आंकड़ांग हिल्लेंगा। उचुन मुल सब्बे रकम ता बुद्धिजीविरा कुल संख्या लगभग 50 लाख मंता ताना लोप्पा बेहर दर्जा ता ओसो साधारण दर्जा ता बुद्धिजीवी शामिल मंता। इव 50 लाख बुद्धिजीविरा लोप्पा बेहरा बहुसंख्या लोकर किन (देशभक्त मंतोर) मना लोक गणराज्य तुन जीवा

कींतोर, जनता ओसो समाजवादी राज्य ता सेवा कियाला आलिसंतोरा ओरा लोप्पा सिर्फ उचुने मुल समाजवादी व्यवस्था तुन विचार कीवोर अनि ज्यादा खुश मन्नोर आंतोरा। ओरु इंजे वेने समाजवाद पोरो डारुवुत कींतोर, मति साम्राज्यवाद ता मुकाबला कीयानास्के ओरु वेने देशभक्तिपूर्ण रुझान पोयंतोरा। राज्य पोरो दुश्मनी तासना बुद्धिजीविरा संख्या वेल्ले कम मंता। ओरु मना सर्वहारा तानाशाही वाले राज्य तुन विचार कीवोर अनि पाड़ना समाज तुने विचार कींतोरा। इद्रम तोर बदे वेने मौका कैदे वातेके गड़बड़ आंता, कम्युनिस्ट पार्टी तुन तेहकसी वाटना अनि पाड़ना चीन ता पुनस्थापना कीयाना कोशिश कींतोरा। सर्वहारा कार्यदिशा ओसो पूंजीवादी कार्यदिशा लोप्पाटल समाजवादी कार्यदिशा ओसो पूंजीवादी कार्यदिशा लोप्पाटल ओरु पेरेकेटा कार्यदिशा लागू कीतेके मुशिकल आयार। मति असल इत्तेके इद कार्यदिशा ते सही हिल्ले अदिन काजे ओरु साम्राज्यवाद, सामंतवाद ओसो नौकरशाही पूंजीवाद मुन्ने आत्मसमर्पण कियाला काजे तैयार मंदितोरा। इद्रम तोर राजनीति लोप्पा, उद्योग, वाणिज्य, संस्कृति, शिक्षा, विज्ञान, प्रौद्योगिक ओसो धार्मिक लेप्पा मंता, ओरु वेल्ले प्रतिक्रियावादी मंतोरा। ओरा संख्या 50 लाख बुद्धिजीविरा लोप्पा सिर्फ उंदी लेवेके रेंडु प्रतिशत मंता बुद्धिजीविरा बेरा संख्या इत्तेके 50 लाख लोकुरा लोप्पा 90 प्रतिशत तुकू ज्यादा बुद्धिजीवी अलग-अलग मात्रा ते समाजवादी व्यवस्था ता समर्थन कींतोरा। ओरा लोप्पाटल वेल्ले लोकुर इंजे एवनल स्पष्ट रूप ते समाजवादी व्यवस्था लोप्पा काम बद्रम कीयाना समझेमाताद हिल्ले, वेल्ले पूना समस्यांग कुन बद्रम समझेमायना, अविन बद्रम हल कीयाना इंजी पुत्ताद हिल्ले।

मार्क्सवाद पोरो 50 लाख बुद्धिजीविरा रुझान ता बारे ते वेहाना इत्तेके ओरा लोप्पाटल 10 प्रतिशत तुकू ज्यादा लोकुरा लोकका कम्युनिस्ट ओसो पार्टी ता समर्थक शामिल मंतोरा, मार्क्सवाद तुन पुंजी मंतोरा अनि सुदृढ़ रुझान (सर्वहारा वर्ग ता रुझान) पोयंतोरा। कुल 50 लाख बुद्धिजीविरा लोप्पा इद्रम तोरा संख्या कम मंता मति ओरु केंद्रबिंदु ओसो उंदी जोरदार शक्ति मंदितोरा। मार्क्सवादी ता अध्ययन कीयाना इच्छा मंदाना ओसो उचुन

करियसी मत्ता बुद्धिजीविरा संख्या वेल्ले मंता मतु इंजे अदिन वेल्ले बेस पुत्ताद हिल्ले। ओरु लोप्पटल उचुन मुल ता विचार ते इंजे डावुट मंता, अदिना रुझान इंजे सुदृढ आताद हिल्ले, कमजोर परिस्थिति ते दुलमुल आंतोरा। 50 लाख बुद्धिजीविरा लोप्पा इंजे वेने इद्रम ताए परिस्थिति मंता। मार्क्सवाद ता कड़ा विरोध कीयाना ओसो अदिना पोरो दुश्मनी तासना बुद्धिजीविरा संख्या वेल्ले कम मंता। उचुन बुद्धिजीविर असल ते मार्क्सवाद तुकू सहमत मन्नोर मति ओरु खुलेआम इद्रम इन्नोरा। इद्रम ता बुद्धिजीविर वायना कालम ते वेल्ले जोम मंदितोर अनि माकिन ओरकिन भिन्न राय तासना अनुमति हियाना। उदाहरण तुकू उचुन आदर्शवादिर किन हूडाटू। इद्रम तोर समाजवाद ता राजनीतिक, आर्थिक व्यवस्था ता समर्थन किया परितोर, मति ओरु मार्क्सवादी विश्व-दृष्टिकोण तुन मानेमायोर। इदे पोल्लो धार्मिक देशभक्त लोरा पोरो वेने लागू आंता। ओरु आस्तिक मंतोर, अनि माटु नास्तिक मंतोम। माटु ओरकिन मार्क्सवादी विश्व-दृष्टिकोण पोयला काजे मजबूर किया परवोम। संक्षिप्त ते 50 लाख बुद्धिजीविर मार्क्सवाद पोरो लागू कीयाना रुझान ता सारांश इद्रम पेश कियमूडांता: मार्क्सवाद ता समर्थन कीयाना बुद्धिजीविर ओसो अदिना बारे ते उचुन पुंजी मत्तोरा संख्या कम मंता; मार्क्सवाद ता विरोध कियानोरा संख्या वेने कमीए मंता; मार्क्सवाद ता समर्थन कींतोर मति अदिन पुनवा मंदानोरा संख्या वेल्ले मंता, ओरु अदिना अलग-अलग मात्रा ते समर्थन कींतोरा। इगा मूंड अलग-अलग रकम ता रुझान लागू आंतांग- सुदृढ, दुलमुल ओसो दुश्मनी। माटु इद परिस्थिति वेल्ले जोम इद्रमे मंदिता इंजी मानेमायना। माटु इद सच्चवाई तुन समझेमायवेके दूसरोरा पोरो वेल्ले बेहरा बोजा वार्डितोम अनि खुद काजे वेल्ले कम काम पोयंतोम। प्रचार-काम कीयाना कामरेड्स ना मुन्ने मार्क्सवाद ता प्रचार-प्रसार कीयाना काम मंदिता। इदिन तीरम-तीरम किया लागिंता अनि वेल्ले बेस कीयाना अनि लोकर इदिन खुद स्वीकार कीयाना लेक्का हूडना। मार्क्सवाद तुन स्वीकार कियाला काजे लोकर किन जबरदस्ती कीयानायो। ओरकिन सिर्फ समझे कीयाना। उचुन पंचवर्षीय योजनांग लोप्पा मना बुद्धिजीविरा उंदी बेहरा

संख्या मार्क्सवाद तुन स्वीकार कीयाना अनि तम्मा काम ओसो पिस्वल ता व्यवहार संगे वर्ग-संघर्ष, उत्पादन-काम ओसो वैज्ञानिक कार्वाईंग ना व्यवहार संगे मार्क्सवाद तुन बेस लागू कीयाना कीतेके वेल्ले बेस आयारा माटु इद्रमे आंता इंजी आशा कीतोम।

तीसरा पोल्लो बुद्धिजीविरा पूना बदलाव ता बारे ते मंता। मना देश सांस्कृतिक रूप ते उंदी पेरके अरता देश आंदू। मना देश लेक्कटा बेहरा देश काजे 50 लाख बुद्धिजीविर वेल्ले कम मंतोर। बुद्धिजीविर हिल्ला मावा काम बेस ताका परवो अदिन काजे माटु ओरा संगे एकता कीयाना काम बेस कीयाना। समाजवादी समाज लोप्पा मुख्य रूप ते मूंड रकम ता लोकुर मंदितोर- मजदूर, किसान ओसो बुद्धिजीवी। बुद्धिजीवी लोकुर बौद्धिक श्रम कीयाना। ओरा काम जनता ना सेवा काजे मंता इतेके मजदूर, किसान लोरा सेवा काजे। बुद्धिजीविरा बेहरा संख्या तुन हूडतेके ओरु पाड़ना चीन ता सेवा कीसोर मत्ता लेक्का पूना चीन ता सेवा किय्या परितोर अनि ओरु पूंजीपति वर्ग ता सेवा कित्ता लेक्का सर्वहारा वर्ग ता सेवा किय्या परितोर। बुद्धिजीविर पाड़ना चीन ता सेवा कीतेके ओरा लोप्पटल वामपंथी लोकुर प्रतिरोध कींतोर, मध्यवर्ती लोकुर दुलमुल आंतोर अनि सिर्फ दक्षिणपंथी लोकुरे सुदृढ़ मंदितोर। नेंडु पूना समाज ता सेवा कीयाना मौका वात्तास्के परिस्थिति इनपढ़े उल्टा मंता। वामपंथी लोकुर दृढ़ मंदितोर, मध्यवर्ती लोकुर दुलमुल आंतोर (ओरा पूना समाज लोप्पा दुलमुल आयना पाड़ना समाज लोप्पा दुलमुल आयना तुकू अलग मंता) अनि दक्षिणपंथी लोकुर प्रतिरोध कींतोर। इदे आयवा बुद्धिजीविर शिक्षा हियाना काम कींतोर। मना समाचारपत्र रोज जनता तुन करहिंतांग। मना साहित्यकार, कालाकार, वैज्ञानिक, तकनीशियन, प्रोफेसर-अध्यापक लोर सब्बे विद्यार्थिर किन शिक्षित कींतोर, जनता तुन शिक्षित कींतोर। शिक्षक ओसो अध्यापक मत्तांकु ओरा काम सबसे मुन्ने खुद किन शिक्षित कीयाना मंता। वर्तमान कालम ते समाज-व्यवस्था ते वेल्ले बदलाव आया मंता इद पोल्लो वेने वेल्ले लागू आंता। हत्ता उचुन साल कुना लोप्पा ओरु वेल्ले मार्क्सवादी शिक्षा दोरकी कित्तोर, ताना लोप्पटल उचुन मुल वेल्ले मेहनत

ते अध्ययन कित्तोर अनि वेल्ले सफलता दोरकी कित्तोर। मति वेल्ले बुद्धिजीविर किन पूंजीवादी विश्व-दृष्टिकोण ता जागा ते पूर्ण रूप ते सर्वहारा विश्व-दृष्टिकोण तुन सफल कियाला काजे वेल्ले जेक ताका लागियर। उचुन मुल उचुक मार्क्सवादी पुस्तकिंग पढेमासी खुद किन बेहरा विद्वान समझेमांतोर, मति असल इत्तेके ओरु पढेमातादु ओरा दिमाग ते नेंगतादे हिल्ले, ओरा लोप्पा मोदोल वेने पोयताद हिल्ले। अद्रमासी ओरकिन इदिना इस्तेमाल कियाला वायो अनि ओरा वर्ग-भावना मुन्ने लेक्काने मंदिता। उचुन मुल लोप्पा वेल्ले घमंड निडंसी मंदिता अनि मुल सिर्फ किताबी ज्ञान दोरकी कीसी खुद किन वेल्ले बेहरा विद्वान समझेमांतोर अनि बेहरा-बेहरा पोंगडिंग कींतोर। मति बदे तूफान वात्तास्के ओरु मजदूर ओसो बहुसंख्यक मेहनतकश किसान लोर किन विडचसी अलग हरीं पोयंतोर। इद्रमतोरे ढुलमुल हरीं पोयंतोर अनि मजदूर-किसान लोर वेल्ले मजबूती ते नितसी मंदिता इद्रम तोर गोलमोल पोल्लोंग कींतोर अनि मजदूर-किसान लोर स्पष्ट पोल्लोंग कींतोर। अदिन काजे दूसरोर किन शिक्षित कीयाना लोकुर खुद किन शिक्षित कीयाना ओसो खुद अध्ययन कीयाना बदे जरूरत हिल्ले इंजी आल्सना गलत मंता। पूना समाजवादी बदलाव इत्तेके सिर्फ दूसरोर किन (जर्मीदार, पूंजीपति ओसो व्यक्तिगत उत्पादक) पूना बदलाव कीयाना, बुद्धिजीविर किन आयो इंजी आल्सना गलत मंता। बुद्धिजीविर किन वेने पूना बदलाव ता जरूरत मंदिता, सिर्फ इंजे तम्मा बुनियादी रुझान बदले कियवा मत्ता बुद्धिजीविरे आयवा हर मानेय अध्ययन कीयाना अनि तम्मा पून बदलाव कीयाना। नन्ना “हर मानेय” शब्द ता इस्तेमाल कितान, ताना लोप्पा इगा मत्ता माटु सब्बेतोर शामिल मंतोम। परिस्थिति लगातार बदलेमासोर मंदिता, मना विचार कुन पूना परिस्थिति अनुसार ढाले कियाला काजे अध्ययन कीयाना जरूरी मंता। मार्क्सवाद तुन बेस लागू कित्ता लोकुरा लोप्पा सर्वहारा रुझान वेल्ले मजबूत मंता, ओरु वेने तम्मा अध्ययन लगातार जारी तासना, पूना-पूना पोल्लोंग लागू किया लागियर अनि पूना-पूना समस्यांग ना अध्ययन किया लागियर। बुद्धिजीविर बस्के एवनल तम्मा दिमाग तल गलत पोल्लोंग

तेंडसी बाहर वाटोर अस्के एवनल ओरु दूसरोर किन शिक्षित कीयाना काम किया परवोर। स्वाभाविक रूप ते माटु दूसरोर किन शिक्षित कीयाना संगे-संगे खुद वेने करिया लागियर, शिक्षक काम कीयाना संगे-संगे खुद विद्यार्थी वेने बनेमाया लागियर। वरोर बेसता शिक्षक बने मायला काजे मुन्ने माटु वरोर बेसता विद्यार्थी बनेमायना। सिर्फ पुस्तक तले सब्बे पोल्लोंग करिया परवोमा। माटु उत्पादन-कार्य ते लागता लोकुरगडल करिया परितोम, मजदूर ओसो किसान लोरगडल करियाना अनि विद्यालय कुना लोप्पा माटु करहाना विद्यार्थिरगडल करियाना। ओरा अध्ययन अनुसार वेल्ले जोश ते ओरा मदद कीयाना मावा जिम्मेदारी मंता। माटु पूर्ण रूप ते ओरा मदद कीयाना, ओरकिन अध्ययन कियाला जबरदस्ती कीयानायो।

चौथा पोल्लो बुद्धिजीविरा मजदूर, किसान जनता संगे उंदी आयना ता बारे ते मंता। बुद्धिजीविरा काम मजदूर- किसान जनता ना सेना कीयाना मंदिता अदिन काजे बुद्धिजीविर किन सबसे मुन्ने ओरा बारे ते पुंदाना ओरा पिस्वल, काम ओसो विचार कुना जानकारी दोरकी कीयाना। माटु बुद्धिजीविर किन जनता नडमा दायना, कारखाना ओसो नाहकुना लोप्पा दायला प्रोत्साहन कीतोमा। मीटु जीवा मंदान जोम बोराई किसान लेवेके किसान किन कलियवा मत्तेके वेल्ले अंगडम आंता। मना सरकारी कर्मचारि, साहित्यकार, कलाकार, अध्यापक ओसो वैज्ञानिक लोकुर परताचोन हर मौका ता फायदा एतसी मजदूर ओसो किसान लोरा संगे घनिष्ठ सम्पर्क स्थापित कीयाना। उचुन मुल सिर्फ हूडला काजे कारखाना लेवेके नाहकुना लोप्पा दांतोर, “इदु कोडा पोरो उदसी पुंगार तुन हूडना लेक्का” आंता, इद्रम कीयाना तुकू हनवा ओसो हूडवा मंदाना बेस मंदिता। बाकी उचुन मुल उचुक महिनांग काजे अगा रोमसी जांच-पडताल किया परितोर अनि अगा तम्मा दोस्त बने किया परितोर। इदु “कोडा पोरोटल रेयसी पुंगार तुन बोयसी हूडना” लेक्का मंदिता। उचुन बाकी लोकुर वेल्ले जोम एवनल रेंडु-मूंडु साल लेवेके इदिनकु वेने ज्यादा जोम अगा रोमा परितोर। इदु “अगा टिकेमासी मंदाना” आंता। उचुन बुद्धिजीविर हमेशा

मजदूर, किसान लोरा नड़मा मंदितोर, उदाहरण तुकू कारखाना ता औद्योगिक मकैनिक, नाहकुना ता कृषि-मकैनिक ओसो स्कूल अध्यापक लोरा ओरु तम्मा काम बेस कीयाना अनि मजदूर, किसान लोरा संगे एकता आयना। माटु बुद्धिजीविर मजदूर, किसान लोरा संगे घनिष्ठ सम्पर्क कीयाना काम तुन उंदी आम रिवाज लेक्का लागू कीयाना; दूसरा माटा ने वेहाना इत्तेके मना बुद्धिजीविरा उंदी बेहरा संख्या इद्रमे कीयाना। बदे डावुट हिल्वे, ओरा लोप्पा सब्बे तोर इद्रम किया परवोर; उचुन मुल बस्के-बस्के ओरा नड़मा दाया परवोर आंतोर, मति ज्यादातर लोकर ओरा नड़मा परताचोन दाया परितोर इंजी आशा कीतोमा ओरु सब्बे लोकर उंदे बेरा दाया परवोर आंतोर मति अलग-अलग टाईम ते, अलग-अलग ग्रुप कुना संगे दाया परितोर। पाड़ना कालम ते माटु येनान ते मत्तास्के बुद्धिजीविर कुन मजदूर, किसान लोरा संगे सीधा सम्पर्क कियाला काजे प्रेरित कीतोमा। अस्के येनान लोप्पा वेल्ले बुद्धिजीविरा विचार लेस्किस्स मत्ता अनि ओरु रक-रकम ता तर्क पेश कियानोर। माटु उंदी गोष्ठी तास्तोम अनि ओरकिन जनता नड़मा दायना सलाह हीतोमा। पेरके वेल्ले लोकर जनता नड़मा हत्तोर अनि वेल्ले बेसता सफलता दोरकी कित्तोर। बस्के एवनल बुद्धिजीविर तम्मा किताबी ज्ञान तुन व्यवहार ते जोड़े कीवोर अस्के एवनल अदु पूर्ण ज्ञान बनेमाया परवो अद्रमासी अदु अधुराए मंदिता। बुद्धिजीविर तम्मा मुन्नेटा लोकरा अनुभव कुना जानकारी मुख्य रूप ते किताब पढ़ेमासी दोरकी कीतोरा। बदे डावुट हिल्वा पुस्तक पढ़ेमायना जरूरी मंता, मति सिर्फ पुस्तक पढ़ेमातेकेने समस्या हल आया परवो आंता। अदिन काजे ओरु वर्तमान परिस्थिति ता अध्ययन कीयाना, व्यवहारिक अनुभव ओसो ठोस सामग्री ता अध्ययन, मजदूर ओसो किसान लोरा संगे एकता कीयाना वेल्ले जरूरी मंता। मजदूर ओसो किसान लोरा संगे एकता कीयाना हल्को हिल्ले। नेंडु वेने उचुन मुल कारखाना, नाहकु लोप्पा दांतोर, ओरा लोप्पटल बोनकिने सफलता दोरकिंता अनि बोनकिने दोरको आंता। इगा विश्व-दृष्टिकोण ता बारे ते सवाल तेदिता। माटु “सौ विचारशाखांग लोप्पा होड़ आयला हियाना” लेवेके विद्याध्ययन ता हर जागा ते वेल्ले विचारशाखांग ओसो

रुझानकु मंदितांग इंतोम; मति विश्व-दृष्टिकोण लोप्पा नेंडु बुनियादी रूप ते सिर्फ रेंडे शाखांग मंतांग- सर्वहारा विश्व-दृष्टिकोण ओसो पूंजीवादी विश्व-दृष्टिकोण। इव रेंडासीना लोप्पाटल उंदी मंदाना जरूरी मंता, सर्वहारा विश्व-दृष्टिकोण मंदिता लेवेके पूंजीवादी विश्व-दृष्टिकोण। कम्युनिस्ट विश्व-दृष्टिकोण सर्वहारा वर्ग ताए विश्व-दृष्टिकोण आंदू, बदे दूसरा वर्ग ता आयो। मना वर्तमान बुद्धिजीविरा लोप्पाटल ज्यादातर लोकर पाड़ना समाज तल वातोर अनि गैर-मेहनतकश परिवार कुना लोप्पा पुटतोर। मजदूर, किसान परिवार ते पुटता लोकर वेने इंजे पूंजीपति वर्ग ता बुद्धिजीविर मंतोर, बारांकु इत्तेके मुक्ति तुकू मुन्ने ओरु पूंजीवादी शिक्षाए एतसी मंतोर, ओरा विश्व-दृष्टिकोण बुनियादू रूप ते पूंजीपति वर्ग ताए मंदिता। ओरु पाड़ना विश्व-दृष्टिकोण बदलेमायवा लेवा ताना जागा ते सर्वहारा विश्व-दृष्टिकोण ता स्थापना आतेके ओरा दृष्टिकोण, ओरा रुझान ओसो ओरा विचार मजदूर, किसान लोरा विचार तुकू अलग मंदिता ओरु गोल सांचा ते चारकोना इट्टा लेक्का साबित आंतोर अनि मजदूर, किसान लोरा संगे जीवा कीसी पोल्लोंग किया परवोर आंतोर। बुद्धिजीविर मजदूर, किसान लोरा संगे एकता आतेके, ओरा संगे गोती कीतेके पुस्तक तल करियता मार्क्सवाद वेने सही साबित आंता। मार्क्सवाद तुन सही तरिका ते लागू कियाला काजे माटु अदिन सिर्फ पुस्तक तले आयवा मुख्य रूप ते वर्ग-संघर्ष संगे, व्यवहारिक काम संगे ओसो मजदूर, किसान जनता संगे घनिष्ठ सम्पर्क संगे करियाना। मना बुद्धिजीविर उचुन मार्क्सवादी पुस्तक पढ़ेमायनाए आयवा मजदूर, किसान जनता संगे घनिष्ठ सम्पर्क संगे ओसो व्यवहारिक काम संगे समझदारी दोरकी कीयाना कीतेके माटु सब्बे तोर उंदे भाषा वड़कितोमा सिर्फ देशभक्ति लेक्कटा भाषा, समाजवादी व्यवस्था लेक्कटा भाषाए आयवा कम्युनिस्ट विश्व-दृष्टिकोण लेक्कटा भाषा वेने वड़कितोमा। इद्रम आतेके माटु सब्बे तोर वेल्ले बेस काम किया परितोमा।

पांचवी पोल्लो शुद्धीकरण ता बारे ते मंता। शुद्धीकरण इत्तेके विचार-पद्धति अनि कार्यशैली तुन सुधरे कीयाना। कम्युनिस्ट पार्टी लोप्पा शुद्धीकरण आंदोलन उंदी बेरा जापानी आक्रमण विरोधी युद्ध ताकनास्के

उंदी बेरा मुक्ति युद्ध ताकनास्के ओसो उंदी बेरा चीन लोक गणराज्य ता स्थापना पेरके शुरुआती कालम ते ताकता। इंजे कम्युनिस्ट पार्टी ता केंद्रीय कमेटी इयेंड पार्टी लोप्पा उंदी दूसरा शुद्धिकरण आंदोलन शुरु कीयाना इंजी निर्णय कित्ता। इदिना लोप्पा गैर-पार्टी लोकुर वेने शामिल आया परिंतोर, मति विचार हिल्वोर तीना लोप्पा शामिल आयनायो। इद शुद्धिकरण आंदोलन लोप्पा मुख्य रूप ते मना विचार-पद्धति ओसो कार्य-शैली ता मूंड गलतिंग ना आलोचना आया (मनोगतवाद, नौकरशाही ओसो संकीर्णतावाद) जापानी आक्रमण विरोधी युद्ध ताकनास्के कित्ता शुद्धिकरण आंदोलन लेक्काने इंजे वेने अदे तरिका लागू आया: मुन्ने उचुन दस्तावेज कुना अध्ययन कीयाना अनि अद अध्ययन पोरो आधार आसी खुद ता विचार, काम ता जांच-पड़ताल कीयाना अनि गलतिंग ओसो कमजोरिंग ना पर्दाफाश कियाला काजे, सही ओसो बेसता पोल्लोंग कुन प्रोत्साहन हियाला काजे आलोचना ओसो आत्मालोचना कीयाना। उंदी बगिल माटु सही रुझान पोयना अनि गलतिंग, कमजोरिंग ना आलोचना ओसो आत्मालोचना गंभीरतापूर्वक कीयाना पोरो-पोरो आयो, अविन जरूर सुधरे कीयाना; दूसरा बगिल, माटु “सलवा-सलवा वडियु और जमने-जमने वायना मुसूर” ता तरिका ओसो “गलतिंग कीयाना तुकू बचेमायला काजे पाड़ना गलतिंग नल करियाना अनि बीमार मानेय किन बचे कियाला काजे ओना बीमारी ता इलाज कीयाना” तरीका पोयना अनि “उंदे देब्बा वाटिसी लोकुर किन खत्म कीयाना” तरीका ता विरोध कीयाना।

मना पार्टी उंदी महान पार्टी आंदू, उंदी गौरवशाली पार्टी आंदू, उंदी सही पार्टी आंदू। इद पोल्लो तुन उंदी तथ्य लेक्का पेश कीयाना। मति मना लोप्पा इंजे वेने कमजोरिंग मंतांग इंदानदिन वेने उंदी तथ्य लेक्का पेश कीयाना। माटु मना हर चीज ता बारे ते आयवा सिर्फ सही चीज ता बारे ते ने वेहाना; संगे ने माटु मना हर चीज ता विरोध कियवा लेवा सिर्फ गलत चीज ताए विरोध कीयाना। सफलतांग मना काम ता मुख्य वस्तु मंदितांग मति मना कमजोरिंग ओसो गलतिंग ना संख्या वेने कम मन्नो आंता।

अदिनके मनाकिन उंदी शुद्धिकरण आंदोलन ता जरूरत मंता। माटु मना खुद ता मनोगतवाद, नौकरशाही ओसो संकीर्णतावाद ता आलोचना कीतेके मना पार्टी ता सम्मान तुन नुकसान आंता या? नावा हिसाब ते इद्रम आयो। इदिना उल्टा इद्रम कीतेके मना पार्टी ता सम्मान बेरसिंता। जापानी आक्रमण विरोधी युद्ध ताकनास्के ताकी कित्ता शुद्धिकरण आंदोलन, मना पार्टी, मना पार्टी-कामरेड्स ओसो मना पाड़ना कार्यकर्ता लोरा सम्मान तुन बेरसी कित्ता अनि पूना कार्यकर्ता लोर वने वेल्ले सफलता दोरकी कीयाना लेक्का साबित आता। रेंडासी पार्टिंग लोप्पाटल बद पार्टी आलोचना तुकू वेरियंता, कम्युनिस्ट पार्टी लेवेके क्वोमिंगतांग? क्वोमिंगतांग पार्टीए वेरियंता। अदु आलोचना पोरो पाबंदी वाटता, मति इद्रम कीसी अदु आखरी हार तुकू बचेमाया परवो। कम्युनिस्ट पार्टी आलोचना तुकू वेरियो, बारांकु इत्तेके माटु मार्क्सवादी आंदू, सही ता पक्ष ते मंता, बुनियादी जनता इत्तेके मजदूर, किसान लोर मना पक्ष ते मंतोर। माटु शुद्धिकरण आंदोलन “मार्क्सवादी शिक्षा ता उंदी व्यापक आंदोलन”¹ आंदू इंतोम। शुद्धिकरण इत्तेके पूरा पार्टी आलोचना अनि आत्मालोचना संगे मार्क्सवाद ता अध्ययन कीयाना। शुद्धिकरण आंदोलन ताकनास्के माटु जरूर मार्क्सवादी शिक्षा मुन्ने तुकू ज्यादा दोरकी किया परितोम।

चीन ता बदलाव ओसो निर्माण ता नेतृत्व काम मावा पोरो आधार आसी मंता। माटु मना विचार-पद्धति ओसो कार्यशैली तुन सुधार कीतेके मना लोप्प मुन्ने तुकू ज्यादा पहलकदमी वांता, माटु मुन्ने तुकू ज्यादा काबिल बनेमांतोर अनि मुन्ने तुकू ज्यादा बेस काम किया परितोम। मना देश लोप्पा जीवा कीसी जनता ओसो समाजवादी काम ता सेवा कीयाना, बदलाव तत्ताला काजे पक्का संकल्प तासना वेल्ले लोकुरा जरूरत मंता। माटु सब्बे कम्युनिस्ट लोर इद्रमे मंदाना। पाड़ना चीन लोप्पा सुधार ता पोल्लोंग कीयाना उंदी जुर्म मत्ता, इद जुर्म कियानोर किन हौकमूडांता लेवेके जेल ते वाटमूडांता। अस्के पक्का लक्ष्य मत्तोरु सुधारक मंदितोर, वीरु बदिनके वेरियोर आंतोर हर कठिन परिस्थिति ते पुस्तक ओसो अखबार छापे कित्तोर, जनता तुन शिक्षित ओसो संगठित कित्तोर अनि

रोमवा लेवा संघर्ष ताकी कित्तोर। जनता ना जनवादी तानाशाही मत्ता राजसत्ता मना देश ता आर्थिक ओसो सांस्कृतिक विकास तेज कियाला काजे हरीं तेरियंतोर। मना राजसत्ता ता स्थापना आसी इंजे सिर्फ उचुके सालकु आता, मति लोकर मना अर्थव्यवस्था, संस्कृति, शिक्षा ओसो विज्ञान ता इलाका लोप्पा समृद्धि दोरकतादु हूडा परितोर। पूना चीन ता निर्माण कियाला माटु कम्युनिस्ट लोकर बदे वेने रकम ता मुशिकल कुना मुन्ने तल्ला वरहोर आंतोर। मति उद काम तुन सिर्फ माटू पूरा किया परवोम आंतोम। मनाकिन उच्च आदर्श संगे प्रेरित आसी समाजवाद ओसो कम्युनिस्ट ता दिशा पोयसी मना सामाजिक बदलाव ओसो निर्माण कियाला साहस संगे मना संगे हट्टा ते हट्टा काल्पसी संघर्ष कीयाना बचोनो गैर-पार्टीं लोकुरा वेने जरूरत मंता। चीन ता दसियों करोड़ जनता काजे उंदी बेसता पिस्वल पिस्सना, आर्थिक, सांस्कृतिक रूप ते पेरके अरसी मत्ता मना देश तुन उंदी विकसित संस्कृति वाले समृद्ध, शक्तिशाली देश बने कीयाना उंदी वेल्ले मुशिकल काम मंता। इदे काम तुन ओसो ज्यादा निपुणता ते पूरा कियाला काजे, उच्च आदर्श कुना संगे प्रेरित आतोर ओसो सुधार कुन लागू कियाला काजे संकल्पबद्ध मत्ता सब्बे गैर-पार्टीं ना लोकुरा संगे कलियसी मुन्ने तुकू ज्यादा बेस काम कियाला काजे माटु इंजे ओसो वायना कालम ते वेने शुद्धिकरण आंदोलन तुन ताकी कीसोर मंदाना अनि मना गलतिंग लगातार सुधरे कीसोर मंदाना। पूर्ण भौतिकवादी लोकुर वेल्ले बहादूर मंतोर; माटु मना सब्बे सहयोद्धा लोर तम्मा-तम्मा जिम्मेदारी साहस संगे निभे कीतेके, सब्बे मुशिकल कुन काबू कीतेके, असफलता तुकू वेरियोर अनि माटु कम्युनिस्ट लोरा आलोचना कीयाना अनि माकिन राय हियाला वेने वेरियोर आंतोर। “हजार नोमुर आता पेरके वेने हामुर तुकू वेरियवा मंदानोरे, राजाल किन कोडा पोरोटल दोड़ रेहना साहस किया परितोर”- समाजवाद ओसो कम्युनिज्म ता निर्माण कीयाना मना संघर्ष लोप्पा इद्रमताए विचार ता जरूरत मंता। मना बगिल तल माटु कम्युनिस्ट लोर मना संगे सहयोग कियानोरा काजे सहायता आयना लेक्का, काम लोप्पा ओरा संगे कामरेड्स ना लेक्का बेसता संबंध बने कीयाना अनि

मना संयुक्त संघर्ष लोप्या ओरा संगे एकता कीयाना लेक्का परिस्थिति पुट्टी कीयाना।

छठवी पोल्लो अलग-थलग ता बारे ते। अलग-थलग इत्तेके निरपेक्ष रूप ते विचार कीयाना, इत्तेके समस्यांग ना बारे अधिभौतिकवादी रुझान लागू कीयाना। मना काम ता मूल्यांकन कीयानास्के हर चीज तुन पूर्ण रूप ते सकारात्मक ओसो पूर्ण रूप ते नकारात्मक समझेमायना अलग-थलग आंता। इद्रम कियानोर कम्युनिस्ट पार्टी लोप्या ओसो बाहर वेने वेल्ले मंतोरा। हर चीज तुन सिर्फ सकारात्मक समझेमायना इत्तेके सिर्फ सही तुन हूडना अनि गलत तुन हूडवा मंदाना, सिर्फ तारीफ कीयाना तुन विचार कीयाना अनि आलोचना तुन वेरियाना आंता। इद्रम ता पोल्लोंग कीयाना तथ्य ता अनुकूल हिल्ले अद्रमासी मना काम बद्रमाई सही साबित आंता। सब्बे सही मंता इंदानादु सही हिल्ले; इंजे वने कमजोरिंग ओसो गलतिंग मंतांगे। सब्बे गलत मंता इंदाना वेने सही हिल्ले, बारांकु इत्तेके इद वेने तथ्य कुना अनुकूल हिल्ले। इगा विश्लेषण कीयाना जरूरी मंता। हर चीज तुन सिर्फ नाकारात्मक समझेमायना इत्तेके बदे वेने रकम मत्ता विश्लेषण कियवा लेवाए इंजे एवनल बदे वेने काम बेस ताकताद हिल्ले, समाजवादी निर्माण ता महान काम, दसियों करोड़ लोकुर हिस्सा एतना महान संघर्ष उंदी गडबड-घोटाला आंदू ताना लोप्या बदे वेने बेसता पोल्लो हिल्ले इंजी आल्सना आंता। इद्रम ता विचार तासनोर बचोनो लोकुर ओसो समाजवादी व्यवस्था तल दुश्मनी तासनोरा नडमा अंतर मंता मति इद्रम तोरा विचार गलत ओसो वेल्ले नुकसानदायक मंता, इद्रम तोरा कारण ते लोकुरा हिम्मत हारेमांता। मना काम ता मूल्यांकन कीयानास्के, हर वस्तु तुन सकारात्मक समझेमायना दृष्टिकोण पोयना गलत मंता अगा हर चीज तुन नकारात्मक समझेमायना दृष्टिकोण पोयना वेने गलत मंता। बोरु इद्रम ता दृष्टिकोण पोयंतोर ओरा माटु आलोचना कीयाना, मति बदे डावुट हिल्ला ओरा आलोचना कीयानास्के माटु “आयना गलतिंग नल बचेमायला काजे पाडना गलतिंग नल करियाना अनि बीमार किन बचे

कियाला काजे ओना बीमारी ता इलाज कीयाना” रुझान पोयना अनि ओरा मदद कीयाना।

उचुन मुल उंदी शुद्धिकरण आंदोलन ताकी कीयाना ओसो हर मानेय तम्मा राय हियाना इंतोरा। इद्रम ता परिस्थिति ते अलग-थलग तल बचेमायना मुशिकल मंता अलग-थलग तुन खत्म कीयाना आह्वान कीयाना इत्तेके लोकुर किन वड़कना मौका हियानायो इंतोरा। इद विचार सही मंता या? स्वाभाविक रूप ते हर मानेय काजे अलग-थलग तल पूराए बचेमायना मुशिकल मंता। लोकुर हमेशा खुद ता अनुभव कुना वेहच ते समस्यांग ना जाच पड़ताल कींतोरा, ओरकिन हल कीयाना राय हींतोरा अनि ओरा बस्केनाई अलग-थलग आयनादु अनिवार्य मंता। मति माटु ओरु तम्मा अलग-थलगपन पोरो काबू कीयाना अनि समस्यांग पोरो परताचोन पूर्ण रूप ते आल्सना इंजी मांग कीयाना। नावा हिसाब ते माटु इद्रम कीयाना जरूरी मंता। इदिना उल्टा, माटु हर दिव्या ओसो हर साल वेल्ले लोकुर समस्यांग पोरो पूर्ण रूप ते विचार कीयाना इंजी मांग कीवेके मना लोप्पा ठहराव वांता अनि मना अलग-थलगपन ता बारे ते वेहाना शुरू कीतेके शुद्धिकरण आंदोलन ता पूर्ण उद्देश्य ता विपरित हंजी नित्तितोमा। अलग-थलग इत्तेके द्वन्द्ववाद ता उल्लंघन कीयाना। माटु तीरम-तीरम द्वन्द्ववाद ता प्रचार-प्रसार कियाला आल्संतोम, हर मानेय किन ओरु तीरम-तीरम वैज्ञानिक द्वन्द्ववादी तरीका इस्तेमाल कियाला करियाना इंजी वेहितोमा। इस्सल प्रकाशित आयाना उचुक लेख कुना लोप्पा बेहरा-बेहरा समझेमाया परवा लेक्कटा शब्द कु वेल्ले मंदितांग, अविना प्रभाव दूसरोरा पोरो अरवो आंता। इद्रम ता लेख कम रासना। लेख रासनास्के माटु “नन्ना बचोन होशियार मंतान!” इंजी आल्सवा लेवा खुद किन पूर्ण रूप ते पाठक लोरा मुन्ने तासना। मीटु वेल्ले जोम तल क्रांतिकारी काम कीसोर मत्तेकाई मीटु बदे गलत पोल्लो कीतेके लोकुर मीवा खंडन कियानू। मीटु बचोन घंमड कीतिर अचोने कम लोकुर पक्ष ते वांतोरा अनि मीवा लेख पढ़ेमायना बगिल अचोने कम ध्यान हियानू। माटु मना काम ईमानदारी ते कीयाना,

विश्लेषणात्मक तरीका ते पोयना, प्रभावशाली तर्क वाले लेख रासना, कठिन शब्द कुना सहारा एतसी दूसरोरा पोरो रोब वाटनायो।

उचुन मुल वेल्ले बेहरा लेख लोप्पा अलग-थलग तल बचेमाया परितोर मति सुडला लेख लोप्पा इदिनगडल बचेमायना संभावना हिल्ले। सुडला लेख हमेशा अलग मंदिता या? नन्ना इंजे-इंजे अलग-थलग तल बचेमायना मुश्किल मंता इत्तान अनि बचोन अलग-थलग आयना लेक्का वातेकाई वेरियाना जरूरत हिल्ले। हर मानेय समस्या पोरो सौ प्रतिशत पूर्ण विचार कीतेके आलोचना लोप्पा बाधा वायर इंजी मांग कीयाना। मति माटु हर मानेय तल ओरु समस्यांग पोरो पूरा विचार कीयाना कोशिश कीयाना, बेहरा ओसो सुडला रकम ता लेख कुना लोप्पा (इविना लोप्पा सुडला निबंध वेने मंता) अलग-थलग तल बचेमायना कोशिश कीयाना इंजी मांग कीयाना। उचुन मुल उचुन सौ लेवेके उंदी-रेंडु हजार शब्द कुना निबंध लोप्पा विश्लेषण कीयाना बद्रम संभव मंता इंतोर? नावा हिसाब ते बारांकु आया परवो? लू शुन इद्रम किताद हिल्ले या? विश्लेषणात्मक तरीका द्वन्द्वात्मक तरीकाए आंदू विश्लेषण इत्तेके बदे वस्तु लोप्पा मत्ता अंतरविरोध कुना विश्लेषण कीयाना। पिस्वल ता गहरा ज्ञान दोरकी कियवा लेवा ओसो संबंधित अंतरविरोध कुन सही तरीका ते समझेमायवा लेवा विश्लेषण कीयाना असंभव मंता। लू शुन पेरके रास्ता निबंध वेल्ले तीखा ओसो शक्तिशाली मत्तेकाई अलग-थलग तल मुक्त मत्ता बारांकु इत्तेके लू शुन अस्के एवनल द्वन्द्ववाद तुन लागू कीसी मत्तोर। लेनिन ना उचुन लेख कुन वेने सुडला निबंध इंदा परितोम; अवु व्यंग्यपूर्ण ओसो तीखा मंजी वेने अलग-थलग तल मुक्त मंदितांग। लू शुन तना लगभग सब्बे निबंध कुना लोप्पा हमला ता निशाना दुश्मन तुन बने किताद मंता; मति लेनिन ना उचुक लेख कुना लोप्पा दुश्मन तुन निशाना बने किताद मंता अनि उचुक निबंध कुना लोप्पा कामरेड्स कुना लू शुन ना निबंध लेक्कटा लेख कुन जनता ना पांत लोप्पा मत्ता गलतिंग ओसो कमजोरिंग ना विरोध कियाला काजे इस्तेमाल कियमूडांता या? नन्ना इद्रम किया परमूडांता इंतान। बदे डावुट हिल्ला माटु दुश्मन ओसो मना नडमा अंतर कीयाना अनि मना

कामरेड्स ना संगे दोस्तीपूर्ण व्यवहार कीयाना दुश्मन लेक्का व्यवहार कीयानायो। माटु वडकनास्के मना विचार ते जनता ना काम ता रक्षा कीयाना ओसो जनता ना राजनीतिक चेतना स्तर बेरसी कीयाना विचार मंदाना, माटु दूसरोरा मजाक उडे कीयाना लेवेके ओरा पोरो हमला कीयाना व्यवहार कीयानायो।

बोराई रासना साहस कियवेके बाताल आयार? उचुन मुल, लोकुर नाराज आंतोर इंजी लेवेके ओरकिन आलोचना ता सामना किया लागियर इंजी रासला आल्सतेके वेने हिम्मत आयो आंता इंतोर। नावा हिसाब ते इद्रम आल्सना रोमी कीयाना। मना राज्य जनता ना जनवादी राज्य आंदू ताना लोप्पा जनता ना सेवा काजे रासला मदद कीयाना वात्तारवरण मंता। सौ पुंगार पूयला हियाना अनि सौ विचारशाखांग लोप्पा होइ आयला हियाना नीति तल विज्ञान ओसो कला ता पुंगार पूयना उंदी पूना गारंटी आंता। मीटु रास्तादू सही मत्तेके आलोचना तुकू वेरियनायो अनि वाद-विवाद संगे खुद किन सही विचार कुना ओसो ज्यादा वेहा परितोर। मीटू रास्तादु गलत मत्तेके आलोचना संगे गलती सुधरे कियाला मदद दोरकिंता, इदिना लोप्पा बदे गलत हिल्ले। मना समाज लोप्पा जुझारू क्रांतिकारी आलोचना ओसो आत्मालोचना ता तरीका उंदी बेसता तरीका मंता, इदिन अंतरविरोध पुट्टी कीयाना, हल कीयाना, विज्ञान ओसो कला ता विकास कीयाना, मना सब्बे काम ता सफलता ता गारंटी कियाला काजे इस्तेमाल आंता।

सातवीं पोल्लो “खुल्ला छूट हियाना” लेवेके “रोमी कीयाना”? इंजी मंता। इद नीति उंदी समस्या आंदू। “सौ पुंगार पूयला हियाना अनि सौ विचारशाखांग लोप्पा होइ आयला हियाना” नीति उंदी बुनियादी नीति मंता, संगेने इद उंदी दीर्घकालीन नीति वेने आंदू; इद सिर्फ उंदी अस्थाई नीति आयो। विचार-विमर्श कीयानास्के कामरेड्स लोर “पाबंद कीयाना” बारे ते असहमत आतोर, नावा हिसाब ते अदु सही मत्ता। पार्टी ता केंद्रीय कमेटी माटु “खुल्ला छूट हियाना”, “पाबंदी वाटनायो” इंजी आल्संता।

मना देश ता नेतृत्व कियाला इव रेंडु वैकल्पिक तरीकांग, दूसरा माटा ने इव रेंडु वैकल्पिक नीतिंग कुन लागू कियमूडांता- “खुल्ला छूट हियाना” लेवेके “पाबंदी वाटना”। “खुल्ला छूट हियाना” इत्तेके सब्बे तोर किन खुल्ला राय हियाना मौका हियाना, इद्रम कीतेके ओरु साहस संगे वड़का परिंतोर, साहस संगे आलोचना किया परिंतोर अनि साहस संगे वाद-विवाद किया परिंतोर; इत्तेके माटु गलत विचार कुनल ओसो बदे वेने जहर तल वेरियानायो; इत्तेके अलग विचार तासना लोकुरा नड़मा तर्क-वितर्क ओसो आलोचना तुन प्रोत्साहन हियाना, आलोचना ओसो आत्मालोचना रेंडासी ना आजादी हियाना; इदिना अर्थ गलत विचार कुन दबे कियवा लेवा लोकुर किन तर्क संगे समझे कीयाना। “ पाबंदी” इत्तेके लोकुर किन अलग विचार पेश कीयाना ओसो गलत विचार पेश कियानोर किन रोमी कीयाना, ओरु इद्रम कियवेके ओरा “सिर्फ उंदे वोर ते ओरकिन खत्म कीयाना”। इद अंतरविरोध कुन भड़के कीयाना तरीका आंदू, अविन हल कीयाना आयो। “खुल्ला छूट हियाना” लेवेके “पाबंदी” इव रेंडासी ना लोप्पाटल उंदी नी तुन चुने कीयाना। माटु “खुल्ला छूट हियाना” नीति तुन चुने कीतोम, बारांकु इत्तेके इदु नीति संगे मना देश तुन सुदृढ़ बने कीयाना ओसो मना संस्कृति ता विकास कियाला सहायता आंता।

माटु “खुल्ला छूट हियाना” नीति तुन लागू कियाला काजे तैयार किताद मंता। इद्रम कीसी माटु दसियों लाख बुद्धिजीविरा संगे एकता किया परिंतोम अनि ओरा वर्तमान दृष्टिकोण तुन बदले किया परिंतोम। नन्ना पोरो वेहता लेक्का मना देश बुद्धिजीविरा बेहरा संख्या सफलता दोरकी कियाला आल्सिंता अनि तन्ना पूना बदलाव कियाला आल्सिंता, ओरु तम्मा पूना बदलाव कीयाना पूरा तैयार तासिंतोर। इदिना पोरो मना लागू कित्ता नीति वेल्ले बेहरा भूमिका निभे कींता। बुद्धिजीविरा सवाल मुख्य रूप ते उंदी विचारधारात्मक सवाल आंदू, विचारधारात्मक सवाल कुन हल कियाला काजे पोरो-पोरो ओसो जोर-जबरदस्ती ता तरीका पोयतेके फायदा आयवा नुकसान आंता। बुद्धिजीविरा पूना बदलाव कीयाना ओसो खासकर ओरा विश्व-दृष्टिकोण बदले कीयाना प्रक्रिया तुन वेल्ले टाईम ता

जरूरत मंदिता। मना कामरेड्स विचारधारात्मक पूना बदलाव कियाला काजे वेल्ले जोम हिम्मत ते गंभीरतापूर्वक काम कीयाना जरूरत मंदिता, लोकुरा विचाराधारा तुन (इदिन बने कियाला ओरा पिस्वल ता बचोने दशाब्दिंग लागतांग), सिर्फ उचुने लेक्चर हीसी, उचुने मीटिंग केयसी बदले कीयाना कोशिश कीयानायो। लोकुर किन प्रभावित कीयाना सिर्फ उंदे तरीका मंता ओरकिन समझे कीयाना, जोर-जबरदस्ती कीयानायो। जोर-जबरदस्ती ते समझे कियमूड़ायो। जोर-जबरदस्ती संगे ओरकिन समझे कीयाना कोशिश कीतेके सफलता दोरको आंता। इद्रम ता तरीका दुश्मन पोरो अमल कियमूड़ांता, कामरेड्स ना पोरो ओसो दोस्त लोरा पोरो अमल कीयाना अनुमति हियानायो। माटु दूसरोर किन प्रभावित कीयाना तरीका पुनवेके बाता कीयाना? माटु करियाना। माटु वाद-विवाद ओसो तर्क-वितर्क संगे गलत विचार कुना पोरो जीत हासिल कियाला करियाना।

“सौ पुंगार पूयला हियाना” तरीका कला ता विकास कीयाना तरीका आंदु, “सौ विचारशाखांग लोप्पा होड़ आयला हीमुट” इद तरीका विज्ञान ता विकास कीयाना तरीका आंदू। इद नीति पोरो अमल कीयाना सिर्फ विज्ञान ओसो कला ता विकास कीयाना उंदी बेसता तरीकाए आयवा व्यापक रूप ते लागू कीतेके मना सब्बे काम कीयाना उंदी बेसता तरीका बनेमाया परिंता। इदिना संगे मना गलतिंग कम आंतांग। वेल्ले पोल्लॉंग माटु समझेमाया परवोम आंतोम, अदिन काजे अविन हल किया परवो आंतोम मति वाद-विवाद ओसो संघर्ष संगे अविन समझेमांतोम अनि अविन हल कीयाना तरीका करियंतोम। सही ता विकास विभिन्न राय नडमा आयवा वाद-विवाद संगे आंता। इदे तरीका गलत ओसो मार्क्सवादी विरोधी सब्बे पोल्लॉंग पोरो लागू आंता बारांकु इत्तेके अविन खिलाफ संघर्ष ताकनास्के मार्क्सवाद ता विकास आंता। इद विपरीत तत्व नडमा ता संघर्ष संगे आयना विकास आंदू द्वन्द्ववाद अनुसार आता विकास आंदू।

लोकुर प्राचीन कालम तले सत्य, शिव ओसो सुंदर ता चर्चा कीसोर वात्ताद हिल्ले या? इदिन विपरीत तत्व असत्य अशिव ओसो असुंदर। मुन्ने मूंडिना अस्तित्व दूसरा मूंडिना अस्तित्व लेवा मंदांना परवो। सत्य ता

अस्तित्व असत्य पोरो मंदिता। मानव समाज ओसो प्रकृति लोप्पा वेने हर वस्तु अनिवार्य रूप ते अलग-अलग हिस्सा ने मंदिता, सिर्फ अलग-अलग ठोस परिस्थिति ने अविना अंतरवस्तु ओसो वाह्य रूप ते भिन्नता वांता। बदे गलत पोल्लो हमेशा मंदिता, अशिव ओसो असुंदर हमेशा मंदिता। सही ओसो गलत, शिव ओसो अशिव ओसो असुंदर हमेशा मंदितांग। इदे पोल्लो बेसता गब्बू वाले पुंगार ओसो लब्बड़ ता पुंगार पोरो लागू आंता। इविना नड़मा ता संबंध विपरीत तत्व कुना एकता ओसो संघर्ष ता संबंध मंदिता। तूलना कियवा लेवा अंतर कीयाना संभव हिल्ले। अंतर कियवा लेवा संघर्ष कियवा लेवा विकास कीयाना संभवि हिल्ले। सत्य ता विकास असत्य ता विरुद्ध संघर्ष संगे आंता। मार्क्सवाद ता विकास पूंजीवादी ओसो निम्न-पूंजीवादी विचारधार विरुद्ध संघर्ष ताकनास्के आंता, अदिना विकास सिर्फ संघर्ष संगेने आंता।

माटु “खुल्ला छूट हियाना” नीति ता पक्ष एतितोम; इंजे एवनल वेल्ले ज्यादा आयवा वेल्ले कम किताद मंता। माटु “खुल्ला छूट हियाना” तुकू वेरियनायो अनि आलोचना लेवेके लब्बड़ ता रोंडा तुकू वेने वेरियनायो। मार्क्सवाद उंदी वैज्ञानिक सत्य आंदू; अदु आलोचना तुकू वेरियोर ओसो अदिन आलोचना संगे हारे किया परमूड़ायो। इदे पोल्लो कम्युनिस्ट पार्टी ओसो जनताना सरकार पोरो वेने लागू आंता; अवु आलोचना तुकू वेरियोंग, अविन आलोचना संगे हारे कियमूड़ायो। बदे गलत पोल्लो हमेशा मंदिता, अदिनकु वेरियाना जरूरत हिल्ले। इंजेने उचुन उचुक दैत्य ओसो दानव कुन रंगमंच ते पेश किताद मंता। इदिन हूडसी उचुन कामरेड्स वेल्ले परेशान आंतोर। नावा हिसाब ते इद्रम ता वस्तुंग वेल्ले कम मत्तेके वेरियाना जरूरत हिल्ले; उचुके दशाब्दिंग लोप्पा इद्रम ता दैत्य ओसो दानव रंगमंच तल गायब आयनुंग अनि परहकतेक वेने दोरकोंग आयनुंग। सही पोल्लोंग कुन माटु मुन्ने ओयना अनि गलत पोल्लो ना विरोध कीयाना, मति लोकुर गलत पोल्लोंग ना सम्पर्क ते वेने वातेके माटु वेरियनायो। सिर्फ उल्टा-पुल्टा, लब्बड़ ओसो गलत विचार संगे सम्पर्क तासना, रंगमंच पोरो दैत्य, दानव कुन हूडना अनुमति हिल्ला

सरकारी आदेश कुना संगे बदे समस्या हल आया परवो। बदे डावुट हिल्ला नन्ना दैत्य, दानव कुना प्रचार-प्रसार ता समर्थन कीसोर हिल्लेन नन्ना सिर्फे “इद्रम ता वस्तुंग कम मात्रा ते मत्ता कारण ते वेरियाना जरूरत हिल्ले इंतान”। उचुन गलत वस्तु ना अस्तित्व ते मंदाना बदे आश्चर्य ता पोल्लो हिल्ले, अविन वेरियाना बदे कारण हिल्ले; बदे डावुट हिल्ला इदिनगडल लोकुर किन गलत वस्तु ना खिलाफ ओसो बेस संघर्ष कियाला करियाला मदद दोरकियर। बेहरा तूफान तुन वेने वेरियाना जरूरत हिल्ले। मानव समाज बेहरा तूफान कुना नड्माए सफलता दोरकी कींता।

मना देश लोप्पा पूंजीवादी, निम्न-पूंजीवादी विचारधारा ओसो मार्क्सवादी-विरोधी विचारधारांग ना अस्तित्व इंजे वेल्ले जोम एवनल मंदिंता। बुनियादी रूप ते मना देश लोप्पा समाजवादी व्यवस्था ता स्थापना किताद मंता। उत्पादन साधन कुना मालिकाना ता बदलाव कियाला माटु बुनियादी रूप ते जीत दोरकी किताद मंता मति राजनीतिक ओसो विचारधारात्मक मोर्चा पोरो पूर्ण जीत माटु इंजे वेने दोरकी किताद हिल्ले। विचारधारा लोप्पा सर्वहारा वर्ग ओसो पूंजीपति वर्ग नड्मा ता संघर्ष लोप्पा आखरी जीत बोनाद आयर, असल ते इंजे तय आताद हिल्ले। माटु इंजे पूंजीवादी ओसो निम्न-पूंजीवादी विचारधारा विरुद्ध उंदी दीर्घकालीन संघर्ष ताकी कीसोर मंदाना। इद पोल्लो तुन समझेमायवा मंदाना, विचारधारात्मक संघर्ष तुन त्याग कीयाना गलत आंता। सब्बे रकम ता गलत विचार, सब्बे रकम ता जहरिला रोंडा ओसो सब्बे रकम ता दैत्य, दानव कुना आलोचना कीयाना। बदे वेने परिस्थिति ते अविन बेलगाम आसी तम्मा कार्वाइंग ना प्रसार कियाला हियानायो। मति, इद आलोचना पूर्ण रूप ते तर्कसंगत, विश्लेषणात्मक ओसो सही मंदाना, बदतमीजी, नौकरशाहाना, अधिभौतिकवादी ओसो कठमुल्लावादी मंदानायो।

लोकुर वेल्ले जोम तल कठमुल्लावाद ता आलोचना कीसोर वाया मंतोर। इद्रम आयना वेने, मति संशोधनवाद ता आलोचना कार्य तुन हमेशा ओरु नजरअंदाज कींतोर। कठमुल्लावाद ओसो संशोधनवाद रेंडासी मार्क्सवाद ता विरोध कींतांग। मार्क्सवाद तुन जरूर विकसित कीयाना;

अदिन व्यवहार ता विकास संगे विकसित कीयाना, अदु गतिहीन मंदा परवो। अदु गतिहीन ओसो पाड़ना हीरकु हौकना लेक्का बनेमातेके जीवा हिल्वा लेक्का आंता। मति मार्क्सवाद ता बुनियादी उसूल कुना उल्लंघन बस्केने कीयानायो, लेवेके माटु गलतिंग कीतोमा मार्क्सवाद पोरो उंदी अधिभौतिकवादी दृष्टिकोण पोयना ओसो अदिन उंदी गैर-लचीला वस्तु समझेमायना कठमुल्लावाद आंता। मार्क्सवाद ता बुनियादी उसूल ता निषेध कीयाना ओसो अदिना सार्वभौमिक सत्य ता निषेध कीयाना संशोधनवाद आंदू संशोधनवाद, पूंजीवादी विचाराधारा ताए उंदी रूप आंदू संशोधनवादीर समाजवाद ओसो पूंजीवाद नड़मा अंतर मंता, सर्वहारा तानाशाही ओसो पूंजीवादी तानाशाही नड़मा अंतर मंता इंजी मानेमायोर आंतोर। ओरु लागू कीयाना कार्यदिशा असल ते समाजवादी कार्यदिशा आयवा पूंजीवादी कार्यदिशा आंदू वर्तमान परिस्थिति ते कठमुल्लावाद तुकू संशोधनवाद ज्यादा नुकसानदायक मंता। संशोधनवाद ता आलोचना कीयाना इंजे विचाराधारात्मक मोर्चा ते मना उंदी महत्वपूर्ण काम आंदू।

आठवीं ओसो आखरी पोल्लो प्रांत, म्युनिसिपलटिंग ओसो स्वायत्त प्रदेश कुना पार्टी-कमेटिंग तम्मा विचारधारा सवाल कुन हल कीयाना। इगा मत्ता कामरेड्स ना बारे उचुन वड़ककाना वेल्ले जागा ने पार्टी-कमेटिंग वेने विचारधारा तुन हल किताद हिल्ले अनि इदिना बारे ते वेल्ले कम काम किताद मंता। इदिना मुख्य कारण अवु आदिना लोप्पा लगेमाता हिल्वा मंतांग। मति अवु इदिन जरूर हल कीयाना। “हल कीयाना” इत्तेके अदिन एजेंडा ते शामिल कीयाना ओसो अदिना अध्ययन कीयाना। जनता ना बेहरा स्तर ते बेहरा वर्ग-संघर्ष (मुन्नेटा क्रांतिकारी कालम ता विशेषता मत्ता) इंजे मारता मति वर्ग-संघर्ष (मुख्य रूप ते राजनीतिक ओसो विचाराधारात्मक मोर्चा ते) इंजे वेने जारी मंता अनि इंजे वेने वेल्ले तीव्र रूप ते ताका मंता। विचाराधार ता सवाल इंजे उंदी वेल्ले महत्वपूर्ण सवाल बनेमाता। सब्बे इलाकांग ना पार्टी-कमेटिंग ना प्रथम सचिव लोर इद सवाल तुन खुद हल कीयाना। इदिन सही तरीका ते सिर्फ इदिना बगिल

गंभीरतापूर्वक ध्यान हीसी इदिना अध्ययन कितास्केने हल किया परमूझायर। सब्बे इलाकांग तम्मा प्रचार काम ता बारे ते मना वर्तमान सम्मेलन लेक्काने मीटिंग केयना, ताना लोप्पा स्थानीय विचारधारात्मक काम ओसो अदिना संबंधित सब्बे समस्यांग पोरो विचार कीयाना। इद्रम ता मीटिंग लोप्पा सिर्फ पार्टी कामरेड्से आयवा पार्टी तुकू बाहर ता लोकुर वेने ओसो संगेने अलग राय तासना लोकुर वेने शामिल आयना। इदिना बेसता रिजल्ट वांता अनि बदे नुकसान आयो आंता, इंजेटा सम्मेलन ता अनुभव तल साबित आता लेक्का।

नोट

- 1) “सेना आत्मनिर्भरता काजे कीयाना उत्पादन ता बारे ते, शुद्धिकरण ओसो उत्पादन ता महान आंदोलन ता महत्व ता बारे ते”, माओ त्सेतुंग ना संकलित रचनांग, ग्रन्थ 3 हूडाटू।

सादा पिस्वल ओसो कठोर परिश्रम पोरो मेलियवा लेवा नितसी मंदाणा, जनता संगे

घनिष्ठ संबंध तासना⁵¹

मार्च 1957

1

मना पार्टी उंदी शुद्धिकरण आंदोलन ताकी किया मंता। इद आलोचना ओसो आत्मालोचना संगे पार्टी लोप्पटा अंतरविरोध कुन हल कीयाना उंदी तरीका आंदू, संगेने पार्टी ओसो जनता नडमा ता अंतरविरोध कुन हल कीयाना उंदी तरीका वेने आंदू। इदिना बारे ते आंदोलन लोप्पा हमला ता निशाना मूंड गलत कार्यशैलिंग (नौकरशाही, संकीर्णतावाद ओसो मनोगतवाद) बनेमांतांग। माटु शुद्धिकरण संगे मना पार्टी ता सादा पिस्वल ओसो कठोर परिश्रम ता परम्परा तुन विकसित कियाला काजे पूरा कोशिश कीयाना। क्रांति लोप्पा जीत दोरकता पेरेके मना उचुन कामरेड्स ना क्रांतिकारी संकल्प ते नरमी वांता, अविना क्रांतिकारी जोश दड़िंगिता, जीवा ता परवारह कियवा जनता ना सेवा कीयाना विचार कमजोर आसोर दाया मंता, तम्मा जीवा ता परवाह कियवा लेवा संघर्ष कीयाना विचार वेने (इदिन ओरु दुश्मन खिलाफ लडेमायनास्के पेश कीयाना) कमजोर आसोर दाया मंता; संगेने ओरा लोप्पा पद ओसो पोरोल पेरेके वित्तना, तिंदना-उंडना, गेत्तेंग पोरो खास ध्यान हियाना, वेतन काजे वरोर दूसरो ना संगे होड

⁵¹ इद लेख ता पहली हिस्सा 18 मार्च 1957 ते चीनान लोप्पा पार्टी कार्यकर्ता लोरा सम्मेलन लोप्पा हीता भाषण ता उंदी अंश आंदू, दूसरा हिस्सा 19 मार्च 1957 ते नानकिंग लोप्पा पार्टी-कार्यकर्ता लोरा सम्मेलन ते हीता भाषण ता उंदी अंश आंदू।

वाटना, सफलता ओसो धन दोरकी कियाला काजे ऊंदना-पिङ्गना कीयाना रुझान दिव्या-दिव्या तुकू बेरससोर दांता। नीरे कार्यकर्ता लोरा दर्जाबंदी कितास्के उचुन मुल कन्निर पोहहना नाटक कीसी उंदी रकम ता परिस्थिति पुट्टी कित्तोर। मानेय ना रेंडु कोंडांग मंतांग, मंतांगे हिल्लेंग? कोंडामेंड पेसना एर तुन कन्निर इंतोर। ओरा दर्जाबंदी ओरु आल्सता लेक्का आयवेके ओरु किल्लना शुरू कींतोर। च्यांग काई-शेक ना खिलाफ युद्ध ते, अमेरिका आक्रमण ता प्रतिरोध कीयाना ओसो कोरिया ता सहायता कीयाना आंदोलन लोप्पा, भूमि सुधार लोप्पा ओसो प्रतिक्रांतिकारीरा दमन कियाला ओरु बस्केने कन्निर पोहताद हिल्ले, समाजवाद ता निर्माण कियाला ओरा कोंडा ते बस्केने उंदी डोंगे वेने कन्निर आरवो, मति ओरा व्यक्तिगत हित कुन नुकसान आतेके ओरा कोंडा ते जड़ो-जड़ो कन्निर पोंगिंता। नन्ना वरोर मानेय मूंड दिव्यंग गाटो तिंदला इनकार कीसोर मत्तोर इंजी केंजतान। नावा हिसाब ते वरोर मानेय मूंड दिव्यंग गाटो तिंदाला इनकार कीतेके बाताले आयो, मति ओरु उंदी हप्पा एवनल गाटो तिनवेके उचुन खतरनाक आयार। सक्षिप्त ते वेहाना इत्तेके पोरोल ओसो पद काजे होड़ वाटना, वेतन, तिंदना-उंडना, गेत्तेंग ओसो सुख-सुविधा ता तूलना कीयाना रुझान पैदा आता। व्यक्तिगत हित कुना काजे भूख-हड़ताल कीयाना ओसो कोंडा ते कन्निर पोंगी कीयाना वेने उंदी रकम ते जनता ना नड़मा ता अंतरविरोध समझेमायमूडांता। बदे ऑपेरा लोप्पा “लिन छंग ता उंदे दिव्या पलायन। पोरोल ता उंदी भाग मंता, इदिना उंदी लाईन इद्रम मंता: “बस्के एवनल मानेय ना गुंडे टुकडेंग आयो अस्के एवनल हल्कोए कोंडा ते कन्निर वायो”। इंजे मना कामरेड्स ना लोप्पा (उचुन महिलांग शामिल मंतांग) इविना बारे ते बस्के एवनल दर्जाबंदी कीयाना टाईम वायो अस्के एवनल अवु हल्कोए कोंडा तल कन्निर पेसी कीवोंग इनमूडांता। इद्रम ता व्यवहार तुन सुधरे कीयाना वेने जरूरी मंता या हिल्ले? हल्कोए कोंडा तल कन्निर पोहवा मंदाना बेसे मति बोनाए गुंडे ता टुकडांग बस्के आंता? अदु मजदूर वर्ग ओसो व्यापक मेहनतकश जनता तिप्पल ते अरतास्के इद्रम आंता। अस्के माटु उचुन कोंडा तल कन्निर

पोहहा परितोमा दर्जाबंदी कीयाना बारे ते इत्तेके मीकिन बचोन गलत दर्जा ते तासत्तेकाई अदिन स्वीकार कीयाना अनि कोंडा ते कन्निर पोहहवा लेवा अविन कोंडा तेने सकले कीसी तासना। दुनिया लोप्पा वेल्ले अन्यायपूर्ण पोल्लोंग आंतांग अनि मीकिन सही दर्जा ते तासवा मंदाना वेने आया परिता। मति इद्रम आतेकाई कोल्हार कीयाना जरूरत हिल्ले, बारांकु इत्तेके इद उंदी वेल्ले साधारण पोल्लो आंदू अनि बस्के एवनल मीकिन पोट्टामेंड गाटो दोरकिता अस्के एवनल खुश मंदाना। मना पार्टी उंदी क्रांतिकारी पार्टी आंदू, अदिन काजे मना उसूल बोनकिने करविने हौकनदु हिल्ले। बस्के एवनल बोराई करविने डोल्ला मंतोर अस्के एवनल ओनकिन क्रांतिकारी काम कीसोर मंदाना अनि संघर्ष कीसोर मंदाना। नेटला दस हजार साल पेरके वेने लोकुर कठोर परिश्रम कीयाना। उंदी कम्युनिस्ट पार्टी काजे कठोर परिश्रम कीयाना, पूरा जीवा कीसी जनता ना सेवा कीयाना जरूरी मंता, विचार हिल्ला लेक्का काम कीयानायो। क्रांतिकारी संकल्प नरमी वात्ता लोकुर किन शुद्धिकरण संगे ओसो उंदी बेरा पूना ताकत निह्चियाना।

2

माटु क्रांतिकारी युद्ध कालम ते कित्ता लेक्का क्रांतिकारी जोश ओसो जीवा ता परवाह कीयानायो अनि क्रांतिकारी काम तुन आखरी एवनल जारी तासना। जीवा ता परवाह कियवा इत्तेके “दा वाटर मार्जिन” पोरोल ता उपन्यास लोप्पा उंदी भूमिका ता पोरोल आंदू “जीवा ता परवाह कियवा मंदाना मंझला तम्मोर श श्यू” ना विचार माटु आल्सना लेक्काने मंता। हत्ता कालम ते माटु इदे विचार तल प्रेरित आसी क्रांति कीतोमा। हर मानेय ना सिर्फ उंदे पिस्वल मंदिता। इद पिस्वल 60, 70, 80 लेवेके 90 साल ता मंदिता, इद ओना उमर पोरो आधार आसी मंदिता। बस्के एवनल मीवा लोप्पा काम कीयाना ताकत मंता अस्के एवनल मीटु बदे काम कीसोर मंदाना। मीटु क्रांतिकारी जोश ओसो जीवा ता परवाह कियवा लेवा काम कीयाना। उचुन कामरेड्स ना लोप्पा इद जोश कमी मत्ता अनि ओरु मुन्ने

दायना बंद कित्तोर। इद्रम आयना बेस हिल्ले इंजी कामरेड्स किन समझे कीयाना।

पूरा पार्टी राजनीतिक ओसो विचाराधारात्मक काम पोरो जोर हियाना। नेटा सम्मेलन लोप्पा शामिल मत्ता वेल्ले लोकुर सेना तल वातोर। सेना लोप्पा बद्रम ता परिस्थिति मंता? युद्ध कालम ते जनता संगे घनिष्ठ संबंध तासना जरूरी मंता, अफसर लोरा सैनिक लोरा संगे कलियसी मंदाणा, ओसो सेना ता जनता संगे कलियसी मंदाणा जरूरी मंता। इद्रम ता परिस्थिति ते मना लोप्पा उचुन कमजोरिंग मत्तेके वेने जनता माकिन माफ कीता। इंजे शांतिकालम मंता माटु लड़ाई कीवेके माटु सिर्फ ट्रेनिंग हियाना काम कीयाना; माटु मेलियवा लेवा जनता संगे घनिष्ठ संबंध तासवेके मना कमजोरिंग कुना काजे जनता माफ किया परवो आंता। इंजे फौजी रैंक व्यवस्था² ओसो बाकी व्यवस्थांग लागू किताद मंता मति उच्चतर रैंक वाले लोकुर तम्मा दोड़ता लोकुरा संगे कलियसी मंदाणा ओसो कार्यकर्ता लोरा किन सैनिक लोरा संगे कलियसी मंदाणा, दोड़ ता लोकुर तम्मा वरिष्ठ नेताल लोरा आलोचना कीयाना ओसो सैनिक लोर कार्यकर्ता लोरा आलोचना कीयाना अनुमति हियाना। उदाहरण तुकू आलोचना कीयाना मौका हियाला काजे पार्टी प्रतिनिधिरा उंदी सम्मेलन केयना। “मूंड गलतिंग” विरोधी आंदोलन ताकनास्के कामरेड छन ई वेल्ले बेस वेहतोर: इचोन साल तल माटु आदेश जारी कीसोर वातोम अनि इद्रम कीयाना काजे सही मत्ता; इंजे मना काजे माटु मना दोड़ ता लोकुर किन उचुन जोम उंदी हप्ता काजे ओरु मावा आलोचना कीयाना इंजी अनुमति हियाना? इत्तेके ओरु इद्रम कीयाना सही मंता इंजी आल्सतोर। नन्ना ओरा समर्थन कीतान; दोड़ ता लोकुर किन उंदी हप्ता एवनल मना आलोचना कियाला हियाना। आलोचना शुरू आयना मुन्ने माटु उचुन तैयारी कीयाना, उंदी रकम ता रिपोर्ट पेश कीयाना अनि मना कमजोरिंग ना बारे ते वेहना, ताना लोप्पा कुल मिले कीसी उंदी-रेंडु लेवेके मूंड-नालुंग मुदांग मंदाणा लेक्का हूडाना। ताना पेरके कामरेड्स किन वड़कला मौका हियाना, उचुन कमजोरिंग पोरो वेहच वाटना अनि आलोचना कियाला हियाना। जनता

वेल्ले न्यायपूर्ण मंदिता, ओरु मना काम ता रिकार्ड मिस्सा परवोरा। कम्पनी, प्लाटून कमांडर लोर वेने तम्मा सैनिक लोर किन आलोचना कियाला हियाना, साल लोप्पा उंदी बेरा आलोचना कियाला काजे उचुन दिय्यंग एवनल मीटिंग जरूर केयना सबसे बेस मंदिता। हत्ता काल ते माटु सेना लोप्पा इद्रम ता जनवाद तुन लागू कीतोम अनि बेसता सफलतांग दोरकी कीतोम। फौजी रैंक व्यवस्था ओसो बाकी व्यवस्थांग पोयतांकु पोरो स्तर ता ओसो दोड़ स्तर ता नड़मा, अफसर ओसो सैनिक लोरा नड़मा, सेना ओसो जनता नड़मा, सशस्त्र सेनांग ओसो स्थानीय प्रशासन नड़मा ता घनिष्ठ संबंध कुन नुकसान आयला हियानायो। पोरो स्तर दोड़ ता स्तर कुना संगे घनिष्ठ संबंध बने कीसी तासना अनि ओरा नड़मा ता संबंध कामरेड्स ना लेक्का मंदाना इंदान पोरो बदे डारुट हिल्ले। कार्यकर्ता लोरा सैनिक लोरा संगे घनिष्ठ संबंध तासना अनि ओरा संगे कलियसी मंदाना। सशस्त्र सेनांग वेने जनता संगे ओसो पार्टी, सरकार ता स्थानीय संगठन संगे घनिष्ठ संबंध तासना।

मना कामरेड्स सिर्फ तम्मा पद, उच्च पद ओसो वरिष्ठता पोरो आधार आसी मंदानायो इंजी सुरता तासना। माटु बचोनो साल तल क्रांति कीसोर वाया मंतोम इंजी गिनती कियमूडांता मति माटु इद रिकार्ड ता भरोसा ते मंदानायो। असल इत्तेके मीटु पाड़ना कामरेड्स आंदिर, बचोनो दशक एवनल काम कीसी मंतरि। मति मीटु बदे गलती कीतेके बदे गलत पोल्लो वड़कतेके जनता मीकिन माफ कीवो आंता। मुन्ने मीटु बचोन काम कीतेके वेने मीवा पद बचोन बेहरा मत्तेके वेने मीटु नेंड बेस काम कीवेके, समस्यांग कुन सही तरीका ते हल कीवेके, इद्रम जनता ना हित कुन नुकसान कीतेके जनता मीकिन माफ कीवो आंता। अदिन काजे मना कामरेड्स वरिष्ठता पोरो आयवा समस्यांग कुन सही तरीका ते हल कीयाना पोरो आधार आसी मंदाना। इगा निर्णायक पोल्लो सही मंदानदू मंता वरिष्ठता मंदाना आयो। मीटु मीवा वरिष्ठता पोरो आधार मंदा परविर, अदिन काजे मीटु अदिन इंजे एवनल मीटु बस्केने अफसर मत्ताद हिल्ले इंजी मरंगसितेके वेने बेसे आयर; दूसरा माटा ने वेहाना इत्तेके मीटु नवाब लोरा

लेक्का ओसो नौकरशाही लेक्का अंहकारी बनेमायनायो, मीवा अंहकार तुन तिलांजली हियाना अनि जनता नडमा ओसो मीवा दोड़ ता लोकरा नडमा दायना। इद मना कार्यकर्ता लोर किन ओसो खासकर पाड़ना कार्यकर्ता लोर सुरता तासना पोल्लो आंदू। साधारण रूप ते पूना कार्यकर्ता लोरा दिमाग ते इद्रम ता बोजा मन्नो, ओरु मुक्त मंदितोर। पाड़ना कार्यकर्ता लोर पूना कार्यकर्ता लोरा संगे बराबरी ता व्यवहार कीयाना। वेल्ले पोल्लो ने पूना कार्यकर्ता लोरकिनकु पेरके मंदितोर, ओरकिन पूना कार्यकर्ता लोरगडल करियाना।

नोट

- 1) “लिन छुंग ना पलायन” मिंग वंश ते रासता “तलवार ता कहानी” पोरोल ता खुनछवी ऑपेरा ता उंदी भाग आंदू। खुनछवी ऑपेरा ता जन्म च्यांगसू प्रांत ता खुनशान लोप्पा आता।
- 2) फौजी रैंक व्यवस्था सितम्बर 1955 ता शुरू ते किताद मत्त अनि मई 1965 ते खत्म कियमूडाता।

बदलाव आया मंता⁵²

15 मई 1957

सामाजिक पिस्वल लोप्पा विपरीत तत्व कुना नडमा एकता ओसो संघर्ष सार्वभौमिक परिघटनांग आंदुंगा। संघर्ष ता कारण ते विपरीत तत्व उंदी दूसरा ते बदलेमांतांग अनि उंदी पूना एकता बनेमांतांग, इद्रम सामाजिक पिस्वल उंदी डाका ओसो मुन्ने दांता। कम्युनिस्ट पार्टी लोप्पा ताकी कित्ता शुद्धिकरण आंदोलन उंदे वस्तु लोप्पा मत्ता रेंडु कार्यशैली नडमा ता संघर्ष आंदू। इद पोल्लो कम्युनिस्ट पार्टी काजे सही मंता, संगे ने पूरा जनता काजे वेने सही मंता।

कम्युनिस्ट पार्टी लोप्पा रक-रकम ता लोकर मंतोर। ओरा मार्क्सवादीर बहुसंख्या ते मंतोर। वीरा लोप्पा कमजोरिंग वेने मंतांग, मति अवु गंभीर मन्नोंग आंतांग। उचुन मुल ता विचार कुना लोप्पा कठमुल्लावादी गलतिंग मंदितांग। ताना लोप्पटल वेल्ले लोकर मेलियवा लेवा अटल ओसो विश्वासनीय मंतोर, पार्टी ओसो देश पोरो इमानदार मंदिंतोर, सिर्फ समस्यांग पोरो ओरा दृष्टिकोण ते “वामपंथी” एकतरफा दिसिंता। इद एकतरफापन तुन दूर कीतेके उंदी बेहरा डाका वाटसोरे मुन्ने दांतोमा। उचुन मुल लोप्पा संशोधनवाद लेवेके दक्षिणपंथी अवसरवाद ता गलतिंग मंतांग। इद्रम तोर वेल्ले खतरनाक मंदिंतोर, बारांक इत्तेके ओरा विचार पार्टी लोप्पा पूंजीवादी विचारधारा ता जंगो मंदिता, बारांकु इत्तेके ओरु पूंजीवादी उदारतावाद काजे आंगलवैयसी मंदिंतोर, हर चीज तुन नकारे कींतोर अनि पार्टी ता बाहर ता पूंजीवादी बुद्धिजीविरा संगे हजारो

⁵² पार्टी कार्यकर्ता लोरा नडमा वितरित उंदी लेख।

रकम ता संबंध तासिंतोरा। हत्ता उचुक महीनांग लोप्पा लोकरु कठमुल्लावाद ता आलोचना कितोर मति संशोधनवाद तुन चुनौती हियवा लेवा अह्हे विडसतोर। कठमुल्लावाद ता आलोचना कीयाना जरूरी मंता लेवेके वेल्ले गलतिंग सुधरे किये परमूडायो आयार। इंजे माटु मना ध्यान संशोधनवाद ता आलोचना पोरो केंद्रित कीयाना टाईम वात्ता। कठमुल्लावाद तन्ना विपरीत तत्व ते बदले मातेके अदु मार्क्सवाद बनेमायर लेवेके संशोधनवाद। मना पार्टी ता अनुभव तले कठमुल्लावाद ता मार्क्सवाद ते बदलेमायना उदाहरण वेल्ले मंतांग अनि संशोधनवाद लोप्पा बदलेमातादु वेल्ले कमा बारांकु इत्तेके कठमुल्लावाद सर्वहारा विचाराधारा ता उंदी शाखा ता प्रतिनिधित्व कींता अदिना पोरो निम्न-पूंजीवादी छाप मंदिता। उचुन पोल्लोंग ने “कठमुल्लावाद” पोरोल ते हमला ता निशाना वाटितोम अवु असल ते सिर्फ काम ताकनास्के आयना गलतिंग मंदितांग। बाकू मुद्दांग लोप्पा “कठमुल्लावाद” ता पोरोल हीसी हमला ता निशाना बने कियमूडांता अदु मार्कसावाद मंदिता, अदिन उचुन मुल पुनवाए “कठमुल्लावाद” समझेमासी ताना पोरो हमला कींतोरा। असली कठमुल्लावादीर “वामपंथी” मंदाना इत्तेके दक्षिणपंथी तुकू ज्यादा बेस मंता इंजी आलिसंतोरा। ओरा इद्रम आल्सना कारण वेने मंता - ओरु क्रांति कियाला आलिसंतोरा। मति क्रांतिकारी काम तुन आयना नुकसान ता दृष्टि ते “वामपंथी” मंदाना दक्षिणपंथी आयना तुकू बद्रमाई बेस हिल्ले, अदिन काजे इद गलती तुन दृढ़ता ते सुधार कीयाना। उचुन गलतिंग केंद्रीय प्रशासन ता नीतिंग कुन लागू कीतांकु आंतांग; ओरा काजे दोड़ स्तर ते काम कीयाना लोकरा वेल्ले निंदा कीयानायो। मना पार्टी लोप्पा उंदी बेहरा संख्या पूना सदस्य लोरा मंता (नौजवान संघ लोप्पा इद संख्या ओसो वेने ज्यादा बेहरा मंता) वीरु बुद्धिजीविर मंदिंतोर अनि ओरा लोप्पाटल उचुन मुल संशोधनवादी विचार संगे वेल्ले संक्रमित आसी मंतोरा। ओरु समाचार पत्र ता पार्टी विचार कुन ओसो ओरा वर्ग-स्वरूप तुन स्वीकार कीवोर, सर्वहारा पत्रकारिता ओसो पूंजीवादी पत्रकारिता नड्मा ता उसूल अंतर तुन लेस्की कींतोर अनि समाजवादी देश कुना सामूहिक अर्थव्यवस्था तुन

तोहना पत्रकारिता ओसो पूंजीवादी देश ता अर्थव्यवस्था तुन (ताना लोप्पा अराजकता ता परिस्थिति ओसो इजारेदार ग्रुप नडमा ता प्रतिस्पर्धा मंता) तोहना पत्रकारिता नडमा अंतर तुन लेस्की कींतोर। ओरु पूंजीवादी उदारतावाद ता समर्थन कींतोर अनि पार्टी ता नेतृत्व ता विरोध कींतोर। ओरु जनवाद ता समर्थन कींतोर अनि केंद्रीयता ता विरोध कींतोर। ओरु संस्कृति ओसो शिक्षा लोप्पा (पत्रकारिता वेने शामिल मंता) जरूर ओसो सही केंद्रीयता वाले नेतृत्व, योजना ओसो नियंत्रण ता (योजनाबद्ध अर्थव्यवस्था तुन लागू कियाला काजे अनिवार्य मंता) विरोध कींतोर। ओरु पार्टी तुकू बाहर ता दक्षिणपंथी बुद्धिजीविरा लेंग ते लेंग काल्पितोर अनि ओरा संगे संबंध तासिंतोर, ओरु वरोर दूसरो ना उंदी यायन पोड्डा ते पुटता तम्मोर लेक्का। कठमुल्लावादी आलोचना कीयाना लोकर रक-रकम तोर मंतोर। ओरा लोप्पा कम्युनिस्ट इत्तेके मार्क्सवादी लोकर मंतोर; कम्युनिस्ट इत्तेके कम्युनिस्ट पार्टी लोप्पा मत्ता दक्षिणपंथी लेवेके संशोधनवादी लोकर मंतोर। पार्टी तुकू बाहर वामपंथी, मध्यवर्ती ओसो दक्षिणपंथी लोकर वेने इदिना आलोचना कींतोर। मध्यवर्ती लोकरा संख्या वेल्ले बेहरा मंता, अदु पार्टी तुकू बाहर ता बुद्धिजीविरा कुल संख्या लगभग 70 प्रतिशत मंता अनि वामपंथिरा संख्या लगभग 20 प्रतिशत ओसो दक्षिणपंथिरा संख्या अलग-अलग परिस्थिति अनुसार लगभग उंदी, मूंड, हेय्युंग लेवेके दस प्रतिशत मंता।

इस्सल जनवादी पार्टींग ओसो उच्च शिक्षा प्रतिष्ठान कुना लोप्पा दक्षिणपंथी सबसे ज्यादा दृढ़ता ओसो तीव्र रूप ते दिस्सा मंतांग। अवु मध्यवर्ती तत्व अविना पक्ष ते मंतांग अनि कम्युनिस्ट पार्टी ना नेतृत्व तुन स्वीकार कीवोंग मति असल ते इदु उंदी कंजकाड़ आंदू। मध्यवर्ती तत्व कुना लोप्पा उचुन मुल दुलमुल मंदितोर, ओरु बस्केने डावड़ बगिल दांतोर अनि बस्केने तिन्ड बगिल दांतोर। ओरु दक्षिणपंथिरा हमला मुन्ने इंजे मूकाल लेक्का वेने नित्ता परितोर, उचुन जोम काजे इंजे बाताल आयर इंजी हरी हूडा वेने परितोर। दक्षिणपंथी इंजे वेने आक्रमण तीव्र आताद हिल्ले अनि जोर-शोर ते हमला किया मंतोर। दक्षिणपंथिर पार्टी लोप्पा आई बाहर

आई, द्वन्द्ववाद ता बारे ते पुन्नोर - बदे वस्तु लोप्पा तीव्र संघर्ष आतास्के अदु तन्ना विपरीत तत्व ते बदलेमांता। माटु दक्षिणपंथिर किन उचुन जोम कंदरेमासी वित्तला हियाना अनि ओरकिन दोगला हियाना। ओरु बचोन तेज वित्तानूर अचोनो मना काजे फायदा आयर। उचुन मुल ओरकिन कीके लेक्का गरी काटा ते हिरकी कींतोर बहे इंजी वेरियंतोर अनि उचुन मुल ओरकिन बेगाने ओसी कोहड़ा ते अरिहची हौकानूर इंजी वेरियंतोर। इंजे हंदी हिल्वा कीकेंग खुद एर पोरु वातांग अदिन काजे अविन गरी काटा ते हिरकी कीयाना जरूरत हिल्ले। इव कीकेंग साधारण आयवा सुई लेक्का तेज मत्ता पलकु वाले माने तिंदना शार्क कीकेंग लेक्का मंतांग। इद्रमताए शार्क किकेंग ना मारेंग लोकरु वेने तिंतोर। दक्षिणपंथिरा खिलाफ मना संघर्ष मध्यवर्ती तत्व कुन मना पक्ष ते कीयाना काम पोरु केंद्रित मंता। दक्षिणपंथीर जनता ना जनवादी तानाशाही, जन-सरकार, समाजवाद ओसो कम्युनिस्ट पार्टी ता नेतृत्व ता समर्थन कींतोम इंतोर मति सिर्फ झूठ आंदू, इदिना पोरु बद्रमाई विश्वास कीयानायो। इद सब्बे दक्षिणपंथिरा पोरु लागू आंता, ओरु जनवादी पार्टिंग लोप्पा आई लेवेके शिक्षा, कला-साहित्य, पत्रकारिता, विज्ञान-प्रौद्योगिकी ओसो उद्योग-वाणिज्य लोप्पा मत्तेकाई ओरा पोरु लागू आंता। रेंडु रकम ता लोकरु सबसे ज्यादा अडियल मंतोर-वामपंथी ओसो दक्षिणपंथीर। इव रेंडासी मध्यमवर्ती तत्व कुन मना पक्ष ते कीयाना अनि अविना पोरु मना नेतृत्व कायम किया मंतोम। दक्षिणपंथीर मुन्ने उंदी हिस्सा तुन ओसो पेरके सब्बे तोर तम्मा पक्ष ते कीयाना कोशिश कींतोर। शुरू ते ओरु पत्रकारिता, शिक्षा, कला-साहित्य ओसो विज्ञान-प्रौद्योगिकी लोप्पा नेतृत्व कैदे पोयना कोशिश किया मंतोर। ओरु इविना लोप्पा कम्युनिस्ट लोरा तूलना ते ज्यादा निपुण हिल्लेर अनि असली परिस्थिति वेने अद्रमे मंता। ओरु “राष्ट्र ता अनमोल रत्न” आंदुर इंजी आल्सिंतोर, ओरकिन बोयना अधिकार हिल्ले।

“मूंड-गलतिंग” विरोधी आंदोलन ताकी कीयाना, प्रतिक्रांतिकारिरा दमन कीयाना अनि विचारधारात्मक पूना बदलाव कीयाना अन्याय ओसो धृष्टता बद्रम आंता! ओरु वेल्ले कालेज-विद्यार्थिर् जर्मीदार, धनी किसान

ओसो पूंजीपति परिवार तल वातोर इंजी पुत्तोर अनि ओरकिन विद्यार्थिर ओरा आह्वान ते तेदितोर इंजी वेने विश्वास मंता। विद्यार्थिरा दिमाग ते दक्षिणपंथी भटकाववादी विचार मंता, ओरु इद्रम कीयाना संभव मंता। मति वेल्ले विद्यार्थिर इद्रमें कींतोर इंजी आल्सना सिर्फ आल्साडे मंदिता। पत्रकारिता लोप्पा काम कीयाना दक्षिणपंथी लोकुर मजदूर ओसो किसान लोर किन सरकार ता विरोध कियाला काजे भड़के कीयाना लेक्कटा पोल्लोंग वेने मंतांग।

उचुन मुल राजनीतिक लेबल वाटना तुकू विरोध कींतोर, मति ओरु इदिना ओरु कम्युनिस्ट पार्टी ओरा पोरो लेबल वाटसोर मत्तास्केने विरोध कींतोर। कम्युनिस्ट लोर, जनवादी पार्टिंग ओसो समाज ता अलग-अलग व्यवसाय कुना वामपंथी, मध्यवर्ती तत्व कुना पोरो खुद लेबल वाटितोर अस्के खुद किन पूराए आजाद समझेमांतोर। हत्ता उचुन महीनांग लोप्पा दक्षिणपंथिर बचोनो लेबल पंडसी अखबार ते छापे कित्तोर! मध्यवर्ती तत्व लेबल वाटना ता वेल्ले ईमानदारी ते विरोध कींतोर। मध्यवर्ती पोरो माटु मुन्ने बचोन गलत लेबल वाटतोम, अविन गुच्चिह कीयाना अनि वायना कालम ते वेने अंधाधुंद तरका ते लेबल वाटनायो। “मूंड गलतिंग” विरोधी आंदोलन लोप्पा प्रतिक्रांतिकारिरा मदत कीयाना लोप्पा ओसो विचारधारात्मक पूना बदलाव कीयाना लोप्पा निज्जमे बोनाई संगे अन्याय आतेके अद गलती तुन सार्वजनिक रूप ते सुधार कीयाना। मति दक्षिणपंथिरा पोरो लेबल वाटना अलग मंता। मति लेबल सही मंदाना अनि दक्षिणपंथीला लेबल सिर्फ निज्जमे दक्षिणपंथी मत्ता लोकुरा पोरोने वाटना। इरवुर-मुवुर किन विड़चसी, दक्षिणपंथीरा पोरोल ऐलान सार्वजनिक रूप ते कीयाना जरूरत हिल्ले, ओरकिन सुधरे कियाला काजे हरीं तेरियसी तासना अनि अनुकूल परिस्थिति वात्तास्ते ओरु हल्कोए समझौता कीयाना लेक्का हूडना। माटु दक्षिणपंथिरा संख्या उंदी, मूंड लेवेके दस प्रतिशत मंता इंतोम अदु सिर्फ उंदी अंदाजा आंदू, ओरा संख्या इदिनकु उचुन ज्यादा लेवेके कम वेने मंदा परिंता। इदे आयवा अलग-अलग इकाई ना परिस्थिति वेने अलग-अलग मंता अदिन काजे ठोस सबूत

दोरकी कीयाना, तथ्य कुना संगे सत्य ता तलाश कीयाना अनि अन्याय कीयाना तुकू बचेमायना जरूरी मंता बारांकु इत्तेके अन्याय कीयाना गलत मंता।

पूँजीपति वर्ग ता लोकर ओसो वेल्ले बुद्धिजीविर मुन्ने पाड़ना समाज ता सेवा कियानोर (अनिवार्य रूप ते वेल्ले जिद्द संगे तम्मा लक्ष्य ता बारे तो कोल्हार पोयंतोर) तम्मा पाड़ना दुनिया काजे आंगलवैयसी मंतोर अनि अनिवार्य रूप ते तम्मा किन पूना दुनिया ता अनुकूल समझेमायोर। ओरा पूना बदलाव कियाला काजे वेल्ले टाईम ता जरूरत मंदिता अनि इद प्रक्रिया ते सख्त तरीका ना इस्तेमाल आया परवो। दूसरा बगिल माटु मुक्ति पेरेके शुरूआती कालम तुकू ओरा लोप्पा वेल्ले लोकरा विकास आतोर, मना काम ता बारे ते ओरा ज्यादातर आलोचना सही मंतांग अनि ओरकिन स्वीकार कीयाना इंजी वेने सुरता तासना। सिर्फ उचुने आलोचनांग गलत मंतांग, इद्रम ता समस्यांग ना स्पष्टीकरण कीयाना। ओरा पोरो विश्वास कीयाना ओसो पद अनुसार अधिकार हियाना इंजी मांग कियानदू सही मंता; ओरा पोरो विश्वास कीयाना अनि ओरकिन अधिकार ओसो जिम्मेदारी हियाना। दक्षिणपंथीर कित्ता आलोचननांग लोप्पा वेने उचुन आलोचननांग सही मंतांग अनि अविन एकदम ठुकरे कीयानायो। ओरु कीयाना सही आलोचननांग कुन स्वीकार कीयाना। दक्षिणपंथीरा विशेषता ओरा दक्षिणपंथी राजनीतिक रुझान। ओरु मना संगे कीयाना सहयोग पोरो-पोरो मंदिता, असली आयो। उचुन पोल्लोंग लोप्पा सहयोग मंदिता अनि उचुक ना लोप्पा ओरा सहयोग मन्नो आंता। साधारण परिस्थिति ते ओरा सहयोग मंदिता मति ओरकिन फायदा एतना मौका दोरकतास्के सहयोग कीवोर आंतोर। इद्रम मंदानास्के ओरु कम्युनिस्ट पार्टी ता नेतृत्व स्वीकार कियाला कित्ता तम्मा किरिया तुन उल्लंघन कींतोर। इद नेतृत्व तल बाहर पेसना कोशिश कींतोर। मति इद नेतृत्व लेवा समाजवाद ता निर्माण कीयाना मुश्किल आंता अनि मना राष्ट्र वेल्ले संकट ते अरिंता।

चीन लोप्पा पूँजीवादी तत्व ओसो मुन्ने पाड़ना समाज ता सेवा कित्ता दसियों लाख बुद्धिजीविर माकिन मना काम काजे जरूरत मंता; वेल्ले

कारगर रूप ते समाजवादी काम ता सेवा कीयाना लेक्का माटु ओरा संगे मना संबंध कुन वेल्ले मजबूत कीयाना। माटु पूना बदलाव कियाला काजे, मजदूर वर्ग ता हिस्सा बनेमायला काजे ओरा मदद कीयाना, इद्रम ओरा वर्तमान परिस्थिति विपरीत परिस्थिति ते बदले कींतोर। ओरा लोप्पटल वेल्ले लोकर इद लक्ष्य एवनल जरूर एव्वा परिंतोर। पूना बदलाव कियाला एकता ओसो संघर्ष रेंडासी शामिल मंतांग, संघर्ष एकता कीयाना साधन मत्तेके एकता साध्य आंदू। संघर्ष आपस ते आंता; नेंडु वेल्ले लोकर मना खिलाफ संघर्ष किया मंतोर। वेल्ले लोकर कित्ता आलोचनांग सही मंतांग लेवेके बुनियादी रूप ते सही मंतांग अविना लोप्पा पेकिंग विश्वविद्यालय ता प्रोफेसर फू इंग कित्ता आलोचना लेक्का कड़ी आलोचनांग वेने शामिल मंतांग, इविन समाचारपत्र लोप्पा प्रकाशित किताद हिल्ले। ओरु मना कामरेड्स ओरा संगे संबंध सुधरे मायना इंजी आलोचना कितोर, अदिन काजे इव आलोचनांग सही काजे किताद मत्ता। मति दक्षिणपंथीर कित्ता आलोचनांग साधारण रूप ते होंग ते किताद मंदितांग, अदिन काजे माटु ओरा संगे दुश्मनी तासिंतोम। आशय बेस मत्तेकाई लेवेके गलत मत्तेकाई इद सिर्फ अंदाजा वाटना लेक्का आयो इदिन स्पष्ट हूडमूडांता।

वर्तमान आलोचना, शुद्धिकरण आंदोलन कम्युनिस्ट पार्टी शुरू कित्ता। मना अंदाजा मत्ता लेक्का माटु आशा कित्ता लेक्का बेसता गब्बू मत्ता पुंगार संगे-संगे लब्बड़ ता रोंडा वेने मोड़िया मंता। उंदी कोर वाले हलियल पेन ओसो अमर पिट्टे संगे-संगे भूत-प्रेत ओसो दैत्य-दानव वेने पुटसोर दांतांग, मति सही वस्तुंग खराब वस्तु तुकू ज्यादा मंतांग। उचुन मुल माटु बेहरा कीकेंग पोयना कोशिश किया मंतोर इंतोर अनि माटु लब्बड़ ता जहरिला रोंडा तेहका मंतोम इंतोम; उंदे पोल्लो कीयाना तरीका अलग-अलग मंता। कम्युनिस्ट विरोधी विचार तासना दक्षिणपंथीर तम्मा लक्ष्य हासिल कियाला काजे चीन लोप्पा फसल, लोहकुन ध्वस्त कीयाना सातवी दर्जा तुकू वेने बेहरा देब्बा वाटना पूरा कोशिश किया मंतोर। ओरु बचोन गलत कींतोर अचोने जल्दी कम्युनिस्ट पार्टी ता सहयोग कीयाना ओसो ओरा नेतृत्व स्वीकार कीयाना विरोध कियानूर अनि इद्रम जनता

ओरु सिर्फ कम्युनिस्ट पार्टी ओसो जनता ना विरोध कीयाना मुट्टामेंड दैत्य-दानवके आंदुंग इंजी समझेमांता। अस्के ओरु तम्मा गुड्डी गुमिया खुद तरवितोर। इद्रम कीयाना गलत मंता या?

दक्षिणपंथीरा मुन्ने रेंडु हर्रिंग मंतांगः उंदी तम्मा तोका रेंडासी कालकु नडमा तासिसी तम्मा गलितंग सुधरे कीयाना। दूसरा विरोध जारी तासना अनितम्मा विनाश तुन न्योता हियाना। महान दक्षिणपंथीर मीटु इदिना लोप्पा बाता चुने किया परितिर इंदानदु उचुन जोम काजे पहल मीवा कैदे मंता।

मना देश लोप्पा पूंजीपति वर्ग ओसो पूंजीवादी बुद्धिजीविरा राजनीतिक रूप ते ईमानदार लेवेके बेईमान मंदाना ओसो बेस लेवेके गलत ता जांच कीयाना बचोनो परीक्षांग मंतांग। मुख्य पोल्लो ओरु समाजवाद निज्जमे तत्ताला आल्संतोरे, आल्सोर अनि निज्जमे कम्युनिस्ट पार्टी ता नेतृत्व स्वीकार कींतोरे, कीवोर इंजी हूडनाद मंता। इव रेंडासी पोल्लो नल ओरु वेल्ले मुन्ने सहमत आतोर मति इंजे उचुन मुल तम्मा किरिया तल पेरके गुच्चला आल्सा मंतोर, इद्रम कीयाना अनुमति हिल्ले। ओरु इव रेंडु पोल्लोंग स्वीकार कीवेके चीन लोक गणराज्य लोप्पा ओरा काजे बदे जागा हिल्ले। मीटु पश्चिमी दुनिया (इदिन आजाद दुनिया वेने इंतोर) ता आदर्श तल प्रेरित आसी मंतिर, मीटु अगाने हत्तेके बेस!

इचोन प्रतिक्रियावादी ओसो जहरीला बयान कुन अखबार लोप्पा प्रकाशित कीयाना अनुमति बारांकु हीताद मंता? बारांकु इत्तेके जनता तुन इव जहरीला रोंडा ओसो नुकसान दायक गैस कुना बारे ते उचुन जानकारी दोरकिंता अनि अदु इविन तेहकसी वाटिंता।

“मीटु इद पोल्लो मुन्ने बारांकु वेहविर?” माटु वेल्ले मुन्ने सब्बे जहरीला रोंडा तुन तेहकसी वाटना इंजी वेहताद हिल्ले।

“मीटु जनता तुन वामपंथी, मध्यवर्ती ओसो दक्षिणपंथी लोकुरा लोप्पा विभाजित कींतोम, इद असल परिस्थिति ता उल्टा हिल्ले या?” रोंडा वेने मोडियवा मंदाना कुदरी (उस्का) तुन विडचसी जनता मंदाना जागा अनिवार्य रूप ते वामपंथी, मध्यवर्ती ओसो दक्षिणपंथी लोकुरा संगे

बटेमासी मंता अनि दस हजार साल पेरके वेने इद्रमे मंदिता। इद असल परिस्थिति तुकू उल्टा हिल्ले या? इद विभाजन संगे जनता लोकुरा जांच-पड़ताल कियाला मार्गदर्शन दोरकिंता अनि मध्यवर्ती तत्व कुन मना पक्ष ते कीयाना अनि दक्षिणपंथिर किन अलगाव ते वाटना हल्को आंता।

“दक्षिणपंथिर किन तम्मा पक्ष ते बारांकु कीतोम?” माटु इदिना कोशिश कीतोम। मति अविन मना पक्ष ते कीयाना बस्के एवनल ओरु अलगाव ते अरतास्केने संभव आंता। इंजे ओरु बगड़ी कोडा ते उदसी मंतोर अनि कम्युनिस्ट पार्टी तुन खत्म किया मंतोर, इद्रम ता परिस्थिति पोरो काबू बद्रम किया परितोम? अलगाव संगे ओरा लोप्पा विभाजन पुट्टिता अनि माटू दक्षिणपंथीरा नडमा विभाजन पुट्टी कीयाना। माटु शुरू तेने जनता तुन वामपंथी, मध्यवर्ती ओसो दक्षिणपंथी लोकुरा लोप्पा इत्तेके प्रगतिशील, मध्यम ओसो पेरके अरता लोकुरा लेक्का तूसना; इद पूनाद आयो, सिर्फ उचुन लोकुरा सुरता तासना ताकत कमजोर मंदिता।

मीटु पूरा ताकत वाटसी लोकुरा “खबर” एता मंतिरा? इद दक्षिणपंथिर बद्रम ता व्यवहार कींतोर इंदाना पोरो आधार आसी मंता। माटु जहरीला रोंडा तुन तेहकसी वाटना, इत्तेके विचारधारात्मक जहरीला रोंडा तुन तेहकसी वाटना। लोकुरा “पता” कीयाना दूसरा पोल्लो। बोरे वेने बस्के एवनल “गंभीर रूप ते कानून ता उल्लंघन” कीवोर अस्के एवनल ओना “पता” एतमूडायो। “गंभीर रूप ता कानून ता उल्लंघन” कीयाना इत्तेके? इत्तेके बारबार चेतावनी हीतेके वेने पुंजी-पुंजी अपराध कींताकु राज्य ओसो जनता ना हित कुन वेल्ले नुकसान आंता। साधारण गलतिंग कीयाना लोकुरा पोरो बीमार किन बचे कियाला ओना बीमारी ता इलाज कीयाना सिद्धांत लागू कीयाना। इद पार्टी लोप्पा ओसो बाहर रेंडासी जागा लागू कीयाना सही तरीका आंदू। “खबर” एतना इत्तेके वेने बीमार किन इलाज कियाला काजे बीमारी ता इलाज कीयाना।

शुद्धिकरण काम पूरा कियाला पार्टी तुन बचोन टाईम लागियर? घटनाचक्र वेल्ले स्पीड आया मंतांग अनि पार्टी ओसो जनता नडमा ता संबंधकु जल्दिए सुधरेमांतांग। इद काम उचुन जागा ने उचुक हप्तांग लोप्पा

उचुन जागा ने उचुक महीनांग लोप्पा ओसो उचुन जागा ने (उदाहरण तुकू नहाकुना इलाकांग लोप्पा) लगभग उंदी साल लोप्पा पूरा आंता। मति मार्क्सवाद ता अध्ययन कीयाना ओसो विचारधारात्मक स्तर बेरसी कियाला वेल्ले टाईम लागियर।

पूजीपति वर्ग ओसो बुद्धिजीविरा संगे मना एकता ओसो मना संघर्ष ता अस्तित्व वेल्ले जोम ताकिंता। कम्युनिस्ट पार्टी लोप्पा शुद्धिकरण आंदोलन बुनियादी रूप ते मारतास्के माटु जनवादी पार्टिंग ओसो समाज ता विभिन्न व्यवसाय कुना लोकुर वेने तम्मा-तम्मा शुद्धिकरण कीयाना। इद्रम कीतेके विकास ता रफ्तार बेरसिंता अनि मुट्टोमेंड लोकुर दक्षिणपंथी लोकुर किन अलगाव ते वाटना हल्को आंता। इंजे पार्टी तुकू बाहर ता लोकुर मना शुद्धिकरण लोप्पा मना मदद किया मंतोर। उचुन जोम पेरके माटु ओरा ओरा शुद्धिकरण लोप्पा ओरा मदद कीतोमा इद्रम आपसी मदद संगे कमजोरिंग दूर कियमूडायर इत्तेके अदिना विपरीत तत्व लोप्पा, उंदी बेसता बदलाव आयर। जनता माटु इद्रमे कीयाना इंजी आशा कींता, माटु अदिना आशा पूरा कीयाना।

चीनी कम्युनिस्ट पार्टी पूरा चीनी जनता ना नेतृत्व केंद्र आंदू 25 मई 1957

मीवा इद कांग्रेस वेल्ले सफल आता। मीटु एकताबद्ध आंतिर अनि पूरा चीन ता नौजवान लोरा नेतृत्व-केंद्र बनेमांतिर इंजी आशा कीताना।

चीनी कम्युनिस्ट पार्टी पूरा चीनी जनता ना नेतृत्व केंद्र आंदू। इद केंद्र लेवा समाजवादी काम पूरा आया परवो।

मीवा इद कांग्रेस एकता ता कांग्रेस मत्ता, इदिना पूरा चीन ता नौजवान लोरा पोरो प्रभाव अरिंता। नन्ना मीकिन बधाई हींतांन।

कामरेड्स, उंदी आयमूट अनि दृढता ओसो साहस संगे समाजवाद ता महान काम काजे संघर्ष कीमुटा। समाजवाद संगे कलियवा हर पोल्लो ओसो काम गलत मंदिंता।

चीनी नव जनवादी नौजवान संघ ता तीसरी राष्ट्रीय कांग्रेस ता सब्बे डेलीगेट लोरा संगे मुलाकात कीयानास्के पेश कित्ता पोल्लो।

दक्षिणपंथीरा तीव्र हमला ता मुहतोड़ जवाब हियाला काजे मना ताकत उंदीकट कीयाना⁵³

8 जून 1957

प्रांतीय, म्युनिसिपल स्तर ता संगठन, ओसो कालेज, विद्यालय कुना लोप्पा खुला रायपेश कियाला काजे लगभग 15 दिव्यंग हालिंतांग। प्रतिक्रियावादी तत्व तीव्र हमला कितोर। पार्टी ओसो नौजवान संघ ता सदस्य लोरा लोप्पा उचुन मुल दुलमुल मत्तोर ओरु माकिन विड़चसी ओरा बगिल हंजी कलियतोर लेवेके दायला आल्सा मंतोर। पार्टी ओसो नौजवान संघ ता व्यापक सदस्य लोरा संगे सक्रिय ओसो मध्यवर्ती तत्व ओरा मुकाबला कियाला मैदान ते रैयतोर। बेहरा अक्षर वाले पोस्टर कुन हथियार लेक्का इस्तेमाल कीसोरें रेंडासी पक्ष संघर्ष ताकनास्के अनुभव दोरकी किया मंतंग अनि अद किस्स लोप्पा तपेमाया मंतांग। माटु परिशान आयना जरूरत हिल्ले, बारांकु इत्तेके प्रतिक्रियावादी तत्व कुना संख्या सिर्फ उचुने प्रतिशत मंता अनि वेल्ले बुद्धि हिल्ला तत्व कुना संख्या उंदी प्रतिशत तुकू ज्यादा हिल्ले। इंजे मोयोल गुडरूम आतदिनकु वेरियनायो। प्रतिक्रियावादी तत्व तम्मा संगठन ओसो स्कूल-कालेज तल बाहर पेसिसी कारखाना लोप्पा ओसो बाकी स्कूल-कालेज ते कार्रवाईंग कियाला दायनूर; ओरकिन रोमी कियाला काजे ठोस निर्णय एतना। कारखाना लोप्पा मुख्य कार्यकर्ता लोर ओसो अनुभवी मजदूर लोरा मीटिंग केयना अनि ओरकिन लब्बड़ पूंजीपति, लब्बड़ बुद्धिजीवी ओसो समाज लोप्पा मत्ता प्रतिक्रियावादी तत्व मजदूर वर्ग ओसो कम्युनिस्ट पार्टी पोरो वेल्ले

⁵³चीनी कम्युनिस्ट पार्टी ता केंद्रीय कमेटी काजे तैयार कित्ता उंदी पार्टी निर्देश ता मसौदा।

बेय्यल लेक्का हमला किया मंतोर ओसो मजदूर वर्ग ता नेतृत्व वाले राजसत्ता ता तख्ता पलट कीयाना कोशिश किया मंतोर, अदिनके सतर्क मंदाना अनि ओरा धोखा ते वायनायो इंजी समझे कीयाना। जनता तुन भड़के कीयाना कार्रवाईंग कुन रोमी कीयाना। सड़क ता गूडी पोरो वाटता प्रतिक्रियावादी पोस्टर कुन हीकसी वाटला काजे जनता तुन गोलबंद कीयाना। कारखाना ता मजदूर लोरा काजे पूरा परिस्थिति तुन स्पष्ट रूप ते समझेमायना अनि बदे गड़बड़ कियवा मंदना जरूरी मंता। इद्रम कीयानास्के तम्मा कल्याण-कार्य ओसो वेतन लेक्कटविना संबंधित पोल्लोंग कियवा उंदी आसी तम्मा कार्रवाईंग कुन प्रतिक्रियावाद खिलाफ केंद्रित कीयाना।

जनवादी पार्टिंग लोप्पा मत्ता प्रतिक्रियावादी तत्व ना बेय्यल लेक्कटा हमलांग पोरो ध्यान हियाना। इव पार्टिंग लोप्पाटल हर पार्टी खुद तम्मा गोष्ठी केयला काजे प्रेरित कीयाना (ताना लोप्पा वामपंथी, मध्यवर्ती ओसो दक्षिणपंथी तत्व शामिल मंदाना) ताना लोप्पा सकारात्मक ओसो नकारात्मक रेंडासी रकम ता राय पेश कीयाना अनि गोष्ठी लोप्पा आता वाद-विवाद ता रिपोर्ट तैयार कियाला काजे संवाददाता लोर किन लोहना। माटु वेल्ले सतर्कता ते वामपंथी ओसो मध्यवर्ती तत्व कुन गोष्ठी ते वड़कला ओसो दक्षिणपंथिरा पोरो प्रत्याक्रमण कियाला काजे प्रोत्साहन कीयाना। इद उंदी वेल्ले कारगर तरीका आंदू। हर जागा ते पार्टी-अखबार कु दर्जनों लेख तैयार तासना अनि दक्षिणपंथिरा हमला ता ज्वार ते उतार वायनास्के रोज प्रकाशित कीयाना। मध्यवर्ती ओसो वामपंथी तत्व कुन अखबार काजे लेख रासना उद्देश्य ते संगठित कीयाना पोरो ध्यान हियाना। मति पार्टी-अखबार कु ज्वार ते उतार वायना मुन्ने सकारात्मक दृष्टिकोण प्रकट कीयाना लेख कुना संख्या सीमित तासना (मध्यवर्ती तत्व रास्ता लेख प्रकाशित किया परितोर) दक्षिणपंथिरा वाटता बेहरा अक्षर वाले पास्टर कुना खंडन कीयाना जनता तुन खुला छूट हियाना। कालेज ओसो विश्वविद्यालय कुना लोप्पा गोष्ठींग केयसी प्रोफेसर लोरिन पार्टी ता बारे ते तम्मा राय पेश कियाला हियाना, दक्षिणपंथिरा किन परताचोन तम्मा जहर

उडियला पूरा मौका हियाना, अनि अखबार कुना लोप्पा प्रकाशित कीयाना। प्रोफेसर लोर किन विवाद कियाला हियाना अनि विद्यार्थिर् किन आजादी ते राय हियाला हियाना। प्रतिक्रियावादी प्रोफेसर, लेक्चरर, सहायक लेक्चरर ओसो विद्यार्थिर् किन तम्मा पूरा जहर उडियला हियाना अनि पेरके-मुन्ने आयवा लेवा तम्मा पोल्लो वेहाला हियाना। ओरु सबसे बेसता शिक्षक मंदिंतोर। सही मौका वात्तास्के तुरंत पार्टी ओसो नौजवान संघ ता सदस्य लोरा अलग-अलग मीटिंग केयसी ओरा लोप्पा आलोचनांग ना श्रेणी-विभाजन कीयाना; रचनात्मक आलोचनांग लागू कीसी गलतिंग, कमजोरिंग दूर कीयाना; मति विध्वंसकारी आलोचनांग ना खंडन कीयाना। संगेने उचुक गैर-पार्टी लोकर किन भाषण हियाला ओसो सही दृष्टिकोण प्रकट कियाला काजे संगठित कीयाना। ताना पेरके पार्टी ता वरोर जिम्मेदार कार्यकर्ता (जनता लोप्पा सम्मानित) सारांश तेंडना भाषण हियाना इदु (ताना लोप्पा विश्लेषण हीताद मंदाना अनि खंडन किया परवा लेक्का मंदाना) वातावरण तुन पूरा बदले किया परना लेक्का मंदाना। परिस्थिति अनुकूल मत्तेके इद प्रक्रिया काजे लगभग उंदी महीना हालिंता, अस्के माटु पार्टी लोप्पा शुद्धिकरण शुरू किया परिंतोम, अदिन “सलवा-सलवा वडियु ओसो जमने-जमने वायना मुसुर” लेक्का ताकी कीयाना।

इद उंदी महान राजनीतिक ओसो विचारधारात्मक संघर्ष आंदू। सिर्फ इदिन ताकी कीसीए मना पार्टी ता पहल कैदे तासा परिंता, तन्ना कार्यकर्ता लोर किन फौलाद बने किया परिंता, जनता तुन शिक्षित किया परिंता, प्रतिक्रियावादीर किन अलगाव ते वाटा परिंता अनि बचाव ता परिस्थिति ते एव्वा परिंता। हत्ता सात साल लोप्पा पहल कैदे मत्ता लेक्का मत्तेकाई इदु सिर्फ उचुने निज्जम आंदू। प्रतिक्रियावादीर कीयाना आत्मसमर्पण उंदी झूटा आत्मसमर्पण मत्ता अनि मध्यवर्ती तत्व लोप्पा वेने वेल्ले लोकर खुद इदिन स्वीकार किताद हिल्ले। इंजे परिस्थिति बदलेमाया मंता। हूडतेके माटु बचाव कीसोर मत्ता लेक्का दिसिंता मति असल ते माटु पहल कैदे पोया मंतोमा अद्रमासी माटु वेल्ले बेस शुद्धिकरण किया मंतोमा प्रतिक्रियावादिरा कैदे (बेय्यल आतोर अनि वेल्ले बेय्यल लेक्का

कार्वाइंग किया मंतोर) सिर्फ हूडला काजे पहल मंता मति असल ते ओरु वेल्ले मुन्ने हतोर अद्रमासी जनता तल अलग-थलग आतोर अनि तम्मा बचाव किया मंतोर। अलग-अलग जागा ना परिस्थिति अलग-अलग मत्तांकु मीटु मीवा कार्यनीति ओसो कार्य-विभाजन लोप्पा लचीलापन तत्ता परितिर।

संक्षिप्त ते इद वेल्ले बेहरा संग्राम आंदू (संग्राम-क्षेत्र पार्टी लोप्पा ओसो बाहर रेंडासी जागा ने) मंता। माटु इद संग्राम लोप्पा जीत दोरकी कियवेके समाजवादी निर्माण कीयाना संभव आयो आयर अनि “हंगरी घटना” आयना वेने उचुन खतरा आंता। इंजे पहलकदमी कैदे तासिसी माटु शुद्धिकरण संगे पुंजी-पुंजी उंदी संभव मत्ता “हंगरी घटना” तुन केयतोम, मति अदिन विभिन्न संगठन कुन, स्कूल-कालेज कुना वेल्ले सुडला-सुडला “हंगरी घटनांग” लोप्पा खंडित कितोर अनि अलग-अलग हल कीतोमा। इदे आयवा पार्टी ओसो सरकार साधारण रूप ते तितर-बितर आताद हिल्ले, सिर्फ उंदी सुडला हिस्साए इद्रम आता (उंदी सुडला हिस्सा कूतिस मत्ता गज्जी लेक्का ओरता अदिना कूलुम पोंगा मंता)। इद वेल्ले फायदा तद मंता। मना समाज लोप्पा प्रतिक्रियावादीर मंतोर, मध्यवर्ती तत्व कुन इदिनकु मुन्ने बस्केने इद्रम ता सबक दोरकताद हिल्ले, मना पार्टी मुन्ने बस्केने इद्रम ता परीक्षा हीताद हिल्ले, अदिन काजे बस्केनाई गडबड आयना अनिवार्य मंता।

नेटा देश लोप्पा वेल्ले अनुकूल परिस्थिति मंता; मजदूर-किसान, पार्टी, सरकार, सेना ओसो ज्यादातर विद्यार्थीर दृढ़ता ते मना पक्ष ते मंतोर। अंतरराष्ट्रीय परिस्थिति वेल्ले बेस मंता अनि अमेरिका तुन वेल्ले कठिन परिस्थिति ता सामना किया लागा मंता।

“वन ह्वेइ पाओ” ना पूजीवादी दिशा ता खंडन कीयाना⁵⁴

1 जुलाई 1957

14 जून तल, मना सम्पादकीय विभाग “उंदी कालम एवनल ‘वन ह्वेइ पाओ’ लागू कित्ता पूजीवादी दिशा” हेडिंग वाले लेख प्रकाशित कित्ता, ‘वन ह्वेइ पाओ’ ओसो ‘क्वांगमिंग दैनिक’ इद सवाल ता बारे ते उचुन आत्मालोचना कित्ता।

‘क्वांगमिंग दैनिक’ ता कर्मचारि बचोनो मीटिंग केयतोर अनि अदिना निर्देशक चांग पो-च्युन ओसो प्रधान सम्पादक हू आन-फिंग ना गलत दिशा ता कड़ी आलोचना कित्ता। इद आलोचना वेल्ले स्पष्ट शब्द ते किताद मत्ता, इंजे इद दैनिक ता दृष्टिबिंदु लोप्पा बुनियादी बदलाव आता, चांग पो-च्युन ओसो हू आन-फिंग ना कम्युनिस्ट पार्टी-विरोधी, जन-विरोधी ओसो समाजवाद-विरोधी पूजीवादी कार्यदिशा ता जागा ते क्रांतिकारी समाजवादी कार्यदिशा पोयताद मंता। अद्रमासी, “क्वांगमिंग दैनिक” ओसो उंदी बेरा पाठक लोरा विश्वास जीड़ता अनि अदिन पढ़ेमातेके उंदी समाजवादी अखबार लेक्का मंता। सिर्फ अदिना तैयार कीयाना तकनीक लोप्पा उचुन सुधार कीयाना जरूरत मंता। सिर्फ अदिन तैयार कीयाना तकनीक ओसो अदिना राजनीतिक दृष्टिकोण रेंडु बिल्कुल अलग-अलग वस्तु आंदू। “क्वांगमिंग दैनिक” तुन तैयार कीयाना तकनीक लोप्पा कमी मत्तेके वेने अदिना राजनीतिक दृष्टिकोण सही मंता। तकनीक तुन सुधरे कीयाना पूरा संभव मंता, तकनीक बदलेमातेके अखबार उंदी

⁵⁴ ‘रनमिन रपाओ’(जन दैनिक) काजे रास्ता उंदी सम्पादकीय

पूना रूप एतित्ता अनि अदिन हूडसी पाठक लोर खुश आयनूर। मति इद काम वेल्ले कठिन मंता; मावा अखबार वेल्ले मुन्ने इद काम तुन सुधरे कीयाना संकल्प कित्ता अनि सुधार वेने आता, मति इंजे अचोन सफलता दोरकताद हिल्ले।

‘वन ह्वेइ पाओ’ तन्ना आत्मालोचना प्रकाशित कित्ता, अद्रमासी अदिना दिशा बदलेमाता। संगेने अदु सकारात्मक दिशा तुन तोहना वेल्ले समाचार ओसो लेख वेने छापे कित्ता, इद उंदी बेसता पोल्लो मंता। मति उचुन कमजोरिंग वेने मंतांग। रंगमंच पोरो नाटक कीयाना उचुन एक्टर लोर उचुन गलत व्यवहार वाले रोल वेल्ले बेस किया परितोर मति बेसता व्यवहार वाले रोल बस्केने किया परवोर आंतोर अनि इद रोल ते ओरा रोल पोरो-पोरो मंदिता। इदिना विपरीत, अमल कीयाना ओरा काजे वेल्ले कठिन मंता। पूर्व ता वडिय पश्चिम वडिय पोरो हावी आंता लेवेके पश्चिम ता वडिय पूर्व ता वडिय पोरो हावी आंता; रेंडासी कार्य-दिशांग ना सवाल बारे ते समझौता कीयाना संभव हिल्ले। वेल्ले सम्पादक ओसो संवाददाता लोर किन पाडना घिसिपिटी हरीं ते ताकना आदत आता, ओरा काजे अचानक बदलेमायना हल्को हिल्ले। मति ओरकिन जरूर बदलेमाया लागियर, ताना लोप्पा ओरकिन बचोन मुश्किल ओसो तिप्पल आतेकाई बदलेमाया लागियर, बारांकु इत्तेके इद्रम कीयानादे सही मंता। बदलेमायना प्रक्रिया वेल्ले सरल ओसो हल्को मंता इंतोर, अस्के ओरु सिर्फ पारम्पारिक रीत अनुसार इंतोर। इद सब्बे तोरा काजे सही मंता इदिन विडचसियाना। ‘वन ह्वेइ पाओ’ ना सम्पादकीय विभाग संबंधित वेल्ले गंभीर पोल्लो मंता, बारांकु इत्तेके इद अखबार पूंजीवादी दिशा ते कोल्हा कित्तास्के अदिना कमान अद सम्पादकीय विभाग कैदे मत्ता, अदिन काजे अदिना हट्टा ते इंजे वेने वेल्ले बोजा मंता अदिन हल्कोए रेहची वाटमूडायो। इदिनकु पोरो बोरे दूसरा कमांडर वेने मंतोरा? इद आरोप वाटानोर इद सवाल ता जवाब “इंगो” इंजी हींतोर, इदिना विरोध कियानोर “हिल्ले” इंजी जवाब हींतोर; इदे आयवा और कमांडर ना पोरोल वेने वेहताद मंता, ओरु चांग पो-च्युन अनि ल्वो लुंग-ची गठजोड ता सदस्य ल्वो लुंग-ची

आंदुर। वीर इरवुर कमांडर लोरा नडमा फू शी-श्यू पोरोल ता वरोर तीसरा व्यक्ति वेने मत्ता, अदु उंदी सुयोग्य, मेहनती महिला मत्ता अनि 'वन ह्वेइ पाओ' ता पेकिंग ऑफिस ता इनचार्ज मंता। लोकुर ल्वो लंग-ची, फू शी श्यू ओसो 'वन ह्वेइ पाओ' ना सम्पादकीय विभाग इव मूंडासी जनवादी संघ ता दक्षिणपंतिरा कमान ता 'वन ह्वेइ पाओ'ना निर्देशन कीसोर मत्ता अंश ता प्रतिनिधित्व कींतोर इंतोर।

जनवादी संघ सौ विचाराशाखांग ना होइ ओसो शुद्धिकरण आंदोलन ताकनास्के उंदी वेल्ले गलत भूमिका निभे कित्ता। अदु संगठित रूप ते क्रियाशील मत्ता, अदिना उंदी सम्पूर्ण योजना, प्रोग्राम ओसो कार्य-दिशा वेने मंता; वीर मुवुरासी अदिन जनता तल अलग कींतोर अनि कम्युनिस्ट पार्टी, समाजवाद ता विरोध कींतोर। इदे आयवा उंदी मजदूर-किसान जनवादी पार्टी वेने मंता इदु इद्रम ताए भूमिका निभे कींता। इव रेंडासी पार्टिंग वेल्ले बेहरा तूफान वात्तास्के तम्मा असली चेहरा तोहतांगा। तूफान चांग-ल्वो गठजोड़ वेने निल्पी कीतांगा। बाकी पार्टिंग वेने तम्मा-तम्मा भूमिका निभे कीतांग अनि अविना वेने उचुन सदस्य लोर वेल्ले दुष्ट मंतोर। मति ओरा संख्या वेल्ले कम मंता अनि ओरा कमान ता इद अंश वेने अचोन स्पष्ट हिल्ले। जनवादी संघ ओसो मजदूर-किसान जनवादी पार्टी ता आम सदस्य लोरा लोप्पा सब्बे तोर लेवेके ज्यादातर लोकुर इदिना लोप्पा शामिल हिल्ले। असल इत्तेके सिर्फ मुट्टामेंड लोकुर इत्तेके प्रमुख पूंजीवादी दक्षिणपंथी लोकुर तूफान ओसो लहर पैदा कींतोर, गुप्तरूप ते षडयंत्र कींतोर, जनता लोप्पा होंग पुट्टी कींतोर, पोरो ओसो दोड़ ता सब्बे स्तर ता सम्पर्क तासिंतोर, नालुंग बगिल अनुकूल प्रतिक्रिया ता तलाश कीसोर मंतोर; सिर्फ वर्तमान परिस्थिति ता बारे ते हर जागा वेल्ले गडबड आतेके ओरा कैदे सत्ता वाया पर्रिता इंजी आल्सिंतोर, तम्मा इद जबरदस्त स्कीम तुन बद्रमाई पूरा कीयाना ओरा आखरी उद्देश्य मंदिता। इव पार्टिंग ना सदस्य लोरा लोप्पा उचुन मुल तम्मा दिमाग शांत तासनोर ओसो वेल्ले मुल धोखा हीसोर दांतोर अनि सिर्फ मुट्टामेंड लोकुरे दक्षिणपंथी ता केंद्रबिंदू बनेमायनोर मंतोर। वीरु मुट्टामेंड लोकुरे केंद्रबिंदू मत्तांकु वीरा लोप्पा

जोड़तोड़ कीयाना पूरा ताकत मंदिता। इयेंड पूरा वसंत कालम ते चीन ता मोयोल पोरो मोय्योल गुडरूम आता अनि इद संकट ता स्रोत चांग-ल्वो गठजोड़ ते ने परहमूड़ांता।

पत्रकार संघ रेंडु मीटिंग केयता। पहली मीटिंग लोप्पा प्रतिवाद कित्ता अनि दूसरा मीटिंग लोप्पा प्रतिवाद ता प्रतिवाद आता। इव रेंडासी मीटुंग सिर्फ उंदी महीना तुकू उचुन ज्यादा टाईम ते केयताद मत्ता, अद्रमासी चीन ती परिस्थिति लोप्पा बचोन जल्दी बदलाव आता इंजी साबित आता। इव मीटिंग संगे वेल्ले सफलता दोरकता। पहली मीटिंग ताकानास्के, पत्रकारिता लोप्पा प्रतिक्रियावादी पूंजीवादी कार्यदिशा खुद “शहर ता मोयोल पोरो कारियल मोयोल अदिन तहस-नहस कीयाना खतरा पैदा कित्ता” इंजी वेहता। मति इंजे ने आता मीटिंग लोप्पा वातावरण बदले माता, दक्षिणपंथिर इंजे वेने वेल्ले जिद्द संगे प्रतिरोध किया मंतोर, वेल्ले लोकुर सही दिशा परहकतोर इंजी इनमूड़ वेने आंता।

14 जून ते ‘वन ह्वेइ पाओ’ आत्मालोचना कित्तोर अनिकतग0तौ-य. उचुक गलतिंग स्वीकार कित्तोर। आत्मालोचना कीयाना उंदी बेसता पोल्लो माटु इदिना स्वागत कीतोमा मति माटु ‘वन ह्वेइ पाओ’ ना आत्मालोचना सही हिल्ले इंतोमा इव पोल्लो ना स्वरूप बुनियादी हिल्ले। इत्तेके इद अखबार बुनियादी पोल्लोंग ना बारे ते बदे आत्मालोचना कित्ताद हिल्ले। इदिना विपरीत 14 जून ते तन्ना सम्पादकीय लोप्पा तन्ना गलती काजे स्पष्टकीरण पेश कीसोरे इत्ता: “ खुला राय हियाना पार्टी ता नीति तुन माटु उंदी बगिल ओसो गलत समझेमातोमा माटु खुला राय हियाना तुन बदे शर्त लेवा प्रोत्साहन कीतेके शुद्धिकरण आंदोलन लोप्पा पार्टी तुकू मदद आयर इंजी आल्सतोमा सकारात्मक राय ओसो गलत राय कुना खंडन कीयाना आलोचनांग कुन अखबार लोप्पा ज्यादा जागा हियाना खुला राय हियाना प्रक्रिया तुकू बाधा आंता इंजी आल्सतोम”। इद निज्जमा? इद्रम हिल्ले। वसंत ते ‘वन ह्वेइ पाओ’ जनवादी संघ ता केंद्रीय अधिकारिरा लोप्पा कम्युनिस्ट पार्टी-विरोध, जन-विरोधी ओसो समाजवाद-विरोधी नीति पोरो अमल कीसोरे सर्वहारा वर्ग खिलाफ वेल्ले

तीव्र रूप ते हमला कित्ता, इदु कम्युनिस्ट पार्टी ता नीति तुकू खिलाफ मत्ता। अद नीति ता लक्ष्य कम्युनिस्ट पार्टी तुन खत्म कीयाना ओसो हर जागा ते गड़बड़ कीयाना मत्ता, इद्रम कित्ता ओरु खुद कम्युनिस्ट पार्टी ता जागा एता परितोर। इदिन निज्जमे “शुद्धिकरण आंदोलन लोप्पा मदद हियाना” इंदा परितोमा? हिल्ले, इद एकदम गलत, बिल्कुल धोखाबाजी आंदू। उचुन जो काजे उंदी वेने सकारात्मक राय तुन प्रकाशित कियवा मंदाना लेवेके सिर्फ उचुने सकारात्मक राय प्रकाशित कीयाना, गलत राय ता खंडन कीयाना गलत मत्ता या? 8 मई तल 7 जून एवनल कम्युनिस्ट पार्टी ता केंद्रीय कमेटी आदेशानुसार मना अखबार ओसो बाकी सब्बे पार्टी अखबार कु इद्रमे कीतांगा। इदिना उद्देश्य दैत्य-दानव ओसो भूत-प्रेत कुन “खुला राय हियाला” हियाना अ जहरीला रोंडा तुन मोड़ियला हियाना वेल्ले बेरसला हियाना अनि दुनिया लोप्पा इंजे वेने इद्रम ता लब्बड़ ता वस्तुंग मंतांग अनि इंजे अविना सफाई कीयाना पिस्ताए इंजी हूड़सी जनता तुन आश्चर्य आयना लेक्का कीयाना। दूसरा माटा ने कम्युनिस्ट पार्टी मुन्नेटले पूंजीपति वर्ग ओसो सर्वहारा वर्ग नड़मा ता इद वर्ग-संघर्ष अनिवार्य मंता इंजी अंदाजा वाटा मंतोमा। पूंजीपति वर्ग ओसो पूंजीवादी बुद्धिजीविर किन इद संग्राम शुरू कियाला हीताद मंता, उचुन जोम एवनल अखबार लोप्पा सकारात्मक राय प्रकाशित कित्ताद हिल्ले लेवेके वेल्ले कम प्रकाशित कित्ताद मंता, पूंजीवादी प्रतिक्रियावादी दक्षिणपंथिरा बेय्यल लेक्का कीयाना हमला ना जवाब हीताद हिल्ले। शुद्धिकरण आंदोलन ताकसोर मत्ता संगठन, स्कूल-कालेज कुना लोप्पा पार्टी-संगठनकु उचुन जोम एवनल इव बेय्यल लेक्का कीसोर मत्ता हमलांग ना जवाबी हीताद हिल्ले। इद्रम जनता स्पष्ट रूप ते बोर सही ओसो बोर गलत राय हिया मंतोर हूड़ा परिरता अनि इद्रम ताकत बेरसी किया परिरता ओसो मौका दोरकी कीसी हमला ना जवाब हिया परिरता। इद उंदी गुप्त योजना मत्ता इंतोर। माटु इद गुप्त आयवा खुल्ला योजना मत्ता इंतोमा। अद्रमासी माटु दुश्मन तुन मुन्ने ने दैत्य-दानव ओसो भूत-प्रेत कुन वेहच ते वायला हीतास्केने खत्म कियमूडांता, जहरीला रोंडा तुन सिर्फ मोड़ियला हीतास्के

भूमि पोरोटल बाहर वायला हीतास्केने तेहकसी वाटमूडांता इंजी वेहचिंतोमा किसान लोर हर साल बचोनो बेरा भूमि पोरो खनती कीसी रोंडा तेहकसी वाटसिवोरा? तेहकसिता पेरके रोंडा तुन खतु लेक्का इस्तेमाल कियमूडांता। वर्ग-दुश्मन मौका दोरकी कीसी अनिवार्य रूप ते तम्मा असली रूप तेहिंतांगा। राजसत्ता ओसो सम्पत्ति कैदल हत्तास्के ओरु केमेक उदसी मनोर आंतोरा। कम्युनिस्ट पार्टी तम्मा दुश्मन कुन मुन्ने तुकू बचोन चेतावनी हीतेकाई ओसो तम्मा बुनियादी रणनीति खुला वेहतेकाई ओरु हमला कीयाना रोमी कीवोर आयनूर। वर्ग-संघर्ष अनिवार्य मंता। लोकुर इदिन रोमी कियाला आल्सतेक वेने रोमी किया परवोरा। सिर्फ इद परिस्थिति ता सही इस्तेमाल कीसी संघर्ष तुन जीडिह कीयाना। प्रतिक्रियावादी वर्ग-दुश्मन खुद वद्दी(जाली) ते बारांकु फंसे मंता? प्रतिक्रियावादी सामाजिक ग्रुप मत्तांकु ओरु फायदा ता लालत ते वांतोर अनि सर्वहारा वर्ग ता बेसता परिस्थिति तुन लब्बड़ परिस्थिति लेक्का आल्संतोरा। हर जागा ते किस्स वाटतेके मजदूर ओसो किसान लोर किन भडके कियमूडायर, विद्यार्थि रास्ना बेहरा अकसर वाले पोस्टर कुन विद्यालय कुन कब्जा कीयाना काम हल्को आयर, खुला राय हीतेके उंदी विस्फोटक परिस्थिति पुटियर, हर जागा तुरंत गड़बड़ आयर अनि कम्युनिस्ट पार्टी तुरंत कमजोर आयर-इद चांग पो-च्युन 6 जून पेकिंग ते 6 प्रोफेसर लोरा मुन्ने कित्ता परिस्थिति ता मूल्यांक आंदू। इद फायदा ता लालत तले कानाल आता लेक्का हिल्ले या? “फायदा” इत्तेके सत्ताधिकार कब्जा कीयाना। ओरगा अखबार कम हिल्ले, अविना लोप्पा उंदी ‘वन ह्वेइ पाओ’ वेने मंता। इद अखबार पोरो वेहता प्रतिक्रियावादी नीति पोरो अमल कित्ता मति 14 जून ते अदु जनता तुन धोखा हियाना कोशिश कित्ता अनि बेस काम कीयाना नाटक कित्ता। अदु “इद गलत समझदारी ता कारण ते मना दिमाग ते पत्रकारिता ता बारे ते पूंजीवादी विचार कुना अवशेष मंतांग” इता। हिल्ले इगा “अवेशेष” कुना जागा ते “भरमार” मंदाना मत्ता। बचोनो महिनांग एवनल इद अखबार प्रतिक्रायवादिरा मुखपत्र मत्ता वीरु सर्वहारा वर्ग पोरो बेय्यल लेक्का

आक्रमण कितोर, इदु तम्मा दिशा तुन कम्युनिस्ट पार्टी, जनता ओसो समाजवाद ता विरोध कीयाना दिशा इत्तेके पूंजीवादी दिशा लेक्का बदले कित्ता (इव सब्बे कियाला काजे पूंजीवादी विचार कुना अवशेष मंदाना हालिंता या? इद बद्रम ता तर्क आंदु? उंदी विशिष्ट स्थापना पोरो आधार आसी सर्वव्यापी निष्कर्ष तेंडना) इद 'वन ह्वेइ पाओ' ना तर्क आंदू 'वन ह्वेइ पाओ' तथ्य कुना विपरीत हंदी हिल्ला प्रतिक्रियावादी रिपोर्ट कुन प्रकाशित कितोर, हंदी हिल्ला प्रतिक्रियावादीरा पोल्लोंग छापे कितोर, सर्वहारा वर्ग पोरो हमला कियाला काजे, साधन लेक्का बेहरा स्तर ते प्रतिक्रियावादी मेटरियल ता इस्तेमाल कितोर मति इव सब्बे पोल्लोंग काजे नेंडु एवनल तन्ना आलोचना कियाला तैयार हिल्लेरा 'शिन मिन पाओ' ना परिस्थिति अलग मंता। ओरु सही तरीका ते वेल्ले बेरा आत्मालोचना कितोर। 'शिन मिन पाओ' ना गलतिंग 'वन ह्वेइ पाओ' ना गलतिंग लेक्का गंभीर हिल्ला मत्तांग, ओनकिन गलतिंग समझेमातास्के ओरु वेल्ले बेस तन्ना गलतिंग सुधरे कीयाना शुरू कितोर। अद्रमासी इद अखबार ता जिम्मेदार मत्ता लोकर ओसो संवाददाता लोर जनता ना काम पोरो जिम्मेदार मत्ता लेक्का आल्सोतर अनि पाठक लोरा कोंडा ते इद अखबार तन्ना संकटपूर्ण परिस्थिति तुन दूर किया मंता। 'वन ह्वेइ पाओ' ना जिम्मेदारी ता विचार बचोन जेक हत्ता? ओरु 'शिन मिन पाओ' ना लेक्का बस्के कियानूर? कर्जा चुकता कीयाना जरूरी मंता, 'वन ह्वेइ पाओ' बस्के कर्जा निहतना शुरू कियानूर? 'शिन मिन पाओ' आत्मालोचना कीसी 'वन ह्वेइ पाओ' ना काजे वेल्ले कठिन सवाल निल्पी कितोर अनि पाठक लोर 'वन ह्वेइ पाओ' बस्के 'शिन मिन पाओ' ना बराबर कींतोर? इंजी पूछेमाया मंतोर। 'वन ह्वेइ पाओ' ना परिस्थिति इंजे वेल्ले कठिन परिस्थिति ते मंता। बस्के एवनल 'शिन मिन पाओ' आत्मालोचना कीवोर अस्के एवनल 'वन ह्वेइ पाओ'ना उचुन दिया काम ताकियर मति 'शिन मिन पाओ' ना आत्मालोचना पेरेक ओरा परिस्थिति मुश्किल ते अरिंता। ईमानदारी ते 'शिन मिन पाओ' ना हरीं पोयसी ताकतेके उंदी कठिन परिस्थिति अनुकूल परिस्थिति ते बदलेमाया परिंता।

इंजे माटु ओसो उंदी बेरा “पूजीवादी दक्षिणपंथी” शब्द ता चर्चा कियाला आल्सा मंतोमा पूजीवादी दक्षिणपंथी पोरो वेहता पूजीवादी प्रतिक्रियावादिर आंदुरा वीरु कम्युनिस्ट पार्टी, जनता ओसो समाजवाद ता विरोध कींतोर; इद परिभाषा वैज्ञानिक ओसो वास्तविक मंता। सिर्फ मुट्टामेंड लोकुर जनवादी पार्टिंग लोप्पा, बुद्धिजीविर, पूंजीपतिर, विद्यार्थिरा नडमा ओसो कम्युनिस्ट पार्टी ओसो नौजवान संघ लोप्पा मंतोर, इंजे तूफान लोप्पा पोरो पेस्तोर। ओरा संख्या वेल्ले कम मंता, मति जनवादी पार्टिंग लोप्पा खासकर उचुन जनवादी पार्टिंग लोप्पा ओरा ताकत वेल्ले मंता अदिन काजे अविना नजरंदाज कीयानायो। वीरु सिर्फ वडकनाए आयवा काम कीसी वेने साबित कितोर; वीरु अपराधीर आंदुरा “वडकानोर किन दोषी” मानेमायनायो इंदाना उसूल वीरा पोरो लागू आयो। वीरु सिर्फ वडकानोरे आयवा कियानोर वेने आंदुरा। वीरकिन कानूनी सजा हियानायो या? इंजे इदिना जरूरत हिल्ला लेक्का मंता। बारंकु इत्तेके जनता ना राज्य सुरक्षित मंता अनि इदिना लोप्पटल बचोनो लोकुर सम्माननीय लोकुर वेने मंतोर। ओरा संगे नरमी व्यवहार कीयाना आंता, सजा हियाना जरूरत हिल्ले। साधारण रूप ते ओरकिन “दक्षिणपंथी” इत्तेके वेन हालिंता, प्रतिक्रियावादीर इंदाना जरूरत हिल्ले। इत्तेके सिर्फ बार-बार चेतावनी हीतेके वेने तम्मा गलतिंग सुधरे कियाला इनकार कींतोर अनि कानून ता उल्लंघन कीसी लगातार तोडफोड जारी तासिंतोर; इद्रम तोर किन सजा हियाना जरूरी मंता। वायना कालम ते गलतिंग कीयाना तुकू बचे मायला काजे पाडना गलतिंग नल सबक एतना अनि बीमार किन बीमारी तल बचे कियाला काजे ओना बीमारी ता इलाज कीयाना, नाकारात्मक तत्व कुन सकारात्मक तत्व लेक्का बदले कीयाना उसूल दक्षिणपंथिरा पोरो वेने लागू आंता। इदे आयवा दूसरा रकम ता दक्षिणपंथीर वेने मंतोर, ओरु सिर्फ वडकिंतोर, काम कीवोर आंतोर। ओरा वडकना ओसो पोरो वेहता दक्षिणपंथिरा संगे कलियंता, मति ओरु बदे विध्वंसकारी कार्रवाईंग लोप्पा शामिल आयोर। इद्रम तोरा संगे वेने नरम व्यवहार कीयाना। ओरा गलत पोल्लोंग कुन छूट हियवा लेवा खंडन कीयाना, मति

ओरकिन तम्मा राय हियाला अनुमति हियाना। पोरो वेहता विभिन्न रकम ता दक्षिणपंथीर किन वेने वड़कला आजादी हीताद मंता। उंदी महान, सुरक्षित देश लोप्पा कम संख्या ते इद्रम तोर किन मंडाला हीतेके बाताले आयो, मति व्यापक जनता तुन तम्मा गलतिंग समझेमाताद मंता। दक्षिणपंथीर माकिन तम्मा नकारात्मक उदाहरण संगे शिक्षित कींतोर इंजी समझेमायना जरूरी मंता। इत्तेके जहरीला रोंडा वेने उपयोगी साबित आया परिंता। अदु उपयोगी साबित आंता बारांकु इत्तेके अदु जहरीला मंता।

कम्युनिस्ट पार्टी लोप्पा शुद्धिकरण काम जारी मंता अनि जनवादी पार्टींग वेने तम्मा-तम्मा शुद्धिकरण काम शुरू कींतांग। नेंडु दक्षिणपंथिरा बेय्यल लेक्का हमलांग कुन जनता हारे कीसीता, शुद्धिकरण आंदोलन सुचारू रूप ते ताकी किया परमूडांता।

पूँजीवादी दक्षिणपंथी हमला ना मुहंतोड़ जवाब हीमटु⁵⁵

9 जुलाई 1957

मार्च ते इगा नन्ना पार्टी ता उचुन कार्यकर्ता लोर किन संबोधित किताना अस्केटल सौ दिव्यंग आतांग। इव सौ दिव्यंग लोप्पा परिस्थिति ते वेल्ले बदलाव आता। माटु पूँजीवादी दक्षिणपंथिरा संगे टक्कर एतितोर अनि जनता ना राजनीतिक चेतना स्तर बेरसता, असल ते वेल्ले पोरो तेदता। अस्के वेने माटु इद परिस्थिति ता अंदाजा वाटसी मत्तोमा उदाहाण तुकू नन्ना अस्के लोकर आलोचना कीयाना शुरू कियानूर लेवेके, किस्स वाटना शुरू कियानूर अस्के नोनता इंजी वेहेताना। माटु मना कप्पार तोला तुन मजबूत कीसी सहेमायाना इंजी वेने वेहेताना। मना कप्पार तोला तुन मजबूत कीसी सहेमायाना इत्तेके मीटु नावा आलोचना कितास्के नन्ना नावा कप्पार तोला तुन मजबूत कीसी उचुन जोम केंजकाना। ताना पेरके नन्ना मीवा पोल्लो ना विश्लेषण कियकान अनि जवाब हियाकान अनि सही आलोचना तुन स्वीकार कियकान अनि गलत ता आलोचना कियकान।

मना लोप्पा चीन लोप्पा आई लेवेके दुनिया लोप्पा लेवेके बदे दूसरा जागा ते ज्यादातर लोकर बेसतोर मंतोर इंजी विश्वास मंदाना। ज्यादातर लोकर इत्तेके 51 प्रतिशत आयवा 90 प्रतिशत तुकू वेने ज्यादा लोकर। मना देश ता 60 करोड़ जनता लोप्पा मजदूर, किसान मावा मुख्य ताकत आंदुर। कम्युनिस्ट पार्टी, नौजवान संघ, जनवादी पार्टिंग लोप्पा ओसो विद्यार्थि, बुद्धिजीविरा नडमा ज्यादातर लोकर जरूर बेसतोर मंतोर। ओरु

⁵⁵ शांघाई ते आता उंदी कार्यकर्ता-सम्मेलन लोप्पा हीता भाषणा

जीवा कियानोर, ईमानदार मंतोर, धूर्त ओसो गलत उद्देश्य वालेर हिल्लेरे इंजी माटु स्वीकार कीयाना। हर राजनीतिक आंदोलन तल साबित आता। वर्तमान आंदोलन लोप्पा विद्यार्थिराए उदाहरण हूडाटू। पेकिंग विश्वविद्यालय लोप्पा सात हजार तुकू ज्यादा विद्यार्थिर मंतोर, मति दक्षिणपंथीर ताना लोप्पा सिर्फ उंदी-रेंडु लेवेके मूंड प्रतिशते मंतोर। इद उंदी-रेंडु लेवेके मूंड प्रतिशत इत्तेके बाताल? इदिना अर्थ आधार-स्तम्भ ता भूमिका निभे कीयाना कट्टरपंथी तत्व हर बेरा मौका दोरकतास्के तल्ला पोरो तेहिंता, अदु पचास तुकू ज्यादा हिल्ले। बाकी उंदी-रेंडु प्रतिशत लोकर ओरा चारो लेक्का मंतोर।

किस्स पोत्ति कीयाना इगा वेने फैले कीयाना हल्को काम हिल्ले। इंजे नन्ना इद शहर ता उचुन कामरेड्स इगा अचोन किस्स पोत्ती किताद हिल्ले इंजी आल्सा मंतोर इंजी केंजताना नावा हिसाब ते शांघाई लोप्पा किस्स लगभग सही मात्रा तेने पोत्तिता, मति अचोन रग-रग आताद हिल्ले। मीटु इदिना प्रभाव ता अंदाजा वाटा परसी मत्तेके अदिन पोत्ति किया परविरा? जहरीला रोंडा तुन मोडियला हियाना, दैत्य, दानव कुन पुट्टला हियाना। अदिनकु बारांकु वेरियंतिर? मार्च ते वेने नन्ना अदिनकु वेरियना जरूरत हिल्ले इंताना। मति मना पार्टी लोप्पा उचुन कामरेड्स पूरा देश लोप्पा गडबड फैलेमांता इंजी वेरियंतोर। नावा हिसाब ते वीरा कामरेड्स अडिग मंतोर, पार्टी ओसो देश पोरो ईमानदार मंतोर, मति सम्पूर्ण परिस्थिति तुन हूडा परवोर अनि वेल्ले लोकर इत्तेके 90 प्रतिशत तुकू ज्यादा लोकर बेस मंतोर। जनता तुकू वेरियनायो, अदु मावा संगे मंता। अदु माकिन रांगा परिंता, मति पिट्टहा परवो। दक्षिणपंथीर सिर्फ मुट्टामेंड लोकरे मंतोर, नन्ना इंजे बेहता लेक्का पेकिंग विश्वविद्यालय लोप्पा सिर्फ उंदी-रेंडु लेवेके मूंड प्रतिशते मंतोर। इद सिर्फ विद्यार्थिरा पोरो लागू आंता। प्रोफेसर ओसो एसोसिएट प्रोफेसर लोरा परिस्थिति अलग मंता ओरा लोप्पा लगभग 10 प्रतिशत लोकर दक्षिणपंथीर मंतोर। वामपंथी वेने लगभग 10 प्रतिशते मंतोर। रेंडासी पक्ष कुना ताकत बराबर मंता। मध्यवर्ती लोकर लगभग 80 प्रतिशत मंतोर। अदिन काजे वेरियना जरूरत हिल्ले, मति मावा उचुन

कामरेड्स बस्केने इदिनकु वेरियंतोर लेवेके बस्केने अदिनकु वेरियंतोर, बस्केने लोन मुट्टना तुकू वेरियंतोर, बस्केने मोयोल पोरोटल पिडग अरना तुकू वेरियंतोर। प्राचीन कालम ते इंजे एवनल सिर्फ “छी राज्य ता वरोर मानेय किन मोयोल अरिंता बहे इंजी डावुट वात्ता”¹ इत्तेके सिर्फ और हनान वासी किन विडचसी दूसरा बोनकिने इद्रम डावुट वायो। दूसरा लोन मुट्टो बारांकु इत्तेके इदिना निर्माण इंजे ज्यादा दिय्यंग आताद हिल्ले। इद अचोन हल्कोए मुट्टा परवो?

संक्षिप्त ते हर जागा 90 प्रतिशत तुकू ज्यादा लोकुर मावा दोस्त मंतोरा। वेरियना जरूरत हिल्ले। वेरियाना बदे कारण हिल्ले, नेतृत्वकारी लोकुर बोर आंदुर? ग्रुप-लीडर, टीम-लीडर, पार्टी शाखा ता सचिव, स्कूल-कालेज ता प्रधान ओसो पार्टी-कमेटी ता सचिव वीर सब्बे नेतृत्वकारी लोकुर आंदुर। कामरेड ख छिंग-श ओराए लोप्पटल वरोर आंदुर नन्ना वेने ओराए लोप्पा वांताना। बाताल आतेकाई माटु सब्बे तोरगा उचुन राजनीतिक पूंजी जरूर मंता, इत्तेके माटु जनता ना उचुन सेवा जरूर किताद मंता। इंजे किस्स पोत्तिता अनि 90 प्रतिशत तुकू ज्यादा लोकुर मना कामरेड्स इद किस्स ते तपेमासी फौलाद बनेमांतोर इंजी आशा कींतोरा। मना सब्बे कामरेड्स लोप्पा बदे उंदी कमजोरी जरूर मंता। बोरे कमजोरी हिल्ला मंतोरा? “मानेय महात्मा मन्नोर ओरु गलतिंग कियवा बद्रम मंदा परिंतोर?” माटु बद्रमाई बदे गलत पोल्लो कींतोम, गलत काम कींतोमे। इव सब्बे गलतिंग हमेशा पुंजी-पुंजी आयोंग आंतांग।

उंदी तय टाईम पेरके बार-बार “किस्स पोत्ति कीयाना” जरूरी आंता। बचोन टाईम पेरके पोत्ति कीयाना? हर साल पोत्ति कीयाना लेवेक हर मूंड साल लोप्पा उंदी बेरा इदिना पोरो मीटु बाता आल्लिंतोर? नावा हिसाब ते अदिन हर पाँच साल योजना लोप्पा कम से कम रेंडू बेरा पोत्ति कीयाना। लेंज ता गिनती पोरो आधार आसी मंदना लीप वर्ष तीन साल लोप्पा उंदी बेरा औसो पांच साल लोप्पा रेंडू बेरा आंता। वानरराज सुन ऊ-खुंग सर्वशक्तिमान पेन ता 8 रेखाकृति वाले जादू ते तपेमासी मुन्ने तुकू ज्यादा शक्तिशाली आता। सुन ऊ-खुंग असीमित चमत्कारी शक्ति संगे निंडसी

मत्ता भूमिका आयोरा? “देवलोक ता राजा ना मुन्ने महात्मा” इंदाना सुन ऊ-खुंग किन वेने 8 रेखाकृति वाले जादू ते तपेमाया लागता। माटु तपेमायना चर्चा कीवोमा? तपेमायना इत्तेके गढ़ाई ओसो शोध प्रक्रिया कीयाना। गढ़ाई इत्तेके हथौड़ा संगे कोहकसी आकार हियाना ओसो शोध ईत्तेके कोयला ताभट्टी ते लोहा पिंगले कीयाना लेवेके खुला भट्टी ते इस्पात बने कीयाना। इस्पात तैयार आतास्के अदिना गढ़ाई कीयाना जरूरत मंदिता। इस्सल इद काम वड़िय संगे ताकना हथौड़ा संगे आया मंता। इद हथौड़ा वेल्ले भयंकर देब्बा वाटिता! माटु मानेय काजे वेने तपेमायना जरूरी मंता। उचुन कामरेड्स तपेमायना बारे ते पूछेमांतोर अस्के ओरु वेल्ले गिर्दा तोहंतोर अनि “इंगो, नावा लोप्पा कमजोरी मंता। नन्ना तपेमायला काजे तैयार मंतान” इंतोर। हर मानेय तपेमायला आल्संतोर। तपेमायना पोल्लोंग कीयाना हल्को मंता मति निज्जमे तपेमायना मौका वात्तास्के निज्जमे वड़िय संगे ताकना हथौड़ा संगे “गढ़ाई” आंता, अस्के ओरु पेरके गुच्चिंतोर अनि वेरी ता मारे ओरा जीवा पेसना लेक्का आंता। इंजे माटु तपेमायना प्रक्रिया ते मंतोमा उचुन जोम काजे पोरो-दोड़ सब्बे जागा हीकाटे मंदिता, पोड़दु-लेंज ता वेहच वेने हिल्ले। अस्के रेंडु रकम ता वड़िय वांता, उंदी रकम ता वड़िय जनता ना बेहरा संख्या बगिल तल, बेसता लोकरा बगिल ता वांता वीरु बेहरा अक्षर वाले पोस्टर वाटसी कम्युनिस्ट पार्टी लोप्पा उचुन कमजोरिंग मंतांग, अविन दूर कीयाना जरूरत मंता इंतोर। दूसरा बगिल ता वड़िय मुट्टामेंड दक्षिणपंथिरा बगिल तल वाया मंता, वीरु मावा पोरो हमला कित्तोर। इव रेंडु रकम ता हमलांग ना निशाना उंदे मंता। मति ज्यादातर लोकर कित्ता हमलांग सही मंतांग। इद मावा काजे उंदी रकम ता तपेमायना प्रक्रिया मत्ता। दक्षिणपंथिर हमला कीयाना वेने मावा काजे उंदी रकम ता तपेमायना प्रक्रिया मत्ता। इंजे माटु निज्जमे तपेमायना मौका दोरकता, इदु मावा पोरो मंदाना दक्षिणपंथिरा कर्जा आंदू और मना पार्टी जनता, मजदूर वर्ग, किसान, विद्यार्थिर ओसो जनवादी पार्टिंग कुन वेल्ले बेहर सबक हित्तोर। हर शहर लोप्पा

दक्षिणपंथीर मंतोर अनि ओरु माकिन खत्म कियाला आल्सतोर। इंजे माटु ओरकिन मना घेराव लोप्पा हिरकी किया मंतोम।

मना क्रांति उंदी जन-क्रांति आंदू, सर्वहारा वर्ग नेतृत्व ते 60 करोड़ जनता ना क्रांति आंदू; इद जनता ना काम आंदू। जनवादी क्रांति जनता ना काम मत्ता, समाजवादी क्रांति जनता ना काम आंदू, समाजवादी निर्माण वेने जनतानाए काम आंदू। इद्रम मत्तेके समाजवादी क्रांति ओसो समाजवादी निर्माण सही मंता या हिल्ले? सफलतांग दोरकी किताद मंता या हिल्ले? मुख्य वस्तु सफलतांग मत्तांगे लेवेके गलतिंग मत्तांग? दक्षिणपंथीर जनता ना काम ता सफलता ता विरोध कींतोर। इद पहली पोल्लो ओसो दूसरा पोल्लो बद दिशा ते दायना? उंदी हरीं समाजवाद बगिल दांता अनि दूसरा पूंजीवाद बगिला। दक्षिणपंथीर माटु मावा दिशा बदले कीयाना अनि पूंजीवादी हरीं पोयना इंतोर। तीसरा पोल्लो समाजवादी निर्माणा ते नेतृत्व बोर कीयाना? सर्वहारा वर्ग लेवेक पूंजीपति वर्ग? कम्युनिस्ट पार्टी लेवेके पूंजीवादी दक्षिणपंथी? दक्षिणपंथीर कम्युनिस्ट पार्टी ता नेतृत्व स्वीकार कीवोर। नावा हिसाब ते इंजे इवे मूंड सवाल कुन केंद्र बने कीसी उंदी बेहरा वाद-विवाद किताद मंता। इद्रम वाद-विवाद कीयाना सही मंता। मुन्ने इव सवाल कुना बारे ते वाद-विवाद किताद हिल्ले।

जनवादी क्रांति ताकनास्के वेल्ले जोम वाद-विवाद आसोर मंता। छिंग अंश ना आखरी साल तल 1911 ता क्रांति एवनल, ख्यान श-खाए विरोधी संघर्ष लोप्पा, उत्तरी अभियान लोप्पा ओसो जापानी आक्रमण विरोधी युद्ध लोप्पा- इव सब्बे मौका ने वाद-विवाद आसोर मत्तांग। सवाल जापानी आक्रमण ता विरोध कीयाना या कीयानायो इंजी मंता। उंदी पक्ष हथियार सब्बे तय कींता इंदाना सिद्धांत ता प्रचार कींता। असल इत्तेके ओरु चीन कैदे हथियार ता कमी मंता, अदिन काजे ओरु जापान संगे लड़ेमाया परवो इंतोर। दूसरा पक्ष वेरियाना जरूरत हिल्ले, बारांकु इत्तेके मुख्य रूप ते मानेय ना जरूरत मंता, अदिन काजे हथियार कम मत्तेकाई माटु युद्ध किया परिंतोम इंतोर। ताना पेरके मुक्ति-युद्ध आयना मुन्ने वेने

अदिना बारे ते वाद-विवाद आता। छुंगकिंग समझौता-वार्ता, छुंगकिंग लोप्पा आता पाडना राजनीतिक सलाहकार सम्मेलन ओसो नानकिंग समझौता-वार्ता, इव सब्बे वाद-विवादे मत्ता। च्यांग काई-शोक मना राय ओसो जनता ना राय तुन केंजवा लेवा नजर अंदाज कित्तोर। ओरु सिर्फ युद्ध कियाला आल्सतोर। युद्ध कीतांकु ओनकिन हार ता सामना किया लागता। इद्रम जनवादी क्रांति ताकनास्के वेने वाद-विवाद आता अनि वेल्ले जोम मानसिक तैयारी किताद मत्ता।

समाजवादी क्रांति वेल्ले स्पीड ते वात्ता। सिर्फ 6-7 साल लोप्पाने पूंजीवादी मालिकाना ओसो सुडला-सुडला उत्पादक कुना नीजि मालिकाना ता समाजवादी बदलाव कीयाना काम ता बुनियादी रूप ते पूरा आताद मत्ता। मति मानेय ना बदलाव कियाला काजे इंजे वेल्ले टाईम लागियर, इद काम उचुन मुन्ने जरूर हत्ता। समाजवादी बदलाव ता काम उंदी दोहरा काम आंदू उंदी बगिल व्यवस्था ता बदलाव कीयाना अनि दूसरा बगिल मानेय ना वेने बदलाव कीयानाद मंता। व्यवस्था लोप्पा सिर्फ मालिकानाए आयवा ऊपरी ढांचा, मुख्य रूप ते राज्य-मशीनरी ओसो विचारधारा वेने शामिल मंता। उदाहरण तुकू समाचारपत्र विचारधारा लोप्पा वांतांग। उचुन मुल समाचारपत्र ता वर्ग-स्वरूप मन्नो, अवु वर्ग-संघर्ष ता साधन आयोग इंतोर। इद गलत मंता। कम से कम अस्के एवनल साम्राज्यवाद खत्म आयो अस्के एवनल समाचारपत्र लोप्पा ओसो विचारधारा लोप्पा बाकी सब्बे वस्तुंग लोप्पा वर्ग-संबंध दिसिंता। विद्यालय कुना शिक्षा ओसो कला-साहित्य सब्बे विचारधारा लोप्पा वांतांग, इव सब्बे ऊपरी ढांचा संबंधित मंतांग अनि इविना तम्मा वर्ग-स्वरूप मंता। प्राकृतिक विज्ञान ता रेंडु पहलु मंदिंता। प्राकृतिक विज्ञान ता खुद तन्ना वर्ग-स्वरूप मन्नो मति अदिना अध्ययन कीयाना ओसो इस्तेमाल कियानोर। वर्ग-स्वरूप जरूर मंता। विश्वविद्यालय लोप्पा उंदी चीनी भाषा-साहित्य विभाग लोप्पा ओसो उंदी इतिहास विभाग लोप्पा आदर्शवाद ता प्रभाव वेल्ले गंभीर रूप ते मंता। समाचार पत्र लोप्पा काम कियानोर। परिस्थिति वेने इद्रमे मंता। सिर्फ सामाजिक विज्ञान लोप्पाने

आदर्शवाद मंता इंजी आल्सनायो, प्राकृतिक विज्ञान लोप्पा वेने वेल्ले मंता। प्राकृतिक विज्ञान लोप्पा काम कीयाना वेल्ले लोकुरा विश्व-दृष्टिकोण आदर्शवादी मंता। मीटु एर बद्रम बनेमांता इंजी पूछेमांतिर अस्के भौतिकवादी मत्तांकु ओरु रेंडु तत्व कलियसी बनेमांता इतोर। इद जवाब वास्तविकता संगे कलियो आंता। मति सामाजिक बदलाव ता सवाल वांता अस्के ओरु आदर्शवादी बनेमांतोर। शुद्धिकरण संगे कम्युनिस्ट पार्टी तुन सुदृढ़ कीयाना इंतोम अस्के ओरा लोप्पा उचुन मुल अदिन खत्म कीयाना इंतोर। वर्तमान आंदोलन तल वेने इद्रमे साबित आता।

दक्षिणपंथिर मावा पोरो हमला कितास्के मना नीति केंजना अनि कमेक मंदाना मत्ता। उचुन हप्तांग एवनल माटु मना कप्पार तोला तुन मजबूत कीसी केव्वी कीसी केंजतोम अनि केमेक मत्तोम। संगेने माटु नौजवान संघ ओसो पार्टी ता साधारण सदस्य लोर किन सूचना हीवोम अनि पार्टी शाखांग ना सचिव ओसो पार्टी शाखा-कमेटींग कुन वेने सूचना हीताद हिल्ले, सब्बे तोर किन आजादी ते आपसी ते लड़ेमायला हीतोम अनि तम्मा मर्जी ते काम कियाला हियाना। विश्वविद्यालय कुना पार्टी-कमेटींग ओसो प्रधान पार्टी-शाखांग लोप्पा दुश्मन मौका दोरकी कीसी नेंगतोर; उदाहरण तुकू छिंगह्वा विश्वविद्यालय तु पार्टी कमेटी लोप्पा वेने दुश्मन मत्तोर। अगा बदे मीटिंग अतेके तुरंत दुश्मन इगा मीटिंग लोप्पा बाताल आता इंजी खबर दोरकनादु। इद्रम तोर किन “बागी” वेने इंदानोर। मुन्ने बस्केने बागी सेनापति हिल्ला मत्तोर? इंजे “बागी विद्वान” वेने पुटतोर। इदिनकु दुश्मन ओसो माटु खुश आंतोम। दुश्मन कम्युनिस्ट पार्टी सदस्य लोर “बगावत” कितोर अनि कम्युनिस्ट पार्टी “खत्म” आयर इंजी खुश आतोर। इंजे बचोन पार्टी-सदस्य खत्म आतोर? शांघाई ता बारे ते नन्ना स्पष्ट पुत्ताद हिल्ले। पेकिंग ता विश्वविद्यालय लोप्पा पार्टी ता लगभग 5 प्रतिशत सदस्य ओसो नौजवान संघ तुकू ज्यादा, 10 प्रतिशत तुकू उचुन ज्यादा सदस्य लोर खत्म आतोर। नावा हिसाब ते ओरु खत्म आयना जरूरी मत्ता। संक्षिप्त ते ओरु 10 प्रतिशत आई लेवेक 20 प्रतिशत, 30 प्रतिशत आई लेवेके 40 प्रतिशत ओरु खत्म आतादु हूडूसी नाकिन बेसे

लागता। ओरा दिमाग पूंजीवादी विचार ओसो आदर्शवाद संगे निंडसी मंता अनि ओरु कम्युनिस्ट पार्टी लेवेके नौजवान संघ लोप्पा चुपचाप नेंगतोरा। ओरु पोरोल तुके कम्युनिज्म ता पक्ष एतितोर, मति असल ते ओरु कम्युनिज्म ता विरोध कीतोर लेवेक दुलमुल मंदितोर। अद्रमासी माटु वेने ओरा “बगावत” हूडसी खुश आंतोमा पार्टी ओसो नौजवान संघ कैडर ता वेल्ले बेस सफाई मुन्ने बस्के कीतोम? मनम ओरकिन तेंडना मुन्ने ने खुद वित्तितोर। मति इंजे परिस्थिति बदलेमाता अनि पासा पलटे माता। माटु दक्षिणपंथिर किन मना घेराबंदी ते हिरकी कीयाना शुरू कीतोम, वेल्ले लोकुर खुद दक्षिणपंथी हिल्ला मत्तोर मति दक्षिणपंथिरा संगे संबंध तासानोर, अस्के मुन्ने वासी ओरा पर्दाफाश कीतेके “बगावत” बंद आता। इंजे दक्षिणपंथिर किन वेल्ले मुश्किल कुना सामना किया लागा मंता अनि ओरा लोप्पाटल उचुन मुल बगावत कित्तोर। नन्ना इगा मार्च लोप्पा कार्यकर्ता लोरकिन संबोधित कीतोम। अस्केटल इंजे एवनल इव सौ दिव्यंग लोप्पा परिस्थिति बचोन बदलेमाता।

दक्षिणपंथिरा खिलाफ मत्ता संघर्ष ता स्वरूप मुख्य रूप ते राजनीतिक मंता। वर्ग-संघर्ष अलग-अलग रूप एतितो। वर्तमान संघर्ष मुख्य रूप ते उंदी राजनीतिक संघर्ष मंदिता, सैनिक लेवेक आर्थिक संघर्ष मन्नो। इद उचुक अंश कुना लोप्पा विचारधारात्मक संघर्ष वेने मंदिता या? इंगो, मति नावा हिसाब ते इद मुख्य रूप ते उंदी राजनीतिक संघर्षे आंदू। दूसरा मंजिल ते इद मुख्य रूप ते उंदी विचाराधारात्मक संघर्ष बनेमायर अनि अस्के सलवा-सलवा वडियु ओसो जमने-जमने वायना मुसुर लेक्का ताकी किया लागियर। कम्युनिस्ट पार्टी ओसो नौजवान संघ लोप्पा ताकी कीयाना शुद्धिकरण आंदोलन उंदी विचारधारात्मक संघर्ष आंदू। माटु मना स्तर बेरसी कीयाना ओसो असली मार्क्सवाद ता अध्ययन कीयाना जरूरी मंता। माटु जीवा कीसी वरोर-दूसरोना मदद कीयाना। माटु मनोगतवाद ओसो नौकरशाह तल पूरा मुक्त आतोमा? माटु निज्जमे गंभीरता ते आल्सना उचुन सामग्री नोट कीयाना अनि उचुक महीनांग एवनल कोशिश

कीसी मना मार्क्सवाद पोरो समझदारी ता स्तर ओसो राजनीतिक, विचारधारात्मक स्तर बेरसी कीयाना।

दक्षिणपंथिरा पोरो जवाबी हमला कियाला उचुन हप्तांग लेवेके उंदी महीना तुकू उचुन ज्यादा टाईम लागना लेक्का वेने मंता। मति इयेटा बाकी महिनांग लोप्पा पेंड ओसो अदिनकु मुन्नेटा साल वेने समाचारपत्र लोप्पा दक्षिणपंथिरा विचार प्रकाशित कीयाना (इंजे कीसोर मत्ता लेक्का) संभव मंता। समाचारपत्र लोप्पा ओरा पोल्लोंग वेल्ले प्रकाशित किताद मत्ताचोने दक्षिणपंथिर मंतोर, वायना कालम ते प्रकाशित कियाला काजे ज्यादा सामग्री पिस्ताद हिल्ले। इंजे माटु बद्रमाई ओसो छापे कीसोर मंतोम, मति प्रकाशित कीयाना लेक्का हिल्लेके माटु छापे कीवोम आंतोम। नावा हिसाब ते जुलाई महीना ते दक्षिणपंथिरा पोरो पूरा जवाबी हमला कीयाना महीना मंदिता। दक्षिणपंथी बेहरा तूफान ओसो बेहरा डोंगे मसुर तुन वेल्ले विचारा कींतोर अनि सलवा-सलवा वड़ियु ओसो जमने-जमने वायना मुसुर तुन विचार कीवोरा। माटु सलवा-सलवा वड़ियु ओसो जमने-जमने मुसुर ता पक्ष एतोर? मति ओरु, “बाताल इंतोर? सलवा-सलवा वड़ियु ओसो जमने-जमने मुसुर? बचोनो दिव्यंग रोज उचुन-उचुन मसुर वासोर मत्तेके वंजि मोदोल कड़ियंता अनि अकाल वायर बेहा तूफान ओसो बेहरा पिरं वातेकेने बेस आयार” इंतोर। मीवी शांघाई ते बोराई “दुपार ते” “करवल ता कांव-कांव” हेडिंग वाले लेख रास्ताद हिल्ले या? इद “करवल” बेहरा तूफान ओसो बेहरा पिरं ता प्रस्ताव तास्ता मानेय आंदुर। ओरु “मीटु कम्युनिस्ट लोर अन्याय कींतिर। मुन्ने मीटु मावा पोरो हमला कितास्के बेहरा तूफान ओसो बेहरा पिरं लेक्का मंदाना इंजी आल्सतिर, नेंडु मीवा बारी वात्तास्के सलवा-सलवा वड़ियु ओसो जमने वायना मुसुर मंदाना इंजी आल्सतिर” इंजी वेने इंतोर। विचाराधारात्मक पूना बदलाव लोप्पा हू श ओसो ल्यांग शू-मिंग ना आलोचना कीयाना वेने शामिल मंता। इदिना संबंध ते मना हत्ता साल पार्टी निर्देश कुना लोप्पा माटु हमेशा सलवा-सलवा वड़ियु ओसो जमने जमने वायना मुसुर ता आह्वान कीतोम। दुनिया लोप्पा सब्बे वस्तु विंको-वंको हरीं तल विकसित आंतांग। उदाहरण

तुकू, मीटु सीधा ताकला आल्सतेके वेने बस्के ने ताका परविर। मीटु बस्केने मोकान मेट्टा पोरो हित्तिरा? अगा दायना हर्ही दोड़ तल पोरो एवनल कुल 18 मोड़ मंतांग। समाज वेने अनिवार्य रूप ते विंको-वंको हर्ही तेने मुन्ने दांता। माटु दक्षिणपंथिर किन परहकना संघर्ष लोप्पा नरमी वायना हियानायो अनि उर्रा वड़ियु, जोरदार मुसुर जारी तासना। इद तूफान-मुसुर ता शुरुआत ओरे कित्तोर, अदिन काजे माटु ओरा पोरो बदला एतना कोशिश कीतोमा दक्षिणपंथिर किन सिर्फ सलवा-सलवा वड़ियु ओसो जमने-जमने वायना मुसुर बचोन बेस मंता इंजी समझेमाया मंता। बदे कटिया तुन हूड़सी पोयना कोशिश कींतोर, बारांकु इत्तेके ओरु जल्दिए मुडंदसोर दांतोर, ह्वांगफू डोड्डा ते मुडंदना वरोर मानेय कटिया कैदे दोरकता इत्तेकेने अदिना सहारा एतना कोशिश कीयाना लेक्का। नन्ना अद “करवल” इंजे सलवा-सलवा वड़ियु ओसो जमने-जमने वायना मुसुर काजे जरूर हर्ही हूड़ा मंता इंजी आल्संतान। मति इंजे तूफान वायना लेक्का मंता। जुलाई पेरेके, अगस्त महीना ते सलवा-सलवा वड़ियु ओसो जमने-जमने वायना मुसुर शुरु आयर, बारांकु इत्तेके अस्के एवनल परहकना लेक्का बदे वस्तु मन्नो आयर।

दक्षिणपंथी लोकुर नकारात्मक उदाहरण संगे शिक्षित कीयाना वेल्ले बेसता शिक्षक लोर आंदुर। चीन लोप्पा हमेशा सकारात्मक ओसो नकारात्मक रेंडासी रकम ता उदाहरण संगे शिक्षित कीयाना शिक्षक मंतोर। लोकुर सकारात्मक ओसो नकारात्मक रेंडासी रकम ता उदाहारण संगे शिक्षित कीयाना जरूरत मंता। जापानी साम्राज्यवाद नकारात्मक उदाहरण संगे शिक्षित कीयाना मना प्रथम सबसे बेसता शिक्षक मंतोर। इदिनकु मुन्ने छिंग सरकार, ख्वान श-खाए ओसो उत्तरी युद्ध-सरकार, पेरेके च्यांग काई-शेक, वीर सब्बे नकारात्मक उदाहरण संगे शिक्षित कीयाना शिक्षक लोर मंतोर। और लेवा चीनी जनता बस्के ने सबक एता परवो। कम्युनिस्ट पार्टी सकारात्मक उदाहरण संगे शिक्षित कीयाना शिक्षक लोरा भूमिका निभे कीसोर मंता, मति सिर्फ इद्रम ता शिक्षक लोरे हालोर आंतोर। इद पोल्लो नेंडु वेने लागू आंता। मना वेल्ले पोल्लोंग मानेमायला इनकार कियानोर

वेने मंतोर। ओरु असल ते बोर आंदुर? ओरु वेल्ले मध्यवर्ती तत्व ओसो खासकर दक्षिणपंथीर आंदुर। मध्यवर्ती लोकर मना पोरो आधार विश्वास ओसो आधा डावुट कींतोर। दक्षिणपंथीर इत्तेके मना पोल्लो इनपडे केंजोर। माटु वेल्ले बेरा ओरकिन राय हींतोम, मति ओरा बैराल आता लेक्का मना राय ता विपरीत व्यवहार कित्तोर। उदाहरण तुकू माटु “एकता-आलोचना-एकता” ता पक्ष एतितोम, मति ओरु मना उंदी वेने पोल्लो केंजोर आंतोर। माटु प्रतिक्रांतिकारिंर किन खत्म कियाला सफल आयला इद महत्वपूर्ण मंता, मति ओरु इदिन मानेमायला इनकार कित्तोर। माटु जनवादी केंद्रीयता ओसो सर्वहारा वर्ग ता नेतृत्व ते जनता ना जनवादी तानाशाही जरूरी मंता, मति ओरु इदिन वेने मानेमायला इनकार कींतोर। माटु समाजवादी देश ओसो पूरा दुनिया ता शांतिप्रिय जनता संगे एकता कीयाना जरूरी मंता इत्तोम मति ओरु मानेमायला इनकार कींतोर। संक्षिप्त ते माटु इव सब्बे पोल्लोंग मुन्ने ने वेहतोम, मति ओरु मना उंदी वेने पोल्लो केंजोर। ओरु जहरीला रोंडा तुन तेहकसी वाटना जरूरी मंता इंजी मानेमायला खासकर इनकार कींतोर। दैत्य, दानव कुन बाहर पेसला हियाणा, अस्केने लोकर मुन्ने एकसपोज आयनूर अनि लोकर ओरकिन खत्म कीयाना जरूरी मंता इंजी आल्लिसंतोर। जहरीला रोंडा मोड़ियला हीता पेरेके तेहकसी भूमि दोड़ मिस्साटु अनि अदिन खत्तु लेक्का इस्तेमाल कीमुटा। बदे डावुट हिल्ला इव सब्बे पोल्लोंग माटु मुन्ने ने वेहताद मंता। मति जहरीला रोंडा मोड़ियसोरे मंता। किसान लोर हर साल रोंडा तुन हर साल बचोनो बेरा तेहकसी वाटकोम इंतोर मति रोंडा ओरकिन उचुन वेने केंजो आंता अदु मोड़ियसोरे मंता। रोंडा तुन तेहकसी वाटतेकाई दस हजार साल एवनल जारी मत्तेकाई, अदु मोड़ियसोरे मंदिता। इंजेटल दस करोड़ साल पेरेके वेने मोड़ियसोरे मंदिता। रोंडा तेहकना पोल्लो इत्तास्के दक्षिणपंथीर वेरियवा मत्तोर, इदे आयवा दक्षिणपंथीर जहरीला रोंडा आयवा बेसता गब्बु मत्ता पुगार आंदु, जहरीला रोंडा माटु आंदोन अनि ओरा जागा ते माकिन तेहकसी वाटना इंजी आल्लिसंतोर। ओरकिन ओरु खुद उंदी जहरीला रोंडा आंदुर इंजी वेने समझेमायोर आंतोर।

पोरो वेहता मूंड सवाल कुना बारे इंजे वाद-विवाद आया मंता। समाजावादी क्रांति वेल्ले तेज आता, अद्रमासी संक्रमण-कालम काजे पार्टी ता आम कार्य-दिशा पोरो पार्टी लोप्पा पूरा वाद-विवाद आया परवो ओसो समाज ते वेने आया परवो आता। इदिना उदाहरण टाली रोंडा मेय्यनास्के कित्ता लेक्का हियमूडांता। अदु मुन्ने रोंडा जल्दी-जल्दी लोपिंता अनि पोड्टा निहिंता अनि पेरके टोड्डी ते उडियसी तीरम-तीरम कावरे कीसोर मंता। माटु व्यवस्था लोप्पा मुन्ने उत्पादन साधन कुना मालिकाना लोप्पा ओसो दूसरा ऊपरी ढांचा, राजनीतिक व्यवस्था ओसो विचारधारा लोप्पा, समाजावादी क्रांति ताकी कींतोम, मति इद सवाल ता बारे ते पूरा बस्के ने वाद-विवाद किताद हिल्ले। इंजे माटु अखबार, गोष्टिंग, आम सभाग ओसो बेरा अक्षर वाले पोस्टर संगे इद वाद-विवाद शुरू आया मंता।

बेहरा अक्षर वाले पोस्टर वाटना उंदी बेसता पोल्लो मंता, नावा हिसाब ते इद तरीका पीडी-पीडी तल ताका मंता। ‘कनफ्यूशियस ना शुक्ति-संग्रह’, ‘5 क्लासिकी रचनांग’, ‘13 क्लासिकी रचनांग’ ओसो 24 राजवंश लोरा इतिहास’ इव सब्बे मना पीडी एवनल ताका मंतांग। बेहरा अकसर वाले पोस्टर वाटना तरीका पीड-पीडी ताका परवो या? नावा हिसाब ते जरूर ताकिंता। उदाहरण तुकु वायना कालम ते कारखाना लोप्पा शुद्धिकरण कीतेके इद तरीका ता इस्तेमाल आयो या? जरूर इदिना इस्तेमाल कीयाना बेस आया अनि बचोन ज्यादा इस्तेमाल आयर अचोने बेस आया। भाषा लेक्काने इदिना वेने वर्ग-स्वरूप मन्नो आंता। मना आधुनिक भाषा ता वर्ग-स्वरूप हिल्ले। माटु सब्बे आधुनिक भाषा वडकिंतोम अनि च्यांग काई-शेक वेने अदे भाषा वडकिंतो। माटु इद्रम ता प्राचीन भाषा बस्केने वडकोम: “अध्ययन ओसो अध्ययन-सामग्री ता हमेशा चिंतन-मनन कीतेके वेल्ले खुशी दोरकिंता” ओसो “जेक-जेक तल वात्ता दोस्त लोरा स्वागत-सत्कार कीतेके वेल्ले सुख दोरकिंता।” सर्वहारा वर्ग ओसो पूंजीपति वर्ग रेंडासी आधुनिक भाषा ता इस्तेमाल कींतो। बेहरा अकसर वाले पोस्टर ता इस्तेमाल सर्वहारा वर्ग ओसो पूंजीपति वर्ग वेने क्रिया परिंता। माटु वेल्ले लोकर सर्वहारा वर्ग ता पक्ष ते मंतोर इंजी

विश्वास मंता। अदिन काजे बेहरा अकसर वाले पोस्टर उंदी साधन लेक्का सर्वहारा वर्ग तुन फायदा कींतांग पूंजीपति वर्ग तुन आयो। उचुन जोम एवनल, लगभग रेंडु-मूंड हसांग एवनल भूमि ओसो मोयोल ते हीकाटे आताद मंता, पोडद-लेंज ता वेहच हिल्ला मंदाना परिस्थिति हूडतेके पूंजीपति वर्ग काजे अनुकूल मत्ता लेक्का मंता। माटु मना कप्पार तोला तुन मजबूत कीसी सहे मायना इत्तेके उंदी-रेंडु हसांग लोप्पा मना हुस्कड़ वायवा लेक्का ओसो कर वेस्वा लेक्का आयना आंता। उचुन हसांग काजे हुस्कड़ वायवा मंदाना ओसो कर वेस्वा मंदाना वेने उंदी रकम ता तपेमायनाए आंदू। इदिना काजे मीकिन धमन भंड्री लोप्पा वाटसी पिघले कीयाना जरूरत हिल्ले।

वेल्ले मध्यवर्ती तत्व दुलमुल आया मंतांग, इद वेने उंदी बेसताए पोल्लो आंदू। ओरकिन दुलमुल आतांकु सबक दोरकिंता। दुलमुल आयना मध्यवर्ती तत्व ता विशेषता आंदू, लेवेके ओरकिन मध्यवर्ती तत्व बद्रम इनमूडांता? उंदी कोंटा ते सर्वहारा वर्ग मंता अनि दूसरा कोंटा ते पूंजीपति वर्ग, नडमा बेहरा संख्या ते मध्यवर्ती तत्व मंता; रेंडासी कोंटांग सुडला मंतांग अनि नडमा ता हिस्सा बेहरा मंता। मति आखरी ते मध्यवर्ती तत्व बेसता लोकर मंतोर, ओरु सर्वहारा वर्ग ता एकताकारी लोकर आंदुर। पूंजीपति वर्ग वेने ओरकिन मना पक्ष ते कीसी एकताकारी बने कीयाना अनि उंदी बेरा लोकर किन हूडतेके ओरु इद्रमे दिसंतोर। बारांकु इत्तेके मध्यवर्ती तत्व कुन वेने मना आलोचना कित्ता मति इद आलोचना सही काजे कित्ताद मंता। दक्षिणपंथिर मध्यवर्ती तत्व मना आलोचना क्रिया मंता इंजी हूडसी ओरु गडबड़ कियाला पेस्तोर। शांघाई ते मीटु वांग चाओ-शू लू ई, छन रन-पिंग ओसो फंग वन-इंग ओसो संगेने ऊ इन लेक्कटा दक्षिणपंथिर किन गडबड़ कीयानास्के हूडतिरा। दक्षिणपंथिर गडबड़ कित्तास्के मध्यवर्ती तत्व भ्रम ते वात्ता। दक्षिणपंथिरा पुरखा चांग पो-च्युन, ल्वो लुंग-ची ओसो चांग नाए-छी आंदुर अनि पेकिंग ओरा जन्म भूमि आंदू। पेकिंग लोप्पा बचोन गडबड़ आंता अचोने बेस आया, बचोन

ज्यादा गंभीर गड़बड़ आंता अचोने बेस आया। मावा अनुभव तले इद्रमे साबित आता।

इंजे-इंजे नन्ना बेहरा अकसर वाले पोस्टर ता चर्चा किताना। इद तरीका संबंधित सवाल लड़ेमायना तरीका संबंधित सवाल आंदू बेहरा अक्सर वाले पोस्टर लड़ेमायना काम वायना उंदी हथियार आंदू, राइफल, पिस्तौल ओसो मशीनगन लेक्का उंदी सुडला हथियार आंदू। विमान ओसो तोपकुना पोरोल 'वन ह्वेइ पाओ', 'क्वांगमिंग दैनिक' ओसो उचन बाकी अखबार कुनल हियमूडांता। दक्षिणपंथिरा पोल्लोंग उचुन जोम एवनल कम्युनिस्ट पार्टी ता अखबार कुना लोप्पा वेने प्रकाशित आसोर मत्तांग। माटु दक्षिणपंथिरा सब्बे पोल्लोंग बद्रम मत्ता अद्रमे प्रकाशित कीयाना इंजी आदेश हीतोमा। इद तरीका ओसो उचुन बाकी तरीकांग इस्तेमाल कीसी माटु व्यापक जनता तुन सकारात्मक ओसो नाकारात्मक उदाहारण संगे शिक्षित कीतोमा। उदाहारण तुकू 'क्वांगमिंग दैनिक' ओसो 'वन ह्वेइ पाओ' ता कर्मचारि र किन इंजे वेल्ले गंभीर शिक्षा दोरकता। मुन्ने ओरु सर्वहारा वर्ग ता अखबार ओसो पूंजीपति वर्ग ता अखबार नडमा, समाजवादी अखबार ओसो पूंजीवादी अखबार नडमा बाता अंतर मंता इंजी वेने वेहा परवो आयनोर। उचन जोम काजे इव रेंडासी अखबार कुना दक्षिणपंथी कर्ताधर्ता लोर इविन पूंजीवादी अखबार बने कीसीतोर। इद्रम ता दक्षिणपंथीर सर्वहारा वर्ग ओसो समाजवाद पोरो होंग कींतोर। इद्रम तोर विश्वविद्यालय कुन सर्वहारा दिशा ते आयवा पूंजीवादी दिशा ते ओंतोर।

पूंजीवादी वर्ग ओसो पाड़ना समाज तल वात्ता बुद्धिजीविरा पूना बदलाव कीयाना जरूरत हिल्ले या? ओरु पूना बदलाव तल वेल्ले वेरियंतोर अद्रमासी उंदी खास रकम ता विचार पैदा आंता अदिन "हीन भावना" इंतोर, बचोन ज्यादा पूना बदलाव आंता अचोने ज्यादा इद भावना वेने बेरससोर दांता। इद विचार गलत मंता। सही विचार वरोर मानेय ना बचोन पूना बदलाव आंता अचोने ज्यादा ओना आत्म-सम्मान वेने बेरसिंता। इदिना कारण ते आत्म-सम्माने पैदा आयना बारांकु इत्तेके मानेय किन तम्मा पूना बदलाव ता जरूरत सिर्फ जागृत आतास्केने

समझेमांता। ओरु तम्मा “वर्ग-चेतना” ता स्तर वेल्ले पोरो मंता इंजी आल्सिंतोर अदिन काजे ओरकिन तम्मा पूना बदलाव कीयाना जरूरत हिल्ले इंजी उल्टा ओरु सर्वहारा वर्ग ता पूना बदलाव कियाला आल्सिंतोर। ओरु दुनिया ता बदलाव पूंजीपति वर्ग अनुसार कीयाना इंजी आल्सिंतोर अनि सर्वहारा वर्ग दुनिया ता बदलाव तन्ना अनुसार कियाला आल्सिंता। नावा हिसाब ते वेल्ले लोकरु इत्तेके 90 प्रतिशत तुकू ज्यादा लोकरु उचुन पेरके-मुन्ने आयना, पुनर्विचार कीयाना, असहमति पेश कीयाना अनि ढुलमुल आता पेरके आखरी ते तम्मा पूना बदलाव कियाला स्वीकार कींतोर। बोना ज्यादा पूना बदलाव आंता ओनकिन पूना बदलाव ता अचोने ज्यादा जरूरत मंदिता। कम्युनिस्ट पार्टी ता वेने पूना बदलाव आया मंता। शुद्धिकरण इत्तेके वेने पूना बदलावे आंदू, वायना कालम ते शुद्धिकरण जारी मंदिता। मीटु शुद्धिकरण इंजे आतेके पेरके बस्के ने आयो इंजी आल्सिंतिरा? इंजे शुद्धिकरण आता पेरके नौकरशाही खत्म आंता या? सिर्फ रेंडु-मूंड साल पेरके उचुन मुल इव सब्बे पोल्लोंग मरंगसिंतोर अनि नौकरशाही मलसी वांता। ओरु इद्रमे मंदिंतोर, ओरा दिमाग कमजोर मंदिता। अदिन काजे टाईम-टाईम ते शुद्धिकरण ता जरूरत मंदिता। कम्युनिस्ट पार्टी काजे वेने शुद्धिकरण जरूरत मंदिता। इद्रम इत्तेके पूंजीपति वर्ग ओसो पाडना समाज तल वात्ता बुद्धिजीविरा काजे इदिना जरूरत हिल्ले या? पूना बदलाव जरूरत हिल्ले या? बदे डावुट हिल्ला ओरा काजे शुद्धिकरण ओसो पूना बदलाव ता ओसो ज्यादा जरूरत मंता।

इंजे जनवादी पार्टिंग लोप्पा शुद्धिकरण आंदोलन ताका मंता। शुद्धिकरण आंदोलन तुन पूरा समाज लोप्पा ताकी कीयाना। इदिना कीयाना जरूरत मत्ता या? इदिना संगे सुडला-सुडला समस्यांगे आयवा महत्वपूर्ण समस्यांग कुन राजनीतिक कार्यदिशा संबंधित सवाल कुन हल कियमूडायरा। इंजे जनवादी पार्टिंग ना शुद्धिकरण आंदोलन लोप्पा कार्यदिशा संबंधित सवाल पोरो लेवेके पूंजीवादी दक्षिणपंथिर ताकी कित्ता प्रतिक्रांतिकारी कार्यदिशा ता खंडन पोरो जोर हीताद मंता। नावा हिसाब ते इद सही मंता। कम्युनिस्ट पार्टी ता तन्ना शुद्धिकरण लोप्पा इंजे

कार्यदिशा संबंधित सवाल पोरो आयवा कार्यशैली पोरो जोर हियमूडया मंता। मति जनवादी पार्टिंग काजे कार्यशैली ता सवाल गौण मंता अनि मुख्य जोर बद कार्यदिशा लागू कीयाना इंदाना पोरो वाटना। ओरु च्यांग पो-च्युन, ल्वो लुंग-ची, चांग नाए-छी, छन रन-पिंग, फंग वन-इंग, लू ई ओसो सुन ता-ख्वू ना प्रतिक्रांतिकारी कार्यदिशा पोयना लेवेके बदे दूसरा कार्यदिशा पोयना? ओरा काजे सबसे मुन्ने इदिना संबंध ते नन्ना तेहता मूंड सवाल कुना बारे ते उंदी स्पष्ट धारणा बने कीयाना जरूरी मंता: समाजवादी क्रांति ओसो समाजवादी निर्माण ता सफलतांग, दसियों करोड़ जनता पूरा कित्ता काम बेस मत्ता या हिल्ले? माटु बद हरीं पोयना, समाजवादी हरीं लेवेके पूंजीवादी हरीं? समाजवादी निर्माण लोप्पा नेतृत्व बद पार्टी कैदे मंदाना, च्यांग-ल्वो गठजोड़ कैदे लेवेके कम्युनिस्ट पार्टी कैदे? कार्यदिशा ता सवाल तुन स्पष्ट कियाला काजे उंदी बेहरा वाद-विवाद शुरू कीयाना।

कम्युनिस्ट पार्टी लोप्पा वेने कार्यदिशा संबंधित सवाल मंता। “बागी” लोर इत्तेके कम्युनिस्ट पार्टी, नौजवान संघ लोप्पा मत्ता दक्षिणपंथिर निज्जमे उंदी कार्यदिशा संबंधित सवाल आंदुर। इंजे कठमुल्लावाद कार्यदिशा संबंधित सवाल हिल्ले, बारांकु इत्तेके अदु इंजे उंदी कार्यदिशा लेक्का विकसित आताद हिल्ले। मना पार्टी ता इतिहास लोप्पा कठमुल्लावाद बचोनो बेरा कार्यदिशा संबंधित सवाल बने माता बारांकु इत्तेके अस्के इद उंदी व्यवस्था, नीति ओसो प्रोग्राम लेक्का विकसित आता। वर्तमान ते कठमुल्लावाद ता विकास अचोन आताद हिल्ले मति अदिना लोप्पा उचुन जटिलता वात्ता, अदिन इंजे हथौड़ा संगे कोहकसी आकार हीसी उचुन नरम कियमूडया मंता। विभिन्न विभाग ओसो संगठन, स्कूल-कालेज ओसो कारखानांग ना नेतृत्वकारी लोकर “सीड़ी रैय्या मंतोर”²? ओरु क्वोमिंगतांग कार्यशैली ओसो शाही आदत कुन विड़सा मंतोर अनि मुन्ने लेक्कटा नौकरशाही व्यवहार कीवोर। इंजे सहकारी समितिंग ताकी कीयाना किसान लोरा संगे खेती किया मंतोर, कारखानांग ताकी कीयाना पार्टी-कमेटींग ना सचिव मजदूर लोरा संगे वर्कशाप ते श्रम कीयाना मंतोर, अद्रमासी नौकरशाही वेल्ले कम आया

मंता। वायना कालम ते इद्रम ता शुद्धिकरण आंदोलन ओसो ताकी कियमूडायरा। माटु बेहरा अक्षर वाले पोस्टर वाटना, गोष्ठिंग कीयाना अनि अलग-अलग समस्यांग हल कीयाना, अविन सुधरे कीयाना ओसो आलोचना कीयाना जरूरत मंदिता। इदे आयवा माटु मना स्तर बेरसी कीयाना ओसो उचुन मार्क्सवाद ता अध्ययन कीयाना।

चीन ता ज्यादातर लोकुर महान मंतोर अनि चीनी राष्ट्र उंदी महान राष्ट्र आंदू। मना राष्ट्र उंदी विचारशीलता, जीवा कीयाना, बुद्धिमत्ता ओसो साहस संगे निंडसी मत्ता राष्ट्र आंदू नन्ना उंदी एकीकृत संकल्प ओसो पिस्वल मत्ता परिस्थिति इत्तेके केंद्रीयता संगे जनवाद ओसो अनुशासन संगे आजादी वेने मंदाना परिस्थिति पैदा आयार इंजी आशा कीताना। रेंडासी पहलु मंदाना सिर्फ उंदी पहलु आयो, सिर्फ अनुशासन मंदानायो ओसो सिर्फ केंद्रीयता वेने मंदानायो। सिर्फ उंदी पहलु मत्तेके लोकुरा टोड्डी बंद आयर अनि ओरु तम्मा पोल्लो किया परवोर आयनुर ओसो गलत पोल्लो ना आलोचना वेने किया परवोर आयनरूरा। माटु लोकुर किन पोल्लोंग कियाला प्रोत्साहित कीयाना अनि उंदी सजीव माहौल बने कीयाना। बोरु मना सही आलोचना कींतोर ओनकिन दोषी मानेमायनायो। ओरु कीयाना आलोचनांग बचोन कटु मत्तेकाई लेवेके ओरु कीयाना निंदा बचोन कड़ी मत्तेकाई ओरकिन दोषी मानेमायना, सजा हियाना लेवेके तंग कीयानायो। तंग कीतेके तिप्पल आंता। असल ते दक्षिणपंथिर किन तंग कीयाना जरूरी मंता।

माटु जनता तल वेरियनायो, ओरा नडमा मंदाना। उचुन कामरेड्स जनता तल एर तुकू वेरियता लेक्का वेरियंतोर। मीटु नाडिया पर्रितिरा? नन्ना बेगा दांतान अगा लोकुर किन नाडियला प्रोत्साहन हींताना। एर उंदी वस्तु आंदू। मीटु रोज उंदी घंटा नाडियला करियतेके, लगातार करियसोर मत्तेके उंदी डुबकी नेंड वाटना अनि उंदी डुबकी नाड वाटतेके सौ दिव्या पेरके जरूर मीकिन नाडियला वायार। पहली पोल्लो मीटु शिक्षक केयनायो, दूसरा मीटु रबड़-ट्यूब ता इस्तेमाल कीयानायो। रबड़-ट्यूब ता इस्तेमाल कीतेके मीकिन नाडियला वायो आयार। “मति नाकिन नावा जीवार ता

वेरीं मंता, नाकिन नाड़ियला वायो!” मीटु चिलचिल एर ते करिया पर्रितिर। मीटु सौ दिव्यने नाड़ियला करियाना इत्तेके मुन्ने 30 दिव्यंग चिलचिला एर लोप्पा करियाना, अस्के मीकिन इदिना तकनीक वायर। मीकिन नाड़िला वात्तास्के मीटु यांगत्सी डोड्डा ते नाड़ियना लेवेके प्रशांत महासागर ते बदे अंतर मन्नो आंता, रेंडासी जागा ने एरे मंदिता। उचुन मुल नाड़ियानोरा लेक्का नाड़ियतेके मुडंदा पर्रितिर बारांकु इत्तेके इद्रम आयनास्के मीकिन बोराई जरूर बचे कियानूर; मति यांगत्सी डोड्डा लोप्पा नाड़ियना वेल्ले खतरनाक मंता, अगा उंदी मुडंदितेके पूराए मायना लेक्का तेज एर पोंगिता इंतोरा। इद्रम तोर इद्रम ता पोल्लोंग कीसी वेरहंतोरा। नन्ना इद्रम ता पोल्लोंग सिर्फ बकवल लोकरे कींतोरा। शुरू ते मावा बेस नाड़ियानोर, नाड़ियला करहानोर ओसो एक्सपर्ट लोरा लोप्पा बोरे वेने यांगत्सी डोड्डा ते नाड़ियना हिम्मत कीवोर आतोर मति इंजे ओरु अगा नाड़िया पर्रितोरा। इस्सल लोकर मीवा ह्वांगफू डोड्डा ते नाड़ियलना हन्नोरा? ह्वांगफू डोड्डा ओसो यांगत्सी डोड्डा ते नाड़ियला काजे बदे शुल्क हिया लागो। लाक्षणिक रूप ते हूडतेके जनता एर लेक्का मंता ओसो विभिन्न स्तर ता नेतृत्वकारी मानेय नाड़ियना लेक्का मंतोर, ओरु एर लोप्पा मंदाना, पोंगना एर संगे नाड़ियना, अदिना विपरीत दायनायो। जनता तुन रांगना-धमके कीयानायो! इद्रम बदे वेने परिस्थिति ते कीयानायो। मजदूर, किसान, विद्यार्थीरा जनता ओसो जनवादी पार्टिंग ना सदस्य, बुद्धिजीविरा बहुसंख्या तुन रांगना-धमके कीयानायो। खुद खुद किन जनता ना विरुद्ध निल्पी कीयानायो, उल्टा ओरा संगे मंदाना। जनता वेने गलती क्रिया पर्रिता। अदु गलती कीतेके अदिन वेल्ले जीवा कीसी समझे कीयाना; अदु मीवा पोल्लो केंजला इनकार कीतेके दूसरा मौका काजे हरीं हूडना। मति अदिनकुनल अलग-थलग आयनायो, नाड़ियनास्के एर अलग आयवा लेक्का। ल्यू पेइ किन तम्मा सहायक लेक्का चूके ल्यांग दोरकतास्के ओरु “कीके तुन एर दोरकता लेक्का” आया मंता इत्तोर। इदु निज्जम आंदू। ओरु इरवुरा कीके-एर लेक्का संबंध ता बारे ते वेहाना सिर्फ उपन्यास लोप्पाने आयवा ऐतिहासिक रूप ते रिकार्ड वेने कित्तोर। चूके ल्यांग जनता आंदुर

अनि ल्यू पेइ नेतृत्वकारी मानेया वरोर नेतृत्व कींतोर अनि दूसरोर अदिना पालन कींतोर।

पूरा ज्ञान ता स्रोत जनता नाए मंदिता। नन्ना हमेशा बुद्धिजीविर सबसे ज्यादा अज्ञानी मंतोर इंताना इद उंदी सही पोल्लो आंदू। खुद वेल्ले ज्ञानी समझेमायना बुद्धिजीविर तम्मा तोका तेहिंतोर अस्के ओरा तोका वानरराज सुन ऊ-खुंग ना तोका तुकू वेने ज्यादा लाटी मंदिता। सुन ऊ-खुंग 72 रूप धारण किया परितोर अनि उंदी बेरा ओरु तम्मा तोक तुन उंदी झंडा लेक्का बदले कींतोर- अचोन लाटी कियानोर। बुद्धिजीविर तम्मा तोका पोरो तेहिंतोर अस्के वेल्ले भयानक दिसिंतोर। “नावा नंबर दुनिया लोप्पा पहली हिल्वेके कम से कम दूसरा तो मंताए।” “मजदूर ओसो किसान लोर इत्तेके वेल्ले बकवल मंतोर! मुशिकल ते रेंडु-मूंड अक्षर पढ़ेमायला-रासला करिया परितोर।” मति पूरा परिस्थिति ता निर्णय आखरी ते बुद्धिजीविर आयवा श्रमिक लोर कींतोर, श्रमिक लोर सबसे मुन्ने हत्ता दस्ता इत्तेके सर्वहारा वर्ग कींता।

बोर बोना नेतृत्व कींतोर - सर्वहारा वर्ग पूंजीपति वर्ग ता लेवेके पूंजीपति वर्ग सर्वहारा वर्ग ता? सर्वहारा वर्ग बुद्धिजीविरा लेवेके बुद्धिजीविर सर्वहारा वर्ग? बुद्धिजीविरा काजे ओरु तम्मा बदलाव कीसी सर्वहारा बुद्धिजीवि बनेमायना जरूरी मंता। इदिन विडचसी ओरा काजे बदे दूसरा हरीं हिल्ले। “तोलाए हिल्वे केलकु बेगा रोमा परिंतांग?”³ हत्ता कालम ते “केलकु” इत्तेके बुद्धिजीवि पांच “तोला” पोरो टिकेमासी मत्तांग, इत्तेके ओरा पोरो आधार आसी पिस्वल पिस्सिंतोर। पहली तोला साम्राज्यवादी मालिकाना, दूसरा तोला सामंती मालिकाना, तीसरा तोला नौकरशाही-पूंजीवादी मालिकाना मत्ता। जनवादी क्रांति ता उद्देश्य साम्राज्यवाद, सामंतवाद ओसो नौकरशाही-पूंजीवाद मूंडासी बेहरा-बेहरा मेट्टांग गुच्चि कीयाना मत्ता या? चौथा तोला राष्ट्रीय पूंजीवादी मालिकाना मत्ता, 5 तोला सुडला उत्पादक मालिकाना इत्तेके किसान, दस्तकारीरा व्यक्तिगत मालिकाना मत्ता। हत्ता कालम ते बुद्धिजीविर पहली मूंड तोलांग पोरो टिकेमासी मंदानोर लेवेके पाइना रेंडु तोलांग पोरो, अविना पोरोने

आधार आसी पिस्वल पिसिंतोर। इव 5 तोलांग इंजे वेने मंतोर? “रेंडु तोलांग इंजे हिल्लेंगा” साम्राज्यवाद तन्ना गेत्तेंग मूड्डा कित्ता अनि अदिना सम्पत्ति पोरो अधिकार कित्ता। सामंती मालिकाना खत्म कित्ताद मंता अनि जमीन किसान लोर किन वापिस कित्ताद मंता, इंजे कृषि-सहकारिता पोरो वेने अमल आया मंता। नौकरशाही-पूंजीवादी कारोबार ता राष्ट्रीयकरण आता। राष्ट्रीय पूंजीवादी उद्योग-वाणिज्य कारोबार संयुक्त राष्ट्रीय-निजी कारोबार लेक्का बदलेमाता अनि बुनियादी रूप ते समाजवादी कारोबार बनेमाता। किसान ओसो दस्तकार, व्यक्तिगत मालिकाना सामूहिक मालिकाना ते बदलेमाता, इद सामूहिक मालिकाना इंजे सुदृढ आताद हिल्ले, इदिन सुदृढ बने कियाला उचुन साल ओसो लागियर। इव पांच तोलांग इंजे हिल्ले, मति इविना पिस्ता प्रभाव “केल्कु” ना पोरो, पूंजीपतिर ओसो बुद्धिजीविर पोरो, इंजे वेने मंता। ओरु इव तोलांग कुन बस्केने मरंगा परवोर, कंजकड़ ते वेने सुरता तासिंतोर। पाड़ना समाज तल, समाज रिती-रिवाज तल तिरियसी वातोर, पाड़ना आदत ओसो पाड़ना पिस्वल पिस्सना तरिकांग कुन बद्रम मत्ता अद्रमे तासना पूरा कोशिश कींतोर। अदिन काजे मानेय ना पूना बदलाव कियाला वेल्ले टाईम लागियर।

इंजे बुद्धिजीविर बद तोला पोरो आधार आसी मंतोर? ओरु सार्वजनिक मालिकाना ता तोला पोरो सर्वहारा वर्ग पोरो टिकेमासी मंतोर। ओरकिन पिस्वल पिस्सना साधन बोर हींतोर? मजदूर ओसो किसान कींतोर। बुद्धिजीविर उंदी रकम ता अध्यापक लोर आंदुर, वीरकिन मजदूर वर्ग ओसो मेहनतकश जनता तम्मा पिल्ला-पेकोर किन शिक्षित कियाला चुने कित्ता। ओरु मालिक लोरा इच्छा विरुद्ध तम्मा माल हियाना, घिसे-पिटे लेखन, कनफ्यूशियसवादी क्लासिकी रचनांग लेवेके पूंजीवादी पोंगडिंग पोल्लोंग कीसी शिक्षित कीसोर मत्तेके उचुन प्रतिक्रांताकारिर तैयार कीसोर मत्तेके मजदूर वर्ग इदिन सहेमायवा लेवा ओरकिन बरखास्त कींता अनि वायना साल ओरा नवीनीकरण कीयाना।

सौ दिव्यंग मुन्ने नन्ना पाड़ना समाज तल वात्ता बुद्धिजीविरा इंजे बदे आधार हिल्ले, ओरु तम्मा पाड़ना सामाजिक ओसो आर्थिक आधार तुन

इत्तेके पाँच तोलांग पोहतोर, ओरा मुन्ने पूना तोला पोरो टिकेमासी मंदाना विड़चसी दूसरा बदे तरीका हिल्ले इत्ताना उचुन बुद्धिजीविर इंजे लेस्कता लेक्का आतोर। ओरु वड़ियता हिरकता लेक्का आतोर, ओरा काजे पोरो बाताले छत्त हिल्ले अनि दोड़ काल तासला वेने बदे जागा हिल्ले। नावा हिसाब ते ओरकिन “वड़िय ते हिरकी कीयाना” महान लोकर इनमूड़ांता। वड़िय ते हिरसी कित्ता लोकर मलसी दायला आल्संतोर मति दाय़ा परवो बारांकु इत्तेके ओरा पाड़ना लोहकु, ओरा पांच तोलांग ना अस्तित्व खत्म आता। ओरु लोन हिल्ला लेक्का आतोर मति सर्वहारा वर्ग पोरो आधार आसी मंदाला तैयार हिल्ले। ओरु सर्वहारा वर्ग पोरो आधार मंदाला आल्सतेके ओरु सर्वहारा विचार कुना अध्ययन कीयाना, सर्वहारा वर्ग संगे गोती तासना अनि मजदूर, किसान लोरा संगे गोती कीयाना जरूरी मंता। मति ओरु इद्रम किया परवोर। वस्तु कैदल हत्ता इंजी पुंजी वेने अदिना काजे लालच तोहंतोर। इंजे माटु ओरकिन जागृत कियाला काजे समझे किया मंतोम। नावा हिसाब ते इद बेहरा वाद-विवाद पेरके ओरकिन बद्रमाई जागृत किया परितोम।

मध्यवर्ती परिस्थिति वाले बुद्धिजीविर किन जागृत कीयाना ओसो ज्यादा घमंड कीयानायो, बारांकु इत्तेके ओरा ज्ञान उचुन सीमित मंता। नावा हिसाब ते वीरु बुद्धिजीविर आंदुर वेने ओसो हिल्ले वेने, वीरकिन अर्ध-बुद्धिजीविर इंदाना ज्यादा बेस आयर, बारांकु इत्तेके ओरकिन गलती कियवा बदे उसूल ता पोल्लो कीयाना ज्ञान वेल्ले कम मंता। इंजे माटु दक्षिपंथी बुद्धिजीविर किन अलग विड़सना बारांकु इत्तेके ओरु प्रतिक्रियावादिर आंदुर। मध्यवर्ती बुद्धिजीविरा गलती ओरु वायकी जंगो वायोने कींतोर, स्पष्ट दिशा पोय्या परवोर अनि बस्के-बस्के लेस्कंतोर। ओरा लोप्पा वेल्ले ज्ञान मत्तेके गलतिंग बारांकु कीवेर? मीवा लोप्पा इचोन अज्ञानता मत्तेके मीटु बद्रम वायकी जंगो वायोन कीयविर? गूडी पोरो मोड़ियता रोंडा वड़िय संगे हिके-हके होलेमांता। इव सब्बे पोल्लो नल मीकिन ज्यादा जानकारी हिल्ले इंजी समझेमांता। इदिना लोप्पा ज्यादा जानकारी तासानोर मजदूर, किसान लोरा नड़मा ता अर्ध-सर्वहारा लोकरे

आंदुर। ओरु सुन ता-ख्वी ना माल सिर्फ नकली मंता इंजी हूड़ा परितोर। ओरु बोर ज्यादा पुत्तोर इंजी हूड़ा परितोर? वेल्ले कम पड़ेमातोर किन वेल्ले कम जानकारी मंता इंजी बदे ड़ावुट हिल्ले। पूरा परिस्थिति ओसो आम दिशा ता बेरे ते महत्वपूर्ण निर्णय कीयानास्के सर्वहारा वर्ग पोरो आधार आसी मंदाना जरूरी मंता। नन्ना खुद वेने बदे महत्वपूर्ण काम कीयाना, महत्वपूर्ण निर्णय एतना मुन्ने जरूर मजदूर किसान लोरा संगे सलाह-मशविरा कीतान, ओरा संगे ओसो घनिष्ठ संबंध तासना कार्यकर्ता लोरा संगे वड़किंतान, ओरकिन नावा राय सही मंता या हिल्ले इंजी पूछेमांताना अदिनके विभिन्न जागा ता दौरा कीयाना वेल्ले जरूरी मंता। सिर्फ पेकिंग ते उदसी मंदाना खतरनाक आंता। इद ऊसाड़ भूमि आंदू तानगडल बदे कच्चा माल दोरका परवो। पूरा कच्चा माल मजदूर ओसो किसान लोरगडल देश ता कौंटा-कौंटा तल वांता। चीनी कम्युनिस्ट पार्टी ता केंद्रीय कमिटी उंदी प्रोसेसिंग कारखाना लेक्का मंता, अगा कच्चा माल इस्तेमाल कीसी उत्पादन तैयार आंता। तैयार आता माल उत्पादन बेस आयना लेवेके गलतिंग आंतांग। ज्ञान ता स्रोत जनता आंदू। जनता नड़मा ता अंतरविरोध कुन सही तरीका ते हल कीयाना इत्तेके तथ्य संगे सच्चाई ता तलाश कीयाना अनि जनदिशा तुन अमल कीयाना। जनदिशा सबसे जरूरी वस्तु आंदू। माटु जनता तल अलग-थलग आयवा मंदाना, जनता संगे मावा संबंध कीके ओसो एर लेक्का मंदाना जरूरी मंता।

माटु दक्षिणपंथिर किन सर्फ उंदे रकम ते खत्म कीयाना जरूरी मंता या? अविना पोरो उंदी-रेंडु देब्बावाटना वेल्ले जरूरी मंता। इद्रम कियवेके ओरु डोलना नाटक कींतोर। माटु इद्रम तोरा पोरो हमला कीयाना, ओरा पेरके अरना जरूरी मंता या? इंगो, हमला कीयाना जरूरत मंता। मति इदिना उद्देश्य ओरकिन सही हरीं ते तत्ताला मजबूर कीयाना मंदाना। हमला कीयानास्के माटु हर संभव आता तरीका पोयसी ओरकिन पूरा अलगाव ते वाटना, सिर्फ अस्केने ओरा लोप्पटल सब्बे तोर किन आयवेकाई कम से कम उचुन मुल किन मना पक्ष ते क्रिया परितोम। ओरु बुद्धिजीविर आंदुर अनि ओरा लोप्पटल उचुन मुल बेहरा-बेहरा विद्वान लोर वेने मंतोर; मना

पक्ष ते वात्ता पेरके ओरु काम वाया परितोर। ओरकिन मना पक्ष ते कीयाना अनि उचुन काम हियाना। इदे आयवा ओरु इंजे नकारात्मक उदाहरण ते जनता तुन शिक्षित कीयाना शिक्षक लेक्का मना वेल्ले सेवा कींतोर। अदिन काजे माटु ओरकिन ह्वांगफू डोड्डा ते मुडुंदी कीयाना आयवा इंजे वेने ओरा बीमारी ता इलाज कीसी बीमार किन बचे कीयाना तरीका पोयना। उचुन मुल मना पक्ष ते वायला आल्सना संभावना मंता। सुन ता-य्वी लेक्कटा लोकरु तम्मा जिद्द पोरो नितसी तोर अनि बदलाव कियाला इनकार कींतोर अस्के ओरकिन तम्मा परिस्थिति ते विडसना। इंजे माटु वेल्ले काम कीयाना मंता। माटु इद्रम ता लोकरु पोरो वायना 50 साल एवनल रोज हमला कीसोर मत्तेके बद्रम आंता! उचुन मुल तम्मा गलतिंग सुधरे कियाला इनकार कींतोर, ओरु यमराज ना दरबार ते दायनास्के वेने अविन तम्मा संगेने पोयसी दाया परितोर अनि यमराज किन “नन्ना पांच तोलांग ना रक्षक आंदाना नन्ना वरोर ‘ईमानदार’ मानेय आंदाना कम्युनिस्ट पार्टी ओसो जनता नावा वेल्ले रिपेयर कित्ता मति नन्ना तल्ला वरिहताद हिल्ले अनि हर परीक्षा पास कितान” इंदा परितोर। मति ओरकिन नेंडु यमलोक ते वेने बदलाव आता, अगा मार्क्स, एंगेल्स ओसो लेनिन ना शासन वात्ता इंजी समझेमाता। नेंडु भगवान टोला वेने रेंडु मंतांग, उंदी पूंजीवादी दुनिया ता भगवान टोला ता शासक ओरा पाड़ना समाज ता यमराज आंदुर, समाजवादी दुनिया ता भगवान टोला ता शासक मार्क्स, एंगेल्स ओसो लेनिन आंदुर। नन्ना कट्टर दक्षिणपंथिर किन नेटल उंदी शताब्दी पेरके वेने जरूर सजा हियमूडायर इंजी आल्संतान।

नोट

- 1) ‘ल्ये च’, ‘थ्येन रुइ’।
- 2) ‘सीडिंगरैय्या मंतोर’ ना राय इगा गलतिंग कियानोर नेतृत्वकारी कार्यकर्ता लोर कीयाना शुद्धिकरण आंदोलन ताकनास्के जनता ना आलोचना केंजसी आत्मालोचन काजे कीयाना ओरा कोशिश, इदिना संगे ओरु जनता तल माफी तालिंकंतोर।
- 3) ‘च्चो च्वान’, ‘राजा शी ना 14वी साल’।

1957 ता एद्दी कालम ता परिस्थिति⁵⁶

जुलाई 1957

मना देश लोप्पा समाजवादी क्रांति कालम ते जनता ओसो पूंजीवादी दक्षिणपंथिरा नडमा ता अंतरविरोध (कम्युनिस्ट पार्टी, जनता, समाजवाद ता विरोध कीयाना अंतरविरोधकु मना ओसो दुश्मन नडमा मत्ता अंतरविरोधकु आंदुंग), उंदी शत्रुपूर्ण, बस्केने हल आयवा मंदाना ओसो पिस्वल मत्ताचोन जोम मंदाना अंतरविरोधकु आंदुंग।

मजदूर वर्ग ओसो कम्युनिस्ट पार्टी खिलाफ वेल्ले बेय्यल लेक्का हमला कीयाना पूंजीवादी दक्षिणपंथिर, प्रतिक्रियावादिर लेवेके प्रतिक्रांतिकारी आंदुर। ओरा पोरो इद्रम ता लेबल वाटना जागा ते ओरकिन दक्षिणपंथीर इंदाना, बारांकु इत्तेके उंदी मध्यवर्ती लोकुरकिन मना पक्ष ते कियाला मदद दोरकिंता अनि दूसरा दक्षिणपंथिर किन विभाजित कियाला मदद दोरकिंता, अदिना लोप्पटल उचुन बदलेमासी मावा बगिल वायना संभावना आंता।

पूंजीवादी दक्षिणपंथिर आखरी एवनल बदलेमायोर, ओरु कट्टरपंथी तत्व आंदुर, मति ओरु खुफिया एजेंट हिल्वेके, तोडफोड कार्यवाही कियवेके ओरकिन वेने काम हियमूडायर अनि नागरिक अधिकार हियमूडायर। इद कार्यनीति लागू कीयाना बारांकु इत्तेके मुन्नेटा वेल्ले घटनांग नल अतिवादी नीति तल नकारात्मक रिजल्ट दोरकतांगा। माटु दूरदर्शी मंदाना इंजेटल बचोनो दशाब्दंग पेरके माटु वर्तमान घटनांग ओसो शुरू कीतेके माटु पूंजीवादी दक्षिणपंथिरा पोरो मावा व्यवहार तल सर्वहारा वर्ग ता क्रांतिकारी काम पोरो बचोन गहरा प्रभाव अरता, अदिना बचोन फायदा आंता इंजी समझेमांता।

⁵⁶ जुलाई 1957 ते छिंगताओ लोप्पा आता प्रांतीय ओसो म्युनिसिपल पार्टी-कमेटिंग ना सचिव लोरा सम्मेलन ताकनास्के रास्ता लेख तुन छापे कीसि सम्मेलन लोप्पा तूस्ताद कीताद मत्ता। अदे साल अगस्त ते इदिन पार्टी ता नेतृत्वकारी कार्यकर्ता लोरा नडमा वेने वितरीत कीताद मत्ता।

मना उद्देश्य उंदी केंद्रीयता संगे जनवाद मंदाना, अनुशासन संगे आजादी वेने मंदाना, एकीकृत संकल्प संगे व्यक्तिगत ओसो सब्बे तोर किन जीवा कीयाना राजनीतिक परिस्थिति पुट्टी कीयाना मंता। इद्रम कीसी मना समाजवादी क्रांति तुन ओसो मना समाजवादी निर्माण तुन मुन्ने ओयमूडांता, मुश्किल कुन दूर कियमूडांता, मना देश लोप्पा उंदी आधुनिक उद्योग, आधुनिक कृषि निर्माण वेल्ले तेज कियमूडायर, मना पार्टी तुन ओसो मना राज्य तुन वेल्ले सुदृढ़ कियमूडायर, ताना लोप्पा वेल्ले भीषण उर्ा वडिय तूफान ता मुकाबला कियाला क्षमता बेरसी कियमूडांता। इगा मुख्य विषय जनता नडमा ता अंतरविरोध कु ओसो मना, दुश्मन नडमा ता अंतरविरोध कुन सही तरीका ते हल कीयाना मंता। इदिन तरीका तथ्य संगे सच्चाई ता दोरकी कीयाना ओसो जनदिशा पोरो अमल कीयाना मंता। इदिनगडल पुट्टना तरीका प्रमुख नीतिंग पोरो विचार-विमर्श कियाला काजे पार्टी सदस्य ओसो गैर-पार्टी लोकुर शामिल आयना अनि खुला शुद्धिकरण आंदोलन ताकी कीयाना, पार्टी, सरकार ता वेल्ले कमजोरिंग, गलतिंग ना समाचार पत्र लोप्पा आलोचना कीयाना लेक्कटा मीटिंग केयना। जनवादी पार्टींग लोप्पा शिक्षा, पत्रकारिता, विज्ञान, प्रौद्योगिकी, कला-साहित्य, सार्वजनिक स्वास्थ्य ओसो उद्योग-वाणिज्य लोप्पा ओसो मजदूर वर्ग, किसान समुदाय ता विभिन्न श्रेणिंग, दस्तकार ओसो बाकी शहरी, नाहकुना श्रमिक लोरा लोप्पा वेने अलग-अलग समूह, अलग-अलग मंजिल ते हर कदम शुद्धिकरण, समाजवादी-शिक्षा आंदोलन ताकी कीयाना। पूंजीपति वर्ग ओसो पूंजीवादी बुद्धिजीविरा समस्या ओरु समाजवादी बदलाव स्वीकार कीयाना मंता, इदे निम्न-पूंजीपति वर्ग पोरो (इदिना लोप्पा किसान ओसो शहर, नाहकुना लोप्पा तम्मा खुद ता रोजगार कीसोर मत्ता श्रमिक लोर शामिल मंतोर), खासकर खुशहाल मध्यम किसान लोरा पोरो वेने लागू आंता; मति मजदूर वर्ग ओसो कम्युनिस्ट पार्टी ता बुनियादी कैडर कुना समस्या ओरा कार्यशैली सुधरे कीयाना मंता। इव समस्यांग ना स्वरूप अलग-अलग मंतांग सामाजिक रूप ते संबंधित मंतांग। इव अलग मत्तेके वेने शुद्धिकरण ता नारा रेंडासी ना इस्तेमाल

बारांकु आंता? बारांकु इत्तेके ज्यादातर लोकुर इद नारा तुन हल्कोए स्वीकार कींतोर। लोकुर किन माटु कम्युनिस्ट पार्टी ओसो मजदूर वर्ग वेने शुद्धिकरण कीसोर मत्तास्के मीटु वेने इद्रम कीयानायो या? इंदा परितोमा इद्रम पहलकदमी पूरा मावा कैदे मंदिंता। शुद्धिकरण ता तरीका आलोचना, आत्मालोचना कीयाना, तथ्य कुन पेश कीयाना ओसो तर्क-वितर्क कीयाना मंदिंता। शुद्धिकरण ता उद्देश्य संघर्ष ता राजनीतिक दिशा सुधरेमायना, विचारधारात्मक स्तर बेरसी कीयाना, काम लोप्पा मत्ता गलतिंग दूर कीयाना, व्यापक जनता तुन एकताबद्ध कीयाना, पूंजीवादी दक्षिणपंथिर, सब्बे समाजवाद-विरोधी तत्व कुन अलगाव ते वाटना अनि विभाजित कीयाना लेक्का मार्गदर्शन कीयाना। इगा वेहता पूंजीवादी दक्षिणपंथिरा लोप्पा उचुन मुल मौका दोरकी कीसी पार्टी, नौजवान संघ लोप्पा नेंगतोर वेने मंतोर, वीरा राजनीतिक रंग पार्टी, नौजवान संघ तुकू बाहर ता दक्षिणपंथिर लेक्का मंता; वीरु सर्वहारा वर्ग ता क्रांतिकारी काम संगे विश्वासघात कींतोर अनि पार्टी पोरु बेय्यल लेक्का हमला कींतोर, अदिन काजे ओरकिन पूराए एक्सपोज कीयाना अनि पार्टी तल तेंडसियाना अनि पार्टी ओसो नौजवान संघ ता कैडर कुना शुद्धता मत्ता लेक्का तासना।

जनता ना बहुसंख्या पोरु सबसे मुन्ने बुनियादी जनता इत्तेके मजदूर, किसान लोरा बहुसंख्या पोरु दृढ़ विश्वास तासना मना बुनियादी शुरुआत आंदू। उद्योगपतिर, व्यापारिर ओसो बुद्धिजीविरा लोप्पाटल वेने वेल्ले लोकुर दक्षिणपंथिरा हमलांग ताकनास्के उचुन जोम धोखा ते वासी दुलमुल आता लेक्का मंता, उचुन हलांग पेरके दक्षिणपंथिरा खिलाफ जवाबी हमला शुरु कित्तास्के होश ते वासी मावा पक्ष एतना शुरु कित्तोर। अदिन काजे पेरके इदिना लोप्पा बहुसंख्यक लोकुर विश्वासनीय मंतोर अनि समाजवादी बदलाव तुन स्वीकार किया परितोर। बस्केने सर्वहारा वर्ग ता ताकत तुन कम कीसी हूडता ओसो पूंजीवादी दक्षिणपंथिरा ओसो का ताकत तुन बेरसी हूडना गलती कित्ता कामरेड्स ना संख्या वेल्ले मंता। प्रिफेक्चर, काउंटिंग, जिलांग, श्यांग ओसो कारखानांग लोप्पा इंजे वेने वेल्ले कार्यकर्ता लोर इद्रम कींतोर। ओरुकिन माटु मना पक्ष ता ताकत तुन

कम कीसी, दुश्मन पक्ष ता ताकत तुन बेरसी कीसी हूडनायो इंजी समझे कीयाना। नाहकुना इलाका लोप्पा जमींदार ओसो धनी किसान लोरा लोप्पा पूना बदलाव आया मंता; ओरा लोप्पटल उचुन मुल इंजे वेने गड़बड़ किया मंतोर अनि ओरा पोरो मना सतर्कता बेरसी कीयाना। ज्यादातर खुशहाल मध्यम किसान सहकारी समितिग लोप्पा मंदाना आल्सिंतोर; ओरा लोप्पा सिर्फ उचुने मुल सहकारी समितिग नल अलग आयला कोल्हार कींतोर अनि पूंजीवादी हरीं पोयला तैयार मंदितोर। माटु क्षमता पोरो आधार आसी ओरा संगे अलग-अलग रकम ते व्यवहार कीतोमा नाहकुना लोप्पा वर्गदिशा पोरो ध्यान हियाना ओसो मुन्नेटा गरीब किसान, खेतिहर मजदूर लोर किन नेतृत्वकारी निकाय कुना लोप्पा प्रभुत्वकारी जागा हियाना, संगे मध्यम किसान लोरा संगे एकता कीयाना बगिल ध्यान हियाना जरूरी मंता। नन्ना केंद्रीय कमेटी बगिल तल तुरंत उंदी निर्देश जारी कीयाना, इदिना संगे पार्टी लोप्पा मत्ता दक्षिणपंथी अवसरवादी विचार कुन, उचुन कार्यकर्ता लोरा लोप्पा मत्ता अलगावादी विचार कुना ओसो खुशहाल मध्यम किसान लोरा पूंजीवादी, व्यक्तिवादी विचार कुना आलोचना कीयाना अनि जमींदार, धनी किसान लोरा प्रतिक्रांतिकारी कार्रवाईग पोरो हमला कियाला काजे नाहकुना पूरा आबादी लोप्पा बेहरा स्तर ता उंदी समाजवादी-शिक्षा आंदोलन ताकी कीयाना इंजी समर्थन कींताना। आलोचना ता मुख्य निशाना वायकी जंगो वायोने इंदाना खुशहाल मध्यम किसान लोर किन बने कीयाना ओरा पूंजीवादी विचार कुना खिलाफ तर्क-वितर्क संगे संघर्ष कीयाना। जिलांग ओसो श्यांग कुना कार्यकर्ता लोरा शुद्धिकरण आंदोलन ओसो तीसरी श्रेणी ता सहकारी समितिग ना जांच-पड़ताल, सुदृढीकरण संगे तालमेल कीसोरे, इद संघर्ष तुन हर साल उंदी बेरा दृढता ते ताकी कीयाना अनि सब्बे सहकारी समितिग कुन सुदृढ कीयाना। नाहकुना लोप्पा वेने मुन्ने किसान लोर किन “खुला राय हियाला” हियाना इतेके आलोचना कियाला हियाना। अस्के ओरा बेसता राय तुन लागू कीयाना अनि गलत राय ता आलोचना कीयाना। इव सब्बे पोरोटल लोहता कार्यदल ता मदद

ते स्थानीय कार्यकर्ता लोर ताकी कीयाना नाहकुना इलाका कुना शुद्धिकरण आंदोलन लोप्पा कीयाना। शहर कुना लेक्काने नहाकुना इलाकांग लोप्पा वेने रेंडु हरी (समाजवाद ओसो पूंजीवाद) नडमा ता संघर्ष मंता। इदिना लोप्पा पूरा जीत दोरकी कियाला वेल्ले टाईम लागिंयरा। इद पूरा संक्रमण कालम ता काम आंदू। नाहकुना लोप्पा लोन-परिवार ओसो सहकारी समिति तुन मेहनत ओसो बचत संगे ताकना काम तुन उंदे बेरा प्रोत्साहन हियाना अनि देश, सहकारी समिति, लोन-दुवार-परिवार तुन जीवा कीयाना विचार तुन वेने उंदे बेरा प्रोत्साहन हियाना। लोन-परिवार तुन मेहनत ओसो बचत संगे ताकना समस्या तुन हल कियाला काजे माटु विशेष महिला संगठन ता कोशिश पोरो आधार आसी मंदाना। वायना उचुन साल कुना लोप्पा हर साल औसतन 3500 करोड़ चिन अनाज टैक्स ओसो 5000 करोड़ चिन अनाज जरूर अस्सना। मति फसल बेस आयना आयवा मंदाना अनुसार इदिना मात्रा लोप्पा कम-ज्यादा वेने कियमूडांता। नहाकुना इलाका लोप्पा उत्पादन हर साल बेरससोर दांता अनि अनाज ता कमी वाले परिवार हर साल कम आसोर दांता, अदिन काजे नहाकुना इलाका लोप्पा वम्मना अनाज ता मात्रा हर साल उचुन कम कीयाना। शहर कुना लोप्पा वेने अनाज ता बिक्री ज्यादा आंता, ताना लोप्पा कटौती कीयाना। सिर्फ इद्रमे संभव संकट ता मुकाबला कियाला काजे राज्य तन्ना अनाज भंडार तुन हर साल बेरसी किया परिंता। 8,500 करोड़ चिन अनाज जमा कियाला असफल आतेके हाटुम-रेट पोरो प्रभाव अरिंता, पूरा राष्ट्रीय आर्थिक योजना तुन सुचारू रूप ते पूरा कियाला बाधा वायर अनि संकट वात्तास्के माटु बदे तरीका हिल्ला लेक्का आंतोम अनि इद उंदी वेल्ले खतरनाक परिस्थिति मंदिंता। इयेंड शरद ता फसल तुकू मुन्ने नाहकुना इलाका लोप्पा व्यक्तिवाद ओसो अलगाववाद खिलाफ (राष्ट्रीय ओसो सामूहिक हित कुना परवाह कीवोंग) संघर्ष शुरू कीयाना जरूरत मंता।

बेगा प्रतिक्रांतिकारीर मंतोर अगा ओरकिन खत्म कीयाना। खत्म कम लोकरु किन कीयाना मति हौकना सज़ा रद्द कीयानायो अनि आम माफी हियानायो। जेल तल पेस्ता पेरके ओरकिन पूना अपराध कींतोर

ओरकिन गिरफ्तार कीयाना अनि सजा हियाना जरूरी मंता। मावा समाज लोप्पा गुंडा, बदमाश, चोर-डाकू, हौकानोर, महिलांग ना बलात्कार कियानोर, गबन कियानोर अनि गंभीर अपराधिर, सार्वजनिक व्यवस्था तुन नुकसान कियानोर ओसो कानून ता गंभीर रूप ते उल्लंघन कियानोर किन सजा हियाना; आम जनता लब्बड़ तत्व समझेमायनोर किन वेने सजा हियाना। इंजे न्याय विभाग, सार्वजनिक सुरक्षा विभाग ता उचुन कार्यकर्ता लोर तम्मा काम बेस कीसोर हिल्लेर अनि इद्रम ता लोकर किन खुला विडसा मंतोर, वीरकिन पोयसी सजा वाटना जरूरी मंता; इद गलत मंता। इद्रम सुडला अपराध काजे वेल्ले बेहरा सजा हियाना सही हिल्ले, अद्रमे बेहरा अपराध काजे हल्को सजा हियाना वेने सही हिल्ले; वर्तमान कालम ते बेहरा अपराध कुना काजे हल्को सजा हियाना खतरा मंता। जुआ करसना पोरो प्रतिबंध वाटना। प्रतिक्रियावादी गुप्त सोसाइटींग पोरो वाटता प्रतिबंध कुन दृढता ते लागू कीयाना। दक्षिणपंथी विद्यार्थिना नेताल लोरकिन पूरा आलोचना कीयाना मति ओरकिन साधारण रूप ते ओरकिन ओरु बेगा पढ़ेमाया मंतोर अगाने मंदाला हियाना। इद्रम कीतेके ओरु दूसरोर किन निगरानी ते मंजी खुद किन सुधरे किया परितोर अनि “शिक्षक” लोरा भूमिका निभे कींतोर। पोरो वेहता सब्बे पोल्लोंग संक्रमण-कालम काजे काम वायना लेक्का मंता अनि अविन लागू कीयाना जिम्मेदारी प्रांत, म्युनिसिपलटिंग ओसो स्वायत्त प्रदेश कुना पार्टी-कमेटींग ना हट्टा ते मंता। केंद्रीय प्रशासन कुना नीतिंग, कानून लोप्पा, न्याय, सार्वजनिक सुरक्षा, संस्कृति, शिक्षा ता काम कीयाना स्थानीय विभाग कुन अनिवार्य रूप ते प्रांत, म्युनिसिपलटिंग ओसो स्वायत्त प्रदेश कुना पार्टी-कमेटींग ओसो जन-परिषद कुना निर्देशन ते काम कीयाना।

मावा साधारण विषय जनता नडमा ता अंतरविरोध तुन सही तरीका ते हल कीयाना। इदिन लोकर बस्के एवनल पुन्नोर अस्के एवनल लगातार चर्चा कीयाना; इद्रम कीतेके मुन्ने कठिन मत्ता विषय पेरके हल्को आंता। जनता ना नडमा ता अंतरविरोध संबंधित सवाल तुन मीवा दिमाग ते स्पष्टिकरण कीयाना, अदिन स्पष्ट रूप ते वेहचियाना, इद्रम बचोनो

अंतरविरोध कुन सही तरीका ते हल कीयाना। सफलता दोरकतास्के, अनुभव दोरकी कितास्के मुन्ने लेक्का वेरीं वेस्सो आया।

नन्ना इदिन ओसो उंदी बेरा वेहाकाना। जनता नडमा ता अंतरविरोध कुन सही तरीका ते हल कीयाना इत्तेके जनदिशा पोरो अमल कीयाना (इदिना पोरो मना पार्टी लगातार जोर हींता)। पार्टी सदस्य लोर किन तम्मा काम लोप्पा जनता संगे सलाह-मशविरा कियाला निपुण आयना अनि बस्केने वेने जनता तल अलग-थलग आयनायो। पार्टी ओसो जनता नडमा ता संबंधि कीके ओसो एर लेक्का मंता। पार्टी ओसो जनता नडमा बेसता संबंध लेवा समाजवादी व्यवस्था निल्पी कीयाना संभव हिल्ले ओसो अदिन सुदृढ़ वेने कियमूडायो आंता।

सशस्त्र सेनांग लोप्पा बचोनो बेरा शुद्धिकरण आंदोलन आंता; अनुशासन ता मूंड मुख्य नियम ओसो ध्यान हियाना लेक्कटा आठ पोल्लोंग लागू किताद मंता; फौजी, राजनीतिक ओसो आर्थिक समस्यांग लोप्पा जनवाद पोरो अमल किताद मंता, युद्ध ताकानास्के स्क्वाड लोप्पा आपसी सहयोग दल बने किताद मंता; लोकुर किन हौकना-पिटहना अनि रांगना-धमके कीयाना अनुमति हिल्ले अनि वित्तनोर किन हौकना सजा हियाना पोरो पाबंदी वाटताद मंता। अद्रमासी सैनिक लोरा मनोबल वेल्ले बेरसता अनि मना सेना जीड़ता। हथियारबंद सैनिक लोरा नडमा आया परिंता इत्तेके कारखाना, नाहकु, ऑफिस ओसो विद्यालय कुना लोप्पा जनवाद पोरो अमल कियाला बारांकु कीयानायो, ओरा समस्यांग (अंतरविरोध) कुन जबरदस्ती आयवा समझे कीयाना तरीका संगे बारांकु हल कियमूडायो?

माटु साम्राज्यवादिर किन वेने वेरियोम इंदानास्के मना जनता तले बारांकु वेरियाना? मानेय आम जनता तल वेरियंतोर अनि जनता तर्क समझेमायो इंजी आल्संतोर अदिन काजे अदिन समझे कीयाना जागा ते दबाव वाटना इंजी आल्संतोर ओरु वरोर असली कम्युनिस्ट आयोर।

शुद्धिकरण आंदोलन ताकनास्के माटु गदार ओसो गंभीर रूप ते कानून ता उल्लंघन कियानोर किन विडचसी, पार्टी ओसो नौजवान संघ

ता सब्बे सदस्य लोरा रक्षा कीयाना, ओरकिन तम्मा गलतिंग, कमजोरिंग कुन दूर कियाला तम्मा कार्यशैली सुधरे कियाला, तम्मा कार्य क्षमता ओसो राजनीतिक, विचाराधारात्मक स्तर तुन बेरसी कियाला पूरा मदद कीयाना कोशिश कीयाना। वरोर पार्टी-सदस्य जीवा कियानोर मंदाना, सुदृढ़ क्रांतिकारी संकल्प संगे लैस मंदाना, सब्बे कठिन परिस्थिति ना परवाह कियवा अविना डटेमासी सामना कीयाना विचार संगे निंडसी मंदाना अनि तन्ना व्यक्तिवाद, अलगाववाद, निरपेक्ष समानतावाद ओसो उदारतावाद संगे मुक्त पक्का उद्देश्य तासना जरूरी मंता; लेवेके ओरु असली पार्टी सदस्य आयोर। पार्टी सदस्य तन्ना जीवा कियानदुन ओसो क्रांतिकारी संकल्प तुन पोहंतोर, ओरु तम्मा गलतिंग पोरो नितसी मंतोर, ओरु बारबार चेतावनी हीतेके वेने तन्ना गलती सुधरे कियाला इनकार कीतेके पार्टी कमेटी ओरा पोरो गंभीर रूप ते अनुशासनात्मक कार्यवाही ता सहारा वेने एतना।

6 महीना तल उंदी साल लोप्पा प्रांत, म्युनिसिपलटिंग ओसो स्वायत्त प्रदेश कुना पार्टी कमेटिंग ना प्रथम सचिव (बाकी सचिव वेने) बदे उंदी सहकारी समिति, उंदी कारखाना, उंदी दुकान लेवेके उंदी विद्यालय लोप्पा हंजी खुद जांच-पड़ताल कीसी उचुन जानकारी ओसो “वड़कना अधिकार” दोरकी कीयाना, इद्रम ता तम्मा सामान्य कामकाज ओसो ज्यादा बेस मार्गदर्शन कीयाना जरूरी मंता। प्रिफेक्चर, काउंटिंग ओसो ओसो जिलांग ना पार्टी कमेटिंग ना सचिव लोर वेने इद्रमे कीयाना।

पूँजीवादी दक्षिणपंथिरा मनम कित्ता वर्तमान आलोचना ता महत्व ता मूल्य कम कीसी हूडनायो। इद राजनीतिक, विचाराधारात्मक मोर्चा ते ताकना उंदी महान समाजवादी क्रांति आंदू। सिर्फ आर्थिक मोर्चा (इतेके उत्पादन साधन कुना मालिकाना लोप्पा) ताकता 1956 ता समाजवादी क्रांति हालो आता अनि अदु सुदृढ़ वेने आयो आता। हंगरी घटना इदिना सबूत मंता। राजनीतिक, विचाराधारात्मक मोर्चा ते वेने उंदी समाजवादी क्रांति ताकी कीयाना जरूरत मंता। बदे डावुट हिल्वा, जनवादी पार्टिंग, बुद्धिजिवीर ओसो उद्योग-वाणिज्य कुना लोप्पा उचुन मुल (दक्षिणपंथिर)

पोरो कम्युनिस्ट पार्टी ता नेतृत्व लागू कीयाना इंजी सवाल कीवोर बारांकु इत्तेके ओरु मावा दुश्मन आंदुर, ज्यादातर लोकर (मध्यवर्ती लोकर) पोरो पार्टी ता नेतृत्व दृढ़ता ते मन्नो आंता; उचुन सांस्कृतिक, शैक्षणिक युनिटकुना लोप्पा पार्टी ता नेतृत्व हिल्ले। मध्यवर्ती लोकर पोरो इद नेतृत्व दृढ़ता ते कीयाना जरूरी मंता, इद काम बचोन जल्दी कीतेके अचोन बेस आयर। पूंजीपति वर्ग ओसो पूंजीवादी बुद्धिजीवी कम्युनिस्ट पार्टी ता नेतृत्व तुन जीवा कीसी मानेमायोर ओसो ओरा नडमा मत्ता दक्षिणपंथिर मना संगे टक्कर एतना शुरू कित्तोर। उंदी बेरा ओरकिन टकरेमासी हारेमाया लागतेके ओरकिन पूरा परिस्थिति ओरा काजे प्रतिकूल ओसो निराशाजनक आयर। सिर्फ अस्केने ओरा लोप्पाटल ज्यादातर लोकर (मध्यवर्ती ओसो उचुन दक्षिणपंथीर लोकर) तम्मा व्यवहार सुधरे कींतोर, तम्मा पूंजीवादी रुझान विडसना, सर्वहारा वर्ग ता पक्ष ते वायना ओसो अदिना पोरो आधार आसी पिस्वल पिस्सना निर्णय कींतोर। डोलना जोम बदलाव कियाला इनकार कीयाना उचुन मुल तम्मा प्रतिक्रियावादी दृष्टिकोण पोयसी ओरकिन तम्मा गुमिया ते ओंता। मति माकिन मना सतर्कता बेरसी कीयाना बारांकु इत्तेके ओरु मौका दोरकी कीसी जरूर तूफान तत्तानूर। इंजेटल इद संघर्ष 10-15 साल एवनल ताकी कीयाना। बदे डावुट हिल्ला 10-15 साल पेरके वर्ग-संघर्ष खत्म आयार इंजी आयो। बस्के एवनल मावा इद दुनिया लोप्पा साम्राज्यवाद ओसो पूंजीपति वर्ग ता अस्तित्व मंदिता अस्के एवनल मावा देश ता प्रतिक्रांतिकारिर ओसो पूंजीवादी दक्षिणपंथी कार्रवाईंग सिर्फ हमेशा वर्ग-संघर्ष ता रूप एतसोर मनवा लेवा अनिवार्य रूप ते विदेशी प्रतिक्रियावादी कार्रवाईंग संगे वेने तालमेल किया मंतांग। उंदी अनिवार्य टाईम पेरके, वर्तमान संघर्ष तीव्र रूप एतंता अनि विचारधारा ता दृष्टि ते इदिना लोप्पा ओसो ज्यादा गंभीरता वांता। हत्ता साल उचुक महीनांग, मुख्य रूप ते हत्ता मूंड महीनांग लोप्पा, माटु पहली निर्णायक अभियान लोप्पा जीत दोरकी कीतोमा मति पूर्ण जीत दोरकी कियाला काजे ओसो उचुन महीनांग एवनल गंभीर कोशिश कीयाना जरूरी मंता अनि माटु इद संघर्ष तुन जल्दबाजी ते खत्म

कीयानायो। इद संघर्ष लोप्पा जीत दोरकवेके समाजवादी निर्माण संभव हिल्ले।

पूरा देश ता जनता नड़मा ताकना बेहरा वाद-विवाद संगे वेल्ले महत्व ता सवाल हल किताद मंता लेवेके हल आया मंतांग। इत्तेके क्रांति ओसो निर्माण आयानास्के मावा काम बेस ताका मंता या हिल्ले (इत्तेके क्रांति ओसो निर्माण काम लोप्पा मुख्य वस्त सफलतांग मत्तांगे, हिल्लेंग), समाजवादी हर्ी पोयना या पोयनायो, कम्युनिस्ट पार्टी ता नेतृत्व, सर्वहारा तानाशाही ओसो जनवादी केंद्रीयता ता जरूरत मंता या हिल्ले, मना विदेशी नीति सही मंता या हिल्ले इंदाना लेक्कटवु। इद्रम ता जन व्यापी बेहरा वाद-विवाद ताकी कीयाना स्वाभाविक मंता। इद शताब्दी ता तीसरा दशक ते सोवियत संघ लोप्पा इद्रम ता वाद-विवाद (बदे उंदी देश लोप्पा समाजवाद ता निर्माण आया परिंता या परवो, इद सवाल ता बारे ते त्रात्स्की ओसो बाकी लोकुरा संगे कित्ता वाद-विवाद लेक्का'), छठी दशक ते इयेटा वाद-विवाद मना देश लोप्पा ताका मंता। माटु इद वाद-विवाद लोप्पा पूर्ण जीत दोरकी किया परवेके मावा काजे मुन्ने दायना मुश्किल आयारा। माटु इद वाद-विवाद लोप्पा जीइतेके मावा समाजवादी बदलाव ओसो समाजवादी निर्माण काम तुन वेल्ले प्रोत्साहन दोरकियर। इद वाद-विवाद विश्वव्यापी महत्व ता उंदी महान घटना आंदू।

माटु चीन लोप्पा आधुनिक उद्योग ओसो आधुनिक कृषि ता बुनियाद तैयार कियाला काजे इंजे टल 10-15 साल टाईम लागियर इंजी समझेमायना। सिर्फ 10-15 साल पेरके मना समाज ता उत्पादक शक्ति विकसित आयार अस्के मना समाजवादी आर्थिक, राजनीतिक व्यवस्था ता भौतिक आधार (इंजे मजबूत भौतिक आधार तुकू वेल्ले जेक मंता) तैयार आता इंजी समझेमायमूड़ायर। मना राज्य (पोरो टा ढांचा) पूरा सुदृढ़ आता अनि मना समाजवादी समाज ता निर्माण बुनियादी रूप ते पूरा आता इंजी समझेमायमूड़ायर। समाजवादी समाज ता निर्माण इंजे पूरा आताद हिल्ले, इदिना काजे 10-15 साल ता टाईम ओसो लागियर। समाजवादी निर्माण कियाला काजे मजदूर वर्ग कैदे तकनीकी कार्यकर्ता लोर, प्रोफेसर,

अध्यापक, वैज्ञानिक, पत्रकार, साहित्यकार, कलाकार ओसो मार्क्सवादी सिद्धांतकार लोरा फौज मंदाना जरूरी मंता। इद उंदी बेहरा फौज मंदाना; सिर्फ उचुने मानेय हालो आंतोरा। इद काम वायना 10-15 साल लोप्पा बुनियादी रूप ते पूरा कीयाना। ताना पेरके उत्पादन शक्ति ना विकास कीयाना, मजदूर वर्ग ता बुद्धिजीविरा फौज ता विस्तार कीयाना दिशा ते ओसो वेल्ले कोशिश कीयाना, समाजवाद तल तीरम-तीरम कम्युनिज्म ते संक्रमण कियाला काजे जरूरी परिस्थितिंग तैयार कीयाना ओसो 8-10 पंचवर्षीय योजनांग नडमा आर्थिक रूप ते अमेरिका बराबर एवनना अनि अदिनकु मुन्ने दायना कोशिश कीयाना। कम्युनिस्ट पार्टी, नौजवान संघ ता सब्बे सदस्य ओसो पूरा जनता लोप्पा इद काम ता प्रचार आसी मंदाना अनि हर मानेय इदिना मेहनत ते अध्ययन कीयाना। संभव आता जागा ते माटु तकनीकी, व्यवसायिक जानकारी दोरकी कीयाना, मार्क्सवादी सिद्धांत ता अध्ययन कीयाना। इद्रम मजदूर वर्ग ता बुद्धिजीविरा उंदी पूना फौज (ताना लोप्पा पाडना समाज तल वात्ता निज्जमे पूना बदलाव आता पेरके दृढता ते मजदूर वर्ग रुझान पोयना सब्बे बुद्धिजीविर शामिल आंतोर) तैयार आयनूर। इद माकिन इतिहास सौंपे कित्ता उंदी महान काम आंदू। मजदूर वर्ग ता क्रांतिकारी काम तुन बस्के एवनल मजदूर वर्ग ता बुद्धिजीविरा उंदी बेहरा पूना फौज तैयार कीवोम अस्के एवनल पूर्ण रूप ते सुदृढ किया परवोम।

शुद्धिकरण कीयाना, दक्षिणपंथिरा आलोचना कीयाना ओसो जनता लोप्पा मत्ता मध्यवर्ती लोकुर किन मना पक्ष ते कीयाना मूंड काम कुना लोप्पा केंद्रीय ओसो प्रांतीय, म्युनिसिपल स्तर ते अनुभव दोरकी कीयाना उंदी बेहरा सफलता आंदू। इव अनुभव कुन दोरकी कित्ता पेरके समस्यांग ना समाधान कीयाना मुन्ने ज्यादा हल्को आंता। वायना उचुन महीनांग ना काम प्रिफेक्चर ओसो काउंटी स्तर ता कार्यकर्ता लोर किन अनुभव बद्रम दोरकी कीयाना इंजी करहना। इंजेटल इयेटा हिरंगम ओसो वायना साल ता वसंत एवनल जिला, श्यांग स्तर ता कार्यकर्ता लोर किन करहाना। शहर लोप्पा एरिया स्तर ता कार्यकर्ता लोर किन कारखाना, खदान लोप्पा

बुनियादी स्तर ते कार्यकर्ता लोर किन, मोहल्ला-कमेटिंग ना कार्यकर्ता लोर किन वेने इदे पोल्लो करहाना। इद्रम कीते के वेल्ले लोकर कोंडांग नाहकनूर, ओरा काजे जनदिशा सिर्फ उंदी पोल्ले लेक्कटा पोल्लो आयर अनि जनता नड्मा ता अंतरविरोध कुन हल कीयाना वेल्ले हल्लो आयारा।

प्रांत, म्युनिसिपलटिंग ओसो स्वायत्त प्रदेश कुना पार्टी-कमेटिंग ना प्रथम सचिव ओसो बाकी सदस्य लोरा काजे इद महान संघर्ष ता कमान पूरा तम्मा कैदे तासना जरूरी मंता। ओरा काजे जनवादी पार्टींग (राजनीतिक हंदी), शिक्षा, पत्रकारिता, (ताना लोप्पा सब्बे समाचारपत्र ओसो पत्रिकांग शामिल मंतांग), विज्ञान-प्रौद्योगिकी, कला-साहित्य, सार्वजनिक स्वास्थ्य ओसो उद्योग-वाणिज्य राजनीतिक बदलाव ओसो विचाराधारात्मक पूना बदलाव काम तुन पूरा कैदे पोयना। हर प्रांत, म्युनिसिपलटी ओसो स्वायत्त प्रदेश कैदे तम्मा खुद ता मार्क्सवादी सिद्धांतकार, वैज्ञानिक, तकनीकी कर्मचारी, साहित्यकार, कलाकार, साहित्य-समालोचक, समाचारपत्र ओसो पत्रिकांग ना प्रथम सम्पादक, संवाददाता लोर मंदाना। प्रथम सचिव लोरा काजे (बाकी सचिव लोरा काजे वेने) ओरु समाचापत्र, पत्रिकांग पोरो खास ध्यान हियाना जरूरी मंता। हर मानेय तूलनात्मक अध्ययन काजे कम से कम पांच समाचारपत्र ओसो पांच पत्रिकांग पढ़ेमायना अनि तम्मा प्रकाशन कुना लोप्पा सुधार कीयाना।

माटु कित्ता दक्षिणपंथिरा आलोचना संगे जनवादी पार्टींग लोप्पा ओसो बुद्धिजीविर, उद्योग-वाणिज्य लोप्पा हर मानेय किन धक्का आता। ओरा लोप्पा वेल्ले लोकर (मध्यवर्ती लोकर) समाजवादी हरी ओसो सर्वहारा नेतृत्व तुन स्वीकार कीयाना बगिल मलतोर इंदाना पोल्लो तुन ध्यान हियाना। अलग-थलग रकम ता लोकरा लोप्पा इद इदिन अलग-अलग स्तर मंता। इंजे ओरु सिर्फ इव बुनियादी पोल्लोंग इतेके समाजवादी हरी ओसो सर्वहारा नेतृत्व तुन निज्जमे स्वीकार कीयाना बगिल मंता मति इद पूंजीवादी दृष्टिकोण तल सर्वहारा दृष्टिकोण एवनल दायना उंदी पहली डाका लेक्का मंता। उंदी साल (इयेटा मई तल वायना साल मई एवनल)

शुद्धिकरण पेरके ओरु उंदी बेहरा डाका वाटा परितोर। हत्ता कालम ते ओरु समाजवादी क्रांति लोप्पा हिस्सा एतना मानसिक तैयारी कियवा मत्तोर। ओरु इद क्रांति ता अचानक सामना किया लागता। कम्युनिस्ट पार्टी ता उचुन सदस्य लोर किन वेने इद्रम ताए परिस्थिति ता सामना किया लागता। दक्षिणपंथिरा आलोचना कीयाना ओसो शुद्धिकरण आंदोलन कीतेके ओरकिन ओसो व्यापक जनता तुन गंभीर समाजवादी शिक्षा एता लागिअर।

दुकान ता बिक्री-कक्षा, नहाकुना इलाकांग (जिलांग ओसो श्यांग), प्राइमरी स्कूल ओसो सेना ता बटालियन, कम्पनिंग किन विडचसी बाकी सब्बे जागा ने बेहरा अक्षर वाले पोस्टर वाटा परमूडांता। मना देश ता परिस्थिति लोप्पा संघर्ष ता रूप सर्वहारा वर्ग काजे अनुकूल अनि पूंजीपति वर्ग काजे प्रतिकूल मंता। बेहरा अक्षर वाले पोस्टर तुकू वेरियाना अंगडम आंता। बेहरा अक्षर वाले पोस्टर वाटना, गोष्ठी केयना ओसो वाद-विवाद कीयाना, उच्च शिक्षा प्रतिष्ठान कुना लोप्पा, केंद्रीय, प्रांतीय म्युनिसिपल, प्रिफेक्चर ओसो काउंटी स्तर ता विभाग, संगठन लोप्पा ओसो बेहरा-बेहरा शहरी कारोबार कुना लोप्पा अंतरविरोध कुन हल कीसी अविना पोरो काबू कियाला अनि मुन्ने दायला लोकुरा मदद कीयाना मूंड वेल्ले बेसता तरिकांग आंदुंग।

शुद्धिकरण आंदोलन ताकनास्के बस्केनाई उत्पादन ओसो बाकी काम ता उल्लंघन कीयानायो। विभिन्न जागा ने अधिकारिर तम्मा दोड़ काम कीयाना सब्बे इकाइंग लोप्पा शुद्धिकरण आंदोलन उंदे बेरा ताकी कियवा अलग-अलग टाईम ओसो अलग-अलग समूह ते ताकी कीयाना।

बेहरा तूफान ओसो बेहरा लहर कुनल वेरियानायो, खुद किन मजबूत कीयाना अनि अविना मुकाबला कीयाना। हर इकाई ते बेहरा लहर कुन उंदी-रेंडु हप्तंग लोप्पा मारिंतांग, पेरके अद इकाई दक्षिणपंथिरा पोरो जवाबी हमरा कियाला पूना मंजिल बगिल दाय़ा परिंता। इव रेंडु-मूंड हप्तंग लोप्पा हर इकाई ता नेतृत्वकारी कार्यकर्ता लोर दक्षिणपंथिरा बेय्यल हमलांग मुन्ने खुद किन मजबूत कीयाना, प्रतिवाद कियवा ओरा पोल्लोंग

केंजना, परिस्थिति ता विश्लेषण कीयाना, अध्ययन कीयाना काम पोरो ध्यान केंद्रित कीयाना।

जवाबी हमला कियाला काजे ताकत बेरसी कीयाना, वामपंथी ताकत कुना संगे एकता कीयाना, मध्यवर्ती ताकत कुन मना पक्ष ते कीयाना कोशिश कीयाना अनि दक्षिणपंथिर किन अलगाव ते वाटना, इदु मार्क्सवादी कार्यनीति ना सबसे बेसता नियम आंदू।

खुला राय हियाणा (संगेने सुधार वेन कीसोर दायना) मंजिल, सुधार पोरो जोर हियाणा (संगे ने खुला राय हियाणा) मंजिल, हर मानेय संबंधित दस्तावेज ता अध्ययन कीयाना ओसो आलोचना, आत्मालोचना संगे मना राजनीतिक चेतना स्तर बेरसी कीयाना मंजिल, इवु मंजिलकु, केंद्रीय, प्रांतीय, म्युनिसिपल, प्रिफेक्चर ओसो काउंटी इव नालुंग स्तर ता शुद्धिकरण आंदोलन ता नालुंग अपरिहार्य मंजिलकु आंदुंगा। इदे आयवा शहर ओसो नाहकुना बुनियादी इकाइंग लोप्पा वेने शुद्धिकरण आंदोलन ताकी कीयाना जरूरी मंता। इद्रम ता आंदोलन पेरेके पूरा पार्टी ओसो पूरा देश ता जनता उंदी पूना रूप एतंता।

प्रांत, म्युनिसिपल ओसो स्वायत्त प्रदेश कुना पार्टी कमेटींग, प्रिफेक्चर पार्टी कमेटींग ना पहली सचिव लोर किन सितम्बर ते आयाना केंद्रीय कमेटी ता पूर्ण अधिवेशन ता तैयारी अगस्त महीना ते उचुन टाईम तेंडसी नहाकुना इलाकांग लोप्पा सहकारी समितिंग ना जांच-पड़ताल, सुदृढीकरण, उत्पादन, अनाज ओसो बाकी समस्यांग संबंधित समस्यांग ना अध्ययन कीयाना वेहिंता। कृषि विकास ता 40 सूत्र कार्यक्रम ता हर धारा ता अध्ययन कीयाना अनि ताना लोप्पा सुधार कीयाना जरूरत मंताए हिल्ले इंजी हूडना।

नोट

1. 'सोवियत संघ ता कम्युनिस्ट पार्टी (बोलशेविक) ता इतिहास, संक्षिप्त कोर्स' अध्याय 9 भाग 5।

क्रांति तुन मुन्ने ओयला कार्यकर्ता बने मायना⁵⁷

9 अक्तूबर 1957

इद सम्मेलन सफल आता। प्रांतीय ओसो प्रिफेक्चर पार्टी कमेटींग नल वात्ता कामरेड्स शामिल आतां कु केंद्रीय कमेटी ता इद विस्तृत पूर्ण अधिवेशन, असल ते मूंड स्तर ता कार्यकर्ता लोरा सम्मेलन बनेमाता। नीति ना स्पष्टीकरण कीयाना, अनुभव कुना आदान-प्रदान किया ओसो संकल्प ता एकीकरण कीयाना उंदी वेल्ले महत्वपूर्ण सम्मेलन बनेमाता।

इद्रम ता सम्मेलन साल ते उंदी बेरा कीयाना जरूरी मंता। बारां कु इत्तेके मना लेक्कटा बेहरा देश ता काम वेल्ले हिरकसी मत्ता लेक्का मंता। हत्ता साल माटु इद्रम ता सम्मेलन कीवोम; अद्रमासी माकिन नुकसान आता अनि दक्षिणपंथी भटकाव ता सामना किया लागता। हय्येड उंदी बेहरा उभार वात्ता मति नीरे अदु उचुन कम आता। बदे डायुट हिलवा हत्ता साल माटु 8वी कांग्रेस कीतोम अनि माकिन टाईम दोरको आता। पेरके इद्रम ता सम्मेलन केयतास्के ताना लोप्पा काउंटी पार्टी-कमेटींग ओसो उचुन बेहरा शहर कुना क्षेत्रीय पार्टी-कमेटींग ना उचुन सचिव लोर किन शामिल क्रियमूडांता; उदाहरण तुकू ताना लोप्पा शामिल आयना लोकरा संख्या सैकडों कीयाना। नावा हिसाब ते समस्यांग कुन हल कियाला काजे हर प्रांत लोप्पा वेने मूंड लेवेके नालुंग स्तर ता कार्यकर्ता लोरा प्रांतीय सम्मेल कीयाना, ताना लोप्पा सहकारी समितिंग ना उचुन कार्यकर्ता लोर वेने शामिल मंदाना।

दूसरा पोल्लो नन्ना शुद्धिकरण ता बारे ते वेहाकाना लोकर किन खुला राय हियाला हियाना अनि तम्मा काम सुधरे कियाला काजे साहस, पूर्णता ओसो दृढ़ता रुझान पोयला हियाना। माटु इद्रम ता संकल्प संगे लैस

⁵⁷ चीनी कम्युनिस्ट पार्टी ता 8वी केंद्रीय कमेटी ता तीसरा विस्तृत पूर्ण अधिवेशन लोप्पा भाषणा 675 | माओ त्से तुंग संकलित रचनांग, ग्रंथ 5

मंदाना। दक्षिणपंथी-विरोधी आंदोलन तुन वेने इदिना संगे जोड़े कीयाना अनि अदिन जोर-शोर ते ताकी कीयाना या? आयो, इद्रम कीयाना जरूरत हिल्ले। बारांकु इत्तेके दक्षिणपंथी विरोधी आंदोलन सही दिशा ते ताका मंता अनि उचुन जागा ने अदु खत्म वेने आताद मंता। इजे बुनियादी इकाइंग लोप्पा इत्तेके काउंटी, जिला ओसो श्यांग ता मूंड स्तर ते खुला राय हियाणा अनि तम्मा काम सुधरे कीयाना पोरो जोर हियाणा। केंद्रीय कमेटी ओसो म्युनिसिपल स्तर ता उचुन विभाग कुना लोप्पा खुला राय हियाणा जारी तासना मति जोर काम तुन सुधरे कीयाना पोरो मंदाना।

इयेंड जनता क्रांति कीयाना उंदी तरीका इत्तेके जन संघर्ष ताकी कीयाना तरीका पुट्टी कित्ता, इत्तेके तन्ना पोल्लोंग कीयाना आजादी, खुला राय हियाणा आजादी, बेहरा वाद-विवाद कीयाना ओसो बेहरा अक्षर वाले पोस्टर रासना तरीका। इजे मना क्रांति ता अन्तर्वस्तु अनुसार मंदाना तरीका परहकता। मुन्ने इद तरीका ता जन्म संभव हिल्ला मत्ता। अस्के माटु लड़ाईंग लोप्पा, पांच प्रमुख आंदोलनकु¹ लोप्पा ओसो तीन महान बदलाव² कीसोर मत्तोर अदिन काजे जल्दबाजी तोहवा लेवा वाद-विवाद कीयाना तरिका ता जन्म आयना संभव हिल्ला मत्ता। अस्के जल्दबाजी कियवा लेवा वाद-विवाद कीयाना, तथ्य कुन पेश कीयाना ओसो तर्क-वितर्क कियाला काजे पूरा उंदी साल लगान ता अनुमति हिल्ला मत्ता अनि नेंडु इद्रम कीयाना संभव मंता। माटु परहकता तरीका इजे वर्तमान जन संघर्ष ता अन्तर्वस्तु, वर्तमान वर्ग संघर्ष ता अन्तर्वस्तु ओसो जनता नडमा ता अंतरविरोध कुन सही तरीका ते हल कीयाना काम संगे कलियंता। इद तरीका तुन मजबूत पोयसी मत्तेके इंजेटल समस्यांग कुन हल कीयाना वेल्ले हल्को आयार। सही ओसो गलत संबंधित सुडला-बेहरा समस्यांग कुन क्रांति ओसो निर्माण कीयानास्के वायना समस्यांग कुना लोप्पा खुला राय हीता पेरके ओसो वाद-विवाद कीयाना तरीका संगे हल कीयाना आयार अनि वेल्ले जल्दी हल कियमूड़ायरा। वामपंथिरा किन सिर्फ मध्यवर्ती लोकुरा संगेने आयवा दक्षिणपंथिरा संगे ओसो नाहकुना इलाका लोप्पा जर्मीदार, धनी किसान लोरा संगे वेने खुला राय हियाणा, वाद-

विवाद कीयाना। माटु “बेइज्जती” तुकू वेरियानायो। माटु मना समाचारपत्र लोप्पा “कम्युनिस्ट पार्टी हर वस्तु ता मालिक बने मायर”, “कम्युनिस्ट पार्टी गद्दी विड़सना” ओसो “पालकी तल दोड़ रेयना” लेक्कटा पोंगडिंग पोल्लोंग प्रकाशित कीवोमा। माटु इंजे “पालकी तरगा मंतोम” अनि दक्षिणपंथिर “पालकी तल दोड़ रेयना पोल्लोंग” कींतोरा। वड़कना आजादी मंदाना, बेहरा वाद-विवाद कीयाना ओसो बेहरा अक्षर वाले पोस्टर रासना तरीका जनता ना पहलकदमी तुन तोहना ओसो ताना लोप्पा जिम्मेदारी ता विचार बेरसी कीयाना वेल्ले बेस मंता।

मना पार्टी ता उंदी जनवादी परम्परा मंता इद परम्परा हिल्वेके इद्रम आजादी ते वड़कना, खुला राय हियाना, बेहरा वाद-विवाद कीयाना ओसो बेहरा अक्षर वाले पोस्टर रासना पोल्लोंग स्वीकार कीयाना संभव हिल्ले। येनान लोप्पा शुद्धिकरण आंदोलन ताकनास्के लोकर मुदांग नोट कीसी मत्तोर, आत्मालोचन कित्तोर अनि वरोर दूसरोर ना सहायता कित्तोर। हर ग्रुप लोप्पा 7 लेवेके 8 मानेय मत्तोर, इद प्रक्रिया बचोनो महीनांग ताकता। नन्ना कलियता सब्बे लोकर इद शुद्धिकरण आंदोलन तुकू खुश मंतोरा ओरु सिर्फ इदिना कारण तेने तम्मा मनोगतवाद तुन दूर किया परतोर इंतोरा भूमि-सुधार ताकनास्के वेने बदे समस्या वातेके मना दिमाग ते मत्ता समस्या हल कियाला काजे जनता तल सलाह-मशविरा कींतोमा। मना फौजी यूनिट कुना लोप्पा कम्पनी कमांडर नरका सिपाहिरगा खुद हंजी ओरु मुचसी हुंजतेरे, हुंजोर हूड़ना अनि ओरा संगे समानता ता व्यवहार कीसोरे दोस्तीपूर्ण तरीका ते वड़कना। येनान लोप्पा ताकता शुद्धिकरण आंदोलन, भूमि सुधार, फौजी यूनिट कुना जनवादी पिस्वल, मूंड जांच-पड़ताल ओसो मूंड सुधार³ कुना लोप्पा, पेरके “मूंड गलतिंग” विरोधी आंदोलन, “पाँच गलतिंग” विरोधी आंदोलन ओसो बुद्धिजीविरा विचाराधारात्मक पूना बदलाव ताकनास्के जनवाद ता अलग-अलग रूप कु मत्तांग। मति आजादी ते वड़कना, खुला राय हियाना ओसो बेहरा वाद-विवाद कीयाना, ताना पेरके “सलवा-सलवा वड़ियु ओसो जमने-जमने वायना मुसुर ” लेक्का सलाह-मशविरा कीयाना ओसो समझे कीयाना, इव सब्बे सिर्फ

नेंड़े आया परिंतांगा। माटु परहकता तरीका मना काम काजे वेल्ले बेस मंता, अदिन मनोगतवाद, नौकरशाही ओसो फरमानशाही (फरमानशाही इत्तेके लोकुर किन हौकना-पिटाई कीयाना लेवेके रांगना, ओरकिन हुकम पालन कियाला मजबूर कीयाना) तुन दूर कीयाना, नेतृत्वकारी कार्यकर्ता लोर जनता संगे उंदी आयना मना काजे वेल्ले हल्को आयारा।

इयेंड मना जनवादी परम्परा ता वेल्ले विकास आता, आजादी ते वड़कना, खुला राय हियाना, बेहरा वाद-विवाद कीयाना ओसो बेहरा अक्षर वाले पोस्टर रासना तरीका वायना पीड़ी तुन सौंपे कीयाना। इद्रम कीतेके समाजवादी जनवाद पूर्ण रूप ते विकसित आयारा। इद्रम ता जनवाद सिर्फ समाजवादी देश लोप्पाने संभव मंता, पूंजीवादी देश लोप्पा आयो। इद्रम ता जनवाद पोरो आधार आसी मत्ता केंद्रीयता कमजोर आयवा लेवा ओसो मजबूत आंता, सर्वहारा तानाशाह वेने मजबूत आंता। सर्वहारा वर्ग काजे अदु तन्ना तानाशाही लागू कीयाना लोप्पा तम्मा व्यापक एकता पोरो आधार आसी मंदाना जरूरी मंता, सिर्फ तम्मा पोरो आधार आसीए काम ताका परवो। चीन लोप्पा सर्वहारा वर्ग संख्या ता दृष्टि ते वेल्ले सुडला ओसो अदिना संख्या सिर्फ उंदी करोड़ तुकू उचुने ज्यादा मंता। अदिना तानाशाही लागू कियाला काजे अदु दसियों करोड़ गरीब, निम्न-मध्यम किसान, निर्धन नागरवासिर, गैर-खुशहाल दस्तकारिर ओसो क्रांतिकारी बुद्धिजीविरा पोरो आधार आसी मंदाना, लेवेके इद वेने संभव मन्नो आंता। इंजे माटु ओरा लोप्पा जोश तेहतोम, अदिन काजे सर्वहारा तानाशाही सुदृढ़ आसोर दायारा।

तीसरा, कृषि। कृषि-विकास ता 40 सूत्र कार्यक्रम लोप्पा संशोधन किताद मंता ओसो इद दस्तावेज तुन जल्दिए जारी कियमूडायरा। कामरेड्स, मीटु नाहकुना कुना लोप्पा इदिना बारे ते वाद-विवाद ओसो विचार-विमर्श कीयाना काम बेस कीयाना। नन्ना उचुन कामरेड्स किन प्रिफेक्चर कुन कृषि योजनांग बने कीयाना या कीयानायो इंजी पूछेमाताना ओरा जवाब इंगो, बने कीयाना इत्तोर। जिलांग वेने इद्रमे कीयाना? जवाब दोरकता इंगो, इद्रमे कीयाना। श्यांग वेने इद्रमे कीयाना या? ओसो उंदी बेरा

जवाब इंगो इंजी वात्ता। सहकारी समितिं ग वेने इद्रम ता योजनांग बने कीयाना। इद्रम कुल मिले कीसी 6 स्तर आंतांग, प्रांत, प्रिफेक्चर, काउंटी, जिला, श्यांग ओसो सहकारी समिति। मीटु इद्रम ता कृषि योजनांग बने कीयाना बगिल ध्यान हियाना, टाईम पास कीयानायो। योजना ओसो कार्यक्रम रेंडासी उंदे आंदुंग, माटु आदत मत्ता लेक्का योजना शब्द ता इस्तेमाल कीसोर वातोम, अदिन काजे अदिन वेने माटु योजना ता पोरोल हिया परिंतोम। माटु विस्तृत योजनांग बने कीयाना, वेल्ले कारगर तरीका ते नेतृत्व कीयाना, पार्टी-सचिव लोर खुद मैदान ते वायना अनि सब्बे पार्टी-सदस्य लोरा सहकारी समितिं ग ताकी कियाला मदद कीयाना तरीका पोरो नितसी मंदाना। हत्ता साल दूसरा 6 महीनांग लोप्पा सब्बे पार्टी-सदस्य लोर सहकारी समितिं ग ताकी कियाला मदद किताद हिल्ले, सब्बे पार्टी-सचिव खुद मैदान ते वात्ताद हिल्ले। इयेंड माटु अव सब्बे काम अविचल रूप ते कीसोर दांतोम।

योजनांग बस्के तैयार आंतांग? नन्ना उचुन कामरेड्स किन पूछेमातास्के उचुन जागा ने तैयार आतांग, उचुन जागा ने इंजे पूरा तैयार आताद हिल्ले। नेंडु प्रांत, प्रिफेक्चर, काउंटी इव मूंड स्तर पोरो जोर हिया मंतोम, अविना योजनांग इयेटा इंगम लेवेके वायना साल ता वसंत ते तैयार आया परिंतांगा? इद्रम आयवेके अविन वायना साल ता सब्बे 6 स्तर कुने बद्रमाई तैयार कीयाना। बारांकु इत्तेके मनगा बचोनो साल ता अनुभव मंता, कृषि-विकास ता 40 सूत्री राष्ट्रीय कार्यक्रम वेने लगभग तैयार आता। इद कार्यक्रम पोरो, प्रांतीय स्तर, बाकी स्तर ता सब्बे योजनांग पोरो नाहकुना लोप्पा विचार-विमर्श कीयाना। मति इव 7 योजनांग पोरो उंदे बेरा विचार-विमर्श कीयाना वोल्ले ज्यादा आंतांग, अदिन काजे जनता उंदी-उंदी योजना पोरो अलग-अलग राय हियाना, वाद-विवाद कियाला हियाना बेस आयार। माटु दीर्घकालीन योजनांग ना चर्चा किया मंतोम। बदे योजना वायना कालम ते गलत साबित आतेके बाता कीयाना? अस्के मनगा उचुन ज्यादा साल ता अनुभव मंदिता अनि माटु अदिना लोप्पा माटु सुधार किया परिंतोम। उदहारण तुकू 40 सूत्री कार्यक्रम लोप्पा माकिन

उचुन साल पेरके ओसो सुधरे कियमूडायर। इद्रम कीयाना अनिवार्य मंता। नावा हिसाब ते अविना लोप्पा हर मूंड साल लोप्पा सुडला सुधार ओसो हर 5 साल लोप्पा बेहरा सुधार कीयाना जरूरत मंदिता। बदे योजना मंदाना बदे योजना हिल्ला मंदाना तुकू बेस मंता। इद कार्यक्रम कुल 12 साल ता मंता, इंजे रेंडु साल आतांग सिर्फ दस सालकु पिस्तांग। माटु इदिना लोप्पा मजबूती हिल्लेके 40 सूत्री कार्यक्रम लोप्पा मूंड अलग-अलग इलाकांग काजे अनाज-उत्पादन ता लक्ष्य, इत्तेके हर मू 400, 500 ओसो 800 चिन अनाज पुट्टी कीयाना लक्ष्य पूरा कियाला असफल आयना खतरा पैदा आंता। इदिना लोप्पा मजबूती तासिसी इद लक्ष्य तुन पूरा कीयाना।

नावा हिसाब ते चीन तुन तम्मा खाद्य समस्या हल कियालाकाजे सघन-सूक्ष्म खेती पोरो निर्भर मंदा लागियर। मना उचुन काउंटिंग नेंडु वेने हर मू उंदी हजार चिन अनाज पुट्टी कीता। आधा शताब्दी लोपा हर मू रेंडु हजार चिन एवना संभव मंता या? वायना कालम ते पीली डोड्डा ता उत्तर ते फैलेमाता इलाका लोप्पा हर मू 800 सौ चिन, ह्वाए डोड्डा ता उत्तर ते फैलेमाता इलाका लोप्पा हर मू उंदी हजार चिन ओसो अदिना दक्षिण ते फैलेमाता इलाका लोप्पा हर रेंडु हजार चिन अनाज पुट्टी कीयाना संभव आया परिंता या? 21वी शताब्दी शुरू एवनल इद लक्ष्य दोरकी कियाला इंजे ओसो उचुक दशक पिस्तांग, इचोन टाईम लागवा लेक्का वेने आंता। तम्मा खाद्य समस्या तुन हल कियाला काजे माटु सघन-सूक्ष्म खेती पोरो आधार आसी मंतोम, मनगा वेल्ले बेहरा जनसंख्या मत्तेकाई हालनाचोन अनाज मंता। नावा हिसाब ते हर मानेय काजे औसतन मूंड मू भूमि वेल्ले मंता। वायना कालम ते उंदू मू तुकू कम जमीन पोरो पुट्टना अनाज वरोर मानेय ना तिंदाला काजे हालिंता। बदे डारुट हिल्ला, परिवार-नियोजन इंजे वेने जरूरी मंता, नन्ना पिल्ला-पेकोर पुट्टी कीयाना तुकू प्रोत्साहन हीवोना।

किसान लोरा लोप्पा अनाज ता खपत बचोन मंता इंजी जानकारी दोरकी कीयाना। माटु लोन-दुवार ताकी कियाला लागना मेहनत ओसो बचत तुन प्रोत्साहन हियाना अनि अनाज ता इस्तेमाल कियाला कमखर्च कीसी अनाज जमा कीयाना। राज्य कैद अनाज जमा कित्ता गोदाम

बनेमांता अनि हर सहकारी समिति ओसो परिवार कैदे वेने अनाज भंडार आयार अनि इव मूंड रकम ता भंडार संगे माटु वेल्ले खुशहाल आंतोमा इदिना विपरीत माटु पूरा अनाज तित्तेके समृद्धि बद्रम वाया परिंता?

इयेंड अनाज जमा कीयाना उचुक जागा ने बेरसी कीयाना अनि फसल बेस आता लेवेके प्राकृतिक आपदा ता सामना किया लागो आता। अतिरिक्त अनाज संगे कमी तुन पूरा कीयाना वेल्ले जरूरी मंता। उचुन प्रांत कुना सहकारी समितिंग लोप्पा जमा कोष (5 प्रतिशत) सार्वजनिक कल्याण कोष (5 प्रतिशत) ओसो प्रबंध-व्यय हिल्ला उत्पादन-व्यय कुल उत्पादन-मूल्य ता 20 प्रतिशत आंता, पूंजीगत निर्माण पोरो आयवा व्यय उत्पादन-व्यय ता 20 प्रतिशत आंता। नन्ना बाकी प्रांत कुनल वात्ता कामरेड्स ना संगे इदिना पोरो विचार-विमर्श कितान। ओरू पूंजीगत निर्माण काजे आयना व्यय उचुन ज्यादा मंता इत्तोर। नन्ना नेंड कीयाना पोल्लोंग सिर्फ सुझाव आंदुंग अवु सही मत्तेके अमल कीयाना, लेवेके अमल कीयानायो। इदे आयवा सब्बे प्रांत ओसो काउंटिंग वेने उंदी लेक्कटा तरीका लागू कीयाना जरूरत मंता। इदिना लोप्पा नन्ना विचारार्थ मीवा काजे विडसिंतान। उचुक इलाकांग लोप्पा सहकारी समितिंग ना प्रबंध-व्यय वेल्ले मत्ता। अदिन घटनेकीसी उंदी प्रतिशत कीयाना। प्रबंध-व्यय इत्तेके सहकारी समितिंग ना कार्यकर्ता लोर किन हियाना भत्ता ओसो प्रशासनिक काम लोप्पा आयना खर्च, अदिन घाटेकीयाना अनि खेतिहर भूमि ता पूंजीपति निर्माण पोरो आयवा व्यय तुन बेरसी कीयाना।

चीनी जनता तुन उच्च विचार संगे प्रेरित कीयाना। माटु देश ता शहर ओसो नाहकुना लोप्पा हर मानेय किन तन्ना मुन्ने उंदी महान लक्ष्य तासना अनि उच्च विचार संगे प्रेरित आयना इंजी शिक्षित कीयाना। पोड्डा मेंड तिंदाना अनि सफाचट (पूरा खत्म) कीयाना उच्च विचार संगे प्रेरित आयना आंता या? हिल्ले इद्रम बिल्कुल इनमूडायो। मना लोन-दुवार ताकी कियाला माकिन मेहनत ओसो बचत कीयाना अनि दीर्घकालीन योजनांग बने कीयाना। रेंगल लेवेके पांडरी गेत्तंग पोंडना मौका ते इत्तेके मर्मिग लेवेके हामुर-नोमुर ता मौका ते दावत हियाना जरूरी हिल्ले। माटु

इव पोल्लोंग लोप्पा बचत कीयाना ओसो राजाल लेक्का खर्च कीयानायो। इद पाड़ना रीति-रिवाज लोप्पा बदलाव तत्ताना संबंधित पोल्लो आंदू। इव रीति-रिवाज कुन बदले कियाला काजे सुडला-बेहरा स्तर ते खुला राय हीसी तर्क-वितर्क कीयाना। ओसो उंदी गलती (जुआ करसना) मंता। हत्ता कालम ते इदिना पोरो पाबंदी वाटना संभव हिल्ले। इद्रम कीतेके सिर्फ खुला राय हियाना अनि वाद-विवाद संगे ने बदले कियमूडांता। नावा हिसाब ते पाड़ना रीति-रिवाज ते बदलाव कीयाना काम वेने योजना लोप्पा शामिल मंदाना।

इदे आयवा 4 नुकसानदायक जंतु खत्म किया ओसो स्वास्थ्य संबंधित काम पोरो ध्यान हियाना सवाल वेने मंता। 4 नुकसानदायक जंतु इतेके हुपेंग, कोड़का पिट्टेंग, वीसिंग, ओसो नुस्मेंग खत्म कीयाना काम लोप्पा नावा वेल्ले इंटेरेस्ट मंता। सिर्फ दस साल पिस्तांग, इयेंड माटु उचुन तैयारी कीयाना, प्रचार कीयाना अनि वायना वसंत ते काम शुरू कीयाना संभव हिल्ले। बारांकु इतेके इंजे वीसिंग पेसिंतांग। नावा हिसाब ते माकिन इव नुकसानदायक जंतु किन खत्म कीयाना अनि पूरा राष्ट्र तुन स्वास्थ्य संबंधित काम पोरो विशेष ध्यान हियाना। इद सभ्यता संबंधित सवाल आंदू, इदिना स्तर हालनाचोन बेरसी कीयाना। उंदी होड़ वाटना; इव नुकसानदायक जंतु कुन बद्रमाई खत्म कीयाना कोशिश कीयाना अनि स्वास्थ्य संबंधित काम पोरो हर मानेय ध्यान हियाना। विभिन्न प्रांत ओसो काउंटिंग लोप्पा प्रगति असमान आंता, मति माटु चैम्पियन बोर बनेमांतोर इंजी हूडना। चीन तुन “4 नुकसानदायनक जंतु मुक्त” देश इतेके हुप्पे पिट्टेंग, वीसिंग, ओसो नुस्मेंग मुक्त देश बने कीयाना।

परिवार-नियोजन काजे वेने उंदी दस-वर्षीय कार्यक्रम बने कीयाना। मति अल्पसंख्या राष्ट्रीयतांग ना इलाकांग ओसो आबादी वाले इलाकांग लोप्पा इदिन लागू कीयानायो। घनी आबादी वाले इलाकांग वेने मुन्ने इदिन सिर्फि उचुन चुने कित्ता जागा ने लागू कीसी हूडना, ताना पेरके अदिन विस्तार कीयाना जरूरी मंता। अस्केने परिवार-नियोजन तुन सर्वव्यापी बने कियमूडांता। परिवार-नियोजन लागू कियाला काजे खुला शिक्षा हियाना

जरूरी मंता, इत्तेके खुला राय हियाना ओसो बेहरा वाद-विवाद कीयाना। पिल्ला-पेकोर पुट्टी कीयाना लोप्पा मानेय जाति इंजे वेने पूरा अराजकता ता परिस्थिति ते मंता अदु इंजे वेने पूरा नियंत्रण किया परताद हिल्ले। वायना कालम ते परिवार-नियोजन पोरो पूरा अमल कीयाना समाज ता पूरा समर्थन दोरकनाचोन संभव हिल्ले, इत्तेके बस्के एवनल आम लोकुर इदिना समर्थन कीवोर इदिना काजे संयुक्त कोशिश कीवोर अस्के एवनल संभव हिल्ले।

विस्तृत योजना ता सवाल वेने मंता। नन्ना इंजे कृषि संबंधित योजनांग ना चर्चा कियाकान, मति उद्योग, वाणिज्य, संस्कृति ओसो शिक्षा संबंधित योजनांग वेने मंतांग। उंदी विस्तृत योजना बने कीयाना, ताना लोप्पा उद्योग, कृषि, वाणिज्य, संस्कृति ओसो शिक्षा शामिल मत्ता ओसो अविना नडमा समन्वय कीसी मत्ताद मंदाना।

प्रयोगात्मक खेती लोप्पा फसल पंडि कीयाना हर जागा प्रचार-प्रसार कीयाना लेक्का मंदाना अनुभव आंदू। काउंटी, जिला, श्यांग ओसो सहकारी समिति ता नेतृत्वकारी कार्यकर्ता लोर उंदी सुडला खेती कीसी हूडना अनि ताना लोप्पा बेहरा उपज दोरकी कियमूडांता या आयो, अविन दोरकी कियाला काजे बद तरीका लागू कीयाना इंजी हूडना।

माटु कृषि-तकनीक ता जानकारी दोरकी कीयाना। माटु तकनीकी जानकारी दोरकी कियवा लेवा कृषि-कार्य कीयाना मुश्किल मंता। राजनीति ओसो व्यवसाय नडमा विपरीत तत्व कुना एकता मंता। ताना लोप्पा राजनीति ता जागा सबसे पोरो ओसो प्रधान मंदिता। उंदी बगिल माटु राजनीति तुन नजरअंदाज कीयाना रुझान ता जरूर विरोध कीयाना अनि दूसरा बगिल सिर्फ राजनीति एवनले सीमित तासना अनि तकनीकी, व्यवसायिक ज्ञान दोरकी कियवेके वेने काम ताका परवो। मावा सब्बे कामरेड्स, उद्योग, कृषि ओसो वाणिज्य लोप्पा काम कीसोर मत्तेकाई लेवेके संस्कृति ओसो शिक्षा लोप्पा काम कीसोर मत्तेकाई उचुन तकनीकी, व्यावसायिक ज्ञान दोरकी कीयाना जरूरत मंदिता। नावा हिसाब ते इदिना संबंध ते वेने उंदी दस वर्षीय योजना बने कीयाना। सब्बे पेशांग, व्यवसाय

कुना लोप्पा काम कीयाना मना कार्यकर्ता लोर तकनीकी, व्यावसायिक काम लोप्पा निपुणता हासिल कीयाना कोशिश कीयाना, काम लोप्पा निपुण बने मायना, रेंगल वेने बनेमायना अनि विशेषज्ञ वेने। रेंगल बनेमायना मुन्ने विशेषज्ञ बनेमायना गलत आंता। इद रेंगल बनेमायना मुन्ने पांडरी बने मायना लेक्का आंता। इद्रम ता पोल्लोंग कींतोर ओरु असल इत्तेक आखरी एवनल पांडरी बनेमायला आलिसंतोर। पेरके रेंगल बनेमायना इत्तेके सिर्फ उंदी पोल्लोए आंदू नेंडु उचुन कार्यकर्ता लोर रेंगल आताद हिल्ले अनि धनी किसान लोरा विचाराधारा मुन्ने तल्ला वरिहतोर। उचुन मुल पांडरी मंतोर, पार्टी लोप्पा मत्ता दक्षिणपंथिर, राजनीतिक रूप ते पांडरी मंतोर ओसो तकनीकी रूप ते वेने निपुण हिल्ले। उचुन मुल भूरियल मंतोर अनि उचन मुल गुलाबी। सिर्फ वामपंथिरे असल रेंगल मंतोर ओरा रंग मावा 5 उक्का वाले रेंगल झंडा लेक्का लाल मंता। मति सिर्फ रेंगल मत्तेकेने काम ताको आंता, माटु व्यावसायिक, तकनीकी ज्ञान वेने बेस दोरकी कीयाना। नेंडु वेल्ले कार्यकर्ता लोर सिर्फ लाल मंतोर, विशेषज्ञ हिल्लेर, व्यावसायिक लेवेके तकनीकी ज्ञान ओरकिन हिल्ले। दक्षिणपंथिर मना लोप्पा नेतृत्व कीयाना क्षमता हिल्ले इंतोर इत्तेके “अज्ञानी ओसो विशेषज्ञ ना नेतृत्व किया परवोर”। माटु ओरा इद पोल्लो ता खंडन कींतोम, माटु नेतृत्व किया परितोम इंतोम। माटु ओरा नेतृत्व किया परितोम इंतोम अस्के माटु राजनीतिक रूप ते ओरा नेतृत्व किया परितोम। तकनीकी ज्ञान लोप्पा इंजे वेने माटु वेल्ले पेरकेने मंतोम अनि अविना पोगो जरूर जीत दोरकि कियाकोम।

सर्वहारा वर्ग तन्ना तकनीशियन, सैद्धांतिक कार्यकर्ता लोरा बेहरा दस्ता लेवा समाजवाद ता निर्माण किया परवो। माटु वायना दस साल लोप्पा सर्वहारा बुद्धिजीविरा दसिता ता स्थापना कीयाना (वैज्ञानिक विकास योजनांग वेने 12 साल तावे मंतांग, इंजे 10 साल पिस्तांग)। मावा सब्बे पार्टी-सदस्य ओसो गैर-पार्टी सक्रिय तत्व कुन सर्वहारा बुद्धिजीवी बनेमायना कोशिश कीयाना। सब्बे स्तर ते खासकर प्रांत, प्रिफेक्चर ओसो काउंटी इव मूंड स्तर ते सर्वहारा बुद्धिजीविर किन प्रशिक्षित कीयाना

योजनांग बने कीयाना। लेवेके इद्रम तोर किन प्रशिक्षित कियवा लेवा टाईम खराब आयार। उंदी पाड़ना चीनी हट्टो, “मर्रा तुन बेरसी कीयाना दस साल लागिंतांग, अनि मानेय किन पोसे कियाला सौ साल लागिंतांग”। सौ साल लोप्पाटल 90 साल घटे कीयाना अनि सिर्फ दस लोप्पा मानेय किन पाले कीयाना। निज्जमे मर्रा तुन बेरसी कियाला दस सालके लागिंतांग इंजी आयो, दक्षिण ते अदिन बेरसी कियाला 25 साल लागिंतांग, अनि उत्तर ते इदिनकु वेने ज्यादा टाईम लागा परिंता। मति दस साल लोप्पा मानेय किन बेरसी कीयाना मुश्कल मंता। 8 साल आतांग मति इदिना लोप्पा माटु दस साल ओसो जोड़े कीतेके मनगा 18 साल आंतांग; अस्के एवनल मार्क्सवादी विचार संगे लैस मत्ता मजदूर वर्ग ता विशेषज्ञ लोरा दस्ता बुनियादी रूप ते तैयार आयर इंजी आशा कीतोमा। ताना पेरके वायना दस साल लोप्पा इद दस्ता ता विस्तार कीतेके स्तर बेरसिंता।

कृषि ओसो उद्योग नड़मा ता संबंध कुना लोप्पा माटु मना कोशिश बेहरा उद्योग कुना पोरो वेने केंद्रित कीयाना ओसो अदिन विकास पोरो प्राथमिकता हियाना इंदना पोरो बदे डावुट हिल्ले; इदिना बारे ते बदे वेने सवाल तेहनायो लेवेके दुलमुल आयनायो इंजी मंता। मति माटु इदिन पूर्वशर्त मानेमासी उद्योग ओसो कृषि संगे-संगे विकास कीयाना, आधुनिक उद्योग ओसो आधुनिक कृषि ता निर्माण कायना जरूरी मंता। माटु चीन तुन उंदी उद्योग-प्रधान देश उंदी कृषि ता आधुनिकीकरण शामिल मत्ता देश बने कीयाना पोल्लोंग कीतोमा। इंजे प्रचार-कार्य लोप्पा कृषि पोरो जोर हियाना। कामरेड तेंग श्याओ-फिंग वेने इदिना चर्चा कितोर।

चौथा, रेंडु तरीका ना बारे तो। काम कीयाना कम से कम रेंडु तरीकांग मंदिंतांग। उंदी तरीका संगे तीरम ओसो सुडला सफलतांग दोरकिंतांग। दूसरा तरीका संगे जल्दी ओसो बेसता सफलतांग दोरकिंतांग। इदिना लोप्पा रफ्तार ओसो गुण रेंडासी शामिल मंतांग। सिर्फ उंदे तरीका तऽ आयवा हमेशा रेंडु तरीकांग पोरो विचार कीयाना। रेलवे निर्माण ता उदाहरण हूडाटू बचोनो हर्रिंग लोप्पाटल उंदी तुन चुने कियाला काजे बचोनो योजनांग मंदाना। तूलना काजे बचोनो तरीकांग ओसो कम से कम

रेंडु तरीकांग मंदा परिंतांग। उदाहरण तुकू बेहरा स्तर ते खुला राय हियाना लेवेके सुडला स्तर ते? बेहरा अक्षर वाले पोस्टर मंदाना या हिल्ले? इव रेंडासी ना लोप्पा बद तरीका बेस मंता? इद्रम ता सवाल बचोनो मंतांग, मति आजादी ते राय हियाना अनुमति हीताद हिल्ले। पेकिंग ता 34 उच्च-शिक्ष प्रतिष्ठान कुना पदाधिकारिरा लोप्पा वरोर वेने पेरके-मुन्ने आयवा लेवा, वेरियवा लेवा तम्मा राय हियाना अनुमति हीताद हिल्ले। ओरा काजे इद किस्स पोरो ताकना लेक्का आंता! ओरु जनता तुन आजादी ते खुला राय हियाला हियाना, ओरकिन वेल्ले समझे कीयाना जरूरत मंदिता, इदे आयवा ओरा पोरो वेल्ले दबाव वाटना वेने जरूरत हिल्ले, इत्तेके खुला रूप ते आह्वान किया ओसो वेल्ले मीटिंग केयना जरूरत मंदिता। इद्रम कीसी ओरा मुन्नेटल पेसना बदे दूसरा हरीं मंदानायो अनि ओरकिन “ल्यांगशान मेड्डा ता विद्रोही लोरा लोप्पा कलियला मजबूर आया लागना”⁴ इंजी हूडितोरा हत्ता कालम ते माटु क्रांति कीयानास्के पार्टी लोप्पा इद तरीका लेवेके अद तरीका बारे ते इद नीति ता बारे ते अलग-अलग राय मंता। मति पेरके माटु तत्कालीन परिस्थितिंग संगे कलियना नीति पोयतेके जापानी आक्रमण विरोधी युद्ध कालम ते ओसो मुक्ति युद्ध कालम ते मुन्ने तुकू बचोनो ज्यादा प्रगति आता। अद्रमे निर्माण काजे वने इद्रम ता लेवेके अद्रम ता नीति लागू कियमूडांता। इदिना लोप्पा वेने माटु असल परिस्थिति संगे कलियनाए नीति लागू कीयाना।

निर्माण काम ता बारे ते सोवियत अनुभव महत्वपूर्ण मंता। नन्ना पूर्णता ता पोल्लोंग कीयानास्के नन्ना अविना गलतिंग कीयाना वेने शामिल मंतांग इंताना। ओरा लोप्पा गलतिंग कीयाना शामिल हिल्लेके अविन पूर्णता इनमूडायो। सोवियत संघ तल करियाना इत्तेके अगाटा सब्बे पोल्लो ना यांत्रिक रूप ते नकल कीयाना इंजी आयो। कठमुल्लावादि इद्रमे कींतोरा। माटु कठमुल्लावाद ता आलोचना कित्ता पेरकेने लोकरु किन सोवियत संघ तल करियाला काजे प्रोत्साहित कीतोम, अदिन काजे इद्रम ता बदे खतरा पैदा आताद हिल्ले। माटु येनान लोप्पा शुद्धिकरण आंदोलन ताकी कीयाना ओसो पार्टी ता 7वी कांग्रेस कित्ता पेरकेने सोवियत संघ

तल करियाना पोरो जोर हीताद मंता। इद मना काजे नुकसानदायक आयाना जागा लाभदायक साबित आता। क्रांति लोप्पा माटु अनुभवी मंतोमा निर्माण लोप्पा माटु इंजे-इंजे शुरू कीतोम, मनगा सिर्फ 8 साल ता अनुभव मंता। मना निर्माण कार्य लोप्पा सफलतांग मुख्य मंता मति माटु गलतिंग कीयाना तुकू वेने बचेमांतोमा वायना कालम ते वेने गलतिंग आंतांग मति अस्के मना गलतिंग कम आंतांग। सोवियत संघ तल करियानास्के अदिना गलतिंग ना अध्ययन कुन शामिल कीयाना जरूरी मंता। अविना अध्ययन कीतेके मावा हरीं कम विंको-वंको मंदितांग। माटु सोवियत संघ ता विंको-वंको हरीं तल बचेमाया परवोम अनि मना काम ज्यादा तेज ओसो ज्यादा बेस किया परवोमा? बदे डायुट हिल्ला माटु इद्रम कीयाना पूरा कोशिश कीयाना। उदाहरण तुकू इस्पात उत्पादन तुने हूडाटू। माटु इदिन मूंड पंचवर्षीय योजनांग लोप्पा लेवेके इदिनकु उचुन ज्यादा टाईम ते 2 करोड़ टन किया परवोमा? कोशिश कीतेके जरूर किया परिंतोमा। इद उद्देश्य तुन पूरा कियाला काजे माटु ज्यादा से ज्यादा सुडला इस्पात कारखाना खोले कीयाना। नावा हिसाब ते माटु इद्रम ता इस्पात कारखाना ज्यादा से ज्यादा खोले कीयाना, हर साल 30 हजार तल 50 हजार टन लेवेके 70 हजार तल 80 हजार टन इस्पात तैयार कीयाना, बारांकु इतेके इव वेल्ले उपयोगी साबित आंतांग। 3 लाख लेवेक 4 लाख टन वार्षिक क्षमता वाले मध्यम आकार ता इस्पात कारखाना स्थापित कीयाना जरूरी मंता।

पांचवी, हत्ता साल बचोनो चीज कुन खत्म किताद मंता। अविना लोप्पा ज्यादा से ज्यादा, जल्दि से जल्दि, बेसता ओसो कम से कम खर्च लोप्पा दोरकता सफलतांग ना उसूल वेने शामिल मत्ता। ज्यादा से ज्यादा ओसो जल्दि से जल्दि सफलता दोरकी कीयाना मांग विडसताद मत्ता अनि संगे ने बेसता ओसो कम से कम खर्च रिजल्ट दोरकी कीयाना मांग तुन वेने खत्म किताद मत्ता। नावा हिसाब ते बोरे वेने बेसता ओसो कम से कम खर्च लोप्पा रिजल्ट दोरकी कीयाना ता विरोध कीवोर; लोकर ज्यादा से ज्यादा ओसो जल्दी रिजल्ट दोरकी कीयाना तुन विचार कीवोर आंतोर,

इदिन उचुन कामरेड्स “दुस्साहस” इंतोर। असल ते “बेसता” ओसो “कम से कम खर्च लोप्पा” रिजल्ट दोरकी कीयाना ता उद्देश्य “ज्यादा से ज्यादा” ओसो “जल्दी” तुन परिसीमित कीयाना। “बेसता” रिजल्ट दोरकी कीयाना इत्तेके बेसता क्वालिटी। “कम से कम खर्च लोप्पा” रिजल्ट दोरकी कीयाना इत्तेके कम पैसा खर्च कीयाना। “ज्यादा से ज्यादा” रिजल्ट दोरकी कीयाना इत्तेके ज्यादा से ज्यादा काम कीयाना। “जल्दी” रिजल्ट दोरकी कीयाना इत्तेके वेने ज्यादा से ज्यादा काम कीयानाए आंदू। इद नारा सीमा निर्धारण कीसिंता, बारांकु इत्तेके बेस ओसो कम से कम खर्च लोप्पा रिजल्ट दोरकी कीयाना आह्वान कींता इत्तेके बेसता क्वालिटी ओसो कम लागत ता आह्वान कींता; इद इद्रम ता रिजल्ट कुन ज्यादा से ज्यादा ओसो जल्दी दोरकी कीयाना मुशिकल कीसिंता। नाकिन वर्तमान अधिवेश लोप्पा वरोर-इरवुर कामरेड्स इद सवाल ता बारे ते वड़कताद हूडसी बेस लागता। संगे ने नन्ना अखबार लोप्पा इदिना बारे ते उंदी लेख वेने पढ़ेमाताना ज्यादा से ज्यादा, जल्दी से जल्दी, बेसत ओसो कम से कम खर्च लोप्पा रिजल्ट दोरकी कीयाना मना मांग सही मंता, वास्तविक परिस्थिति संगे मेल तिंता, मनोगतवादी हिल्ले। माटु हमेशा ज्यादा से ज्यादा ओसो जल्दी रिजल्ट दोरकी कीयाना पूरा कोशिश कीयाना; माटु सिर्फ ज्यादा से ज्यादा ओसो जल्दी रिजल्ट दोरकी कियाला काजे कीयाना मनोगतवादी मांग ता विरोध कींतोमा हत्ता साल दूसरा 6 महीना लोप्पाने इद नारा खत्म आता। नन्ना इदिन पुनस्थापित कियाला आल्सिंताना। इद्रम कीयाना संभव मंता या? इदिना पोरो ध्यान हीमूट।

कृषि विकास ता 40 सूत्री कार्यक्रम तुन वेने खत्म किताद मंता। हत्ता साल 40 सूत्र कार्यक्रम तुन पाड़ना समझेमायमूडाता। मति इंजे अदिना “पुनस्थापना आया मंता।”

प्रगति तुन प्रोत्साहन हियाना कमेटिंग कुन वेने खत्म किताद मंता। नन्ना ओसो उंदी बेरा सवाला कितान: कम्युनिस्ट पार्टी ता केंद्रीय कमेटि, सब्बे स्तर ता पार्टी कमेटिंग, राज्य-परिषद ओसो सब्बे स्तर ता जन परिषदकु (संक्षिप्त ते पार्टी कमेटिंग प्रमुख मत्ता अधिसंख्या “कमेटिंग”)

सार रूप ते प्रगति तुन प्रोत्साहन हियाना कमेटिंग आंदुंग लेवेके प्रतिगमन तुन प्रोत्साहन हियाना कमेटिंग? अविन प्रगति तुन प्रोत्साहन हियाना कमेटिंग मंदाना। नावा हिसाब ते क्वोमिंगतांग प्रतिगमन तुन प्रोत्साहन हियाना कमेटिंग ओसो कम्युनिस्ट पार्टी तुन प्रोत्साहन हियाना कमेटी आंदुंग। माटु इंजे प्रगति तुन प्रोत्साहन हियाना हत्ता साल ते खत्म कित्ता कमेटी ना पुनस्थापना किया परितोमा? मीटु सब्बे तोर अविना पुनस्थापना खिलाफ लेंग तेहना अनि प्रतिगमन हियाना कमेटिंग किन संगठित कीयाना पोरो डटेमासी मंदाना अनि वेल्ले लोकुर प्रतिगमन ता पक्ष एतितेके नन्ना बाता किया परिताना। मति वर्तमान अधिवेशन तल सब्बे तोर प्रगति तुन प्रोत्साहन हियाला आल्ससोर मत्ता लेक्का दिसिंता अनि इदिना पक्ष एतना लेक्का भाषण वेने हीताद हिल्ले। सिर्फ दक्षिणपंथी चांग-ल्वो गठजोड़ माटु पेरके अरना इंजी आल्सिंता। निज्जमे वेल्ले तेज आसोर मत्ता, हंदी वेंडसी मुन्ने हत्ताविना लोप्पा अस्थाई ओसो आंशिक प्रतिगमन ता अनुमति हियमूडंता, इत्तेके माटु मना डाका पेरके वाटना लेवेके मुन्ने दायना मना रफ्तार तुन तीरम किया लागियरा। मति मना आम नीति हमेशा प्रगति तुन प्रोत्साहन हियाना मत्ता।

6वी, सर्वहारा वर्ग ओसो पूंजीपति वर्ग नड़मा ता अंतरविरोध, समाजवादी हरी ओसो पूंजीवादी हरी नड़मा ता अंतरविरोध, बदे डावुट हिल्ला वर्तमान चीनी समाज ता प्रधान अंतरविरोध आंदू। मना वर्तमान कार्य मुन्ने तुकू अलग मंता। मुन्ने सर्वहारा वर्ग मुन्ने प्रधान कार्य मत्ता साम्राज्यवाद विरोधी सामंतवाद विरोधी संघर्ष लोप्पा जनता ना नेतृत्व कीयाना अदु इंजे पूरा आता। नेंडु प्रधान अंतरविरोध बद आंदू? इंजे माटु समाजवादी क्रांति किया मंतोम, इदिना हमला ता निशाना पूंजीपति वर्ग आंदु, संगेने इद क्रांति ता उद्देश्य सुडल स्तर ता व्यक्तिगत उत्पादन व्यवस्था तुन बदले कीयाना इत्तेके सहकारिता तुन लागू कीयाना आंदू; अदिन काजे समाजवाद ओसो पूंजीवाद नड़मा ता सामूहिकतावाद ओसो व्यक्तिवाद नड़मा ता ओसो सारांश ते समाजवादी हरी ओसो पूंजीवादी हरी नड़मा ता अंतरविरोध नेंडु प्रधान अंतरविरोध मंता। 8वी कांग्रेस ता प्रस्ताव लोप्पा

इद सवाल ता बारे ते वेहताद हिल्ले। अदिना उंदी अंश लोप्पा उन्नत समाजवादी व्यवस्था ओसो पेरके अरता सामाजिक उत्पादक शक्तिंग नड़मा ता अंतरविरोध प्रधान अंतरविरोध आंदू। इद प्रस्थापना सही हिल्ले। 7वी केंद्रीय कमेटी ता दूसरा पूर्ण अधिवेशन लोप्पा माटु राष्ट्रव्यापी जीत पेरके देश लोप्पा मजदूर वर्ग ओसो पूंजीपति वर्ग नड़मा ता अंतरविरोध ओसो देश ता बाहर चीन ओसो साम्राज्यवाद नड़मा ता अंतरविरोध प्रधान अंतरविरोध मंदिता। माटु इद अधिवेशन पेरके खुला चर्चा किताद हिल्ले मति अस्केटल माटु इदिना पोरो अमल कीसोर वाया मंतोम, बारांकु इत्तेके मना क्रांति उंदी समाजवादी क्रांति लोप्पा विकसित आता अनि माटु अद क्रांति लोप्पा रम्मेमासी मंतोम। मूंड महान बदलावके असल समाजवादी क्रांति आंदुंग, इद क्रांति लोप्पा मुख्य रूप ते उत्पादन साधन कुना मालिकाना लोप्पा ताकी कीयाना क्रांति आंदू; इव मूंडासी बदलावकु बुनियादी रूप ते पूरा आतांग। इव सब्बे तीव्र वर्ग-संघर्ष ता सूचक आंदू।

हत्ता साल ता दूसरी 6 महिनांग लोप्पा वर्ग-संघर्ष लोप्पा नरमी वात्ता। इद्रम माटु पुंजी-पुंजी कीतोम। मति माटु अदिना लोप्पा नरमी वायला हीतेके पूंजीपति वर्ग, पूंजीवादी बुद्धिजीविर, जर्मीदार ओसो धनी किसान लोर, खुशहाल मध्यम किसान लोरा उंदी हिस्सा मावा पोरो हमला शुरू कित्ता। इद इयेंडे आता। माटु नरमी वायला हीतोम अनि ओरु मावा पोरो हमला शुरू कित्तोर। इद मावा काजे बेस मत्ता, इद्रम कीतांकु पहल मावा कैदे वात्ता। ‘पीपुल्स डेली’ ता वरोर सम्पादकीय लोप्पा वेहता लेक्का, “मर्ग शांत मंदाला आल्सिंता, मति वड़िय रोमसोरे हिल्ले”⁵। ओरु उर्ग वड़िय तेहला आल्सतोर, उंदी सुडला-बेहरा तूफान तत्ताला आल्सतोर! इद्रम ता परिस्थिति ते माटु “मर्गक ना रक्षापंक्ति” कीयाना शुरू कीतोम। इदे मावा दक्षिणपंथि विरोधी संघर्ष मत्ता, शुद्धिकरण आंदोलन मत्ता।

शुद्धिकरण लोप्पा रेंडु काम शामिल मंतांग: उंदी दक्षिणपंथिरा खिलाफ संघर्ष कीयाना ताना लोप्पा पूंजीवादी विचारधारा खिलाफ संघर्ष कीयाना वेने शामिल मंता, दूसरा सुधार कुन लागू कीयाना, इदिना लोप्पा रेंडु कार्यदिशांग नड़मा ता संघर्ष वेने शामिल मंता। मनोगतवाद,

नौकरशाही ओसो संकीर्णतावाद इव सब्बे पूंजीवादी रुझानकु आंदुंग, मना पार्टी लोप्पा मत्तेके इविना काजे पूंजीपति वर्ग तुन दोषी मानेमायना। इंजेटल उंदी शताब्दि लेवेके रेंडु शताब्दि पेरेके वेने इदिना काजे पूंजीपति वर्ग तुने दोषी मानेयमायना या? अस्के वेने इद्रम कीयाना मुशिकल आयारा। अस्के एवनल नौकरशाही ओसो मनोगतवाद ता अस्तित्व मंदिता या? इंगो, अस्के वेने मंदिता, मति इदिना काजे दोषी पेरेके अरसी मत्तादिन मानेमायमूडायरा। समाज लोप्पा वामपंथी लोकुर, मध्यवर्ती लोकुर ओसो दक्षिणपंथिर हमेशा मंदिंतोर अनि मुन्ने हत्ता, मध्यम ओसो पेरेके अरता तत्व हमेशा मंदिंतोर। अस्के मीटु नौकरशाही ओसो मनोगतवाद ता दोषी पेरेके अरता तत्व मंदितांग।

शुद्धिकरण आंदोलन वायना साल पहली मई एवनल जारी मंदिता। ताना काजे अचोन टाईम वेल्ले मंता। पहली मई पेरेके ओसो उंदी नरमी वायला हियाना या? नन्ना इंगो, नरमी वायला हियाना इंजी आलिंसंताना इद्रम नरमी वायला हियाना दक्षिणपंथी भटकाव इंदा परितोमा? नन्ना, इद्रम इनमूडायो इंताना उदाहरण तुकू उंदी मीटिंग तुने हूडाटू। अदु लगातार जारी मत्तेके नरका-पियल आधा साल एवनल लगातार जारी मत्तेके, वेल्ले लोकुर नदारद आयना संभावना मंता। अदिन काजे माटु परिस्थिति अनुसार काम कीयाना, बस्केने रफ्तार बेरसी कीयाना अनि बस्के कम कीयाना। इद्रम कीसी माटु हत्ता साल माटु वेल्ले बेहरा जीत दोरकी कीतोम; माटु ढील हियवेके मावा काजे मना काम तुन सही साबित कीयाना मुशिकल आयर, बारांकु इत्तेके मनगा अदिना सही कारण हिल्ला मत्ता। माटु मालिकाना ता सवाल बुनियादी रूप ते हल किताद मंता, मति सही तरीका ते हल किताद हिल्ले इत्तोम। वर्ग-संघर्ष इंजे समाप्त आता। अदिन काजे ढील हियाना उसूल संबंधित छूट हियानाए आयवा परिस्थिति ता मांग आंदू।

नावा हिसाब ते शुद्धिकरण आंदोलन तुन वायना साल पहली मई एवनल जारी तासना अनि वायना साल ता दूसरा 6 महिनांग लोप्पा रोमी कीयाना। अस्के नाहकुना लोप्पा उंदी दूसरा शुद्धिकरण आंदोलन ताकी

कीयाना लेवेके उंदी दूसरा वाद-विवाद कीयाना जरूरत मंदिता या हिल्ले, इदु अस्केटा परिस्थिति पोरो आधार आसी मंदिता अनि इदिना बारे ते विचार-विमर्श वायना साल ते आयरा। मति पेरैटल हब्बर ता साल लोप्पा बद्रमाई दूसरा शुद्धिकरण आंदोलन कीयाना जरूरी मंता। माटु अस्के वेने दूसरा शुद्धिकरण आंदोलन कियवेके, अदिनकु वेने लब्बड़ बचोनो साल ताकी कियवा मत्तेके पाड़ना ओसो पूना दक्षिणपंथिर ओसो उंदी बेरा कुड़कड़ कीयाना शुरु कींतोर; संगे ने मध्यवर्तिरा दक्षिणपक्ष ते मत्ता उचुन तत्व, उचुन मध्यवर्ती तत्व ओसो उचुन वामपंथी तत्व वेने बदलेमाया परितांगा। दुनिया लोप्पा उचुन मुल वेल्ले अतरंगी मंदितोर मीटु बचोन ढील हीतेके वेने ओरा दक्षिणपंथी भटकाववादी विचार जरूर दिसिंता, ओरु नुकसानदायक समीक्षांग ओसो दक्षिणपंथी पोल्लो जरूर कींतोर। मना फौजी यूनिट कुना लोप्पा अनुशासन ता मूंड मुख्य नियम ओसो ध्यान हियाना लेक्का 8 पोल्लोंग ना लगातार शिक्षा हियाना जरूरी मंता। मीटु उचुकम महीनांग काजे इदिन रोमी कीतेके सैनिक लोरा मनोबल कम आयरा। मनोबव उंदी साल लोप्पा बचोनो बेरा बेरसी कीयाना। पूनोर किन शिक्षित कीयाना। शुद्धिकरण लेवा पाड़ना सैनिक ओसो वरिष्ठ कार्यकर्ता लोरा विचारधारा लोप्पा वेने बदलाव कीयाना।

इगा नन्ना सोवियत संघ संगे मावा मतभेद कुना बारे ते वेने उचुन पोल्लोंग कियाकाना सबसे मुन्ने, स्टालिन ना सवाल कुना बारे ते मावा ओसो खुश्चोव नड़मा अंतरविरोध मंतांगा। ओरु स्टालिन ना वेल्ले गलत प्रचार कितोर, माटु इदिनकिन सहमत हिल्लेमा। ओरु स्टालिन किन वेल्ले गलत तोहतोर! इद सिर्फ उंदी देश आयवा सब्बे देश कुना संबंधित पोल्लो आंदू। मीटू थ्येनआनमन मैदान ते स्टालिन ना गलत फोटो वाटतोम, इद पूरा दुनिया ता मेहनतकश जनता ना विचार संगे कलियो इंजी खश्चोव ओसो मना नड़मा ता बुनियादी मतभेद दिसिंतांगा। स्टालिन ना बारे ते हूड़तेके ओना मूल्यांकन कम से कम 70 प्रतिशत ओसो 30 प्रतिशत ते कीयाना। 70 प्रतिशत सफलतांग काजे ओसो ओसो 30 प्रतिशत ओना गलतिंग काजे। इद मूल्यांकन सौ प्रतिशत सही आयवा ओना गलतिंग

सिर्फ 20 प्रतिशत लेवेके सिर्फ 10 प्रतिशत लेवेके 30 प्रतिशत तुकू ज्यादा वेने मंदा परितांगा। सब्बे पोल्लोंग पोरो विचार कित्ता पेरके स्टालिन ना सफलतांग मुख्य मंतांग अनि ओना गलतिंग, कमजोरिंग गौण मंतांगा इदिना बारे ते मावा दृष्टिकोण खश्चोव किनकु अलग मंता।

दूसरा शांतिपूर्ण संक्रमण सवाल ता बारे ते वेने माटु खश्चोव ओसो ओना संगे सहमत हिल्लेमा। मावा हिसाब ते बदे वेने देश ता सर्वहारा पार्टी तुन शांति ओसो युद्ध काजे तैयार मंदाना। मुन्ने, कम्युनिस्ट पार्टी लेनिन फरवरी क्रांति तल अक्तूबर क्रांति एवनल पेश कित्ता नारांग लागू कीसोरे शासक वर्ग तल शांतिपूर्ण संक्रमण ता मांग कीता। माटु वेने च्यांग काई-शोक ना मुन्ने शांति-वार्ता ता प्रस्ताव तास्तोमा। इद पूंजीपति वर्ग खिलाफ, दुश्मन खिलाफ उंदी रक्षात्मक नारा आंदू, अदिनके माटु युद्ध आयवा शांति ता मांग कीतोम, इद्रम कीतेके माकिन जनता तुन मन पक्ष ते कियाला मदद दोरकियर। इद नारा संगे माटु पहलकदमी मना कैदे तासा परितोम; इद उंदी कार्यनीतिक नारा आंदू। मति पूंजीपति वर्ग राजसत्ता तुन खुद हस्तांतरित कियवा लेवा हिंसा ता सहारा एतितता। अस्के दूसरा संभावनांग पैदा आंता। ओरु लडेमायला आल्सतेके मुन्ने फैरिंग कीतेके माटु वेने ओरा मुकाबला कियाला काजे लडेमायवा मंदा परवोम। सशस्त्र शक्ति संगे राजसत्ता पोरो कब्जा कीयाना इंजी रणनीतिक नारा आंदू। मीटु शांतिपूर्ण संक्रमण बारे ते जिद कीतेके मीवा समाजवादी पार्टिंग नडमा बदे अंतर मन्नो आंता। जापानी समाजवादी पार्टी उंदे पार्टी आंदू, अदु सिर्फ उंदी संभावना काजे तैयार मंता इत्तेके अदु हिंसा बस्केने कीवोंग। दुनिया ता सब्बे समाजवादी पार्टिंग इद्रमे मंतांग। साधारण रूप ते सर्वहारा वर्ग ता राजनीतिक पार्टिंग काजे अवु रेंडासी संभावनांग काजे तैयार मंतांगा इनमूडांता। पहली संभावना बोरे शरीफजादाल सिर्फ तोड्डी ता इस्तेमाल कीयाना मुटका ता इस्तेमाल कीतेके नन्ना वेने नावा मुटका ता इस्तेमाल कियाकाना। इदिन इद्रम पेश कीसी रेंडासी संभावनांग कुन सुरता तासमूडायर अनि अदिना लोप्पा बदे कमी मन्नो आया। इदिन विडचसी बदे दूसरा हरी हिल्ला। नेंडु उचुन देश कुना कम्युनिस्ट पार्टिंग, ब्रिटिश कम्युनिस्ट पार्टी, सिर्फ

शांतिपूर्ण संक्रमण ता नारा पेश कीयाना लेक्का। माटु इदिना पोरो ब्रिटिश पार्टी नेताल ना संगे वार्ता कीतोम, मति सफल आयोम आतोम। ओरा घमंड मंदाना स्वभाविक मंता, बारांकु इत्तेके ओरु “शांतिपूर्ण संक्रमण ता नारा पेश कीयाना पोल्लोंग खुश्चोव बद्रम किया परितोर? अदिन नन्ना वेल्ले मुन्ने पेश कीसी मत्तान!” इत्तोर।

इदे आयवा सोवियत कामरेड्स सौ पुंगार पूयला हियाना ओसो सौ विचारशाखांग लोप्पा होड़ आयला हियाना मना नीति तुन समझेमायोरे आंतोर। माटु समाजवाद लोप्पा ओसो जनता ना पांत कुना लोप्पा प्रतिक्रांतिकारीरा लोप्पा, सौ पुंगार पूयला हियाना अनि सौ विचारशाखांग लोप्पा होड़ आयला हियाना इंजी आल्लिसंतोम। बदे डावुट हिल्ला जनता नड़मा ओसो पाबंदी आया परिता, इदिना उंदी हिस्सा मना दुश्मन बने माया परिता। उदाहरण तुकू दक्षिणपंथिर किने हूड़टू। मुन्ने ओरु जनता ना पांत कुना लोप्पा मत्तोर मति नेंडु नावा हिसाब ते ओरु सिर्फ एक-तिहाई अंश जनता ना श्रेणी लोप्पा मंता ओसो दो-तिहाई अंश प्रतिक्रांतिकारीरा श्रेणी ते मंता। माटु ओरकिन चुनाव अधिकार तल जेक कीतोम? कानूनी रूप ते सजा हियाना लेवेके श्रम संगे पूना बदलाव कीयाना लोकरु किन विड़चसी, बाकी लोकरा संगे इद्रम कीयाना बेस आयार। ओरा लोप्पटल उचुन मुल किन राजनीतिक सलाहकार सम्मेलन ता राष्ट्रीय कमेटी ता सदस्य वेने बने कियमूडांता, बारांकु इत्तेके इद कमेटी ता सदस्य लोरा संख्या उंदी हजार आतेके वेने बेस आयार। दक्षिणपंथी तत्व पोरो-पोरो हूड़तेके इंजे वेने जनता ना पांत लोप्पा मत्ता लेक्का दिसिंतोर, मति असल ते ओरु मना दुश्मन आंदुर। माटु खुलेआम मना दुश्मन आंदुर, मना ओसो ओरा नड़मा ता अंतरविरोध जनता ओसो दुश्मन नड़मा ता अंतरविरोध आदू, बारांकु इत्तेके ओरु समाजवाद ता विरोध कींतोर, कम्युनिस्ट पार्टी ता नेतृत्व ता विरोध कींतोर अनि सर्वहारा तानाशाही ता विरोध कींतोर इंजी ऐलान कीतोम। सक्षिप्त ते ओरा पोल्लोंग ओसो काम 6 मापदंड⁶ संगे कलियो आंता! ओरु जहरीला रोंडा आंदुर, जनता नड़मा बस्के ने उचुन जहरीला रोंडा जरूर मोड़ियंता।

आखरी ते माटु मना काम लोप्पा मजबूती तोहना अनि अध्ययन लोप्पा कठोर परिश्रम कीयाना। इव मूंडासी शब्द कुना पोरो ध्यान हियाना “कठोर, परिश्रम, कीयाना”। माटु मना काम लोप्पा मजबूती तोहना अनि कठोर परिश्रम कीयाना जरूरी मंता। इंजे मना वेल्ले कामरेड्स कठोर परिश्रम कीसोर हिल्लेर, उचुन मुल इत्तेके काम कित्ता पेरके तम्मा अतिरिक्त ताकत तुन मुख्य रूप ते ताश ओसो “माच्यांग” करसना, डांस-पार्टिंग लोप्पा खर्च कींतोर। नावा हिसाब ते इद सही हिल्ले। माटु काम कित्ता पेरके मना अतिरिक्त ताकत तुन मुख्य रूप ते अध्ययन लोप्पा वाटना अनि अध्ययन ता आदत वाटना। असल इत्तेके माटु बदिना अध्ययन कीयाना। माटु मार्क्सवाद-लेनिनवाद, दूसरा प्रौद्योगिकी ओसो तीसरा प्राकृतिक विज्ञान ता अध्ययन कीयाना। इदे आयवा साहित्य, खासकर साहित्य ता सिद्धांत ता वेने अध्ययन कीयाना। इदिना बारे ते उचुन जानकारी दोरकी कीयाना नेतृत्वकारी कार्यकर्ता लोरा काजे जरूरी मंता। ओरु पत्रकारिता ओसो शिक्षा ता जानकारी वेने दोरकी कीयाना। संक्षिप्त ते ज्ञान-विज्ञान तुन वेल्ले व्यापक आसोर दांता, इदिना बारे ते माटु साधार जानकारी दोरकी कीयाना। बारांकु इत्तेके इव सब्बे ना माटु नेतृत्व कीयाना! माटु बद्रम ता विशेषज्ञ आंदोम? माटु राजनीतिक विशेषज्ञ आंदोम। जानकारी दोरकी कियवा, इविना नेतृत्व कियवा लेवा काम बद्रम ताकियर? सब्बे प्रांत कुना तम्मा-तम्मा अखबार मंतांग, इविन मुन्ने नजरअंदाज कित्ता मत्ता, कला-साहित्य विषय ता पत्रिका, संगठन मंतांग, इविन वेने मुन्ने नजरअंदाज किताद मत्ता। संयुक्त मोर्चा, जनवादी पार्टिंग ओसो शिक्षा ता परिस्थिति वेने इद्रमे मत्ता। इव सब्बे किन नजरअंदाज आता अनि इविना लोप्पाने विद्रोह आता। मति उंदी बेरा इविना पोरो ध्यान हियाना शुरू आतास्के उचुके महीनांग लोप्पा पूरा परिस्थिति बदलेमाता। ल्वो लुंग-ची सर्वहारा वर्ग ता सुडला बुद्धिजीविर निम्न-पूजीपति वर्ग ता बेहरा बुद्धिजीविरा नेतृत्व बद्रम किया परितोर? इंजी पूछेमातोर। ओना इद पोल्लो गलत मत्ता। ओरु तम्मा किन निम्न-पूजीवादी इंतोम, मति असल ते ओरु पूजीवादिर आंदुर। सर्वहारा वर्ग ता “सुडला बुद्धिजीविर” पूजीपति वर्ग ता बेहरा

बुद्धिजीविरा नेतृत्व जरूर कींतोरा। सर्वहारा वर्ग कैदे ओरा सेवा कीयाना बुद्धिजीविरा उंदी ग्रुप मत्ता, ताना लोप्पा मुन्ने मार्क्स ओसो ताना पेरके एंगल्स, लेनिन, स्टालिन मंतोर अनि इंजे मना लेक्कटा लोक्कुर ओसो वेल्ले दूसरा लोक्कुर मंतोरा। सर्वहारा वर्ग सबसे मुन्ने हत्ता वर्ग आंदू, अदु पूरा दुनिया लोप्पा क्रांति ता नेतृत्व कींता।

नोट

- 1) 5 प्रमुख आंदोलन कु: भूमि सुधार आंदोलन, अमेरिका आक्रमण ता प्रतिरोध कीयाना ओसो कोरिया ता सहायता कीयाना आंदोलन, प्रतिक्रांतिकारि किन खत्म कीयाना आंदोलन, “मूंड गलतिंग” विरोधी ओसो “हेय्युंग गलतिंग” विरोधी आंदोलन ओसो विचाराधारात्मक पूना बदलाव आंदोलन।
- 2) इगा कृषि, दस्तकारी ओसो पूंजीवादी उद्योग-वाणिज्य ता समाजवादी बदलाव ता बारे ता वेहताद मंता।
- 3) ‘सेना लोप्पा जनवादी आंदोलन’, नोट 1, ‘माओ त्सेतुंग ना संकलित रचनांग’ ग्रन्थ 4।
- 4) शानतुंग प्रांत ता ल्यांगशान मेट्टा सुंग राजवंश लोप्पा विद्रोही किसान लोरा उंदी अड्डा मत्ता। क्लासिकी उपन्यास “द वाटर मार्जिन” लोप्प ज्यादातर विद्रोही नेताल अधिकारि ओसो निरंकुश जमींदार लोरा उत्पीडन संगे मजबूर आसी डेरा पोयला ल्यांगशान मेट्टा ते हत्तोरा। “ल्यांगशान मेट्टा ता विद्रोहिरा लोप्पा कलियला मजबूर आयना” इत्तेके बदे दबाव ते वासी बदे काम कियाला मजबूर आयाना।
- 5) हान इंग (पश्चिमी हान राजवंश), ‘गीत-संग्रह ता टीका’, अध्याय 9।
- 6) इद ग्रन्थ लोप्पा हूडाटू।

जनता ना बहुसंख्या पोरु भरोसा तासना⁵⁸

13 अक्तूबर 1957

शुद्धिकरण आंदोलन काजे इंजे उंदी तरीका तंडताद मंता इत्तेके आजादी ते वड़कला हियाणा, खुला राय हियाणा, बेहरा वाद-विवाद कीयाना अनि बेहरा अक्षर वाले पोस्टर रासना। इद पूना तरीका तुन जनता खोज कित्ता, इद मना पार्टी हत्ता कालम ते लागू कित्ता तरीका तूक अलग मंता। असल ते येनान लोप्पा वेने शुद्धिकरण आंदोलन ताकनास्के बेहरा अक्षर वाले उचुन पोस्टरकु दिस्तांग मति माटु अविन प्रोत्साहन किताद हिल्ले। पेरके “मूंड रकम ता जांच-पड़ताल ओसो मूंड रकम ता सुधार” कीयानास्के वेने इद तरीका ते इस्तेमाल किताद हिल्ले। क्रांतिकारी युद्ध कालम ते माकिन वेतन दोरकवा मत्ता अनि मनगा हथियार बने कीयाना कारखाना वेने हिल्ला मत्ता। मना पार्टी ओसो सेना सैनिक, विभिन्न जागा ने जनता पोरु आधार आसी मत्ता, जनता पोरु आधार आसी मत्ता। अदिन काजे वेल्ले जोम उंदी जनवादी कार्यशैली ता जन्मन आता। मति अस्के नेता लेक्का आजादी ते वड़कना, खुला राय हियाणा, बेहरा वाद-विवाद कीयाना, बेहरा अक्षर वाले पोस्टर रासना तरीकांग लागू किताद हिल्ला मत्ता। इदिना बाता कारण मत्ता? इदिना कारण अस्के माटु उंदी तीव्र युद्ध लोप्पा मत्तोर अनि वर्ग-संघर्ष वेल्ले उग्रम रूप ते ताकसोर मत्ता। अस्के माटु मना पांत कुना लोप्पा इव सब्बे पोल्लो ना खुला छूट हीतेके वेल्ले नुकसान आसी मनवड़ा। इंजे परिस्थिति बदलेमाता। युद्ध मारता अनि थाइवान तुन विड़चसी पूरा देश मुक्त आता। अदिन काजे इद पूना तरीका ता जन्म आता।

⁵⁸ सर्वोच्च राज्य सम्मेलन ता 13वीं अधिवेशन लोप्पा भाषणा

पूना क्रांतिकारी विषय-वस्तु काजे उंदी पूना तरीका परकना जरूरी मंता। मना वर्तमान क्रांति उंदी समाजवादी क्रांति आंदू, अदिना उद्देश्य उंदी समाजवादी देश ता निर्मा कीयाना अनि अदु इद पूना तरीका परहकताद मंता। इदिन वेल्ले जल्दि प्रचार कियमूडायर अनि इदिन इस्तेमाल कीयाना उचुने महीनांग लोप्पा वेल्ले जल्दि करियमूडांता।

आजादी ते तम्मा पोल्लोंग वडकला हिया, खुला राय हियाना, बेहरा वाद-विवाद कीयाना अनि बेहरा अक्षर वाले पोस्टर रासना तरीका लागू आसोर मत्तेके मुख्य रूप ते रेंडु पोल्लोंग लोप्पा वेरीं मंदिता। पहली गडबड तुकू वेरीं मंदिता। मीटु गडबड तुकू वेरियंतिरा? नावा हिसाब ते वेल्ले लोकरु इदिनकु वेरियंतोरा। दूसरा कठिन परिस्थिति दूर किया परवा मंदाना तुकू वेरीं मंदिता। कारखाना लेवेके सहकारी समितिंंग ना निर्देशक, कालेज ता प्रधान, पार्टी-केटिंग ना सचिव मत्ता लोकरु, खुला राय हीतेके अनि किस्स पत्तितेके तम्मा किन बचे किया परवोर आयनूर इंजी वेरियंतोरा। इंजे लोकरु किन वेरीं मुक्त आयना, मति मई ते इद्रम कीयाना मुश्किल मंता इंजी समझेमायला हल्को आंता। पेकिंग ता 34 उच्च-शिक्षा प्रतिष्ठान कुना लोप्पा खुला राय हियाना अनुमति बस्के एवनल वेल्ले मीटिंग केयमूडाय अस्के एवनल हियमूडायो। निडर मंदाना जरूरत बारांकु मंता? राय हियाना मना काजे फायदेमंद बारांकु मंदिता? मना काजे बदिनगडल फायदा आंता- खुला राय हियाना, पेरेके-मुन्ने आसी राय हियाना लेवेके इनपडे राय हियवा लेवा मंदाना? इनपडे राय हियवा मंदाना मना काजे फायद मन्नो, पेरेके-मुन्न आसी राय हीतेके वेने बदे सवाल हल आया परवो अदिन काजे खुला राय हियाना जरूरी मंता। पहली पोल्लो इद्रम कीतेके गडबड पैदा आयो आंता, दूसरा इद्रम कीतेके कठिन परिस्थिति दूर कीयाना असंभव मन्नो आंता। बदे डावुट हिल्ला उचुन मुल ता समस्या अलग मंता। उदाहारण तुकू, तिंंग लिंंग कठिन परिस्थिति तुन दूर किया परवो अनि कम्युनिस्ट पार्टी तुन पूरा नीर कीयाना उद्देश्य ते किस्स पोत्ती कित्ता फंग श्वे-फंग वेने कठिन परिस्थिति पोरो काबू कित्ताद हिल्लो। वीरु सिर्फ मुडामेंड लोकरु मंतोर अनि दक्षिणपंथीर आंदुरा। दूसरा लोकरु किन

परेशान आयना जरूरत हिल्ले, ओरु इद्रम ता परिस्थिति पोरो काबू किया परिंतोर। नौकरशाही, संकीर्णतावाद ओसो मनोगतवाद लेक्कटा गलतिंग कीतेके वेने ओरु सिर्फ इविन सुधरे कीयाना जरूरत मंदिता वेरियाना जरूरत हिल्ले। बुनियादी पोल्लो जनता ना बहुसंख्या पोरो भरोसा तासना अनि जनता नडमा वेल्ले लोकर बेसतोर मंतोर इंजी भरोसा कीयाना। मजदूर लोरा नडमा वेल्ले लोकर बेस मंतोर अनि अद्रमे किसान लोरा नडमा वेने वेल्ले लोकर बेसतोर मंतोर। कम्युनिस्ट पार्टी ओसो नौजवान संघ ता ज्यादतर सदस्य बेस मंतोर। मना देश लोप्पा गडबड पैदा कियला आल्सोर। पूंजीवादी बुद्धिजीविर, पूंजीपतिर ओसो जनवादी पार्टिंग ना सदस्य लोरा नडमा वेने वेल्ले लोकरा पूना बदलाव आया परिंता। अदिनके माटु वेरियनायो, बारांकु इत्तेके गडबड पैदा आया परवो अद पैदा आयना संभावनाए हिल्ले। माटु बहुसंख्या पोरो भरोसा तासना अनि बहुसंख्या इत्तेके 51 प्रतिशत लोकर इंजी आयो? आयो, इद्रम आयो इद्रम इत्तेके 90-98प्रतिशत लोकरा पोरो भरोसा तासना।

समाजवादी क्रांति माटु सब्बे तोरा काजे उंदी पूना मंदिता। माटु मुन्ने ताकी कित्ता क्रांति सिर्फ उंदी जनवादी क्रांति मत्ता, अदिना स्वरूप उंदी पूंजीवादी क्रांति मत्ता। अदु सिर्फ साम्राज्यवादी, सामंतवादी ओसो नौकरशाही-पूंजीवादी मालिकाना तुन खत्म कित्ता, व्यक्तिगत मालिकना ओसो राष्ट्रीय पूंजीवादी मालिकाना तुन आयो। अदिनके वेल्ले लोकर जनवादी क्रांति ता परीक्षा ते पास आतोर। इदिना लोप्पा उचुन मुल निज्जमे उंदू पूर्ण जनवादी क्रांति कियाला आल्सतोर अनि अदिना लोप्पा वातोर, बाकी लोकर अदिना काजे कठोर परिश्रम कियाला तैयार मत्तोर अनि परीक्ष पीरा पास कित्तोर। इंजे समाजवाद ता परीक्ष ता सामना कीयाना, उचुन मुल काजे इद कठिन परीक्षा मत्ता। उदाहारण तुकू हुपे प्रांत लोप्पा वरोर पार्टी-सदस्य मुन्ने वरोर खेत-मजदूर मत्तोर। ओना परिवार ता मूंड पीडिंग कुन भीख ताल्का लागता। मुक्त पेरके ओरा पूना पिस्वल शुरू आता। ओना परिवार ता परिस्थिति सुधरेमाता अनि ओरु जिला स्तर ता कार्यकर्ताल बनेमातोर। मति ओनकिन समाजवाद तुकू सख्त शिकायत

मत्ता, ओरु कृषि-सहकारिता ता वेल्ले विरोध कितोर; ओरु “आजादी” ता मांग कितोर अनि अनाज अस्सना-वम्मना राष्ट्रीय एकाधिकार ता विरोध कितोर। वर्ग-शिक्षा हियाना उद्देश्य ते वीना पिस्वल ता बारे ते इंजे उंदी प्रदर्शनी किताद मंता। ओरु तिप्पल ते कन्निर पोहा मंतोर इंजी पेरके ओरु तन्ना गलतिंग सुधरे कींतोर। समाजवाद परीक्षा पास कीयाना बारांकु मुशिकल मंता? बारांकु इत्तेके समाजवाद इत्तेके पूंजीवादी मालिकाना तुन खत्म कीसी अदिन पूरा जनता ना समाजवादी मालिकना ते बदले कीयाना अनि व्यक्तिगत मालिकाना तुन खत्म कीसी अदिन समाजवादी सामूहिक मालिकाना लेक्का बदले कीयाना। बदे डारुट हिल्ले इद संघर्ष बचोनो साल एवनल ताकसोर मंदिता अनि नेंडु संक्रमण काल बचोन बेहरा मंता इंदाना जरूर मुशिकल मंता। इयेंड संघर्ष ता लहर कुना लोप्पा उभार वाया मंता। हर साल इदिना लोप्पा पीली डोड्डा ता लहर कुना लेक्का उभार वासोर मंदिता या? नावा हिसाब ते इद्रम आयो बहे। मति पेरके वेने इद्रम ता उभार वासोरे मंदिता।

इंजे पूरा देश लोप्पा समाजवाद तुन स्वीकार कियवा मंदानोर बचोन मंतोर? वेल्ले स्थानीय कामरेड्स संगे कलियसी नन्ना उंदी अंदाजा वाटताना अदिना अनुसार मना कुल आबादी लोप्पा लगभग दस प्रतिशत लोकुर समाजवाद तुन विचार कीवोर अनि अदिना विरोधी कींतोर। इदिना लोप्पा जमींदार वर्ग ता , धनी किसान, खुशहाल मध्यम किसान लोरा उंदी हिस्सा, राष्ट्रीय पूंजीपति वर्ग ता उंदी हिस्सा, पूंजीवादी बुद्धिजीविरा उंदी हिस्सा, शहरी निम्न-पूंजीपति वर्ग ता उच्च श्रेणी ता उंदी हिस्सा ओसो इरवुर-मुवुर मजदूर ओसो गरीब, निम्न-मध्यम किसान वेने शामिल मंतोर। 60 करोड़ आबादी ता दस प्रतिशत बचोन आंता? 6 करोड़। इदु सुडला संख्या हिल्ले इदिन कम आल्सनायो।

माटु जनता ना बहुसंख्या पोरु पक्का भरोसा तासना जरूरी मंता, इदिना रेंडु कारण मंता। पहली, मना कुल आबादी लोप्पा 90 प्रतिशत लोकुर समाजवाद तुन स्वीकार कींतोर। ताना लोप्पा सर्वहारा वर्ग, नहाकुना इलाका ना अर्ध-सर्वहारा गरीब किसान, निम्न-मध्यम किसान,

निम्न-पूँजीपति वर्ग ता उच्च श्रेणी ता बहुसंख्या लोकर, पूँजीवादी बुद्धिजीविरा बहुसंख्या लोकर ओसो राष्ट्रीय पूँजीपति वर्ग ता उंदी हिस्सा शामिल मंता। दूसरा, समाजवादी तुन स्वीकार कियवा मंदाना अदिना विरोध कियानालोरा लोप्पा वेल्ले कट्टरपंथी लोकर बचोन मंतोर, इत्तेके अति-दक्षिणपंथी, प्रतिक्रांतिकारी, तोड़-फोड़ कार्रवाईंग कियवेकाई वेल्ले जिद्दी ओसो तम्मा कट्टरपन तुन डोलन जोम विड़सवा मंदानोरा संख्या लगभग 2 प्रतिशत मंता। कुल आबादी ता 2 प्रतिशत बचोन आंता, उंदी करोड़ बीस लाख। इद उंदी करोड़ बीस लाख मानेय जमा आसी हथियारबंद आसी उंदी बेहरा सेना ता रूप एता परितोर। मति देश लोप्पा वेल्ले गड़बड़ बारांकु आयार? बारांकु इत्तेके वीरु विभिन्न सहकारी समितिंग, नाहकु, कारखानांग, स्कूल ओसो कम्युनिस्ट पार्टी, नौजवान संघ, जनवादी पार्टिंग ना विभिन्न शाखांग लोप्पा फैलेमासी मंतोर। ओरु हर जागा ते मंतोर, जमा आया परवोर अदिन काजे बदे बेहरा गड़बड़ आया परवो।

समाजवादी क्रांति बचोन बेहरा मंता, इद संघर्ष लोप्पा बद-बद वर्ग शामिल मंता? समाजवादी क्रांति सर्वहारा वर्ग मेहनतकश जनता ना नेतृत्व कीसी पूँजीपति वर्ग खिलाफ शुरू कित्ता संघर्ष आंदू। चीनी लोप्पा सर्वहारा वर्ग संख्या कम मंता मति अदिना एकताकारी संख्या वेल्ले बेहरा मंता। ताना लोप्पा सबसे महत्वपूर्ण गरीब ओसो निम्न-मध्यम किसान मंतोर, ओरा संख्या नाहकुना आबादी ता 70 प्रतिशत, इदिन कु ज्यादा मंता। खुशहाल मध्यम किसान लोरा संख्या लगभग 20 प्रतिशत मंता। इंजे खुशहाल किसान लोर किन साधारण रूप ते मूंड श्रेणी ने विभाजित किया परितोम: लोकर सहकारिता तुन स्वीकार कींतोर ओरा संख्या 40 प्रतिशत मंता; दुलमुल मंदानोरा संख्या 40 प्रतिशत मंता; विरोध कियानोरा संख्या 20 प्रतिशत मंता। हत्ता उचुक साल कुना लोप्प शिक्षा ओसो पूना बदलाव कीतांकु जमींदार ओसो धनी किसान लोरा पांत कुना लोप्पा वेने विभाजन आता, ओरा लोप्पा उचुन मुल इंजे समाजवाद ता पूरा विरोध किया परवोर। पूँजीपति वर्ग ओसो पूँजीवादी बुद्धिजीविरा पोरो वेने माटु

विश्लेषणात्मक दृष्टिकोण पोयना अनि सब्बे तोर समाजवाद ता विरोध कींतोर इंजी आल्सनायो, बारांकु इत्तेके वास्तविक परिस्थिति इद्रम हिल्ले। मना कुल आबादी लोप्पाटल 90 प्रतिशत लोकुर समाजवाद ता पक्ष ते मंतोर। माटु इद बहुसंख्या पोरो भरोसा कीयाना। माटु मना कोशिश ओसो बेहरा वाद-विवाद संगे 8 प्रतिशत लोकुर किन मना पक्ष ते क्रिया परितोम, इदिना लोप्पा कुल संख्या 98 प्रतिशत आंता। इद्रम समाजवाद ता दृढता ते विरोध कीयाना कट्टरपंथिर सिर्फ 2 प्रतिशत पिसिंतोर। बदे डावुट हिल्ला माटु सतर्क मंदाना बारांकु इत्तेके वीरु इंजे वेल्ले शक्तिशाली मंतोर इंजी कामरेड तेंग श्याओ-फिंग इस्सले वेहतोर।

धनी किसान नाहकुना कुना पूंजीपति वर्ग आंदू ओरा पोल्लो वेल्ले कम लोकुर केंजिंतोर। जमींदार इत्तेके वेल्ले बदनाम आसी मंतोर। दलाल-पूंजीपति वर्ग वेल्ले मुन्ने ने बदनाम आता। पूंजीपति वर्ग ओसो पूंजीवादी बुद्धिजीविर, नाहकुना निम्न-पूंजीपति वर्ग ता उच्च श्रेणी (खुशहाल मध्यम किसान), शहरी निम्न-पूंजीपति वर्ग ता उच्च श्रेणी (सुडला-सुडल खुशहाल मालिक), इव रेंडु श्रेणिंग ना बुद्धिजीविरा प्रभाव उचुन जरूर मंदिता। बुद्धिजीविरा सब्बे जागा ने जरूरत मंदिता। विश्वविद्यालय कुना लोप्पा प्रोफेसर लोरा जरूरत मंदिता, प्राइमरी, सेकेंडरी स्कूल लोप्पा अध्यापक लोरा जरूरत मंदिता, अखबार लोप्पा संवाददाता लोरा जरूरत मंदिता, थिएटर लोप्पा अभिनेताल-अभिनेत्रि लोरा जरूरत मंदिता, निर्माण-परियोजनांग काजे वैज्ञानिक, इंजीनियर, तकनीशियन लोरा जरूरत मंदिता। इंजे बुद्धिजीविरा संख्या 50 लाख ओसो पूंजीपतिरा संख्या 7 लाख मंता, कुल मिले कीसी इद संख्या गरें-गरें 60 लाख मंता। हर परिवार लोप्पा 5 मानेय मत्तेके 60 लाख तुन 50 संगे गुणा कीतेके संख्या 3 करोड़ आंता। तूलनात्मक रूप ते हूइतेके पूंजीपति वर्ग ओसो अदिना बुद्धिजीविरा शिक्षा, तकनीकी जानकारी स्तर पोरो मंदिता। अदिनके दक्षिणपंथीर वेल्ले घमंड कींतोर। ल्वो लुंग-ची सर्वहारा वर्ग ता सुडला बुद्धिजीवी निम्न-पूंजीपति वर्ग लेक्का बेहरा बुद्धिजीवीरा नेतृत्व क्रिया परवोर आंतोर इतोर। ओरु पूंजीपति वर्ग आयवा निम्न-पूंजीपति वर्ग ते

वांतोर, निम्न-पूँजीपति वर्ग ता वरोर बेहरा बुद्धिजीवी आंदुर इंजी जिद कींतोर। नावा हिसाब ते सर्वहारा वर्ग ता सुडला बुद्धिजीविर किन विडसाटू, सिर्फ उंदी वेने पुनवा मत्ता मजदूर, किसान वेने लो लुंग-ची किनकु बचोनो ज्यादा बुद्धिमान मंतोर।

पूँजीपति वर्ग ओसो ओरा बुद्धिजीविर, निम्न-पूँजीपति वर्ग ता उच्च श्रेणिंग ओसो अदिना बुद्धिजीविरा दक्षिणपंथी, मध्यवर्ती तत्व कम्युनिस्ट पार्टी ओसो सर्वहारा वर्ग ता नेतृत्व तुन जीवा कीसी मानेमांता। इगा दक्षिणपंथिर (दुश्मन मंदितोर), पोरो-पोरो मानेयमायना मध्यवर्ती तत्व नडमा फर्क कीयाना जरूरी मंता। कम्युनिस्ट पार्टी बदे वेने काम ता नेतृत्व कीयाना लेक्का हिल्ले इंदानोर वेने मंतोर? इद विचार सिर्फ दक्षिणपंथिराए आयवा मध्यवर्ती तत्व कुना लोप्पा वेने उचुन मुल ता आंदू संक्षिप्त ते ओरा अनुसार माटु इंजे उचुन दिथ्याना सग्गा तोरा लेक्का मंतोम, कम्युनिस्ट पार्टी मुन्ने बदे दूसरा देश लोप्पा डेरा वाटना ओसो सर्वहारा वर्ग मुन्ने बदे दूसरा ग्रह ते डेरा वाटना विडचसी दूसरा बदे हरीं हिल्ले। बारांकु इत्तेके मीटु सब्बे पोल्लोने कोडही मंतरि! दक्षिणपंथिर मीटु काम तोर हिल्लिर इंतोर। वर्तमान वाद-विवाद ता मुख्य उद्देश्य पोरो-पोरो मानेमायना मध्यवर्ती तत्व कुन तम्मा पक्ष ते कीयाना, समाजिक विकास ता नियम बातल आंदू इंजी समझे कीयाना अनि शैक्षणिक स्तर कम मत्ता सर्वहारा वर्ग ता पोल्लो केंजना अनि नाहकुना लोप्पा गरीब, निम्न-मध्यम किसान लोरा पोल्लोंग केंजा बेस आयार। शैक्षणिक स्तर सर्वहारा वर्ग ओसो गरीब, निम्न-मध्यम किसान लोरा बेस हिल्ले मति क्रांति कीयानास्के सर्वहारा वर्ग ओसो गरीब, निम्न-मध्यम किसान लोरे इदिना लोप्पा निपुण साबित आंतोर। इद पोल्लो संगे बहुसंख्याक लोकुर किन प्रभावित कियमूडांता या? इंगो, कियमूडांता। इद्रम कीतेके पूँजीपति वर्ग ता बहुसंख्या तुन पूँजीवादी बुद्धिजीविरा बहुसंख्या तुन ओसो निम्न-पूँजीपति वर्ग ता उच्च श्रेणी ता बहुसंख्या तुन प्रभावि कियमूडांता। इद्रम कीसी विश्वविद्याल कुना प्रोफेसर, प्राइमरी, सेकेंडरी स्कूल ता अध्यापक, कलाकार, साहित्यकार, वैज्ञानिक, इंजीनियर लोरा बहुसंख्या तुन प्रभावित

कियमूडांता। इंजे पूरा मानेमायोर ओरु उचुन साल पेरेके तीरम-तीरम मानेमांतोरा।

लोकुरा बहुसंख्या समाजवाद ता समर्थन कीसोर मंदानास्के आजादी ते वड़कना, खुला राय हियाना, बेहरा वाद-विवाद कीयाना, बेहरा अक्षर वाले पोस्टर रासना तरीका ना जन्म आयना वेल्ले बेस आता। इद तरीका ता बदे वर्ग-स्वरूप मनो आंता। दक्षिणपंथी वेने इदिना इस्तेमाल किया परितोरा। माटु “बेहरा” लेक्कटा शब्द कुना आविष्कार कित्ता दक्षिणपंथिरा कर्जदार मंतोमा। इयेंड 27 फरवरी ते नन्ना नावा भाषण ते इद शब्द ता इस्तेमाल कित्ताद हिल्ले, नन्ना आजादी ते वड़कना, खुला राय हियाना ओसो बेहरा वाद-विवाद कीयाना बारे ते उचुन वेने वेहताद हिल्ले। हत्ता साल मई ते इगा आता उंदी मीटिंग लोप्पा माटु सौ पुंगार पूयला हियाना अनि सौ विचारशाखांग लोप्पा होड़ आयला हियाना ता चर्चा कितान अस्के माटु “खुला राय हियाना” अनि “आजादी ते वड़कना” ता बारे ते वेहतान, मति इव रेंडासी बेरांग “बेहरा” लेक्कटा शब्द ता इस्तेमान कीवोना। इदे आयवा मना विचार ते सौ पुंगार पूयला हियाना ता इस्तेमाल सिर्फ कला-साहित्य लोप्पा मंदाना अनि सौ विचारशाखांग लोप्पा होड़ आयला हियाना ता इस्तेमाल सिर्फ विद्या अध्ययन संबंधित समस्यांग लोप्पा आंता। पेरेके दक्षिणपंथिर इदिना इस्तेमाल राजनीतिक समस्यांग लोप्पा लेने कीयाना। दूसरा माटा ने ओरु सब्बे समस्यांग लोप्पा खुला राय हियाला हियाना, “खुला राय हियाना उंदी कालम” तय कीयाना। इदे आयवा ओरु बेहरा स्तर ते राय हियाला हियाना। स्पष्ट रूप ते इद नारांग ना इस्तेमाल सर्वहारा वर्ग वेने किया परित्ता ओसो पूंजीपति वर्ग वेने; इदिना इस्तेमाल वामपंथी, मध्यवर्ती ओसो दक्षिणपंथी सब्बे तोर किया परितोरा। आजादी ते तम्मा पोल्लोंग कीयाना, खुला राय हियाना, बेहरा वाद-विवाद कीयाना ओसो बेहरा अक्षर वाले पोस्टर रासना नारा संगे बद वर्ग ता फायदा आयार? इदिना संगे सर्वहारा वर्ग ताए फायदा आयर, पूंजीवादी दक्षिणपंथिरा आयो। बारांकु इत्तेके पूरा आबादी लोप्पा 90 प्रतिशत लोकुर देश लोप्पा गड़बड़ पैदा आयनायो इंजी आल्संतोर ओरु समाजवाद

निर्माण कियाला आल्संतोर। बाकी समाजवाद तुन स्वीकार कियवा अदिना विरोध कीयाना 10 प्रतिशत लोकरा लोप्पा वेल्ले लोकर रेंडु मत नडमा दुलमुल आसोर मंदितोर, समाजवाद ता सख्त विरोध कीयाना कट्टरपंथी तत्व सिर्फ 2 प्रतिशत मंता। ओरु देश लोप्पा गडबड बद्रम किया परितोर? अदिन काजे पेरके आजादी ते वडकना, खुला राय हियाना, बेहरा वाद-विवाद कीयाना ओसो बेहरा अकसर वाले पोस्टर रासना तरीका लेवेके तरीका जनता ना बहुसंख्या काजे फायदा मंदिता अनि अदिना पूना बदलाव कियाला सहायक आंता। रेंडु हरींग मंतांग-समाजवादी हरी ओसो पूंजीवादी हरी इद नारा समाजवाद काजे फायदा मंदिता।

माटु गडबडी तुकू वेरियानायो अनि मना लोप्पा कठिन परिस्थिति तल वेंडा परवोम इंजी वेरी नेंला वेने हियानायो। दूसरा बगिल, दक्षिणपंथिरा काजे कठिन परिस्थितल तल वेंडना मुश्किल मंदिता, ओरा काजे इदिनगडल वेंडना संभावना वेने मंदिता। नावा हिसाब ते द्वन्द्ववादी नियन अनुसार दक्षिणपंथी रेंडु हिस्सा ने विभाजित आंतांग। घटनांग ना आम रुझान तल प्रभावित आसी वेल्ले दक्षिणपंथिरा विचार सुधरेमातास्के तम्मा रुझान बदले कीयाना, सही तरीका ते व्यवहार कीयाना ओसो उचुन नरम आयना संभावना वेने मंदिता। इद्रम आतास्के ओरा दक्षिणपंथी लेबल गुच्चिह कीसी ओरकिन दक्षिणपंथी पोरोल ते केयवा लेवा ओरकिन काम हियमूझायर। मुट्टामेंड वेल्ल कट्टरपंथी लोकर आखरी एवनल गलती मानेमायोर अनि दक्षिणपंथी लेबल डोलना जोम तासिंतोर। इद्रम ता लोकर हमेशा मंदितोर मति इद अचोन महत्वपूर्ण हिल्ले।

दक्षिणपंथिर गडबड कितोर अदिन काजे माटु परिस्थिति ता मूल्यांगक किया परितोम: उंदी बगिल कुल आबादी लोप्पा 90 प्रतिशत लोकर समाजवाद तुन स्वीकाल कींतोर अनि माटु मना कोशिश संगे इद संख्या 98 प्रतिशत एवनल बेरसी किया परितोम, दूसरा बगिल 10 प्रतिशत लोकर समाजवाद तुन स्वीकार कियवा विरोध कींतोर, ताना लोप्पा समाजवाद ता सख्त विरोध कीयाना कट्टरपंथी लोकर 2 प्रतिशत मंतोर। इद मूल्यांकन तल माटु बेगा नितसी मंतोम इंजी समझेमांता।

सर्वहारा वर्ग ता राजनीतिक पार्टी ता नेतृत्व ते ओसो लोकुरा बहुसंख्या समाजवाद ता समर्थन पोरो आधार आसी माटु आजादी ते वडकना, खुला राय हियाणा, बेहरा वाद-विवाद कीयाना, बेहरा अक्षर वाले पोस्टर रासना तरीका ता इस्तेमाल किया परितोम, उंदी बेरा हंगरी आता लेक्कटा ओसो इंजे पोलैंड ते आसोर मत्ता घटना तुकू बचेमाया परितोमा माटु इद पत्रिका ता प्रकाशन पोरो पाबंदी वाटना, पोलैंड ते कित्ता लेक्का।' माटु सिर्फ पार्टी ता समाचारपत्र लोप्पा उंदी-रेंडु सम्पादकीय प्रकाशित कीयाना जरूरत मंता। 'वन ह्वेइ पाओ' ना आलोचना कियाला काजे माटु रेंडु सम्पादकीय रासना। पहली सम्पादकीय पूर्ण रूप ते स्पष्ट हिल्ला मत्ता अनि समस्या तुन तोहा परवो, मति दूसरा सम्पादकीय ता प्रकाशन पेके 'वन ह्वेइ पाओ' खुद तन्ना गलतिंग सुधरे कीयाना शुरू कित्तोर। 'शिन मिन पाओ' वेने इद्रमे कित्तोर। पोलैंड ते इद्रम आया परवो बारांकु इत्तेके ओरु प्रतिक्रांतिकारी ओसो दक्षिणपंथिरा संबंधित समस्यांग कुन ओसो बद हरीं पोयना इंदाना समस्या तुन इंजे हल किया परताद हिल्ले ओसो पूंजीवादी विचार कुना खिलाफ संघर्ष पोरो वेने जोर हिया परताद हिल्ले। अदिन काजे उंदी पत्रिका पोरो पाबंदी वाटता कारण ते उंदी घटना आता। नावा हिसाब ते चीन लोप्पा समस्या हल कीयाना वेल्ले हल्को मंता, नन्ना बस्केने निराशावादी बनेमायोन आतान। नन्ना गडबड आया परवो ओसो माटु वेरियाना जरूरत हिल्ले इंजी बस्केने इन्नोना गडबडी तुन सुधरे कियमूडांता। बेगा सही राय वांता ओसो गलत तरीका ते कोल्हार कीयाना ओसो वेल्ले गडबड आंता अगा समस्या तुन हल कीयाना मुन्ने तुकू बचोनो ज्यादा हल्को आंता।

मुक्ति तुकु मुन्ने चीन लोप्पा सिर्फ 40 लाख औद्योगिक मजदूर मत्तोर ओसो इंजे ओरा संख्या एक करोड़ बीस लाख आता। इगा संख्या वेल्ले हिल्ले मति मजदूर वर्ग ओसो सिर्फ मजदूर वर्ग ताए वायना कालम वेहच ते मंता। बाकी सब्बे वर्ग संक्रमण किया वर्ग आंदू, ओर सब्बे तोरकिन मजदूर वर्ग लोप्पा संक्रमण कीयाना लागियर। किसान पहली चरण ते इद संक्रमण तुकू मुन्ने सामूहिक किसान बनेमांतोर अनि दूसरा चरण ते राष्ट्रीय फार्म ता मजदूर बनेमांतोर। पूंजीपति वर्ग तुन खत्म कीयाना मति शारीरिक

रूप ते खत्म कीयानायो; अदिन उंदी वर्ग लेक्का खत्म कीयाना मति मानसिक रूप ते ओरा पूना बदलाव कीयाना। पूंजीवादी बुद्धिजीविरा पूना बदलाव कीयाना जरूरत मंता, अद्रमे निम्न-पूंजीवादी बुद्धिजीविरा पूना बदलाव कीयाना वेने जरूरत मंता। ओरा तीरम तीर पूना बदलाव कीयाना ओसो आखरी ते और किन सर्वहारा बुद्धिजीवी बने कीयाना। नन्ना उंदी बेरा इद हट्टो ता बारे ते वेहतान “तोला हिल्लेके केल्लकु बद्रम पेसिंतांग?” बुद्धिजीवी सर्वहारा वर्ग तल संबंध जोड़े कियवेके ओरकिन “वड़िय ते हिरकसी मंदाना” खतरा एता लागियरा। इंजे वेल्ले लोकुर ट्रेड यूनियन ते शामिल आतोरा। उचुन मुल “माटु ट्रेड यूनियन ते शामिल आतोम, मति माटु मजदूर वर्ग ता सदस्य बनेमाताद हिल्ला?” इंजी पूछेमांतोरा। आयो, इद्रम आयो। उचुन मुल कम्युनिस्ट पार्टी लोप्पा शामिल आतोरा, मति कम्युनिस्ट-विरोधी मंतोरा। तिंंग लिंग ओसो फंग श्वे-फंग इद्रमताए कम्युनिस्ट विरोधी कम्युनिस्ट मानेय आयोरा? ट्रेड यूनियन लोप्पा शामिल आतेके वरोर मानेय खुद मजदूर वर्ग ता सदस्य बनेमायोर आंतोर ओनकिन पूना बदलाव ता प्रक्रिया तल वेंडा लागिंता। जनवादी पार्टींग ना सदस्य, विश्वविद्याल कुना प्रोफेसर, साहित्यकार ओसो लेखक लोर मजदूर ओसो किसान लोरा नडमा गोती हिल्ले। इद उंदी गंभीर कमी मंता। फेइ श्याओ-थुंग नाए उदाहरण हूडाटू। पोरो स्तर ता बुद्धिजीविरा नडमा ओरा दो सौ तुकू ज्यादा दोस्त मंतोर, पेकिंग, शांघाई, छंगतू, ऊहान ओसो ऊशी लेक्कटा जागा ने फैलेमासी मंतोर। ओरु इद ग्रुप तल संबंध देहा परवो; इदे आयवा अदु वीर किन संगठित कीयाना जागरूक कोशिश वेने कित्ता अनि अदिना बगिल तल खुला राय वेने हींता। इदे अदिना मुश्किल कुना कारण आंदू। नावा हिसाब ते मीटु उचुन बदले माया पर्रितार? दो सौ मानेय ना मीवा ग्रुप विडसाटू अनि मजदूर, किसान लोरा लोप्पटल बाकी दो सौ मानेय किन दोस्त बने कीमुटा। नावा हिसाब ते बुद्धिजीविर मजदूर, किसान जना नडमाए तम्मा दोस्त बने कीयाना, वीरा लोप्पा ने ओरकिन बेसता दोस्त दोरका पर्रितोर। मुयतोर मजदूर लोरकिन दोस्त बने कीमुटा। किसान लोरा नडमा खुशहाल मध्यम किसान लोरकिन आयवा गरीब, निम्न-

मध्यम किसान लोरा नड़मा मीवा दोस्त बने कीमुटा। बारांकु इत्तेके दिशा अनुसार इद्रम ता मुयतोर मजदूर लोरो अनि इद्रम ताए गरीब, निम्न-मुध्य किसान वेल्ले जागरीक मंदिंतोर।

शुद्धिकरम आंदोलन ता नालुंग मंजिलकु मंतांग- खुला राय हियाना, जवाबी हमला कीयाना, गलतिंग सुधरे कीयाना अनि अध्ययन कीयाना। इत्तेके खुला राय हियाना, दक्षिणपंथिरा पोरो जवाबी हमला कीयाना, जांच-पड़ताल, सुदृढीकरण कीयाना ओसो गलतिंग सुधरे कीयाना अनि पेरके उचुन मार्क्सवाद-लेनिनवाद ता अध्ययन कीयाना “मंद-मंथर बयार और हल्की फुहार” तरीका ते ग्रुप मीटिंग लोप्पा आलोचना ओसो आत्मालोचना कीयाना। इयेंड 1 मई ते चीनी कम्युनिस्ट पार्टी ता केंद्रीय कमेटी शुद्धिकरण ता बारे ते जारी कित्ता दस्तावेज लोप्पा पहली बेरा “सलवा-सलवा वड़ियु ओसो जमने-जमने वायना मुसुर ” ता बारे ते वेहताद मत्ता, अस्के वेल्ले कामरेड्स मुख्य रूप ते दक्षिणपंथिर अदिना विरोध कित्तोर अनि “वड़िय-धूका अनि बेहरा मुसुर” ता आशा कित्तोर इदु पेरके मना काजे सही साबित आता। मना अंदाजा इदे मत्ता। बारांकु इत्तेके येना ता शुद्धिकरण आंदोलन लोप्पा वेने इद्रमे आसी मत्ता; माटु मंद-मथर बयार ता प्रस्ताव तास्तोम, इदिना जागा ते बेहरा तूफान वात्ता मति आखरी ते मंद-मंथर बयार अदिना दबाव वाटता। कारखानांग लोप्पा बेरा अक्षर वाले हजारों पोस्टर वाटतास्के नेतृत्वकारी पद ते काम कीयाना लोकुर किन वेल्ले कठिन परिस्थिति ता सामना किया लागता। लगभग 10 दिव्यांग लोप्पा उचुन मुल पद विड़सला लेवेके इस्तीफा हियाला तैयार आतोर अनि इदिनकुन ज्यादा सहेमाया परवोम इत्तोर, ओरा काजे तिंदना-उंडना विड़सना लेक्का, उस्कड़ मिरता लेक्का आता। पेकिंग ता विश्वविद्यालयकुना पार्टी-कमेटिंग ना सचिव लोरा किन वेने इद्रमताए परिस्थिति ता सामना किया लागता। ओरा करवुर डोलता, उस्कड़ मिरता। दक्षिणपंथिर ओरकिन रोमी क्रियवा लेवा खुला राय हियाला हित्तोर, ओरा उचुन वेने विरोध कीवोर। माटु वेने ओरकिन वेल्ले खुला राय हियाला हीतोम अनि जवाब हीवोम इत्तोम। अदिन काजे मई ते माटु ओरकिन तम्मा

परिस्थिति ते विडसतुम अनि 8 जून एवनल ओरा खंडम कीवोमा इद्रम सब्बे तोर पेरके मुन्ने आयवा लेवा तम्मा राय हित्तोर। इविना लोप्पा साधारण रूप ते 90 प्रतिशत तुकू ज्यादा राय सही मत्तांग अनि सिर्फ उचुके रायकु दक्षिणपंथी मत्तांग। हर इकाई तुन परिस्थिति वेंडा लागितार। हर कारखाना ओसो हर कृषि-उत्पादन सहकारी समिति तुन शुद्धिकरण आंदोलन ताकी किया लागिता। इंजे अद सेना लोप्पा ताका मंता। इद आंदोलन ताकी कीयाना वेल्ले जरूरी मंता। मीटु इद आंदोलन ताकी कीवेके “स्वतंत्र हाटुम” ता विकास आयार। इद उंदी दुनिया आंदू, बारांकु इत्तेके इगा मूंड साल एवनल शुद्धिकरण कियवेके कम्युनिस्ट पार्टी, नौजवान संघ ओसो जनवादी पार्टींग लोप्पा अनि विश्वविद्यालय कुना प्रोफेसर, प्राइमरी, सेंकेंडरी स्कूल कुना अध्यापक लोर, संवाददाता, इंजीनियर, वैज्ञानिक लोरा नडमा ओसो वेल्ले बद्रम-बद्रम तावो पोल्लों तेदिंतांग अनि पूंजीवादी विचार कुना जन्म आंता। नावा हिसाब ते हर मानेय रोज तम्मा लोहकुना सफाई कीयाना, रोज तम्मा तोड्डी नोर्ना अद्रमे शुद्धिकरण वेने साधारण रूप साल ते उंदी बेरा लगभग उंदी महीना एवनल ताकी कीयाना। इद आंदोलन लोप्पा उभार वासोर मंदिंता। वर्तमान उभार काजे माटु जिम्मेदार हिल्लेम, इदिना काजे दक्षिणपंथिरे जिम्मेदार आंदूर। माटु कम्युनिस्ट पार्टी लोप्पा वेने काओ कांग मंता इंतोमा। जनवादी पार्टींग लोप्पा वेने काओ कांग मंदाना संभावना मंता। नाकिन इत्तेके इदिना पोरो उचुन विश्वास हिल्ले। इदे आयवा इंजे कम्युनिस्ट पार्टी लोप्पा वेने तिंंग लिंंग, फंग श्वे-फंग ओसो च्यांग फंग लेक्काटोर पेस्तोर इत्तेके जनवादी पार्टींग लोप्पा इद्रम तोर मारतोर इंजी आल्सना या?

पूंजीपति वर्ग ओसो पूंजीवादी बुद्धिजीविर तम्मा पूना बदलाव कीयाना जरूरी मंता इंजी स्वीकार कीयाना। दक्षिणपंथिर इद्रम कियाला इनकार कींतोर, ओरा प्रभाव ते उचुन बाकी लोकर वेने तम्मा पूना बदलाव कियाला इनकार कींतोर अनि ओरा पूना बदलाव आता इंतोर। चांग नाए-छी पूना बदलाव उंदी भयंकर चीज आंदू, मानेय ना तोला हुय्थिची हव्वी पिङ्गना लेक्का मंता इंतोर। माटु मानेय किन तम्मा पूर्ण बदलाव किया

लागियर इंतोमा इत्तेके मानेय ना तोला हुय्यिची हव्वी पिडंगना इंजी इंतोरा। इद्रम आम मानेय ना तोला हुय्यिची हव्वी पिडंगानोर बोरु? वेल्ले लोकरु मना उद्देश्य बाताल इंजी, माटु इव सब्बे बारांकु कीयाना ओसो समाजवाद बदरम बेस मंता इंजी मरंगतोर। विचाराधारत्मक पूना बदलाव बारांकु जरूरी मंता? बारांकु इत्तेके माटु पूंजीवादी बुद्धिजीवी सर्वहारा विश्व-दृष्टिकोण पोयना अनि खुद किन सर्वहारा बुद्धिजीवी बने कीयाना। पाडना बुद्धिजीविर किन बदलेमाया लागियर बारांकु इत्तेके पूना बुद्धिजीविर मुन्ने वाया मंतोरा। मीटु ज्ञान लोप्पा पूना बुद्धिजीवी इंजे वेल्ले पोरो स्तर ते एवताद हिल्ले इंतोर, मति आखरी ते वीरु अनिवार्य रूप ते अद स्तर ते एवितोर। वीर पूना ताकत कुना उदय संगे पाडना वैज्ञानिक, इंजीनियर, प्रोफेसर अध्यापक लोर किन उंदी चुनौती ता सामना किया लागियर अनि ओरु मुन्ने जरूर दायनूर। माटु ज्यादातर लोकरु प्रगति किया परितोर अनि उचुन मुल तम्मा सर्वहारा बुद्धिजीवी वेने बनेमाया परितोर इंतोमा।

सर्वहारा वर्ग तुन वेने पूंजीपति वर्ग लेक्काने तन्ना बुद्धिजीविरा दस्ता तैयार किया लागियर। तन्ना बुद्धिजीविर लेवा बदे वेने वर्ग ता शासन ताका परवोर। अमेरिका कैदे खुद तन्ना बुद्धिजीवी हिल्लेके अगा पूंजीवादी तानाशाही बदरम लागू आया परिता? मनगा उंदी सर्वहारा तानाशाही मंता, सर्वहारा वर्ग तन्ना बुद्धिजीविरा दस्ता तैयार कीयाना अनि ताना लोप्पा समाज तल वात्ता ओसो निज्जमे खुद किन पूना बदलाव कित्ता मजदूर वर्ग ता रुझान दृढता ते लागू कित्ता सब्बे बुद्धिजीविर शामिल आयना। चांग नाए-छी ना गिनती तम्मा किन बदले कीयाना इनकार कीयाना दक्षिणपंथिरा लेक्का कियमूडांता। खुद किन बदले कीसी वरोर सर्वहारा बुद्धिजीवी बनेमायला काजे प्रेरित कीतेके इनकार कीतोर अनि ओरु वेल्ले मुन्ने मत्तोर, इंजे वरोर “लाल पूंजीवादी” बनेमातोर इंतोरा। अदिनके इंजे माटु मना मूल्यांकन खुद कीयाना ओसो सार्वजनिक वाद-विवाद कीयाना तरीका पोयना; मीटु मीवा मूल्यांकन खुद जरूर किया परितोर, मति इदिन वाद-विवाद काजे जनता ना मुन्ने तासमूडायर; माटु मीट सब्बे आल्सता स्तर ते एव परताद हिल्ले; चांग नाए-छी, निमा वरोर श्वेत पूंजीवादी

आंदिर इंतोमा उचुन मुल ओरु पहली विशेषज्ञ बने मांतोर अनि पेरके लाला मुन्ने विशेषज्ञ बनेमायना अनि पेरके लाल बनेमायना इत्तेके मुन्ने पांडरी अनि पेरके लाल बनेमायना आंता। इंजे आयवा पेरके लाल बनेमायनूर- ओरु इंजे लाल बनेमाताद हिल्ले इत्तेके इंजे ओरा रंग बद मंता? पक्का ओरा रंग इंजे पांडरीए मंता। बुद्धिजीविर किन लाल ओसो विशेषज्ञ उंदे बेरा बनेमायना। लाल बनेमायला काजे ओरकिन तम्मा पूंजीवादी विश्व-दृष्टिकोण पूराए पक्का बदले किया लागियर। इदे आयवा ओरकिन वेल्ले पुस्तकिंग पढ़मायना जरूरते आयवा दोड़ रास्ता सवाल कुन निज्जमे लागू कियाना: सर्वहारा वर्ग बातल? सर्वहारा तानाशाही बातल? बाकी सब्बे वर्ग संक्रमणशील मंदानास्के सिर्फ सर्वहारा वर्ग ताए वायना कालम वेहच ते बारांकु मंता? मना देश सिर्फ समाजवादी हरीए बारांकु पोयना, पूंजीवादी हरी बारांकु पोयनायो? कम्युनिस्ट पार्टी ता नेतृत्व अनिवार्य बारांकु मंता?

नन्ना 30 अप्रैल ते कित्ता पोल्लोंग वेल्ले लोकरा दिमाग ते प्रभाव वाटतांग? “तोला हिल्लेके केल्लु बेगा टिकेमाया परिंतांग?” नन्ना चीन लोप्पा पांच तोलांग वाया मंतांग इत्ताना अविना लोप्पा मूंड तोलांग पाड़नांग मंतांग, इत्तेके साम्राज्यवादी मालिकाना, सामंती मालिकाना ओसो नौकरशाही-पूंजीवादी मालिकाना। पाड़ना समाज लोप्पा बुद्धिजीवीर इव मूंड तोलांग पोरो आधार आसी पिसिंतांग। इदे आयवा ओरु राष्ट्रीय पूंजीवादी मालिकाना ओसो सुडला उत्पादक कुना मालिकाना इत्तेके निम्न-पूंजीवादी मालिकाना पोरो वेने आधार आसी मंदिंतांग। मना जनवादी क्रांति ता लक्ष्य पहली तोला तुन हुय्यिहचियाना अनि इद क्रांति लिन च-श्वी³ ना कालम ते सौ साल तुकू ज्यादा कालम एवनल ताकतांग। पेरकेटा रेंडु तोलांग, इत्तेके राष्ट्रीय पूंजीवादी मालिकाना ओसो सुडला उत्पादक कुना मालिकाना कुन, समाजवादी क्रांति ता निशाना बने कित्ताद मंता। इंजे इव पांच तोलांग ना अस्तित्व हिल्ले। पहली मूंड तोलांग वेल्ले मुन्ने ने गायब आतांग, पिस्ता रेंडु इंजे गायब आतांग। इंजे बद तोला मंता? समाजवादी सार्वजनिक मालिकाना ता तोला। बदे

डावुट हिल्ला, इद रेंडा हिस्सा ने विभाजित मंता, पूरा जनता ना मालिकाना ओसो सामूहिक मालिकाना। ओरु बदिना पोरो आधार आसी पिसिंतोर? जनवादी पार्टी ता सदस्य आई लेवेके प्रोफोसर, वैज्ञानिक, संवाददाता, वीर सब्बे तोर मजदूर वर्ग पोरो, सामूहिक किसान लोरा पोरो, पूरा जनता ना मालिकाना पोरो ओसो सामूहिक मालिकाना पोरो आधार आसी मंदिंतोर। संक्षिप्त ते वीर सब्बे तोर समाजवादी सार्वजनिक मालिकाना पोरो आधार आसी पिसिंतोर। पोरो वेहता पांच तोलांग हिल्ला कारण ते केलकु वेडिय ते हिरकसी मंदितांग, अद्रमासी अवु बेगाने टिकेमायवा लेवा दोड़ अरसोरे मंतांग। बुद्धिजीविर इंजे वेने इद पूना तोला ता उल्लंघन किया मंतोर। ओरु सर्वहारा वर्ग ओसो गरीब, निम्न-मध्यम किसान लोर किन बाताले समझेमायोर, ओरु नक्षत्र-विज्ञान ओसो भूगोल लेक्कटविन पुन्नोर इंतोर। ओरु “मूंड धर्म ओसो नौ विचारशाखांग”⁴ ना लोकुर ओरकिनकु दोड़ मंतोर इंजी आलिसंतोर। बुद्धिजीवी मार्क्सवादी-लेनिनवाद तुन स्वीकार कियाला तैयार हिल्ले। हत्ता कालम ते वेल्ले लोकुर मार्क्सवाद-लेनिनवाद ता विरोध कींतोर। साम्राज्यवादिर अदिना विरोध कींतोर। च्यांग काई-शेक दिव्य-दिव्य तुकू विरोध कीसोर मंतोर अनि “कम्युनिज्म चीन ता परिस्थिति ता अनुकूल हिल्ले” इंतोर अद्रमासी लोकुरा लोप्पा कम्युनिज्म तुकू वेरीं पुटता। बुद्धिजीविर मार्क्सवाद-लेनिनवाद तुन स्वीकार कीयाना अनि मना पूंजीवादी विश्व-दृष्टिकोण तुन सर्वहारा विश्व-दृष्टिकोण लेक्का बदले कियाला काजे टाईम ओसो उंदी समाजवादी विचारधारात्मक क्रांतिकारी आंदोलन ता जरूरत मंदिता। इयेटा आंदोलन ता उद्देश्य अदिना काजे हरीं पंडना मंता।

दक्षिणपंथिरा पोरो जवाबी हमला पेरके इंजे उचुन विभाग, संगठन ओसो कालेज कुना लोप्पा शांति वात्ता; नेतृत्वकारी पद ते काम कीयाना लोकुर आराम ते मंदा मंतोर अनि पेश कित्ता सही राय कुना अनुसार सुधार कियाला तैयार हिल्ले। पेकिंग ता उचुन विभाग, संगठन ओसो कालेज लोप्पा इद्रमताए परिस्थिति मंता। नावा हिसाब ते सुधार कीयानास्के खुला राय हियाना उंदी बेहरा ऊसा ओसो उंदी बेरा वातेके बेस आयारा। बेहरा

अक्षर वाले पोस्टर वाटाटू ओसो “मीटु सुधार बारांकु कियविर?” पूछेमायमूट, ओरकिन चुनौती हीमुट! इद चुनौती वेल्ले उपोयगी साबित आया परिंता। सुधार कियाला काजे उचुन टाईम लागिंता, उंदी-रेंडु महीनांग ना जरूरत मंदिता। ताना पेरके उंदी अध्ययन कालम मंदिता, उचुन मार्क्सवादी-लेनिनवाद ता अध्ययन कीयाना, “सलवा-सलवा वडियु ओसो जमने-जमने वायना मुसुर” लेक्का आलोचना ओसो आत्मालोतना आयना। इद चौथी मंजिल मंदिता। बदे डावुट हिल्ला इद्रम ता अध्ययन काजे उंदी-रेंडु महीनांग हालोंगे। इत्तेके इद आंदोलन मारसोर दायार अद्रमे अध्ययन लोप्पा लोकुरा इन्ट्रेस्ट बेरससोर दायना।

दक्षिणपंथिरा पोरो जवाबी हमला बस्केनाई जरूर रोमिंता। उचुन दक्षिणपंथिर इदिना अंदाजा वेने वाटतोर। ओरु इद तूफान बस्केने जरूर शांत आंता इंतोर। इदु निज्जमे! दक्षिणपंथिरा विरोध मीटु हमेशा किया परविर, हर दिया ओसो हर साल किया परविर। उदाहरण तुकू पेकिंग ते दक्षिणपंथिरा विरोध ता वातावरण ते मुन्ने लेक्कटा तीव्रता हिल्ले, बारांकु इत्तेके जवाबी हमला ता कालम लगभग मारता। मति इद इंजे पूराए मारताद हिल्ले, माटु मना कोशिश कुना लोप्पा नरमी वायला हियानायो। उचुन दक्षिणपंथिर इंजे वेने आत्मसमर्पण कियाला सख्त इनकार कींतोर, ल्वो लुंग-ची ओसो चांग नाए-छी कित्ता लेक्का। नावा हिसाब ते माटु ओरकिन बचोनो बेरा समझे कीयाना, ताना पेरके वेने ओरु तम्मा गलती स्वीकार कियाला इनकार कीतेके माटु वेने बाता किया परिंतोम? ओरकिन रोज मीटिंग ते केयना या? उचुन कट्टरपंथी लोकुर तमा किन सुधरे कींतोर अनि ओरकिन मनम विडसा लागियर। इद्रम तोर मुट्टुमेंडे मंतोर। माटु ओरकिन तम्मा परिस्थिति ते विडसना अनि उचुक दशक एवनल अद्रमे मंदाला हियाना। इद्रम कीसी वेल्ले लोकुर मुन्ने हंजोर मंदिंतोर।

माटु दक्षिणपंथिर किन समुद्र ते वाटा मंतोमा? हिल्ले, वरोर किन वेने आयो। दक्षिणपंथी उंदी दुश्मन ताकत आंदू, बारांकु इत्तेके ओरु कम्युनिस्ट पार्टी, जनता ओसो समाजवाद ता विरोध कींतोर। मति इंजे माटु ओरा पोरो जर्मीदार, प्रतिक्रांतिकारिरा लेक्का व्यवहार कीवोम अनि ओरकिन

मतदान अधिकार हियवा मंदानदु बुनियादी अंतर आंदू इरवुर-मुवुर लोकुर किने इद अधिकार तल तेंडना अनि ओरा सुधार कियाला काजे मेहनत कियाला वाटना। माटु लागू कीयाना तरीका लोप्पा बोनकिने गिरफ्तार कियमूडायो अनि मतदान अधिकार तल वेने तेंडमूडायो, इदिना विपरीत ओरकिन सही हरीं ते वायना मौक हियमूडंता, इद्रम ओरकिन विभाजित कियाला मदद दोरकिता। नन्ना इंजे-इंजे ने दक्षिणपंथिर रेंडु रकम ता मंता इंजी वेहताना। उंदी रकम तोर तम्मा गलितंग सुधरे किता पेरके दक्षिणपंथी लेबल तल मुक्त आंतोर अनि जनता ना पांत ते मलसी वांतोर। दूसरा रकम तोर यमराज ना दर्शन आयना जोम तम्मा गलतिंग संगे टुंडसी मंदितोर। ओरु “माटु आत्मसमर्पण कीयाना लोकुर आयोम! हूडूटू, माटू बचोन ‘ईमानदार’ आंदोम!” इंतोर। इद्रम तोर पूंजीपति वर्ग ता ईमानदार नौकर आंदुर दक्षिणपंथी लोकुर सामंती अवशेष ओसो प्रतिक्रांतिकारिरा संगे गठजोड़ ओसो घनिष्ठता तासना, ओरा संगे कलियसी कार्रवाईंग कींतोर। ‘वन ह्वेइ पाओ’ अखबार तुन हूडूसी जर्मीदार वेल्ले खुश आंतोर। ओरु किसान लोरकिन पढेमासी वेहना ओसो वेरहना-धमके कियाला काजे अखबार ता उचुक कापिंग अस्सिंतोर अनि “हूडूटू, इद अखबार लोप्पा छपेमाता!” इंजोरे ओरु बदला एतला आल्सतोर। साम्राज्यवादिर ओसो च्यांग काई-शेक ना वेने दक्षिणपंथिरा सांगं घनिष्ठ संबंध मंता। उदाहरण तुकू थाईवान ओसो हांगकांग ता प्रतिक्रियावादिर छू आन-फिंग ता “सब्बे वस्तु ने कम्युनिस्ट पार्टी ता इजारा मंदाना” आरोप ता चांग पो-च्युन ना “राजनीतिक योजना मंडल” ता मांग ओसो ल्वो लुंग-ची ना “राजनीतिक पुनर्प्रतिष्ठान कमेटी” ता आह्वान ता पूरा समर्थम कितोर। अमेरिका साम्राज्यवाद वेने दक्षिणपंथीरा समर्थन कींता। उंद बेरा नन्ना मीकिन “अमेरिका पेकिंग पोरो हमला कीतेके मीटु बाता कियाकिनर? बद्रम ता रुझान पोयकिर? बद्रम व्यवहार कियाकिर? अमेरिका संगे कलियसी कठपुतली शासन ता गठन कियाकिर लेवेके मना संगे मेड्डा पोरो दायकिर?” इंजी पूछेमाताना। अस्के नन्ना नावा उद्देश्य मेड्डांग पोरो दायाना मंता, मुन्ने चांगच्याखओ ओसो पेरके येनान ते दायाना इत्ता। नन्ना

अतिशयोक्ति ता सहारा एता मंतान ओसो गलत संभावनांग कुना पोरो विचार किया मंताना। माटु गड़बड़ी तुकू वेरियोमा। अमेरिका आधा चीन पोरो कब्जा कीतेकाई माटु वेरियनायो। जापान चीन ता ज्यादातर हिस्सा पोरो कब्जा कित्ता या? माटु पेरके युद्ध संगे उंदी पूना चीन ता स्थापना कित्ताद हिल्ले या? उचुन जापानी लोकुरा संगे वड़कनास्के नन्ना बचोनो बेरा माटु जापानी साम्राज्यवाद तुन धन्यवाद हियाना इत्ताना। बारांकु इत्तेके ओरु आक्रमण कीतांकु मना पूरा राष्ट्र लोप्पा विरोध ता लहर तेदितांग अनि मना जनता तेदता, इद्रम इद आक्रमण मना काजे वरदान साबित आता।

दक्षिणपंथिर ढोंगियल आंदुर, बेईमान आंदुर मावा मोरकुल पेरके गलत काम कींतोरा। चांग पो-च्युन इचोन कुकर्म कींतोरा इंजी बोर आलिसस मत्तोर? इद्रम तोर बचोन बेहरा पद ते मत्तेके अचोनो बेहरा गद्दारी कित्तादु हूड़ताना। चांग-ल्लवो गठजोड़ दीर्घकालीन सह-अस्तित्व ओसो आपसी निरीक्षण, सौ पुंगार पूयला हियाना, सौ विचारशाखांग लोप्पा होड़ आयला हियाना नारांग केंजिसी वेल्ले खुश आतोरा। ओरु इव नारांग ना फायदा एतसी मावा विरोध कित्तोरा। माटु दीर्घकालीन सह-अस्तित्व ता समर्थन कींतोरा मति ओरु इदिन उंदी अल्पकालीन सह-अस्तित्व ते बदले कीयाना कोशिश कित्तोरा इत्तोमा। माटु आपसी निरीक्षण ता पक्ष एतितोम, मति ओरु बदे वेने रकम ता निरीक्षण स्वीकार कीवोरा। उंदी बेरा ओरु बेय्यल आतोरा अनि पेरके असल परिस्थिति ता विकास ओरा आशा विपरीत आता। इद्रम दीर्घकालीन सह-अस्तित्व अल्पकालीन सह-अस्तित्व ते बदलेमाता। चांग पो-च्युन ना मंत्रि पद ता बातल आंता? नावा हिसाब ते वायना कालम ते ओरु इद पद ते मन्नोर आंतोर बहे। वरोर दक्षिणपंथी किन मंत्रि पद ते चुने कीयाना जनता स्वीकार कीवो आंता! उचुन कुख्यात दक्षिणपंथी राष्ट्रीय जन-प्रतिनिधि सभा ता प्रतिनिधि वेने मंतोरा। ओरा बारे ते बाता कीयाना? नावा हिसाब ते ओरकिन वेने इद पद ते तासना मुश्किल मंता। उदाहरण तुकू तिंंग लिंग वायना कालम ते जन-प्रतिनिधि मंदा परवोरा। उचुन मुल बदे पद हियाना लेक्का ओसो बदे काम

हियवा मंदाना बेस आंता इदान लेक्काटोर मंतोर। उदाहरण तुकू छयेन वेइ-छांग वायना कालम ते प्रोफेसर पद ते मंदा परितोर मति विश्वविद्यालय ता वाइस-प्रेसिडेंट पद ते मंदा परवोर। उचुन पिस्ता लोकर इत्तेके उचुने जोम काजे प्रोफेसर मंदा परवोर, बारांकु इत्तेके विद्यार्थि ओरा लेक्चर केंजला हन्नोर आंतोर। अस्के ओरु बाता काम कियानूर? माटु विश्वविद्यालय लोप्पा ओरा उचुन दूसरा काम हिया परितोम; संगे ने ओरकिन सुधरे मायना मौका हिया परितोम अनि उचुन साल पेरके ओसो अध्ययन काम ते वाटा परितोम। इव सब्बे सवाल कुना बारे ते आल्सना जरूरत मंता। इद उंदी लेस्कसी-हिरकसी मत्ता समस्या आंदू। क्रांति खुद वेने उंदी लेस्कसी-हिरकसी मत्ता समस्या आंदू। अदिन काजे मीटु दक्षिणपंथिरा संगे बद्रम व्यवहार कीयाना, ओरा संगे बद्रम ता व्यवस्था कीयाना इंजी विचार-विमर्श कींतिर इंजी आशा कींतान।

विभिन्न जनवादी पार्टिंग ओसो अविना बुनियादी इकाइंग ना परिस्थिति बद्रम मंदिता? नावा हिसाब ते इदिना बारे ते मीटु (जिम्मेदार पद ते मंजी काम कीसोर मत्तोर) स्पष्ट जानकारी तासविर बहे। कट्टर दक्षिणपंथिर माकिन ओरा बूडुंज दिस्सनायो इंजी उचुन जोम काजे बदे संगठन लोप्पा एर कलहा परितोर। जांच-पड़ताल कीतेके और संख्या असल ते सिर्फ उंदी-रेंडु प्रतिशते मंता। एर ते बचोन फिटकुरी वाटतेकाई मीकिन अदिना बूडुंज स्पष्ट दिस्सो आंता। वर्तमान शुद्धिकरण आंदोलन फिटकुरी वाटना लेक्का ने मंता। खुला राय हियाना अनि बेहरा वाद-विवाद कींताकु माटु बूडुंज हूड़ा परितोम। माटु कारखानांग, नाहकु ओसो कालेज लोप्पा हर् वस्तु ता बूडुंज हूड़ा परितोम अनि कम्युनिस्ट पार्टी, नौजवान संघ ओसो जनवादी पार्टिंग लोप्पा हर वस्तु ता बूडुंज हूड़ा परितोर।

इंजे नन्ना कृषि-विकास ता 40 सूत्री कार्यक्रम ता बारे ते वेहाकाना रेंडु साल ता अनुभव पेरके वेने बुनियादी लक्ष्य इंजे 4 सौ, 5 सौ ओसो 8 सौवे तय किताद मंता इत्तेके अनाज ता हर मू वार्षिक उत्पादन पीली डोड्डा ता उत्तर ते 4 सौ चिन, ह्याए डोड्डा ता उत्तर ते 5 सौ चिन ओसो ह्याए डोड्डा ता दक्षिण ते 8 सौ चिन तय किताद मंता। इद लक्ष्य 12 साल

लोप्पा पूरा कीयाना इंजी मत्ता। उचुने धारांग आयवा पूरा कार्यक्रम ते बदे बुनियादी बदलाव किताद हिल्ले। उचुन सवाल हल आतांग, उदाहारण तुकू सहकारी बदलाव ता सवाल मुख्य रूप ते हल आता, अनि अदिना संबंधित धारांग लोप्पा सही संशोधन किताद मंता। उचुन वस्तुंग पोरो मुन्ने जोर हीताद हिल्ले, कृषि-मशीनरी ओसो रासायनिक खादा। इंजे इविना लोप्पा वेल्ले कोशिश आया मंता अदिन काजे संबंधित धारांग लोप्पा इविना पोरो जोर हियाना। धारांग ना क्रम तुन वेने उचुन पुनर्व्यवस्थित किताद मंता। राष्ट्रीय जन-प्रतिनिधि सभा ता स्थाई समिति ओसो राजनीतिक सलाहकार सम्मेलन ता राष्ट्रीय कमेटी ता स्थाई समिति ता संयुक्त मीटिंग ते विचार-विनिमय पेरके कृषि-विकास काजे तैयार किता इद कार्यक्रम ता संशोधित ड्राफ्ट तुन सब्बे नाहकुना लोप्पा वाद-विवाद काजे तूसना कीयाना, पाडना ड्राफ्ट तुन प्रसारित किता लेक्का। इदिना पोरो कारखानांग लोप्पा अलग-अलग हंदी ते जनवादी पार्टिंग लोप्पा वेने वाद-विवाद आया परिंता। चीनी कम्युनिस्ट पार्टी ता इद कार्यक्रम ता ड्राफ्ट मना राजनीतिक योजना मंडल इत्तेके चीनी कम्युनिस्ट पार्टी ता केंद्रीय कमेटी तैयार किता, चांग पो-च्युन आल्सना “राजनीतिक योजना मंडल” आयो।

इद कार्यक्रम पोरो वाद-विवाद कियाला काजे किसान लोर किन प्रेरित कीयाना वेले जरूरी मंता। माटु जनता ना सजीवता ओसो जोश बेरसी कीसोर मंदाना। हत्ता साल ता दूसरी 6 महीनांग लोप्पा ओसो इयेटा पहली महीनांग लोप्पा जनता ना जोश कम आसी मत्ता, ताना पेरके दक्षिणपंथिर शहर, नाहकुना लोप्पा आयना गडबडी ता कारण ते ओरा जोश ओसो ज्यादा कम आसी मत्ता। शुद्धिकरण ओसो दक्षिणपंथी-विरोधी आंदोलन इद जोश तुन ओसो उंदी बेरा बेरसी किता। नावा हिसाब ते कृषि-विकास ता इद 40 सूत्री कार्यक्रम साधारण रूप ते चीन ता परिस्थिति संगे कलियो, अद्रमासी मनोगतवाद ता उपज आयो। इद कार्यक्रम लोप्पा मुन्ने उचुन मनोगतवाद जरूर मत्ता, मति अदिन माटु दूर किताद मंता। पूर्ण रूप ते विश्लेषण कीतेके इद कार्यक्रम तुन साकार रूप

हियाना संभव मंता। चीन तुन जरूर बदले कियमूडांता, अज्ञान तुन ज्ञान ते बदले कियमूडांता, नरमी तुन सक्रियता ते बदले कियमूडांता।

कार्यक्रम लोप्पा नालुंग नुकसानदायक जीव कुन खत्म कीयाना बारे ते इतेके हुपेंग, कोड़का पिट्टेंग, वीसिंग ओसो नुस्मेंग खत्म कीयाना बारे ते वेने उंदी धारा मंता। नाकिन इदिना लोप्पा वेल्ले इंट्रेस्ट मंता, मीटु इदिना बारे बाताल आल्लिसंतिर पुन्नोन? मीकिन वेने इदिना लोप्पा इंट्रेस्ट मंदाना संभावना मंता। नालुंग नुकसानदायक जीव किन खत्म कीयाना उंदी व्यापक सार्वजनिक स्वास्थ्य आंदोलन आंदू, संगेने इद अन्धविश्वास दूर कीयाना आंदोलन वेने आंदू। अविन खत्म कीयाना हल्को हिल्ले। नालुंग नुकसानदायक जीव किन खत्म कियाला काजे वेने खुला राय हियाना, बेहरा वाद-विवाद कीयाना ओसो बेहरा अक्षर वाले पोस्टर रासना जरूरी मंता। मीटु जनता तुन गोलबंद कीसी इद काम लोप्पा वाटतेके उचुन सफलतांग दोरकतेके जनता ना मानसिक परिस्थिति जरूर बदलेमांता ओसो चीनी राष्ट्र ता मनोबल जरूर बेरसिंता। माटु मना राष्ट्र तुन वेल्ले जबरदस्त बने कीसीयाना।

परिवार नियोजन लोप्पा सफलता दोरकना वेने संभव मंता। इदिना बारे ते वेने वेल्ले वाद-विवाद कीयाना अनि बचोनो साल एवनल इस्तेमाल कीयाना, बचोनो साल एवनल प्रचार-प्रसार कीयाना, बचोनो साल एवनल लोकुरा लोप्पा वेल्ले प्रचार कीयाना।

मना मुन्ने इंजे वेल्ले काम पिस्ता। माटु इंजे कृषि-विकास ता 40 सूत्र कार्यक्रम लोप्पा तय कित्ता वेल्ले काम पूरा कीयाना मंता। इद सिर्फ कृषि ता योजना आंदू; इदे आयवा उद्योग, संस्कृति ओसो शिक्षा ता काम ता वेने योजनांग मंतांग। मूंड पंचवर्षीय योजनांग पूरा आता पेरके चीन ता रूप जरूर बदलेमायार।

मना हिसाब ते तीसरी पंचवर्षीय योजना ता आखरी ते मना वार्षिक इस्पात उत्पादन दो करोड़ टन एविंता। इयेंड मावा इस्पात उत्पादन 52 लाख टन मंता अनि दस साल लोप्पा लक्ष्य पूरा आयना संभव मंता। 1952 ते भारत ता इस्पात उत्पादन 16 लाख टन मत्ता ओसो इयेंड 17

लाख टन तुकू उचुन ज्यादा मंता; 5 साल लोप्पा सिर्फ उंदी लाख टन तुकू ज्यादा आया परिंता। मना परिस्थिति बद्रम मंता? 1949 ते मावा इस्पात उत्पादन सिर्फ 1 लाख 90 हजार टन मत्ता, मूंड साल ता पुनस्थापना कालम ते 10 लाख टन तुकू ज्यादा आता अनि 5 साल पेरके इंजे 52 लाख टन एवता; 5 साल लोप्पा 30 लाख टन तुकू ज्यादा बेरसता। वायना 5 साल पेरके मावा वार्षिक उत्पादन उंदी करोड़ टन तुकू ज्यादा आतेके लेवेके अदिनकु वेने ज्यादा 1 करोड़ 15 लाख टन एवतेके, माटु मना तीसरी पंचवर्षीय योजना पूरा कित्ता पेरके अदिन 2 करोड़ टन एवसी किया परवोमा? जरूर एवसी किया परिंतोमा।

नन्ना मावा देश ते परिस्थिति आशा पूर्ण मंता इंतान। दक्षिणपंथिर इदु निराशापूर्ण मंता इंतोर मति ओरु इद्रम इंदाना गलतीं कींतोर। ओरकिन विश्वास हिल्ले; ओरु समाजवाद ता विरोध कींतोर अदिन काजे ओरकिन विश्वास हिल्ला मंदानदु स्वाभाविक मंता। माटु समाजवाद हरीं पोरो डटेमासी मंतोर अनि विश्वास संगे निंडसी मंतोमा।

नोट

- 1) अक्तूबर 1957 ते पौलैंड सरकार सामाहिक 'पो प्रोस्तू' पोरो पाबंदी वाटतोर, अद्रमासी अगा विद्यार्थिरा विद्रोह आतांगा।
- 2) इगा कामरेड माओ त्सेतुंग 30 अप्रैल 1957 ते जनवादी पार्टिंग ना नेतृत्वकारी सदस्य ओसो गैर-पार्टी जनवादी लोकुरा उंदी मीटिंग ते शुद्धिकरण आंदोलन ओसो बुद्धिजीविरा विचारधारात्मक पूना बदलाव ता बारे ते हीता भाषण ता बारे ते वेहताद मंता।
- 3) लिन च-श्वी (1785-1850) प्रथम अफीम-युद्ध ताकनास्के क्वांगतुंग ओसो क्वांगसी प्रांत लोप्पा छिंग राजवंश ता वाइसराय मत्तोर। ओरु ब्रिटिश आक्रमण ता दृढ़ता ते विरोध कित्तोर।
- 4) प्राचीन कालम ते चीन लोप्पा इव मूंड धर्म मत्तांग(कनफ्यूशियसवादी धर्म ताओ धर्म ओसो बौद्ध धर्म, इव 9 विचारशाखांग) कनफ्यूशियस पंथी, ताओ पंथी, इन-यांग विधानवादी, तर्कवादी, मोवादी, राजनीतिक-रणनीतिवादी, सर्वमतसंकलनवादी ओसो कृषिविज्ञानवादी। पेरके "मूंड धर्म ओसो 9 विचारशाखांग" ना व्यापक समझायमूडाता, ओरु विभिन्न धार्मिक सम्प्रदाय

ओसो विद्याध्ययन संबंध्यत म तता सूचक बनेमातांग। पाइना समाज लोप्या इद
पोल्लो ता इस्तेमाल गुप्त व्यवसाय कुना लोप्या मत्ता लोकुरा पोरो वेने लागू
आंता।

पार्टी एकता ता द्वन्द्ववादी तरीका⁵⁹

18 नवम्बर 1957

एकता ता सवाल पोरो नन्ना तरीका ता बारे ते वेहाकान। नावा हिसाब ते माटु हर कामरेड ना पोरो (ओरु बोरे वेने मंदा परितोर), ओरु दुश्मन लेवेके तोड़फोड़ कीयाना तत्व हिल्वेके एकता ता रुझान लागू कीयाना। माटु ओरा पोरो उंदी द्वन्द्ववादी तरीका लागू कीयाना, अधिभौतिकवादी तरीका आयो। द्वन्द्ववादी तरीका बाताल आंदू? हर वस्तु ता विश्लेषण कीयाना, हर मानेय बदे आई गलती जरूर कीतोर, बोनाई ओरु गलतिंग कीतोर अदिनके पूर्ण निषेध कीयानायो। हर मानेय किन सहारा ता जरूरत मंदिता। हर योग्य मानेय किन 3 मानेय ना सहायता कीयाना जरूरत मंता, हर टाड्रा तुन मूंड मेड़ा ना जरूरत मंदिता। पोवोड़ पुंगार बचोन सोबाता मत्तेकाई अदिन तन्ना सोबा बेरसी कियाला काजे ताजा आकी ना जरूरत मंदिता।

इव सब्बे चीन ता हट्टोंग आंदुंगा। ओसो उंदी चीनी हट्टो मंता अदु मुवुर मोचिर कलियसी तन्ना बुद्धि इस्तेमाल कीतेके ओरु वेल्ले प्रतिभाशाली ल्यांग ना लेक्काने बेहरा सफलता दोरकी किया परितोर। ल्यांग वरोर सर्वगुणसम्पन्न मानेय आया परवोर ओना वेने हंदिंग मंतांग। 12 देश कुना मना इद घोषणापत्र तुन हूड़ाटू, माटु इदिना पहली, दूसरी, तीसरी ओसो चौथी ड्राफ्ट तैयार कीतोम अनि इंजे वेने इदिन सुधार ताका मंता। नावा हिसाब ते बोराई पेन लेक्का सर्वगुण ओसो सर्वशक्तिमान मंतोर इंतोर, इत्तेके ओना गलती आंता। माटु गलतिंग कीयाना कामरेड्स ना पोरो बद्रम ता व्यवहार कीयाना? माटु विश्लेषण कीयाना अनि द्वन्द्ववादी तरीका

⁵⁹ कम्युनिस्ट पार्टींग ओसो मजदूर पार्टींग ना प्रतिनिधिरा मास्को मीटिंग लोप्पा भाषण ।

पोयना, अधिभौतिकवादी तरीका पोयनायो। मना पार्टी बस्के ने अधिभौतिकवाद, कठमुल्लावाद ता चिकला ते हिरकसी मत्ता, बोर विचार वायोर ओनकिन पूरा नष्ट कियमूडायनदू। पेरके माटु कठमुल्लावाद ता खंडन कीतोम अनि तीरम-तीरम उचुन-उचुन द्वन्द्ववाद करियतोम। विपरीत तत्व कुना एकता द्वन्द्ववाद ता उंदी बुनियादी तरीका आंदू। इद धारण अनुसार माटु गलतिंग कीयाना कामरेड्स ना संगे बद्रम ता व्यवहार कीयाना? मुन्ने माटु अदिन ओरकिन गलत विचार कुना संगे पूरा मुक्त कियाला काजे संघर्ष ताकी कीयाना। दूसरा माटु ओरो सहायता कीयाना। पहली मुद्दा, संघर्ष कीयाना ओसो दूसरा मुद्दा सहायता कीयाना मंता। माटु गलतिंग दूर कियाला ओरा सहायता कीयाना अस्केने ओरु तन्ना किन सुधरे किया परितोर।

मति दूसरा रकम ता लोकुरा संगे मावा व्यवहार अलग रकम ता मंदिता। त्रात्सकी लेक्कटा ओसो चीन ता छन तू-श्यू चांग क्वो-थाओ, काओ कांग लेक्कटोरा पोरो सहायता ता व्यवहार कीयाना असंभव आता, बारांकु इत्के ओरा इलाज हिल्ला लेक्का आता। हिटलर, च्यांग काई-शेक ओसो जार वेने इद्रम तोरे मत्तोर, ओरकिन खत्म कीयाना जरूरी मत्ता, बारांकु इत्के माटु ओसो ओरु वरोर-दूसरोना पूर्ण बहिष्कार कीतोम। अद्रमासी ओरा स्वरूप ता सिर्फ उंदे पहलू मंता। पेरके अद साम्राज्यवादी व्यवस्था ओसो पूंजीवादी व्यवस्था काजे वेने सही साबित आंता, असल इत्के वीरा जागा अनिवार्य रूप ते समाजवादी व्यवस्थाए एतिंता। अद्रमे इद विचारधारा लोप्पा वेने लागू आंता, आदर्शवाद ता जागा भौतिकवाद एतिंता अनि ईश्वरवाद ता जागा निरीश्वरवाद एतिंता। इगा माटु रणनीतिक उद्देश्य ता पोल्लोंग किया मंतोम। मति कार्यनीतिक मंजिल ता पोल्लोंग अलग मंतांग इव ताकनास्के समझौता किया परितोम। माटु कोरिया ते 38वी विस्तार रेखा पोरो अमेरिका संगे समझौता किताद हिल्ले या? वियतनाम लोप्पा फ्रांस संगे समझौता किताद हिल्ले या?

हर कार्यनीतिक मंजिल ते माटु संघर्ष कियाला निपुण आयना संगे-संगे समझौता कियाला वेने निपुण मंदाना। इंजे माटु कामरेड्स ना नडुमा

ता संबंध कुना पोरो मलसी वायना। नावा हिसाब ते गलत समझेमायना कामरेड्स नडमा वार्ता कीयाना जरूरी मंता। उचुन मुल कम्युनिस्ट पार्टी लोप्पा शामिल आयनोर सब्बे तोर महात्मा बनेमांतोर, ओरा लोप्पा मतभेद लेवेके गलत समझदारी मनो आंता अदिनके कम्युनिस्ट पार्टी ता विश्लेषण कियमूडायो, इत्तेके ताना लोप्पा अखंडता ओसो एकरूपता मंता अदिन काजे वार्ता कीयाना जरूरत हिल्ले इंतोर। पार्टी लोप्पा शामिल आंतोर ओरु सौ प्रतिशत मार्क्सवादी मंदाणा लेक्का मंता। असल ते मार्क्सवादी अलग-अलग रकम तोर मंतोर, ओरा लोप्पा सौ प्रतिशत मार्क्सवादी वेने मंदिंतोर अनि 90 प्रतिशत, 80 प्रतिशत, 70 प्रतिशत, 60 प्रतिशत लेवेके 50 प्रतिशत मार्क्सवादी वेने मंदिंतोर अनि उचुन मुल इत्तेके सिर्फ 10 प्रतिशत लेवेके 20 प्रतिशते मार्क्सवादी मंदिंतोर। मावा लोप्पाटल इरवुर लेवेके उचुन ज्यादा मुल उंदी सुडला कोली ते वार्ता किया परवोर? माटु एकता काजे वरोर दूसरो ना सहायता कीयाना विचार ते वार्ता किया परवोम? बदे डावुट हिल्ला इगा नन्ना कम्युनिस्ट कैडर कुना नडमा आयना वार्ता ता चर्चा किया मंताण, साम्राज्यवादीरा संगे (माटु ओरा संगे वेने वार्ता कीतोम)। नन्ना उंदी उदाहरण हींताना इंजे मना 12 देश कुना नडमा वार्ता आसोर हिल्ले या? 60 तुकू ज्यादा पार्टींग नडमा वेने वार्ता आसोर हिल्ले या? असल ते वार्तांग जरूर आया मंतांग। दूसरा माटा ने मार्क्सवाद-लेनिनवाद ता उसूल कुन नुकसान कियवा लेवा माटु मना काजे सही मत्ता दूसरोरा राय कुन स्वीकार कीतोम अनि मना विडसना लेक्का मत्ता राय कुन विडसिंतोम। इद्रम माटु गलतिंग कीयाना कामरेड्स संगे रेंडु अलग-अलग व्यवहार कीतोम। उंदी बगिल संघर्ष कीतोम अनि दूसरा बगिल ओरा संगे एकता कीतोम। संघर्ष ता उद्देश्य मार्क्सवाद ता उसूल कुना पोरो नितसी मंदाणा, इदिन उसूल कुना पोरो डटेमासी मंदाणा वेने इंतोम; उंदी बगिल संघर्ष कीयाना व्यवहार ओसो दूसरा बगिल माटु ओरो संगे एकता कीतोम। एकता ता उद्देश्य ओरकिन सुधरे मायला मौका हियाना, ओरा संगे सुलह-समझौता कीयाना, इदिने लचीलापन इंतोम।

उसूल ओसो लचीलापन ता एकीकरण उंदी मार्क्सवादी-लेनिनवादी उसूल आंदू इद विपरीत तत्व का एकता आंदू

हर रकम ता दुनिया, बदे डावुट हिल्ला विशेष रूप ते वर्ग-समाज, अंतरविरोध संगे निंडसी मंता। उचुन मुल अंतरविरोध समाजवादी समाज लोप्पा वेने “मंदा” परिंतांग, मति नावा हिसाब ते समस्या तुन इद्रम पेश कीयाना सही हिल्ले। मुद्दा अंतरविरोध तुन परहकना या परहकनायो इंजी आयो असल इत्तेके समाजवादी समाज अंतरविरोध संगे निंडसी मंता। अंतरविरोध हिल्ला मंदाना जागा बदे हिल्ले, अनि विश्लेषण किया परवा लेक्कटा मानेय वेने मनोर आंतोर। ओना विश्लेषण किया परमूडायो इंजी आल्सना उंदी अधिभौतिकवादी विचार आंदू। उंदी परमाणू लोप्पा वेने विपरीत तत्व कुना एकता निज्जमे मंता या हिल्ले इंजी ध्यान हीमुटा। ताना लोप्पा केंद्रबिंदू ओसो इलेक्ट्रॉन रेंडु विपरीत तत्व कुना एकता मंता। उंदी केंद्रबिंदू लोप्पा वेने प्रोटन ओसो न्यूट्रॉन रेंडु ऐन्टीपोटोन मंतांग, अद्रमे न्यूट्रॉन लोप्पा वेने न्यूट्रॉन ओसो ऐन्टीन्यूट्रॉन मंतांग। सक्षिप्त ते हर जागा विपरीत तत्व कुना एकता मंता। विपरीत तत्व कुना एकता ता धारणा, द्वन्द्ववाद ता व्यापक रूप ते प्रचार-प्रसार कीयाना जरूरी मंता। नावा हिसाब ते द्वन्द्ववाद तुन दार्शनिक लोर सुडला हंदी तल बाहार पेसिसी व्यापक जनता नडमा दायना। विभिन्न पार्टिंग ना राजनीतिक ब्यूरोंग ना मीटिंग, ओरा केंद्रीय कमेटिंग ना पूर्ण अधिवेशन, ओरा सब्बे स्तर ता पार्टी-कमेटिंग ना मीटिंग लोप्पा इद सवाल पोरो विचार-विमर्श कीयाना। असल ते मना पार्टी-शाखांग ना सचिव लोर द्वन्द्ववाद तुन समझेमांतोर, बारांकु इत्तेके ओरु पार्टी-शाखा ना मीटिंग काजे रिपोर्ट तैयार कीतोम अस्के मना नोटबुक लोप्पा रेंडु मुद्दांग जरूर रासिंतोम: पहली, सफलतांग ओसो दूसरा कमजोरिंग। उंदी ता रेंडु लोप्पा विभाजित आयना - इद उंदी सार्वभौमिक घटना आंदू, इदे द्वन्द्ववाद आंदू।

सब्बे प्रतिक्रियावादिर कागजी डुव्वल आंदू⁶⁰

18 नवम्बर 1957

च्यांग काई-शेक 1946 ते मना खिलाफ आक्रमणात्मक कार्यवाही शुरू कित्तास्के मना वेल्ले कामरेड्स ओसो पूरा देश ता जनता माटु युद्ध जीडा परितोमे परवोम इंजी परेशान मत्ता। नन्ना खुद वेने परिशान मत्ताना मति माटु उंदी पोल्लो पोरो विश्वास मत्ता। अस्के एन्ना लुईस स्ट्रॉंग पोरोल ता अमेरिकी पत्रकार येनान वात्ता। उंदी इंटरव्यू ते नन्ना ओरकिन वेल्ले सवाल कुना बारे ते वडकतान, अविना लोप्पा च्यांग काई-शेक, हिटलर, जापान, अमेरिका ओसो परमाणू बम लेक्कटवु वेने शामिल मत्तांग। नन्ना शक्तिशाली समझेमायना सब्बे प्रतिक्रियावादीर सिर्फ कागज ता डुव्वल आंदुर इंजी वेने इत्तान। बारांकु इत्तेके ओरु जनता तल अलग-थलग मंतोरा। हिटलर कागज ता डुव्वल आयोरा? हिटलर ना तख्ता पलट कित्ताद हिल्ल या? नन्ना रूस ता जार वरोर कागज ता डुव्वल मत्तोर, चीनी सम्राट वरोर कागज ता डुव्वल मत्तोर, जापान साम्राज्यवाद उंदी कागज ता डुव्वल मत्ता इंजी इत्तान।

और सब्बे तोरा पतन आता इंजी मीटु सब्बे तोर पुत्तादे मंता। अमेरिका साम्राज्यवाद ता इंजे एवनल पतन आताद हिल्ले ओसो अदिनगा परमाणू बम मंता। नन्ना अदु वेने उंदी कागज ता डुव्वल आंदू ओरा वेने पतन आयर इत्तान। च्यांग काई-शेक वेल्ले शक्तिशाली मत्तोर, बारांकु इत्तेके ओनगा 40 लाख तुकू ज्यादा सैनिक वाले नियमित सेना मत्ता। अस्के माटु येनान लोप्पा मत्तोमा येनान ता आबादी बचोन मत्ता?

⁶⁰ कम्युनिस्ट पार्टींग ओसो मजदूर पार्टींग ना प्रतिनिधिरा मास्को मीटिंग लोप्पा भाषण ता अंशा

सात हजार। मनगा बचोन सैनिक लोर मत्तोर? मनगा 9 लाख छापामार सैनिक मत्तोर अनि और सब्बे च्यांग काई-शोक ना दर्जनों आधार-इलाकांग लोप्पा विभाजित किताद मंता। मति माटु च्यांग काई-शोक सिर्फ उंदी कागज ता डुव्वले आंदुर, माटु ओरकिन जरूर हारे कीतोम इंतान। वेल्ले जो अनुभव कुना पोरो आधार आसी माटु दुश्मन खिलाफ संघर्ष काजे इद धारण ता स्थापना किताद मंता: माटु रणनीतिक रूप ते मना सब्बे दुश्मन कुन कमजोर समझेमायना, मति कार्यनीतिक रूप ते ओरा पूरा-पूरा विवरण कोंडा ते तासना। दूसरा माटा ने वेहाना इत्तेके माटु समग्र रूप ते दुश्मन कुन जरूर कमजोर समझेमायना मति हर ठोस सवाल पोरो विचार कीयानास्के पूरा-पूरा विवरण तुन जरूर कोंडा ते तासना। माटु समग्र रूप ते दुश्मन तुन कमजोर समझेमायवेके अवसरवादी गलतिंग कीतोम। मार्क्स ओसो एंगेल्स सिर्फ इरवुर मानेय मत्तोर। ओरू तम्मा कालम ते पूंजीवाद ता तख्ता पूरा दुनिया लोप्पा पलटेमायार इंजी वेहतोर। मति ठोस समस्यांग पोरो ओसो उंदी-उंदी दुश्मन संबंधित समस्यांग पोरो विचार कीयानास्के माटु दुश्मन ता पूरा-पूरा ब्यौरा पोरो कोंडा तासवेके दुस्साहसवादी गलतिंग कीतोम। लड़ाईंग सिर्फ उंदी-उंदी कीसी लड़ेमायमूड़ांता अनि दुश्मन सिर्फ अंश-अंश कीसीए खत्म कियमूड़ांता। कारखाना सिर्फ उंदी-उंदी कीसी बने कीयाना। किसान जमीन तुन सिर्फ उंदी-उंदी नेली कीसी पूहा परितोम। इदे पोल्लो गाटो तिंदनास्के वेने लागू आंता। रणनीतिक रूप ते विचार कीतेके माटु गाटो तिंदाना तुन जरूरी समझेमायोम अनि माटु गाटो जरूर खत्म किया परितोम। मति माटु निज्जमे गाटो तिंदनास्के सिर्फ उंदी-उंदी बुक्काए तिंदा परितोम। उंदे बुक्का ते पूरा गाटो तिंदाना संभव हिल्ले। इद तरीका उंदी-उंदी कीसी हल कीयाना तरीका इंतोम। फौजी साहित्य लोप्पा इद दुश्मन ता सेनांग कुन उंदी-उंदी कीसी तहस-नहस कीयाना तरीका इंतोम।



**SELECTED WORKS OF
MAO Tse Tung
VOL. V**

GONDI
Translation by
JANI

2024

Jangom
press 